



New Testament

Suba Language

Suba - Bible - New Testament

Mathaayo	3	
Mariiko	82	
Luuka	133	
Yowaana	216	
Awatumw	282	
Awaruumi	361	
1 Awakorintho	397	
2 Awakorintho	431	
Awagalatia	452	
Awaefeeso	464	
Awafilipi	476	
Awacolosaii	484	
1 Awathesaloniika	492	
2 Awathesaloniika	499	
1 Awatimtheeo	503	
2 Awatimtheeo	513	
Awatiito	520	
Awafilemoonii	525	
Awaibrania	527	
Awayakoobo	552	
1 Petro	561	
2 Petro	570	
1 Yowaana	576	
2 Yowaana	585	
3 Yowaana	586	
Yuuda	588	
Owusasuko	591	

Suba - Bible - New Testament

Mathaayo

Mathaayo 1

Owuiwulane owua Yesu Kristo

- ¹Gano nigo amang'ana agaajojwa ku owuiwulane owua Yesu Kristo omuizukulu owa Daudi, omuizukulu owa Abraamu:
- ²Abraamu yawanga swawu Isaaka, Isaaka yawanga swawu Yakoobo ori swawu Yuuda ni waamwawu waae awekizia ikumi no omulala.
- ³Yuuda yawanga swawu Pereezi ni Zeera, awaana awa omukazi owaetwanga mbwe Tamaari. Pereezi yawanga swawu Ezrooni, ni Ezrooni yawanga swawu Raamu.
- ⁴Raamu yawanga swawu Aminadaabu, ni Aminadaabu yawanga swawu Nasooni owawanga swawu Salmoon.
- ⁵Salmoon yawanga swawu Boazi. Ng'inwawu Boazi yaetwanga mbwe Raabu. Boazi yawanga swawu Obeedi omwana owa omukazi owaetwanga mbwe Ruth. Obeedi yawanga swawu Yeese,
- ⁶ni Yeese yawanga swawu Omwami Daudi. Daudi yawanga swawu Sulumaani, owa ng'inwae yasooka akwewua ni Uria.
- ⁷Sulumaani yawanga swawu Reoboamu, swawu Abiija. Abiija yawanga swawu Aasa.
- ⁸Aasa yawanga swawu Yeosefaati, ni Yeosefaati yawanga swawu Yoraamu. Yoraamu yawanga swawu Uzia,
- ⁹ni Uzia yawanga swawu Yothaamu. Yothaamu yawanga swawu Aazi, swawu Ezekia.
- ¹⁰Ezekia yawanga swawu Manaase, owawanga swawu Amooni. Amooni yawanga swawu Yosia,
- ¹¹ni Yosia yaiwula Yekonia ni waamwawu waae awekizia mu amiire aga Awaisraeli waawanga mu owusiwe mu ekialo ekia Babulooni.
- ¹²Okuemera Awaisraeli wagie mu owusiwe mu ekialo ekia Babulooni: Yekonia yawa swawu Seltieli, ni Seltieli yawanga swawu Zerubabeeli.

¹³Zerubabeeli yawanga swawu Abiudi, ni Abiudi yawanga swawu Eliakiimu, swawu Azoori.

¹⁴Azoori yawanga swawu Zadooki, Zadooki yawanga swawu Akiimu, ni Akiimu yawanga swawu Eliudi.

¹⁵Eliudi yawanga swawu Eliazaari, owawanga swawu Mathaani. Mathaani yawanga swawu Yakoobo,

¹⁶ni Yakoobo yawanga swawu Yoseefu, iwa Maaria ng'inwawu Yesu oetwa mbwe Kristo.

¹⁷Kutio tuwona mbwe kwatoola amakula agalondokana ikumi ni ine okuamera ku Abraamu kutuuka ku Daudi, amakula ikumi okuamera ku Daudi nawuno Awaisraeli waagia mu owusiwe mu ekialo ekia Babulooni, kandi amakula ikumi okuamera ao kutuuka ku okuiwulwa okwa Kristo.

Okuiwulwa okwa Yesu

¹⁸Okuiwulwa okwa Yesu Kristo kwawa kutino: Kwatuukra ng'inwae Maaria ni yawanga na amiire okukola empurizanio ni Yoseefu mbwe waaza okukwezana. Ni, ni waawanga ni wakiari okuwa owulala ki omukazi no omusaaza, Maaria yatuukrwa na ari ni isaai ku amaani aga Omwoyo Omweru ogwa Katonda!

¹⁹Yoseefu, owaagianga okuwa omusaaza owa Maaria, yawanga omuntu omuigolovu. Lwona ngakaagalanga okufumia Maaria enze asuke emberu wa awantu. Kutio yawisia okumuiyako enkumu arekane nae owuiwisi.

²⁰Ni ni yawanga na akiangirizia okukola otio, enyankoi owa Katonda yamuuzra mu amalooto na agona, amulaga otino, "Yoseefu omuzia owa Daudi, otatia okutoola Maaria awe omukazi waa, aeniki isaai eria ari nario rimuemiire ku Omwoyo Omweru ogwa Katonda.

²¹Maaria aaza okuiwula omwana owekizia, kandi paka omuluke eriina Yesu, aeniki aaza okununula awaawu mu amawi gaawu."

²²Wino wiona wiaikola okutuusia amang'ana aga Omwami Katonda yawoola ni kuwita ku omugambi waa otino:

²³"Omwala omugima aaza okuamba isaai aiwule omwana owekizia. Waaza okumueta eriina Emanueli" — erilagana mbwe, "Katonda ari ni ifwe."

²⁴Olwa Yoseefu yalamuka mu endoolo, yakola kiomo enyankoi yamulaga mala atoola Maaria aira engo, awa omukazi waa.

²⁵Ni kukawa kutio, ngakawa nae owulala ki omukazi no omusaaza nawuno Maaria yaigawula areeta omwana owekizia. Kandi Yoseefu yamuluka eriina Yesu.

Mathaayo 2

Awaganga awa ewufumanyanga waazre oku-aa Yesu owunene

¹Yesu yaiwulwa ku omugizi ogwa Bethleemu mu ekialo ekia Yudeea. Mu amiire ago, Omwami Eroode nio owawanga ku entewe. Nikuemao otino, wario awantu awaaza ku omugizi ogwa Yerusaleemu ni waema mu ewialo ewia ewufumanyanga. Awantu wano waaesanga okusoma eng’eni-ng’eni kandi wamanya ekia zilagana.

²Waawuuzia otino, “Ariai omwana oiwuulwe okuwa omwami owa Awayaudi? Twawona eng’eni-ng’eni elagana okuiwulwa kwae ewufumanyanga, kandi wuno tuuzre okumuifunamira tumu-ee owunene.”

³Olwa Omwami Eroode yawurra eking’ana kino, iye alala na awantu awangi mu omugizi ogwa Yerusaleemu, waawa no okuinyaasia ino mu emioyo giawu.

⁴Yaeta awakangasi awa awoozia alala na awagerezi awa endagirra woona wamuuzako. Yawawuuzia aa Kristo yasugananga aiwulwe.

⁵Waamulaga mbwe, “Bethleemu mu ekialo ekia Yudeea, aeniki kino nikio ekia omugambi owa Katonda omulala yajoja:

⁶“Ni iwue Bethleemu omugizi oguri mu ekialo ekia Yuuda, ngori omutono ino okukira awaami awa Yuuda woona kiomo awangi wamiire okuwa ni wakuwona yaaya; aeniki ni iwue omwami ooza okuaaya awantu wange Awaisraeli aaza okuemako.”

⁷Nikuemao, Eroode yaeta awasomi awa eng’eni-ng’eni waria owuiwisi, awaamulaga enyinga ezia eng’eni-ng’eni eria yafumiramo.

⁸Eroode yawatuma wagie Bethleemu na awalaga otino, “Mugie muagale omwana oyo geeza. Ni, ni mumutuukiire-utuukra otino, munkubre omunwa kugere neena ngie muifunamire mu-ee owunene.”

⁹⁻¹⁰Olwa waamala okuwurra amang’ana aga Omwami Eroode, waafuma okugia emberi no olugendo lwawu. Kandi eng’eni-ng’eni eya waawona ewufumanyanga eria yawafumira kandi. Olwa waagiwona, waawa no owusangaavu ino. Yawakangatra nawuno egia eideng’a aa aiwariire ni aa omwana Yesu yawanga.

¹¹Olwa waaingira mu enyumba, waawona omwana wazane ni ng’inwae Maaria. Woona waaifunama ansi wa-aa omwana Yesu owunene. Nikuemao, waaigula ewia owuwiikro wiawu, wafumiamo empanwa endootu-ndootu ezia igula eriri kungulu kiomo edhaabu, epooda ewunya esaami, alala na amavuta agawunya esaami agaetwa mbwe mane-maane, wa-aa omwana Yesu.

¹²Awantu wano, olwa waagonanga owuire, waasikirrwa mu amalooto mbwe wataaza wairana ku Eroode. Okwo kwagera wairana mu ekialo kiawu, ni walondre engira indi.

Yesu airwa Misiri okumizula olumbe

¹³Olwa waamala okugia, enyankoi yafumira Yoseefu mu amalooto na amulaga otino, “Ema, otoole omwana ono ni ng’inwae orumuke ogie mu ekialo ekia Misiri.

Gia oweere eyo nawuno nkulage, aeniki Eroode aaza okuagarizia omwana ono amuite.”

¹⁴Kutio Yoseefu yaema atoola omwana ni ng'inwae afuma nawo owuire okugia Misiri

¹⁵aa yaweera nawuno Eroode afwa. Kutio amang'ana aga Omwami Katonda yawoola ni kuwitra ku omugambi wae mbwe, “Nyiza okueta omuzia wange aeme Misiri” gaatuuka kuwene.

¹⁶Eroode yagia amanya mbwe awasomi awa eng'eni-ng'eni waria, waalowa okukola okuagala kwae. Okwo kwagera enda yaae yayia ino. Yasikirra mbwe awaana awekizia woona mu omugizi ogwa Bethleemu alala ne ewitemo ewiri ampi, awa emiaka iwiri ni kuika ansi, nikulondokana ne enyinga ezia awantu awo waumulaga, waitwe!

¹⁷Kuno kwatusia amang'ana aga Omugambi Yeremia yawoola mbwe:

¹⁸“Omwoyo guwurrwa Raama. Ee okurra ne enkweri enyingi. Raeli arra awaana wae kandi alowere okuoreziwua. Aeniki awaana wae wafwire wawuere.”

Yesu airaniziwua Nazareeti

¹⁹Ne Eroode yamala okufwa, enyankoi owa Katonda yafumira Yoseefu mu amalooto, na ari Misiri.

²⁰Yumulaga otino, “Ema, otoole omwana ni ng'inwae oirane mu ekialo ekia Israeli. Aeniki awaagalanga okuona owulamu owua omwana wafwire wawuere.”

²¹Kutio Yoseefu yaema atoola omwana oyo ni ng'inwae airana mu ekialo ekia Israeli.

²²No olwa yawurra mbwe Akelao yawanga ku entewe eya Eroode swae, yatia okugia eyo. Yagia ale mu ekitemo ekia Galiili, kiomo yasiagiziwua mu amalooto mbwe yasugananga akole.

²³Yagia amenya mu omugizi oguetwa mbwe Nazareeti. Kandi okwo kwatusia amang'ana agaawoolwa na awagambi owa Katonda ku Kristo mbwe: “Arietwa Omunazareeti.”

Mathaayo 3

Yowaana Omubatiisi alonga engira

(Mari 1:1–8; Luuk 3:1–18; Yowa 1:19–28)

¹Ne emiaka emiera giamala okuwita, Yowaana Omubatiisi yatanika okulanzia mu ekeewa eya Yudeea

²na awoola otino, “Mugaluke mureke amawi, aeniki Owuami owua ku igulu wuri ampi.”

³Yowaana ono nio owa Omugambi Isaaya yagamba-gambako olwa yawoola otino, “Omwoyo ogwa omuntu oetana mu ekeewa mbwe, ‘Mulongre Omwami engira, mumugololre engira ewe enyigolovu.’”

⁴Yowaana yawanga na aiwoya enguwo ezia owuwiri owua engamia, kandi yasiwanga omukanda ogwa iseero mu ensinzi yaae. Okuria kwae kwawanga amadeede no owuuki owua mu isaka.

⁵Awantu waaema Yerusaleemu, Yudeea, alala ne ewitemo ewiri ampi no oluuzi olwa Yordaani wiona ni wamugiako.

⁶Waawoola amawi gaawu owuyanga, nikwo Yowaana yawabatiisa mu oluuzi olwa Yordaani.

⁷No olwa Yowaana yawona Awafarisaayo na Awasadukaayo ni wamuuzako aa yabatisanga, yawalaga otino, “Inywe awaana awa enzoka wano! Owasiagiizie mbwe mumizule okuswawukwa no okusu okungi okuuzanaanu?”

⁸Muamie ensaafu ezia mu enkola, ezilagana geeza mbwe omuntu agaluuke arekere amawi.

⁹Ni mutaaza mwaingirizia mbwe muuza mwamizuka ku okuwoola-uwoola mbwe, ‘Turi geeza aeniki turi awaana awa Abraamu.’ Mbalaga mbwe Katonda aesa okugalusia amawaale gano gawe awaana awa Abraamu!

¹⁰Namba nyingeeno, embasa emiire okuteewua ku isina eria omuti; kandi omuti ki omuti oguta-amia ensaafu endootu guuza okutemwao nikwo gurigizwe mu omurro.

¹¹“Inze mbabatiisa na amanzi, kiomo ekilago mbwe omuntu agaluuke arekere amawi. Na ario omuntu ooza enyima wange, ori omukaate okunkira, owa inze ng’asugre namba okuginga ewiraato wiae. Iye aaza okubatiisa awantu no Omwoyo Omweru ogwa Katonda kandi no omurro.

¹²Ari ne ekiseeso kiae mu amakono, ekia aaza okuseesra amaemba mu olwanyilwae. Emere aaza okuta mu ekiagi, na amakunzo aaza okusamba no omurro ogutazima.”

Yesu abatiisrwe na amanzi kandi no Omwoyo Omweru

(Mari 1:9–11; Luuk 3:21–22)

¹³Nikuemao, Yesu yaema Galiili agia Yordaani okubatiiswa ni Yowaana.

¹⁴Ni Yowaana yageezaania okumugaania na awoola otino, “Ni iwue osugaane ombatiise inze. Kuwa kutie mbwe onyizako mbwe nkubatiise?”

¹⁵Yesu yamuirania otino, “Reka kuwe kutio nyingeeno, aeniki paka tutuusie okuagala okwa Katonda mu engira ziona.” Nikuemao Yowaana yaganya amubatiisa.

¹⁶Ni Yesu yamala okubatiiswa otino, yafuma mu amanzi kandi ku enyinga ezio, igulu riaiguka kandi yawona Omwoyo Omweru ogwa Katonda na aika mu embonekano eya iemba-emba nawuno amugwirrako.

¹⁷Kandi omwoyo gwaema ku igulu ogwawoola otino, “Ono no Omuzia wange owa ngonziizie kandi owa nsangaarre nae.”

Mathaayo 4

Yesu ageezaaniwua ne Ekikeeno

(Mari 1:12–13; Luuk 4:1–13)

¹Nikuemao, Omwoyo Omweru ogwa Katonda yaira Yesu mu ekeewa okugia okugeezaniwua ne Ekikeeno.

²Yasiwa okuria aa ataria ku amiire amakumi ane, owuire no omwasu, kandi enzala katio yamurianga.

³Ekikeeno kiamuuzako kandi kimulaga otino, “No ori Omuzia owa Katonda, laga amawaale gano gagaluke gawe okuria.”

⁴Yesu yakiirania otino, “Kujojrwe mu endagano mbwe: ‘Okuria kweng’ene ngakugera no omuntu awa omulamu, ni na amang’ana goona aga Katonda awoola.’”

⁵Nikuemao Ekikeeno kiamuira ku omugizi omweru ogwa Yerusaleemu, kimuemerezia asi aliire okukira ku enzizi eya ekaalu.

⁶Kiamulaga mbwe, “No ori Omuzia owa Katonda, guluka ansi, aeniki kujojerwe mu endagano mbwe: ‘Katonda aaza okusikirra enyankoi waae wakurinde, kandi waaza okukuginga kungulu kugere otaguunya okugulu ku iwaale.’”

⁷Yesu yakiirania otino, “Lwona kujojerwe mu endagano mbwe: ‘Otageezaania Omwami Katonda waao.’”

⁸Nikuemao, Ekikeeno kaira Yesu ku ekigiri ekiliire ino, kimulaga ewialo ewia owuami wiona ewiri ku ekialo alala no owunyazi owurimo.

⁹Kialaga Yesu mbwe, “Nyiza okuku-aa wino wiona, no onyifunamiire kandi ompe owunene.”

¹⁰Yesu yakiirania otino, “Gia ale ni inze Sataani! Aeniki kujojerwe mu endagano mbwe: ‘Ifunamira kandi o-ee Omwami Katonda waao eng’ene owunene, kandi iye eng’ene nio osugaane okorre.’”

¹¹Nikuemao Ekikeeno kiamureka, kandi enyankoi waaza wamutunzia.

Yesu atanika emirimo egia okulanzia amang’ana amalootu

(Mari 1:14–15; Luuk 4:14–15)

¹²Olwa Yesu yawurra mbwe Yowaana Omubatiisi aingiziiwue mu owusiwe, yairana Galiili.

¹³Ngakamenya Nazareeti, ni yagia amenya Kapernaumu, omugizi ogwawanga ku ensanyaata eya omwalo, mu ewialo ewia Zebuluuni ni Naftaali.

¹⁴Okukola otio kwatuusia amang’ana aga Katonda yawoola ni kuwitra ku Omugambi Isaaya mbwe:

¹⁵“Ekialo ekia Zebuluuni alala ne ekia Naftaali, ewialo ewiri ku engira ewariire ku enyanza, elonda oluuzi olwa Yordaani, Galiili ekialo ekia awantu awatari Awayaudi —

¹⁶awantu awamenyere mu ekierema wawuine owueru owukaate; ee owueru wufumiire awantu awamenyere mu ekialo ekia ekiiruuzia ekia olumbe kisanikiire.”

¹⁷Okuemera ao, Yesu yatanika okulanzia amang’ana aga Katonda na awoola otino, “Mugaluke mureke amawi, aeniki Owuami owua ku igulu wuri ampi.”

Yesu aetre awalonzi waae awa kuluweri

(Mari 1:16–20)

¹⁸Ni Yesu yagenda-gendanga ku ensanyaata eya omwalo ogwa Galiili, yawona awantu wawiri awaawanga awazia awa omuntu omulala, ni watega engoe ziawu mu enyanza, aeniki waawanga awavuwi. Omulala ku iwo yawanga Petro, no owundi yawanga Andereeya.

¹⁹Yesu yawaeta na awalaga otino, “Muuze mundonde, ni nyiza okuwagerera okuvuwa awantu ni mundeetako.”

²⁰Waafuma wuangu-wuangu wareka engoe ziawu walonda Yesu.

²¹Yagia emberi wutono, kandi awona Yakoobo ni Yowaana, wona awazia awa omuntu owaetwanga Zebeedi. Awazia wano waawanga mu owuato ni Zebeedi swawu, ni waganzulula engoe ziawu okugia okutega. Yesu yawaeta,

²²kandi ao-ao, waareka owuato wuawu ni swawu Zebeedi, wamulonda.

Yesu alamiizie awalwire wangi

²³Yesu yagenda-genda mu ekialo ekia Galiili kiona, na agerera mu amasinagoogi gaawu, na alanzia amang’ana amalootu aga Owuami owua Katonda, kandi na alamia awantu ku amalwire goona.

²⁴Amang’ana gaae gailanzia mu ekialo ekia Siiria kiona. Yareeterwa awantu awaalwalanga amalwire agagawukane-gawukaane, awandi awaawurranga owululu owungi, awaawanga ne ewikeeno, awaagwanga emvuwu alala na awa emiwiri giakwa eng’anzi kandi Yesu yawalamia wona.

²⁵Awantu awangi ino waaema Galiili, ni Dekapooli, Yerusaleemu, Yudeea alala ne ewitemo ewiri engereka indi eya oluuzi olwa Yordaani, wagia wamulonda.

Mathaayo 5

Awasereekwe na awatasereekwe

(Luuk 6:20–23)

- ¹Olwa Yesu yawona omurima ogwa awantu awangi ogwo, yaniina ku ekigiri agia aikala ansi. Awalonzi waae woona waamugiako,
- ²kandi yatanika okuwagerera na awalaga otino,
- ³“Awasereekwe na awantu awamanyire mbwe awatakiye ensereki ezia mu omwoyo, aeniki Owuami owua ku igulu wuri owuawu.
- ⁴Awasereekwe na awantu awarra, aeniki Katonda aaza okuwaoreezia.
- ⁵Awasereekwe na awantu awaolu, aeniki Katonda aaza okuwa-aa ekialo kiomo yaifuuwa.
- ⁶Awasereekwe na awantu awari ne enzala no owulwo owua okukola okuagala okwa Katonda, aeniki waaza okuigusiwua.
- ⁷Awasereekwe na awantu awa amasaasra, aeniki waaza okusaasrwa.
- ⁸Awasereekwe na awantu aweeru mu emioyo giawu, aeniki waaza okuwona Katonda.
- ⁹Awasereekwe na awantu awareeta empurizanio endootu agati ya awantu, aeniki waaza okuetwa awaana awa Katonda.
- ¹⁰Awasereekwe na awantu awakorrwa uwiiwi ku okukola ewintu ewia Katonda aagala, aeniki Owuami owua ku igulu no owuawu.
- ¹¹“Musereekwe inywe na awantu wawanyega, ni wawakorra uwiiwi, kandi ni wawawoolako ewintu ewiwiiwi wiona ku olugonzi olwa mungonziizie nalwo.
- ¹²Musangaale kandi muomererwe, aeniki omugawo ogwa muwikiirwe ku igulu guri omukaate. Mu engira efwanani, waakorra uwiiwi awagambi awaawaaao, inywe ni mukiari.

Omuunyu no owueru

(Mari 9:50; 4:21; Luuk 14:34–35; 8:16)

- ¹³“Mu ekialo kino, inywe muri kiomo omuunyu mu okuria. No omuunyu ni guteesiizie enzaziima yagwo, gwona gukairana gwawa omulungi kandi? Yaaya, omuunyu ogumiire okuteesia enzaziima, guwula ne emirimo. Ekisigaale mala no okufukwa enze, awantu wagutaze-taze na amagulu.
- ¹⁴“Mu ekialo kino, inywe muri kiomo owueru owumurika mu ekierema. Omugizi oguri ku ekigiri ngaguesa okuiwisa, yaaya.
- ¹⁵Lwona awantu ngawaesa okuambia ekimuri kandi wakifunikira ne ekidida. Ni aa okukola otio, wakita aa ekiesa okumurikra awantu awari mu enyumba woona.

¹⁶Mu engira endala eyo, owueru owua mugenda-gendamo wusugaane wuwonekanre awantu woona, ni wawona enkola ziinyu endootu kugere watondowole Soinyu ori ku igulu.

Yesu aazre okutuusia ensikirra eya Muusa na amang’ana aga awagambi

¹⁷“Mutaingirizia mbwe nyizre okuona amang’ana aga Muusa yajoja nakuwa amang’ana aga Awagambi. Ni nyizre okugatuusia.

¹⁸Mbalaga kuwuene mbwe nawuno ekialo ni igulu witeeke, ewulao-uwula enyukuta namba itone eriiza okutoolwao ku amang’ana aga Muusa yajoja, nawuno wiona wituuke kuwuene.

¹⁹Omuntu-umuntu otambuka namba ensikirra entono okukira ziona kandi agerera awandi okukola owufwanani, iye aaza okuwa omutono okukira woona mu Owuami owua ku igulu. No omuntu okola ewia ensikirra eagala kandi agerera awandi ensikirra, iye aaza okuwa omunene mu Owuami owua ku igulu.

²⁰Ee, mbalaga mbwe owuigolovu wuinyu ni wutakirre owua Awafarisaayo na awagerezi awa endagirra, ni kuwuene mbwe ngamuri-ingira mu Owuami owua ku igulu.

Yesu aganiizie owuisi no okuwa no okusu

²¹“Mwamiire okuwurra aga waaguukwa wiifu waalagwa kale mbwe, ‘Otaita omuntu,kandi omuntu-umuntu oitre owundi aaza okukengerwa ekiina ekia olumbe.’

²²Ni inze mbalaga mbwe omuntu-umuntu oweere no okusu no omwina waae aaza okukengerwa ekiina ekia olumbe. Kandi omuntu-umuntu onyegere omwina waae na amulaga mbwe, ‘Iwue owula ne emirimo!’ aaza okukengerwa ekiina no oluwuga olwa awagaaka. No omuntu onyegere omwina waae na amulaga mbwe, ‘Iwue omumaya ono!’ iye asugre no okuirwa mu omurro.

²³“Kutio no ogiire okufumia omusango gwao ku isiga eria omusango, ni no okiari oingirizie mbwe ario omwina waaori ni ing’ana ni iwue,

²⁴reka-ureka omusango gwao ao, osooke ogie olonge empurizanio nae. No omiire okukola otio, katio irana ofumizie Katonda omusango gwao.

²⁵“Mala amang’ana wuangu-wuangu no omuzigu waaori oagala okukuirra mu ekiina. Kola otio no okiari nae ku engira aeniki, wusa-wusa, aaza yakuirra emberu wa omukengi owa ewiina, akute mu amakono aga omusikare, kandi oingiziwue mu owusiwe.

²⁶Nkulaga kuwuene mbwe ngooza okufuma mu owusiwe, nawuno o-oloole omusango ogwo gwona, aa namba eela neeza okusigala.

Owusondo wuganiziwue

²⁷“Mwamiire okuwurra mbwe kwawoolwa mbwe, ‘Otasooda omukazi nakuwa omusaaza owa owundi.’

²⁸Ni inze mbalaga mbwe omuntu-umuntu owariire omuntu owekikazi kandi yamuagala mu omwoyo gwae, iye amiire okukola owusondo.

²⁹Ne eriiso riao rigera no oingira mu owuoni, ritooleo ororigize ale. Kulootu okuteesia ekiimo ekilala ekia omuwiri gwao okukira omuwiri gwao gwona okurigizwa mu omurro.

³⁰Kandi no okukono kwao okusaaza kugera no oingira mu owuoni, kukenge kuemeo okurigize ale. Kulootu ku iwue okuteesia ekiimo ekilala ekia omuwiri gwao okukira omuwiri gwao gwona okurigizwa mu omurro.

Okurumusia omukazi kuganiziiwue

(Mari 10:11–12; Luuk 16:18)

³¹“Kwawoolwa mbwe, ‘Omuntu-umuntu osomoosie omukazi waae paka amu-ee itu eria okurekana.’

³²Ni inze mbalaga mbwe omuntu-umuntu osomoosie-usomosia mukaae, ku ing’ana-ung’ana erigawuuke no owusoodani, agera omukazi oyo na awa omusoodani. Omuntu-umuntu okwere omukazi orekere iwuae oyo, yona awa omusoodani.

Okuifuuwa kuganiziiwue

³³“Lwona, mwamiire okuwurra mbwe waaguukwa wiifu waalagwa kale otino, ‘Otareka okutuusia okuifuuwa kwao kandi kola ewintu wiona ewia oifuwiire Katonda.’

³⁴Ni inze mbalaga mbwe otaaza waifuuwa yaaya ne eriina eria igulu, aeniki nirio entewe eya owuami eya Katonda;

³⁵nakuwa ne eriina eria ekialo, aeniki nikio ekisigikro ekia amagulu gaae; namba ne eriina eria Yerusaleemu, aeniki nigwo omugizi ogwa Omwami Omunene.

³⁶Kandi otaaza waifuuwa no oeta omutwe gwao, aeniki iwue owula na amaani aga okugalusia oluwiri lwao luwe olweru namba olumwamu, yaaya.

³⁷Iwue no owoorre mbwe, ‘Ee,’ reka riwe-uwa ‘Ee’ otio. Ni no owoorre mbwe, ‘Yaaya,’ reka riwe-uwa ‘Yaaya’ otio. No otereero agandi agakirre ao, ago gaema ku omwoni Ekikeeno.

Okuoloola owuoni ku owuoni kuganiziiwue

(Luuk 6:27–36)

³⁸“Mwamiire okuwurra mbwe kwawoolwa mbwe, ‘Eriiso ku eriiso kandi eriino ku eriino.’

³⁹Kukawa kutio, inze mbalaga mbwe otaaza walwania omuntu omuwiiwi, yaaya. Na akukubre oluyu oluwega olulala, mugalusizie oluwega lundi lwona akube.

⁴⁰Kandi no omuntu agala okukuingirra kugere atoole esaati yaa, mu-ee ni ikooti riona.

⁴¹No omuntu akunigirizia mbwe omugingre omusigo ku emaeli endala, nganya ogie nae emaeli iwiri.

⁴²No omuntu akusawire ekintu, mu-ee kandi otamuima okuemeko amakono amasa.

Gonzia awiiko na awazigu owufwanani

⁴³“Mwamiire okuwurra mbwe kwawoolwa mbwe, ‘Gonzia awiiko waa, ni rega awazigu waa.’

⁴⁴Ni inze mbalaga otino: Mugonzie awazigu wiinyu kandi musawire awawaingizia mu emidambo.

⁴⁵Okwo kuuza okugera muwe awaana awa Soinyu ori ku igulu. Iye agera ne eriuwa riae rifumira awawi na awalootu, kandi atuma emvula yaa ekubre awigolovu na awantu awatari awigolovu owufwanani.

⁴⁶Iwue no ogonziizie mala awakugonziizie weng’ene, ao otio ekia okaserekrwa niki? Namba awasolozzi awa omusolo wona wakola watio?

⁴⁷Kandi iwue no okeezia mala awiiko waa weng’ene, ao ekia okola ekia awandi watakola niki? Namba awatamanyire Katonda wona wakola watio.

⁴⁸Kutio muwe awatuufu awawulako embala, ki Soinyu owa ku igulu.”

Mathaayo 6

Owu-aani ku awataka

¹Yesu yagia emberu na alaga omurima ogwo otino, “Muwarre geeza muwone mbwe ngamukola enkola ezilagana owigolovu wuinyu mala emberu wa awantu, ni muagala mbwe wawawone. Ni mukorre mutio, muwula no omugawo oguema ku Soinyu ori ku igulu.

²“Kutio no oesana ekintu ku omutaka, otaaza walanzia no olwiga awantu wawurre, kiomo awantu awaisemerezia wakola mu amasinagoogi ni mu engira, kugere awantu wawa-ee owuti. Mbalaga kuwene mbwe iwo wamiire okutuukra omugawo gwawu gwona.

³Ni iwue no oesana ekintu ku omutaka, otareka okukono kwao okumosi kwamanya ekia okukono okusaaza kuesana.

⁴Kutio okuesana kwao kuuza okuwa owuiwisi kandi Soinyu owona ewikolwa owuiwisi aaza okuku-aa omugawo.

Yesu agereere ku okusawa Katonda

(Luuk 11:1–13)

⁵“Ne enyinga ezia osawa, otaaza wakola ekia awantu awaisemerezia wakola. Iwo wagonziizie okusawa ni waideng’ere mu amasinagoogi ni mu amasangangira agari mu emigizi kugere wawonwe na awantu awawita. Mbalaga kuwuene mbwe iwo wamiire okutuukra omugawo gwawu gwona, aa kiwulao ekiwasigariire.

⁶Ni iwue no oogala okusawa Katonda, ingira mu akayumba kaa aka muni, oigale ekiriango nikwo osawe Swao otawonwa na amiiso.

⁷Kandi mu okusawa kwao, otaaza waawao no owoola-woola amang’ana amangi agatawurikana kiomo awantu awatamanyire Katonda. Iwo waingirizia mbwe waaza okuwurrwa aeniki wawoola amang’ana amangi, ni wasawa.

⁸Mutaaza mwawa ki iwo, aeniki inywe Soinyu amanyire ewia muagala namba ni mukiari okumusawa.

⁹“Ni ntino musugaane musawe Katonda: “ ‘Soifu ori ku igulu, eriina riao rieewue owuti,

¹⁰owuami wuao wuuze, okuagala kwao kuikole ku ekialo, kiomo kuikola ku igulu.

¹¹Otu-ee reero okuria kwifu okwa owuire ki owuire.

¹²Oturekere amawi giifu, kiomo twona turekera awatukorra uwiiwi.

¹³Otareka tuingire mu okugeezaniwua, ni otununule mu amakono aga Omuwi. Aeniki, owuami na amaani no owunene no owuao amiire goona. Amin.’

¹⁴Aeniki ni murekeere awandi amawi gaawu, Soinyu ori ku igulu yona aaza okuwarekera amawi giinyu.

¹⁵Ni, ni mutarekeere awandi amawi gaawu, Soinyu yona ngaaza okuwarekera amawi giinyu.

Engerera ku okusiwa okuria

¹⁶“Enyinga ezia musiwa aa mutaria, mutaaza mwawonekana awawula no owusangaavu kiomo awantu awaisemerezia wakola. Iwo wakunyaazia ewieni ni wagala mbwe awantu wamanye mbwe wari mu okusiwa. Mbalaga kuwuene mbwe awantu awo wamiire okutuukra omugawo gwawu gwona, aa kiwulao ekiwasigariire.

¹⁷Ni inywe enyinga ezia musiwre okuria aa mutaria, muiwake amavuta ku omutwe kandi muozie ewieni wiinyu,

¹⁸kutaaza kwamanyikra awantu mbwe muri mu okusiwa, ni Soinyu eng’ene, owona ewitawonwa na awantu, awe mbwe nio omanyire. Ni mukorre mutio, Soinyu owona ewintu ewikolwa owuiwisi aaza okuwa-aa omugawo.

Owuwiiko owuri ku igulu

(Luuk 12:33–34; 11:34–36; 16:13)

¹⁹“Mutata owuwiiko wuinyu ku ekialo aa wionwa ne emungu ne ekuuti, kandi aa awiwi waesa okuingirao wawaiwira.

²⁰Ni inywe mute owuwiiko wuinyu ku igulu, aa ngawiesa okuonwa ne emungu ne ekuuti, kandi aa awiwi ngawaesa okuingirao na amaani, wawasakula.

²¹Ni kutio aeniki, aa owuwiiko wuao wuri nio aa omwoyo gwao guuza okuweera.

²²“Eriiso nirio ekimuri ekia omuwiri, aa na amiiso gao gari amalootu omuwiri gwao gwona guuza okuizula du no owueru.

²³Ni na amiiso gao mawiiwi omuwiri gwao gwona guuza okuizula du ne ekierema. Kutio ni kuri mbwe owueru owukurimo wuri ekierema ekisa, ao otio ekierema ekio kimwamu ti-ti ti!

²⁴“Awulao oesa okukorra awaami wawiri geeza, wona. Aaza okugonzia omulala, no owundi arege; namba ate omwoyo gwae ku omulala, no owundi atoole owutono. Ngamuesa okukorra Katonda, kandi mwakorra amasendi, yawa.

Mutawa no okuinyaasia mu emioyo giinyu

(Luuk 12:22–31)

²⁵“Kutio mbalaga mbwe emioyo giinyu gitainyaasizia owulamu wuinyu, ku ekia muuza okuria, namba ewia muuza okunywa, nakuwa ku emiwiri giinyu, ku ewia muuza okuiwoya. Kane owulamu ngawukirre okuria-ukuria, kandi omuwiri ngagukirre enguwo-unguwo?

²⁶Muwarreko enyonyi; ngazikomera, ngazigesia lwona ngaziwiika ewiokuria mu ewiagi. Ni kukawa kutio, Soinyu ori ku igulu aziriisia. Mureke mbawuuzieko: Katonda ngawatoorre owuzito okukira enyonyi?

²⁷Arioko ku inywe, omuntu oesa okusonga namba enyinga endala eng'ene mu owulamu wuae, ku okuinyaasia kwae mu omwoyo?

²⁸“Kusi ekigera no omwoyo gwao guinyaasizia mala enguwo-unguwo niki? Ingiriziako kiomo isuwi rikoma eriene mu isaka. Ngarikola emirimo, lwona ngarinawa.

²⁹Ni kukawa kutio, mbalaga kuwuene mbwe namba Sulumaani, mu owunyazi wuae wuona, ngakaingiziako geeza okukira isuwi rino.

³⁰Ni kuri mbwe nintio Katonda aingizia isuwi erikoma eriene mu isaka, eriwaao reero, ni enkio ritoolwa riarigizwa mu omurro, ngaaza okuwaingizia geeza owukirre? Oo inywe awantu awawula no okuganya wano!

³¹“Kutio mutaaza mwawa no okuinyaasia mu emioyo giinyu, ni muiwuuzia mbwe, ‘Tunaariaki?’ nakuwa mbwe, ‘Tunaanywaki?’ namba mbwe, ‘Tunaingiziaki?’

³²Aeniki awantu awatamanyire Katonda niwo awarumukra ewintu ewifwana ewio. Inywe Soinyu amanyire mbwe muwiagala.

³³Ni musooke muagale Owuami owua Katonda, no owuigolovu wuawuo wuona, nikwo muuza okusongwa ewintu wino wiona.

³⁴Kutio mutaaza mwainyaasizia owuire owua enkio, aeniki enkio wuuza okui-nyaasizia owuene. Owuire ki owuire wuri ne emidambo egiwusugre.

Mathaayo 7

Okukengera awandi ekiina kuganiziiwue

(Luuk 6:37–42)

¹Otakengera owundi ekiina, kugere iwue oona otakengerwa ekiina.

²Aeniki mala kiomo okengera awandi ekiina, oona ooza okukengerwa ekiina, Kandi omurengo ogwa orenga nagwo nigwo oona ooza okurengerwamo.

³Iwue niki ekigera no owarra akaatu akatono akari mu eriiso eria omwina waa, no oguntu ogunene oguri mu eriiso riao omwene, ngagukunyaasia?

⁴Oesa otie okulaga omuda waa mbwe, 'Reka nkutoorro akaatu akatono akari mu eriiso riao rino,' no oguntu ogunene guri mu eriiso riao?

⁵Iwue omuntu oisemerezia ono, sooka otooleo oguntu ogunene mu eriiso riao, nikwo owone geeza kandi oese okutoolao akaatu akatono mu eriiso ria omwina waa.

⁶Mutaaza mwa-aa embwa ewintu ewitengeekrwe Katonda, lwona mutarigizra enguruwe amawaale aga iguzi eria kungulu, aeniki ziiza ziaagataza-taza, nikuemao ziwagalukre ziwatandule owutono-tono.

Sawa, aagala kandi kong'oota ekiriango

(Luuk 11:9–13)

⁷Sawa, no ooza okueewua; aagala, kugere otuukre; kong'oota ekiriango, ni ooza okuigurrwao.

⁸Aeniki omuntu ki omuntu osawire aeewua; oagala atuukra; kandi okukong'oota, aaza okuigurrwao ekiriango.

⁹Naanu ku inywe oesa oku-aa omuzia waa iwaale, na amusawire omukaati?

¹⁰Namba oesa ya-aa omuzia waa enzoka, na amusawire emvwa?

¹¹Ni kuri mbwe kukawa mbwe muri awooni, ni mumanyire oku-aa awaana wiinyu empanwa endootu, katio Soinyu ori ku igulu iye aaza oku-aa awantu awamusawa, empanwa endootu eziagana zitie!

¹²Kandi korra awandi ewia okaagala mbwe woona wakukorre, aeniki eno nio entuuko eya amang'ana aga Muusa yajoja na amang'ana aga Awagambi.

Ekikulo ekinyigu ne ekiyaagu

(Luuk 13:24)

13“Ingirra ekikulo ekinyigu. Ekikulo ekiiyaagu ne engira enyiiyaagu ne eziira awantu mu olumbe, kandi awantu awangi wazi-ingirra.

14Ne ekikulo ekinyigu ne engira enyigu nizio eziira awantu mu owulamu, kandi awatono niwo awazituukra wazilonda.

Omuti gumanywa ne ensaafu ziangwo

(Luuk 6:43–45)

15“Muwe amankaga ku awagambi awa owuweeyi, awaaza okuwaazako ni waingiizie enguwo ezia owuwiri owua amagondi, ni munsu wari mala ensisi eziita.

16Muuzza okuwamanya ne enkola ziauwu. Kusi awantu waesa okunoga emizabiibu okuema ku emiti agia amawua, namba emikuyu okuema ku eminyenya?

17Mu engira efwanani, omuti omulootu nigwo oguamia ensaafu endootu, no omuti omuwiiwi guamia ensaafu embiiwi.

18Omuti omulootu ngaguesa okuamia ensaafu embiiwi, kandi omuti omuwiiwi ngaguesa okuamia ensaafu endootu.

19Omuti-umuti oguta-amia ensaafu endootu, guuza okutemwao kandi gurigizwe mu omurro.

20Nintio muuzza okuwamanya ni muwona ensaafu ziauwu.

21“Ng’ana awantu wona awanyeta mbwe, ‘Omwami, Omwami,’ waaza okuingira mu Owuami owua ku igulu yaaya, ni mala awakola okuagala okwa Soifu ori ku igulu weng’ene.

22Awantu awangi warindaga owuire owua Katonda arikengra awantu ekiina mbwe, ‘Omwami, Omwami, kane ngatwafumia owugambi ne eriina riao? Ngatwafumia ewikeeno ku eriina riao, kandi tukola amankono amangi ku eriina riao?’

23Ni inze ndiriwalaga owuyanga otino, ‘Ng’anyakawamanya namba wutono. Mugie ale ni inze, inywe awooni wano!’

Omuomboki omumaya no omuomboki omuganga

(Luuk 6:47–49)

24“Kutio omuntu-umuntu owurra amang’ana gano kandi yakola nago, iye afwanana no omuomboki omuganga owaomboka enyumba yaae ku olutare.

25Emvula yaaza, emigera giika, kandi emiyaga giwuuta enyumba eyo. Kukawa kutio, enyumba ngekagwa ansi, aeniki yawanga no owulusa owukalangufu owua-aawua ku olutare.

26No omuntu-umuntu owurra amang’ana gange gano, ni yareka okukola nago, iye afwanana no omuomboki omumaya owaomboka enyumba yaae ku omusenye.

²⁷Emvula yaaza, emigera giika, kandi emiyaga giwuuta enyumba eyo. Nikuemao, enyumba yagemuka egwa ansi boo!”

Yesu yagereranga ki omuntu ori na amaani

(Mari 1:22; Luuk 4:32)

²⁸Olwa Yesu yamala okuwoola amang’ana gano, omurima omukaate ogwa awantu waaluguula engerera yaae ino,

²⁹aeniki yagereranga geeza kandi na amaani, ni ng’ani ki awagerezi awa endagirra.

Mathaayo 8

Yesu alamiizie omuntu owa owugenge

(Mari 1:40–45; Luuk 5:12–16)

¹Olwa Yesu yaika ansi na aema ku ekigiri, omurima omukaate ogwa awantu gwamulonda.

²Omuntu owa owugenge yaaza akuba amasigamo ansi emberi waae kandi amulaga otino, “Omwami, nkusawa mbwe no oganyire, oesa okunyeruyia mbe omweru.”

³Yesu yagolola okukono kwae amuamba, nikuemao amulaga otino, “Ee, nganyire. Wa omulamu!” Ao-ao omuntu oyo yalamiwua mu owugenge wuae.

⁴Nikuemao Yesu yamulaga otino, “Otaaza walaga omuntu ekia nkukoriire kino, ni gia oilagane ku omuoza kandi ofumie omusango ogwa Muusa yasikirra awantu awalamre ku owugenge, kiwe ekilago ku awantu woona mbwe olamre.”

Okuganya okwa omukangasi owa awa-iiye owa Awaruumi

(Luuk 7:1–10)

⁵Olwa Yesu yaingira-uingira ku omugizi ogwa Kapernaumu otino, omukangasi owa awa-iiye owa Awaruumi, yamugiako okumusawa owuitunzi.

⁶Yamulaga otino, “Omwami, omukurumu wange ari ansi omuwiri gwae gufwire eng’anzi, kandi awurra owululu owuluguulwa.”

⁷Yesu yamulaga otino, “Nyiza okugia mulamie.”

⁸Omukangasi owa awa-iiye owa Awaruumi oyo, yamuirania otino, “Omwami, ng’ansugre iwue okuingira mu enyumba yange. Ni woola-uwoola ing’ana, kandi omukurumu wange aaza okulama.

⁹Inze omwene ndi omuntu ori ansi eya awandi, ni noona ndi na awa-iiye awakola ansi yange. Ni ndagre omulala mbwe, ‘Gia,’ agia kandi owundi mbwe ‘Iza ano,’ aaza-uuzza. Ndaga omukurumu wange mbwe, ‘Kola kino,’ kandi yakikola.”

¹⁰Olwa Yesu yawurra amang’ana ago, yawa no okuluguula ino, kandi yalaga awaamulondanga mbwe, “Mbalaga kuwuene mbwe namba mu ekialo ekia Israeli

ano, okuemera ri nkiari okutuukrako omuntu namba omulala, ori no okuganya okunene kutino.

¹¹Mbalaga mbwe awantu awangi wariema ewufumanyanga ne ewugwanyanga, kandi waritoola iwaga riawu mu omugomo ogwa Abraamu, Isaaka ni Yakoobo, mu Owuami owua ku igulu.

¹²Ni awakaweere aweene owuami, iwo waririgizwa enze, mu ekierema ansi aa awantu warirra kandi warisienenia amiino.”

¹³Nikuemao Yesu yalaga omukangasi owa awa-iye owa Awaruumi oyo otino, “Fuma ogie! Kugia okuikola mala kiomo oganyire otio.” Kandi omukurumu waae oyo, yalama mala enyinga ezio.

Yesu alamiizie awantu awangi

(Mari 1:29–34; Luuk 4:38–41)

¹⁴Olwa Yesu yagia aingira omwa Petro, yawona maaziala Petro na agona ku ekitanda no omuwiri guri omuyu le, alwala.

¹⁵Yesu yamuamba okukono kandi ao-ao owulwire wuamuwuako chwe. Yaema atanika okuwa-aa okuria.

¹⁶Olwa kwatuuka igulo, awantu awangi awaawanga ne ewikeeno waareetwa ku Yesu. Yesu yawafumiamo ewikeeno mala ni ing’ana ilala, kandi yalamia awalwire woona.

¹⁷Ewio wiaikola okutuusia amang’ana aga Omugambi Isaaya yawoola mbwe gaazanga okuikola: “Yatoolao amatekere giifu kandi yaginga amalwire giifu goona.”

Ekia paka okole no oogala okulonda Yesu

(Luuk 9:57–62)

¹⁸Olwa Yesu yawona omurima ogwawanga ni gumuisunguuzie, yasikirra mbwe wa-ambuke wagie engereka indi eya omwalo ogwa Galiili.

¹⁹Nikuemao, omulala ku awagerezi awa endagirra yamuuzako amulaga otino, “Omugerezi, nyiza okukulonda asi-uasi aa ogia.”

²⁰Yesu yamuirania otino, “Endenya ziri na amiina ziago, kandi enyonyi ziri ne entalala. No Omuzia owa Omuntu, iye awula ni aa yakaingizia omutwe.”

²¹Omulonzi wundi yamulaga otino, “Omwami, owusookere reka nsooke ngie nyawire soifu.”

²²Ni Yesu yamulaga mbwe, “Ndonde, oreke awafu waawire awafu awiina waawu.”

Yesu aorezia omuyaga na amasiira

(Mari 4:35–41; Luuk 8:22–25)

²³Nikuemao yaingira mu owuato, kandi awalonzi waae woona waaingira nae.

²⁴Kalala, omuyaga omuzito gwatemuka mu enyanza kandi amasiira gaatanika okukuba owuato wukalu. Ne ewio wiaikolanga, Yesu iye yagonanga mu owuato.

²⁵Awalonzi waae waagia wamulamusia ni wawoola watino, “Omwami, tununule, tufwa amanzi!”

²⁶Yawairania na awalaga otino, “Inywe awa okuganya okutono wano, mutia kolaki?” Nikuemao yaema kungulu asikirra omuyaga na amasiira, kandi enyanza yagwiriira ekitene mala ku enyinga ezio.

²⁷Awalonzi waae waawa no okuluguula ino, kandi waaiwuuzia mbwe, “Ono no omuntu ofwana otie? Namba omuyaga na amasiira gamuwurra!”

Yesu alamiizie awantu wawiri awari ne ewikeeno

(Mari 5:1–20; Luuk 8:26–39)

²⁸Olwa yatuuka engereka indi, mu ekitemo ekia Gadaara, awantu wawiri awari ne ewikeeno waafuma agati ya ewiwaga waagaana ni Yesu. Waawanga awalulu, aa yawulangao omuntu owaesanga okulonda engira eyo.

²⁹Waaogerera wukalu ni wawoola watino, “Otuagalakooki, iwue Omuzia owa Katonda? Kusi oozre okutuswawuka na amiire aga Katonda yataao gakiari?”

³⁰Kuno kwatuukra ne enguruwe zindi zia-aayanga ampi ao.

³¹Ewikeeno wiaisasaama Yesu, ni wiwoola witino, “No oogala okutufumia, tuganyire tugie tuingire mu olwizo olwa enguruwe luuria.”

³²Yesu yawilaga otino, “Mugie!” Kutio wiafuma wigia mu enguruwe, kandi enguruwe ziona mu olwizo olwo, ziagondoka ne ekibuusi zigia zigwa ku oluwanga, ziolomoka mu enyanza mala zifwa ziona.

³³Awaayi awa-aayanga enguruwe ezio, waarumuka wagia mu omugizi gwawu, wagia walaga awantu ewiaikola wino wiona, kugia ekiaikorra awantu wawiri awaawanga ne ewikeeno awo.

³⁴Nikuemao awantu awa omugizi ogwo woona waafuma okugia okuwona Yesu. Kandi olwa waamuwona, waamuiyemba mbwe aeme mu ekitemo kiawu ekio.

Mathaayo 9

Yesu ari na amaani aga okurekera awantu amawi

(Mari 2:1–12; Luuk 5:17–26)

¹Yesu yaingira mu owuato, wawunguka nawuno wagia watuuka ku omugizi gwawu.

²Awantu wandi waamureetra omuntu owa omuwiri gwafwa eng’anzi, na agonere ku iseero. Olwa Yesu yawona okuganya okwa waawanga nakwo, yalaga omulwire oyo otino, “Otafwa omwoyo, mwana wange; amawi gaao orekeerwe.”

³Ku okuwoola otio, awagerezi awa endagirra wandi waawoola agati yaawu aweene mbwe, “Omuntu ono, na mpano anyega Katonda!”

⁴Yesu yawanga na amanyire ewintu ewia waaingirizianga wino. Kutio yawalaga otino, “Ekigera ni muganya amaingirizio amawiiwi gano ni gawaingiramo mu omwoyo niki?”

⁵Ekiwuuwu okukola niki katio: okuwoola mbwe, ‘Amawi gao orekeerwe,’ nakuwa okuwoola mbwe, ‘Ema ogende-gende?’

⁶Ni kugere mumanye mbwe Omuzia owa Omuntu ari na amaani aga okurekera awantu amawi ku ekialo kuno...” Nikuemao yalaga omuntu owa omuwiri ogwafwa eng’anzi otino, “Ema otoole iseero riao ogie engo waao.”

⁷Kandi omuntu oyo yaema ataa na agia engo waae.

⁸Olwa omurima ogwa awantu ogwo gwawona ekiaikola ekio, waawa no owuti ino, kandi waatondowola Katonda owa-aa awantu amaani agaagana na ago.

Yesu yaaza okueta awooni

(Mari 2:13–17; Luuk 5:27–32)

⁹Yesu yafuma ao kandi olwa yagia emberu wutono, yawona omuntu ku eriina Mathaayo, na aikaale mu enyumba omwa awantu waafumiangamo omusolo. Yesu yalaga omuntu oyo mbwe, “Ndonde,” kandi ao-ao Mathaayo yaema atanika okumulonda.

¹⁰Lunyima ni Yesu yarianga okuria okwa igulo omwa Mathaayo, awasolozu awa omusolo, na ‘awooni’ awangi, waaza waria nae alala na awalonzi waae.

¹¹Olwa Awafarisaayo waagia wawona-uwona ekintu ekio, waawuuzia awalonzi awa Yesu watino, “Ekigera no omugerezi wiinyu aria na awasolozu awa omusolo, na ‘awooni’ niki?”

¹²Ku okuwurra eking’ana ekio, Yesu yawoola otino, “Awiifu kane awalwire, nganiwo awaagala omurezi? Awalamu iwo waagarraki omurezi?”

¹³Ni nyagala mbwe mugie muigerere ekia amang’ana gano galagana: ‘Ngonziizie amasaasra okukira okufumiziwua omusango.’Aeniki ng’anyakaaza okueta awantu awigolovu, ni nyaazra awooni.”

Engerera eya Yesu egawuuke ne eya Awafarisaayo

(Mari 2:18–22; Luuk 5:33–38)

¹⁴Nikuemao awalonzi awa Yowaana waaza ku Yesu wamuwuzia watino, “Kuwa kutie mbwe ifwe alala na Awafarisaayo tusiwa aa tutaria okuria, na awalonzi waa iwo ngawakola watio?”

¹⁵Yesu yawairania na awoola mbwe, “Awageni awa ng’ina enserezi ogia okukwa aetre, waesa otie okurra ni wari nae? Amiire gaaza aga ng’ina enserezi oyo aaza okutoolwao awaemeko. Nikuemao nikwo warisiwa okuria.

¹⁶“Awulao-uwula omuntu onawa ekiraka ekiyia ku enguwo enkiire. Ni na akorre otio, ekiraka ekio kiiza okuema ku enguwo enkiire eyo, mala asi atanduku ao asigale awiwi okukira kiema yawanga.

¹⁷Lwona awantu ngawafuka edivaai empia mu ekimuga ekia edivaai ekilongerwe ni iseero ikulu. Aeniki ni wakorre watio, iseero erio riiza okuowoka, edivaai efugike kandi iseero erio rioneke uwiiwi. Kutio edivaai empia efukwa mu ekimuga ekia edivaai ekilongerwe ni iseero iyia, kandi mu engira eyo edivaai alala ne ekimuga kiayo ngawiiza okuoneka, yaaya.”

Omwala owafwa aziuka, no omukazi omulwire owalama

(Mari 5:21–43; Luuk 8:40–56)

¹⁸Ni yagianga emberi no okuwoola otio, omukangasi omulala yamuuzako mala amukubra amasigamo ansi na awoola otino, “Omwami, omwala wange afwire. Ni ganya tugie omuteeko okukono, kandi aaza okuwa omulamu.”

¹⁹Yesu yafuma okugia nae, alala na awalonzi waae.

²⁰Mu enyinga ezio, omukazi wundi owa enda yaae yawanga ne emiire okuwaao ne esulula ku emiaka ikumi ni iwiri, yaaza nyamugongo ogwa Yesu mala a-amba enguwo yaae.

²¹Yawanga na amiire okuwoola mu omwoyo gwae omwene mbwe, “Ni mpambre-uamba enguwo yaae, nyiza okulama.”

²²Yesu yagaluka mala amuwona. Yamulaga otino, “Otafwa omwoyo omwala wange. Okuganya kwao kukulamiizie” Ku enyinga ezio, omukazi oyo yalama.

²³Olwa Yesu yaingira omwa omukangasi oria, yatuukrao awakubi awa ewituutu na awantu awangi ni wakuba erioga eringi.

²⁴Yawalaga otino, “Mufume mugie. Omwala owamurra akiari okufwa yaaya, na agona.” Ni iwo wamusekera, ki otamanyire ekintu ekia awoola.

²⁵Olwa awantu awo waamala okufumiwua enze, Yesu yaingira mu enyumba. Ya-amba okukono okwa omwala oyo, kandi omwala yaema.

²⁶Eking’ana kino kiailanzia mu ewitemo wiona ewia ekialo ekio.

Yesu alamiizie awawuunu wawiri

(Mari 10:46–52; Luuk 18:35–43)

²⁷Ni Yesu yawita ao na agia, awawuunu wawiri waamulonda enyima ni waogerera watino, “Tuambre amagongi, iwue Omuzia owa Daudi!”

²⁸Olwa yamala okuingira mu enyumba, awawuunu awo waamuuzako. Nikuemao Yesu yawawuuzia otino, “Mberi muri no okuganya mbwe ndi na amaani aga okuwalamia?” Waamuirania mbwe, “Ee Omwami.”

²⁹Nikuemao ya-amba amiiso gaawu kandi awawoorra otino, “Kuwaikorre owuagani no okuganya okwa muri nakwo.”

³⁰Kandi ao-ao waatanika okuwona. Nikuemao Yesu yawagaania wukalu na awalaga otino, “Muwone mbwe awulao-uwula omuntu omanyire ekiikorre kino.”

³¹Kukawa kutio, iwo waagia watanika okulanzizia awantu ekintu ekia Yesu yawakorra kino, mu ekitemo ekio kiona.

Yesu alamiizie omuntu omurimba ori ne ewikeeno

³²Ni waafumanga ni wagia, Omuntu omurimba owawanga ne ekikeeno yairwa ku Yesu.

³³Kandi olwa ekikeeno kiafumiwua, omuntu owawanga omurimba oyo yatanika okugamba-gamba. Awantu awangi awawanga ao, waaluguula ni wawoola mbwe, “Kiwulao-uwula ekintu ekifwana kino ekimiire okuikolako mu ekialo ekia Israeli ano, yaaya.”

³⁴Na Awafarisaayo iwo waawoola watino, “Omuntu ono, akola na amaani aga omukangasi awa ewikeeno okufumia ewikeeno.”

Ekialo kilawire na awagesi wari awatono

³⁵Yesu yagia mu ewitemo ne emigizi giona, na agerera awantu mu amasinagoogi, kandi na alanzizia awantu amang’ana amalootu aga Owuami owua Katonda, kandi na alamia awantu ku amalwire na amatekere goona.

³⁶Olwa yawona omurima ogwa awantu, yawa-ambra amagongi aeniki waanyaasiwuanga kandi ngawakaesanga okuintunzia iwo aweene mala kiomo amagondi agawula no omwayi.

³⁷Nikuemao Yesu yalaga awalonzi waae otino, “Ekialo kilawire, na awagesi wari watono.

³⁸Kutio musawe Omwami omwene ewigeswa atume awemirimo mu emisiri egilawire wagie wagersa.”

Mathaayo 10

Yesu alowoole awatumwa ikumi ni wawiri

(Mari 3:13–19; Luuk 6:12–16)

¹Nikuemao Yesu yaeta awalonzi waae ikumi ni wawiri wamuuzeko. Yawa-aa amaani aga okufumia ewikeeno kandi aga okulamia amalwire na amatekere goona.

²Gano nigo amiina aga awatumwa ikumi ni wawiri awo: owasooka ni Simioni (owayaluka mbwe Petro) ni wamwawu waae Andereeya; Yakoobo omuzia owa Zebeedi ni wamwawu waae Yowaana;

³Piliipo ni Batholomeo; Thomaasi ni Mathaayo owawanga omusolozzi owa omusolo; Yakoobo omuzia owa Alfaayo, ni Thadaayo;

⁴Simioni Omusiani ni Yudaasi Iskarioti owamuguzia.

Yesu atumre awalonzi waae ikumi ni wawiri

(Mari 6:6b–13; Luuk 9:1–6)

- ⁵Yesu yatuma awantu ikumi ni wawiri wano na awalaga otino, “Mutaaza mwagia ku awantu awatari Awayaudi namba okuingira mu omugizi ogwa Awasamaria.
- ⁶Ni mugie ku amagondi agateekere, awari awaana awa Israeli.
- ⁷Ni mugia, mulanzizie awantu otino, ‘Owuami owua ku igulu wuri ampi.’
- ⁸Mulamie awalwire, muziusie awafu, mueruyie awalwala owulwire owua owugenge kandi mufumie ewikeeno ku awantu. Kiomo mueerwe wusaasa, nintio mwona muezane wusaasa.
- ⁹Mutatoola ekintu-ukintu kiomo edhaabu namba efeedha musiwe mu emikanda giinyu mugie nawio, yaaya.
- ¹⁰Lwona mutatoola ensawo eya olugendo, namba enguwo eya okugalusia, namba ewiraato ewia okugalusia, namba ensimbo eya okugenda-gendra; aeniki owemirimo asugre okuoloolwa ku emirimo egia akorre.
- ¹¹“Mu omugizi-umugizi ogwa muingiiremo, muagarizie omuntu oganyire okuwaingizia ori ao, mumenye omwae nawuno mufume ao.
- ¹²Ni muingira ku omugizi ogwo, mugu-ee ensereki ziinyu.
- ¹³Omugizi ogwo ni guganyire okuwaingizia, muganye owuolu owuwariko wuwe ku omugizi ogwo; ni, ni watawaingiizie, mureke owuolu owuwariko wuwairaneko.
- ¹⁴No omuntu alowere okuwaingizia namba okuingizia amang’ana giinyu, mukukumule egunduusi eya ku amagulu giinyu enyinga ezia mufuma mu enyumba eyo nakuwa ku omugizi ogwo.
- ¹⁵Mbalaga kuwuene mbwe kuriweera awantu awa omugizi ogwo uwiiwi owuire owua ekiina, okukira emigizi egia Sodooma ni Gomoora.

Eminyako-nyaako egia awatumwa waaza okuwona

(Mari 13:9–13; Luuk 21:12–17; 12:2–9, 51–53; 14:26–27)

- ¹⁶“Mbatuma ki amagondi agari agati eya ensisi. Kutio muwe awagezi ki enzoka kandi awaolu ki iemba-emba.
- ¹⁷“Muirinde ku awantu awaaza okuwaira mu ewiina kandi wawakube mu amasinagoogi gaawu.
- ¹⁸Muuzza okuirwa emberu wa awakangasi na awaami ku amang’ana gange, mugie muwalage iwo alala na awantu awatari Awayaudi ku okuganya okwa muri nakwo ku inze.

¹⁹Ni, ni wawa-ambre, mutainyaasia ku ekia mugia okuwoola namba engira eya mugia okugamba-gambramo, yaaya. Enyinga ezia muuza okuemereziwua okugamba-gamba, nizio muuza okueewua amang'ana aga okuwoola.

²⁰Aeniki ng'ani inywe awarigamba-gamba, ni no Omwoyo Omweru ogwa Katonda Soifu nio origamba-gamba ni kuwawitrako.

²¹“Omuntu ariguzia wamwawu waae ndiki-ndiki ku awazigu aitwe, kandi swawu omuntu ariguzia omwana waae. Awaana awarigalukra awiiwuzi waawu kandi wagere waitwe.

²²Awantu wona wariwarega ku amang'ana gange. No omuntu orikola olutuunyo nawuno mu owutuuko arilama.

²³Na awantu wawakoreere uwiiwi ku omugizi omulala, musomoke mugie ku ogundi. Mbaifuuwira mbwe ngamuza okumala emigizi egiri Israeli giona no Omuzia owa Omuntu akiari okuirana.

²⁴“Omuntu ogererwa ngakirre omugerezi waae, namba owemirimo nga-akirre omuntu owa akorra emirimo.

²⁵Kusugre no omuntu ogererwa ari ki omugerezi omugerera, kandi owemirimo na ari ki omuntu owa akorra emirimo. Ni kuri mbwe ng'ina omugizi nio awantu waeta Belzebuuli, katio awantu awa ku omugizi gwae ngawaaza okukorrwa uwiiwi owukirre?

²⁶“Mutaaza mwawatia namba wutono. Kiwulao ekintu ekisanikiirwe ekitaaza okusanukulwa, namba ekiwisrwe ekitaaza okufuma enze kiamanywa.

²⁷Ewia mbalaga mu ekierema, muwoole omuwasu kandi ekia omonyiriziiwue ku okutwi, woola no oimerre kungulu ku olusala.

²⁸Otaaza watia awantu awaita mala omuwiri gweng'ene ni ngawaesa oku-ita omwoyo gwao. Ni mutie mala omulala ori na amaani aga okuona omuwiri alala no omwoyo mu omurro ogutazima.

²⁹Kane ewiyundigiri wiwiri ngawigulwa amasendi amatono ino? Ni Soinyu Katonda amanyire namba ne endala kuwio egwire ansi.

³⁰Katonda amanyire namba embala eya emvwiri ezia muri nazio ku emitwe.

³¹Kutio mutatia, aeniki Katonda awatoorre owuzito okukira ewiyundigiri.

³²“Omuntu-umuntu olagana emberi wa awantu mbwe ari owange, noona ndirilagana mbwe ari owange emberi wa Soifu ku igulu.

³³No omuntu-umuntu ondowa emberi wa awantu, noona ndirimulowa emberi wa Soifu ku igulu.

³⁴“Mutaingirizia mbwe nyaaza okureeta owuolu ku ekialo, yaaya. Nanyakaaza okureeta owuolu, ni nyaaza okureeta engawuzi.

³⁵Ni kutio aeniki nyizre okugawula awazia ni waaswawu, okugawula awaala ni wang'inwawu, kandi okugawula awakamwana ni wang'inaziala waawu.

³⁶Omuzigu owa omuntu aaza okuwa mala owa omwawu ndiki-ndiki.

³⁷“Omuntu-umuntu ogonziizie owundi, awe swae, ng'inwae, omuzia wae namba omwala wae, okukira kiomo angonziizie, ngasugre okuwa omulonzi wange.

³⁸Kandi omuntu otatoorre omusalaaba gwae andonde, ngasugre okuwa omulonzi wange.

³⁹Omuntu-umuntu orinda owulamu wae omwene aaza okuwuteesia, kandi omuntu oteesia owulamu wae omwene ku amang'ana gange aaza okutuukra owulamu.

⁴⁰“Omuntu owaingiizie, anyingiizie inze kandi onyingiizie, aingiizie Katonda owantuma.

⁴¹Omuntu-umuntu oingiizie omugambi owa Katonda aeniki ari omugambi, aaza okutuukra omugawo ogwa omugambi aeewua. Lwona, omuntu-umuntu oingiizie omuntu omulongoole aeniki ari omulongoole, aaza okutuukra omugawo ogwa omuntu omulongoole aeewua.

⁴²Kandi no omuntu aeere omulala ku awalonzi wange awato wano namba ekikombe ekia amanzi amaolu aeniki ari omulonzi wange, mbalaga kuwene mbwe ngariteesia omugawo gwae.”

Mathaayo 11

Yowaana Omubatiisi awuuzia ni Yesu ari Meesia

(Luuk 7:18–23)

¹Ni Yesu yamala okugerera awalonzi wae ikumi ni wawiri amang'ana gano goona, yafuma ao okugia okugerera kandi okulanzia amang'ana amalootu mu emigizi egia ekitemo ekia Galiili.

²Yowaana Omubatiisi owawanga mu owusiwe, yawurra ewintu ewia Kristo yawanga na akola. Kutio yatuma awandi ku awalonzi wae ku iye,

³wagie wamuwuzie otino, “Iwue ni iwue owasugananga aaze, kusi tusugaane turinde owundi?”

⁴Yesu yawairania otino, “Muirane ku Yowaana, mugie mumulage ewintu ewia muwuriire kandi ewia muwuine:

⁵Awawuunu wawona, awarema wagenda-genda, awari no owugenge walamiwua, awa amatwi maziwu wawurra, awafu waziuka, kandi amang'ana amalootu galanziziwua awataka.

⁶Omuntu otairana enyima ku amang'ana gange asereekwe.”

Yesu agamba-gamba ku Yowaana

(Luuk 7:24–28)

⁷Na awalonzi awa Yowaana waafumanga ni wagia, Yesu yatanika okugamba-gambra omurima ogwa awantu ogwawanga ao ku Yowaana na awalaga otino, “Olwa mwagia ku Yowaana mu ekeewa, ekia mwagia okuwona niki? Kusi ekituutu ekiyunziwua-yunziwua no omuyaga?”

⁸Ni kutari kutio, ekia mwagia eyo okuwona niki? Kusi omuntu oingizia enguwo endootu? Yaaya, awaingizia enguwo endootu-ndootu waituukrana mu emigizi egia awaami.

⁹Kutio ekia mwagia okuwona niki kane? Kusi omugambi? Ee, omugambi kandi mbalaga mbwe akirre omugambi no okukira.

¹⁰Ono nio omuntu owajojwako kale mbwe, ‘Wona, nyiza okutuma omutumwa wange emberu waa, orikangata emberu waa akugolorre engira.’

¹¹Mbalaga kuwuene mbwe ku awantu wona awa awakazi waiwuule, awulaoko namba omulala omiire okuwaa okira Yowaana Omubatiisi. Kukawa kutio, omuntu omutono otuukre mu Owuami owua ku igulu amukirre.

Yowaana ni Yesu walowerwe

(Luuk 7:30–35)

¹²“Okuemera ku amiire aga Yowaana Omubatiisi yatanika emirimo giae nareero, Owuami owua ku igulu wumiire okuwa ni wulwaniwua no owuvuya na awantu awatinzi awagala mbwe wawutoole na amaani.

¹³Aeniki Awagambi awa Katonda wona alala na amang’ana aga Muusa yajoja gagamba-gamba ku ewintu ewiazanga okuikola mu amiire goona kutuuka ku amiire aga Yowaana.

¹⁴Kandi no oesa waganya, Yowaana nio Eliija owasugananga aaze.

¹⁵Omuntu ori na amatwi aga okuwurra ka-awurre!

¹⁶“Awantu awa ikula rino nyesa okuwafwanania naki katio? Kufwanana na awaana awaikaale mu ekiiya awaogerera ni waeta awaana awiina waawu watino:

¹⁷“Twawakubra ekituutu, ni ngamukazina! Twawaembera olwembo olwa olumbe, ni ngamukarra!”

¹⁸“Yowaana iye ngakaweerao na aria kandi na anywa. Kino kiagera ni wawoola mbwe, ‘Omuntu ono ari ne ekikeeno.’

¹⁹No Omuzia owa Omuntu iye aria kandi anywa, kandi okwo kugera ni wawoola mbwe, ‘Omuntu ono agonziizie okuria kandi ari omunywi. Lwona ari omwiko owa awasolozu awa omusolo na awooni.’ No owuganga wulaganwa mu enkola ziauwu.”

Yesu asiagizia emigizi egialowa okumuganyako

(Luuk 10:13–15)

²⁰Nikuemao Yesu yatanika okusiagizia emigizi egia yakolamo amankono, aeniki ngawakagaluka wareka amawi gaawu.

²¹“Kuriwaweera owululu inywe awantu awa Koraziini! Kuriwaweera owululu awantu awa Bethsaida! Kuweeko mbwe amankono agaakolwa agati iinyu gaakolwa mu emigizi egia Taaya ni Sidooni, kangato awaawangamo waagaluka kale, ni waingiizie enguwo ezikorre amakurugunya kandi ni wafukre igoke mu emiwiri giawu.

²²Mbalaga mbwe kuriweera emigizi egia Taaya ni Sidooni geeza-geezako owuire owua Katonda arikengra awantu ekiina, okukira kiomo kuriwaweera inywe!

²³Kusi inywe awantu awa Kapernaumu, muingirizia mbwe muuza okugingwa kungulu ku igulu? Yawa, muuza okuisiwua ansi mu ekialo ekia awafu! Kuweeko mbwe amankono agaakolwa agati iinyu gaakolwa mu omugizi ogwa Sodooma, kangato omugizi ogwo gukiario na nyingeeno.

²⁴Kutio mbalaga mbwe owuire owua Katonda arikengra awantu ekiina, kuriweera awantu awa Sodooma geeza-geezako kuwakira inywe.”

Munyizeko mutuukre okuwuluuka

(Luuk 10:21–22)

²⁵Ku enyinga ezio, Yesu yawoola otino, “Nkutondowoole Soifu Katonda, Omwami owa igulu ne ekialo, aeniki owisiire awaganga na awasomi ewintu wino, no owisasuriire awaana awato.

²⁶Ee Soifu, aeniki kino nikio ekilootu ekia wasangaala nakio okukola.

²⁷“Soifu anteriire ewintu wiona mu amakono. Awulao omanyire Omuzia ogawuuke ni Katonda Ise, kandi awulao omanyire Katonda Ise ogawuuke no Omuzia waae alala na awantu awa Omuzia awuine okumumanyisia.

²⁸“Munyizeko inywe awantu awadoowere kandi awaingre ne emisigo emizito, ni nyiza okuwawuluusia.

²⁹Mutoole ejooki yange muitwike ku igosi kandi muigerere ku inze, aeniki ndi omuolu kandi oiisie ansi mu omwoyo. Ni mukorre mutio, muuza okutuukra aa okuwuluusia emioyo giinyu.

³⁰Aeniki ejooki yange mpuuwu okuginga kandi omusigo gwange guri omuwuwu.”

Mathaayo 12

Yesu nio Omwami owa Sabato

(Mari 2:23–28; Luuk 6:1–5)

¹Owuire wulala olwa Sabato, Yesu na awalonzi waae waagenda-gendanga mu omusiri ogwa engaano. Aeniki awalonzi waae waawanga ne enzala, waatanika okuiiya ewigala ewia engaano ni waria.

²Olwa Awafarisaayo waawawona ni wakola watio, waalaga Yesu watino, “Wonako! Na mpano awalonzi waa wakola ekitasugaane okukolwa nyanga olwa Sabato?”

³Yesu yawairania otino, “Inywe mukiari okusoma ekia Omwami Daudi yakola olwa iye alala na awantu awayawanga nawo waawurranga enzala?”

⁴Yagia mu enyumba eya Katonda, kandi iye alala na awantu awayawanga nawo, waeewua emikaati egiatengekerwa Katonda waria, kukawa mbwe ensikirra yaganyira omuozi eng’ene okugiria.

⁵Kusi mukiari okusoma amang’ana aga Muusa jajoja mbwe owuire owua Sabato, awoozia wakola emirimo mu ekaalu ni ngawawalwa ki awaonre ensikirra?

⁶Mbalaga mbwe ekia muri nakio kikirre ekaalu.

⁷Kuweeko mbwe mumanyire ekia amang’ana agari mu endagano agawoola mbwe, ‘Ngonziizie amasaasra okukira okufumiziwua omusango,’ galagana, kangato ngamukakengra awawula no owuoni ekiina ekia awooni.

⁸Kutio Omuzia owa Omuntu nio Omwami owa Sabato.”

Yesu alamiizie omurema olwa Sabato

(Mari 3:1–6; Luuk 6:6–11)

⁹Yesu yafuma ao agia aingira mu esinagoogi,

¹⁰kandi omuntu owa okukono kwae kwaremera yawanga omwo. Awafarisaayo wandi, awaagalanga ekintu ekia wakaingirra Yesu nakio mbwe akorre owuoni, waamuwuzia watino, “Mberi kuri kulootu okulamia omuntu owuire owua Sabato?”

¹¹Yesu yawairania otino, “No ori ni igondi, kandi igondi erio rigie rigwe mu owuina owuire owua Sabato, ngoritoolamo?”

¹²Omuntu ngari omukaate okukira igondi ale? Kutio kulootu okukorra omuntu geeza owuire owua Sabato.”

¹³Nikuemao Yesu yalaga omuntu oyo otino, “Golola okukono kwao.” Omuntu oyo yakola otio kandi okukono okwo kwawa okulamu mala kiomo okundi.

¹⁴Awafarisaayo waafuma ao kandi watanika okukola omupango ogwa okuita Yesu.

Omulowole owa Katonda

¹⁵Yesu yagia amanya omupango gwawu, kutio yafuma agia ale na ao. Omurima omukaate ogwa awantu gwamulonda. Yalamia awalwire waawu wona,

- ¹⁶na awasiagizia mbwe watalaga omuntu owa yawanga.
- ¹⁷Okwo kwatuusia amang'ana aga Katonda yawoola ni kuwitra ku Omugambi Isaaya mbwe:
- ¹⁸“Ono nio owemirimo wange omulowole! Mulowoole kandi nsangaarre nae. Nyiza okumu-aa Omwoyo Omweru kandi aaza okukorra enganda ziona ewintu ewisugaane.
- ¹⁹Ngaaza okusoolana namba okukuba olukweri namba okuogerera mu engira ezia emigizi.
- ²⁰Ngarivuna ekituutu ekiremeere namba okuzimia omurro oguagala okufwa, nawuno awone mbwe awantu woona watuukiire ekisugre ne enkola ziwu.
- ²¹Enganda ziona ziiza okuta emioyo giawu ku iye.”

Awantu waingirizia mbwe Yesu akola na amaani aga Belzebuuli

(Mari 3:20–30; Luuk 11:14–23; 12:10)

- ²²Nikuemao waamureetra omuntu owawanga ne ekikeeno owawanga omuwuunu kandi omurimba. Yesu yamulamia mala atanika okuwona no okugamba-gamba.
- ²³Awantu woona waaluguula ino kandi waawuuzia watino, “Awiifu, kusi ono akawa Kristo Omuzia owa Daudi?”
- ²⁴No olwa Awafarisaayo waawurra eking'ana kino, waawoola watino, “Omuntu ono akola mala na amaani aga aerwe ni Belzebuuli omwami owa ewikeeno, okufumia ewikeeno.”
- ²⁵Aeniki Yesu yawanga na amanyire ekia waaingirizianga, yawalaga otino: Owuami owugawukaane wuuzi okuoneka, kandi omugizi ki omugizi namba enyumba omwa awantu wailwania iwo aweene, ngaguza okuimerra.
- ²⁶Sataani ne efumia Sataani, ao otio egawuuke eilwania eene. Ni kuri kutio owuami wuae wukaimerra wutie?
- ²⁷Ni, ni kuri mbwe mfumia ewikeeno na amaani aga mpeerwe ni Belzebuuli, mundageko mbwe awantu wiinyu iwo wawifumia naki? Kutio awantu wiinyu awo niwo awaaza okuwakengera ekiina.
- ²⁸Ni, ni kuri mbwe mbifumia na amaani aga Omwoyo Omweru ogwa Katonda, kane kuri kuwene mbwe Owuami owua Katonda wuwaazreko.
- ²⁹Kuesekana kutie omuntu okuingira mu enyumba eya omukalu aiwe ewintu wiae, na atasookre amusiwe? Ee, na amiire okumusiwa nikwo aesa okumusakula ewintu ewia mu enyumba.
- ³⁰“Omuntu otari nyaluwega lwange andwania, kandi omuntu otakunza ni inze, iye ataanyia.

³¹Mbalaga mbwe Katonda aaza okurekera awantu amawi goona na amanyego aga awantu wamunyega nago. No omuntu onyegere-unyega Omwoyo Omweru ogwa Katonda, iye ngaaza okurekerwa amawi gaae, yaaya.

³²Omuntu-umuntu ogamba-gambre uwiiwi ku Omuzia owa Omuntu aaza okurekerwa, no omuntu ogamba-gambre uwiiwi ku Omwoyo Omweru ogwa Katonda ngaaza okurekerwa mu ikula rino kugia eriiza.

³³“Omuti ni guweere omulootu, ensaafu ziangwo ziona ziwa endootu, kandi omuti omuwiiwi gwona guama ensaafu embiiwi. Kutio omuti gumanywa ne ensaafu ziangwo.

³⁴Inywe awaana awa enzoka wano, muesa mutie okuwoola ekintu ekilootu? Aeniki ewintu ewia omunwa guwoola wiema mala ku ewiizuule omwoyo ogwa omuntu.

³⁵Omuntu omulootu afumia ewintu ewilootu ewia awiikre mu omwoyo gwae, kandi omuntu omuwiiwi yoona afumia ewintu ewiwiwi ewia awiikre mu omwoyo gwae.

³⁶Ni mbalaga mbwe owuire owa ekiina, Katonda arikengra awantu ekiina ku ing’ana ki ing’ana eria waafwa okuwoola-woola-uwoola.

³⁷Ee, amang’ana gaao nigo agarigera okire ekiina, nakuwa ekiina kikukire.”

Awataganyire waaza okukirwa ne ekiina

(Luuk 11:29–32)

³⁸Nikuemao Awafarisaayo na awagerezi awa endagirra wandi waamulaga watino, “Omugerezi, tuagala mbwe otu-eeko ekilago ekiema ku igulu.”

³⁹Ni Yesu yawairania otino, “Awantu awa ikula iwiiwi kandi eritarindre endagano, niwo awaagala mbwe wakorrwe amankono kiwaweere ekilago! Ni kiwulao ekilago ekia waaza okueewua ekigawuuke ne ekilago ekia Omugambi Yoona.

⁴⁰Kiomo Yoona yawa mu enda eya emvwa ku amiire asatu owuire no omuwasu, nintio Omuzia owa Omuntu yoona aaza okuwa mu ilowa munsu ku amiire asatu owuire no omuwasu.

⁴¹Awantu awa Nineeve wari-imerra mu ekiina na awantu awa ikula rino kandi warigera ekiina kiwakire. Ee, aeniki iwo waagaluka wareka amawi gaawu olwa Yoona yawalanzizia amang’ana aga Katonda, ni wano walowere amang’ana aga omuntu okirre Yoona ale ori ano.

⁴²Omwami owekikazi owa ekialo ekiri Emulambo yoona ari-imerra mu ekiina ni ikula eria nyingeeno rino, kandi yoona arigera ekiina kiwakire. Ee, aeniki yaema ale ino agia okuwurra amang’ana aga Sulumaani, ni wano walowere okuwurra omuntu okirre Sulumaani ale ori ano.

Ekiikola ne ekikeeno kifumiiwue ku omuntu

(Luuk 11:24–26)

⁴³“Ekikeeno ni kifumre ku omuntu, kiyuga-yuga mu ewialo ewikarre aa amanzi gawula, ni kiagala aa kikawuluukra. Ni kitatuukiire,

⁴⁴kiwoola kitino, ‘Reka nyirane omwange.’ Ni kiiraane kandi kituukre enyumba ne eri wusaasa, ne eeruuye kandi ne ewintu witeerwe geeza,

⁴⁵kigia okuagala ewikeeno windi musamvu ewiwiiwi okukikira. Nikuema wiona wiirana okumenya omwo kandi omuntu oyo airana yawa omuwiiwi okukira kiomo yawanga kuluweri. Nintio kuuza okuweera awantu awa ikula rino.”

Ng’inwawu Yesu ni waamwawu Yesu awa kuwuene

(Mari 3:31–35; Luuk 8:19–21)

⁴⁶Ni Yesu yawanga na akiagamba-gambra omurima ogwa awantu, ng’inwae ni waamwawu awekizia waaza waimerra enze, aeniki waagalanga okugamba-gamba nae.

⁴⁷Nikuema omuntu yagia alaga Yesu otino, “Ng’inwao ni waamwinyu awekizia wari enze ano, waagala okugamba-gamba ni iwue.”

⁴⁸Yesu yawairania otino, “Ng’inoifu naanu? Kusi waamwifu awekizia ni waawu anu?”

⁴⁹Yasiagizia awalonzi waae no okukono na awoola otino, “Wano niwo ng’inoifu ni waamwifu awekizia.

⁵⁰Ni kutio aeniki omuntu-umuntu okola okuagala okwa Soifu ori ku igulu nio wamwifu owekiala, no owekizia kandi nio ng’inoifu.”

Mathaayo 13

Olugero olwa omurimi owagia okumwa emwo

(Mari 4:1–9; Luuk 8:4–8)

¹Owuire owuo Yesu yafuma mu enyumba agia aikala ku ensanyaata eya enyanza.

²Omurima ogwa awantu awangi ino gwaza gumuisunguuziako. Okwo kwagera Yesu aniina owuato aikalamo, awantu iwo waaimerre ku ensanyaata.

³Yatanika okuwalaga ewintu ewingi mu engero otino, “Omurimi yagia okumwa emwo yaae.

⁴Ni ni yamwanga emwo, emwo indi yagwa ku engira kandi enyonyi ziaza zigiria chwe.

⁵Eindi yagwa ku entare, asi aa ilowa riawulanga eringi. Eno yafuma wuangu-wuangu aeniki ilowa itono erio riawanga ni ri-iserengeere ku entare.

⁶No olwa iwasu riafuma, emere eyo yakala kandi elala no okulala aeniki yawulanga ne emizi.

⁷Emwo indi yagwa mu amawua, agaakoma ne emere mala gasindigania emere eyo.

⁸Ne eindi yagwa mu ilowa ilootu, aa yalawia emere mia kilala kangi okukira, eindi amakumi mukaaga kangi okukira, ne eindi amakumi asatu kangi okukira.”

⁹Yesu yamaariizia na awoola mbwe, “Omuntu ori na amatwi aga okuwurra, ka-awurre.”

Awalonzi awa Yesu wasanukuriirwe amang’ana agaiwisre

(Mari 4:10–12; Luuk 8:9–10; 10:23–24)

¹⁰Nikuemao awalonzi waae waamuuzako wamuwuuzia watio, “Ekigera no ogamba-gamba na awantu mu engero otino niki?”

¹¹Yesu yawairania otino, “Inywe ni inywe awaerwe okumanya owueru owua ewintu ewiiwisre ewia Owuami owua ku igulu, ni ng’ani iwo yaaya.

¹²Omuntu okola geeza ne ekia aegeekwe nio orisongwa. No omuntu otakola geeza ne ekia aegeekwe aaza okunyagulwa namba ekitono ekia yaegekwa.

¹³Ngamba-ngamba nawo mu engero aeniki: “Kukawa mbwe wari na amiiso agawona, ni ngawawona; kukawa mbwe wari na amatwi agawurra, ni ngawawurra lwona amang’ana ngagawaingirra.

¹⁴Watuusia owugambi owua Isaaya owuwoola mbwe: “ ‘Muuza okuwa mala ni muwurra, na amang’ana ngagaaza okuwaingirra; muuza okuwa mala ni muwarra, no okuwona ngamuuza okuwona.

¹⁵Aeniki awantu wano emioyo giawu mikalu, lwona waziwire amatwi, kandi waindiriizie amiiso gaawu; Wataaza, wawona na amiiso gaawu, kandi wawurra na amatwi gaawu, lwona emioyo giawu gitaaza giaingirizia amang’ana, kugere wagaluke waaze ku Katonda, awanunule.’

¹⁶“Ni, inywe amiiso giinyu gasereekwe aeniki gawona kandi amatwi giinyu goona gasereekwe aeniki gawurra.

¹⁷Mbalaga kuwuene mbwe awagambi awangi na awantu awigolovu awangi waawa na amiiga aga okuwona ewintu ewia muwona kandi okuwurra ewia muwurra nyingeeno wino, ni ngakukawaweera kutio.

Ekia olugero olwa omurimi owamwa emwo lulagana

(Mari 4:13–20; Luuk 8:11–15)

¹⁸“Mutege amatwi muwurra ekia olugero olwa omurimi owagia okumwa emwo lulagana:

¹⁹Engira eya emwo yagwako eimeriire awantu awawurra amang’ana aga Owuami owua ku igulu, ni ngagawaingirra. Kutio omuzigu aaza kandi yawasakula ing’ana eriasimbwa mu emioyo giawu.

²⁰Olutare luimeriire awantu awawurra amang’ana kandi wagaingizia wuangu-wuangu no owusangaavu.

²¹Ni aeniki wawula ne emizi, ngawawuuzza ku amiire amangi, yaaya. Iwo ne eminyako-nyaako namba emidambo giiziire awantu ku amang’ana aga Katonda, wairana enyima wuangu-wuangu.

²²Amawua aga emwo yagwamo na awantu awawurra amang’ana, no okui-ingirizia okwa owulamu alala ne ensemerezanio eya owunyazi egisindigania nawuno yareka okuamia ensaafu.

²³Ni ilowa ilootu ri-imeriire awantu awawurra amang’ana kandi wagaingizia. Iwo waamia ensaafu mia kilala, awandi amakumi mukaaga, na awandi amakumi asatu kangi okukira eyamwewua.”

Olugero olwa isuwi eria amagolwe

²⁴Nikuemao Yesu yawalaga olugero lundi oluwoola lutino, “Owuami owua ku igulu wufwanana no omuntu owamwa emwo yaae mu omusiri gwae.

²⁵No owuire awantu woona ni wagona, omuzigu yaaza mala asimba amagolwe agati ya engaano mala afuma agia.

²⁶Olwa engaano yafuma kandi etanika okufumia ewigala, amagolwe goona gaafuma.

²⁷“Awemirimo awa ng’ina omusiri waaza waamuwuuzia watino, ‘Omukangasi kane ngawasimba emwo endootu eng’ene mu omusiri gwao? Amagolwe gano gaemerei katio?’

²⁸“Yawairania mbwe, ‘Omuzigu nio owakola kino.’ “Nikuemao awemirimo waamuwuuzia watino, ‘Wagala mbwe tugie tuiye amagolwe?’

²⁹“Yawairania na awoola mbwe ‘Yaaya mutakola otio. Ni mutaniike okuiya amagolwe, muuza mwaiya kugia engaano yoona.

³⁰“ ‘Mureke gakome goona nawuno kutuuke mu igesa. Igesa ni rirituuka ndirilaga awagesi wasooke wakunze amagolwe emitwe-emitwe gasambwe; nikuemao engaano ekunziwue ereetwe mu ekiagi.’ ”

Olugero olwa emwo entono eya karadaali no olwa omumera

(Mari 4:30–32; Luuk 13:18–21)

³¹Yesu yawalaga olugero lundi otino, “Owuami owua ku igulu wuesa okufwananiwua ne emwo eya karadaali, eya omuntu yatoola agia asimba mu omusiri gwae.

³²Kukawa mbwe emwo eyo nie entono ino okukira emwo ziona, ne okomere ewa omuti omukaate okukira emiti giona. Enyonyi ziiza ziagiombokako entalala ku ensagia ziagwo.”

³³Yesu kandi yawalaga olugero lundi otino, “Owuami owua ku igulu wuesa okufwananiwua no amamera amatoono aga omukazi atoola yafuka ku owusie wungi yaduwania mala amamera gaazimbia owusie owuo wuona.”

Okugamba-gamba mu engero

(Mari 4:33–34)

³⁴Yesu yalaga omurima ogwa awantu amang’ana gano goona mu engero kandi riwulao ing’ana-ung’ana eria yawalaga na atakorre no olugero.

³⁵Kuno kwatuusia amang’ana aga Katonda yawoola ni kuwitra ku omugambi omulala mbwe: “Nyiza okugamba-gamba nawo mu engero, nyiza okuwoola amang’ana agamiire okuwa ni gaiwisre okuema mu owutaniko owua ekialo.”

Ekia olugero olwa isuwi lulagana

³⁶Nikuemao yareka omurima ogwo mala agia aingira mu enyumba. Awalonzi waae waamugiako kandi wamulaga watino, “Tunawurreko ekia olugero olwa amagolwe aga mu omusiri luria lulagana.”

³⁷Yesu yawairania otino, “Omuntu owamwa emwo endootu no Omuzia owa Katonda.

³⁸Omusiri ne ekialo, ne emwo eimeriire awaana awa Owuami owua Katonda. Amagolwe gaimeriire awaana awa omwoni,

³⁹kandi omuzigu owagasimba ne Ekikeeno. Igesa ri-imeriire owuire owua owutuuko kandi awagesi wari enyankoi awa Katonda.

⁴⁰“Kियो amagolwe gaiiywa kandi gaasambwa, nintio kuriwa owuire owua owutuuko.

⁴¹Nyanga olwo, Omuzia owa Omuntu arituma enyankoi waae awari-iiyao ekintu-ukintu ekiri mu owuami wuae ekireeta owuoni alala na awantu woona awakola owuoni.

⁴²Enyankoi awo wariwaluuma mu omurro omuyu le, aa awantu warirra kandi warisienenia amiino.

⁴³Awalongoole iwo wariwala ki enyanga mu owuami owua Soifu Katonda. Ori na amatwi, ka-awurre.”

Olugero olwa owuwiiko owuawiswa no olwa eluulu

⁴⁴Yagia emberi na awoola mbwe, “Owuami owua ku igulu wuesa okufwananiwua no owuwiiko owuawiswa mu omusiri. Olwa omuntu yawutuukra, yairana awuwisa aazane ao. Yagia aguzia ewintu wiae wiona na ari omusangaavu ino, nikuemao agia agula omusiri ogwo.

⁴⁵“Kandi, Owuami owua ku igulu wuesa okufwananiwua no omuntu owa amaara oagala eluulu endootu ino.

⁴⁶Olwa yatuukra eluulu eya iguzi eria kungulu, yairana enyima agia aguzia ewintu wiae wiona nikwo agia agula eluulu eyo.

Olugero olwa olugoe

⁴⁷“Lwona, Owuami owua ku igulu wuesa okufwananiwua no olugoe olwategwa mu enyanza mala luamba emvwa ezigawukane-gawukaane.

⁴⁸Olwa olugoe lwaizula ne emvwa otino, awavuwi waalukulula enze ku ensanyaata nikuemao walowola emvwa endootu ziona wata mu ekikapu, ne embiiwi warigiza.

⁴⁹Nintio lwona kuriwa mu entuuko eya ekialo. Enyankoi wariiza wagawule awalongoole na awawiiwi

⁵⁰kandi warigize awawiiwi mu omurro omuyu le, aa awantu warirra kandi warisienenia amiino.”

⁵¹Yesu yawawuuzia otino, “Mberi muwuriire amang’ana gano goona?” Waamuirania mbwe, “Ee, tuwuriire.”

⁵²Yawalaga mbwe, “Kutio omugerezi ogerera ensikirra omiire ogererwa amang’ana aga Owuami owua ku igulu, iye afwanana ni ng’ina enyumba ofumia owuwiiko owua ewintu ewiyia ne ewikulu okuema mu ekitamu kiae.”

Omugambi ngaerwe owuti mu ekialo kiawu

(Mari 6:1–6)

⁵³Olwa Yesu yamala okugamba-gamba mu engero zino, yafuma aema mu ekitemo ekio.

⁵⁴Yairana mu omugizi gwawu, atanika okugerera awantu mu esinagoogi yaawu kandi awantu awa eyo waaluguula. Waawuuzia watino, “Omuntu ono atoorrei amaganga na amaani aga okukola amankono gano?”

⁵⁵Kane ono ng’anio omuzia owa omufundi owa amabaawu oria? Maaria ng’anio ng’inwae kandi waamwawu waae ng’ani waawu YakooBo, Yoseefu, Simioni ni Yudaasi?

⁵⁶Waamwawu waae awekiala ng’aturi nawo ano? Kutio omuntu ono iye yatuukrai ewintu wino wiona?”

⁵⁷Kandi waalowa okuganya ku iye. Ni Yesu yawalaga otino, “Omugambi owa Katonda ngaewua owuti mala mu omugizi gwawu no omwawu eng’ene.”

⁵⁸Yesu ngakakola amankono amangi ao aeniki awantu waawulanga no okuganya ku iye.

Mathaayo 14

Okuitwa okwa Yowaana Omubatiisi

(Mari 6:14–29; Luuk 9:7–9)

- ¹Mu amiire ago, Omwami Eroode yawurra amang’ana aga Yesu.
- ²Yalaga awemirimo waae watino, “Ono ni Yowaana Omubatiisi. Aziukre aemere ku awafu kandi ekio niki ekigera na ari na amaani aga okukola amankono.”
- ³Eroode yaingirizianga otio aeniki kwatuukra ni yasikirra mala Yowaana a-ambwa, asiwua kandi arigizwa mu owusiwe ku amang’ana aga Erodiasi muka Piliipo,
- ⁴mbwe ngera Yowaana yamugaanianga enyinga ziona na amulaga mbwe, “Yaaya, endagirra iifu ngekuganyiire okutoola muka wamwinyu awe omukazi wao, wamwinyu na akiario omulamu!”
- ⁵Okwo kwagera Eroode awa no okuagala mbwe aite Yowaana, ni kukawa kutio yatia, aeniki awantu waawanga ni watoorre Yowaana ki omugambi owa Katonda.
- ⁶Nyanga ndala ne Eroode yagomeranga owuire owua yaiwurrwamo, omwala owa Erodiasi yazina geeza ino emberu wa Eroode na awageni waae kandi okwo kwasangaazia Eroode ino.
- ⁷Yamuifuwira na ata endagano mbwe aaza okumu-aa ekintu-ukintu ekia amusawire.
- ⁸Ku amagezi aga ng’inwae yamugerera, omwala oyo yalaga Eroode otino, “Nyagala ompe omutwe ogwa Yowaana Omubatiisi ku oludaawo luno.”
- ⁹Omwami Eroode yawurra wuwiiwi ino mu omwoyo gwae, ni ku endagano eya omwene yata na amuifuwira emberu wa awageni waae, yasikirra mbwe omwala oyo aewue ekia yasawa ekio!
- ¹⁰Kutio Yowaana yakengwa igosi mu owusiwe.
- ¹¹Omutwe gwae gwareetwa mu oludaawo kandi gueewua omwala owa Erodiasi owagutoola aguirra ng’ina.
- ¹²Awalonzi awa Yowaana waaza watoola omuwiri ogwa Yowaana wagia waawira, nikuemao wagia walaga Yesu ekiaikola ekio.

Yesu aeere awantu awakirre elufu witaanu okuria

(Mari 6:30–44; Luuk 9:10–17; Yowa 6:1–13)

- ¹³Olwa Yesu yawurra amang’ana ago, yafuma no owuato okugia aaiwisre. Awantu waawurra mbwe agiire kandi omurima ogwa awantu awaema mu emigizi egia ekitemo ekio, gwamulonda eyo na amagulu.
- ¹⁴Olwa Yesu yagowa kandi awona omurima omungi ogwa awantu, yawa-ambra amagongi kandi yalamia awalwire waawu.
- ¹⁵Ne enyinga ezia igulo ziawanga ampi, awalonzi waae waamuuzako wamulaga watino, “Asi ano na ale ne emigizi, no owuire wuri ampi okuwaira. Kutio reka awantu wano wagie mu emigizi egia ampi ano, wagie waagale okuria wagule.”

¹⁶Yesu yawairania otino, “Ngawasugaane wagie yaaya, aweene muwa-ee okuria warie.”

¹⁷Iwo wamuirania mbwe, “Turi mala ne emikaati itaanu ne emvwa iwiri ziang’ene.”

¹⁸Yesu yawalaga otino, “Muwireete ano.”

¹⁹Nikuemao yawoola mbwe awantu waikale ansi ku owusuwi. Yatoola emikaati itaanu ne emvwa iwiri ziria. Yaginga amiiso gae ku igulu, airanzia Katonda otioo nikwo agenyula omukaati. Nikuemao yatoola ewiokuria ewio a-aa awalonzi waae kandi awalonzi waae waawitoola wawi-aa awantu.

²⁰Woonaa waaria waiguta du, kandi awalonzi waae waakunza ewimega ewia ewiokuria ewiasigala mala wiizula ewidida ikumi ni wiwiri.

²¹Awantu awaaria woonaa, awasaaza weng’ene waawanga elufu witaanu, no orekere awakazi na awaana enze.

Yesu agende-gendre ku amanzi

(Mari 6:45–51; Yowa 6:16–21)

²²Olwa awantu waamala-umala okuria otino, Yesu yanigirizia awalonzi waae okuingira mu owuato wasiawale okugia engereka indi. Iye yasigala enyima na asiwula omurima ogwa awantu ogwo.

²³Ni yamala okuwasiwula wagia, yaniina agia ku ekigiri okusawa kandi kwatuuka igulo na ari ao omwene.

²⁴Owuato owua awalonzi waae waawangamo wuawanga ni wuri ku owuziwa ale ne ensanyaata, amasiira ni gawukuba eno ne eno aeniki omuyaga gwawanga omungi.

²⁵Owuire ni wugia okutuuka kungoko, Yesu yawagiako na agenda-genda ku enyanza.

²⁶Olwa awalonzi waae waamuwona na agenda-genda ku enyanza, owuti wuawamba ino mala watanika okukuba erioga ni yawoola watino, “Kiiria ne ekikeeno! Kiiria ne ekikeeno!”

²⁷Ni Yesu yawalaga wuangu-wuangu otino, “Mutafwa omwoyo, ono ni inze. Mutawa no owuti.”

²⁸Petro yamuirania otino, “Omwami ni kuri mbwe oyo ni iwue, ndage nkuuzeko ku amanzi ao.”

²⁹Yesu yamulaga mbwe, “Iza.” Nikuemao Petro yafuma mu owuato, atanika okugenda-genda ku amanzi na awariire ku Yesu.

³⁰No olwa yawona omuyaga, owuti wuamuamba mala atanika okuniwa mu amanzi. Yaogerera na awoola otino, “Omwami, nnunule!”

³¹Ao-ao Yesu yagolola okukono kwae mala amuamba na amulaga otino, “Iwue ori no okuganya okutono ono, katio oweere no okui-ingirizia kolaki?”

³²Olwa waingira-uingira mu owuato woona awawiri watino, omuyaga gwawua chwe.

³³Awaawanga mu owuato woona waamuifunamra ni wawoola watino, “Kuwuene ori Omuzia owa Katonda.”

Yesu alamiizie awantu Genezereeti

(Mari 6:53–56)

³⁴Olwa waamala okuambuka enyanza, waagia wagowa Genezereeti.

³⁵Kandi olwa awantu awa eyo waagia wamumanyirizia, waatumania amang’ana ku awantu awa ewitemo ewia ampi ao woona. Awantu waamureetra awalwire awangi

³⁶wamusawa mbwe areke awalwire awo wa-ambeko namba enguwo yaae kandi awaamuamba woona waalama.

Mathaayo 15

Endagirra ezia Awayaudi ne engerera ezia Yesu

(Mari 7:1–13)

¹Nikuemao Awafarisaayo na awagerezi awa endagirra wandi waaza ku Yesu ni waema Yerusaleemu kandi wamuwuzia watino,

²“Ekigera awalonzi wao ni watambuka endagirra eya waaguukwa wiifu niki? Iwo ngawaozia amakono ni wagia okuria!”

³Yesu yawairania otino, “Ni inywe ekigera ni mutambuka ensikirra eya Katonda ku amang’ana aga okutuusia endagirra ziinyu niki?”

⁴Aeniki kukawa mbwe Katonda yasikirra mbwe, “Tia swao ni ng’inwao’ kandi mbwe, ‘Omuntu-umuntu onyega swae nakuwa ng’inwae paka aitwe.’

⁵Ni inywe muwoola mbwe no omuntu alagre swae nakuwa ng’inwae mbwe, ‘Owuitunzi owua nkakueere, miire okuta antulo oku-aa Katonda,’

⁶mbwe ngasugaane ‘a-ee awiiwuzi owuti’ ku okuwa-aa ekintu ekio. Kutio mutoola amang’ana aga Katonda ki aga owusaasa kugere mutuusie endagirra ziinyu.

⁷Inywe awantu awaisemerezia wano! Isaaya yawanga kuwuene olwa yawagambako na awoola mbwe:

⁸“ ‘Awantu wano wampa owuti mala ne eminwa, ne emioyo giawu giri ale ni inze.

⁹Owunene owua wampa wuwula ne emirimo; engerera ziauwu ziri mala amang’ana aga awantu wateere mbwe galondwe.’ ”

Ekintu ekiesa okumwamia Omuntu

(Mari 7:14–23)

- ¹⁰Yesu yaeta omurima ogwa awantu mbwe wamuuzeko, mala awalaga otino, “Mutege amatwi muwurre.
- ¹¹Ekintu eki-ingira mu enda eya omuntu ngakigera no omuntu awa ‘otari omweru’ yaaya, ni ne ekifuma mu omunwa ogwa omuntu niki ekigera na awa ‘otari omweru.’ ”
- ¹²Nikuemao awalonzi waae wamugiako kandi wamuwuzia watino, “Omanyire mbwe Awafarisaayo ngawakawona geeza ni iwue ku amang’ana aga oema okuwalaga garia?”
- ¹³Yawairania mbwe, “Emiti giona agia Soifu ataasimba giiza okuiywa giona ne emizi giagio.
- ¹⁴Murekane na awakangasi awawuunu awo. Omuwuunu na a-ambiire omuwuunu omwina waae ensimbo, wona waaza okugwa mu owuina.”
- ¹⁵Petro yamulaga otino, “Tunawurreko ekia olugero olwo lulagana.”
- ¹⁶Yesu yawawuzia otino, “Kane mwona mukiawula no okuwurra?”
- ¹⁷Ngamuwona mbwe ekintu eki-ingira mu omunwa kigia mu enda ni kandi nikuemao kiafuma mu omuwiri?
- ¹⁸Ne ewintu ewifuma mu omunwa wiema mu omwoyo, kandi wino niwio ewigera no omuntu awa ‘otari omweru.’
- ¹⁹Aeniki ni mu omwoyo ogwa omuntu nimwo ewintu kiomo amaingirizio amawiiwi, owuisi, okugia no omukazi namba omusaaza owa owundi ku iseero, owusoodani, owuiwi, okufumia owuwoni owua owuweeyi, no okuwoola awantu, wiona wifumira.
- ²⁰Ewintu wino niwio ewigera omuntu na ‘atawa omweru,’ no okuria na amakono agataoziiwue ngakugera na awa ‘otari omweru.’ ”

Okuganya okwa omukazi otari Omuyaudi

(Mari 7:24–30)

- ²¹Yesu yafuma ao agia aaiwisre mu ewitemo ewia Taaya ni Sidooni.
- ²²Omukazi owa Kanaani owa mu ekitemo ekio yagia ku Yesu amurra na awoola otino, “Omwami Omuzia owa Daudi, mpambreko amagongi! Omwala wange anyaaasiwua ino ne ewikeeno ewimuriko.”
- ²³Yesu ngakairania ekintu, kutio awalonzi waae waamugiako wamuisasaama watino, “Omwami, mulage agie aeniki akuba erioga enyima wiifu.”
- ²⁴Iye yairania otino, “Inze nyatumwa ku Awaisraeli awateekere ki amagondi.”

²⁵Omukazi oyo yaaza mala akuba amasigamo gaae emberu wa Yesu na awoola mbwe, “Omwami, ntunzie!”

²⁶Yamuirania otino, “Ngakulootu omuntu okutoola owuita owua awaana arigizre embwa.”

²⁷Iye yairania otino, “Namba embwa ziona ziria ewisonyokerwa ewigwa ansi eya emeesa eya ng’inazio.”

²⁸Nikuemao Yesu yamuirania mbwe, “Omukazi iwue, ori no okuganya okukaate! Okusawa kwao kutuusiziiwue.” Kandi omwala waae yalama mu enyinga ezio.

Yesu alamiizie awalwire awangi enze eya ekialo ekia Awayaudi

(Mari 7:31–37)

²⁹Yesu yafuma ao agia ku ensanyaata eya enyanza eya Galiili. Nikuemao yaniina agia ku ekigiri kandi aikala ansi.

³⁰Omurima omukaate gwamuuzako ni wareetere awa amagulu gaadembuka, awawuunu, awarema, awarimba, na awaalwalanga amalwire gandi agagawuke-gawuuke, wawagolola emberu wa Yesu kandi yawalamia woona.

³¹Awantu waaluguula okuwona awarimba ni wagamba-gamba, awa amagulu gaadembuka ni wagenda-genda, awarema ni walama kandi awawuunu ni wawona. Kino kiagera watondowola Katonda owa Awaisraeli.

Yesu aeere awantu elufu wine awatari Awayaudi okuria

(Mari 8:1–10)

³²Yesu yaeta awalonzi waae wamuuzeko kandi awalaga otino, “Mpambra awantu wano amasaasra. Wamiire okuwa ni inze ku amiire asatu goona, kandi nyingeeno wawula ne ekia wakaria. Nanyagala okuwareka wagie ne enzala aeniki omuuka guuza gwawawuera ku engira ni wagia.”

³³Awalonzi waae waamuirania watino, “Tukatuukrai emikaati egikasuga awantu awangi watino aa turi ale ne emigizi ano.”

³⁴Yesu yawawuuzia otino, “Muri ne emikaati imeka?” Wamuirania mbwe, “Musamvu ne emvwa entono-ntono.”

³⁵Yesu yasikirra omurima ogwa awantu awo mbwe waikale ansi.

³⁶Nikuemao yatoola emikaati musamvu ne emvwa ezio mala aikazia Katonda nikwo agigenyula. Yagitoola agiezania ku awalonzi waae kugere wagawire awantu awo okuria kandi waagiezania ku omurima ogwa awantu awo.

³⁷Awantu woona waaria nawuno waiguta du! Olwa waamala kuria, awalonzi wakunza ewimega ewia ewiokuria ewiasigala, mala wisuga ewidida musamvu.

³⁸Awantu awaaria woona, awasaaza weng’ene no orekere awakazi na awaana enze, waawanga elufu wine.

³⁹Olwa Yesu yamala okureka omurima ogwa awantu gugia, yaingira mu owuato ampi ni Magadaani.

Mathaayo 16

Awakangasi awa Awayaudi wagala wakorrwe amankono

(Mari 8:11–13; Luuk 12:54–56)

¹Awafarisaayo na Awasadukaayo wandi waaza ku Yesu okumugeezaania ni wamuwuuzia mbwe awakorreko ekilago ekiema ku igulu.

²Yesu yawairania otino, “Igulu ni riakaanye enyinga ezia igulo, aweene muwoola mbwe omuyaga guuza okuwa omulootu.

³Ni igulu ni riakaanye kandi ni rizigre enyinga ezia kunkio, muwoola mbwe emvula eeza okukuba. Okwo kulagana mbwe mumanyire okusoma okufwanana okwa igulu. Ni kukawa kutio, ngamumanyire okusoma ewintu ewiikola mu amiire agaturimo gano.

⁴Awantu awa ikula iwiiwi kandi eritarindre endagano, niwo awagala mbwe wakorrwe amankono kiwaweere ekilago! Ni kiwulao ekilago ekia waaza okueewua ekigawuuke ne ekilago ekia Omugambi Yoona.” Nikuemao Yesu yarekana nawo afuma agia.

Muwe amankaga no omumera ogwa awakangasi awa ediini eya Awayaudi

(Mari 8:14–21)

⁵Olwa wa-ambuka enyanza wagia engereka indi, awalonzi waae waalawira okutoola emikaati.

⁶Yesu yawalaga otino, “Muwe amankaga kandi muirinde ku omumera ogwa Awafarisaayo na Awasadukaayo.”

⁷Waagamba-gamba agati yaawu aweene ni wawoola watino, “Paka kuwe mbwe awoola otio aeniki ngatukatoola emikaati.”

⁸Yesu yawanga na amanyire ekia waawoolanga kino, kutio yawawuuzia otino, “Inywe awantu awawula no okuganya wano, mugamba-gamba ku okuwula ne emikaati kolaki?

⁹Mukiawula no okuwurra? Ngamuingiriziako emikaati itaanu egiasuga awantu elufu witaanu, ne ewidida ewia mwakunza?

¹⁰Namba emikaati musamvu egiasuga awantu elufu wine, ne ewidida ewia mwakunza?

¹¹Kuwa kutie mbwe murekere okumanya mbwe ekia ngamba-ngambreko ng’ane emikaati yaaya? Ni muwe amankaga kandi muirinde ku omumera ogwa Awafarisaayo na Awasadukaayo.”

¹²Ku okuwoola otio, waagia wamanya mbwe Yesu ngakawalaganga mbwe wairinde ku omumera ogukolwa nagwo okufumba omukaati, ni ku engerera eya Awafarisaayo na Awasadukaayo.

Petro awoorre mbwe Yesu nio Meesia

(Mari 8:27–30; Luuk 9:18–21)

¹³Olwa Yesu na awalonzi waae waagia watuuka a-ampi ne ekitemo ekia Kaisaria Filiipi, yawuuzia awalonzi waae otino, “Awantu wawoola mbwe Omuzia owa Omuntu ari anu?”

¹⁴Waamuirania watino, “Awandi wawoola mbwe ni iwue Yowaana Omubatiisi, awandi mbwe ori Eliija na awandi woona mbwe ni iwue Yeremia namba omulala ku awagambi awa Katonda.”

¹⁵Yesu yawawuuzia otino, “Ni inywe muwoola mbwe ni inze anu?”

¹⁶Simioni Petro yairania na awoola mbwe, “Ni iwue Meesia, Omuzia owa Katonda omulamu.”

¹⁷Yesu yamuirania na awoola otino, “Osereekwe iwue Simioni omuzia owa Yoona, aeniki okusasuriire eking’ana kino ni Soifu ori ku igulu, otari omuntu yaaya.

¹⁸Kandi nkulaga iwue mbwe ori Petro kandi ku iwaale rino, nyiza okuombokako ekaniisa kiangе, kandi ewikulo ewia ekialo ekia awafu ngawiiza okukikira, yaaya.

¹⁹Nyiza okuku-aa ewifunguo ewia Owuami owua ku igulu. Ekintu-ukintu ekia orisiwa ku ekialo kiiza okusiwua ku igulu, kandi ekintu-ukintu ekia orisiwula ku ekialo, kiiza okusiwulwa ku igulu.”

²⁰Nikuemao yawagaania wukalu mbwe wataaza walaga omuntu mbwe yawanga Meesia.

Yesu agamba-gambre ku okufwa kwae

(Mari 8:31–33; Luuk 9:22)

²¹Okuemera ao, Yesu yatanika okulaga awalonzi waae mbwe yasugananga agie Yerusaleemu, aa yagianga okunyaasiwua mu amakono aga awagaaka awa ediini eya Awayaudi, awakangasi awa awoozia, alala na awagerezi awa endagirra. Yawalaga mbwe kwanigirizia mbwe aitwe afwe kandi aziuke owuire owua okusatu awe omulamu kandi.

²²Petro yamutoola agia nae antulo mala atanika okumusiagizia otino, “Yaaya Omwami! Ewio ngawisugre wikuikorre yawa.”

²³Yesu yagaluka alaga Petro otino, “Ema emberi wange, iwue Sataani! Ori ekigazio kiangе kandi owula ne ewintu ewia Katonda mu amaingirizio gaao, ni mala ewintu ewia awantu niwio ewia omanyire.”

Oagala okuwa omulonzi wa Yesu paka aganye okufumia owulamu wuae

(Mari 8:34—9:1; Luuk 9:23–27)

²⁴Nikuemao Yesu yalaga awalonzi waae otino, “Omuntu oogala okundonda, paka asooke ailowe iye omwene kandi atoole omusalaaba gwae andonde.

²⁵Aeniki omuntu-umuntu oogala okununula owulamu wuae iye omwene, aaza okuwurigiza. No omuntu origiize owulamu wuae ku amang’ana gange, iye aaza okutuukra owulamu.

²⁶No owulootuuki no omuntu atuukiire ekialo kiona, na ateesie owulamu wuae? Kusi kiriooko ekintu ekia omuntu aesa okugalusania nakio owulamu wuae?

²⁷Omuzia owa Omuntu aaza okuuzza ne enyankoi waae mu owunene owua Swae, kandi nikuemao aaza oku-aa omuntu ki omuntu empanwa yaae owuagani ne emirimo egia yakola.

²⁸Mbalaga kuwuene mbwe awandi ku awantu awari ano ngawarifwa ni wakiari okuwona Omuzia owa Omuntu na airana no owuami wuae.”

Mathaayo 17

Embonekano eya Yesu egaluuke enzeru zerre

(Mari 9:2–8; Luuk 9:28–36)

¹Na amiire mukaaga gaamala okuwita, Yesu yatoola Petro, Yakoobo ni Yowaana, afuma nawo waniina ku ekigiri ekiliire okuwa aweene.

²Eyo embonekano eya Yesu yagaluka emberi waawu. Ekieni kiae kiang’ena-ng’ena ki enyanga, kandi enguwo ziae ziawa enzeru zerre ki owueru.

³Ku enyinga eziazane ezio, awantu wawiri waawafumira. Awantu awo waawanga Muusa ne Eliija, awaagamba-gambanga ni Yesu.

⁴Petro yalaga Yesu otino, “Omwami, kuri kulootu mbwe turi ano. No oganyire, nyiza okuomboka ewigiti wisatu ano, kilala kiiza okuwa ekiao, ekindi ekia Muusa, ne ekindi ekia Eliija.”

⁵Ni Petro yawanga na akiagamba-gamba, ire erieru zerre riaika riwasanikizia, kandi omwoyo gwaema mu ire ogwawoola mbwe, “Ono nio Omuzia wange owa ngonziizie kandi owa nsangaarre nae. Mumuwurre!”

⁶Olwa awalonzi awo waawurra otio, waagwa ansi amafunikira, no owuti wuwa-ambre ino.

⁷Ni Yesu yawagiako awa-amba na awalaga otino, “Mueme, mutatia.”

⁸Olwa waawarra kungulu, awulao omuntu owa waawona ogawuuke ni Yesu.

⁹Ni waaikanga ni waema ku ekigiri, Yesu yawasikirra na awalaga otino, “Mutaaza mwalaga omuntu ekintu ekia muwuine, nawuno Omuzia owa Omuntu aziusiwue aeme ku awafu.”

Okuirana okwa Omugambi Eliija

(Mari 9:11–13)

¹⁰Awalonzi waae waamuwuzia watino, “Ekigera na awagerezi awa endagirra wawoola mbwe Eliija nio owasugananga asookere Meesia okuuzza niki katio?”

¹¹Yesu yawairania na awoola otino, “Kuwuene Eliija nio osooka okuuzza kugere airanie ewintu wiona wiwe geeza.

¹²Ni mbalaga mbwe Eliija yamiire okuuzza. Ni kukawa kutio, ngawakamumanyirizia yaaya, ni iwo wamiire okumukorra ewintu wiona ewia aweene waagalanga. Nintio lwona Omuzia owa Omuntu aaza okunyaasiwua mu amakono gaawu.”

¹³Kuno kwagera awalonzi waae wamanya mbwe owa Yesu yagamba-gambangako yawanga Yowaana Omubatiisi.

Yesu alamiizie omuzia owawanga ne ekikeeno

(Mari 9:14–29; Luuk 9:37–43a)

¹⁴Olwa waatuuka ku omurima, omuntu omulala yaaza ku Yesu, amukubra amasigamo ansi.

¹⁵Yamulaga otino, “Omwami, ambra omuzia wange amagongi, aeniki agwa emvuwu kandi ainyaasia ino. Kangi amiire okugwa mu omurro namba mu amanzi.

¹⁶Nyaa ni muretiire awalonzi waao, no okumulamia kuwakirre.”

¹⁷Yesu yairania na awoola otino, “Oo inywe ikula erioneeke kandi eriwula no okuganya rino! Nyiza okuwa ni inywe ni nsikiizie omwoyo ku amang’ana giinyu kutuuka ri? Mutoole omuzia oyo mumundeetere ano.”

¹⁸Yesu yasiagizia ekikeeno ekio kimuemeko mala kimuemako, kandi omuzia oyo yawa omulamu okuemerera ao.

¹⁹Nikuemao awalonzi waae waamugiako na ari omwene, wamuwuzia watino, “Ekigera ne ekikeeno ekio kiasa ni kitukirre okufumia niki?”

²⁰Yawairania otino, “Kiasa ni kiwakirre aeniki muri no okuganya okutono ino. Mbalaga kuwuene mbwe muweeko namba no okuganya okutono ki emwo eya karadaali, muesa okulaga ekigiri kino mbwe, ‘Ema ano, ogie aaria’ kandi kikakola otio. Kiwulao-uwula ekintu ekitaaza okureka okuesekana ku inywe.

²¹[Ne ekikeeno ekifwana kino kifumiziwua mala ku okusawa no okusiwa okuria.]”

Yesu agamba-gambre kandi ku okufwa no okuziuka kwae

(Mari 9:30–32; Luuk 9:43b–45)

²²Olwa waaikumia alala Galiili, Yesu yawalaga otino, “Omuzia owa Omuntu aaza okuguziwua, atewue mu amakono aga awantu

²³awaaza okumuita, kandi owuire owua okusatu aaza okuziusiwua aeme ku awafu awe omulamu kandi.” Kino kiagera owululu wuingirra awalonzi waae ino.

Okufumia omusolo ogwa ekaalu

²⁴Yesu na awalonzi waae waagia watuuka Kapernaumu. Eyo awasolozzi awa omusolo ogwa awantu wafumizizia emirimo egia mu ekaalu, waagia ku Petro wamuwuzia watino, “Omugerezi iinyu ono mberi afumia omusolo ogwa ekaalu?”

²⁵Petro yawairania otino, “Ee, afumia.” Olwa Petro yaingira mu enyumba, Yesu nio owasooka okugamba-gamba nae. Yawuuzia Petro otino, “Oingirizia otie Simioni? Awaami awa ku ekialo wasolozia omusolo ku anu? Ku awazia waawu, kusi ku awantu wandi awasaasa?”

²⁶Petro yamuirania mbwe, “Ku awantu wandi.” Yesu yamulaga otino, “Kutio awazia waawu iwo ngawafumia.

²⁷Ni kugere wataaza wawona ni ifwe uwiiwi, fuma ogie mu enyanza ogie otege ilowo riao. Toola emvwa eya ogia okusooka okuamba owarre mu omunwa gwayo. Ooza okutuukramo isendi ilala erisugre okuoloola omusolo gwao no ogwange. Toola isendi erio ori-ee awasolozzi awa omusolo awo ki omusolo gwao no ogwange.”

Mathaayo 18

Omunene okukira awandi mu Owuami owua ku igulu

(Mari 9:33–37; Luuk 9:46–48)

¹Enyinga ezio, awalonzi awa Yesu waamugiako kandi wamuwuzia watino, “Omunene okirre wona mu Owuami owua ku igulu naanu?”

²Yesu yaeta omwana omuto aaza amuemerezia agati yaawu.

³Yawalaga otino, “Mbalaga kuwuene mbwe ni mutagaluuke muwe ki awaana wato, ngamuri-ingira mu Owuami owua ku igulu, yaaya.

⁴Kutio omuntu-umuntu oisiizie ansi yawa ki omwana ono, nio omuntu omunene okirre wona mu Owuami owua ku igulu.

⁵Kandi omuntu-umuntu oingiizie omwana omuto ki ono, ku eriina riange, anyingiizie inze.

Ogera Omukristo na airana enyima mu okuganya ariwona owululu

(Mari 9:42–48; Luuk 17:1–2)

⁶“No, omuntu ogera omulala ku awantu awanganyireko ki awaana awato wano, na areka okuwa no okuganya ku inze, kuri kulootu okukira na asiwirweko oluwaare ku igosi, agie arigizwe mu enyanza.

⁷Kuriweera wululu awantu awakola ewintu ewigera na awantu wareka okuwa no okuganya ku inze! Ewintu ki ewio paka wiweeo, ni kuriweera omuntu owireeta wululu ino!

⁸Ni kuri mbwe okukono namba okugulu kwao nikwo okugera no oingira mu owuoni, kukenge kuemeo okurigize ale. Kulootu no oingiire mu owulamu no owula ne ekiimo ekilala, okukira okuwa na amakono awiri na amagulu awiri, no owutuukre origizwe mu omurro ogwa amiire goona.

⁹Kandi ni kuri mbwe eriiso riao nirio erigera no oingira mu owuoni, rikumbule riemeo oririgize ale. Aeniki kuri kulootu okuingira mu owulamu ne ekidong’o, okukira okuwa na amiiso awiri, no owutuukre origizwe mu omurro.”

Olugero olwa igondi eriateeka

(Luuk 15:3–7)

¹⁰Yesu yagia emberi na awoola otino, “Omuntu ataaza yatoola wutono namba omulala ku awantu awanganyireko ki awaana awato wano. Aeniki mbalaga mbwe enyankoi awawaimeriire ku igulu wawarra Soifu ori ku igulu mu amiiso enyinga ziona.

¹¹[Aeniki Omuzia owa Omuntu yaaza okununula awantu awaateeka.]

¹²“Muingirizia mutie? No omuntu ari na amagondi mia kilala, ni ilala rigie riteeke, ngareka amagondi amakumi kienda ni kienda, yagia ku ewigiri okuagala ilala eriteekere erio?

¹³Kandi na arituukiire, mbalaga kuwuene mbwe awa omusangaavu ni igondi ilala eriateeka erio okukira amakumi kienda ni kienda agataateeka garia.

¹⁴Mu engira efwanani, Soinyu ori ku igulu ngagala mbwe namba omulala ku awanganyireko ki awaana awato wano ateeke.

Ekia osugaane okole ni wamwinyu akuoneere

(Luuk 17:3)

¹⁵“Ni wamwinyu akuoneere, mugieko ogie omulage owuwi owua akukoriire, ni muri nae wawiri. Na akuwuriire, irania empurizanio agati yaa ni wamwinyu oyo.

¹⁶Ni, na alowere okuwurra agaa, toola omuntu omulala namba awantu wawiri mumugieko, kugere ‘amang’ana goona gasigikwe na awantu wawiri namba wasatu.’

¹⁷Na akialowere-ulowa, ta amang’ana ago emberi wa ekaniisa. Ni na akialowere okuwurra kugia ekaniisa, mutoole ki omuntu otamanyire Katonda namba ki omusoloji owa omusolo.

¹⁸“Mbalaga kuwuene mbwe ekintu-ukintu ekia musiwre ku ekialo, kisiwirwe ku igulu kwona, kandi ekintu-ukintu ekia musiwuule ku ekialo, kiiza okusiwulwa ku igulu kwona.

¹⁹“Lwona mbalaga mbwe na awantu wawiri ku inywe ku ekialo kuno, wawurizaanie ku ekintu-ukintu ni wasawa, waaza okueewua ekintu ekio ni Soifu ori ku igulu.

²⁰Aeniki aa awantu wawiri namba wasatu waikumiizie ku eriina riange, omwene ndi agati yaawu.”

Olugero olwa owemirimo owula na amasaasra

²¹Nikuemao Petro yaaza ku Yesu amuwuuzia otino, “Omwami, nsugaane ndekere wamwifu onkoriire uwiiwi aa kameka? Musamvu, kusi aa kameka?”

²²Yesu yamuirania mbwe, “Yaaya, ng’a musamvu, ni na amakumi musamvu ni musamvu.

²³“Kutio Owuami owua ku igulu wukafwananiwua no omwami omulala owagalanga okuwala ewintu ewia yata mu amakono aga awemirimo waae.

²⁴Mu okutanika-utanika otino, omuntu owawanga no omusango gwae ogwa amasendi amangi ino yareetwa emberi waae.

²⁵Olwa okuoloola omusango kwamukira, omukangasi oyo yasikirra mbwe iye ni mukaae, na awaana waae, alala ne ewintu ewia waawanga nawio wiona, wiguziwue amasendi kugere omusango ogwo guoloolwe.

²⁶Owemirimo oyo yagwa mu amasigamo gaae emberi wa omukangasi waae, na amuiyemba na awoola otino, ‘Ganya ompe iwaga, nyiza okukuoloola omusango gwao gwona.’

²⁷Omukangasi waae yamuambra amasaasra mala amurekera omusango ogwo gwona kandi amulekula agia.

²⁸“No olwa owemirimo oyo yafuma na agia, ya-agaana owemirimo omwina waae owawanga no omusango gwae ogwa amasendi amatono. Yamuamba igosi atanika okumugoga na amulaga mbwe, ‘Mpoloole omusango gwange ogwa ori nagwo!’

²⁹“Owemirimo omwina waae yagwa mu amasigamo amuiyemba otino, ‘Ganya ompe iwaga, nyiza okukuoloola omusango gwao.’

³⁰“Ni iye yalowa asiriisia, kandi aa okumu-aa iwaga, yagia emberi mala agera omuntu oyo arigizwa mu owusiwe nawuno amuolole omusango ogwo.

³¹Olwa awemirimo wandi waawona ekiaikola ekio, waaluunya ino kandi waafuma wagia walaga omukangasi waawu amang’ana goona agaaikola.

³²“Nikuemao omukangasi oyo yaeta owemirimo oyo aaze emberi waae. Yamulaga otino, ‘Iwue owemirimo omuwiiwi ono! Nyema okukurekera omusango gwange ogwa wawerenga nagwo gwona ku okuiyemba okwa wanyiyembere mbwe nkurekere.

³³Iwue katio ngokasugaane oambre owemirimo omwina waa amasaasra kiomo neena nkuambiire amasaasra?’

³⁴No okusu okungi, omukangasi waae yamuta mu amakono aga awasikare awa mu owusiwe, anyaasiwue nawuno amuolole omusango gwae ogwa yawanga nagwo gwona.

³⁵Nintio Soifu ori ku igulu aaza okukorra omulala ki omulala ku inywe, ni mutarekeere waamwinyu ne emioyo giinyu giona.”

Mathaayo 19

Yesu agerera ku okurekana no omukazi

(Mari 10:1–5; Luuk 16:18)

¹Olwa Yesu yamala okuwoola amang’ana gano, yafuma Galiili agia mu ekitemo ekia Yudeea, ekiri engereka indi eya oluuzi olwa Yordaani.

²Omurima omungi ogwa awantu gwamulonda kandi yalamia awalwire awaawanga agati yaawu.

³Awafarisaayo wandi wamuuzako okumugeezaania. Waamuwuzia watino, “Endagirra iifu lwona eganyiire omusaaza okurekana no omukazi waae ku ing’ana-uing’ana?”

⁴Yesu yawairania otino, “Inywe mukiari okusoma mbwe mu owutanikro Omulusi ‘yawaluka omukazi no omusaaza,’

⁵kandi awoola mbwe, ‘kuno kugera omusaaza areka swae ni ng’ina mala yaizoga ni mukaae, kandi awantu wawiri awo wawa ekintu ekilala’?

⁶Kutio awantu awo ngawari wawiri yaaya, ni wari ekintu ekilala. Kandi kutio ekia Katonda ateere alala, omuntu ataaza yagawula, yaaya.”

⁷Waamuwuzia mbwe, “Ekigera ni Muusa yasikirra mbwe omusaaza aesa oku-aa omukazi waae itu eria okurekana, mala yarekana nae kane niki?”

⁸Yesu yawairania otino, “Muusa yawaganyira okurekana na awakazi wiinyu aeniki emitwe giinyu giawanga emikalu. Ni ng’anintio kwawanga okuemera mu owutanikro, yaaya.

⁹Mbalaga mbwe omuntu-umuntu orekaane ni mukaae, ni kutari mala ku amang’ana aga okugia ku owuriri no omusaaza wundi, mala yatoola omukazi wundi, omuntu oyo ari omusoodani.”

¹⁰Awalonzi waae waamulaga watino, “Ni kuri mbwe nintio amang’ana gari agati ya omukazi no omusaaza, kane kulootu no omuntu atakwere.”

¹¹Yesu yawairania otino, “Ng’ani mbwe woona waesa okuingizia ing’ana rino. Ni, ni mala awantu awa Katonda nio oere owuesani.

¹²Wario awantu awataesa okukwa aeniki wari awasowole awaaiwulwa otio, awandi waasowolwa na awantu; na awandi walowere okukwa ku amang’ana aga

Owuami owua ku igulu. Omuntu oesa okuingizia ing'ana rino, asugaane akole otio.”

Yesu asereeke awaana awato

(Mari 10:13–16; Luuk 18:15–17)

¹³Awaana awato waareetwa ku Yesu, kugere awateeko amakono kandi awasawire. Na awalonzi waae waagaania awantu awaawareeta awo.

¹⁴Ni Yesu yawoola otino, “Mureke awaana awato wanyizeko, kandi mutawalowera yaaya. Aeniki Owuami owua ku igulu wuri owua awantu awari ki awaana wano.”

¹⁵Yata amakono ku awaana awo, nikuemao yafuma ao.

Omuwuuka omunyazi

(Mari 10:17–27; Luuk 18:18–27)

¹⁶Omuntu wundi yaaza ku Yesu amuwuuzia otino, “Omugerezi, ekilootu ekia nsugaane nkole kugere ntuukre owulamu owutawua niki?”

¹⁷Yesu yamuirania mbwe, “Ombuuzia ekintu ekilootu kolaki? Omulootu no omulala weng'ene. No oogala owulamu owutawua, rinda ensikirra.”

¹⁸Omuntu oyo yamuwuzia mbwe, “Ensikirra eziriai?” Yesu yamuirania mbwe, “Ensikirra kiomo 'Otaita, otasooda omukazi owa owundi, otaiwa, otata ku omuntu amang'ana aga owuweeyi,

¹⁹tia swao ni ng'inwao,' alala ni 'gonzia omwina waa o kiomo oigonziizie iwua omwene.' ”

²⁰Omuwuuka oyo yamulaga otino, “Ensikirra zino ziona miire okurinda, ekia nkeeyire niki katio?”

²¹Yesu yamuirania mbwe, “No oogala okuwa omulongoole owula ne ekintu ekikukeeyire, gia oguzie ewintu wiao wiona, otoole ewia onatuukramo o-ee awataka, nikwo ooza okuwa no owuwiiko ku igulu. No omiire okukola otio, ooze ondonde.”

²²Olwa omuwuuka oyo yawurra otio, yafuma agia na awula no owusangaavu namba wutoono, aeniki yawanga no owunyazi wungi.

²³Nikuemao Yesu yalaga awalonzi waae otino, “Mbalaga kuwuene mbwe kuri kukalu omunyazi okuingira mu Owuami owua ku igulu.

²⁴Lwona mbalaga mbwe kuri kunyoowu engamia okuingira mu iwundu eria esindaano okukira omunyazi okuingira mu Owuami owua Katonda.”

²⁵Olwa awalonzi waae waawurra ing'ana erio, waazinduka ino kandi waawuzia watino, “Oesa okununulwa katio naanu?”

²⁶Yesu yawawarra mala awoola otino, “Ku omuntu kino ngakiesekana, ni ku Katonda ewintu wiona wiesekana.”

Ekia turituukra ku okulonda Yesu

(Mari 10:28–31; Luuk 18:28–30; 22:28–30)

²⁷Petro yamuirania mbwe, “Omwami, ifwe tureekere ewintu wiona tukulonda! Niki ekia turieewua katio?”

²⁸Yesu yawalaga mbwe, “Mbalaga kuwuene mbwe, ne ewintu wiona wiiza okugalusiwua wiwe ewiyia, olwa Omuzia owa Omuntu ari-ikala ku entewe yaae eya owunene, inywe awamiire okunonda mwona muri-ikala ku entewe ikumi ni iwiri ezia owuami, okukengera ewiriango ikumi ni wiwiri ewia Israeli ekiina.

²⁹Kandi omuntu ki omuntu omiire okureka amayumba, namba waamwawu awekizia, namba awekiala, namba swae, namba ng’ina, namba awaana, namba emisiri ku amang’ana gange, aaza okutuukra mia kilala kangi okukira kandi arituukra owulamu owutawua.

³⁰Na awantu awangi awakangaate wariwa enyima, kandi awantu awangi awari enyima warikangata.”

Mathaayo 20

Olugero olwa awemirimo mu omusiri ogwa omuzabiibu

¹Yesu yagia emberi na awalaga otino, “Owuami owua ku igulu wuesa okufwananiwua ni ng’ina omusiri owafuma kunkio okugia okuagala awemirimo waaze wamukorre mu omusiri ogwa omuzabiibu.

²Yaganyana nawo mbwe yaazanga okuwaoloola edinaari endala ku owuire, nikuemao awatuma mu omusiri gwae.

³“Ni ziagianga okutuuka enyinga isatu ezia kunkio, yafuma kandi agia awona awantu wandi ni wakola wusa mu ekiiyia.

⁴Yawalaga otino, ‘Inywe mwona mugie mukole mu omusiri gwange ogwa omuzabiibu, ni nyiza okuwaoloola ekisugre.’

⁵Kutio waafuma wagia. “Yafuma kandi agia akola owufwanani ni zigia okutuuka enyinga ezia mukaaga, ne enyinga ezia kienda.

⁶Ne enyinga ikumi ne endala ziwanga ampi, yafuma kandi agia atuukra awantu wandi ni ewaimeriire ampi ao. Yawawuuzia otino, ‘Ekigera ni mumiire okuwa ni muimeriire ano owuire wuona ni mukola wusa niki?’

⁷“Iwo waamuirania mbwe, ‘Aeniki awulao omuntu omiire okutu-aa emirimo.’ “Yawalaga mbwe, ‘Kane mwona mugie mukole emirimo mu omusiri gwange.’

⁸“Olwa kwatuuka igulo, ng’ina omusiri yalaga owemirimo waae owawanga na aimeriire awemirimo wandi otino, ‘Eta awemirimo wange kugere owaoloole omusaara gwawu. Tanika na awatoorrwe lunyima.’

⁹“Awemirimo awaawanga ni watoorrwe enyinga ezia ikumi ne endala waaza, kandi omulala ki omulala yaeewua edinaari endala.

¹⁰Kutio olwa awantu awatoolwa kuluweri waaza, waaingirizianga mbwe iwo wanaeewua amasendi amangiko. Ni woona waaeewua mala edinaari endala-ndala.

¹¹Olwa waamala okutoola, waatanika okung’ong’oonra ng’ina omusiri ni wawoola watino,

¹²‘Awantu awatoorrwe lunyima wano iwo wakorre emirimo mala ku enyinga endala eng’ene, ni nyingeeno owa-aa omusaara owuagani ni ifwe awakorre emirimo emikalu ku iwasu owuire wuona.’

¹³“Ni iye yawairania omulala ku iwo na amulaga otino, ‘Omwiko wange, wuwulao owuwi owua nkukoriire namba wutoono. Ngatwawurzania mbwe nyiza okuku-aa edinaari endala ku emirimo giao?

¹⁴Toola omusaara gwao ogie. Ni inze oogala oku-aa omuntu oema okutoolwa lunyima, omusaara oguagana no ogwa nkueere.

¹⁵Naanu oesa okundowera okukola ekia mbwine na amasendi gange? Kusi iyari rikuamba aeniki ndi omu-aani?’ ”

¹⁶Yesu yamariizia na awoola mbwe, “Kutio okangaate ariwa enyima, kandi ori enyima arikangata.”

Yesu agamba-gambre olwa okusatu ku okufwa kwae

(Mari 10:32–34; Luuk 18:31–34)

¹⁷Ni Yesu yagianga Yerusaleemu, yatoola awalonzi waae ikumi ni wawiri agia nawo antulo kandi awalaga otino,

¹⁸“Wuno tugia Yerusaleemu, kandi Omuzia owa Omuntu agia okuguziwua ku awakangasi awa awoozia na awagerezi awa endagirra. Waaza okumukengera ekiina ekia olumbe,

¹⁹kandi wagia okumuta mu amakono aga awantu awatari Awayaudi wamukorre amatiicha ni wamuswawuka kandi wamuwambe ku omusalaaba. Owuire owua okusatu, aaza okuziusiwua awe omulamu kandi!”

Okusawa okwa ng’inwawu Yowaana ni Yakoobo

(Mari 10:35–41)

²⁰Nikuemao ng’inwawu Yowaana ni Yakoobo, awazia awa Zebeedi yaaza ku Yesu na awazia waae wawiri. Yakubra Yesu amasigamo ansi amusawa mbwe aganye amukorre kiomo yagalanga.

²¹Yesu yamuwuzia mbwe, “Oagala nkukorreki?” Yamuirania na awoola otino, “Ganya omulala ku awazia wange wawiri wano aikale nyakukono kwao okusaaza no owundi nyakukono okumosi mu owuami wuao?”

²²Yesu yawalaga otino, “Ngamumanyire ekia musawa. Inywe mwona muesa okunywera ekikombe ekia eminyako-nyaako ekia nyiza okunyweramo?” Wamuirania ni wawoola mbwe, “Ee tuesa.”

²³Yesu yawalaga otino, “Kuwuene okunywa ni muuza okunywera mu ekikombe ekia noona nyiza okunyweramo. No okuikala nyakukono kwange okusaaza namba okumosi ng’ani inze oesana iwaga, yaaya. Amawaga ago, na aga awantu awa Soifu Katonda nio oteeriire.”

²⁴Olwa awalonzi ikumi wandi waawurra watio, waawona uwiiwi na awazia wawiri awa omuntu omulala awo.

Oagala okukangata paka awe omukurumu owa awandi

(Mari 10:42–45; Luuk 22:24–30)

²⁵Yesu yawaeta alala mala awalaga mbwe, “Mumanyire mbwe awaami awa awantu awa ekialo kino wari awatinzi kandi walagana amaani aga wari nago ku awantu awa wakangatiire.

²⁶Ku inywe ng’anintio kusugaane kuwe, yaaya. Aa mukakorre mutio, omuntu oagala okuwa omunene agati iinyu paka awe owemirimo wiinyu,

²⁷kandi oagala okuwa owa kuluweri paka awe omukurumu iinyu.

²⁸Ee, kuri mala kiomo Omuzia owa Omuntu ngakaaza mbwe awantu wamukorre, ni yaaza okukorra awandi, no okufumia owulamu wuae kugere awantu wasiwulwe waeme mu amawi.”

Yesu alamiizie awawuunu wawiri

(Mari 10:46–52; Luuk 18:35–43)

²⁹Ni Yesu na awalonzi waae waafumanga Yeriiko, awantu awangi ino waumulonda.

³⁰Awawuunu wawiri waawanga ni waikaale ku entulo eya engira, kandi olwa waawurra mbwe Yesu yawitanga, waoogerera wukaalu watino, “Omwami Omuzia owa Daudi, tuambre amagongi!”

³¹Awantu awaawanga mu omurima ogwo waawagaania mbwe wasarigire, ni iwo waoogerera wukalu okukira ni wawoola mbwe, “Omwami Omuzia owa Daudi, tuambre amagongi!”

³²Yesu yaemerra kandi awaeta. Yawawuuzia otino, “Ekia muagala mbwe mbakorre niki?”

³³Waamuirania mbwe, “Omwami, tuagala okuwona.”

³⁴Yesu yawa-ambra amagongi mala a-amba amiiso gaawu. Ao-ao, waatanika okuwona kandi wumulonda.

Mathaayo 21

Yesu aingiziwue Yerusaleemu ne ekisangaalo

(Mari 11:1–11; Luuk 19:28–40; Yowa 12:12–19)

- ¹Ni waawanga ampi okutuuka Yerusaleemu, ni wari Bethfaage ku ekigiri ekia Zaituuni, Yesu yatuma awalonzi waae wawiri
- ²na awalaga otino, “Mugie mu ekitemo ekiri emberi kiiria, aa mugia okutuukrao entikiri embuuka ne esiwirwe ao alala ni ng’ina wayo. Muzisiwule, muzindetere ano.
- ³No omuntu awawuziizie ekintu, mumulage mbwe Omwami nio oziagala, kandi aaza okuzireka muuze nazio ni watawanyaaasiizie na amang’ana amangi.”
- ⁴Kino kiaikola okutuusia amang’ana agaawoolwa no omugambi mbwe:
- ⁵“Laga Omwala owa Sayuuni mbwe, ‘Wonako, Omwami waaoko akuuzako, omulu ziri kandi na aniinre ku entikiri, ku entikiri embuuka, omwana owa entikiri.’ ”
- ⁶Awalonzi awo waafuma wagia wakola ekia Yesu yawalaga ekio.
- ⁷Waareeta entikiri alala no omwana wayo, watoola enguwo ziwu wazitaako nikwo Yesu aniina aikala ku entikiri embuuka eyo.
- ⁸Omurima omungi ogwa awantu waa-anzuula enguwo ziwu ku engira, na awandi waavuna ensagia ezia emiti waziazia ku engira.
- ⁹Awantu awaawanga emberu na awaawanga enyima waae waaogerera ni wawoola watino, “Osaana ku Omuzia owa Daudi! Asereekwe iye ooza ku eriina eria Omwami Katonda! Osaana ku ori kungulu okukira!”
- ¹⁰Olwa Yesu yaingira ku omugizi ogwa Yerusaleemu, yazegezia omugizi ogwo kandi awantu waatanika okuwuzia watino, “Ono naanu ono kane?”
- ¹¹Omurima ogwawanga ni Yesu gwairania otino, “Ono ni Yesu, omugambi owa Katonda oema Nazareeti mu ekialo ekia Galiili.”

Yesu arumuusie awaguzi mu ekaalu olwa okuwiri

(Mari 11:15–19; Luuk 19:45–48)

- ¹²Yesu yaingira mu ekaalu mala arumusia awantu awayatuukra ni waguzia kandi ni wagula ewintu omwo. Yafulukania emeesa ezia awagalusi awa amasendi, alala ne entewe ezia awantu awaaguzianga amaemba-emba.
- ¹³Yawalaga otino, “Kwajojwa mbwe ‘Enyumba yange eeza okuetwa enyumba eya okusawa’ ni inywe mugigaluusie ‘Owuiwiso owua awasakuzi.’ ”
- ¹⁴Awawuunu na awarema waamuuzako mu ekaalu, kandi yawalamia.
- ¹⁵No olwa awakangasi awa awoozia na awagerezi awa endagirra waawona ewintu ewikate-kaate ewia Yesu yakola kandi awaana ni wakuba erioga mu ekaalu ni wawoola mbwe, “Osaana ku Omuzia owa Daudi,” waawurra nawo uwiiwi ino.

¹⁶Okwo kwagera ni wawuuzia Yesu watino, “Owurra ewia awaana wano wawoola?” Yawairania mbwe, “Ee, inywe mukiari okusoma mu endagano mbwe, “‘Ogerre eminwa egia awaana awato na awakianuuna ni gikutondowola’?”

¹⁷Nikuemao yawareka afuma ku omugizi ogwo, agia paka Bethania, agia agona eyo.

Yesu afuwre omuti ogwa omukuyu gukala

(Mari 11:12–14, 20–24)

¹⁸Enkio walwo kunkio ni Yesu yairananga ku omugizi ogwa Yerusaleemu, enzala yamurianga.

¹⁹Yawona omuti ogwa omukuyu ku entulo eya engira, mala agugiako na aingirizia okugutuukrako ensaafu. No olwa yatuukra mala amatu geng’ene, yagulaga otino, “Otaaza wa-aamia ensaafu kandi!” Ao-ao, omuti ogwo gwakala.

²⁰Olwa awalonzi waae waawona ekiaikola ekio, waaluguula ni waawuuzia watino, “Omukuyu guno gureetre otie okukala wuangu-wuangu otino?”

²¹Yesu yawairania otino, “Mbalaga kuwuene mbwe ni muweere no okuganya aa muwula ni kaozi, ngamuuzi okuwa no owuesani owua okukola mala ekikoriirwe omukuyu guno kieng’ene, ni muuzi okuwa no owuesani owua okulaga namba ekigiri kino mbwe, ‘Gemuka oeme ano, ogie oirigize mu enyanza,’ kandi kuuza okuikola.

²²Ni muweere no okuganya, muuzi okutuukra ewintu wiona ewia musawire Katonda ni musawa.”

Awakangasi awa Awayaudi wawuuziizie Yesu aa amaani gaae gaema

(Mari 11:27–33; Luuk 20:1–8)

²³Yesu yaingira mu olwanyi olwa ekaalu kandi ni yagereranga, awakangasi awa awoozia alala na awagaaka awa Awayaudi waamuuzako wamuwuzia watino, “Amaaniiki aga okola nago ewintu ewia okola wino? Okueere amaani gano naanu?”

²⁴Yesu yawairania otino, “Noona nyagala okuwawuuzia okuwuuzia okulala. Ni munyiraanie, noona nyiza okuwalaga amaani aga nkola nago ewintu ewia nkola wino.

²⁵Yowaana yatuukrai amaani aga okubatiisa awantu? Gamuemera ku igulu ku Katonda, kusi ku awantu?” Waaikululana mu amang’ana agati yaawu aweene watino, “Ni tuwoorre mbwe ‘Gaamuemera ku igulu’ aaza okutuwuuzia mbwe, ‘Ekiawalowera okumuganyako katio niki?’

²⁶Ni, ni tuwoorre mbwe, ‘Gaamuemera ku awantu,’ tutiire awantu wano aeniki woona watoola Yowaana ki omugambi owa Katonda.”

²⁷Kutio waairania Yesu mbwe, “Ifwe ngatumanyire.” Nikuemao Yesu yawalaga mbwe, “Noona ng’anyiza okuwalaga aa amaani aga nkola nago ewintu wino gaema.”

Olugero olwa awazia wawiri

²⁸Yesu yagia emberu na awoola otino, “Muingirizia mutie? Yawangao omuntu owawanga na awazia wawiri. Yagia ku omulala amulaga mbwe, ‘Mwana wange, reero gia okole emirimo mu omusiri ogwa omuzabiibu.’

²⁹“Yairania swae mbwe, ‘Yaaya, ndowere nganyiza okukola otio!’ ni lunyima yagalusia amingirizio mala agia akola ekia swae yamulaga.

³⁰“Nikuemao swawu awazia awo yagia ku omuzia waae wundi agia amulaga ekia yalaga omwina waae. Iye yamuirania mbwe, ‘Ee, nganyire nyiza okukola otio,’ ni ngakagia akola otio.

³¹“Ku awazia wawiri wano, owakola ekia swawu yagalanga naanu?” Waamuirania mbwe, “Omuzia owasooka.” Yesu yawalaga otino, “Mbalaga kuwene mbwe awasolozu awa omusolo na awasondo wawasookra okuingira mu Owuami owua Katonda!

³²Aeniki Yowaana yaaza okuwalaga engira eya owuigolovu, ni ngamukamuganyako, na awasolozu awa omusolo alala na awasondo iwo waamuganyako. Ni namba olwa mwawona ewio ni wiikola, ngamukagaluka mureka amawi mumuganyeko.

Olugero olwa awarimi awaakodeesa omusiri

(Mari 12:1–12; Luuk 20:9–19)

³³“Muwurre olugero lundi luno: Yawangao omuntu omulala owawanga no omusiri. Yasimba emizabiibu mu omusiri gwae mala aomboka enzizi esunguzia omusiri. Ya-aawa ansi aa edivaai emigirwa kandi aomboka ekitandaalo ekia omurinsi aikalako. Nikuemao yatoola omusiri ogwo ogu-aa awarimi wandi wagukodeesa nikwo afuma agia olugendo mu ekialo kindi.

³⁴Olwa amiire aga igesa gaatuuka ampi, yatuma awemirimo waae ku awarimi awaakodeesa omusiri waria, wagie wawatooleko ensaafu ezia omuzabiibu.

³⁵“Awarimi awaakodeesa omusiri awo waa-amba awemirimo awaatumwa ku iwo, wakuba omulala, omulala waita no owundi wakuba na amawaale!

³⁶Nikuemao yatuma awemirimo wandi ku iwo, awangi okukira awayatuma kuluweri, ni awarimi awo waawakorra owufwanani.

³⁷Owutuukre, yatuma omuzia waae ku iwo na aingirizia mbwe, ‘Wagia oku-aa omuzia wange owuti.’

³⁸“No olwa awarimi awo waawona-uwona omuzia oyo otino, waawoola agati yaawu aweene watino, ‘Ono nio osugaane arie omwandu ogwa ng’ina omusiri. Muuze tumuite, kugere omusiri guno gutusigarre.’

- ³⁹Kutio waamutoola wagia wamurigiza enze eya omusiri nikwo wamuita!
- ⁴⁰“Kutio, muingirizia mbwe no omwene omusiri aaza okuuzza, niki ekia aaza okukorra awarimi awaakodeesa omusiri awo?”
- ⁴¹Awantu awaamutegerezianga waamuirania watino, “Aaza okuita awantu awawiiwi awo uwiiwi ino, kandi atoole omusiri gwae a-ee awantu wandi awaaza okumu-aa omugawo gwae ku omuzabiibu ni igesa rituukre.”
- ⁴²Yesu yawalaga otino, “Inywe kane mukiari okusomako mu endagano mbwe, “Iwaale eria awaomboki waalowa nirio erairana riwa ilootu eriambiriire enzizi eya enyumba; Omwami Katonda omwene nio okorre ekintu kino, kandi ne ekintu ekiluguulwa mu amiiso giifu?”
- ⁴³“Kutio mbalaga mbwe Owuami owua Katonda wuuza okutoolwa ku inywe, wueewue awantu awaaza okukola okuagala kwae.
- ⁴⁴Omuntu oigunyire ku iwaale rino aaza okuvunika wutono-tono, no owa iwaale erio rigwireko riiza okumusia ki egunduusi.”
- ⁴⁵Olwa awakangasi awa awoozia alala na Awafarisaayo waawurra engero ezia Yesu ezio, waagia wamanya mbwe ni iwo Yesu yawanga na agamba-gambako.
- ⁴⁶Kuno kwagera watanika okuagarizia engira eya okumuamba, ni waatia omurima ogwa awantu aeniki awantu waatoola Yesu ki omugambi owa Katonda.

Mathaayo 22

Olugero olwa omugomo ogwa enserezi

(Luuk 14:15–24)

- ¹Yesu kandi yagamba-gamba nawo mu olugero na awoola otino,
- ²“Owuami owua ku igulu wuesa okufwananiwua no omwami owaikazizia omuzia waae omugomo ogwa enserezi.
- ³Yatuma awemirimo waae ku awantu awaetwa mu omugomo ogwo, wagie wawalage mbwe waaze, ni waalowa okuuzza chee.
- ⁴“Nikuemao yatuma awemirimo awangi okukira awayatuma kuluweri na awalaga otino, ‘Mugie mulage awantu awanyaeta mbwe miire okufumba okuria kwange, eng’ombe yange enovu emiire okuwaagwa kandi ewintu wiona wiri ansi. Waganye waaze mu omugomo.’
- ⁵“Ni iwo waatoola amang’ana ago wutono kandi wafuma wagenda mu engira ziauwu — omulala mu omusiri gwae, kandi owundi okuniiwa.
- ⁶Awandi ku iwo waa-amba awemirimo waae awo, wawakorra uwiiwi kandi wawaita.
- ⁷Enda eya omwami yayia ino. Yatuma awa-iiye waae wagia waita awiisi awo kandi waona emigizi giawu.

⁸“Nikuemao yalaga awemirimo waae otino, ‘Omugomo ogwa enserezi gumiire okutuuka, na awantu awanyaeta ngawasugre no okuuzamo.

⁹Mufume mugie ku engira enkate-kaate, mueete awantu woona awamunatuukra.’

¹⁰Kutio awemirimo waafuma wagia ku engira ezia omugizi wagia wakumia awantu woona awawaatuukra, awalootu na awawiiwi, kandi enyumba eya omugomo yaizula na awageni du-du du-du du!

¹¹“No olwa omwami yaingira okuuzo okuwona awageni, yawona omuntu omulala owawanga na ataiwooye enguwo ezia omugomo ogwa enserezi.

¹²Yamuwuzia otino, ‘Omwiko wange, iwue waingiire ano otie no owula ne enguwo ezia enserezi?’ Omunwa ogwa omuntu oyo gwa-anda.

¹³“Nikuemao omwami yalaga awemirimo waae mbwe, ‘Mumusiwe amakono na amagulu, mumurigize enze mu ekierema aa awantu warra kandi wasienenia amiino.’

¹⁴“Ni kutio aeniki awaeeterwe wari wangi, na awaaza okulowolwa watono.”

Okufumizia Kaisaari omusolo

(Mari 12:13–17; Luuk 20:20–26)

¹⁵Nikuemao Awafarisaayo waafuma enze wagia wawurizania ku kiomo waka-amba Yesu na amang’ana gaae iye omwene.

¹⁶Waatuma awalonzi waawu alala na awantu awaaganya no owukangasi owua Eroode. Awantu awo waagia ku Yesu wamulaga watino, “Omugerezi, tumanyire mbwe iwue owoola amang’ana agari kuwuene, kandi mbwe ogerera engira eya Katonda mu engira eri kuwuene. Iwue ekia omuntu ari ngakikunyaasia, aeniki ngotiire amiiso aga omuntu.

¹⁷Tulage ekia iwue owona ku ing’ana rino: Mberi endagirra iifu etuganyiire okufumizia Omwami Kaisaari omusolo, nakuwa yaaya?”

¹⁸Ni Yesu owawanga na amanyire engira embiiwi eya waawanga nayo, yawalaga otino, “Inywe awantu awaisemerezia wano, ekigera ni muntegera omutego mumpambe niki?”

¹⁹Mundageko isendi erikolwa nario okufumia omusolo.” Waamureetra edinaari atola

²⁰nikwo awawuzia otino, “Kino ne ekiiruzia ekia anu? Kandi rino ne eriina eria anu?”

²¹Waairania mbwe, “Kaisaari!” Nikuemao yawalaga otino, “Mu-ee Kaisaari ewia Kaisaari, ne ewia Katonda mu-ee Katonda!”

²²Olwa waawurra otio, waaluguula ino. Kutio waamureka wagia.

Awasadukaayo wawuzia Yesu ku okuziuka

(Mari 12:18–27; Luuk 20:27–40)

- ²³Owuire owuazane owuo, Awasadukaayo awaallowanga mbwe okuziuka okwa awafu kuwulao, waaza ku Yesu wamuwuuzia
- ²⁴watino, “Omugerezi, Muusa yawoola mbwe no omuntu afwire na awula no omwana, wamwawu paka agereme omukazi oyo, kugere afumie enyumba eya wamwawu.
- ²⁵Waawangao awazia musamvu awa omuntu omulala. Omukulu yakwa nikuemao afwa, kandi aeniki ngakarekao awaana, yarekera wamwawu omukazi agereme.
- ²⁶Ekintu ekilala ekio kiaikorra omuzia owa okuwiri no owa okusatu nawuno kutuuka ku omuzia omutono otuukre.
- ²⁷Owutuukre, omukazi oyo yona yafwa.
- ²⁸Katio tulageeko, olwa awantu wariziuka, omukazi oyo ariwa omukazi owa anu ku awazia musamvu awaawa nae awo?”
- ²⁹Yesu yawairania na awoola otino, “Muteekere aeniki ngamumanyire endagano, lwona ngamumanyire amaani aga Katonda ari nago.
- ³⁰Na awantu wariziuka, ngawarikwa kandi ngawarikwewua. Ni wariwa ki enyankoi awa ku igulu.
- ³¹Ni ku okuziuka okwa awafu, inywe mukiari okusoma ekia Katonda yawalaga mbwe,
- ³²‘Inze ni inze Katonda owa Abraamu, Katonda owa Isaaka, kandi Katonda owa Yakoobo’? Ngari Katonda owa awafu, yaaya, na ari Katonda owa awalamu.”
- ³³Olwa omurima ogwa awantu gwawurra amang’ana ago, gwaluguula engerera yaae ino.

Ensikirra enene ekirre ezindi ziona

(Mari 12:28–34)

- ³⁴Olwa Awafarisaayo waawurra mbwe Yesu akirre Awasadukaayo mu amang’ana, waaikumia alala.
- ³⁵Nikuemao omulala ku iwo, owawanga na amanyire ensikirra ino, yagia amugeezaania no okuwuuzia kuno:
- ³⁶“Omugerezi, ensikirra enene ekirre ziona, ne eriai?”
- ³⁷Yesu yamuirania mbwe, “ ‘Gonzia Omwami Katonda waao no omwoyo gwao gwona, ne enkolo yaa yona kandi na amaingirizio gaao goona.’
- ³⁸Eno nie ensikirra esookere kandi eri enene okukira ziona.

³⁹Ne eya okuwiri efwana nayo: ‘Gonzia omwina waao kiomo oigonziizie iwue omwene.’

⁴⁰Amang’ana aga Muusa yajoja goona, alala na amang’ana aga Awagambi awa Katonda goona, gaisimbiriire ku ensikirra iwiri zino.”

Kristo ari Omuzia owa Daudi

(Mari 12:35–37; Luuk 20:41–44)

⁴¹Na Awafarisaayo waawanga ni waikumiiizie alala, Yesu yawawuuzia otino,

⁴²“Inywe muingiriziaki ku Kristo? Ari omuzia owa anu?” Waamuirania mbwe, “Ari Omuzia owa Daudi.”

⁴³Yesu yawalaga otino, “Kuwa kutie mbwe Daudi, na agamba-gamba na aizuziwwue no Omwoyo Omweru, amueta ‘Omwami’? Aeniki omwene awoola mbwe,

⁴⁴“ ‘Omwami Katonda yalaga Omwami wange otino, “Ikala nyakukono kwange okusaaza nawuno nte awazigu waao ansi ya amagulu gaao.” ’

⁴⁵Katio ni kuri mbwe Daudi amueta ‘Omwami,’ Kristo akawa omuzia waae otie?”

⁴⁶Awulao omuntu owaesanga okumuirania ing’ana namba ilala, kandi okuemera nyanga olwo awulao omuntu owamuigemako mbwe amuwuuzia ekintu.

Mathaayo 23

Yesu asiagizia awakangasi awa ediini eya Awayaudi

(Mari 12:38–40; Luuk 20:45–47; 11:42–53)

¹Nikuemao Yesu yalaga omurima ogwa awantu awaawangao alala na awalonzi waae otino,

²“Awagerezi awa endagirra na Awafarisaayo waikaale ku entewe eya Muusa.

³Kutio musugaane mulonde kandi mukole ewintu wiona ewia wawalaga. Ni mutakola ewia wakola yaaya, aeniki ngawakola ewia wagerera.

⁴Iwo wasiwira awandi emisigo emizito wawatwika ku amawega, na aweene ngawairako namba olwala olulala.

⁵“Ewintu wiona ewia wakola, wawikola kugere awantu wawawone. Ewintu ewia awantu waingizia okulagana mbwe waiteere ku Katonda, kiomo amasanduuki amatono-tono aga amaseero agateewuamo ensikirra nikwo awantu wasiwa ku emitwe ni ku amakono, iwo wasiwa amanene-nene kandi ewuusi ezirereeza ku ekanzu, iwo wataako endiire-ndiire ino.

⁶Wagonziizie entewe ezia emberu mu emigomo kandi okuikala emberu mu amasinagoogi.

⁷Lwona wasangaala ni wakeeziwua mu ewiyyia kandi na awantu wawaeta mbwe ‘Omugerezi.’

- ⁸Ni inywe ngamusugaane muetwe mbwe ‘Omugerezi,’ yaaya, aeniki muri mala no Omukangasi omulala eng’ene kandi mwona muri ki awaana awa omuntu omulala.
- ⁹Kandi otaaza waeta omuntu-umuntu ku ekialo kuno mbwe ‘Soifu,’ yaaya, aeniki muri ni Soinyu omulala eng’ene, kandi ari ku igulu.
- ¹⁰Lwona otaaza waganya omuntu akuete mbwe, ‘Omukangasi’ yaaya, aeniki muri no Omukangasi omulala eng’ene ori Kristo.
- ¹¹Omuntu omunene agati iinyu asugaane awe owemirimo wiinyu,
- ¹²No omuntu-umuntu oiginga kungulu aaza okuisiwua ansi, kandi oiisia ansi aaza okugingwa kungulu.
- ¹³“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Muigarra awandi okuingira mu Owuami owua ku igulu. Aweene ngamuingira, na awagala okuingira woona mulowera okuingira.
- ¹⁴[Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano, aeniki musemerezia awakazi awafwire ni muwariako ewintu, kandi musawa okusawa okuliire ni muilagana emberu wa awantu. Kutio muriswawukwa wululu okukira.]
- ¹⁵“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Mukuba eno ne eno ku ekialo ekikalu kandi muambuka enyanza okugalusia omuntu omulala, kandi na amiire okuwa omulala ku inywe mugera yawa omwana owa gaena okukira inywe kawiri.
- ¹⁶“Kuriwaweera uwiiwi inywe awawuunu awaiteere mbwe woona wagala okukangatra awandi! Muwoola mbwe, ‘No omuntu aifuuwre ne eriina eria ekaalu, ng’ane ekintu. Ni, mbwe no omuntu aifuuwre ne edhaabu eri mu ekaalu, okuifuuwa kwae okwo kumusiwire.’
- ¹⁷Inywe awawuunu awamaya wano! Ekikaate niki: edhaabu kusi ekaalu egera ne edhaabu erimo, ne ewa enzeru?
- ¹⁸Lwona muwoola mbwe, ‘No omuntu aifuuwre ni isiga eria omusango gusambwako, ngakulagana ekintu. Ni, no omuntu aifuuwre ne eriina eria esadaaka eri ku isiga eriene, mbwe omuntu oyo okuifuuwa kwae okwo kumusiwire.’
- ¹⁹Mundageko ekikaate okukira inywe awawuunu wano: esadaaka kusi isiga eria omusango erigera ne esadaaka ewa enzeru?
- ²⁰Nyagala mumanye mbwe omuntu oifuuwre ne eriina eria isiga eria omusango, aifuuwre kugia ne ewintu wiona ewigiriko.

- ²¹Kandi omuntu oifuuwre ne eriina eria ekaalu, aifuuwre nayo kugia ni Katonda ogimenyeremo.
- ²²Kandi omuntu oifuuwre na aeta igulu, aifuuwre ne entewe eya Owuami owua Katonda alala ni Katonda ogiikaaleko.
- ²³“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Mufumia endala ku ikumi ku amasuwi agataluusia okuria kiomo munanaa, amadhaari, ne ejiira. Ni mulawiire amang’ana amazito mu ensikirra ezia Katonda kiomo okukorra awantu woona kiomo kusugaane, okuwa na amasaasra no okuisikia mu okukola ewintu ewia Katonda aagala. Kulootu ni mulondokaane ne ensikirra ziona, aa mutagawuule ezia murinda ne ezia mutarinda.
- ²⁴Inywe awawuunu awaiteere mbwe woona wagala okukangatra awandi! Museesa ewintu wiona ewia munywa kugere mutamira namba isami, ni eno mumira engamia yoon.
- ²⁵“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Mutoola enyinga okuoza enze eya ewisanda ne endaawo ziinyu geeza ino, ni munsu mwazio ziizuule mala no owusakuzi ne endandulu.
- ²⁶“Awafarisaayo awawuunu inywe! Musooke muozie munsu eya ewisanda kandi enze yawio wiona wiiza okueruyia.
- ²⁷“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Mufwana ewiwaga ewiwakrwe ne erangi enzeru, ewiwonekana ewilootu no owiwona, ni munsu wiizuule ne ewigumba ewia awafu alala ne ewintu ewiwoorre wiona.
- ²⁸Mu engira efwanani, enze muwonekanira awantu ki awalongoole, ni munsu muizuule du no okuisemerezia alala ne enkola embiwi.
- ²⁹“Kuriwaweera uwiiwi inywe awagerezi awa endagirra ni inywe Awafarisaayo, inywe awantu awaisemerezia wano! Muombokra awagambi awa Katonda ewiwaga kandi musaata ewiwaga ewia awantu awalongoole.
- ³⁰Kandi muwoola mbwe, ‘Kuweeko mbwe twamenya mu amiire aga waaguukwa wiifu, ngatukaweere nawo mu owulala mu okusuluzia amasaai aga awagambi awa Katonda.’
- ³¹Kutio muiwoolako aweene mbwe muri awiizukulu awa awantu awaaita awagambi awa Katonda.
- ³²Muizuzie omurengo ogwa owuoni owua waaguukwa wiinyu mbenanu!
- ³³“Inywe enzoka wano! Inywe awaana awa enzoka wano! Murimizula okurizizwa mu omurro ogwa gaena mutie?

³⁴Kutio mbatumra awagambi na awantu awaganga alala na awagerezi. Awandi muuza okuwamba ku omusalaaba, na awandi muuza okuswawuka enkowa mu amasinagoogi giinyu, ni muwaimia mu omugizi ki omugizi.

³⁵Kutio amasaai aga awantu awalongoole awa Katonda awamiire okuitwa ku ekialo kiona gaaza okuwa ku emitwe giinyu, okutanikra ku Abeeli kutuuka ku Zakaria omuzia owa Berekia owa mwaita agati ya ekaalu ni isiga eria okufumizizia Katonda omusango.

³⁶Mbalaga kuwuene mbwe wino wiona wiiza okuikorra ikula rino.

Yesu arra omugizi ogwa Yerusaleemu

(Luuk 13:31–35)

³⁷“Oo inywe awantu awa Yerusaleemu! Oo inywe awantu awaita awagambi awa Katonda, kandi awakuba awamutumrweko na amawaale. Miire okuwa ni nyagala okuwakumia kiomo engoko ekumia winyuunyu wiayo mu embaya ziayo, ni mwalowere.

³⁸Muwoneko, enyumba iinyu ezirrwe kandi esigaale ifulukwa.

³⁹Mbalaga mbwe ng’amuuza okumbona inze kandi, nawuno olwa muriwoola mbwe, ‘Omuntu ooza ku eriina eria Omwami Katonda, asereekwe.’ ”

Mathaayo 24

Ekaalu eya Katonda eeza okuonwa

(Mari 13:1–2; Luuk 21:5–6)

¹Yesu yafuma mu ekaalu ataa na agia. Awalonzi waae waamuuzako okumulaga iyomboka eria ekaalu eyo.

²Yesu yawawuuzia otino, “Mberi muwona amayumba gano? Mbalaga kuwuene mbwe goona gaaza okugemulwa gawuere ansi kandi riwulao namba iwaale ilala eriiza okusigala ni riigereeke ku erindi.”

Ewilago ewia owutuuko owua ekialo

(Mari 13:3–13; Luuk 21:7–19)

³Ni Yesu yawanga na aikaale ku ekigiri ekia Zaituuni, awalonzi waae waamuuzako ni wari aweene. Waamuwuzia watino, “Tulage olwa ewintu wino wiriikola, ne ewirilagana mbwe okuirana kwao no owutuuko owua ekialo wiri ampi?”

⁴Yesu yawairania otino, “Muwe amankaga omuntu ataaza yawateesia.

⁵Aeniki awantu awangi waaza okuza ne eriina riange ni wawoola mbwe, ‘Ni inze Kristo, ni inze Kristo,’kandi wariteesia awantu awangi ino.

⁶Muuza okuwurra mbwe amaye galwana na agandi mbwe gari ampi okutanika. Ni mutaaza mwatia, aeniki ewio paka wiikole. Ni muwe no okumanya mbwe namba ne ewio wiikola, owutuuko owua ekialo wukiari emberu.

⁷Enganda zirilwana, kandi ewialo ewia owuami wirilwana. Enzala no okuzegera okwa ekialo wiriwaa mu ewialo ewingi.

⁸Ni wino wiona wiriwa mala ki owutanikro owua ewisa ewiluma omukazi oogala okuiwula.”

⁹Yagia emberu na awalaga otino, “Nikuemao muriteewua mu amakono aga awantu awariwanyaasia wululu, kandi awariwaita. Muriregwa na awantu awa ewialo wiona ku amang’ana gange.

¹⁰Mu amiire ago, awantu awangi warireka okuganya okwa wari nakwo ku inze. Wariguzia awiina waawu kandi wariregana aweene.

¹¹Awagambi awa owuweeyi awangi warifuma kandi warisemerezia awantu awangi.

¹²Okuisonga okwa enkola embiwi kurigera olugonzi olwa awantu awangi wagonziizie nalwo awiina waawu, luri-irana enyima.

¹³No omuntu orikola olutuunyo nawuno mu owutuuko, arilama.

¹⁴Kandi injiili eya Owuami owua Katonda eno, eeza okulanziwua ku ekialo kiona, kiomo ekilago ku awantu awari mu ewialo wiona, nikuemao owutuuko wuuze.”

Emidambo egiriamba awantu awa Yerusaleemu

(Mari 13:14–20; Luuk 21:20–24)

¹⁵Yagia emberu na awalaga mbwe, “Ni muwuine ‘omuziro ogureeta okuoneka,’ ogwa Omugambi Danieli yagamba-gambako, ni guimeriire Asi Aeeru, (omusomi asugaane awurre amang’ana gano geeza)

¹⁶awantu awari Yudeea wasomoke wagie mu ewigiri.

¹⁷Omuntu ori ku olusala olwa enyumba yaae, ataika ansi okutoola ewintu wiae ewiri mu enyumba omwo, yaaya.

¹⁸Ori mu omusiri, atairana engo okutoola enguwo yaae.

¹⁹Kuriweera awakazi, awa amiire ago garituukra ni wari awazito namba ni wanuunia, uwiiwi owufwana wutie?

²⁰Musawe mbwe amiire ago gataaza gawa aga entwigo nakuwa olwa Sabato.

²¹Aeniki ni kuweere kutio, emidambo egikiari okuwaa okuamera mu owutanikro nawuno nyingeeno, kandi egitaaza okuwaa kandi, giriwaa.

²²Amiire ago garekeko okuiraniwua enyima, awulao-uwula omuntu okalama. Na awalowole awa Katonda warigera amiire aga emidambo ago, gairaniwue enyima.

Kristo awa owuweeyi

(Mari 13:21–23; Luuk 17:23–24)

²³“Mu amiire ago no omuntu akulagre mbwe, ‘Wonako, Kristo nguno!’ nakuwa mbwe, ‘Kristo nguuria!’ mutaaza mwaganya.

²⁴Ni kutio aeniki kristo awa owuweeyi na awagambi awa owuweeyi waaza okufuma kandi waaza okukola amankono amakaate agaluguulwa, kugere ni kuesekana, wasemerezie kugia awalowole awa Katonda.

²⁵Mbalagre amang’ana gano ni gakiari okuikola.

²⁶“Kutio no omuntu awalagre mbwe, ‘Kristo nguuria, ari mu ekeewa,’ mutaaza mwafuma okugia eyo. Lwona ni wawalagre mbwe, ‘Nguno ari ano, mu enyumba muni,’ mutaaza mwaganya.

²⁷Aeniki mala kiomo olumesi lumesra ewufumanyanga lwawonekana ewugwanyanga, nintio okuuza okwa Omuzia owa Omuntu kuriwa.

²⁸Aa ekintu kifwire, nio aa etaayi ziikumia.”

Ewintu ewirilagana mbwe okuirana okwa Yesu kuri ampi

(Mari 13:24–27; Luuk 21:25–28)

²⁹Yesu yagia emberi na awoola otino, “Ne emidambo egia amiire ago giriwua-uwua otino, “ ‘enyanga erimwama ti, kandi omwenzi ngaguriwala; eng’eni-ng’eni zirigwa ni ziema ku igulu, kandi ewintu ewiri ku igulu wirizegera.’

³⁰“Nikuemao ekilago ekia Omuzia owa Omuntu kiiza okuwonekana ku igulu, kandi awantu awa enganda ziona eziri ku ekialo warirra ni wawona Omuzia owa Omuntu na aika ansi mu amare na ari no owunene na amaani amangi.

³¹Arituma enyankoi waae no omulala akuba olwiga wukaalu, kandi woona waaza okukumia awalowole waae ni wawatoola ku embega ine ezia igulu ne ekialo.

Okuigerera ku omuti ogwa omukuyu

(Mari 13:28–31; Luuk 21:29–33)

³²“Muigerere ekintu ekilala ku omuti ogwa omukuyu. Enyinga ezia amatu gagwo gasewuka, awantu wamanyire mbwe amiire aga emvula gari ampi.

³³Mu engira endala eyo, ni muwuine wino wiona ni wiikola, muwe no okumanya mbwe Omuzia owa Omuntu ari ampi, amiire okutuuka ku ekiriango.

³⁴Mbalaga kuwuene mbwe ikula rino ngariiza okuwita, wino wiona ni wikiari okuikola.

³⁵Igulu ne ekialo wiiza okuwua chwe, na amang’ana gange ngagariwua.

Awulao omanyire owuire owua okuirana okwa Yesu

(Mari 13:32–37; Luuk 17:26–30, 34–36; 21:34–36)

³⁶“Awulao-uwula omanyire owuire nakuwa enyinga ezia Omuzia owa Omuntu ari-irana, kugia enyankoi namba inze omwene. Ni, ni Katonda Ise eng’ene nio omanyire.

- ³⁷Mala kiomo kwawanga mu amiire aga Noowa, nintio lwona okuirana okwa Omuzia owa Omuntu kuuza okuwa.
- ³⁸Omugera ni gwawanga ni guri ampi okuona ekialo, awantu waaweerao ni waria, ni wanywa, kandi ni wakwezana nawuno owuire owua Noowa yaingira mu owuato.
- ³⁹Ngawakawanga ni wamanyire-umanya ekiazanga okuikola nawuno omugera gwaza gugia nawo wona. Nintio kuuza okuwa mu okuuzza okwa Omuzia owa Omuntu.
- ⁴⁰Awantu wawiri warituukrwa ni wari mu omusiri. Omulala aritoolwa no owundi arisigala.
- ⁴¹Awakazi wawiri warituukrwa ni wasia. Omulala aritoolwa no owundi arisigala.
- ⁴²“Kutio muwe amiiso aeniki ngamumanyire Owuire owua Omwami iinyu aaza okuirana.
- ⁴³Ni musugaane mumanye mbwe kuweeko mbwe omwene enyumba amanyire mbwe ne enyingaaki ezia owuire ezia omwiwi aaza okuuzrako, akaweere amiiso kugere enyumba yaae etavunwa.
- ⁴⁴Kutio mwona musugaane muwe amiiso, aeniki Omuzia owa Omuntu aaza okuirana enyinga ezia mutamanyire.
- ⁴⁵“Owemirimo omuganga kandi oirindre naanu katio? Owemirimo owa omukangasi waae ateere awemirimo wona awa ku omugizi gwae mu amakono, kugere awa-ee okuria mu enyinga ezisugre.
- ⁴⁶Kulootu omukangasi owa owemirimo oyo na airaane amutuukre na akola otio.
- ⁴⁷Mbalaga kuwuene mbwe aaza okumuteera ewintu wiae wiona mu amakono, arinde.
- ⁴⁸Ni kuweeko mbwe owemirimo oyo ari omuntu omuwiiwi, mala awoole mu omwoyo gwae mbwe, ‘Mfwaki? Omukangasi akiaza okuwa enze ku amiire amangi,’
- ⁴⁹nikuema atanike okukuba awemirimo awiina waae kandi aingire mu okuria no okunywa na awanywi.
- ⁵⁰Omukangasi owa owemirimo oyo aaza okuuzza owuire owua ataingirizia, kandi enyinga ezia atamanyire.
- ⁵¹Ari mukenga-kenga kandi amu-ee omugawo ogusugre na awantu awaisemerezia, aa awantu warirra ni wasienenia amiino.

Mathaayo 25

Olugero olwa awaala awagima ikumi

- ¹“Olwa Omuzia owa Omuntu aaza okuirana, Owuami owua ku igulu wuriwa ki awaala awagima ikumi awaatoola ewimuri wiawu kandi wafuma okugia okuaagaana ni ng’ina enserezi omuzia.
- ²Wataanu ku iwo waawanga awamaya, ni wataanu wandi waawanga awaganga.
- ³Awamaya waatoola ewimuri wiawu, ni wareka okutoola amavuta agasugre.
- ⁴Na awaganga iwo waatoola ewimuri wiawu na amavuta agasugre.
- ⁵Omuzia ng’ina enserezi yakinda okuuza, nawuno wona waluya mala endoolo ziwaira.
- ⁶“Olwa kwatuuka owuire agati, erioga riawurrwa mbwe, ‘Omuzia ng’ina enserezi nguno aaza! Mufume mumuaganre!’
- ⁷“Nikuemao, awaala awagima waria waalamuka wona watanika okukagia ewimuri wiawu.
- ⁸Awamaya ku iwo waria waalaga awaganga watino, ‘Mutueeko amavuta giinyu aeniki ewimuri wiifu wifwa.’
- ⁹“Waawairania mbwe, ‘Yaaya, tuwula na amavuta agakatusuga ifwe alala ni inywe, kutio mugie ku awantu awaguzia amavuta mugie mugule.’
- ¹⁰“Ni, ni waawanga ku engira ni wagia okugula amavuta, omuzia omwene enserezi yatuuka. Awaala awagima awaawanga ni waikagre waria, waaingra nae mu omugomo ogwa enserezi, nikuemao ekiriango kiigalwao ti.
- ¹¹“Lunyima, awaala wandi waria wona waaza mala watanika okuetana watino, ‘Omukangasi! Omukangasi! Tuingurreo ekiriango!’
- ¹²“Ni iye yawairania otino, ‘Mbalaga kuwuene mbwe, ng’ambamanyire inywe.’
- ¹³“Kutio muwe amiiso, aeniki ngamumanyire owuire namba enyinga ezia ndiiranamo.”

Olugero olwa awemirimo wasatu awaagekwa etalanta

(Luuk 19:11–27)

- ¹⁴Yagia emberi na awoola otino, “Lwona Owuami owua Katonda wufwanana kiomo omuntu owafuma okugia olugendo mu ekialo kindi. Ni yafumanga, yaeta awemirimo waae awaageka omwandu gwae warinde.
- ¹⁵Omulala yaegeka etalanta itaanu ezia amasendi, owundi yaegeka etalanta iwiri no owundi yaegeka etalanta endala. Yawa-aa nikulondokana no owuesani owua omuntu ki omuntu, nikwo afuma agia.
- ¹⁶Omuntu owaagekwa etalanta itaanu ezia amasendi yafuma kalala agia akola na amasendi ago emirimo, mala atuukra etalanta zindi itaanu.

- ¹⁷Nintio lwona owaegekwa etalanta iwiri yoona yakola, mala atuukra etalanta zindi iwiri.
- ¹⁸No omuntu owaegekwa etalanta endala, iye yafuma agia a-aawa owuina, nikuemao awisa isendi eria omukangasi.
- ¹⁹“Emiigo emingi ni giamala okuwita, omukangasi owa awemirimo awo yairana okuwona kiomo waakola na amasendi ago.
- ²⁰Omuntu owaegekwa etalanta itaanu ezia amasendi yaaza areeta itaanu ezia yaegekwa alala, ni itaanu kungulu ezia yatuukra. Yawoola otino, ‘Omukangasi, wanyegeka etalanta itaanu, ni wonako ntuukiire itaanu zindi kungulu.’
- ²¹“Omukangasi waae yamuirania otino, ‘Okorre geeza ino; ori owemirimo omulootu kandi omuigolovu. Omiire okuwa omulongoole ku okurinda amatono geeza, katio nyiza okukuta okurinda amangi. Iza osangaale no omukangasi waa.’
- ²²“Omuntu owaegekwa etalanta iwiri yoona yaaza ember amulaga mbwe, ‘Omukangasi, wanyegeka etalanta iwiri, ni wonako ntuukiire iwiri zindi kungulu.’
- ²³“Omukangasi waae yamuirania otino, ‘Okorre geeza ino; ori owemirimo omulootu kandi omuigolovu. Omiire okuwa omuigolovu ku okurinda amatono, ni katio nyiza okukuta okurinda amangi. Iza osangaale no omukangasi waa.’
- ²⁴“Nikuemao, owemirimo owaegekwa etalanta endala yaaza amulaga otino, ‘Omukangasi, nkumayire mbwe ori omuntu omugugu, ogesa aa ataakomera kandi okunza emere aa otaamwa.
- ²⁵Kutio, nyawanga ni ntiire, kandi okwo kwagera ngia mbisa etalanta yaa eya waanyegeka mu ilowa. Toola, eno nio etalanta yaa.’
- ²⁶“No omukangasi waae yamuirania otino, ‘Iwue owemirimo omuwiiwi kandi omugata ono! Owuo owoola mbwe wawanga no omanyire mbwe inze ngesa aa ntaakomera kandi nkunza emere aa ntaamwa?
- ²⁷Ni kuri kutio, kane okatoorre amasendi gange owiike mu ebenki kugera ni nyiraane nyize ntuukre etalanta yange, ne ekintu kungulu.
- ²⁸“ ‘Kutio, mumutooleko etalanta eyo mugie-ee omuntu ori ne etalanta ikumi oria.
- ²⁹Aeniki omuntu-umuntu okola geeza ne ekia aegekwe nio ooza okusongwa amangi, kandi aaza okuwa na amangi okukira. No omuntu otakola geeza ne ekia aegekwe, aaza okunyagulwa namba ekitono ekia yaegekwa.
- ³⁰Kandi mutoole owemirimo owula ne emirimo oyo mumurigize enze mu ekierema, aa awantu warirra ni wasienenia amiino.’

Embuzi na amagondi

- ³¹“Olwa Omuzia owa Omuntu ariiza mu owunene wuae, enyankoi woona ni wari nae, ari-ikala ku entewe yaae eya owuami eri no owunene owua ku igulu.

³²Awantu awari mu ewialo wiona wari-ikumia emberi waae, kandi arigawula awantu aa kawiri kiomo omwayi akagawula amagondi na atoola ku embuzi.

³³Arita amagondi nyakukono kwae okusaaza, ne embuzi nyakukono okumosi.

³⁴“Nikuemao, Omwami arilaga awari nyakukono kwae okusaaza otino, ‘Muuze inywe awasereekwe ni Soifu. Mutoole iwaga riinyu mu owuami owua mumiire okuikaziziwua okuamera mu okulukwa okwa ekialo.

³⁵Aeniki nyawurranga enzala, mumpa okuria ndia; nyawurranga owulwo, mumpa ekinywewua nywa; nyawanga omugeni agati iinyu, munyingizia.

³⁶Nyatakayia enguwo, munyingizia enguwo; nyawanga omulwire, mundinda geeza; nyawanga mu owusiwe, muuza mumbona.’

³⁷“Nikuemao, awantu awigolovu warimuirania watino, ‘Omwami, ni ri olwa twakuwona no owurra enzala tukuriisia, namba no owurra owulwo tuku-aa ekintu onywa?

³⁸Kusi ni ri olwa twakuwona no ori omugeni tukuizingizia, namba no otakiiye enguwo tukuizingizia enguwo?

³⁹Kusi ni ri olwa twakuwona no ori omulwire namba no ori mu owusiwe tuuza tukuwona?’

⁴⁰“Omwami ariwairania otino, ‘Mbalaga kuwuene mbwe ekintu-ukintu ekia mwakorra omulala ku waamwifu awari ansi ino wano, ni inze owa mwakikorra.’

⁴¹“Nikuemao arilaga awantu awari nyakukono kwae okumosi otino, ‘Munyemeko inywe awantu awafuwrwe wano. Mugie mu omurro ogutazima amiire goona, ogwakumrwa Ekikeeno ne enyankoi waae.

⁴²Aeniki nyawanga ni mpurra enzala, ni ngamukampa okuria ndie; nyawurranga owulwo, ni ngamukampa ekintu nywe.

⁴³Nyawanga omugeni, ni ngamukanyingizia; nyatakayia enguwo, ni ngamukanyingizia enguwo; nyawanga omulwire kandi nyawanga mu owusiwe, ni ngamukaninda.’

⁴⁴“Woono wari-irania watino, ‘Omwami, twakuwona no owurra enzala, namba no ori omugeni, namba no otakiiye enguwo, namba no ori mu owusiwe ri tureka okukutunzia?’

⁴⁵“Ariwairania mbwe, ‘Mbalaga kuwuene mbwe ekintu-ukintu ekia mwareka okukorra omulala ku awari ansi ino wano, ni inze owa mwareka okukikorra.’

⁴⁶“Nikuemao, iwo warigia mu okuswawukwa okutariwua, na awigolovu iwo warigia mu owulamu owutariwua.”

Mathaayo 26

Awakangasi awa ediini eya Awayaudi wagala okuita Yesu

(Mari 14:1–2; Luuk 22:1–6)

- ¹Olwa Yesu yamala okuwoola ewintu wino, yalaga awalonzi waae otino,
- ²“Mumanyire mbwe gakiari amiire awiri, omugomo ogwa Pasaaka gutuuke. Omuzia owa Omuntu aaza okuteewua mu amakono aga awantu awaaza okumuwamba ku omusalaaba.”
- ³Awakangasi awa awoozia na awagaaka awa Awayaudi waaikumia alala ku omugizi ogwa Omukangasi omunene owa awoozia owaetwanga mbwe Kaifa,
- ⁴okuagala engira eya okuamba Yesu owuiwisi wamuite.
- ⁵Na aweene waawoola watino, “Ngatuesa okumuamba mu omugomo guno yaaya, aeniki awantu waaza wareeta erioga.”

Yesu afukirweko amavuta aga iguzi eria kungulu

(Mari 14:3–9)

- ⁶Ni Yesu yawanga ku omugizi ogwa Bethania, mu enyumba eya omuntu owaetwanga mbwe Simioni, omuntu owawanga no owugenge kale,
- ⁷omukazi wundi yamuuzako ni ichupa eria amavuta agawunya esaami kandi aga iguzi eria kungulu ino. Omukazi oyo yatoola amavuta ago afuka ku omutwe ogwa Yesu owawanga na aigoloole na aria ku emeesa.
- ⁸Olwa awalonzi waae waawona ekiaikola ekio, waawurra uwiiwi ino. Waawuuzia watino, “Omukazi ono aona amavuta gano otino kolaki?”
- ⁹Amavuta gano gakaguziwwue ku iguzi eria kungulu kandi amasendi gaewue awataka.”
- ¹⁰Yesu yamanya ekintu kino kutio yawalaga otino, “Munyaasia omukazi ono kolaki? Ankoriire ekintu ekilootu ino.
- ¹¹Awataka mukiaza okuwa nawo amiire goona, ni inze ngamuuza okuwa ni inze amiire goona.
- ¹²Olwa amfukreko amavuta gano, akorre otio kugere omuwiri gwange guikagre owuawizi.
- ¹³Mbalaga kuwuene mbwe asi-uasi aa injiili eno eeza okulanziwua mu ekialo kiona, ekia omukazi ono akorre kino kiiza okugamba-gambwako, na awantu wamuingirizia.”

Yudaasi aganyire okuguzia Yesu

(Mari 14:10–11; Luuk 22:3–6)

- ¹⁴Nikuemao omulala ku awalonzi ikumi ni wawiri, ku eriina Yudaasi Iskarioti yafuma agia ku awakangasi awa awoozia

¹⁵awawuuzia otino, “Niki ekia muuza okumpa ni muteere mu amakono giinyu?” Kutio waamuwalra efeedha amakumi asatu wamu-aa atoola.

¹⁶Okuemera nyanga olwo, Yudaasi yatanika okuagala iwaga ilungi eria okumuta mu amakono gaawu.

Okuikagra omugomo ogwa Pasaaka

(Mari 14:12–16; Luuk 22:7–13)

¹⁷Owuire owusookere mu omugomo ogwa Omukaati ogutazogrwe na amamera, awalonzi awa Yesu waamuuzako waamuwuuzia watino, “Omwami, na ai aa wagala mbwe tukuikazizie Pasaaka orie?”

¹⁸Yawairania mbwe, “Mugie mu omugizi guuria ku omuntu wundi ao mumulage mbwe, ‘Omugerezi awoorre ti: Enyinga ezia nyateerwa ziri ampi. Inze na awalonzi wange tuuza okuria omugomo ogwa Pasaaka omwao.’ ”

¹⁹Kutio awalonzi waae waakola kiomo Yesu yawalaga, wagia wamuikazizia Pasaaka.

Yesu awoorre ooza okumuguzia

(Mari 14:17–21; Luuk 22:21–23; Yowa 13:21–25)

²⁰Olwa kwatuuka igulo, Yesu yawanga na aigoloole na aria na awalonzi waae ikumi ni wawiri ku emeesa.

²¹Kandi ni waarianga, yawalaga otino, “Mbalaga kuwuene mbwe omulala ku inywe aaza okunguzia.”

²²Waawurra uwiiwi ino kandi watanika okumulaga omulala-lala mbwe, “Kuwuene oyo ng’ani inze yaaya Omwami?”

²³Yesu yairania na awoola mbwe, “Omuntu oiniizie omukaati ni inze mu oludaawo ono, nio ooza okunguzia.

²⁴Omuzia owa Omuntu aaza okufwa aameo mala kiomo kwajojwa ku iye. Ni kuriweera omuntu omuguziizie wululu ino! Kukaweere geeza ku iye, ni yareka okuiwulwa.”

²⁵Nikuemao Yudaasi owagianga okumuguzia yamulaga otino, “Omugerezi, kuwuene ngowoola mbwe oyo ni inze, yaaya?” Yesu yamuirania mbwe, “Ee, ni iwue mala kiomo omwene owoorre.”

Amasaai aga endagano empia

(Mari 14:22–25; Luuk 22:19–20; 1Kori 11:23–25)

²⁶Ni waarianga, Yesu yatoola omukaati aikazia Katonda, agugenyula nikwo aguaa awalonzi waae na awalaga otino, “Mutoole murie. Guno no omuwiri gwange.”

²⁷Nikuemao yatoola ekikombe, aikazia Katonda nikwo aki-aa awalonzi waae na awalaga otino, “Mutoole munywere ekikombe kino inywe mwona.

²⁸Gano na amasaai gange aga endagano, agafukwa kugere Katonda arekere awantu awangi amawi gaawu.

²⁹Mbalaga mbwe ng'anyiza okunywa edivaai eema ku ensaafu eya omuzabiibu kandi, nawuno kutuuke olwa ndirinywa edivaai empia mu owuami owua Soifu Katonda.”

Yesu awoorre mbwe awalonzi waae waaza okumurumuka

(Mari 14:26–31; Luuk 22:31–34; Yowa 13:36–38)

³⁰Olwa waamala okuemba olwembo otino, waafuma ni wawariire ekigiri ekia Zaituuni.

³¹Nikuemao Yesu yawalaga otino, “Owuire wuno ni wukiari okukia, kirio ekintu ekigia okunyiikorra, ekiiza okugera inywe mwona mundumuke. Ni kutio mala kiomo kwajojwa mbwe: “ ‘Nyiza okuita omwayi, kandi amagondi agari mu olwizo, gaaza okutanyika.’

³²Ni, ni Katonda amiire okunziusia, nyiza okukangata emberu iinyu, ngie Galiili.”

³³Petro yamuirania mbwe, “Omwami, namba na awandi woona wakurumuuke, inze nanyiza okukurumuka, yaaya.”

³⁴Yesu yamuirania otino, “Nkulaga kuwuene mbwe owuire owua turiko wuno, ooza okulowa kasatu mbwe ngomanyire, engoko ni zikiari okulagula.”

³⁵Ni Petro iye yamulaga mbwe, “Namba ni kuri okufwa ni iwue, nanyiza okukulowa, yaaya.” Kandi awalonzi waae wandi woona waawoola watio.

Yesu asawa Gethsemaani ku ekigiri ekia Zaituuni

(Mari 14:32–42; Luuk 22:39–46)

³⁶Nikuemao Yesu na awalonzi waae waagia watuuka asi aetwa mbwe Gethsemaani. Yesu yawalaga otino, “Muikale ano, inze ngia okusawa aaria.”

³⁷Yatoola Petro na awazia wawiri awazia awa Zebeedi agia nawo. Yatanika okuwurra owululu kandi okuinyaasia ino mu omwoyo gwae.

³⁸Nikuemao yawalaga mbwe, “Mpurra owululu mu omwoyo gwange ino, aa wuagala okunzita. Muweere ano kandi muwe amiiso alala ni inze.”

³⁹Yesu yagia emberu wutono nikwo agwa amafunikira kandi asawa otino, “Soifu, ni kuesekana, ganya ekikombe ekia eminyako-nyaako kino kimbite. Ni kutaaza kwawa ku okuagala kwange yaaya, ni kuwe kiomo omwene wagala.”

⁴⁰Yairana ku awalonzi waae atuukra ni wagona. Kutio yawuuzia Petro otino, “Okuwa amiiso ni inze namba ku enyinga endala eng'ene kuwakirre?”

⁴¹Muwe amiiso kandi musawe kugere mutagwa ni mugeezaniwua. Omwoyo guagala, no omuwiri mudewenyu.”

⁴²Yawareka kandi olwa okuwiri agia asawa otino, “Soifu, ekikombe ekia eminyako-nyaako kino ni kuesekana okitooleo ntakinyweramo, ni reka okuagala kwao kuikole.”

⁴³Olwa yawairanako kandi, yawatuukra ni wagona, aeniki amiiso gaawu gaawanga amazito.

⁴⁴Kutio yawareka agia okusawa kandi olwa okusatu na awoola mala amang’ana amalala ago.

⁴⁵Nikuemao yairana ku awalonzi waae awalaga otino, “Owuo mukiagona, kandi muigoloole muwuluuka? Muwone, enyinga ziri ampi ezia Omuzia owa Omuntu aaza okuguziwua ateewue mu amakono aga awooni.

⁴⁶Mulamuke tugie! Omuguzi wange nguno aaza!”

Yesu aguziwue kandi a-ambrwe

(Mari 14:43–52; Luuk 22:47–53; Yowa 18:1–11)

⁴⁷Yesu ni yawanga na akiagamba-gamba, Yudaasi omulala ku awalonzi ikumi ni wawiri yawatuukako, na ari no omurima ogwa awantu awagingre emiambe egia olugangala ne ewirungu. Awantu wano waawanga ni watumirwe na awakangasi awa awoozia alala na awagaaka awa Awayaudi okuuzza okuamba Yesu.

⁴⁸Kuno kwatuukra no omuguzi yawanga na amiire okuwurzania nawo mbwe, “Omuntu owa munawona ni nuunre, niye. Mumuambe, mugie nae.”

⁴⁹Yudaasi yagia ku Yesu owuigoloole, amulaga otino, “Oikaziwue Omugerezi,” nikuemao amunuuna.

⁵⁰Yesu yamuirania mbwe, “Omwiko wange, kino niki ekikureetre ano?” Nikuemao awantu awo waaza emberu, wa-amba Yesu.

⁵¹Okwo kwagera omulala ku awalonzi waae yaira okukono, azomola omwambe gwae ogwa olugangala, aguta ku owemirimo owa Omukangasi omunene owa awoozia, amukewa okutwi kuwuera ansi chee.

⁵²Yesu yamulaga otino, “Irania omwambe mu ensawo yagwo! Awantu woona awalwana no olugangala waaza okuitwa no olugangala.

⁵³Kusi oingirizia mbwe ng’anyesa okueta Soifu kandi wuangu-wuangu ampe emiganda egikirre ikumi ni iwiri egia enyankoi?

⁵⁴Ni, ni nkorre otio, endagano ewoola mbwe wino paka winyiikorre, ekatuusiwua otie?”

⁵⁵Ku enyinga ezio, Yesu yalaga omurima ogwo otino, “Munyiziire ne emiambe egia olugangala ne ewirungu ki awagia okuamba omukangasi olwania esirikaali otino kolaki? Nyamiire okuwa ni nyikala ni inywe mu olwanyi olwa ekaalu ni ngerera owuire ki owuire, mutampamba?

⁵⁶Ni kino kiikorre kugere amang’ana aga awagambi awa Katonda waajoya gatuuke kuwuene.” Nikuemao awalonzi waae woona waarumuka wamureka.

Yesu airrwe ku oluwuga olwa awagaaka

(Mari 14:53–65; Luuk 22:54–55, 63–71; Yowa 18:12–14, 19–24)

⁵⁷Awantu awa-amba Yesu wano, waamutoola wamaira ku Kaifa Omukangasi omunene owa awoozia. Awagerezi awa endagirra na awagaaka waawanga ni waikumiizie aa Kaifa.

⁵⁸Ni Petro yamulonda enyima ale wutono nawuno watuuka ku olwanyi olwa Omukangasi omunene owa awoozia. Yaingira aikala na awarinzi okuwona ekiagianga okuikola.

⁵⁹Awakangasi awa awoozia no oluwuga olwa awagaaka awa Awayaudi, waagarizia amang’ana ku awawoni awa owuweeyi agawaesanga okuingirra Yesu nago kugere akengerwe ekiina ekia olumbe.

⁶⁰Ni ngawakatuukra, kukawa mbwe awawoni awangi awa owuweeyi waaza emberu wawoola amang’ana gaawu. Owutuukre wawiri waaza emberu

⁶¹wawoola watino, “Omuntu ono yawoola mbwe, ‘Nyesa okuona ekaalu eya Katonda kandi ngiomboke ku amiire asatu.’”

⁶²Nikuemao Omukangasi omunene owa awoozia yaimerra alaga Yesu otino, “Ngoirania ing’ana ku ewintu ewia wakuwoolako wino, kolaki?”

⁶³Ni Yesu yasarigira-usarigira kiri. Omukangasi owa awoozia yamulaga otino, “Ifuuwa ku eriina eria Katonda omulamu mbwe ni iwue Meesia Omuzia owa Katonda.”

⁶⁴Yesu yamuirania otino, “Ee, kuri mala kiomo iwue omwene owoorre mbwe ni inze. Ni mbalaga inywe mwona mbwe muuza okuwona Omuzia owa Omuntu na aikaale nyakukono okusaaza okwa Katonda aa amaani gari, kandi na aaza ku amare aga ku igulu.”

⁶⁵Nikuemao Omukangasi omunene owa awoozia yatandula enguwo yaae na awoola otino, “Omuntu ono aifwanania ni Katonda! Tuagarraki omuwoni wundi kandi? Ee, aweene muema okumuwurra na aifwanania ni Katonda.

⁶⁶Inywe muingirizia mutie ku amang’ana gano?” Waamuirania mbwe, “Asugre no olumbe.”

⁶⁷Nikuemao waamufuuzako amate ni wamukuba ewifunzi, na awandi ni wamukuba empiu

⁶⁸ni wamulaga mbwe, “Tulageeko amang’ana aga owugambi, iwue Meesia. Okukubre naanu?”

Petro alowa mbwe ngamanyire Yesu

(Mari 14:66–72; Luuk 22:54–65; Yowa 18:25–27)

⁶⁹Kwatuukra Petro na aikaale enze ku olwanyi, olwa owemirimo owekiala yamugiako awoola otino, “Iwue oona wawanga ni Yesu Omugaliili ono.”

⁷⁰Ni Petro yalowa ing’ana erio emberu wa awaawanga ao woona na awoola mbwe, “Namanyire ekia owoola, iwue.”

⁷¹Nikuemao yafuma agia ku ekikulo, aa owemirimo owekiala wundi yamuwona kandi alaga awantu awaawanga ao otino, “Omuntu ono yawanga ni Yesu Omunazareeti.”

⁷²Petro yalowa amang’ana ago na aifuuwa mbwe, “Inze namanyire omuntu ono!”

⁷³Ne enyinga entwini ziamala okuwita, awantu awaawanga ni waimeriire ao waagia ku Petro wamulaga otino, “Kuwuene ori omulala ku iwo, aeniki namba kiomo onawula amang’ana kwona kukuamba.”

⁷⁴Nikuemao yatanika okuifuuwa omwene na aria endagano na awalaga otino, “Awiifu inze omuntu ono, namumanyire, yaaya!” Ao-ao, engoko yalagula.

⁷⁵Nikuemao Petro yaingirizia ing’ana eria Yesu yaa na awoorre mbwe, “Engoko ne ekiari okulagula, ooza okulowa kasatu mbwe ngomanyire.” Yafuma enze kandi arra wululu ino.

Mathaayo 27

Awayaudi wairre Yesu ku Pilaato

(Mari 15:1; Luuk 23:1; Yowa 18:28–32)

¹Kunkio enkio walwo, awakangasi awa awoozia woona alala na awagaaka awa Awayaudi waawisia mbwe Yesu aitwe.

²Waamusiwa wagia wamuta mu amakono aga Pilaato omukangasi owa Awaruumi.

Yudaasi aigogre

(Awat 1:18–19)

³Olwa Yudaasi owaguzia Yesu yawona mbwe Yesu akengerwe ekiina ekia olumbe, owululu wuamuingirra mala afuma airanizia awakangasi awa awoozia alala na awagaaka efeedha ziawu amakumi asatu, aga waamu-aa

⁴na awoola otino, “Nkorre owuoni aeniki nguziizie omuntu omweru owula no owuoni.” Ni iwo waamuirania mbwe, “Ekio ng’ane ekintu ku ifwe yaaya. Ago mang’ana gaao.”

⁵Kutio Yudaasi yazigiza amasendi ago mu ekaalu, ataa na agia. Nikuemao yagia aigoga afwa.

⁶Awakangasi awa awoozia awo waatoola amasendi ago kandi wawoola watino, “Ngatuesa okuta amasendi gano mu owuwiiko owua ekaalu yaaya, aeniki ensikirra elowere amasendi aga amasaai ki gano.”

⁷Kutio waawisia mbwe wakole nago okugula omusiri ogwa omuwumbi, asi aa awageni awatari Awayaudi wa-awirwa.

⁸Kandi ekio nikiyo ekigera ni gukiaetwa mbwe Omusiri ogwa Amasaai nawuno reero.

⁹Kutio amang'ana aga Omugambi Yeremia yawoola gaatuuka kuwuene olwa yawoola mbwe, "Waatoola efeedha amakumi asatu, ebeei eya yakubirwa na Awaisraeli,

¹⁰watoola amasendi wagula nago omusiri ogwawanga ogwa omuwumbi, kiomo Katonda yasikirra."

Yesu ari mu ekiina emberi wa Pilaato

(Mari 15:2–15; Luuk 23:2–4, 13–25; Yowa 18:39—19:16)

¹¹Olwa Yesu yairwa emberi wa omukangasi Pilaato, yamuwuuzia otino, "Mbwe iwue ni iwue omwami owa Awayaudi?" Yesu yamuirania mbwe, "Omwene ni iwue owoorre otio."

¹²Olwa yaingirra na awakangasi awa awoozia na awagaaka awa Awayaudi, ngakairania ekintu.

¹³Nikuemao Pilaato yamuwuuzia otino, "Ngowurra amang'ana aga wakuingirra nago gano?"

¹⁴Ni Yesu ngakairania namba ing'ana ilala ku amang'ana aga waamuingirra nago, ekintu ekialuguuzia Pilaato ino.

¹⁵Mu omugomo ogwa Pasaaka, yawanga enkola eya omukangasi owa Awaruumi, okusiwula okuema mu owusiwe, omusiwe omulala owa omurima ogwa Awayaudi walowoole.

¹⁶Ku enyinga ezio, yawangao omusiwe omulala omukianyaanya ino owaetwanga Barabaasi.

¹⁷Kutio olwa omurima gwaikumia, Pilaato yawawuuzia otino, "Omuntu owa muagala mbasiwurre agati ya Barabaasi ni Yesu, oetwa mbwe Meesia ono, naanu?"

¹⁸Yawoola otio aeniki omwene yawanga na amanyire mbwe iyari nirio eriagera ni wata Yesu mu amakono gaae.

¹⁹Ni Pilaato yawanga na aikaale ku entewe yaae eya okukenga ekiina, omukazi waae yamutumra omutumwa na amulaga otino, "Otaaza waganya okukorra omuntu omweru owula no owuoni oyo ekintu ekiwiiwi. Inze omwene miire okuinyaasia ino mu amalooto ku amang'ana gaae owuire owua reero wuno."

²⁰Na awakangasi awa awoozia na awagaaka awa Awayaudi waagalusia omurima ogwa awantu kugere wasawe Pilaato awasiwurre Barabaasi, ni Yesu mbwe aitwe.

²¹Omukangasi yawawuuzia kandi mbwe, “Ku awantu wawiri wano, owa muagala mbasiwurre naanu?” Waamuirania ni wawoola mbwe, “Barabaasi!”

²²Yawawuuzia kandi otino, “Katio nkole entie ni Yesu oetwa mbwe Meesia ono?” Waamuirania ni wawoola mbwe, “Muwambe!”

²³Pilaato yawawuuzia mbwe, “Kolaki? Niki ekia akorre ekisugre no olumbe?” Ni iwo waaogerera wukalu okukira ni wawoola mbwe, “Muwambe ku omusalaaba!”

²⁴Olwa Pilaato yawona mbwe okugamba-gamba kwawu ngakukatunzianga ekintu, ni kwareetanga mala erioga eringi, yatoola amanzi aisaawa emberu wa omurima ogwa awantu awo. Olwa yamala okukola otio, yawalaga otino, “Inze mbula ni inywe mu okusuluzia amasaai aga omuntu ono. Ni inywe amasaai gae gariko!”

²⁵Awantu awo wona waawoola watino, “Reka amasaai gae gawe ku emitwe giifu ifwe alala na awaana wiifu!”

²⁶Nikuemao Pilaato yawasiwurra Barabaasi. Ni yasikirra mbwe Yesu akubwe enkowa nikwo amuta mu amakono gaawu okugia okuwambwa ku omusalaaba.

Awa-iiye wasuusia Yesu

(Mari 15:16–20; Yowa 19:1–3)

²⁷Nikuemao awa-iiye awa Pilaato omukangasi owa Awaruumi waatoola Yesu waira mu ekambi yaawu kandi wakumia omuganda omungi ogwa awa-iiye wamuikumiako wamuisunguuzia.

²⁸Waamuvuulako enguwo, nikwo wamuingizizia enguwo endiire enzakanyu.

²⁹Nikuemao, waazinga engata eya amawua wamuingizizia ku omutwe ki ekigudu ekia owuyaayi kandi watoola ensimbo, wamuteera mu okukono okusaaza. Olwa waamala okukola otio, wamukubra amasigamo ansi okumusuuusia ni wamulaga watino, “Oikaziwue, omwami owa Awayaudi?”

³⁰Waamufuuzako amate kandi wamutoolako ensimbo eyo mu amakono, watanika okumukuba nayo ku omutwe, entunda enyingi.

³¹Olwa waamala okumusuuusia otio, waamuvuulako enguwo endiire enzakanyu eyo, wamuingizizia enguwo ziae ezia eyawanga nazio. Nikuemao waafuma nae okugia okumuwamba ku omusalaaba.

Okuwambwa okwa Yesu ku omusalaaba

(Mari 15:21–32; Luuk 23:26–43; Yowa 19:17–27)

³²Ni waagendanga, waagaana omuntu owa Kureene owaetwanga mbwe Simioni. Awalangra waanigirizia omuntu oyo okuginga omusalaaba ogwa Yesu yawanga na agingre.

³³Waagia watuuka asi aa-etwa mbwe Goligotha, (erilagana mbwe asi aa Ekiyanga ekia Omutwe).

- ³⁴Ao waatoola edivaai ezogerwe ne endulwe wa-aa Yesu. Yagigusa, nikuemao alowa okuginywa.
- ³⁵Olwa waamala okumuwamba ku omusalaaba, waagawana enguwo ziae ni wakuba ensiiti
- ³⁶Waaikala ansi ao okumuwarra.
- ³⁷Awandi waamuteera amang'ana aga yaingirrwa nago ku omutwe ogwa omusalaaba, agaawoolanga mbwe: ono ni yesu, omwami owa awayaudi.
- ³⁸Awasakuzi wawiri waawambwa nae, omulala nyakukono okusaaza, no owundi nyakukono okumosi.
- ³⁹Awawitangira waamurigizra amanyego, eno ni watenzia emitwe giawu
- ⁴⁰ni wawoola watino, "Iwue owazanga okuona ekaalu kandi ogiomboke ku amiire asatu, nyingeeno inunulako omwene kato! Ika ansi oeme ku omusalaaba, no ori Omuzia owa Katonda!"
- ⁴¹Mu engira endala eyo, awakangasi awa awoozia, awagerezi awa endagirra alala na awagaaka awa Awayaudi, wona waamurigizra amang'ana ni wawoola watino,
- ⁴²"Mbwe yanunula awandi, no omwene ngaesa okuinunula! Mbwe ari omwami owa Awayaudi. Kane ka-aike aeme ku omusalaaba mbenanu! Na akorre otio, tuuza okumuganyako.
- ⁴³Mbwe ateere omwoyo gwae ku Katonda. Katonda ka-amununule katio, ni kuri mbwe amuagala. Aeniki omwene amiire okuwa na awoola mbwe, 'Ndi Omuzia owa Katonda.' "
- ⁴⁴Mu engira endala eyo, awasakuzi awaawambwa nae wona waamuzigizra amanyego.

Okufwa okwa Yesu ku omusalaaba

(Mari 15:33–41; Luuk 23:44–49; Yowa 19:28–37)

- ⁴⁵Ekierema kia-amba ekialo kiona okutanikra ku enyinga mukaaga, kutuuka enyinga kienda.
- ⁴⁶Ni ziwanga ampi okutuuka enyinga kienda, Yesu yarra no omwoyo ogwa kungulu na awoola otino, "Eli, Eli, lama sabakithaani?" erilagana mbwe, "Katonda wange, Katonda wange, ondekere kolaki?"
- ⁴⁷Olwa awandi ku awantu awaawanga ni waimeriire ao waawurra otio, waawoola mbwe, "Nguyo katio aeta Eliija."
- ⁴⁸Kalala, omulala ku iwo yarumuka agia atoola esiponji aingizia mu amalwa amalulu pe, mala agitoola agisiwa ku ekiti nikwo airra Yesu ku omunwa mbwe anywe.

⁴⁹Awiina waae waamulaga mbwe, “Mureke katio tuwoneko ne Eliija aaza okuuza okumununula.”

⁵⁰Yesu yarra no omwoyo ogwa kungulu olwa okuwiri, nikuemao omwoyo gwae gugia.

⁵¹Ao-ao, epasia eya mu ekaalu yatanduka aa kawiri, okuemera kungulu paka ansi. Ekialo kiazegera kandi amawaale gaawaaluka.

⁵²Ewiwaga ewia-aawua mu amawuuta wiaiguka kandi emiwiri egia awantu awa Katonda awaafwa, giazisiwua wawa awalamu kandi.

⁵³Waafuma mu amawuuta kandi olwa Yesu yamala okuziuka, waagia ku omugizi omweru ogwa Yerusaleemu kandi wafumira awantu awangi.

⁵⁴Olwa omukangasi owa awa-iiye alala na awa-iiye awaarindanga Yesu waawona okuzegera okwa ekialo alala ne ewindi ewiaikola ewio, owuti wuawa-amba mala wawoola watino, “Kuwuene omuntu ono kane yawanga Omuzia owa Katonda!”

⁵⁵Awakazi awangi awaalonda Yesu okuemera Galiili ni wamutunzia, woona waawanga ao. Iwo waaimerra ale ni wawona ewiagianga emberu.

⁵⁶Ku awakazi awo waawangao Maaria omwala owa Eumagidaala, Maaria ng’inwawu Yakoobo, alala ni ng’inwawu Yakoobo ni Yowaana awazia awa Zebeedi.

Owuawizi owua Yesu mu iwuuta

(Mari 15:42–47; Luuk 23:50–56; Yowa 19:38–42)

⁵⁷Yawangao omuntu omulala omunyazi owaetwanga Yoseefu owaemanga Arimathea. Olwa kwatuuka igulo, omuntu owawanga na amiire okuwa omulonzi owa Yesu ono, yaaza.

⁵⁸Yagia ku Pilaato okumusawa omuwiri ogwa Yesu, kandi Pilaato yasikirra mbwe aeewue.

⁵⁹Yoseefu yatoola omuwiri ogwo, aguwasaania mu enguwo endootu enzeru,

⁶⁰nikwo ogingizia mu iwuuta riae iyia eria ya-aawa ku iwaale. Yagalangasia oguwaale omusumba, aigala nagwo omunwa ogwa iwuuta, nikuemao afuma agia.

⁶¹Maaria omwala owa Eumagidaala ni Maaria wundi oria, waaikala embega ne embega ezia iwuuta.

Owurinzi owua iwuuta

⁶²Enkio walwo, nyanga olwa Sabato, awakangasi awa awoozia na Awafarisaayo, waagia ku Pilaato

⁶³wamulaga watino, “Omukangasi, tuingirizia kiomo omuntu omuweeyi oria yawoola na akiari omulamu mbwe, ‘Amiire asatu ni gamiire okuwua, nyiza okuziuka mbe omulamu kandi.’

⁶⁴Kutio sikirra mbwe iwuuta riae ririndwe geeza nawuno amiire asatu ago gawite. Awalonzi waae waguma okuuzza waiwe omuwiri gwae, nikwo watanike okulaga awantu mbwe aziuuke aemere ku awafu. Owuweeyi owua enyima owuo, wuesa wuawa owuwiiwi okukira owuasooka.”

⁶⁵Pilaato yawalaga otino, “Mutoole awarinzi mugie muwone mbwe iwuuta ririndirwe geeza kiomo kuesekana.”

⁶⁶Kutio waafuma wagia waziina enimbo etaesa okufuma mala ni kivunirwe, agati ya iwuuta no oguwaale ogwaigala omunwa ogwa iwuuta, kandi wata awarinzi okurinda iwuuta.

Mathaayo 28

Okuziuka okwa Yesu

(Mari 16:1–8; Luuk 24:1–12; Yowa 20:1–10)

¹Olwa Sabato yamala okuwita, enkiyo walwo kunkio kumagambaazi, owuire owusookere ku omudiira, Maaria omwala owa Eumagidaala ni Maaria wundi oria, waagia okuwarra ekiwaga ekia Yesu.

²Nikuemao ekialo kiazegera wukalu, aeniki enyankoi owa Omwami Katonda yaika na aema ku igulu agia agalangasia oguwaale ogwawanga ni guigaaleo omunwa ogwa iwuuta agutoolao mala aguikalako kungulu.

³Embonekano yaae yafwananga olumesi kandi enguwo ziae ziwanga enzeru zerre ki idaafu.

⁴Owuti wua-amba awarinzi ino kandi waa-adada wagwa ansi wakala ng’a ki ewitundu.

⁵Ne enyankoi oyo yalaga awakazi awo otino, “Mutatia yaaya, aeniki manyire mbwe muagala Yesu owawambwa ku omusalaaba.

⁶Awula ano, aeniki amiire okuziuka mala kiomo yawoola. Muuze muwone asi aa yawanga na ateerwe.

⁷Kutio, mugie wuangu-wuangu mulage awalonzi waae mbwe amiire okuziuka aemere ku awafu kandi wuno amiire okuwakangatra emberu agiire Galiili, kandi mugia okumutuukra eyo mumuwone. Mugie, miire okuwalaga.”

⁸Kutio awakazi awo waa-anguya waema ku ekiwaga ao ni wakiari no owuti kandi eno ni wari no owusangaavu owungi. Waarumuka okugia okulaga awalonzi awa Yesu eking’ana ekio.

⁹Ku engira ni wagia, Yesu yawafumira kalala awalaga otino, “Mbakeeziizie.” Waamugiako wamuifunamra, wamuamba amagulu ni wamu-aa owunene.

¹⁰Nikuemao Yesu yawalaga otino, “Mutatia. Mugie mulage waamwifu wagie Galiili aa ngia okuwawona.”

Amang’ana aga awarinzi ku okuziuka okwa Yesu

¹¹Na awakazi awo waawanga ni wakiari ku engira, awandi ku awarinzi awaarindanga ekiwaga waagia ku omugizi ogwa Yerusaleemu, wagia walaga awakangasi awa awoozia ewintu wiona ewiaikola.

¹²Awakangasi awa awoozia waaikala na awagaaka awa Awayaudi kandi wawurizania ku ekia wasugaane wakole. Waa-aa awarinzi awo amasendi amangi

¹³kandi wawalaga watino, “Muwoole mbwe, ‘Awalonzi waae waazre owuire ni tugona, waiwa omuwiri gwae.’

¹⁴Amang’ana gano ni gaizukre gatuuke ku omukangasi Pilaato, ifwe aweene tuuza okugamba-gamba nae tuwafumie mu amang’ana ago.”

¹⁵Kutio, awarinzi awo waatoola amasendi kandi wakola kiomo waalagwa. Amang’ana gaawu gano gamiire okuilanzia ino agati ya Awayaudi okutuuka nyingeeno.

Owutumwa owunene

(Mari 16:15–18)

¹⁶Nikuemao awalonzi ikumi ni mulala waagia Galiili, ku ekigiri ekia Yesu yawanga na awalagre mbwe wagiako.

¹⁷Olwa waamuwona, waamuifunamra ni wamu-aa owunene, na awandi ku iwo waawanga ni wakiari no okuingirizia mbwe andi ng’ani iye.

¹⁸Yesu yawagiako kandi awalaga otino, “Amaani goona ku igulu ni ku ekialo gamiire okuteewua mu amakono gange.

¹⁹Kutio, mugie mu ewialo wiona mugalusie awantu wawe awalonzi wange, ni muwabatiisa ku eriina eria Katonda Ise, eriina eria Omuzia no Omwoyo Omweru.

²⁰Muwagerere okulonda amang’ana goona aga miire okuwasikirra, kandi muwe no okumanya mbwe nyiza okuwa ni inywe amiire goona nawuno mu owutuuko owua ekialo.”

Mariiko

Mariiko 1

Yowaana Omubatiisi alonga engira

(Math 3:1–12; Luuk 3:1–18; Yowa 1:19–28)

- ¹Gano na amang’ana amalootu agari kuwuene ku ewintu ewia Yesu Kristo Omuzia owa Katonda yakola ku ekialo.
- ²Kiomo Katonda yawoola mu ebuuki eya awagambi otino, “Wona, nyiza okutuma omutumwa wange emberu waa, ooza okukulongera engira yaa.”
- ³“Omwoyo ogwa omuntu oetana mu ekeewa otino, ‘Mulongere Omwami engira, mumugololre engira ewe enyigolovu.’ ”
- ⁴Omuntu oyo yawanga Yowaana, yafuma mu ekeewa atanika okulanzizia awantu mbwe wagaluke wareke amawi, wabatiiswe kugere Katonda awarekere owuoni wuawu.
- ⁵Awantu awangi ino awa mu ekialo ekia Yudeea no omugizi ogwa Yerusaleemu waagia ku Yowaana. Waawoola amawi gaawu owuyanga, nikwo Yowaana yawabatiisa mu oluuzi olwa Yordaani.
- ⁶Yowaana yawanga na aiwoya enguwo ezia owuwiri owua engamia, kandi yawanga no omukanda ogwa iseero mu ensinzi yaae. Yarianga amadeede no owuuki owua mu isaka.
- ⁷Yawalanzizia otino, “Omuntu ooza enyima wange ari omukaate okunkira, owa ng’asugre namba okuikirra okusiwula engoe ezia ewiraato wiae.
- ⁸Inze mbabatiisa na amanzi, ni iye aaza okuwabatiisa no Omwoyo Omweru.”

Yesu abatiisrwe na amanzi kandi no Omwoyo Omweru

(Math 3:13–17; Luuk 3:21–22)

- ⁹Mu amiire ago, Yesu yaema Nazareeti mu ekialo ekia Galiili, kandi yagia abatiiswa ni Yowaana mu oluuzi olwa Yordaani.
- ¹⁰Olwa Yesu yafuma mu amanzi otino, yawona igulu ni ri-iguka kandi Omwoyo Omweru ogwa Katonda yaika nawuno amuguirrako mu embonekano eya iemba-
emba.
- ¹¹Kandi omwoyo gwaemera ku igulu ogwawoola gutino, “Iwue ni iwue omuzia wange owa ngonziizie, kandi owa nsangaarre nae.”

Yesu ageezaaniwua ne Ekikeeno

(Math 4:1–11; Luuk 4:1–13)

- ¹²Nikuemao otino, Omwoyo Omweru yamutoola amuira mu ekeewa.
- ¹³Yawa mu ekeewa eyo ku amiire amakumi ane ni Sataani amugeezaania. Yawanga eyo ne entiang’i ezia mu isaka, kandi enyankoi waamutunzia.

Yesu atanika emirimo egia okulanzia amang'ana amalootu

(Math 4:12–17; Luuk 4:14–15)

14Ni Yowaana yawanga na amiire okuingiziwua mu owusiwe, Yesu yaaza owaawu Galiili okulanzia amang'ana amalootu aga Katonda.

15Yawoolanga otino, “Enyinga zimiire okutuuka kandi Owuami owua Katonda wuri ampi. Kutio mugaluke mureke amawi giinyu, muganye amang'ana amalootu aga Katonda.”

Yesu aetre awalonzi waae awa kuluweri

(Math 4:18–22)

16Ni Yesu yawitanga ku omwalo ogwa enyanza eya Galiili, yawona Simioni ni wamwawu waae Andereeya ni wari mu enyanza ni watega engoe, aeniki waawanga awavuwu.

17Nikuemao yawalaga otino, “Muuze mundonde, ni nyiza okuwagerera okuvuwa awantu ni muwandeetako.”

18Waafuma wuangu-wuangu wareka engoe ziauwu walonda Yesu.

19Ni Yesu yagia emberu wutono, yawona Yakoobo ni wamwawu waae Yowaana, wona awazia awa Zebeedi, ni wari mu owuato wuawu wanawa engoe.

20Ku enyinga ezio yawaeta, kandi waareka swawu Zebeedi na awemirimo waae mu owuato, wamulonda.

Yesu ari na amaani aga okufumia ewikeeno

21Waairana Kapernaumu kandi olwa owuire owua Sabato wuatuuka otino, Yesu yaingira mu esinagoogi kandi atanika okugerera awantu.

22Awantu awaamuwurra na agerera waaluguula ino, aeniki yagereranga geeza kandi na amaani, ni ng'ani ki awagerezi awa endagirra.

23Enyinga ezio, yawangao omuntu owawanga ne ekikeeno ekiwiiwi mu esinagoogi yaawu omwo.

24Omuntu oyo yarra wukalu otino, “Otuagalakooki, iwue Yesu Omunazareeti? Wuno ooze okutumala? Nkumanyire owa ori. Ni iwue Omweru oemere ku Katonda.”

25Ni Yesu yasiagizia ekikeeno ekio na awoola otino, “Sarigira kiri, kandi fuma omuemeko!”

26Ekikeeno ekiwiiwi ekio kiagera omuntu oyo aitaza-taza, kandi kiarra wukalu nikwo kifuma kimuemako.

27Amang'ana ago ga-amba eminwa egia awantu awaawangao wona. Kutio waaiwuuzia agati yaawu watino, “Gano amang'anaaki gano? Eno ne engerera empia efwana etie eno? Agamba-gambra namba ewikeeno ewiwiiwi na amaani nawuno wiamuwurra.”

²⁸Kino kiagera eriina riae rimanyika kalala asi-uasi mu ewialo wiona ewiri ampi ni Galiili ao.

Yesu alamiizie awantu awangi

(Math 8:14–17; Luuk 4:38–41)

²⁹Olwa yafuma mu esinagoogi otino, Yesu alala ni Yakoobo ni Yowaana, waagia waingira mu enyumba eya Simioni ni Andereeya.

³⁰Maaziala Simioni yawanga omwo na agona ku ekitanda no omuwiri guri omuyu le, alwala. Waamulaga mbwe omukazi oyo yawanga omulwire.

³¹Yesu yamugiako amuamba okukono amuemia kungulu, kandi owulwire owuo wuamureka; kandi yatanika okuwa-aa okuria warie.

³²Igulo olwo, ne enyanga egia okugwamo, waareetra Yesu awantu woona awaawanga awalwire namba awaawanga ne ewikeeno.

³³Awantu woona awa Kapernaumu waaikumia mu ekiriango ekia enyumba okuwona.

³⁴Yalamia awantu awangi awaalwalanga amalwire agagawukane-gawukaane kandi yawafumiamo ewikeeno ewingi. Ngakaganyira ewikeeno ewio okugambagamba, aeniki wiawanga ni wimumanyire.

Yesu alanzia amang'ana amalootu Galiili

(Math 4:23–25; Luuk 4:42–44)

³⁵Enkio walwo kunkio kungoko, Yesu yafuma omwene agia asi andi aa akawa omwene, kandi yasawa Katonda ao.

³⁶Lunyima, Simioni na awantu wandi awaawanga nae waafuma okumuagala aa ari.

³⁷Waamutuukra kandi wamuwuzia watino, “Eno nio ori, na awantu woona wakuagala eria?”

³⁸Yesu yawairania otino, “Kutunigirizia mbwe tugie mu emigizi egiri emberi ano, kugere ndanzie amang'ana amalootu omwo mwona, aeniki ekio niki ekiagera ni nyiza ku ekialo.”

³⁹Kutio yagenda-genda mu ekialo ekia Galiili kiona na alanzia mu amasinagoogi gaawu kandi na afumia ewikeeno ku awantu.

Yesu alamiizie omuntu owa owugenge

(Math 8:1–4; Luuk 5:12–16)

⁴⁰Ni Yesu yagenda-gendanga, omuntu owa owugenge yamugiako, amukubra amasigamo ansi kandi amusawa otino, “Nkusawa mbwe no oganyire, oesa okunyeruya mbe omweru.”

⁴¹Yesu yamuambra amasaasra, amugiako ampi kandi agolola okukono kwae amuamba na amulaga otino, “Ee, nganyire. Wa omulamu!”

- ⁴²Mu enyinga ziazane ezio, omuntu oyo, owugenge wuamuwuako chwe, alama.
- ⁴³Yesu yamureka agie enyinga ezio kandi amugaania wukalu
- ⁴⁴na amulaga otino, “Otaaza walaga omuntu ekia nkukoriire kino, ni gia oilagane ku omuozia kandi ofumie omusango ogwa Muusa yasikirra awantu awalamre ku owugenge, kiwe ekilago ku awantu woona mbwe olamre.”
- ⁴⁵Kukawa mbwe Yesu yamugaania otio, iye yatanika okulaga awantu mbwe Yesu nio omulamiiizie kandi amang’ana ago gaailanzia ino. Okuilanzia okwa amang’ana ago kwalowera Yesu okugia mu emigizi na awantu wamuwona. Yaweeranga aaiwisre. Ni kukawa kutio, awantu waaemanga mu ewialo wiona ni wamugiako.

Mariiko 2

Yesu ari na amaani aga okurekera awantu amawi

(Math 9:1–8; Luuk 5:17–26)

- ¹Lunyima, Yesu yairana Kapernaumu. Olwa awantu waawurra mbwe amiire okuirana ari engo,
- ²awantu waamugiako awangi awaizula enyumba kutambuka ekiriango, aa otatuukra aa otaza. Ni Yesu yawalanzizianga amang’ana amalootu aga Katonda,
- ³awantu wane waamuirra omuntu omulwire owa omuwiri gwae gwafwa eng’anzi mbwe amulamie.
- ⁴Ni ngawakatuukra iwaga eria okutuuka ampi ni Yesu, aeniki ngawaesanga okuwita omurima ogwa awantu awangi awaawanga ao. Kutio, waaniina kungulu watagula olusala aiwariire ni aa Yesu yawanga; kandi olwa waamala okuowola asi asugre, waaisia omulwire oyo na aigoloole ku owuriri, mu enyumba.
- ⁵Olwa Yesu yawona okuganya okwa waawanga nakwo, yalaga owa omuwiri gwafwa eng’anzi oyo otino, “Mwana wange, amawi gaao orekeerwe.”
- ⁶Awagerezi awa endagirra awaawanga ni waikaale ao waatanika okuiwuuzia mu emioyo giawu watino,
- ⁷“Omuntu ono agamba-gamba atie? Aifwanania ni Katonda! Naanu oesa okurekera awantu owuoni ogawuuke ni Katonda omwene?”
- ⁸Mu enyinga ezio Yesu yamanya mu omwoyo gwae ekia waaiwuuzia mu emioyo giawu ekio. Kutio yawawuuzia otino, “Ekigera ni muiwuuzia ku amang’ana gano mu emioyo giinyu niki?”
- ⁹Mundageko ekiwuuwu okukola, okulaga omulwire mbwe, ‘Amawi gaao orekeerwe,’ nakuwa okumulaga mbwe, ‘Ema otoole owuriri wuao ogie?’
- ¹⁰Ni kugere mumanye mbwe Omuzia owa Omuntu ari na amaani aga okurekera awantu amawi ku ekialo kuno...” yalaga omulwire oyo otino,
- ¹¹“Nkulaga mbwe, ema otoole iseero riao ogie engo.”

¹²Mu enyinga ezio, yaema atoola iseero riae afuma na agia na awantu woona wamuwona. Kutio, awantu woona awaawanga ao waaluguula ino kandi waatondowola Katonda ni wawoola watino, “Tukiari okuwona ekintu ekifwana kitino.”

Yesu yaaza okueta awooni

(Math 9:9–13; Luuk 5:27–32)

¹³Yesu kandi yairana ku omwalo ogwa enyanza eya Galiili. Awantu awangi waamugiako kandi yatanika okugerera amang’ana amalootu aga Katonda.

¹⁴Olwa yamala okuwagerera kandi ataa na agia, yawona Laawi omuzia owa Alfaayo na aikaale mu enyumba omwa awantu waafumiangamo omusolo. Yesu yalaga omuntu oyo mbwe, “Ndonde,” kandi ao-ao Laawi yaema atanika okumulonda.

¹⁵Lunyima, ni Yesu yarianga omwa Laawi, awasolozzi awa omusolo na ‘awooni’ awangi waaikala okuria nae alala na awalonzi waae. Aeniki awantu awangi ino waumulonda.

¹⁶Olwa Awafarisaayo awaawanga awagerezi awa endagirra waawona Yesu na aria na ‘awooni’ na awasolozzi awa omusolo, wasoozia awalonzi waae watino, “Ekigera na aria na awasolozzi awa omusolo na ‘awooni’ niki?”

¹⁷Olwa Yesu yawurra okuwuzia okwo, yawalaga otino, “Awiifu kane awalwire, nganiwo awaagala omurezi? Awalamu iwo waagarraki omurezi? Inze ng’anyakaaza okueta awantu awigolovu, ni nyaazra awooni.”

Engerera eya Yesu egawuuke ne eya Awafarisaayo

(Math 9:14–17; Luuk 5:33–38)

¹⁸Awalonzi awa Yowaana na Awafarisaayo waawanga ni wasiwa aa wataria okuria amiire gandi. Kutio, awantu wandi waagia ku Yesu wamuwuzia watino, “Ekigera na awalonzi awa Awafarisaayo na awa Yowaana wasiwa okuria, ni iwue awaao ngawasiwa okuria niki?”

¹⁹Yesu yawalaga otino, “Kuwa kutie mbwe awageni awa mu owugeni owua enserezi waesa okusiwa okuria ni ng’ina enserezi akiari nawo? No omwene enserezi akiari nawo ngawaesa okusiwa okuria.

²⁰Amiire gaaza aga ng’ina enserezi oyo aaza okutoolwao awaemeko, nikwo warisiwa okuria mu amiire ago.

²¹Awulao omuntu oesa okunawa ekiraka ekiyia ku enguwo enkiire. Ni na akorre otio, ekiraka ekiyia ekio kiiza okutanduka kieme ku enguwo eyo, kandi asi atanduku ao asigale awiwi okukira.

²²Lwona, awulao oesa okuta edivaai empia mu ekimuga ekia edivaai ekia iseero ikulu. Ni na akorre otio, edivaai eyo eeza okuzimbia iseero erio ritanduke kandi

edivaai eyo efugike, kandi ekimuga ekia iseero ekio kioneke. Kutio, edivaai empia eteewua mu ekimuga ekia iseero iyia.”

Yesu nio Omwami owa Sabato

(Math 12:1–4; Luuk 6:1–5)

²³Owuire wulala, olwa Sabato, Yesu yawitanga mu emisiri egia engaano. Ni waawitanga omwo, awalonzi waae waatanika okuiya ewigala ewia engaano ni waria.

²⁴Kutio Awafarisaayo waalaga Yesu watino, “Wonako! Ekigera na awalonzi waao waiya ewigala ewia engaano olwa Sabato niki, ne endagirra iifu ngetuganyiire okukola otio?”

²⁵Yesu yawairania otino, “Inywe mukiari okusoma ekia Omwami Daudi yakola olwa iye alala na awantu awayawanga nawo waawurranga enzala?”

²⁶Yagia mu enyumba eya Katonda, amiire aga Abiaatha yawanga Omuoza munene, aeewua kandi aria emikaati egitengeekwe emberu wa Katonda, egia endagirra etaganyiire omuntu-umuntu okuria mala omuoza eng’ene; kandi yaesania egindi ku awantu awaawanga nae wona wagiria.”

²⁷Yesu yamariizia na awoola mbwe, “Mbalaga kuwuene mbwe, Katonda yateerao omuntu Sabato ni Katonda ngakalukira Sabato omuntu.

²⁸Kutio, Omuzia owa Omuntu no omwami owa namba Sabato.”

Mariiko 3

Yesu alamiizie omurema olwa Sabato

(Math 12:9–14; Luuk 6:6–11)

¹Owuire wundi Yesu yaingira mu esinagoogi, kandi omuntu yawanga omwo owa okukono kwae kwaremera, kuigoda.

²Awafarisaayo waagalanga ekintu ekia wakamuingirra nakio mbwe aonre Sabato.

³Yesu yalaga omuntu owa okukono kwae kwaremera oyo otino, “Iza emberu ano.”

⁴Nikuemao yawuuzia awaagalanga engira eya okumuamba awo otino, “Endagirra iifu etuganyiire okukolaki olwa Sabato, okukola geeza nakuwa okukola owuwiiwi? Okutunzia owulamu owua omuntu nakuwa okumuita? Ni iwo waasarigira kiri.”

⁵Yesu yawawarra no okusu awasunguuzia, kandi yawa-ambra amasaasra ku okuwa kwawu ne emioyo emikalu, nikwo alaga omuntu oyo otino, “Golola okukono kwao.” Yagolola okukono kwae kandi okukono okwo kwairana kuwa okulamu ng’ese.

⁶Awafarisaayo waafuma omwo wagia wata ekiina enyinga ezio okuwurzania na awantu awa Omwami Eroode okuagala kiomo wakamuita.

⁷Yesu yafuma ao na awalonzi waae agia ku omwalo ogwa Galiili, kandi awantu awangi owuluku awaema mu ekialo ekia Galiili waamulonda. Lwona awandi awangi waaema Yudeea,

⁸Yerusaleemu ni Idumea, ne ewialo ewiri engereka indi eya oluuzi olwa Yordaani. Awandi wona waaema mu ewialo windi ewilondokana ne emigizi egia Taaya ni Sidooni. Awantu wano waamulondanga nikulondokana ne ewia waamuwurrako mbwe akola.

⁹Awantu waawa awangi ino kugera Yesu alaga awalonzi waae mbwe watoole owuato aniine kandi wawusindike mu amanzi wutono kugere awantu watamuisindiganiako.

¹⁰Aeniki yawanga na amiire okulamia awantu awangi, kandi wona awaawanga na amalwire waamuisindiganiako ni waagala mbwe wamuambeko.

¹¹Enyinga ziona ezia ewikeeno ewiwiiwi wiawonanga Yesu, wiagwanga ansi emberu waae ni wimulaga witino, “Iwue no Omuzia owa Katonda.”

¹²Ni Yesu yawisiagizia wukalu mbwe witamumanyisia ku awantu wamanye owa yawanga.

Yesu alowoole awatumwa ikumi ni wawiri

(Math 10:1–4; Luuk 6:12–16)

¹³Yesu yaniina agia mu ekigiri kandi yaeta awalonzi waae awa yaagalanga mbwe wamugieko; kandi waamuuzako.

¹⁴Ku awantu wano, yalowola awantu ikumi ni wawiri awa yaeta mbwe awatumwa waae awaazanga okuwa nae kandi awa yaazanga okutuma okugia okulanzia

¹⁵kandi oku-aa amaani aga okukira nago ewikeeno.

¹⁶Awalonzi waae awo waawanga, Simioni owa Yesu yaluka mbwe Petro,

¹⁷Yakoobo ni wamwawu waae Yowaana awazia awa Zebeedi, (awa Yesu yaluka mbwe Bonagiisi, okulagana mbwe, awazia awa olukuwa);

¹⁸Andereeya ni Piliipo, Batholomeo, Mathaayo, Thomaasi, Yakooobo omuzia owa Alfaayo, Thadaayo, Simioni Omusiani,

¹⁹ni Yudaasi Iskarioti, owaguzia Yesu.

Awantu waingirizia mbwe Yesu akola na amaani aga Belzebuuli

(Math 12:22–30; Luuk 11:14–23)

²⁰Olwa Yesu yairana Kapernaumu, awantu awangi waamulonda nawuno waingira mu enyumba omwa yawanga. Awantu waawa awangi aa Yesu na awalonzi waae ngawakatuukra iwaga eria okuria.

- ²¹Olwa ng'inwae ni waamwawu waae waawurra eking'ana ekio, waafuma okugia okumwirukira aeniki awantu wandi waawoolanga mbwe Yesu ari ni ilalu.
- ²²Awagerezi awa endagirra awaaema Yerusaleemu waawoola watino, "Belzebuuli omukangasi owa ewikeeno amuriko, kandi nio omueere amaani aga afumia nago ewikeeno."
- ²³Yesu yalaga awantu mbwe wamugieko ampi. Yagamba-gamba nawo na awalaga otino, "Muingirizia mbwe Sataani kiesa okumpa amaani aga okufumia ewikeeno otie?"
- ²⁴Owuami ki owuami owugawukaane, ngawuesa okuimerra.
- ²⁵Kandi no omugizi gugawukaane, ngaguesa okuimerra.
- ²⁶Ni Sataani kiesa okuilwania ekiene kandi kigawukane ekiene, ngakiesa okuimerra kandi kimiire okuimala kiwuere.
- ²⁷Lwona, awulao omuntu oesa okuingira mu enyumba eya omuntu omukalu amusakule ewintu wiae, na atasookre amusiwe. Nikuemao nikwo akatoola ewintu ewiri mu enyumba yaae.
- ²⁸"Kuwuene mbalaga mbwe awantu awa ekialo waaza okurekerwa amawi gaawu goona namba okuona eriina eria Katonda okwa wamiire okuona.
- ²⁹Ni, no omuntu onyegere Omwoyo Omweru, iye ngarirekerwa amawi gaae aeniki akorre amawi agatawua."
- ³⁰(Ekiagera Yesu na agamba-gamba otio, yawanga na amiire okuwurra na awantu wandi wawoola mbwe akola na amaani aga ekikeeno.)

Ng'inwawu Yesu ni waamwawu Yesu awa kuwuene

(Math 12:46–50; Luuk 8:19–21)

- ³¹Ng'inwawu Yesu ni waamwawu Yesu awekizia waaza waimerra enze eya enyumba eya Yesu yawangamo, kandi waatuma amang'ana mbwe aetwe.
- ³²Awantu awangi awaawanga ni waikaale wamuteere agati waamulaga watino, "Ng'inwao ni waamwinyu awekizia wari enze ano, wakuagala."
- ³³Yesu yawairania mbwe, "Ng'inaifu naanu? Ni waamwifu naanu?"
- ³⁴Yawarra awantu awaawanga ni waikaale nae awo, nikwo awoola otino, "Muwone! Wano niwo ng'inoifu ni waamwifu awekizia:
- ³⁵Omuntu-umuntu okola okuagala okwa Katonda nio ng'inaifu kandi nio wamwifu owekiala ni wamwifu owekizia."

Mariiko 4

Olugero olwa omurimi owagia okumwa emwo

(Math 13:1–9; Luuk 8:4–8)

¹Owuire wundi kandi Yesu yatanika okugerera awantu ku ensanyaata eya enyanza. Omurima ogwa awantu awangi gwamuikumiako kugera aingira mu owuato aikalamo no owuato wuri mu amanzi. Omurima ogwa awantu ogwo iwo waawanga ku ensanyaata.

²Yesu yawagerera ewintu ewingi mu engero na awoola otino,

³“Muwurre! Omurimi yagia okumwa emwo yaae.

⁴Ni yamwanga, emwo indi yagwa ku engira kandi enyonyi ziaza zigiria chwe.

⁵Eindi yagwa ku entare, asi aa ilowa riawulanga eringi. Eno yafuma wuangu-wuangu aeniki ilowa itono erio riawanga ni ri-iserengeere ku entare.

⁶No olwa iwasu riafuma, emere eyo yakala kandi elala no okulala aeniki yawulanga ne emizi.

⁷Emwo indi yagwa mu amawua, agaakoma ne emere mala gasindigania emere eyo, mala ereka okulawia emere.

⁸Emwo indi yagwa mu ilowa ilootu, aa yamera, ekoma kandi elawa geeza kuwungi, eindi yalawa entunda amakumi asatu okukira eyamwewua, eindi entunda amakumi mukaaga, ne eindi entunda mia kilala okukira.”

⁹Yesu yawoola otino, “Omuntu ori na amatwi aga okuwurra ka-awurre!”

Awalonzi awa Yesu wasanukuriirwe amang’ana agaiwisre

(Math 13:10–17; Luuk 8:9–10; 10:23–24)

¹⁰Ni Yesu yawanga omwene, na awatumwa waae ikumi ni wawiri alala na awantu wandi, waamuwuuzia ekigera na agamba-gamba mu engero.

¹¹Yesu yawairania otino, “Inywe ni inywe awaerwe okumanya owueru owua ewintu ewiiwisre ewia Owuami owua Katonda. Ni ku iwo awari enze, walagwa amang’ana goona mu engero.

¹²Na kutio, kukawa mbwe kuwuene wategerezia, ni ngawawurra, lwona kukawa mbwe wawarra, ni ngawawona. Ni wakawuriire kandi wawone, woona wakagaluuke warekerwe amawi gaawu.”

Ekia olugero olwa omuntu owamwa emwo lulagana

(Math 13:18–23; Luuk 8:11–15)

¹³Yesu yawawuuzia otino, “Kane mwona ngamukawurra olugero luno? Katio muuza okuwurra mutie engero zindi ziona ezia nyiza okuwagerera nazio?”

¹⁴Emwo eya omuntu yamwa, na amang’ana aga Katonda.

¹⁵Engira eya emwo yagwako, na awantu awaawurra amang’ana aga Katonda, ni wuangu-wuangu Sataani kiiza kiawanyagula amang’ana agaamwewua ku iwo.

¹⁶Olutare olwa emwo yagwako eimeriire awantu awawurra amang’ana aga Katonda, waagaingizia wuangu-wuangu no owusangaavu.

¹⁷Ni aeniki wawula emizi, wawa nago ku amiire amatoono. Ni, ne eminyako-nyaako ne emidambo giiziire awantu awa Katonda, wairana enyima waagareka enyinga ezio.

¹⁸Amawua aga emwo yagwamo, na awantu awawurra amang’ana aga Katonda,

¹⁹no okuingirizia okwa owulamu owua ku ekialo kuno, ne esemerezanio eya owunyazi alala no okuagala okungi okwa ewintu, gaingira gasindigania amang’ana ago nawuno gaareka okuama ensaafu.

²⁰Ilowa ilootu eria emwo yagwamo na awantu awawurra amang’ana aga Katonda wagaingizia, kandi waama ensaafu kangi okukira eyamwewua, awandi entunda amakumi asatu, awandi amakumi mukaaga na awandi wona entunda mia ekilala.

Kola no okumanya okwa ori nakwo

(Luuk 8:16–18)

²¹Yesu kandi yatanika okuwalaga otino, “Ario oka-ambia ekimuri kandi yakifunikira ne ekidida, nakuwa yakita mu enkuriri? Ngakita ku emesa kuwueru?”

²²Aeniki kiwulao ekintu ekiiwisre ekitaaza okuwoneka enze, lwona ekintu-ukintu ekisanikiirwe kiiza okusanukulwa.

²³Omuntu ori na amatwi aga okuwurra ka-awurre!”

²⁴Yesu kandi yawalaga otino, “Muingirizie geeza ku ewintu ewia muwurra. Omurengo ogwa orenga nagwo nigwo iwue oona ooza okurengerwa nagwo, kandi orituukra kuwungi okukira ao.

²⁵Aeniki, omuntu okola geeza ne ekia aegeekwe nio orisongwa. No omuntu otakola geeza ne ekia aegeekwe aaza okunyagulwa namba ekitono ekia yaegekwa.”

Olugero olwa emwo ekoma eene

²⁶Yesu yagia emberi na awoola otino, “Owuami owua Katonda wufwanana ne emwo eya omurimi akomeere mu omusiri gwae.

²⁷Owuire agona no omuwasu awona, ni ngamanyire kiomo emwo eyo efuma kandi ekoma. Emere ne emiire okufuma,

²⁸ilowa eriene nirio erigera ne ekoma nawuno yalawa.

²⁹Ne emiire okulawa, omurimi aaza ne engeso yagesa mu amiire aga igesa.”

Olugero olwa emwo entono ewa omuti omukaate ino

(Math 13:31–33; Luuk 13:18–21)

³⁰Yesu yawawuuzia otino, “Owuami owua Katonda tukawugeraania naki? Olugerooki olwa tukakuba okuwufwanania nawuo?”

³¹Owuami owua Katonda wufwana ne emwo eya karadaali, eri emwo entono ino okukira emwo zindi ziona ku ekialo.

³²Emwo eyo ne ekomeerwe, emera kandi yakoma nawuno yawa omuti omukaate okukira emiti giona, kandi etaako ensagia enkate-kaate ezia enyonyi ezia ku emiyaga ziomboka ewitalala mu ekiiruuzia kiagwo.”

Okugamba-gamba mu engero

(Math 13:34)

³³Yesu yawalanzizia amang’ana amalootu aga Katonda na akola ne engero ezifwana zitino, kangi nikulondokana no okuwurra kwawu.

³⁴Yesu ngakagamba-gamba nawo na atakorre no olugero; ni, ni yawanga na awalonzi waae weng’ene, yawalaganga owueru owua amang’ana ago goona.

Yesu aorezia omuyaga na amasiira

(Math 8:23–27; Luuk 8:22–25)

³⁵Owuire owuo iguulo, Yesu yalaga awalonzi waae otino, “Tuambuke enyanza tugie engereka indi eria.”

³⁶Kutio awalonzi awa Yesu waareka omurima ogwa awantu ao wagia waingira mu owuato nae. Amaato gandi goona gaawalonda enyima.

³⁷Omuyaga omuzito ino gwatemuka kandi amanzi gaatanika okuingira mu owuato, aa wuagalanga okuniwa.

³⁸Okwo kwatuukra ni Yesu asigiike omutwe geeza ku ekisigikro nyakilumba ekia owuato, na agona. Awalonzi waae waamulamusia ni wakuba erioga watino, “Omugerezi, tutunzie! Ngowona ni tufwa amanzi?”

³⁹Yesu yalamuka alaga omuyaga otino, “Gwiriira.” Kandi alaga amasiira otino, “Muoreere.” Omuyaga gwagwiriira kandi amasiira gaaoreera.

⁴⁰Nikuemao yalaga awalonzi waae otino, “Muri awati otio kolaki? Kane muwula no okuganya mutino?”

⁴¹Kukawa kutio, waawanga ni wakialuguula kandi waiwuuzia aweene watino, “Ono no omuntuki ono, owa namba omuyaga na amasiira gawurra?”

Mariiko 5

Yesu alamiizie omuntu ori ne ewikeeno

(Math 8:28–34; Luuk 8:26–39)

¹Waawunguka wagia watuuka engereka indi eya enyanza eya Galiili mu ekialo ekia Geraasi.

²Olwa Yesu yamala okufuma mu owuato, omuntu ori ne ewikeeno ewiwiiwi yamufumira mu ewiwaga.

- ³Omuntu ono yawanga na amenyere mu ewiwaga kandi awulao omuntu owaesanga okumuamba namba okumusiwa no omunyororo.
- ⁴Ku amiire amangi yawanga na asiwirwe ne engoe ku amakono ne ewiuma ku amagulu. Ni yawutula engoe ezio ne ewiuma ewia waamusiwanga nawio amagulu. Yawulangao omuntu owaesanga okumuambirira.
- ⁵Owuire no omuwasu yagenda-gendanga mu ewiwaga ni mu ewigiri na arra kandi na aikewa na amawaale iye omwene.
- ⁶Olwa omuntu ono yawona Yesu na akiari ale, yarumuka amugiako kandi amukubra amasigamo ansi na amu-aa owuti.
- ⁷⁻⁸Okwo kwatuukra ni Yesu amiire okulaga ekikeeno ekio mbwe, “Fuma omuemeko, iwue ekikeeno ekiwiiwi kino!” Ekikeeno ekio kiarra wukalu ni kiwoola kitino, “Onyagalakooki Yesu Omuzia owa Katonda omunene okukira? Nkuiyembere ku eriina eria Katonda mbwe ontamala.”
- ⁹Yesu yakiwuuzia mbwe, “Eriina riao naanu?” Kiairania mbwe, “Eriina riange ni Leejio, aeniki turi awangi.”
- ¹⁰Kandi kiaiyeмба Yesu ino mbwe atawarumusia awaire ale enze eya ekitemo ekio.
- ¹¹Kuno kwatuukra olwizo olwa enguruwe enyingi ni ziaaya ku ekigiri ampi ao.
- ¹²Kutio ewikeeno ewio wiaisasaama Yesu witino, “Tuganyire tugie tuingire mu enguruwe ziiria.”
- ¹³Kutio Yesu yawiganyira okukola otio. Ewikeeno ewiwiiwi ewio wiafuma wigia wi-ingira mu enguruwe ezio kandi olwizo olwawanga ne enguruwe ezikasuga elufu wiwiri, ziagondoka ne ekibuusi zigia zigwa ku oluwanga, ziolomoka mu enyanza mala zifwa ziona.
- ¹⁴Awaayi awa enguruwe ezio, waarumuka wagia wawoola ewiaikola wino ku awa ku omugizi gwawu ni mu ekialo ekio. Kutio awantu awo waaza okuwona ekintu ekiawanga ni kiikorre ekio.
- ¹⁵Waatuuka ku Yesu kandi wawona omuntu owawanga ne ewikeeno oyo na aikaale ao, na aingiizie enguwo kandi omutwe gwae ni guri omulootu. Ekio kiagera owuti wuwa-amba ino.
- ¹⁶Awantu awaawona ekintu kino, waagia walaga awantu ekiaikorra omuntu owawanga ne ewikeeno oyo, ne ekiaikorra enguruwe.
- ¹⁷Kutio awantu awo waatanika okuiyemba Yesu mbwe aeme mu ekitemo kiawu ekio agie.
- ¹⁸Olwa Yesu yaingiranga mu owuato, omuntu owawanga ne ewikeeno oyo yamuiyemba mbwe amuganyire agie nae.

¹⁹Ni Yesu yamulowera na amulaga otino, “Yaaya, gia engo ku awiiko waa ogie owalage kiomo Katonda akusasiire no owulootu owua akukoriire.”

²⁰Omuntu oyo yagia kandi atanika okugenda-genda ku emigizi giona ikumi na alaga awantu owulootu owua Yesu amukoriire. Awantu woona awaamuwurra, waaluguula ino.

Omwala owafwa aziuka, no omukazi omulwire owalama

(Math 9:18–26; Luuk 8:40–56)

²¹Olwa Yesu ya-ambuka enyanza airana engereka indi atuuka ku omwalo ogwa Kapernaumu, omurima ogwa awantu awangi waagia wamuikumiako.

²²Nikuemao omukangasi owa esinagoogi wundi, oetwa Jairo, yaaza. Olwa yawona Yesu, yakuba amasigamo ansi mu amagulu aga Yesu kandi

²³amuisasaama na awoola otino, “Omwala wange omutono ari omulwire ino aa enkolo yaae nie eguwa. Ganya tugie omuteeko amakono gaao kugere awe geeza kandi awe omulamu.”

²⁴Yesu yaganya afuma agia nae. Omurima ogwa awantu awangi waamulonda kandi waamuisindiganiako embega ziona.

²⁵Yawangao omukazi wundi owa enda yawanga ne emiire okuwa ne esulula ku emiaka ikumi ni iwiri.

²⁶Yawanga na amiire okunyaka-nyaaka na afula-fula ku awarezi awangi, kandi yawanga na amiire okukola no owunyazi owua yawanga nawuo wuona. Ni owulwire owuo ngawukawua, ni wuaisonga okuwa owuwiiwi ino.

²⁷Yawanga na amiire okuwurra amang’ana aga awantu waawoolanga ku Yesu. Kutio yaingira mu awantu agia nyamugongo ogwa Yesu kandi a-amba ku enguwo yaae.

²⁸Aeniki yawoola omwene mbwe, “Ni mpambre namba enguwo yaae eng’ene, nyiza okulama.”

²⁹Ku enyinga ezio, amasaai agaasululanga ago gaaimerra kalala, mala awurra mu omuwiri gwae mbwe alamre.

³⁰Yesu yawurra mu owulamu wuae mbwe amaani gafumre gamuemako, kutio yagaluka kalala awarra omurima ogwa awantu awamuikumiako awawuuzia otino, “Oambre enguwo ziangе naanu?”

³¹Awalonzi waaе wamuirania watino, “Ekigera no otuwuuzia okuambreko niki, ni kandi owona kiomo awantu wakusindigaanieko?”

³²Yesu iye yagia emberi na awarra eno ne eno okuwona omuntu omuambreko.

³³No omukazi oyo yamanya ekintu ekiawanga ni kimuikoriire, kutio yagia ku Yesu no owuti na adada kandi akuba amasigamo emberi waae amulaga owueru owua amang'ana goona.

³⁴Yesu yamulaga otino, "Omwala wange, okuganya kwao kukulamiizie. Gia no owuolu kandi wa owuyanga ku emidambo giao giona."

³⁵Ni Yesu yawanga na akiagamba-gamba, awantu wandi waaema omwa Jairo waaza wamulaga watino, "Omwala waao amiire okufwa. Katio ekikagera onyaasie Omugerezi wusaasa kiwulao."

³⁶Ni Yesu iye yareka okuingizia ekia waawoola ekio, kandi yalaga omukangasi oyo otino, "Otatia, wa-uwa no okuganya."

³⁷Yesu yalowera omuntu-umuntu okumulonda okuingira nae, ni yaingira mala ni Petro, Yakoobo ni Yowaana, wamwawu Yakoobo, weng'ene.

³⁸Olwa waatuuka ku enyumba eya omukangasi owa esinagoogi oyo, Yesu yawona awantu awaakubanga erioga eringi, na awandi ni warra kandi ni wakuba enkweri wukalu.

³⁹Olwa yaingira, yawawuuzia otino, "Ekigera ni mukuba erioga kandi murra niki? Omwana ono ngafwire, na agona."

⁴⁰Awantu awo waamusekera. Ni Yesu yawafumia enze wona, ni yatoola swawu omwana ni ng'inwae alala na awalonzi awaawanga nae, aingira nawo aa omwana yawanga.

⁴¹Ya-amba okukono kwae amulaga otino, "Taliitha kuumi"; elagana mbwe "Omwala omutono, mboola mbwe ema."

⁴²Omwala oyo yaema ku enyinga ezio, agenda-genda (yawanga ne emiaka ikumi ni iwiri), kandi ekintu ekio kia-amba awantu eminwa.

⁴³Yesu yawagaania wukalu mbwe omuntu wundi atamanya ekiaikola ekio kandi yawalaga mbwe wa-ee omwala oyo okuria arie.

Mariiko 6

Omugambi ngaerwe owuti mu ekialo kiawu

(Math 13:53–58)

¹Yesu yafuma asi ao na awalonzi waae agia ku omugizi gwawu.

²Olwa Sabato, yatanika okugerera mu esinagoogi. Awantu awangi awaawurra engerera yaae waaluguula ni waiwuuzia watino, "Omuntu ono atoorrei amang'ana gano? Amagangaki aga ari nago gano? Akola amankono amakaate gatie gano?"

³Ono ng’anio omufundi owa amabaawu oria, omuzia owa Maaria, ori wamwawu Yakoobo, Yoseefu, Yudaasi ni Simioni? Kane waamwawu waae awekiala ngatumenyere nawo ano?” Kandi waalowa okuganya ku iye.

⁴Yesu yawalaga otino, “Omugambi ngaeeewa owunene mala mu ekialo kiawu kandi na awaawu weng’ene, ni mu ewialo windi aeewua owunene.”

⁵Kutio Yesu ngakakola amankono amakaate ao, ni yata amakono gaae ku awalwire awatono awalamia.

⁶Yesu yawaluguula ino ku okutaganya okwa wataamuganyako.

Yesu atumre awatumwa waae ikumi ni wawiri

(Math 10:5–15; Luuk 9:1–6)

Yesu yagenda-genda mu ewitemo ewia ao na agerera awantu.

⁷Yaeta awalonzi waae ikumi ni wawiri awatuma wawiri-wawiri okugia okulanzia kandi yawa-aa amaani aga okufumia ewikeeno.

⁸Yawalagirizia mbwe ni wagia olugendo olwo, wataginga ekintu-ukintu, ni watoole mala ensimbo eng’ene. Wataginga okuria, ensawo eya olugendo, nakuwa amasendi ku emikanda giawu.

⁹Ewiraato ni waiwoye, ni wataginga enguwo iwiri.

¹⁰Yesu yamariizia na awalaga otino, “Mumenye mu enyumba eya muingiziiwemo nawuno kutuuke mufume ku omugizi ogwo.

¹¹Ni, na awantu awa mu ekitemo kindi watawaingiizie kandi ni walowere okuwawurra, mukukumule egunduusi eri ku amagulu giinyu ni mufuma kiwe ekisiagizio ku iwo.”

¹²Waafuma wagia kandi walanzizia awantu watino, “Awantu wasugaane wagaluke wareke amawi gaawu.”

¹³Waasawira awantu ni wawafumizia ewikeeno ewingi kandi waawaka awalwire awangi na amavuta ni walama.

Okuitwa okwa Yowaana Omubatiisi

(Math 14:1–12; Luuk 9:7–9)

¹⁴Omwami Eroode yawurra goona aga Yesu yakolanga, aeniki ewintu wino wiagera eriina riae rimanyika mu ewialo wiona. Awandi waawoolanga watino, “Yowaana Omubatiisi nio oziukre aemere ku awafu kandi ekio nikio ekigera na ari na amaani aga okukola amankono.”

¹⁵Na awandi waawoolanga mbwe, “Andi ono ne Eliija.” Awandi wooka mbwe, “Andi ono no omulala ku awagambi awakulu!”

¹⁶Olwa Eroode yawurra otio, yawoola otino, “Yowaana ng’anyamukenga igosi afwa, kandi akawa omulamu atie?”

- ¹⁷Okwo kwatuukra ne Eroode amiire okutuma awantu wa-amba Yowaana, wamuta mu owusiwe ku amang’ana aga Erodiasi muka wamwawu waae Piliipo, owa Eroode yawanga na atoorre okuwa omukazi waae.
- ¹⁸Ni Yowaana yamuganianga enyinga ziona na amulaga mbwe, “Yaaya, endagirra iifu ngekuganyiire okutoola muka wamwinyu awe omukazi waao, wamwinyu na akiario omulamu!”
- ¹⁹Kino kiagera Erodiasi akola owuzigu ni Yowaana kandi yaagalanga mbwe aite Yowaana. Ni ngakaesanga aeniki
- ²⁰Eroode yatia Yowaana aeniki yawanga na amanyire mbwe Yowaana yawanga omuntu omulootu kandi omweru, kutio yamurinda geeza. Yawanga na agonziizie amang’ana aga Yowaana kukawa mbwe gaamunyaasianga enyinga ziona ezia yagawurranga.
- ²¹Ne Erodiasi yatuukra iwaga eria okumuita, olwa Omwami Eroode yakola owugeni owua okugomera owuire owua yaiwurrwamo. Yaeta awakangasi awa mu owuami wuae na awakangasi awatiirwe mu ekialo ekia Galili.
- ²²Olwa omwala owa Erodiasi yaingira kandi azina owuzina owuaomerezia Eroode na awageni waae, omwami yalaga omwala oyo otino, “Nsawe ekintu-ukintu ekia okaagala kandi nyiza okuku-aa.”
- ²³Omwami yamuifuuwira na awoola otino, “Ekintu-ukintu ekia onsawire nyiza okuku-aa, namba ni kuri enusu eya owuami wuange.”
- ²⁴Omwala oyo yasomoka agia awuuzia ng’inwae otino, “Niki ekia nsugaane nsawe omwami ampe?” Ng’inwae yamuirania otino, “Gia omusawe omutwe ogwa Yowaana Omubatiisi.”
- ²⁵Omwala oyo yairana wuangu-wuangu ku omwami amulaga otino, “Nyangala mbwe ompe omutwe ogwa Yowaana Omubatiisi ku oludaawo, nyingeeno.”
- ²⁶Omwami yawurra uwiiwi ino mu omwoyo gwae; ni ku endagano eya omwene yata na amuifuuwira emberu wa awageni waae, ngakaesanga okuima omwala oyo ekia yamusawa.
- ²⁷Mu enyinga ezio, Omwami yatuma omulala ku awarinzi waae amulaga mbwe agie areete omutwe ogwa Yowaana. Omurinzi oyo yagia mu owusiwe akenga igosi eria Yowaana,
- ²⁸areeta omutwe ku oludaawo, kandi aguezania ku omwala oyo. Omwala oyo oona yagutoola aguirra ng’inwae.
- ²⁹Olwa awalonzi awa Yowaana waawurra ekiaikola ekio, waaza watoola omuwiri gwae waguawira mu iwuuta.

Yesu aeere awantu awakirre elufu witaanu okuria

(Math 14:13–21; Luuk 9:10–17; Yowa 6:1–13)

- ³⁰Olwa awatumwa awo waairana ku Yesu, waamulaga wiona ewia wagereere ne ewia wakorre.
- ³¹Awantu awangi waaweerao ni waingira kandi ni wafuma aa Yesu na awalonzi waae ngawakatuukra namba iwaga eria okuria, kutio Yesu yalaga awalonzi waae otino, “Mutuingire mu owuato tugie asi aa iwisre kugere tutuukre iwaga tuwuluuke.”
- ³²Waafuma wawalama no owuato okugia aa awantu wawula, okuwa aweene.
- ³³Awantu awangi awaawawona ni wasiawala waagia waamanya aa waagianga, kutio awantu waaema mu emigizi giona egia ao ni wawita enze na amagulu wawasookera okutuuka aa waagianga.
- ³⁴Olwa Yesu yagowa ku omwalo kandi awona omurima ogwa awantu awangi ogwo, yawa-ambra amasaasra aeniki waafwananga amagondi agawula no omwayi. Kutio yatanika okuwagerera ewintu ewingi.
- ³⁵Ni kwatuuka igulo, awalonzi waae waamugiako wamulaga watino, “Asi ano emigizi giwulao, ne enyinga ziona zimiire okugia ino.
- ³⁶Kutio laga awantu wagie waagale okuria mu emigizi ne ewitemo agiri ampi na ano, aweene wagie wagule ekintu ekia wakaria.”
- ³⁷Yesu yawairania otino, “Inywe aweene muwa-ee ekintu warie.” Waamulaga watino, “Amasendi agakagula emikaati egikasuga awantu wano na agaera edinaari mia wiwiri. Kutio ifwe tugie tuagalei okuria okwo tugule warie?” Nikuemao Yesu yawalaga otino,
- ³⁸“Muwarreko mbwe muri ne emikaati imeka?” Olwa waamala okuwarra, waamulaga watino, “Tutuukiire emikaati itaanu ne emvwa iwiri.”
- ³⁹Yesu yawasikirra mbwe awantu waikale ansi ku owusuwi ewifuwo-wifuwo.
- ⁴⁰Kutio waaikala ansi mu ewifuwo mia kilala ewia awantu amakumi ataanu-ataanu.
- ⁴¹Yesu yatoola emikaati itaanu ne emvwa iwiri ziria. Yaginga amiiso gaae ku igulu, airanzia Katonda otioo nikwo agenyula emikaati. Nikuemao yatoola emikaati egio a-aa awalonzi waae wagigawre awantu awo. Kandi yagawa emvwa iwiri ezio ku awantu awo wona.
- ⁴²Wona waaria waiguta du.
- ⁴³Nikuemao waakunza ewimega ewia emikaati ne emvwa ewiasigala, mala wiizula ewidida ikumi ni wiwiri.
- ⁴⁴Awantu awaaria emikaati egio awekisaaza weng’ene waawanga elufu witaanu.

Yesu agende-gendre ku amanzi

(Math 14:22–33; Yowa 6:16–21)

⁴⁵Nikuemao, Yesu yanigirizia awalonzi waae okuingira mu owuato wakangate emberi wagie engereka indi, aetwa Bethsaida. Ni iye yasigala enyima na asiwula omurima ogwa awantu awo wagie.

⁴⁶Ni yamala okusiwula awantu awo wagia, Yesu yaniina ku ekigiri omwene okusawa.

⁴⁷Iguulo no owuato wumiire okugia ale ku owuziwa, ni Yesu yawanga na asigaale omwene ku ekialo,

⁴⁸yawona omuyaga ni gunyaasia awalonzi waae aeniki aa waavuganga ni wagia, nio aa omuyaga gwawanga ni guemara. Owuire ni wuri ampi okukia, Yesu yawagiako na agenda-genda ku enyanza. Yagia ki oagala okuwawitako,

⁴⁹no olwa waamuwona na agenda-genda ku amanzi, waaingirizia mbwe wawuine ekikeeno kandi owuti wuawa-amba mala watanika okukuba enkweri,

⁵⁰aeniki woona waamuwona kandi owuti wuwa-amba ino. Mu enyinga ezio, Yesu yagamba-gamba nawo na awoola otino, “Mutafwa omwoyo, ono ni inze. Mutawa no owuti.”

⁵¹Nikuemao, Yesu yaniina mu owuato owua waawangamo kandi omuyaga gwaoreera. Awalonzi waae waamuluguula ino,

⁵²aeniki waawanga ni wakiari okumanya amaani aga Yesu yawanga nago kukawa mbwe nikwo yaemanga oku-aa awantu awakirre elufu witaanu okuria. Emioyo giawu giawanga emikalu.

Yesu alamiizie awantu Genezereeti

(Math 14:34–36)

⁵³Olwa waamala okuambuka enyanza, waagia wagowa Genezereeti, kandi wasiwa owuato ku ensanyaata.

⁵⁴Olwa waafuma mu owuato watino, awantu wamanyirizia Yesu kalala,

⁵⁵kutio waagia waira amang’ana mu emigizi egiri ampi ao giona kandi wareeta awalwire ku Yesu ni wagonere ku amaseero gaawu.

⁵⁶Asi-uasi aa yagia, kuwe mu emigizi, mu ewitemo, nakuwa mu ewialo wiawu, waa-azia awalwire mu ewiyyia kandi waamuiyemba mbwe areke wa-ambeko namba enguwo yaae kandi awa-amba enguwo yaae woona waalama.

Mariiko 7

Endagirra ezia Awayaudi ne engerera ezia Yesu

(Math 15:1–9)

¹Owuire wulala Awafarisaayo na awagerezi awa endagirra wandi awaaema Yerusaleemu, waaikumia alala okugia ku Yesu, okumuagalako amang’ana.

- ²Waatuukra na awalonzi waae wandi waria na amakono agataoziiwue kiomo enkola eya Awafarisaayo eagala.
- ³Awafarisaayo na Awayaudi waaisawanga nikulondokana ne enkola eya waaguukwa waawu.
- ⁴Ni waaemanga mu ewiyyia, ngawakaesanga okuria ni wakiari okuisaawa kiomo enkola yaawu eagala. Waalondanga enkola zindi ziona ezifwana ne ezia okuozia ewikombe, entamu, ne endaawo.
- ⁵Kutio Awafarisaayo na awagerezi awa endagirra waawuuzia Yesu watino, “Ekigera na awalonzi waa ngawalonda endagirra ezia waaguukwa wiifu niki? Iwo waria na amakono amamwamu agataisaawrwe.”
- ⁶Yesu yawairania otino, “Inywe awantu awaisemerezia wano! Kane Isaaya omugambi yawanga kuwuene olwa yawagambako, kiomo kwajojwa mbwe: “ ‘Awantu wano wampa owuti mala ne eminwa, ne emioyo giawu giri ale ni inze.
- ⁷Owunene owua wampa wuwula ne emirimo; engerera ziauwu ziri mala amang’ana aga awantu wateere mbwe galondwe.’
- ⁸Murekere ensikirra ezia Katonda kandi muisiwire ku nkola eziateewuao na awantu.”
- ⁹Yesu yagia emberu na awalaga otino, “Muri no owuganga owua okulowa ensikirra ezia Katonda kugere murinde endagirra ziinyu!
- ¹⁰Aeniki Muusa yawoola mbwe ‘Tia swao ni ng’inwao’kandi mbwe ‘Omuntu-umuntu onyegere swae nakuwa ng’inwae paka aitwe.’
- ¹¹Ni inywe muwoola mbwe omuntu olagre swae ni ng’ina mbwe ‘owuitunzi owua nkakueere miire oku-aa Katonda,’
- ¹²mumuganyiire mbwe kiwulao ekia asugaane a-ee swae ni ng’inwae.
- ¹³Ao otio, mutoola amang’ana aga Katonda ki agawula ne emirimo kugere mute endagirra ziinyu emberu. Lwona muri ne enkola zindi enyingi ezifwana zitio ezia mulonda.”

Ekintu ekiesa okumwamia omuntu

(Math 15:10–20)

- ¹⁴Yesu yaeta awantu awaawanga ao woona wamuuzeko mala awalaga otino, “Mutege amatwi muwurre:
- ¹⁵Kiwulao ekintu ekiri enze eki-ingira mu enda eya omuntu ekiesa okugera yawa omumwamu. Ne ewintu ewifuma mu omunwa ogwa omuntu, niwio ewigera no omuntu awa omumwamu.
- ¹⁶Ori na amatwi aga okuwurra ka-awurre!”

¹⁷Olwa Yesu yaema ku awantu awo yagia mu enyumba na awalonzi waae. Waamuwuzia mbwe awalageko ekia olugero olwo lulagana.

¹⁸Yesu yawairania otino, “Namba inywe mwona ngamuluwurra? Ngamuwona mbwe ekintu ekiema enze ni ki-ingira mu omuntu, ngakigera na awa omumwamu,

¹⁹aeniki ngaki-ingira mu omwoyo gwae, ni ki-ingira mala mu enda yaae, kandi kiafuma enze?” (Kutio Yesu yaganya mbwe ewiokuria wiona wisugaane wiriiwue.)

²⁰Yesu yagia emberu na awoola otino, “Ekintu ekifuma mu omwoyo ogwa omuntu niki ekigera na awa omumwamu.

²¹Aeniki ni kuema muni mu omwoyo ogwa omuntu nimwo amaingirizio amawiiwi, owusondo, owuiwi, owuisi,

²²okugia no omukazi namba omusaaza owa owundi ku iseero, endandiire, enkola embiiwi, owuweeyi, okuinyonkoonia, iyari, okuitoola, okuwoola awantu uwiiwi alala no owumayaanu wiona wiema.

²³Ewintu wino wiona wifuma muni mu omwoyo ogwa omuntu, kandi wiagera omuntu yawa omumwamu.”

Okuganya okwa omukazi otari Omuyaudi

(Math 15:21–28)

²⁴Nikuemao Yesu yafuma ao agia mu ekialo ekia Taaya ni Sidooni. Yaingira mu enyumba indi kandi ngakaagalanga mbwe awantu wamanye mbwe ari omwo. No okuwa kwae omwo ngakukaesanga okuiwisa.

²⁵Omukazi wundi yawangao owa omwala waae yawanga ne ewikeeno. Olwa yawurra mbwe Yesu ari ao, yamugiako kandi amukubra amasigamo ansi mu amagulu gaae.

²⁶Yawanga omukazi omugeni, owaiwulwa mu ekialo ekia Siiria asi aetwa Foeniisia. Yasawa Yesu mbwe agie amufumizie ewikeeno ku omwala waae.

²⁷Yesu yamuirania otino, “Reka nsooke nye awantu wange okuria, aeniki ngakuri kulootu omuntu okutoola owuita owua awaana arigizre embwa.”

²⁸No omukazi oyo yamuirania otino, “Ngakuwiiwi Omwami, noona manyire mbwe ng’andi omulala ku awantu waa, ni namba embwa ziona ziria ewiokuria ewigwire ansi eya emeesa na awaana waria.”

²⁹Yesu yamulaga mbwe, “Ku amang’ana gaa amalootu ago, oesa okuirana engo aeniki ewikeeno wimiire okufuma ku omwala waa.”

³⁰Olwa omukazi oyo yairana engo, yatuukra omwala waae na agona ku owuriri, ewikeeno ni wimiire okumuemako.

Yesu alamiizie awalwire awangi enze eya ekialo ekia Awayaudi

(Math 15:29–31)

³¹Olwa Yesu yaema Taaya, yaika Sidooni na aemao aniina awitra Dekapooli na airana ku omwalo ogwa Galiili.

³²Awantu wandi wamureetra omuntu omurimba kandi omuziwi. Waasawa Yesu mbwe agie amuambeko no okukono kwae kugere alame.

³³Yesu yafumia omuntu oyo mu awantu. Nikuemao yatoola ewiala wiae aingizia mu amatwi aga omulwire oyo, afuuzza amate mu okukono kwae nikuemao a-amba olurimi olwa omuntu oyo na amate.

³⁴Owutuukre, Yesu yasooka awarra ku igulu, aezera wukalu, nikwo alaga omulwire oyo mbwe, “Efata.” Okulagana mbwe, “Iguka!”

³⁵Ao-ao, omuntu oyo amatwi gae gaiguka kandi yatanika okugamba-gamba kwona.

³⁶Yesu yagaania awaawangao wukalu mbwe, watalaga omuntu-umuntu ekintu ekia akorre ekio. Ni kiomo yagianga emberi okuwagaania, nintio waagianga emberi okulaga awantu eking’ana ekio.

³⁷Woonna awaawurra eking’ana ekio, waawa no okuluguula kiomo Yesu akola ewintu ewilootu. Ekia waaluguulanga ino ni mbwe, Yesu yageranga awatagamba-gamba, ni wagamba-gamba, kandi awatawurra, ni wawurra.

Mariiko 8

Yesu aeere awantu elufu wine awatari Awayaudi okuria

(Math 15:32–39)

¹Mu amiire ago, na amiire amangi gakiari okuwita, awantu awangi kandi waaikumia ku Yesu. Okuria kwawulangao okwa awantu awo wakaria, kutio Yesu yaeta awalonzi waae wamuuzeko kandi awalaga otino,

²Mpambra awantu wano amasaasra aeniki wamiire okuwa ni inze ku amiire asatu goona, ni nyingeeno wawula okuria okwa wakaria.

³Ni, ni mbarekere wagie mu emigizi giawu ne enzala, omuuka guuza gwawawuera ku engira ni wagia aeniki awandi ku iwo waemere ale.”

⁴Awalonzi waae waamuwuzia watino, “Mu ekeewa aa turi ano tukatuukrai emikaati egikasuga awantu wano?”

⁵Yesu yawawuuzia mbwe, “Muri ne emikaati imeka?” Waamuirania mbwe, “Musamvu.”

⁶Yesu yasikirra omurima ogwa awantu awo mbwe waikale ansi. Nikuemao yatoola emikaati musamvu egio aikazia Katonda nikwo agigenyula. Yagitoola agiezenia ku awalonzi waae kugere wagawire awantu awo okuria kandi waagiezenia ku omurima ogwa awantu awo.

⁷Waawanga ne emvwa entono-ntono. Olwa yamala okuikazia Katonda ku emvwa ezio, yalaga awalonzi waae mbwe wazitoole ziona wazigawire awantu.

⁸Awantu woona waaria nawuno waiguta du! Olwa waamala kuria, awalonzi wakunza ewimega ewia ewiokuria ewiasigala, wisuga ewidida musamvu.

⁹Awantu woona awaaria waawanga ni wakira elufu wine.

¹⁰Olwa Yesu yamala okuwasiwula wagia, yaingira mu owuato na awalonzi waae, wagia mu ekitemo ekia Delmanuutha.

Awakangasi awa Awayaudi wagala wakorrwe amankono

(Math 16:1–4; Luuk 12:54–56)

¹¹Awafarisaayo wandi waamugiako okumugeezaania ni wamuwuuzia mbwe awakorreko ekilago ekiemere ku igulu.

¹²Yesu yakemula no omwoyo omululu na awoola otino, “Ekigera na awantu wagala mbwe wakorrwe ekilago niki? Mbalaga kuwuene mbwe kiwulao ekilago ekia waaza okueewua.”

¹³Nikuemao, yawareka agia aingira mu owuato na awalonzi waae okuambuka enyanza wagia engereka indi.

Muwe amankaga no omumera ogwa Awafarisaayo

(Math 16:5–12)

¹⁴Awalonzi waalawira okutoola emikaati, ni waawanga mala no omukaati omulala gweng’ene mu owuato.

¹⁵Yesu yawasiagizia otino, “Muwe amankaga kandi muirinde ku omumera ogwa Awafarisaayo no omumera ogwa Eroode.”

¹⁶Waagamba-gamba agati yaawu aweene ni wawoola watino, “Paka kuwe mbwe awoola otio aeniki tuwula ne emikaati.”

¹⁷Yesu yamanya ekia waawoolanga kutio yawawuuzia otino, “Ekigera ni mugamba-gamba ku okuwula no omukaati niki? Kane owuo ngamuwurra lwona ngamuntuukra? Owuo emioyo giinyu gikiari emikalu?”

¹⁸Muri na amatwi ni ngamuwurra. Lwona muri na amiiso ni ngamuwona. Ngamuingiriziako enyima?

¹⁹Olwa nyagawira awantu awakirre elufu witaanu emikaati itaanu, mwakunza ewidida ewimeka ewia ewiokuria ewiasigala?” Wamuirania mbwe, “Ikumi ni iwiri.”

²⁰Yesu yawuuzia kandi otino, “No olwa nyariisia awantu awakirre elufu wine ne emikaati musamvu, mwakunza ewidida ewimeka ewia ewimega ewia ewiokuria ewiasigala?” Waamuirania mbwe, “Musamvu.”

²¹Yesu yawawuuzia mbwe, “Katio ekiwalowera okumanya ekia mboola niki?”

Yesu alamiizie omuwuunu Bethsaida

²²Olwa waatuuka Bethsaida, awantu wandi waamuirra omuntu omuwuunu wamusawa mbwe aganye amulamie kugere awone.

²³Yesu yamuamba okukono amufumia enze eya omugizi. Ni Yesu yamala okumufuuzako amate mu amiiso, yamutaako okukono nikwo amuwuuzia otino, “Mberi owona ekintu?” Omuntu oyo

²⁴yamuirania mbwe, “Ee, mbona awantu! Ni, ng’ambawona geeza. Wamfwananira emiti ni kandi wagenda-genda.”

²⁵Yesu kandi yamutaako okukono ku amiiso, mala amiiso gae gatanika katio okuwona kandi yawona ewintu wiona geeza.

²⁶Yesu yamulaga mbwe, “Gia engo.” Kandi amugaania otino, “Gia-ugia, otairana Bethsaida.”

Petro awoorre mbwe Yesu nio Meesia

(Math 16:13–20; Luuk 9:18–21)

²⁷Yesu na awalonzi waae waagia watuuka mu ewitemo ewia Kaisaria Filiipi. Ku engira ni wagia, yawawuuzia otino, “Awantu wawoola mbwe ni inze anu?”

²⁸Waamuirania watino, “Awantu wawoola mbwe ori Yowaana Omubatiisi, awandi mbwe ori Eliija, na awandi wona wawoola mbwe ori omulala ku awagambi.”

²⁹Yesu yawagalukra awawuuzia otino, “Ni inywe muwoola mbwe ni inze anu?” Petro yamuirania otino, “Iwue ni iwue Meesia.”

³⁰Yesu yawagaania mbwe watalaga omuntu wundi owa ari.

Yesu agamba-gambre ku okufwa kwae

(Math 16:21–23; Luuk 9:22)

³¹Yesu yatanika okuwagerera mbwe Omuzia owa Omuntu paka awone eminyako-nyaako mu engira enyingi, kandi aaza okulowua na awagaaka awa ediini eya Awayaudi, na awakangasi awa awoozia alala na awagerezi awa endagirra. Lwona aaza okuitwa, no owuire owua okusatu ariziuka kandi.

³²Yawoola amang’ana gano mu engira ewurikana geeza. Kutio Petro yamutoola amuira antulo atanika okumusiagizia ku amang’ana ago.

³³Yesu yagaluka alaga Petro omugongo awarra awalonzi waae wandi, nikwo yagaania Petro na awoola otino, “Ema emberi wange, iwue Sataani! Aeniki owula ne ewintu ewia Katonda mu amaingirizio gaa, ni mala ewintu ewia awantu niwio ewia omanyire.”

Oagala okuwa omulonzi wa Yesu paka aganye okufumia owulamu wuae

(Math 16:24–28; Luuk 9:23–27)

³⁴Yesu yaeta awantu awangi awo alala na awalonzi waae wamuuzeko, nikwo awalaga otino, “Omuntu oogala okundonda, paka asooke ailowe iye omwene kandi atoole omusalaaba gwae andonde.

³⁵Aeniki omuntu-umuntu oogala okununula owulamu wuae iye omwene, aaza okuwurigiza. No omuntu origiize owulamu wuae ku amang’ana gange ni ku amang’ana aga injiili, iye aaza okutuukra owulamu.

³⁶No owulootuuki owua omuntu akawona na ari no owunyanzi owua ku ekialo kiona, na ateesie owulamu wuae?

³⁷Niki ekia omuntu akagalusania no owulamu wuae?

³⁸Aeniki omuntu osuuka ni inze kandi na amang’ana gange emberu wa awantu awaoneeke kandi awatatiire Katonda wano, Omuzia owa Omuntu yona arisuuka nae olwa ariiza no owukaate owua swae, na ari ne enyankoi aweeru.”

Mariiko 9

¹Yesu yagia emberu na awalaga otino, “Mbalaga kuwuene mbwe awandi ku awantu awari ano ngawarifwa ni wakiari okuwona Owuami owua Katonda ni wuuzza na amaani.”

Embonekano eya Yesu egaluuke enzeru zerre

(Math 17:1–8; Luuk 9:28–36)

²Na amiire mukaaga gaamala okuwita, Yesu yatoola Petro, Yakoobo ni Yowaana afuma nawo waniina ku ekigiri ekiliire okuwa aweene. Eyo embonekano eya Yesu yagaluka emberu waawu,

³kandi enguwo ziae ziawa enzeru zerre ezing’ena-ng’ena ino okukira kiomo omuntu-umuntu akaozia enguwo ku ekialo kuno.

⁴Mu enyinga ezio, Muusa ne Eliija waawafumira ao ni wagamba-gamba ni Yesu.

⁵Nikuemao, Petro yalaga Yesu otino, “Omugerezi, kuri kulootu mbwe turi ano. Reka tuomboke ewigiti wisatu, ekilala kiwe ekiao, ekindi ekia Muusa ne ekindi ekia Eliija.”

⁶Owuti wuawa-amba ino kandi Petro ngakamanya ekia yawoolanga.

⁷Ire riaika riwasanikizia kandi omwoyo gwaema mu ire ogwawoola gutino, “Ono no omuzia wange owa ngonziizie. Mumuwurre.”

⁸Nikuemao waawarra eno ne eno, ni ngawakawona omuntu wundi na ari ao nawo, ni mala Yesu eng’ene.

⁹Ni waaikanga ni waema ku ekigiri, Yesu yawagaania wukalu mbwe watalaga omuntu-umuntu ekia waawona nawuno kutuuke Omuzia owa Omuntu aziuke okuema ku awafu.

¹⁰Waawisa eking'ana ekio. Ni waaiwuuzia aweene mbwe, "Awoolaki na agambagamba ku okuziuka okuema ku awafu?"

Okuirana okwa Omugambi Eliija

(Math 17:10–13)

¹¹Awalonzi waae wamuwuuzia watino, "Ekigera na awagerezi awa endagirra wawoola mbwe Eliija nio owasugananga asookere Meesia okuuzza niki katio?"

¹²Yesu yawalaga otino, "Kuwuene Eliija nio osooka okuuzza kugere airanie ewintu wiona wiwe geeza. Ni mberi mumanyire mbwe kwajojwa mu endagano mbwe Omuzia owa Omuntu ariwona eminyako-nyaako emingi kandi arilowua ne ekirega?"

¹³Ni mbalaga mbwe Eliija amiire okuuzza, kandi waamukorra ewintu ewia waagalanga, kiomo kwajojwa ku iye."

Yesu alamiizie omuzia owawanga ne ekikeeno

(Math 17:14–21; Luuk 9:37–43a)

¹⁴Olwa waairana watuuka ku awalonzi wandi, waatuukra omurima ogwa awantu awangi ni wawiikumizieko wawasunguuzie, kandi awagerezi awa endagirra waaikululananga nawo mu amang'ana.

¹⁵Olwa omurima ogwa awantu awo woona waawona-uwona Yesu watino, waaluguula ino kandi waarumuka wamugiako kandi watanika okumukeezia.

¹⁶Yesu yawawuuzia otino, "Muikululana mu amang'ana kolaki?"

¹⁷Omuntu owawanga mu omurima ogwa awantu omwo yamuirania otino, "Omugerezi, mberenga ni ndetere omuzia wange ku iwue, aeniki ari ne ekikeeno ekia owurimba.

¹⁸Asi-uasi aa kimuambiire, kimugwisia ansi, yaluma amiino gae kandi ifulo riamufumako, nikwo yakala ng'a! Nsawire awalonzi waa mbwe wakifumie, no okukifumia kuwakirre."

¹⁹Yesu yawairania otino, "Oo inywe ikula eriwula no okuganya rino! Nyiza okuwa ni inywe ni nsikiizie omwoyo ku amang'ana giinyu kutuuka ri? Mutoole omuzia oyo mumureete ano."

²⁰Waatoola omuzia oyo waira ku Yesu. Olwa ekikeeno kiawona Yesu kitino, kiagwisia omuzia oyo ansi. Yagwa ansi atanika okugalangatana ni ifulo rifuma mu omunwa.

²¹Yesu yawuuzia swawu omwana oyo otino, "Omwana ono amiire okuwa otino okuemera ri?" Yamuirania mbwe, "Okuemera mu owuana wuto.

²²Kangi kimiire okuwa ni kimugwisia mu omurro ni mu amanzi, mala mbwe kimuite. Ni no oesa okukola ekintu-ukintu, awiifu tuambre amasaasra otutunzie."

²³Yesu yamulaga mbwe, “Ekigera no owoola mbwe ni nyesa niki? Ewintu wiona wiesekana ku omuntu oganyire ku Katonda.”

²⁴Mu enyinga ezio swawu omuzia oyo yamuirania na awoola mbwe, “Ndi no okuganya okutono ku Katonda, ntunzie mbe no okuganya okusugre ku Katonda.”

²⁵Olwa Yesu yawona awantu awangi ni warumuka ni waaza alala, yasiagizia ekikeeno ekiwiiwi ekio na awoola mbwe, “Iwue ekikeeno ekia owurimba kandi ekia amatwi amaziwu kino, fuma omuemeko kandi otamuiranako kandi!”

²⁶Ekikeeno ekio kiarra wukalu kandi kiagera no omuzia oyo aitaza-taza nikwo kimufumako. Omuzia oyo yasigala na akarre ng’a ki omuntu ofwire, kandi awangi waawoola mbwe, “Awiifu, na mpano afwire!”

²⁷Ni Yesu yagia amuamba okukono amuemerezia, kandi yaimerra omwene.

²⁸Ni Yesu yawanga na amiire okuingira mu enyumba, awalonzi waae waamuwuzia ni wari aweene watino, “Ekigera ne ekikeeno ekio kiaa ni kitukirre okufumia niki?”

²⁹Yesu yawalaga otino, “Ekikeeno ki kino ngakiesa okufumiwua-ufumiwua wusaasa otio, ni mala ku okusawa no okusiwa okuria.”

Yesu agamba-gambre kandi ku okufwa no okuziuka kwae

(Math 17:22–23; Luuk 9:43b–45)

³⁰Olwa waaema asi ao, waalonda engira ewitra Galiili. Yesu ngakaagalanga mbwe omuntu amanye aa wari,

³¹aeniki yagereranga awalonzi waae. Yawalaga otino, “Omuzia owa Omuntu aaza okuguziwua, ateewue mu amakono aga awantu awaaza okumuita. Ni, na amiire okufwa, amiire asatu ni gamiire okuwita, aaza okuziuka aeme ku awafu awe omulamu kandi.”

³²Ni ngawakawurra ekia yawalaganga ekio, ni lwonwa waatia okuwuzia.

Omunene okirre awandi mu Owuami owua Katonda

(Math 18:1–5; Luuk 9:46–48)

³³Yesu na awalonzi waae waagia watuuka Kapernaumu. Ku engira ni wagia, awalonzi waae waaikululananga mu amang’ana ku okawa omukangasi agati yaawu. Olwa waamala okuingira mu enyumba, Yesu yawawuzia otino, “Mugalusianenga amang’ana ku engira kuuki?”

³⁴Wasarigira kiri wareka okumuirania aeniki ni waawanga ku engira, waaikululananga mu amang’ana aweene ni waiwuzia naanu okawa omunene agati yaawu.

³⁵Yesu yaikala ansi aeta awalonzi waae awalaga otino, “Omuntu oogala okuwa omukangasi asugaane aikole omutono otuukre kandi awe omukurumu owa awantu wona.”

³⁶Yesu yaimerezia omwana omuto emberu waawu. Yakunaania omwana oyo mu amakono gaae, nikwo awalaga otino,

³⁷“Omuntu-umuntu oingiizie omwana omuto ki ono, ku eriina riange, anyingiizie inze. No omuntu onyingiizie, ng’ani inze owa aingiizie eng’ene, na aingiizie kugia Katonda owantuma.”

Omuntu otatulwanya ari oluwega lwifu

(Luuk 9:49–50)

³⁸Owuire wundi, Yowaana yamulaga otino, “Omugerezi, tuwuine omuntu wundi na afumia ewikeeno ku eriina riao, ni ifwe tumugaaniizie aeniki iye ngakawanga omulala ku ifwe.”

³⁹Ni Yesu yamuirania otino, “Yawa, mutaaza mwamuemerezia okukola otio, aeniki awulao omuntu okakola amankono ku eriina riange kandi mu enyinga ezio awoole ekintu ekiwiiwi ku inze.

⁴⁰Aeniki omuntu-umuntu otatulwanya ari oluwega lwifu.

⁴¹Mbalaga mbwe, omuntu owaere amanzi aga okunywa aeniki muetwa ne eriina eria Kristo, kuwene ngarireka okutuukra omugawo gwae.”

Ogera Omukristo na airana enyima mu okuganya ariwona owululu

(Math 18:6–9; Luuk 17:1–2)

⁴²Yagia emberu na awoola otino, “No omuntu-umuntu okagera omulala ku awakiari no okuganya okutono wano ni waingira mu owuoni, kuri kulootu okukira na asiwirweko oluwaare ku igosi, agie arigizwe mu enyanza.

⁴³No okukono kwao kugera no oingira mu owuoni, kukenge kuemeo. Kuri kulootu ku iwue no oingiire mu owulamu no owula ekiimo ekilala okukira okugia mu omurro ogutazima no ori na amakono awiri.

⁴⁴Asi ao enyende zirio ezitafwa kandi omurro gwona ngaguzimao.

⁴⁵No okugulu kwao kugera no oingira mu owuoni, kukenge kuemeo. Kuri kulootu ku iwue okuingira mu owulamu no oremeere okukira okurizwa mu omurro no ori na amagulu awiri.

⁴⁶Asi ao enyende zirio ezitafwa kandi omurro gwona ngaguzimao.

⁴⁷Ni kuri mbwe eriiso riao rigera no oingira mu owuoni, rikumbule riemeo. Kuri kulootu ku iwue no oingiire mu Owuami owua Katonda ne ekidong’o okukira okurizwa mu omurro no ori na amiiso awiri.

⁴⁸Asi ao enyende zirio ezitafwa kandi omurro gwona ngaguzimao.

⁴⁹Omuntu-umuntu oagala okundonda, paka aeruziwue no omurro.

⁵⁰“Omuunyu mulootu; ni, ni guteesiizie enzaziima, oesa otie okuguiraniamo enzaziima kandi? Kutio, mutateesia enzaziima iinyu, ni muwe no owuolu omuntu no omwina waae.”

Mariiko 10

Yesu agerera ku okurekana no omukazi

(Math 19:1–12; Luuk 16:18)

¹Yesu na awalonzi waae waafuma Kapernaumu wagia nawuno watuuka mu ekitemo ekia Yudeea ekiri engereka indi eya oluuzi olwa Yordaani. Olwa yatuuka, awantu awangi waamuikumiako, kutio yatanika okuwagerera kiomo kwawanga enkola yaae.

²Awafarisaayo wandi awaaza okumugeezaania waamuwuuzia watino, “Lwona endagirra iifu eganyiire omusaaza okurekana no omukazi waae?”

³Yesu yawairania na awawuuzia otino, “Endagirra eya Muusa ewoola etie ku eking’ana ekio?”

⁴Waamulaga watino, “Endagirra eya Muusa yaganyira omusaaza okujoja itu eria okurekana ni mukaae, mala yarekana nae.”

⁵Ni Yesu yawairania otino, “Muusa yawajojera endagirra eno aeniki emitwe giinyu giawanga emikalu.

⁶No okuemera mu owutanikro owua owulusi, ‘Katonda yawaluka omusaaza no omukazi.’

⁷Kuno kugera omusaaza areka swae ni ng’ina, mala yaizogaana ni mukaae,

⁸kandi awantu wawiri awo wawa ekintu ekilala.’ Kutio awantu awo ngawari wawiri yaaya, ni wari ekintu ekilala.

⁹Kandi kutio ekia Katonda ateere alala, omuntu ataaza yagawula, yaaya.”

¹⁰Ni waawanga mu enyumba, awalonzi waae waamuwuuzia eking’ana ekio.

¹¹Yesu yawalaga otino, “Omuntu-umuntu orekaane ni mukaae kandi akwe omukazi wundi, ari omusoodani kandi aoneere mukaae oyo.

¹²Lwona no omukazi arekaane no omusaaza waae kandi akwewue no owundi, akorre owusoodani.”

Yesu asereeke awaana awato

(Math 19:13–15; Luuk 18:15–17)

¹³Awantu waareetanga awaana ku Yesu kugere awateeko okukono awasereke. Na awalonzi waae waasoozia awantu awaawareetanga awo.

¹⁴Olwa Yesu yawona ni wakola watio, ngakaomerrwa nawo kandi yawalaga otino, “Mureke awaana awato wanyizeko, kandi mutawalowera yaaya. Aeniki Owuami owua Katonda wuri owua awantu awari ki awaana wano.

¹⁵Mbalaga kuwuene mbwe omuntu-umuntu otaganyire owulamu wuae wuwe ansi eya owurinzi owua Omwami Katonda kiomo omwana awa ansi eya owurinzi owua swae, ngari-ingira mu Owuami owua Katonda.”

¹⁶Nikuemao, Yesu yaginga awaana awo mu amakono gaae kandi awasereka, na ata amakono gaae ku iwo.

Omuwuuka omunyazi

(Math 19:16–26; Luuk 18:18–27)

¹⁷Ni Yesu yafumanga na agia, omuntu yasomoka amugiako akuba amasigamo ansi emberi waae, amuwuuzia otino, “Omugerezi omulootu, ekia nsugaane nkole niki kugere ntuukre owulamu owutariwua?”

¹⁸Yesu yamuirania otino, “Onyeta mbwe omulootu kolaki? Awulao omuntu omulootu mala Katonda eng’ene.

¹⁹Ngomanyire ensikirra: ‘Otaita, otasooda omukazi owa owundi, otaiwa, otata ku omuntu amang’ana aga owuweeyi, otasemerezia omuntu no ori no okuagala okumutuukrako ekintu kandi tia swao ni ng’inwao.’?”

²⁰Omuntu oyo yamuirania otino, “Omugerezi, ensikirra zino ziona miire okuzirinda okuemera mu owuana wuto wuange.”

²¹Yesu yamuwarra mu amiiso aomererwa nae, kandi yamulaga otino, “Kirio ekintu ekilala ekia okiakeeyire: Gia oguzie ewintu ewia ori nawio wiona nikuemao otoole amasendi aga onatuukramo o-ee awataka, nikwo ooza okuwa no owuwiiko ku igulu. No omiire okukola otio, ooze ondonde.”

²²Olwa omuntu oyo yawurra otio, yafuma agia na ari no owululu ino mu omwoyo gwaae, aeniki yawanga no owunyazi owungi.

²³Yesu yawarra awalonzi waae nikwo awalaga otino, “Kuriwa okukalu okufwana kutie ku awantu awari no owunyazi okuingira mu Owuami owua Katonda.”

²⁴Awalonzi waae waaluguula amang’ana gaae ago. Ni Yesu yawalaga kandi otino, “Waana wange, kuri okukalu okufwana kutie okuingira ku Owuami owua Katonda?”

²⁵Kuri kunyoowu engamia okuingira mu iwundu eria esindaano okukira omunyazi okuingira mu Owuami owua Katonda.”

²⁶Amang’ana ago gaawazindusia ino, kandi waamulaga watino, “Oesa okununulwa katio naanu?”

²⁷Yesu yawawarra mala awalaga otino, “Ku omuntu kino ngakiesekana, ni ng’ani ku Katonda, aeniki ewintu wiona wiesekana ku Katonda.”

Ekia turituukra ku okulonda Yesu

(Math 19:27–30; Luuk 18:28–30)

²⁸Petro yamulaga otino, “Omwami, ifwe tureekere ewintu wiona tukulonda!”

²⁹Yesu yawalaga otino, “Mbalaga kuwuene mbwe awulao omuntu orekere amayumba, nakuwa wamwawu awekizia nakuwa awekiala, nakuwa swae, nakuwa ng’inwae, nakuwa awaana, nakuwa emisiri, ku amang’ana gange no okulanzia amang’ana aga Katonda,

³⁰otaaza okutuukra, mu amiire aga owulamu wuno, awaana, waang’inwae, waaswae, waamwawu, amayumba, ne emisiri entunda mia ekilala kangi okukira, alala no okunyasiwua. Ni mu amiire agaaza arituukra owulamu owutariwua.

³¹Na awantu awangi awakangaate, wariwa enyima, kandi awantu awangi awari enyima warikangata.”

Yesu agamba-gambre olwa okusatu ku okufwa kwae

(Math 20:17–19; Luuk 18:31–34)

³²Lunyima ni waawanga ku engira ni wagia Yerusaleemu, Yesu yawanga na akangaate emberi waawu. Awalonzi waae waawanga ni waluguula kandi awaawalondanga enyima waawanga no owuti. Yesu kandi yatoola awalonzi waae ikumi ni wawiri wawa aweene, nikwo awalaga ekiagianga okumuikorra eyo.

³³Yawalaga otino, “Wuno tugia Yerusaleemu, kandi Omuzia owa Omuntu agia okuguziwua ku awakangasi awa awoozia na awagerezi awa endagirra. Waaza okumukengera ekiina ekia olumbe, kandi waaza okumuta mu amakono aga awantu awatari Awayaudi.

³⁴Awantu awo waaza okumukorra amatiicha, wamufuuzeko amate, wamuswawuke enkowa, nikwo wamuite. Na amiire asatu gamiire okuwua aaza okuziuka aeme ku awafu.”

Okuagala okwa Yakoobo ni Yowaana

(Math 20:20–24)

³⁵Owuire wundi Yakoobo ni Yowaana, awazia awa Zebeedi, waagia ku Yesu wamulaga watino, “Omugerezi, tukaagala mbwe otukorre ekintu-ukintu ekia tuuza okukusawa.”

³⁶Yesu yawairania otino, “Eki muagala mbwe mbakorre niki?”

³⁷Waamuirania watino, “Tuganyire tuikale ni iwue mu owunene wuao, omulala ote nyakukono kwao okusaaza no owundi nyakukono kwao okumosi.”

³⁸Yesu yawalaga mbwe, “Ngamumanyire ekia musawa. Inywe mwona muesa okunywera ekikombe ekia eminyako-nyaako ekia nyiza okunywamo, nakuwa okutuukra owubatiiso owua olumbe owua nyiza okubatiiswa?”

³⁹Waaganya mbwe, “Ee, tuesa.” Yesu yawalaga otino, “Muuza okunywa mu ekikombe ekia eminyako-nyaako ekia nyiza okunyweramo, kandi muuza okubatiiswa no owubatiiso owua emidambo emilulu owua nyiza okubatiiswa nawuo.

⁴⁰No okuikala nyakukono kwange okusaaza namba okumosi ng’ani inze oesana iwaga, yaaya. Na amawaga ago na aga awantu awa gaatengekrwa kale.”

⁴¹Olwa awalonzi ikumi wandi waawurra watio, waawona uwiiwi ni Yakoobo ni Yowaana.

Oagala okukangata paka awe omukurumu owa awandi

(Math 20:25–28; 19:28; Luuk 22:24–30)

⁴²Yesu yawaeta woona wamuuzako nikwo awalaga otino, “Mumanyire mbwe awakangasi awa awantu awa ekialo kino wari awatinzi kandi walagana amaani aga wari nago ku awantu awa wakangatiire.

⁴³Ku inywe ng’anintio kusugaane kuwe, yaaya. Aa mukakorre mutio, omuntu oagala okuwa omunene agati iinyu paka awe owemirimo wiinyu,

⁴⁴kandi oagala okuwa owa kuluweri paka awe omukurumu owa awantu woona.

⁴⁵Aeniki Omuzia owa Omuntu oona ngakaaza mbwe awantu wamukorre, ni yaaza okukorra awantu, kandi okufumia owulamu wuae kugere awangi wasiwulwe mu amawi gaawu.”

Yesu alamiizie omuwuunu Batimaayo

(Math 20:29–34; Luuk 18:35–43)

⁴⁶Waagia watuuka Yeriiko, kandi olwa Yesu na awalonzi waae alala no omurima ogwa awantu awangi awaawalondanga waafumanga, waatuukra Batimaayo, omuzia owa Timaayo, omuwuunu omusawi-sawi, na aikaale entulo eya engira.

⁴⁷Olwa yawurra mbwe Yesu Omunazareeti nio owita, yatanika okukuba erioga na awoola otino, “Yesu, Omuzia owa Daudi, mpambreko amagongi!”

⁴⁸Awantu awangi waamugaania ni wamulaga mbwe asarigire; ni iye yagia emberu na akuba erioga ino otino, “Omuzia owa Daudi, mpambre amagongi!”

⁴⁹Yesu yaideng’a kandi awoola otino, “Mumuete ano.” Awantu waaeta omuwuunu oyo watino, “Ori ne enkawi. Ema wuangu omugieko, akueta.”

⁵⁰Omuntu oyo yarigiza enguwo yaae aema wuangu-wuangu kandi agia ku Yesu.

⁵¹Yesu yamuwuzia otino, “Eki oagala nkukorre niki?” Omuntu omuwuunu oyo yamuirania mbwe, “Omugerezi, nyagala amiiso gange gawone.”

⁵²Yesu yamulaga otino, “Okuganya kwao kukulamiizie, oesa okugia-ugia katio.” Ku enyinga ezio, amiiso aga omuwuunu oyo gaawona kandi yalonda Yesu mu olugendo lwae.

Mariiko 11

Yesu aingiziiwue Yerusaleemu ne ekisangaalo

(Math 21:1–11; Luuk 19:28–40; Yowa 12:12–19)

¹Olwa Yesu na awalonzi waae waawanga ampi okutuuka Yerusaleemu, ni wari Bethfaage ni Bethania ku ekigiri ekia Zaituuni, yatuma awawiri ku awatumwa waae

²na awalaga otino, “Mugie mu ekitemo ekiri emberi kiiria. Ni muingira, mugia okutuukra entikiri embuuka ekiari okuginga omuntu ne esiwirwe ao. Mugisiwule mugireete.

³No omuntu awawuziizie mbwe, ‘Ekigera ni musiwula entikiri eyo niki?’ Mumulage mbwe ‘Omwami nio ogiagala kandi aaza okugiirania ano wuangu.’ ”

⁴Waafuma wagia watuukra omwana owa entikiri ne esiwirwe enze ku ekikulo, kandi waagisiwula.

⁵Awantu awaawanga ni waimeriire ao waawawuuzia watino, “Musiwula entikiri eyo kolaki?”

⁶Awalonzi awo waawairania kiomo Yesu yawalaga, kutio awantu awo waawareka wagia nayo.

⁷Olwa waareeta entikiri eyo ku Yesu, waatoola enguwo ziwu wagiaziako nikwo Yesu yaniina agiikalako.

⁸Owungi owua awantu waatoola enguwo ziwu waziazia ku engira, na awandi wa-azia ensagia eziri na amatu amangi ezia waavuna mu emisiri.

⁹Awantu awaawanga emberi na awaaemanga enyima waae waaogerera wukalu watino, “Osaana! Asereekwe iye ooza ku eriina eria Omwami Katonda!”

¹⁰“Owuami owua guukwa iifu Daudi owuuzwa wusereekwe! Osaana ku ori kungulu okukira!”

¹¹Yesu yaingira Yerusaleemu kandi yagia aingira mu ekaalu. Olwa yamala okuwarra ewintu wiona ewiawanga mu ekaalu, yafuma na awalonzi waae ikumi ni wawiri wairana Bethania aeniki kwawanga ni kumiire okutuuka igulo.

Yesu afuuwre omuti ogwa omukuyu

(Math 21:18–19)

¹²Enkio walwo, ni waaema Bethania ni wairana Yerusaleemu, Yesu yawurranga enzala.

¹³Yawona omuti ogwa omukuyu na amatu amangi gagusewuukeko okuemera ale. Kutio yagugiako ampi okuwona na akatuukra ni guriko ensaafu. Olwa yagutuukako, ngakatuukra ekintu, ni mala amatu geng'ene, aeniki amiire aga okuama ensaafu gaawanga ni gakiari.

¹⁴Yesu yalaga omuti ogwo otino, “Ngooza okuama ensaafu ziriiwue na awantu kandi!” Awalonzi waae waawurra ekia yawoola ekio.

Yesu arumuusie awaguzi mu ekaalu olwa okuwiri

(Math 21:12–17; Luuk 19:45–48)

¹⁵Olwa waatuuka Yerusaleemu, Yesu yagia aingira mu ekaalu atanika okurumusia na afumiamo awantu awaaguzianga na awaagulanga ewintu mu ekaalu omwo. Yafulukania ansi emeesa ezia awagalusi awa amasendi alala ne entewe ezia awaguzi awa amaemba-emba.

¹⁶Ngakaganyira awaguzi okuwita mu ekaalu ni wagingre ewintu ewia okuguzia.

¹⁷Yagerera awantu na awoola otino, “Kwajojwa mbwe ‘Enyumba yange eeza okuetwa enyumba eya okusawa ku awantu wona.’ Ni inywe mugigaluusie ‘Owuiwiso owua awasakuzi.’”

¹⁸Olwa awakangasi awa awoozia na awagerezi awa endagirra waawurra amang’ana ago, waatanika okuagala engira eya okuita Yesu, aeniki waamutia kandi awantu awangi waomererwa ne engerera ziae eziawaluguuzianga ino.

¹⁹Olwa kwatuuka igulo, waafuma Yerusaleemu wairana Bethania.

Omuti ogwa omukuyu gukarre

(Math 21:20–22)

²⁰Kunkio ni waafuma ni wagia Yerusaleemu, waawona omuti ogwa omukuyu guria ni gukarre okuamera ku isina okutuuka kungulu.

²¹Petro yaingirizia ekia Yesu yalaga omuti ogwo kandi yalaga Yesu otino, “Omugerezi, wonako! Omuti ogwa izo wafuuwire gumiire okukala.”

²²Yesu yawairania otino, “Muwe no okuganya ku Katonda!

²³Mbalaga kuwuene mbwe, no omuntu alagre ekigiri kino mbwe, ‘Gemuka oeme ano, ogie oirigize mu enyanza,’ na awula ni kaoozi mu omwoyo gwae, ni ari no okuganya mbwe ekintu ekia awoorre ekio kiiza okuikola, ekintu ekio kiiza okuikola.

²⁴Kutio mbalaga mbwe ekintu-ukintu ekia muwuuziizie Katonda mu okusawa, muwe no okuganya mbwe mumiire okukituukra, kandi kiiza okuwa ekiinyu.

²⁵No oimeriire okusawa, sooka orekere awantu ku eking’ana-uking’ana ekiri agati yaa nawo, kugere Soinyu Katonda ori ku igulu oona akurekere amawi gaao.

²⁶Ni, no otarekiire awandi, Soinyu ori ku igulu oona ngaaza okukurekera amawi gaao.”

Awakangasi awa Awayaudi wawuuziizie Yesu aa amaani gaae gaema

(Math 21:23–27; Luuk 20:1–8)

²⁷Wairana Yerusaleemu, kandi ni Yesu yawanga na agenda-genda mu ekaalu, awakangasi awa awoozia, na awagerezi awa endagirra alala na awagaaka waamuuzako,

²⁸kandi wamuwuzia watino, “Amaaniiki aga okola nago ewintu ewia okola wino? Okueere amaani gano naanu?”

²⁹Yesu yawairania otino, “Nyagala okuwawuuzia okuwuuzia. Ni munyiraanie, noona nyiza okuwalaga amaani aga nkola nago ewintu ewia nkola wino.

³⁰Mundageko mbwe amaani aga Yowaana yabatiisa nago awantu gaaema ku igulu ku Katonda, kusi ku awantu?”

³¹Waaikululana mu amang’ana agati yaawu aweene watino, “Ni tuwoorre mbwe ‘Gaamuemera ku igulu’ aaza okutuwuuzia mbwe, ‘Ekiawalowera okumuganyako niki?’

³²Ni tuwoorre mbwe, ‘Gaamuemera ku awantu?’ ” Waatia awantu, aeniki awantu woona waawanga ni wamanyire mbwe Yowaana no omugambi owa Katonda kuwuene.

³³Kutio waairania Yesu mbwe, “Ifwe ngatumanyire.” Nikuemao Yesu yawalaga mbwe, “Noona ng’anyiza okuwalaga aa amaani aga nkola nago ewintu wino gaema, yaaya.”

Mariiko 12

Olugero olwa awarimi awaakodeesa omusiri

(Math 21:33–46; Luuk 20:9–19)

¹Yesu yatanika okugamba-gamba na awakangasi awa awoozia, awagerezi awa endagirra na awagaaka awa Awayaudi mu olugero otino, “Omuntu wundi yasimba emizabiibu mu omusiri gwae mala aomboka enzizi esunguuzia omusiri. Ya-aawa ansi aa edivaai emigirwa kandi aomboka ekitandaalo ekia omurinzi aikalako. Nikuemao yatoola omusiri ogwo agu-aa awarimi wandi wagukodeesa nikwo afuma agia olugendo mu ekialo kindi.

²Olwa enyinga ezia igesa ziatuuka, omuntu oyo yatuma owemirimo waae ku awarimi awo kugere wamu-ee ensaafu zindi ezia ku omusiri ogwa omuzabiibu ogwo.

³Na awarimi awo wa-amba owemirimo oyo, wamukuba kandi wamurumusia airana amakono masa.

⁴Omwene omusiri yatuma kandi owemirimo wundi ku iwo. Ni iye oona waamukuba oluguma kandi waamukorra ewintu ewia ensuuko.

⁵Yatuma owundi kandi, ni ono waakuba waita. Nintio kwawa na awemirimo wandi awangi, awandi ku iwo waakuba na awandi waita.

⁶“Omulala owayawanga na asigaale nae okutuma yawanga omuzia waae omwene owa agonziizie. Owutuukre yamutuma na aingirizia mbwe ‘Wagia oku-aa omuzia wange owuti.’

⁷Na awarimi awo waawoola agati yaawu watino, ‘Ono nio osugaane arie omwandu ogwa ng’ina omusiri. Muuze tumuite, kugere omusiri guno gutusigarre.’

- ⁸Kutio waamuamba kandi wamuita, nikwo wamurigiza enze eya omusiri ogwo.”
- ⁹Yesu yawawuuzia otino, “Katio niki ekia omwene omusiri ogwo aaza okukorra awarimi awo? Aaza okuita awarimi awo, nikuema atole omusiri ate mu amakono aga awandi.
- ¹⁰Inywe kane mukiari okusoma mu endagano mbwe: “ ‘Iwaale eria awaomboki waalowa nirio eriairana riwa ilootu eriambiriire enzizi eya enyumba.
- ¹¹Omwami Katonda omwene nio okorre ekintu kino, kandi ne ekinu ekiluguulwa mu amiiso giifu’?”
- ¹²Olwa waamanya mbwe ni iwo Yesu yawanga na agamba-gambako mu olugero luno, waagarizia engira eya okumuamba. Ni waatia omurima ogwa awantu awaawanga ao, kutio waamureka wafuma wagia.

Okufumizia Kaisaari omusolo

(Math 22:15–22; Luuk 20:20–26)

- ¹³Lunyima Awafarisaayo wandi na awa mu owuami owua Omwami Eroode waatumwa okugia okugeezaania Yesu kugere wamutuukreko ekiwiiwi ekia akawoola omwene ku Esirikaali.
- ¹⁴Kutio waagia wamuwuzia watino, “Omugerezi, tumanyire mbwe iwue owoola amang’ana agari kuwuene. Iwue ekia omuntu ari ngakikunyaasia, aeniki ngotiire amiiso aga omuntu, no ogerera engira eya Katonda mu engira eri kuwuene. Tulageeko, mberi endagirra iifu etuganyiire okufumizia Omwami Kaisaari omusolo, nakuwa yaaya?”
- ¹⁵Ni Yesu yagia amanya okuisemerezia kwawu okwo, yawawuuzia mbwe, “Ekigera ni muntegera omutego mumpambe niki? Mundeetrekko isendi eria edinaari tuwone.”
- ¹⁶Waamureetra isendi nikuemao yawawuuzia otino, “Kino ne ekiiruuzia ekia anu? Kandi rino ne eriina eria anu?” Waamuirania watino, “Kaisaari.”
- ¹⁷Kutio Yesu yawalaga mbwe, “Mu-ee Kaisaari ewintu ewia Kaisaari, ne ewia Katonda mu-ee Katonda!” Awantu awo waaluguula engira eya Yesu yawairaniamo.

Awasadukaayo wawuuzia Yesu ku okuziuka

(Math 22:23–33; Luuk 20:27–40)

- ¹⁸Awasadukaayo awaalowanga mbwe okuziuka okwa awafu kuwulao, waaza ku Yesu wamuwuzia
- ¹⁹watino, “Omugerezi, Muusa yatujojera mu ensikirra mbwe no omuntu afwire arekeo omukazi okiawula awaana, wamwawu osigaale paka agereme omukazi oyo, kugere afumie enyumba eya wamwawu.

- ²⁰Waawangao awazia musamvu awa omuntu omulala. Omukulu yatoola omukazi, ni yafwa areka mukaae na akiawula no omwana.
- ²¹Omuzia owa okuwiri yagerema omukazi oyo, ni yoona yafwa na ataiwuule nae omwana. Kwawa kutio no owa okusatu oona,
- ²²nawuno kutuuka ku omuzia owa musamvu owafwa na ataiwuule nae omwana yoona. Owutuukre omukazi oyo oona yafwa.
- ²³Katio, olwa awantu wariziuka, omukazi oyo ariwa omukazi owa anu ku awasaaza musamvu awaawa nae ki awasaaza waae?”
- ²⁴Yesu yawairania otino, “Ekintu ekilala ekiwateesia, ni mbwe ng’amumanyire amang’ana agari mu endagano, lwona ng’amumanyire amaani aga Katonda.
- ²⁵Aeniki, na awantu wariziuka ngawarikwa kandi ngawarikwewua. Ni wariwa ki enyankoi awa ku igulu.
- ²⁶Ni ku okuziusiwua okwa awafu, ngamumiire okusoma mu ebuuki eya Muusa, kiomo Katonda yagamba-gamba nae mu omunayo ogwa isaka eriayianga, na awoola mbwe ‘Inze ni inze Katonda owa Abraamu, Katonda owa Isaaka, kandi Katonda owa Yakoobo’?
- ²⁷Ngari Katonda owa awafu yaaya, na ari Katonda owa awalamu. Kutio muteekere ino ni muingirizia mbwe awafu ngawaesa okuziuka.”

Ensikirra enene ekirre ezindi ziona

(Math 22:34–40)

- ²⁸Omulala ku awagerezi awa endagirra yaaza awurra engamba-gamba yaawu. Kukawa mbwe yawurra kiomo Yesu yairania Awafarisaayo awo geeza, yamuwuzia otino, “Ensikirra eri enene okukira ezindi ne eriai?”
- ²⁹Yesu yamuirania otino, “Ensikirra enene okukira ezindi ne ewoola etino, ‘Muwurre Awaisraeli! Omwami Katonda iifu ni Katonda omulala eng’ene.
- ³⁰Gonzia Omwami Katonda waa no omwoyo gwao gwona, ne enkolo yaao yoona, na amaingirizio gaao goona, kandi na amaani gaao goona.’
- ³¹Eya okuwiri ni mbwe, ‘Gonzia omwina waa kiomo oigonziizie iwue omwene.’ Ewulao ensikirra indi enene okukira zino.”
- ³²Omuntu owainogerezia mu endagirra oyo yairania Yesu otino, “Omugerezi, owoorre kuwene mbwe Katonda ari omulala kandi awulao owundi.
- ³³Kandi mbwe tumugonzie no omwoyo gwona, na amaingirizio goona, na amaani goona, kandi mbwe omuntu agonzie omwina waae kiomo aigonziizie iye omwene. Okukola otio kunene okukira okufumia emisango egisambwa.”

³⁴Olwa Yesu yawona mbwe omuntu oyo airaanie embuuzia geeza ino, yamulaga otino, “Iwue ngori ale no Owuami owua Katonda.” Okuemera ao, awulao omuntu owaigema okumuwuuzia embuuzia indi kandi.

Kristo ari Omuzia owa Daudi

(Math 22:41–46; Luuk 20:41–44)

³⁵Ni Yesu yawanga na agerera mu ekaalu, yawuuzia awaawangamo otino, “Awagerezi awa endagirra wareeta watie okuwoola mbwe Kristo ari omuzia owa Daudi?”

³⁶Kukawa kutie ni Daudi omwene, na aizuziiwue na amaani aga Omwoyo Omweru, nio owawoola otino, “ ‘Omwami Katonda yalaga Omwami wange otino, “Ikala nyakukono kwange okusaaza nawuno nte awazigu waaao ansi ya amagulu gao.” ’

³⁷Daudi omwene amueta mbwe Omwami. Katio Kristo awa otie omuzia waae kandi?” Awantu awangi awaawangao wamutegerezia ni wari no owusangaavu.

Yesu asiagizia awakangasi awa ediini eya Awayaudi

(Math 23:1–12; Luuk 20:45–47)

³⁸Yesu yawagereranga na awoola otino, “Muirinde ne enkola ezia awagerezi awa endagirra awagonziizie okugenda-genda ni waiwooye enguwo endiire-ndiire no okukeeziwua mu ewiyyia.

³⁹Lwona wagonziizie okuikala ku entewe endowole mu amasinagoogi kandi warumukra amawaga agatengekrwe awakangasi mu emigomo.

⁴⁰Wasemerezia awakazi awafwire ni wawariako ewintu kandi wasawa okusawa okuliire okwa okuilagana emberu wa awantu. Iwo warikengerwa ekiina ekiwiiwi okukira awandi.”

Omukazi omufwire afumiizie amangi okukira wona

(Luuk 21:1–4)

⁴¹Yesu yagia aikala mu ekaalu asi aa aiwariire ne esanduuki eteewuamo ewintu ewifumiziiwue Katonda. Yawona kimo awantu awangi waira amasendi ni wata mu esanduuki eya amasendi. Awanyazi awangi waatamo amasendi gaawu amangi.

⁴²No omukazi wundi omufwire omutaka yaaza ataamo eela iwiri ziang’ene, ezitasuga namba ekintu.

⁴³Yesu yaeta awalonzi waae awalaga otino, “Mbalaga kuwuene mbwe omukazi omufwire omutaka ono, afumiizie amangi okukira awantu wona awateere amasendi gaawu mu esanduuki omwo.

⁴⁴Aeniki awandi wona wafumiizie amatono okuema ku owunyazi owungi owua wari nawuo. No omukazi omutaka ono, iye afumiizie goona aga awerenga nago, kugia owulamu waae.”

Mariiko 13

Ekaalu eya Katonda eeza okuonwa

(Math 24:1–2; Luuk 21:5–24)

¹Olwa Yesu na awalonzi waae waafuma mu ekaalu, omulala ku awalonzi waae yamulaga otino, “Omugerezi, wonako ekaalu eno kiomo yaombokwa geeza na amawaale amalootu agaomerezia!”

²Yesu yamuirania otino, “Owona amayumba amakate-kaate amalootu gano? Mbalaga kuwuene mbwe goona gaaza okugemulwa gawuere ansi kandi riwulao namba iwaale ilala eriiza okusigala ni riigereeke ku erindi.”

Ewilago ewia owutuuko owua ekialo

(Math 24:3–14; Luuk 21:7–19)

³Ni Yesu yawanga na aikaale ku ekigiri ekia Zaituuni asi aiwariire ne ekaalu, Petro, Yakoobo, Yowaana na Andereeya waamuwuzia ni wari nae aweene watino,

⁴“Tulage olwa ewintu wino wiriikola, ne ewirilagana mbwe ewintu wino wiri ampi okuikola?”

⁵Yesu yatanika okuwalaga otino, “Muwe amankaga omuntu ataaza yawateesia.

⁶Aeniki awantu awangi waaza okuuza ne eriina riange ni wawoola mbwe, ‘Ni inze Kristo, ni inze Kristo,’ kandi wariteesia awantu awangi ino.

⁷Ni muuza okuwurra mbwe amaye galwana, na agandi mbwe gari ampi okutanika, mutatia aeniki ewio paka wiikole. Ni muwe no okumanya mbwe namba ne ewio wiikola, owutuuko owua ekialo wukiari emberi.

⁸Enganda zirilwana, kandi ewialo ewia owuami wirilwana. Okuzegera okwa ekialo kuriwaa mu ewialo ewingi kandi enzala eriwaa. Ni wino wiriwa mala owutanikro owua ewisa ewiluma omukazi oagala okuiwula.

⁹“Ni inywe muwe amankaga, aeniki waaza okuwaira mu ewiina emberi wa awagaaka, kandi muuza okukubwa mu amasinagoogi. Lwona, muri-imerra mu ewiina emberi wa awakangasi na awaami awa ekialo ku amang’ana gange, kugere muwoole amang’ana gange emberi waawu.

¹⁰Ni injiili paka elanziwue mu ekialo kiona, nikwo owutuuko owua ekialo wuriiza.

¹¹Ni wawairre emberi kandi wawareete mu ekiina, mutainyaasia okuingirizia ekia mugia okuwoola. Ni muwoole mala amang’ana agariwaazra mu enyinga ezio, aeniki ng’ani inywe awariwa ni wagamba-gamba yaaya, ni no Omwoyo Omweru.

¹²“Omuntu ariguzia wamwawu waae ndiki-ndiki ku awazigu aitwe, kandi swawu omuntu ariguzia omwana waae. Awaana awarigalukra awiiwuzi waawu kandi wagere waitwe.

¹³Muriregwa na awantu awa ewialo wiona ku amang’ana gange. No omuntu orikola olutuunyo nawuno mu owutuuko, arilama.

Emidambo egiriamba awantu awa Yerusaleemu

(Math 24:15–22; Luuk 21:20–24)

¹⁴“Ni muwuine ‘omuziro ogureeta okuoneka,’ ni guingiire mu ekaalu kandi guimereziiwue Asi Aeeru aa gutasugaane guwe (omusomi asugaane awurre amang’ana gano geeza), awantu awari Yudeea wasomoke wagie mu ewigiri.

¹⁵Omuntu ori ku olusala olwa enyumba yaae ataika ansi, lwona ataingira mu enyumba yaae okutoola ewintu wiae ewiri mu enyumba omwo, yaaya.

¹⁶Ori mu omusiri, atairana engo okutoola enguwo yaae.

¹⁷Kuriweera awakazi, awa amiire ago garituukra ni wari awazito namba ni wanuunia, uwiiwi owufwana wutie?

¹⁸Musawe mbwe amiire ago gatawa amiire aga entwigo.

¹⁹Aeniki, mu amiire ago, emidambo giriwaa egikiari okuwaa okuemera Katonda yaluka ekialo mu owutanikro kutuuka nyingeeno, kandi emidambo egirifwana gitio ngagiriwaa kandi.

²⁰Ni Katonda arekeko okuirania amiire ago enyima, awulao-uwula omuntu okalama. Na awalowole awa Katonda yalowola kale warigera amiire aga emidambo ago, gairaniwue enyima.

Kristo awa owuweeyi

(Math 24:23–28; Luuk 17:23–24)

²¹“Mu amiire ago, no omuntu akulagre mbwe, ‘Wonako, Kristo nguno!’ nakuwa mbwe ‘Kristo nguuria!’ mutaaza mwaganya.

²²Ni kutio aeniki kristo awa owuweeyi na awagambi awa owuweeyi waaza okufuma kandi waaza okukola amankono agaluguulwa, kugere ni kuesekana, wasemerezie kugia awalowole awa Katonda.

²³Ni muwe amankaga. Mbalagre ewintu wiona ni wikiari okuikola.

Ewintu ewirilagana mbwe okuirana okwa Yesu kuri ampi

(Math 24:29–31; Luuk 21:25–28)

²⁴“Ni mu amiire ago, ne emidambo gimiire okuwua-uwua otino, “ ‘enyanga erimwama ti, kandi omwenzi ngaguriwala;

²⁵eng’eni-ng’eni zirigwa ni ziema ku igulu, kandi ewintu ewiri ku igulu wirizegera.’

²⁶“Kandi awantu wariwona Omuzia owa Omuntu na aaza mu amare na ari na amaani amangi kandi no owunene.

²⁷Nikuemao arituma enyankoi waae okukumia awalowole waae ni wawatoola ku embega ziona ine ezia ekialo, okuemera entulo eya ekialo kutuuka ku entulo eya igulu.

Okuigerera ku omuti ogwa omukuyu

(Math 24:32–35; Luuk 21:29–33)

²⁸“Muigerere ekintu ekilala ku omuti ogwa omukuyu. Enyinga ezia amatu gagwo gasewuka, awantu wamanyire mbwe amiire aga emvula gari ampi.

²⁹Mu engira endala eyo, ni muwuine wino ni wiikola, muwe no okumanya mbwe Omuzia owa Omuntu ari ampi, amiire okutuuka ku ekiriango.

³⁰Mbalaga kuwuene mbwe ikula rino ngariiza okuwita, wino wiona ni wikiari okuikola.

³¹Igulu ne ekialo wiiza okuwua chwe, na amang’ana gange ngagariwua.

Awulao omanyire owuire owua okuirana okwa Yesu

(Math 24:36–44; Luuk 17:26–30, 34–36; 21:34–36)

³²“Awulao-uwula omanyire owuire nakuwa enyinga ezia Omuzia owa Omuntu ari-irana, kugia enyankoi namba inze omwene. Ni, ni Katonda Ise eng’ene nio omanyire.

³³“Muwe amankaga kandi muwe amiiso, aeniki ngamumanyire olwa enyinga ezio zirituuka.

³⁴Kufwanana no omuntu owafuma okugia olugendo ale. Ni yafumanga, yata ewintu wiae mu amakono aga awemirimo waae warinde. Omulala ki omulala yarekerwa emirimo egia yasugananga akole, kandi yalaga omurinzi owa ekiriango mbwe arinde geeza.

³⁵Kutio muwe amiiso, aeniki ngawamanyire olwa omwene enyumba aaza okuirana, kuwe igulo, nakuwa owuire agati, nakuwa kungoko, namba ku amagambaazi.

³⁶Ni nyiza okuuza owuiwisi otio, ntaaza nyawatuukra ni mugona.

³⁷Ekia mbalaga, ndaga awantu wandi wona: mbwe, muwe amankaga.”

Mariiko 14

Awakangasi awa ediini eya Awayaudi wagala okuita Yesu

(Math 26:1–5; Luuk 22:1–6)

¹Kwawanga ni kusigaale amiire awiri omugomo ogwa Pasaaka no ogwa Omukaati oguwulamo amamera gutuuke. Awakangasi awa awoozia na awagerezi awa endagirra waagalanga engira eya okuamba Yesu owuiwisi wamuite.

²Ni waawoola agati yaawu aweene mbwe, “Ngatuesa okumuamba mu omugomo guno yaaya, aeniki awantu waaza wareeta erioga.”

Yesu afukirweko amavuta aga iguzi eria kungulu

(Math 26:6–13)

³Ni Yesu yawanga ku omugizi ogwa Bethania, ni yarianga ku emeesa mu enyumba eya Simioni owawanga no owugenge kale, omukazi wundi yaaza na agingre amavuta aga naadi agawunya esaami kandi aga iguzi eria kungulu ino mu ichupa eria alabasta. Yakonola omutwe ogwa ichupa erio nikwo afuka amavuta ago ku omutwe ogwa Yesu.

⁴Ni wario awandi awaawona uwiiwi kandi waawoola mu emioyo giawu mbwe, “Omukazi ono aona amavuta gano otino kolaki?”

⁵Aeniki amavuta ago gakaguzi iwue amasendi agakira omusaara ogwa omuntu akaria ku omwaka omulala, kugere amasendi ago gagawirwe awataka niki.” Kutio waasoozia omukazi oyo wukalu.

⁶Yesu yawalaga otino, “Mureke omukazi ono. Ekigera ni mumunyaasia niki? Ekia ankoriire kino ne ekintu ekilootu ino.

⁷Aeniki awataka awo mukiaza okuwa nawo amiire goona, kutio muuza okuwatunzia enyinga-uninga ezia muwuine. Ni inze ngamuuzza okuwa ni inze amiire goona.

⁸Iye amiire okukola ekia akakola, kandi awakre omuwiri gwange amavuta ne enyinga zikiari kugere omuwiri gwange guikagre owuawizi.

⁹Mbalaga kuwuene mbwe asi-uasi aa injili eeza okulanziwua mu ekialo kiona, ekia omukazi ono akorre kino kiiza okugamba-gambwako na awantu wamuingirizia.”

Yudaasi aganyire okuguzia Yesu

(Math 26:14–16; Luuk 22:3–6)

¹⁰Nikuemao, Yudaasi Iskarioti, owawanga omulala ku awalonzi awa Yesu ikumi ni wawiri, yagia ku awakangasi awa awoozia kugere ate Yesu mu amakono gaawu.

¹¹Olwa waawurra eking’ana ekio waasangaala ino, kandi waamwifuuwira mbwe waaza okumu-aa amasendi. Yudaasi yatanika okuagala iwaga ilungi eria okumuta mu amakono gaawu.

Okuikagra omugomo ogwa Pasaaka

(Math 26:17–19; Luuk 22:7–13)

¹²Owuire owusookere mu omugomo ogwa Omukaati ogutazogrwe na amamera, olwa waakolanga omusango ogwa ekimaatwa ekia Pasaaka, awalonzi awa Yesu waamuwuzia watino, “Omwami, na ai aa wagala mbwe tukuikazizie Pasaaka orie?”

¹³Okwo kwagera atuma awalonzi waae wawiri na awalaga otino, “Mugie ku omugizi ogwa Yerusaleemu, ni munaagana omuntu ogingre entamu eya amanzi, mumulonde.

¹⁴Ni mu enyumba eya anaingira, mulage omwene enyumba eyo mutino, ‘Omugerezi atutumre tuuze tukuwuzie mbwe enyumba yaae eya awageni eya akariiramo omugomo ogwa Pasaaka na awalonzi waae eriai?’

¹⁵Omuntu oyo aaza okuwalaga enyumba enkaate eri kungulu ku egoroofa erimo ewintu wiona ewiagalana kandi eya awantu waesa okuikalamo. Ao nio mutuikazizie tuuze turiiremo.”

¹⁶Awalonzi awo waafuma wagia ku omugizi ogwa Yerusaleemu wagia watuukra ewintu mala kiomo Yesu yawanga na awalagre. Kutio waafumba okuria okwa Pasaaka wakuikazia omwo.

Yesu awoorre ooza okumuguzia

(Math 26:20–25; Luuk 22:21–23; Yowa 13:21–25)

¹⁷Olwa kwatuuka igulo, Yesu yaaza na awalonzi waae ikumi ni wawiri.

¹⁸Ni waawanga ku emeesa ni waria, Yesu yawalaga otino, “Mbalaga kuwuene mbwe omulala ku inywe aaza okunguzia. Ee omuntu oyo aria ni inze.”

¹⁹Woono waawurra uwiiwi ino kandi watanika okumulaga mulala ki omulala watino, “Kuwuene oyo ng’ani inze yaaya Omwami?”

²⁰Yesu yawalaga otino, “No omulala ku inywe awatumwa ikumi ni wawiri, oiniizie omukaate ni inze mu oludaawo.

²¹No Omuzia owa Omuntu aaza okufwa aemeo mala kiomo kwajojwa ku iye. Ni kuriweera omuntu omuguziizie wululu ino! Kukaweere geeza ku iye, ni yareka okuiwulwa.”

Amasaai aga endagano empia

(Math 26:26–29; Luuk 22:19–20; 1Kori 11:23–25)

²²Ni waawanga ni waria, Yesu yatoola omukaate, aikazia Katonda nikwo agugenyula aa awalonzi waae na awalaga otino, “Mutoole murie. Guno no omuwiri gwange.”

²³Nikuemao yatoola ekikombe, aikazia Katonda nikwo aki-aa awalonzi waae, kandi woono waakinyweramo.

²⁴Nikuemao yawalaga otino, “Gano na amasaai gange aga endagano, agafukirwa awantu awangi.

²⁵Mbalaga mbwe ng’anyiza okunywa edivaai eema ku ensaafu eya omuzabiibu kandi, nawuno kutuuke olwa ndirinywa edivaai empia mu Owuami owua Katonda.”

Yesu awoorre mbwe awalonzi waae waaza okumurumuka

(Math 26:30–35; Luuk 22:31–34; Yowa 13:36–38)

²⁶Olwa waamala okuemba olwembo otino, waafuma ni wawariire ekigiri ekia Zaituuni.

²⁷Yesu yawalaga otino, “Inywe mwona muuza okundumuka, aeniki kwajojwa mbwe, “ ‘Nyiza okuita omwayi, kandi amagondi gaaza okutaanyika.’

²⁸Ni, ni Katonda amiire okunziusia, nyiza okukangata emberi iinyu, ngie Galiili.”

²⁹Petro yamuirania otino, “Omwami, namba na awandi woona wakurumuuke, inze ng’andirikureka.”

³⁰Yesu yamuirania otino, “Nkulaga kuwuene mbwe owuire owua turiko wuno, ooza okulowa kasatu mbwe ngomanyire, engoko ni zikiari okulagula kawiri.”

³¹Ni Petro yalowa wukalu na awoola otino, “Namba ni kuri okufwa ni iwue, nanyiza okukulowa, yaaya.” Awalonzi wandi woona waawoola watio.

Yesu asawa Gethsemaani ku ekigiri ekia Zaituuni

(Math 26:36–46; Luuk 22:39–46)

³²Nikuemao Yesu na awalonzi waae waagia watuuka asi aetwa mbwe Gethsemaani. Yesu yawalaga otino, “Muikale ano, inze ngie nsawe.”

³³Yatoola Petro, Yakoobo ni Yowaana agia nawo antulo, kandi atanika okuwurra owululu mu omwoyo gwae kandi amasaai gaatanika okumuluma ino.

³⁴Nikuemao yawalaga mbwe, “Mpurra owululu mu omwoyo gwange ino, aa wuagala okunzita. Muweere ano kandi muwe amiiso.”

³⁵Yesu yagia emberi wutono, nikwo agwa ansi atanika okusawa Katonda wululu na awoola mbwe ni kuesekana aganye amutoorro ekikombe ekia emidambo ekio atakinyweramo. Yagia emberi na awoola otino,

³⁶“Soifu! Manyire mbwe ewintu wiona wiesekana ku iwue, ntoorro ekikombe kino. Ni kutaaza kwawa ku okuagala kwange, ni kuwe mala kiomo iwue oogala.”

³⁷Yairana ku awalonzi waae atuukra ni wagona. Kutio yawuuzia Petro otino, “Simioni, owuo ogona? Ngoesa okuwarra namba ku enyinga endala?

³⁸Muwe amiiso kandi musawe kugere mutagwa ni mugeezaniwua. Omwoyo guagala, no omuwiri mudewenyu.”

³⁹Yawareka kandi olwa okuwiri agia asawa, na awoola mala amang’ana aga yawoola kuluweri.

⁴⁰Olwa yawairanako kandi, yawatuukra ni wagona, aeniki amiiso gaawu gaawanga amazito. Waagingirizia amiiso ni waawula ne ekia wakamulaga.

⁴¹Yairana kandi olwa okusatu, awawuuzia otino, “Owuo mukiagona, kandi muigoloole muwuluuka? Endoolo zisugre katio. Enyinga zimiire okutuuka ezia Omuzia owa Omuntu aaza okuguziwua ateewue mu amakono aga awooni.

⁴²Mulamuke tugie! Omuguzi wange nguno aaza!”

Yesu aguziwe kandi a-ambrwe

(Math 26:47–56; Luuk 22:47–53; Yowa 18:1–11)

⁴³Ni Yesu yawanga na akiagamba-gamba, Yudaasi, owawanga omulala ku awalonzi ikumi ni wawiri, yawatuukako na ari no omurima ogwa awantu awagingre emiambe egia olugangala ne ewirungu, awaatumwa na awakangasi awa awoozia, awagerezi awa endagirra na awagaaka awa Awayaudi okuza okuamba Yesu.

⁴⁴Kuno kwatuukra no omuguzi yawanga na amiire okuwurzenia nawo mbwe, “Omuntu owa munawona ni nuunre, niye. Mumuambe, mugie nae no owurinzi owukalu.”

⁴⁵Olwa Yudaasi yatuuka otino, yagia ku Yesu owuigoloole amulaga otino, “Geeza Omugerezi?” Nikuema amunuuna.

⁴⁶Nikuema awantu awo waa-amba Yesu.

⁴⁷No omulala ku awalonzi awaawanga ni waimeriire nae ao yazomola omwambe gwae ogwa olugangala, aguta ku owemirimo owa Omukangasi omunene owa awoozia, amukewa okutwi kuwera ansi chee.

⁴⁸Yesu yawawuuzia otino, “Munyiziire ne emiambe egia olugangala ne ewirungu ki awagia okuamba omukangasi olwania esirikaali otino kolaki?”

⁴⁹Nyamiire okuwa ni nyikala ni inywe mu olwanyi olwa ekaalu ni ngerera owuire ki owuire, mutampamba? Ni mureke amang’ana aga Katonda gatuuke kiomo gaajojwa.”

⁵⁰Nikuema, awalonzi wona waarumuka wamureka.

⁵¹Ario omuzia wundi owalondanga Yesu na aingiizie enguwo empuuwu. Olwa awantu wano waagia okumuamba otino,

⁵²yasomoka areka enguwo yaae, agia ekikuna.

Yesu airrwe ku oluwuga olwa awagaaka

(Math 26:57–68; Luuk 22:54, 55, 63–71; Yowa 18:12–14, 19–24)

⁵³Awantu awo waira Yesu aa Omukangasi omunene owa awoozia. Awakangasi awa awoozia, na awagerezi awa endagirra na awagaaka awa Awayaudi wona waawanga ni wiikumizie alala ao.

⁵⁴Petro yamulondanga enyima ale wutono nawuno watuuka waingira mu olwanyi oluri agati eya amayumba aga Omukangasi omunene owa awoozia. Minsi omwo Petro yaikala na awarinzi na aota omurro.

⁵⁵Awakangasi awa awoozia no oluwuga olwa awagaaka awa Awayaudi wona waagarizia okawoola ekintu ekiwiiwi ku Yesu, ekikagera akengerwe ekiina ekia olumbe, ni ngawakatuukra.

⁵⁶Aeniki awantu awangi waamuwoolako amang’ana amangi aga owuweeyi, na amang’ana gaawu ago gaagawukana.

⁵⁷Awandi ku awantu awo waaza waimerra nae kandi wamuwoolako owuweeyi watino,

⁵⁸“Twamiire okumuwurra na awoola mbwe, ‘Nyiza okuona ekaalu eyaombokwa na awantu eno, kandi ku amiire asatu nyiza okuomboka eindi, etaombookwe na awantu.’”

⁵⁹Namba awantu wano, woona amang’ana gaawu gaagawukana.

⁶⁰Nikuemao Omukangasi omunene owa awoozia yaimerra agati yaawu awuuzia Yesu otino, “Ngoirania ing’ana ku ewintu ewia wakuwoolako wino, kolaki?”

⁶¹Ni Yesu yasarigira kiri kandi ngakairania. Omukangasi omunene owa awoozia oyo yamuwuzia kandi otino, “Iwue ni iwue Meesia, omuzia owa Omwami Katonda?”

⁶²Yesu yamuirania otino, “Ni inze, kandi muuza okuwona Omuzia owa Omuntu na aikaale nyakukono okusaaza okwa Katonda aa amaani gari, kandi na aaza mu amare aga ku igulu.”

⁶³Omukangasi omunene owa awoozia yatandula enguwo yaae na awoola otino, “Tuagarraki omuwoni wundi kandi?”

⁶⁴Ee, aweene muema okumuwurra na aifwanania ni Katonda. Inywe muingirizia mutie ku amang’ana gano?” Woona waamulowa ni wawoola mbwe asugaane aitwe.

⁶⁵Awandi waatanika okumufuuzako amate ni wamusiwre amiiso ne ekitambaaya kandi wamukuba ewifunzi. Waamuwuzia watino, “Tulageeko amang’ana aga owugambi.” Nikuemao awarinzi waamutoola watanika okumukuba ewifunzi.

Petro alowa mbwe ngamanyire Yesu

(Math 26:69–75; Luuk 22:54–65; Yowa 18:25–27)

⁶⁶Ni Petro yawanga na ari ansi mu olwanyi, omulala ku owemirimo awekiala awa Omukangasi omunene owa awoozia yamugiako.

⁶⁷Yatuukra Petro na aota omurro, amuwarra nikwo amulaga otino, “Iwue oona owanga ni Yesu Omunazareeti ono.”

⁶⁸Ni Petro yalowa asiiriisia na awoola otino, “Inze ng’amanyire lwona ng’ampurra ekia owoola ekio.” Yaema ao agia enze ku ekikulo. Mu enyinga ezio engoko yalagula.

⁶⁹Owemirimo owekiala oyo yamuwona kandi yalaga awaawanga ni waimeriire ao otino, “Omuntu ono ari omulala ku iwo!”

⁷⁰Ni Petro kandi yalowa amang’ana ago otino, “Inze ng’andi omulala ku iwo.” Lunyima wutono, awaawanga ni waimeriire ao waamulaga watino, “Kuwuene ori omulala ku iwo, aeniki ori Omugaliili.”

⁷¹Ni Petro yatanika okuifuuwa omwene na aria endagano na awalaga otino, “Awiifu, inze namanyire omuntu owa mugamba-gambako ono.”

⁷²Ao-ao, engoko yalagula olwa okuwiri. Nikuemao Petro yaingirizia kiomo Yesu yamulaga mbwe, “Engoko ne ekiari okulagula kawiri, ooza okulowa kasatu mbwe ngomanyire.” Kutio yatuluka na amaziga kandi yarra wululu.

Mariiko 15

Awayaudi waire Yesu ku Pilaato

(Math 27:1–2, 11–26; Luuk 23:1–5, 13–25; Yowa 18:28—19:16)

¹Kunkio no owuire wukia wutino, Omukangasi omunene owa awoozia, yaikala na awagerezi awa endagirra, awakangasi awa awoozia, alala na awagaaka awa Awayaudi, wona okuwurzania ku ekiina ekia Yesu. Nikuemao waamusiwa wagia wamuta mu amakono aga Pilaato omukangasi owa Awaruumi.

²Omwami Pilaato yamuwuzia otino, “Mbwe iwue ni iwue omwami owa Awayaudi?” Yesu yamuirania otino, “Omwene ni iwue owoorre otio.”

³Kandi awakangasi awa awoozia waamuingirra ni wamuwoolako amang’ana amangi.

⁴Okusarigira okwa Yesu kwagera Pilaato amuwuzia kandi otino, “Owula ne ekia okairania? Mberi owurra amang’ana amangi aga wakuwoolako gano?”

⁵Ni Yesu yasarigira kiri, kandi ekio kiagera Pilaato aluguula ino.

⁶Mu omugomo ogwa Pasaaka, kwawanga enkola eya omukangasi waawu okuwasiwurra omusiwe omulala owa awantu wamusawire mbwe afumie mu owusiwe.

⁷Yawangao omusiwe omuwiiwi owaetwanga Barabaasi, owawanga muni ku okuita omuntu ne erioga riefuma agati eya Awayaudi na awakangasi awa esirikaali eya Awaruumi.

⁸Awantu awangi waagia ku Pilaato wamusawa mbwe awasiwurre omuntu omulala kiomo kwawanga enkola yaawu mu omugomo ogwa Pasaaka.

⁹Pilaato yawawuzia mbwe, “Muagala mbasiwurre omuntu oieta mbwe Omwami owa Awayaudi ono?”

¹⁰Yawawuzia otio aeniki yamanya geeza mbwe iyari nirio eriagera awakangasi awa awoozia ni wamuirra embera waae.

¹¹Na awakangasi awa awoozia waalaga awantu mbwe walage Pilaato awasiwurre Barabaasi aa okusiwula Yesu.

¹²Pilaato kandi yawawuuzia otino, “Katio nkole entie no omuntu owa mueta mbwe omwami owa Awayaudi ono?”

¹³Waamuirania no omwoyo ogwa kungulu watino, “Muwambe ku omusalaaba!” Pilaato yawawuuzia mbwe, “Kolaki? Niki ekia akorre ekisugre no olumbe?” Ni iwo waaogerera wukalu okukira ni wawoola mbwe, “Muwambe ku omusalaaba!”

¹⁴Pilaato yawawuuzia otino, “Kolaki awiifu, ekiwi ekia akorre niki?” Ni iwo waagia emberu ni waogerera wukaalu okukira watino, “Muwambe ku omusalaaba!”

¹⁵Kutio Pilaato yawasiwurra Barabaasi, na ari no okuagala mbwe aomerezie omurima ogwa awantu awo. Yasikirra mbwe Yesu akubwe enkowa, nikuemao amuta mu amakono gaawu okugia okuwambwa ku omusalaaba.

Awa-iye wasuusia Yesu

(Mari 15:16–20; Yowa 19:2–3)

¹⁶Awa-iye awo waatoola Yesu waira mu ekambi yaawu kandi wakumia awa-iye awangi waaza omwo.

¹⁷Waavuula Yesu enguwo ziae wamuingizizia enguwo endiire enzakanyu, nikwo waazinga engata eya amawua wamuteera ku omutwe ki ekigudu ekia owuyaayi.

¹⁸Waatanka okumusekera ni wamusuusia ni wamulaga watino, “Oikaziwue, omwami owa Awayaudi?”

¹⁹Waamukuba omutwe ne ekiti ekia ekituutu kangi ni wamufuuzako amate ku owueni. Awandi waamukubra amasigamo ansi ni wamu-aa owuti ki omwami.

²⁰Olwa waamala okumusuusia otio, waamuvuulako enguwo endiire eyo, wamuingizizia enguwo ziae ezia eyawanga nazio. Nikuemao waafuma nae okugia okumuwamba ku omusalaaba.

Okuwambwa okwa Yesu ku omusalaaba

(Math 27:32–44; Luuk 23:26–43; Yowa 19:17–27)

²¹Ni waafumanga ni wagia, waagaana omuntu wundi, oetwa Simioni owa Kureene, owawanga swawu Aleksanda ni Ruufo, na aema olugendo enze na aingira ku omugizi ogwo. Waamunigirizia okuginga omusalaaba ogwa Yesu.

²²Wairra Yesu asi aa-etwa mbwe Goligotha, (erilagana mbwe asi aa Ekiyanga ekia omutwe).

²³Waatoola edivaai ezoganiwue no omuti omululu wa-aa Yesu, ni yalowa okuginywa.

²⁴Olwa waamala okumuwamba ku omusalaaba, waagawana enguwo ziae ni wakuba ensiiti, okumanya ekia omuntu ki omuntu asugaane atoole.

²⁵Waamuwamba ku omusalaaba enyinga isatu ezia kunkio.

- ²⁶Ibaawu riateewua ku omusalaaba kungulu erijojerweko amang’ana aga yaingirra nago agaawoolanga mbwe:omwami owa awayaudi.
- ²⁷Waamuwamba na awasakuzi wawiri, omulala nyakukono kwae okusaaza, no owundi nyakukono okumosi.
- ²⁸Kutio amang’ana aga Katonda gaatuuka kuwuene.
- ²⁹Awawitangira waamurizra amanyego, eno ni watenzia emitwe giawu ni wamulaga watino, “Iwue owazanga okuona ekaalu kandi ogiomboke ku amiire asatu,
- ³⁰nyingeeno inunulako omwene kato! Ika ansi oeme ku omusalaaba!”
- ³¹Nintio lwona awagerezi awa endagirra alala na awakangasi awa awoozia woona waamurizra amang’ana ni wawoola watino, “Mbwe yanunula awandi, ni omwene ngaesa okuinunula.
- ³²Katio Kristo, Omwami owa Awayaudi, aikeko ansi aeme ku omusalaaba, kugere tuwone kandi tuganye nae.” Awantu awaawambwa nae woona waamurizra amanyego.

Okufwa okwa Yesu ku omusalaaba
(Math 27:45–56; Luuk 23:44–49; Yowa 19:28–37)

- ³³Olwa kwatuuka enyinga ezia mukaaga, ekierema kia-amba ekialo kiona nawuno kutuuka enyinga ezia kienda.
- ³⁴Ni ziwanga ampi okutuuka enyinga kienda, Yesu yarra no omwoyo ogwa kungulu na awoola otino, “Eloi, Eloi, lama sabakithaani?” erilagana mbwe, “Katonda wange, Katonda wange, ondekere kolaki?”
- ³⁵Olwa awandi ku awantu awaawanga ni waimeriire ao waawurra otio, waawoola mbwe, “Owuo mpao aeta Eliija.”
- ³⁶Omuntu omulala yasomoka agia atoola amalwa amalulu pe aingiziamo esiponji kandi agifumuta ku ekiti, agiira ku omunwa ogwa Yesu mbwe aganywe. Yalaga awiina wae otino, “Mureke tuwoneko ne Eliija aaza okuuzza amutoole ku omusalaaba okwo, amuisie ansi.”
- ³⁷Yesu yarra no omwoyo oguri kungulu, nikwo yakewa enkolo.
- ³⁸Ao-ao, epasia eya ekaalu yatanduka aa kawiri, okuemera kungulu paka ansi.
- ³⁹Olwa omukangasi owa awa-iiye, owawanga na aimeriire emberu na awarra Yesu, yawona ewiaikola ni Yesu akeweka enkolo, yawoola otino, “Kuwuene omuntu ono kane yawanga Omuzia owa Katonda!”
- ⁴⁰Awakazi woona waawanga ao ni yawona ewiaikolanga, ni waimeriire ale. Ku awakazi awo waawangao Salome, Maaria omwala owa Eumagidaala, ni Maaria ng’inwawu Yakoobo, wamwawu Yoose omutono.

⁴¹Ni waawanga mu ekialo ekia Galiili, awakazi wasatu wano waaweeranga nae kandi waamukorranga emirimo. Awakazi wandi awangi awaaza nae ni waema Yerusaleemu woona waawanga ao.

Owuawizi owua Yesu mu iwuuta

(Math 27:57–61; Luuk 23:50–56; Yowa 19:38–42)

⁴²Olwa kwatuuka igulo, olwa Emirimo Itaanu,

⁴³omuntu wundi oetwa Yoseefu owaemanga ku omugizi ogwa Arimathea, kandi owawanga omulala ku awagaaka awa oluwuga otiirwe ino, yakola owusiani agia ku Pilaato amusawa omuwiri ogwa Yesu agie aawre. Omuntu ono oona yawanga na arindirra okuuzza okwa Owuami owua Katonda.

⁴⁴Pilaato yaluguula ino olwa yawurra mbwe Yesu amiire okufwa, kutio yaeta omukangasi owa awa-iiye okumuwuuzia ni Yesu yafwa kale.

⁴⁵Olwa Omukangasi owa-iiye yamulaga mbwe amiire okufwa, Pilaato yaganya mbwe Yoseefu atoole omuwiri ogwa Yesu.

⁴⁶Yoseefu yagula enguwo nikwo agia aisia omuwiri ogwa Yesu ansi okuema ku omusalaaba. Yaguwasaania mu enguwo eyo, nikwo aguingizia mu iwuuta eriwanga ni rimiire okuawua mu iwaale. Nikuemaog yagalangasia oguwaale omusumba aigala nagwo omunwa ogwa iwuuta erio.

⁴⁷Maaria omwala owa Eumagidaala ni Maaria ng'inwawu Yoose waawona aa yateewua.

Mariiko 16

Okuziuka okwa Yesu

(Math 28:1–10; Luuk 24:1–12; Yowa 20:1–10)

¹No owuire owua Sabato wuamala okuwita, Maaria omwala owa Eumagidaala, Saloome ni Maaria ng'inwawu Yakoobo waagula amavuta agawunya esaami kugere wagic wawake nago omuwiri ogwa Yesu.

²Kunkio nyanga olwa omudiira ogwa okuwiri, ne enyanga efuma, awakazi wano waafuma wagic ku ekiwaga ekia Yesu.

³Waiwuuzia aweene ku engira ni wagic watino, “Naanu katio ogia okutugalangasizia oguwaale guria gueme ku omunwa ogwa ekiwaga?”

⁴Olwa waatuuka ao wawarra, waawona oguwaale ogwo ni gwawanga ni gumiire okugalangasiwua guema ku iwuuta. Ni gwawanga oguwaale omusumba.

⁵Olwa waaingira mu owuina, waawona omuntu oiwooye enguwo enzeru zere na aikaale nyakukono okusaaza. Okwo kwagera owuti wuawa-amba ino.

⁶Omuntu oyo yawalaga otino, “Mutatia. Manyire mbwe muagala Yesu Omunazareeti owawambwa ku omusalaaba oria. Amiire okuziuka, awula ano. Muwone asi aa waawanga ni wamuteere.

⁷Ni mugie, mulage Petro na awalonzi waae wandi mbwe amiire okukangata agiire Galiili, kandi mugia okumutuukra eyo kiomo yawalaga.”

⁸Awakazi awo waafuma enze warumuka ni waema ku ekiwaga ao. Owuti wuawa-amba aa awulao owa waagamba-gamba nae ku engira ni wagia.

Yesu afumiire Maaria omwala owa Ewumagidaala

(Yowa 20:11–18)

⁹Olwa Yesu yamala okuziuka, kunkio nyanga olwa omudiira ogwa okuwiri, yafumira Maaria omwala owa Eumagidaala, owa yawanga na afumiizieko ewikeeno musamvu.

¹⁰Yagia alaga awantu awa Yesu yawanga nawo, awaawanga ni wamurra ni wari no owululu owungi.

¹¹No olwa waawurra omukazi oyo na awoola mbwe Yesu ari omulamu kandi mbwe amuwuine na amiiso, waalowa amang’na ago wasiriisia mbwe no owuweeyi.

Yesu afumiire awalonzi wawiri

(Luuk 24:13–35)

¹²Lunyima Yesu kandi yafumira awalonzi waae wawiri ku engira, mu engira egawuuke ni wagia ku omugizi gundi.

¹³Awalonzi waae wawiri wano waairana wuangu-wuangu walaga awiina waawu eking’ana kino. Ni wona waalowa amang’ana ago.

Yesu afumiire awalonzi ikumi ni mulala

(Luuk 24:36–46; Yowa 20:24–30)

¹⁴Owutuukre, yafumira awalonzi waae ikumi ni mulala wona ni waikaale ni waria ku emeesa. Yesu yawalaga otino, “Ne ekintu ekiwiiwi ino mbwe mukiawula no okuganya, kandi mwalowere okuwa no okuganya ku amang’ana aga mumiire okulagwa na awamiire okumbona ni miire okuziuka.”

Owutumwa owunene

(Math 28:15–18)

¹⁵Owuire wundi Yesu yawalaga otino, “Mugie mu ekialo kiona mugie mulanzizie awantu wona amang’ana amalootu.

¹⁶Oweere na okuganya kandi yabatiiswa, arituukra owulamu owutariwua. No olowere okuwa no okuganya ku amang’ana ago, ekiina kirimukira.

¹⁷Wino niwio ewiriwa ewilagano ku awantu awariwa no okuganya ku inze; warifumia ewikeeno ne eriina riange, wariwoola eminwa egigawuke-gawuuke egia watamanyire,

¹⁸wariamba enzoka ni ngaziriwaluma, lwona ni wanywere owutwa owuita awantu, ngawuriwaita kandi warita amakono gaawu ku awalwire, na awalwire warilama.”

Yesu aguluuke agiire ku igulu

(Luuk 24:50–53; Awat 1:9–11)

¹⁹Olwa Yesu yamala okugamba-gamba nawo otio, yatoolwa aniiniwua ku igulu, aa yagia aikaale nyakukono okusaaza okwa Omwami Katonda.

Awalonzi watanika okulanzia injili

²⁰Awalonzi waae waagia walanzia amang'ana aga Katonda mu ekialo kiona kandi Yesu yawa-aa amaani mu emirimo giawu giona. Amankono aga Katonda yakola nawo, gaawa ekilago ku awantu ku amang'ana amalootu aga waalanzia.

Luuka

Luuka 1

Amang'ana ku owuimpi

- ¹Omukangasi otiirwe Tiofiila, awantu awangi awamiire okukalawana okujoja ku ewintu ewimiire okuikola agati iifu ano.
- ²Wamiire okujoja amang'ana amalala aga ifwe twona twalagwa na awantu awasooka okugawona na amiiso ni gaikola kandi awaakorra Katonda mu okugalanzizia awantu.
- ³Kutio, mbona mbwe kulootu noona nkujojere amang'ana gano mu engira ewurikana aeniki omwene miire okugalondorezia geeza okuemera mu owutanikro,
- ⁴kugere omanyeye owuene wuona owuri ku amang'ana goona aga omiire okugererwa.

Okuiwulwa okwa Yowaana Omubatiisi

- ⁵Mu amiire aga Eroode yawanga omwami owa Yudeea, yawangao omuozia owaetwanga mbwe Zakaria, owawanga mu owuasio owua owulala owua awoozia owuaetwanga Abiija. Mukaae yaetwanga mbwe Elizabeethi, omwala owa awa Aruuni.
- ⁶Woono wawiri waawanga awigolovu emberu wa Katonda, kandi waarinda ensikirra ne endagirra ziona ezia Katonda aa wataterera.
- ⁷Ni waawulanga omwana aeniki Elizabeethi yawanga omugumba, kandi woono wawiri waawanga awantu awakulu.
- ⁸Owuire wulala ni Zakaria yawanga na akola emirimo egia owuozia emberu wa Katonda mu owuasio owua owulala wuawu,
- ⁹yalowolwa ne ensiiti na awoozia awiina waae, nikulondokana ne enkola ezia emirimo egia owuozia, okuingira mu ekaalu eya Omwami okusamba owubaani.
- ¹⁰Ne enyinga ezia okusamba owubaani wuatuuka, awantu woono awaakumia okusawa, waasawiranga enze.
- ¹¹Enyankoi owa Katonda yafumira Zakaria aimerra nyakukono okusaaza okwa emeesa eya okusamba owubaani.
- ¹²Olwa Zakaria yamuwona, yazinduka amasaai kandi owuti wuamuamba.
- ¹³Ne enyankoi yamulaga otino, "Zakaria, otatia. Katonda amiire okuwurra okusawa kwao, kandi mukaae Elizabeethi aaza okuiwula omwana owekizia, omuluke eriina Yowaana.

¹⁴“Aaza okugera owone geeza kandi owe omusangaavu, kandi awantu awangi wariwa ne ekisangaalo ku okuiwulwa kwae,

¹⁵aeniki ariwa omuntu omukaate emberu wa Katonda. Na ataaza yanywa amalwa nakuwa ewintu ewilulu ewitowookwe; kandi aaza okuizuziwua no Omwoyo Omweru, namba na akiari mu enda eya ng'inwae.

¹⁶“Arigera Awaisraeli awangi wairane ku Omwami Katonda waawu.

¹⁷Arikangata emberu wa Omwami na ari na amaani aga Omwoyo Omweru kiomo Eliija. Arigalusia emioyo egia waaswawu awaana okugonzia awaana waawu; kandi origera awa emitwe emikalu okuwurra amang'ana aga owuganga aga awalongoole, kugere waikagre okuingizia Omwami.”

¹⁸Ni Zakaria yawuuzia enyankoi otino, “Ekiesa okundaga mbwe ewintu wino wiriikola niki? Aeniki inze ndi omuntu mukulu, kandi mukange oona ari ne emiaka emiera.”

¹⁹Nikuemao, enyankoi yamuirania otino, “Inze ni Gabrieli, omutumwa okola emberu owa Katonda; kandi ntumrwe okugamba-gamba ni iwue ni nkureetra amang'ana amageni amalootu gano.

²⁰Kutio, manya mbwe ooza okuwa omurimba otagamba-gamba nawuno kutuuke owuire owua ewintu wino wiiza okuikola, aeniki ngokaganya na amang'ana gange gano agaaza okuikola owuire wuago.”

²¹Ku enyinga ezio, awantu awaasawanga enze awo waarindanga Zakaria ni waaluguula ekiagera na akinda ino mu ekaalu munsu otio.

²²Olwa Zakaria yafuma enze, ngakaesanga okugamba-gamba. Kuno kwagera wamanya mbwe awuine owusasuko mu ekaalu; aeniki yawalagirizianga ewintu mala na amakono ni ngakanawula eking'ana.

²³Ne enyinga ezia owuasio owua okukola mu ekaalu ziwua, Zakaria yairana engo waae.

²⁴Lunyima, mukaae Elizabeethi ya-amba isaai kandi yaiwisa mu enyumba ku emienzi itaanu na atafuma enze. Yawoola otino,

²⁵“Katonda nio onkoriire geeza otino. Mwakuuno ambariire no owusiza wuae kandi antoorreko ensuuko ezia owugumba emberu wa awantu.”

Okulanzia okuiwulwa okwa Yesu

²⁶Ne Elizabeethi yawanga ni isaai eria emienzi mukaaga, Katonda yatuma enyankoi Gabrieli ku omugizi ogwa Nazareeti, mu ekitemo ekia Galiili.

²⁷Yagia ku omwala omugima oetwa Maaria, owawanga no owuiko owua okukwezana ni Yoseefu, owaemanga mu ekiriango ekia Omwami Daudi.

- ²⁸Enyankoi oyo yamugiako amulaga otino, “Oikaziwue, iwue omwala omusereke. Omwami ari ni iwue kandi aomereerwe ni iwue!”
- ²⁹Maaria yainyaasia mu omwoyo gwae ino ku amang’ana ago kandi yaiwuuzia mu amaingirizio gaae ekia amakeezio ago gaalagananga.
- ³⁰Enyankoi oyo yamulaga otino, “Maaria, otatia, aeniki Katonda ari omusiza ni iwue.
- ³¹Kutio, wona! Ooza okuamba isaai kandi oiwule omwana owekizia kandi orimuluka mbwe Yesu.
- ³²Ariwa omuntu omukaate, kandi arietwa mbwe Omuzia owa Katonda omunene; kandi Omwami Katonda arimuta ku entewe eya owuami owua guukwa waae Daudi.
- ³³Ariwa omwami owa awiizukulu awa Yakoobo ku emiigo emiera egiiza kandi owuami wuae ngawuriwua yawa!”
- ³⁴Maaria yawuuzia enyankoi otino, “Kino kiesa okuikola kitie, ni inze nkiari omwala omugima okiari okuwa alala no omusaaza?”
- ³⁵Enyankoi yamuirania otino, “Omwoyo Omweru aaza okukuuzako kandi amaani aga Katonda ori kungulu okukira gaaza okukusanikira. Kutio omwana owa ooza okuiwulwa oyo arietwa mbwe Omweru, Omuzia owa Katonda.
- ³⁶Namba Elizabeethi, omuganda waa, oona aaza okuwa no omwana kukawa mbwe ari omukiire. Kandi iye owaetwanga omugumba nyingeeno ari ne enda eya emienzi mukaaga.
- ³⁷Aeniki kiwulao ekiesa okukira Katonda okukola.”
- ³⁸Maaria yairania otino, “Inze ndi omukurumu owa Omwami Katonda, kandi nganyire ekintu-ukintu ekia aagala mbwe kinyiikoleko.” Nikuemao enyankoi yagia amureka.

Maaria agiire okuwona Elizabeethi

- ³⁹Nikuemao, Maaria yasiwa emisigo wuangu afuma okugia ku omugizi oguri mu ekialo ekia ewigiri ewia Yudeea,
- ⁴⁰aingira ku omugizi ogwa Zakaria agia akeezia Elizabeethi.
- ⁴¹Olwa Elizabeethi yawurra amakeezio aga Maaria otino, omwana yawaaya mu enda yaae kandi Elizabeethi yaizuziwua no Omwoyo Omweru.
- ⁴²Yagamba-gamba no omwoyo ogwa kungulu na awoola otino, “Iwue osereekwe agati eya awakazi wandi, kandi omwana owa ooza okuiwula oona asereekwe!”
- ⁴³Ni inze nsereekwe aeniki ng’inwawu Omwami wange aazre okumbona.

⁴⁴Aeniki olwa mpuriire-uwurra amakeezio gao otino, omwana ori munda yange aduma-duumre ne ekisangaalo.

⁴⁵Osereekwe iwue ku okuganya mbwe ewintu ewia Katonda akulagre wiiza okuikola!”

Olwembo olwa Maaria

⁴⁶Nikuemao Maaria yawoola otino, “Omwoyo gwange gutondowola Omwami Katonda.

⁴⁷Mu owulamu wuange ndi ne ekisangaalo ku Katonda omununuzi wange,

⁴⁸aeniki amiire okunyingirizia inze omukurumu waae ori ansi! Okutanikra reero, amakula goona gaaza okunyeta omusereke,

⁴⁹aeniki Katonda owa amaani goona amiire okunkorra ewintu ewikaate. Eriina riaae rieru!

⁵⁰Alagana owusiza ku awantu awamuere owuti, okuemera ku ikula rino okugia ku ikula rindi.

⁵¹Amiire okukola ewinene na agoloole okukono kwae okwa amaani na ataanyia awaitumbula mu amaingirizio gaawu.

⁵²Yategula awaami awa amambala nawuno awatoola ku entewe ziwu, na aginga kungulu awantu awaiisiizie ansi.

⁵³Yaigusia awari ne enzala ne ewintu ewilootu, na awanyazi arumusia wagia amakono masa.

⁵⁴Amiire okutunzia omukurumu waae Israeli, na alonda owusiza wuae,

⁵⁵kiomo yawoorra waaguukwa wiifu, Abraamu alala na awiizukulu waae, mbwe arikola amiire goona.”

⁵⁶Kutio, Maaria yamenya ne Elizabeethi ku emienzi egikaera isatu nikwo airana owaawu.

Okuiwulwa okwa Yowaana Omubatiisi

⁵⁷Olwa enyinga ezia Elizabeethi ezia okuigawula ziatuuka, yaiwula omwana owekizia.

⁵⁸Awamenyere nae ampi na awaganda waae waawurra kiomo Omwami amiire okumukorra owusiza owukaate, kandi woona waasangaala nae alala.

⁵⁹Olwa owuire owua munaane wuatuuka waaza okuira omwana enyangu, kandi waagalanga mbwe wamuluke swae Zakaria.

⁶⁰Ni ng’inwae yawairania otino, “Yaaya! Asugaane aetwe Yowaana!”

⁶¹Ni iwo waamuirania watino, “Awulao omuntu mu oluganda lwinyu ori ne endukwa eyo.”

⁶²Nikuemao waawuuzia swae na amakono ni wamuagalako eriina eria akaagala omwana oyo alukwe.

⁶³Yawasawa iwaale eria akujojako, kandi yajoja mbwe “Eriina riae ni Yowaana.” Kandi okwo kwagera awantu waluguula ino.

⁶⁴Ao-ao, omunwa gwae gwaiguka kandi olurimi lwae lusiwuka, nawuno atanika okugamba-gamba na atondowola Katonda.

⁶⁵Kandi, owuti wua-amba awantu woona awaawanga ni wamenyere nawo ampi. Awantu woona awa ekialo kiona ekia ewigiri ewia Yudeea waagamba-gambanga ku amang’ana gano.

⁶⁶Omuntu-umuntu owawurra amang’ana gano yagaluguula na aiwuuzia otino, “Omwana ono aaza okuwa omuntu ofwana otie?” Aeniki, kuri kuwuene mbwe amaani aga Omwami Katonda gari nae.

Olwembo olwa Zakaria

⁶⁷Swae Zakaria, na aizuziwua no Omwoyo Omweru, yawoola amang’ana agaamuemera ku Katonda otino:

⁶⁸“Atondowolwe Omwami, Katonda owa Awaisraeli, aeniki amiire okuuzi okutoola awantu waae mu amakono aga omuzigu.

⁶⁹Amiire okutureetra omununuzi ori na amaani okuema mu enyumba eya omukurumu waae Daudi.

⁷⁰Kiomo yawoola okuwitra ku awagambi waae aweeru okuemera kale mbwe:

⁷¹Aritununula okuema ku awazigu wiifu kandi okuema ku amakono aga awaturegere woona.

⁷²Arilagana owusiza ku waaguukwa wiifu kandi ari-ingirizia endagano yaae enzeru eya yakola nawo.

⁷³Aaza okutuusia endagano eya yaifuuwira soifu Abraamu.

⁷⁴Aaza okutu-aa amaani aga okumukorra ni tuwula owuti, na amiire okututoola mu amakono aga awazigu wiifu.

⁷⁵Kandi tuuza okuwa aweeru kandi awigolovu emberu waae, amiire goona aga owulamu wuifu.

⁷⁶Ni iwue, omwana wange, ooza okuetwa omugambi owa Katonda omunene; aeniki orikangata emberu owa Omwami okuta emioyo egia awantu okuwa amankaga okumingizia.

⁷⁷Ooza oku-aa awantu waae amaganga aga okumanya owuinunuzi owutuukrwa ni warekeerwe owuoni wuawu.

⁷⁸Okuwitra ku owusiza owua olugonzi olwa Katonda iifu, aaza okureeta owueru owua enyanga owua owuinunuzi wumurike, ni wuema ku igulu,

⁷⁹ku awamenyere mu ekierema kandi awari mu ekiiruuzia ekia olumbe; kandi okulagirizia amagulu giifu ku engira eya owuolu.”

⁸⁰Omwana oyo yakoma kandi awa omukalangufu mu omuwiri ni mu omwoyo; kandi yamenya mu ekeewa nawuno kutuuka afuma awonekana owuyanga ku Awaisraeli.

Luuka 2

Okuiwulwa okwa Yesu

(Math 1:18–25)

¹Mu amiire ago kwawa mbwe Omwami Kaisaari Augusto yafumia amang’ana mbwe awari mu ekialo ekia Rooma wona wawalwe.

²Kuno nikwo okwawanga okuwalwa okwa awantu okwasooka ni Kwirinaasi yawanga omukangasi owa ekialo ekitono ekia Siiria.

³Kandi omuntu ki omuntu yagia okuwalwa ku omugizi omunene ogwa ekialo ekia waaguukwa waawu.

⁴Kutio Yoseefu oona yaema Nazareeti mu ekialo ekia Galiili agia Yudeea ku omugizi ogwa Bethleemu ogwa Daudi yawanga na amenyeremo, aeniki yawanga owa enyumba no owuiwulane owua Daudi.

⁵Waagia eyo alala ni Maaria, owayawanga na akorre nae owuiko owua okukwezana, kandi owawanga na alwire ni isaai mu enyinga ezio.

⁶Ni waawanga eyo, waaizukira ne enyinga ezia Maaria ezia okuigawula ni zituukre,

⁷kandi yaiwula omwana waae owa kuluweri owekizia. Yamuwasania mu enguwo kandi amuta mu ekituwa ekia emiandu giriiramo, aeniki iwaga riawulangao mu amayumba aga awageni.

Awaayi ne enyankoi

⁸Ni waawangao awaayi awa amagondi awaawanga ni wamenyere mu ekiayiro ekia ampi ao, ni warinda emiandu giawu owuire.

⁹Enyankoi owa Omwami yawafumira kalala kandi owunene owua Omwami wuwala wuwasunguuzia. Okwo kwagera owuti owunene ino wuwa-amba.

¹⁰Ne enyankoi oyo yawalaga otino, “Mutatia aeniki mbareetiire amang’ana amalootu agareeta owusangaavu owunene ku awantu wona.

- ¹¹Reero, Omwami Kristo, Omununuzi iinyu, aiwuulwe ku omugizi omunene ogwa Omwami Daudi.
- ¹²Kino nikiyo ekiiza okuwa ekilago ku inywe: Muuza okutuukra omwana owasaniwue mu enguwo kandi agonre mu ekituwa ekia emiandu giriiramo.”
- ¹³Kalala, omuganda ogwa enyankoi awa Katonda awangi waafuma wawa ne enyankoi oyo ni watondowola Katonda kandi ni waawoola watino,
- ¹⁴“Owunene wuwe ni Katonda ori kungulu ino, kandi owuolu wuwe ku awantu awaomerezia Katonda ku ekialo.”
- ¹⁵Olwa enyankoi awo waawareka ni wairana ku igulu, awaayi awo waawoola agati yaawu watino, “Mutugieko Bethleemu, tugie tuwone ekia Omwami Katonda atulagre mbwe kiikorre eyo kino.”
- ¹⁶Kutio waafuma wuangu-wuangu wagia waatuukra Yoseefu ni Maaria, alala no omwana eking’eng’e na agonre mu ekituwa ekia emiandu giriiramo.
- ¹⁷Olwa waamala okumuwona waalanzia amang’ana aga waalagwa ku omwana oyo,
- ¹⁸kandi wona awaawawurra waaluguula ino amang’ana aga awaayi awo waawalaga.
- ¹⁹Ni Maaria iye yawiika amang’ana gano goona mu omwoyo gwae kandi yagaingirizianga.
- ²⁰Awaayi awo wairana ni watondowola Katonda kandi ni wamu-aa owunene ku ewintu wiona ewia waawurra kandi wawona, ewiawanga mala kiomo waawanga ni wamiire okulagwa.

Yesu airrwe mu ekaalu

- ²¹Olwa owuire owua munaane owua okuira omwana enyangu wuatuuka, yaewua eriina Yesu, eria enyankoi yamuluka ni isaai riae rikiari okuambwa.
- ²²Na amiire aga okuieruyia okwa ng’ina omwana nikulondokana ne endagirra eya Muusa, gaawua, Yoseefu ni Maaria waagia Yerusaleemu okufumia omusango. Waagia no omwana Yesu okumuta emberu wa Omwami Katonda,
- ²³ni walonda ensikirra ezia Omwami Katonda eziwoola otino, “Omwana owekizia osookere mu enda ari omweru otengeekeerwe Omwami Katonda.”
- ²⁴Lwona waagia okufumia omusango nikulondokana ne endagirra eya Omwami Katonda ewoola mbwe: omuntu afumia amaemba-emba awiri nakuwa ewiana ewia ewigimbamvula wiwiri.
- ²⁵Yawangao omuntu Yerusaleemu owaetwanga Simoni, omuntu omuigolovu kandi oambre amang’ana aga Omwami Katonda. Yarindiranga okuwona owuire owua Awaisraeli waazanga okununulwa, kandi Omwoyo Omweru yamuwangako.

- ²⁶Yawanga na amiire okulagwa no Omwoyo Omweru mbwe ngarifwa na atawuine Kristo, Omununuzi owa Omwami Katonda yaifuuwa okutuma.
- ²⁷Yakangatrwa no Omwoyo Omweru mala agia aingira mu olwanyi olwa ekaalu. Olwa awiiwuzi awa omwana Yesu waaingira nae mu ekaalu okumukorra kiomo enkola ezia endagirra ziagalanga,
- ²⁸Simoni yamuginga mu amakono gaae atanika okutondowola Katonda na awoola otino,
- ²⁹“Omwami omunene, omiire okukola kiomo waaifuuwa. Katio oesa wandeka inze omukurumu waa ngone no owuolu,
- ³⁰aeniki miire okuwona, omuntu ooza okununula awantu, na amiiso gange.
- ³¹Ee, owuinunuzi owua omiire okureeta kandi ota emberu owa awantu woona.
- ³²Iye nio owueru owuuzi okusasurra namba awantu awatari Awayaudi engira yao kandi aaza okureetra awantu wao Awaisraeli owunene owukuemako.”
- ³³Ewintu ewia awiiwuzi awa omwana waawurra ni Simioni awoola ku omwana waawu wiawa-amba eminwa.
- ³⁴Nikuemao, Simoni yawasereka kandi alaga Maaria ng’ina Yesu otino, “Omwana ono arigera Awaisraeli awangi wari-isiwua ansi, na awandi wariniiniwua kungulu. Ariwa ekilago ekiema ku Katonda ekia awantu warilowa ni wagamba-gambako uwiiwi,
- ³⁵kugere amaingirizio agari mu emioyo egia awantu gamanyike. Namba iwue oona, oriwa no omwoyo omululu kiomo omuntu owa omwambe gufumuute guingira mu enkolo muni.”
- ³⁶Lwona yawangao omugambi owekikazi owa Katonda owaetwanga Aana, omwala owa Fanueli, owa ekiriango ekia Aasa. Yawanga na akiriiye katio, ni yamenya ni iwuae mala ku emiaka musamvu gieng’ene.
- ³⁷Nikuemao iwuae yafwa asigala omukazi omufwire nawuno awa ne emiaka amakumi munaane ni ine. Ngakaemanga mu ekaalu, ni yakorra Katonda owuire no omuwasu, na asawa kandi na asiwa okuria aa ataria.
- ³⁸Yawaazako ampi mu enyinga ezio atanika okuiranzia Katonda otioo na agamba-ngamba ku omwana Yesu, ku awantu awa Yerusaleemu woona awaarindiranga okununulwa mu amakono aga awazigu.
- ³⁹Ni waamala okukola ewintu wiona kiomo endagirra eya Omwami yaagalanga, Yoseefu ni Maaria wairana Galiili ku omugizi gwawu oguetwa Nazareeti.
- ⁴⁰Kandi omwana oyo yakoma awa omukalangufu. Yaizuziwua na amaganga amangi kandi owusiza owua Katonda wuamuwangako.

Omuzia Yesu asigaale mu ekaalu

- ⁴¹Omwaka ki omwaka awiiwuzi waae waagianga Yerusaleemu mu omugomo ogwa Pasaaka.
- ⁴²Olwa yawanga ne emiaka ikumi ni iwiri, waagia nae nikulondokana ne enkola eya omugomo ogwo.
- ⁴³Olwa omugomo gwawua kandi awiiwuzi waae wairananga engo, omuzia Yesu iye yasigala enyima Yerusaleemu na awiiwuzi waae watamanyire.
- ⁴⁴Waagenda-genda ku owuire owulala ni waingirizia mbwe yawanga agati eya awalugendwa. Lunyima, waatanika okumuagala mu awaganda na awiiko waawu,
- ⁴⁵ni ngawakamutuukra. Enkio walwo waatanika olugendo olwa okuirana Yerusaleemu, ni wamuagala.
- ⁴⁶Owuire owua okusatu waamutuukra mu olwanyi olwa ekaalu, na aikaale agati ya awagerezi awa endagirra na awategerezia kandi na awawuuzia embuuzia.
- ⁴⁷Awantu wona awaamuwurra waaluguula ino kiomo amanyire ewintu ewingi kandi kiomo yairanianga embuuzia.
- ⁴⁸Olwa awiiwuzi waae waamuwona waaluguula. Ng'inwae yamulaga otino, "Mwana wange, ekigera no otukoriire otino niki? Inze ni swao tumiire okunyakanyaaka ino ni tukuagala."
- ⁴⁹Ni iye yawawuuzia otino, "Munyagalenga kolaki? Na mukawanga ni mumanyire mbwe nsugaane mbe mu enyumba eya Soifu?"
- ⁵⁰Ni iwo ngawakamanya ekia yawalaganga.
- ⁵¹Nikuemao, yaika nawo Nazareeti kandi yamenya nawo no owuti geeza. Ni ng'inwae yawiika kandi a-amba ewintu wino mu omwoyo gwae.
- ⁵²Kandi Yesu yakoma mu amaganga kandi mu omuwiri gwona; yagonziwua na awantu kandi ni Katonda yoona.

Luuka 3

Yowaana Omubatiisi alonga engira

(Math 3:1–12; Mari 1:1–8; Yowa 1:19–28)

- ¹Gwawanga omwaka ogwa ikumi ni itaanu mu owukangasi owua Kaisaari Tiberiasi. Pontias Pilaato yawanga omukangasi owa ekitemo ekia Yudeea, ne Eroode yawanga omukangasi owa ekitemo ekia Galiili. Wamwawu waae Piliipo nio owawanga omukangasi owa Iturea ni Trakonitiisi, ni Lisaania yawanga omukangasi owa Abileene.
- ²Anaasi ni Kaifa niwo awaawanga awakangasi awa awoozia. Amiire ago amang'ana aga Katonda gaazra Yowaana omuzia owa Zakaria na ari mu ekeewa.

³Yagia mu ewialo wiona ewiri ampi no oluuzi olwa Yordaani, na alanzizia awantu mbwe wagaluke wareke amawi, wabatiiswe kugere Katonda awarekere owuoni wuawu.

⁴Kiomo Katonda yawoola mu amang'ana agari mu ebuuki eya Omugambi Isaaya otino: "Omwoyo ogwa omuntu oetana mu ekeewa otino, 'Mulongre Omwami engira, mumugololre engira ewe enyigolovu.

⁵Amiina goona gawugrwe, ewigiri wiona wirimwe wiike ansi. Engira eziigodre zigololwe, kandi anyenyeevu aterereziwue.

⁶Kandi awantu woona waaza okuwona owuinunuzi owua Katonda.' "

⁷Yowaana yalaga omuganda ogwa awantu awamuuzako kugere awabatiise otino, "Inywe awaana awa enzoka wano! Owasiagiizie mbwe mumizule okuswawukwa no okusu okungi okuuzza naanu?

⁸Muamie ensaafu ezia mu enkola, ezilagana geeza mbwe omuntu agaluuke arekere amawi. Ni mutaaza mwaingirizia mbwe muuza mwamizuka ku okuwoola-uwoola mbwe, "Turi geeza aeniki turi awaana awa Abraamu.' Mbalaga mbwe Katonda aesa okugalusia amawaale gano gawe awaana awa Abraamu!

⁹Namba nyingeeno, embasa emiire okuteewua ku isina eria omuti; kandi omuti ki omuti oguta-amia ensaafu endootu guuza okutemwao nikwo gurigizwe mu omurro."

¹⁰Omurima ogwo gwamuwuuzia otino, "Katio tusugaane tukoleki?"

¹¹Yowaana yawairania otino, "Omuntu ori ne enguwo iwiri asugaane agawire omwina wae owula nayo, kandi ori no okuria oona asugaane akole otio."

¹²Awasolozzi awa omusolo awaaza okubatiiswa woona waamuwuuzia watino, "Omugerezi, ifwe tusugaane tukoleki?"

¹³Yawalaga otino, "Mutasolozia amangi okukira kiomo kuagalana."

¹⁴Nikuemao awa-iiye wandi woona waamuwuuzia watino, "Ni ifwe, tusugaane tukoleki?" Yowaana yawairania otino, "Mutatoola amasendi ku awantu na amaani kandi mutata amang'ana aga owuweeyi ku omuntu. Mureke emisaara giinyu giwasuge!"

¹⁵Awantu awaarindranga okuuzza okwa Omununuzi waingirizianga mu emioyo giawu mbwe Yowaana oyo nio owawanga Meesia.

¹⁶Yowaana yawairania woona otino, "Inze mbabatiisa na amanzi. Na ario amuntu omukaate okunkira ooza, omuntu owa ng'asugre namba okusiwula engoe ezia ewiraato wiae. Iye aaza okuwabatiisa no Omwoyo Omweru ogwa Katonda kandi no omurro.

¹⁷Ari ne ekiseeso kiae mu amakono, ekia aaza okuseesra amaemba mu olwanyi lwae. Emere aaza okuta mu ekiagi, na amakunzo aaza okusamba no omurro ogutazima.”

¹⁸Na amang’ana gandi amangi, Yowaana yaiyemba awantu na awalanzizia amang’ana amalootu.

¹⁹No olwa Yowaana yagaania Omwami Eroode ku amang’ana aga Erodiasi muka wamwawu owa yatoola okuwa omukazi waae, kandi ku amawi gandi amangi aga Eroode yakolanga,

²⁰Eroode yasonga owuwi ku amawi goona aga yakola ago olwa yaingizia Yowaana mu owusiwe.

Yesu abatiisrwe na amanzi kandi no Omwoyo Omweru

(Math 3:13–17; Mari 1:9–11)

²¹Kwawa mbwe, na awantu woona waamala okubatiiswa kandi Yesu oona yaaza abatiiswa, kandi ni yasawanga igulu riaigukao.

²²Omwoyo Omweru yaika ku iye mu embonekano eya iemba-emba kandi omwoyo gwaemera ku igulu ogwawoola gutino, “Iwue ni iwue omuzia wange owa ngonziizie, kandi owa nsangaarre nae.”

²³Yesu yawanga ne emiaka egiera amakumi asatu na atanika emirimo giae.

Owuiwulane owua Yesu

(Math 1:1–17)

Awantu waingirizianga mbwe yawanga omuzia owa Yoseefu, ni kuwuene yasimuka mu owuiwulane owua Eeli.

²⁴Eeli yawanga omuzia owa Mataat, Mataat yawanga omuzia owa Laawi, Laawi yawanga omuzia owa Melki, Melki yawanga omuzia owa Janaai, Janaai yawanga omuzia owa Yoseefu.

²⁵Yoseefu yawanga omuzia owa Matathiasi, Matathiasi yawanga omuzia owa Amoos, Amoos yawanga omuzia owa Naumi, Naumi yawanga omuzia owa Esli, Esli yawanga omuzia owa Nagaai.

²⁶Nagaai yawanga omuzia owa Maathi, Maathi yawanga omuzia owa Matathiasi, Matathiasi yawanga omuzia owa Semeeni, Semeeni yawanga omuzia owa Yoseeki, Yoseeki yawanga omuzia owa Yooda.

²⁷Yooda yawanga omuzia owa Yoanan, Yoanan yawanga omuzia owa Reesa, Reesa yawanga omuzia owa Zerubabeeli, Zerubabeeli yawanga omuzia owa Seltieli, Seltieli yawanga omuzia owa Neeri.

²⁸Neeri yawanga omuzia owa Melki, Melki yawanga omuzia owa Aadi, Aadi yawanga omuzia owa Kosaam, Kosaam yawanga omuzia owa Elmadaam, Elamdaam yawanga omuzia owa Eeri.

²⁹Eeri yawanga omuzia owa Yoswa, Yoswa yawanga omuzia owa Eliazaari, Eliazaari yawanga omuzia owa Yoriimu, Yoriimu yawanga omuzia owa Mattaat, Mattaat yawanga omuzia owa Laawi.

³⁰Laawi yawanga omuzia owa Simoni, Simoni yawanga omuzia owa Yuuda, Yuuda yawanga omuzia owa Yoseefu, Yoseefu yawanga omuzia owa Yoanaamu, Yoanaamu yawanga omuzia owa Eliakiimu.

³¹Eliakiimu yawanga omuzia owa Melea, Melea yawanga omuzia owa Meena, Meena yawanga omuzia owa Mataatha, Mataatha yawanga omuzia owa Nathaani, Nathaani yawanga omuzia owa Daudi.

³²Daudi yawanga omuzia owa Yeese, Yeese yawanga omuzia owa Obeedi, Obeedi yawanga omuzia owa Boazi, Boazi yawanga omuzia owa Salmooni, Salmooni yawanga omuzia owa Nasooni.

³³Nasooni yawanga omuzia owa Aminadaabu, Aminadaabu yawanga omuzia owa Raamu, Raamu yawanga omuzia owa Ezrooni, Ezrooni yawanga omuzia owa Pereezi, Pereezi yawanga omuzia owa Yuuda.

³⁴Yuuda yawanga omuzia owa Yakoobo, Yakoobo yawanga omuzia owa Isaaka, Isaaka yawanga omuzia owa Abraamu, Abraamu yawanga omuzia owa Teera, Teera yawanga omuzia owa Naori.

³⁵Naori yawanga omuzia owa Seruugi, Seruugi yawanga omuzia owa Reeu, Reeu yawanga omuzia owa Peleegi, Peleegi yawanga omuzia owa Ebeer, Ebeer yawanga omuzia owa Seela.

³⁶Seela yawanga omuzia owa Kainaani, Kainaani yawanga omuzia owa Alfaksaadi, Alfaksaadi yawanga omuzia owa Seem, Seem yawanga omuzia owa Noowa, Noowa yawanga omuzia owa Lameeki.

³⁷Lameeki yawanga omuzia owa Methuseela, Methuseela yawanga omuzia owa Enooka, Enooka yawanga omuzia owa Yareedi, Yareedi yawanga omuzia owa Maalaleeli, Maalaleeli yawanga omuzia owa Kainaani.

³⁸Kainaani yawanga omuzia owa Enoosi, Enoosi yawanga omuzia owa Seeth, Seeth yawanga omuzia owa Adaamu, ni Adaamu yawanga omuzia owa Katonda.

Luuka 4

Yesu ageezaaniwua ne Ekikeeno

(Math 4:1–11; Mari 1:12–13)

¹Yesu yaema mu Oluuzi olwa Yordaani na aizuziiwue no Omwoyo Omweru owamukangatra amuira

²mu ekeewa, aa Ekikeeno kiamugeezaania ku amiire amakumi ane. Ngakaria ekintu-ukintu ku amiire ago, kandi mu entuuko yago enzala katio yamurianga!

³Ekikeeno kiamulaga kitino, “No ori Omuzia owa Katonda, laga iwaale rino rigaluke riwe okuria.”

⁴Yesu yamuirania otino, “Kujojrwe mu endagano mbwe: ‘Okuria kweng’ene ngakugera no omuntu awa omulamu.’ ”

⁵Ekikeeno kiamuira asi ari kungulu ino kandi kimulaga ewialo wiona ewia owuami owua ku ekialo, kalala ki olumesi.

⁶Nikuemao kiamulaga kitino, “Nyiza okuku-aa amaani goona aga owukangasi owua ewialo wino no owunene wuawio wuona, aeniki miire okuwiewua kandi nyesa okuwi-aa omuntu-umuntu kiomo mbwine.

⁷Kutio, no onyifunamiire kandi ompe owunene, wiona wiiza okuwa ewiao.”

⁸Yesu yamuirania otino, “Kujojrwe mu endagano mbwe, ‘Ifunamira kandi o-ee Omwami Katonda waao eng’ene owunene kandi iye eng’ene nio osugaane okorre.’ ”

⁹Ekikeeno kiamuira Yerusaleemu, kimuemerezia asi aliire okukira ku enzizi eya ekaalu, kimulaga kitino, “No ori Omuzia owa Katonda, eema ano oguluke ogwe ansi.

¹⁰Aeniki kujojrwe mu endagano mbwe, ‘Katonda aaza okusikirra enyankoi waae wakurinde,

¹¹kandi waaza okukuginga kungulu kugere otaguunya okugulu ku iwaale.’ ”

¹²Yesu yamuirania otino, “Endagano ewoola mbwe, ‘Otageezaania Omwami Katonda waao.’ ”

¹³Olwa Ekikeeno kiamala okugeezaania Yesu mu engira zino ziona, kiamureka nawuno enyinga zindi zituuka.

Yesu atanika emirimo egia okulanzia amang’ana amalootu

(Math 4:12–17; Mari 1:14–15)

¹⁴Yesu yairana owaawu Galiili na akangatiirwe no Omwoyo Omweru, kandi amang’ana gaaye gailanzia mu ewitemo wiona ewiri ampi ao.

¹⁵Yagerera awantu mu amasinagoogi gaawu, kandi awantu wona waamu-aa owunene.

Yesu alowerwe Nazareeti

¹⁶Yesu yairana owaawu Nazareeti aa yakomera. Owuire owua Sabato yagia mu esinagoogi kiomo kwawanga enkola yaae kandi yaimerra okusoma endagano.

¹⁷Ebuuki eya Omugambi Isaaya yateewua mu amakono gaae. Yagisanukula mala atuukra asi ajojrwe otino,

¹⁸“Omwoyo Omweru ogwa Omwami andimo, kandi amiire okumbaka amavuta kugere ndanzie amang’ana amalootu ku awataka. Amiire okuntuma okulanzia

okusiwulwa okwa awasiwe, kandi mbwe awawuunu wawone, kandi okuta owuyanga awantu awanyaasiwua.

¹⁹Kandi okulanzia mbwe amiire aga Omwami aaza okulagana owusiza ku awantu waae gamiire okutuuka.”

²⁰Nikuemao, yasanikra ebuuki eyo agiiranizia owemirimo owa mu esinagoogi, mala agia aikala ansi okugerera. Awantu woona waamutaako ekiwi ekia amiiso.

²¹Nikuemao, yatanika okugamba-gamba otino, “Reero amang’ana gano gatuukre kuwuene kiomo mugawuriire na amatwi giinyu otio.”

²²Woonna waamugamba-gambako geeza ni waaluguula amang’ana amalootu aga owusiza agaafumanga mu omunwa gwae. Ni ngawakaganya nae mbwe nio Meesia, kutio waaiwuuzia watino, “Kane ono ng’ano omuzia owa Yoseefu?”

²³Yesu yawalaga otino, “Kuwuene muuza okundaga emfumo ewoola etino, ‘Omurezi, irerako omwene!’ Lwona muuza okundaga mbwe, ‘Kolako ku omugizi gwinyu ano ewintu ewia twawuriire mbwe wakola Kapernaumu.’ ”

²⁴Yagia emberu na awoola otino, “Mbalaga kuwuene, mbwe omugambi ngaingiziwua mu ekialo kiawu.

²⁵Ni kuwuene mbwe waawangao awakazi awafwire awangi mu ekialo ekia Awaisraeli mu amiire aga Omugambi Eliija, olwa igulu riaigalwao ku emiaka isatu ne enusu kandi enzala enene ya-amba ekialo kiona.

²⁶Ne Eliija ngakatumwa ku iwo woona, ni yatumwa mala ku omukazi omufwire owawanga Zarefaathi mu ekitemo ekia Sidooni.

²⁷Lwona, waawangao awalwire awangi awaalwalanga owugenge mu ekialo ekia Awaisraeli mu amiire aga Omugambi Eliisa, ni woona ngawakalama ku owulwire owuo, ni mala Naamani eng’ene owaemanga mu ekialo ekia Siiria.”

²⁸Awantu woona awaawanga mu esinagoogi enda ziwu ziyia nae ino olwa waawurra amang’ana gano.

²⁹Waaemerrako, wamusindika enze eya omugizi wamuiru ku oluwanga olwa ekigiri ekia omugizi ogwo gwaombokwako, kugere wamuluume agwe ansi.

³⁰Ni iye yagenda-genda agati ya omurima ogwo mala agia eziaa.

Yesu afumiizie ekikeeno

(Mari 1:21–28)

³¹Yesu yaika agia Kapernaumu, omugizi oguri mu ekitemo ekia Galiili kandi owuire owua Sabato yagereranga awantu.

³²Awaawurra engerera yaae gaawa-amba eminwa, aeniki amang’ana gaae gaawanga na amaani.

³³Mu esinagoogi omwo yawangao omuntu owawanga ne ekikeeno. Omuntu oyo yarra wukalu otino,

³⁴“Otuagalakooki, iwue Yesu Omunazareeti? Wuno oozre okutumala? Manyire owa ori, ni iwue Omweru oemere ku Katonda!”

³⁵Ni Yesu yasiagizia ekikeeno ekio na awoola otino, “Sarigira kiri, kandi fuma omuemeko!” Nikuemao ekikeeno ekio kiagwisia omuntu oyo ansi emberu waawu, mala kimufumako ni kitamunyarre omuwiri.

³⁶Amang’ana ago ga-amba eminwa egia awantu awaawangao awo woona, kandi waaiwuuzia agati yaawu watino, “Gano amang’anaaki gano? Agamba-gambra namba ewikeeno ewiwiiwi na amaani no owukire nawuno wiafuma ku awantu.”

³⁷Kandi amang’ana aga ewintu ewia yakolanga wino gaailanzia gatuuka asi-uasi mu ewialo ewiri ampi ao.

Yesu alamiizie awantu awangi

(Math 8:14–17; Mari 1:29–34)

³⁸Yesu yaema mu esinagoogi agia ku omugizi ogwa Simioni. Kwatuukra ni maaziala Simioni agona ku ekitanda no omuwiri guri omuyu le, alwala. Awalonzi waae waamusawa mbwe amutunzie.

³⁹Yesu yagia amuimerrako ampi mala asiagizia owulwire owuo kandi wumureka. Ku enyinga ezio, yalama mala aema atanika okuwa-aa okuria.

⁴⁰Kutio iguulo, ne enyanga yawanga ne egia okugwamo, awantu woona awaawanga na awalwire awaalwalanga amalwire agagawuke-gawuuke waawareeta ku Yesu, kandi yata amakono gaae ku omuntu ki omuntu na awalamia.

⁴¹Ewikeeno wiona wiafuma ku awantu awangi ni wikuula witino, “Iwue ni iwue Omuzia owa Katonda!” Ni iye yawisarigizia, kandi ngakawiganyira okugamba-gamba aeniki wiawanga ni wimanyire mbwe yawanga Kristo.

Yesu alanzia amang’ana amalootu Galiili

(Math 4:23–25; Mari 1:35–39)

⁴²Kunkio ku amagambaazi, Yesu yafuma agia asi andi aa akawa omwene. Awantu waamuagala, kandi olwa waamutuukako ngawakaagalanga mbwe afume awareke.

⁴³Ni iye yawalaga otino, “Paka ndanzie amang’ana amalootu aga Owuami owua Katonda mu emigizi gindi giona, aeniki ekio nikio ekiagera ni ntumwa.”

⁴⁴Kutio yagia emberu okulanzia mu amasinagoogi agari mu ekialo ekia Awayaudi.

Luuka 5

Amankono aga okuamba emvwa enyingi

- ¹Owuire wulala, Yesu yawanga na aimeriire ku ensanyaata eya enyanza eya Genezereeti, na awantu wamuikumiizieko kandi wawurra amang'ana aga Katonda.
- ²Yawona amaato awiri ni garekerwe ku ensanyaata ao, na awavuwi aweene waaenzianga engoe ziwu.
- ³Yaingira mu owuato owulala owua Simioni (owa eriina riae rindi riawanga Petro), kandi yamusawa mbwe asindike owuato mu amanzi ampi ni ku ekialo. Nikuema, yaikala mu owuato kandi yatanika okugerera omurima ogwa awantu na aikaale omwo.
- ⁴Olwa Yesu yamala okugamba-gamba na awantu, yalaga Simioni otino, "Musiwazie owuato mugie ewuziwa mugie mutege engoe ziinyu ziambe emvwa."
- ⁵Simioni yamuirania otino, "Omwami, tumiire okukola emirimo emikalu owuire owulamba ni ngatuka-amba emvwa. Ni aeniki ni iwue owoorre otio, ngia okutega engoe."
- ⁶Olwa waakola watio, wa-amba emvwa enyingi ino aa engoe ziatanika okutanduka.
- ⁷Kutio, waaeta awiina waawu awaawanga mu owuato wundi waaze wawatunzie. Olwa waaza, waaizuzia amaato awiri ago ne emvwa du nawuno gawona okuniwa.
- ⁸Olwa Simioni Petro yawona ekiaikola kino, yagwa mu amasigamo gaae emberu wa Yesu na amulaga otino, "Nyemeeko, ogia ale ni inze Omwami. Ndi omuntu omwoni!"
- ⁹Iye alala na awantu awa yawanga nawo gaawa-amba eminwa olwa waawona emvwa enyingi ezia wa-ambre,
- ¹⁰kandi nintio lwona awiina waae, Yakoobo ni Yowaana, awazia awa Zebeedi, wona gaawa-amba eminwa. Nikuema Yesu yalaga Simioni otino, "Otatia, okuamera reero ooza okuwa omuvuwi owa awantu no owareeta okundonda."
- ¹¹Kutio, waakulula amaato gaawu ku ekialo kandi wareka ewintu wiona wamulonda.

Yesu alamiizie omuntu owa owugenge

(Math 8:1–4; Mari 1:40–45)

- ¹²Ni Yesu yawanga na ari ku omugizi gundi, omuntu olwala owulwire owua owugengeyaaza, kandi olwa yawona Yesu yamwifunamra na amuiyemba otino, "Omwami, nkusawa mbwe no oganyire, oesa okunyeruyia mbe omweru."
- ¹³Yesu yagolola okukono kwae amuamba, nikuema amulaga otino, "Ee, nganyire. Wa omulamu!" Ku enyinga ezio owugenge owuamuwuako.

¹⁴Nikuemao Yesu yamusikirra mbwe, “Otalaga omuntu ekintu ekikuikoriire kino, ni gia oilagane ku omuoza kandi ofumie omusango ogwa Muusa yasikirra awantu awalamre ku owugenge, kiwe ekilago ku awantu woona mbwe olamre.”

¹⁵Kukawa mbwe yamugaania mbwe atalaga awantu amang’ana gae ago, ni gaailanzia kuwungi okukira, kandi omurima ogwa awantu gwazanga okutegerezia Yesu no okulamiwua ku amalwire gaawu.

¹⁶Ni kangi Yesu yawaemangako okugia okuwa omwene mu ekeewa na asawa.

Yesu ari na amaani aga okurekera awantu amawi

(Math 9:1–8; Mari 2:1–12)

¹⁷Owuire wulala ni Yesu yawanga na agerera, Awafarisaayo na awagerezi awa endagirra awaaemanga mu ewitemo wiona ewia Galiili, na awaaemanga Yudeea ni Yerusaleemu, waaza waikala ao. Amaani aga Omwami Katonda gaawanga ao aga okulamia awalwire.

¹⁸Awantu wandi waaza ni wagingre omulwire owa omuwiri gufwire eng’anzi ku iseero kandi waagalanga mbwe waingire mu enyumba wamute emberu owa Yesu.

¹⁹Ni ngawakatuukra engira eya okuingira mu enyumba aeniki awantu waawanga ni waizuule enyumba du okutuuka ku ekiriango. Kutio, waaniina kungulu ku olusala walutagula kandi wamuisia mu enyumba agati ya awantu emberu wa Yesu na agonere ku iseero.

²⁰Olwa Yesu yawona okuganya okwa waawanga nakwo, yawoola otino, “Omuzia, amawi gao orekeerwe.”

²¹Awafarisaayo na awagerezi awa endagirra waatanika okuiwuuzia watino, “Ono naanu oifwanania ni Katonda ono? Naanu oesa okurekera awantu owuoni ogawuuke ni Katonda omwene?”

²²Yesu yamanya ekia waaiwuuzianga kandi yawairania otino, “Ekigera ni muiwuuzia ku amang’ana gano mu emioyo giinyu niki?”

²³Ekiwuuwu okukola niki, okuwoola mbwe ‘Amawi gao orekeerwe,’ nakuwa okuwoola mbwe ‘Ema ogende-gende’?

²⁴Ni kugere mumanye mbwe Omuzia owa Omuntu ari na amaani aga okurekera awantu amawi ku ekialo kuno...” yalaga omuntu owa omuwiri gwafwa eng’anzi oyo otino, “Nkulaga mbwe ema otoole iseero riao ogie engo.”

²⁵Mu enyinga ezio yaimerra emberu waawu, atoola ekintu ekia yawanga na agonereko, afuma agia engo na atondowola Katonda.

²⁶Awantu woona waaluguula ino kandi waatondowola Katonda. Owuti wuawa-amba kandi waawoola watino, “Reero tuwuine ewintu ewikate-kaate ewiluguulwa!”

Yesu yaaza okueta awooni

(Math 9:9–13; Mari 2:13–17)

²⁷Nikuemao Yesu yafuma okugia kandi ni yagianga yawona omusolozzi owa omusolo oetwa mbwe Laawi na aikaale mu enyumba omwa awantu waafumiangamo omusolo. Yesu yalaga omuntu oyo mbwe, “Ndonde.”

²⁸Laawi yaema areka ewintu wiona atanika okumulonda.

²⁹Nikuemao Laawi yakorra Yesu owugeni owunene mu enyumba yaae, kandi omurima ogwa awasolozzi awa omusolo na awantu wandi waaria nawo alala.

³⁰Awafarisaayo na awagerezi awa endagirra awaawanga ao waasoozia awalonzi awa Yesu watino, “Ekigera ni muria kandi munywa na awasolozzi awa omusolo na ‘awooni’ niki?”

³¹Yesu yawairania otino, “Awiifu kane awalwire, nganiwo awaagala omurezi? Awalamu iwo waagarraki omurezi?”

³²Inze ng’anyakaaza okueta awantu awigolovu, ni nyaazra awooni kugere wagaluke wareke owuoni.”

Engerera eya Yesu egawuuke ne eya Awafarisaayo

(Math 9:14–17; Mari 2:18–22)

³³Awantu wandi waalaga Yesu watino, “Awalonzi awa Yowaana kangu wasiwa okuria ni wasawa, namba awalonzi awa Awafarisaayo wona wakola watio, ni iwue awaawo waria kandi wanywa-unywa.”

³⁴Yesu yawawuuzia otino, “Awageni awa owugeni owua enserezi wakasiwa okuria otie ni ng’ina enserezi akiari nawo?”

³⁵Amiire gaaza aga ng’ina enserezi oyo aaza okutoolwao awaemeko, nikwo warisiwa okuria.”

³⁶Yawalaga olugero luno: “Awulao omuntu otoola ekiraka ku enguwo empia kandi yakinawa ku enguwo enkiire. Ni na akorre otio, aaza okutandula enguwo empia eyo, ni kandi ekiraka ekiyia ekio ngakiiiza okuambana geeza ne enguwo enkiire eyo.

³⁷Lwona, awulao oesa okuta edivaai empia mu ekimuga ekia edivaai ekia iseero ikulu. Ni na akorre otio, edivaai eyo eeza okuzimbua iseero erio ritanduke kandi edivaai eene efugike, kandi ekimuga ekia iseero ekio kioneke.

³⁸Kutio edivaai empia paka eteewue mu ekimuga ekia iseero iyia.

³⁹Lwona, omuntu omiire okunala mu enkola enkulu ngagala okugaluka ku enkola empia, aeniki awona mbwe enkola ziae enkulu ezio ziri endootu.”

Luuka 6

Yesu nio Omwami owa Sabato

(Math 12:1–8; Mari 2:23–28)

¹Owuire wulala olwa Sabato, Yesu yawitanga mu emisiri egia engaano. Awalonzi waae waatanika okuiya ewigala ewia engaano, ni wazikunya-kunya mu amakono gaawu ni waria.

²Na Awafarisaayo wandi waawawuuzia watino, “Muiya ewigala ewia engaano olwa Sabato kolaki, ne endagirra iifu ngetuganyiire okukola otio?”

³Yesu yawairania otino, “Inywe mukiari okusoma ekia Omwami Daudi yakola olwa iye alala na awantu awayawanga nawo waawurranga enzala?”

⁴Yagia mu enyumba eya Katonda aeewua emikaati egitengeekwe emberu wa Katonda aria. Emikaati egia endagirra etaganyiire omuntu-umuntu okuria mala awoozia weng’ene, kandi yaesania egindi ku awantu awaawanga nae wagiria.”

⁵Yesu yamariizia na awalaga otino, “Omuzia owa Omuntu nio Omwami owa Sabato.”

Yesu alamiizie omurema olwa Sabato

(Math 12:9–14; Mari 3:1–6)

⁶Owuire wundi olwa Sabato, Yesu yaingira mu esinagoogi atanika okugerera. Omwo yawangao omuntu owa okukono kwae okusaaza kwaremera.

⁷Awafarisaayo na awagerezi awa endagirra waagalanga ekintu ekia wakamuingirra nakio mbwe aonre Sabato.

⁸Ni Yesu yamanya ekia waingirizianga, kutio yalaga omuntu owa okukono kwaremera oyo otino, “Iza oimerre emberu ano.” Omuntu oyo yaema kandi aimerra ao.

⁹Nikuemao Yesu yawalaga otino, “Mbawuuzia, niki ekia endagirra iifu etuganyiire okukola olwa Sabato? Okukola geeza nakuwa okukola owuwiiwi? Okutunzia owulamu owua omuntu nakuwa okuwuona?”

¹⁰Yawawarra wona awasunguuzia nikwo amulaga otino, “Golola okukono kwao.” Yakola otio kandi okukono okwo kwairana kuwa okulamu ng’ese.

¹¹Okusu kwa-amba Awafarisaayo na awagerezi awa endagirra ino, okwagera watanika okugamba-gamba agati yaawu ku ekia wakakorra Yesu.

Yesu alowoole awatumwa ikumi ni wawiri

(Math 10:1–4; Mari 3:13–19)

¹²Mu amiire ago, Yesu yafuma agia mu ekigiri okusawa, kandi yawa eyo owuire owulamba na asawa Katonda nawuno wukia.

¹³Ni wuakia, yaeta awalonzi waae kandi alowola awantu ikumi ni wawiri agati yaawu, awa yaeta mbwe awatumwa waae.

¹⁴Waawanga Simioni, owa yaluka mbwe Petro, Andereeya wamwawu Petro; Yakoobo, Yowaana, Piliipo, Batholomeo;

¹⁵Mathaayo, Thomaasi, Yakoobo omuzia owa Alfaayo, Simioni, owaetwanga Omuzalooti,

¹⁶Yudaasi omuzia owa Yakoobo, ni Yudaasi Iskarioti, owawa omuguzi owa Yesu.

Yesu alamiizie kandi agereere awantu awangi

¹⁷Yaika nawo agia aimerra mu ekiriwo. Omurima ogwa awalonzi waae waawanga ao alala na awantu awangi owuluku awaaema mu ewialo wiona ewia Yudeea ni Yerusaleemu na awaema mu ewialo ewia Taaya ni Sidooni ewiri ku omwalo ogwa Galiili, waaza okumutegerezia no okulamiwua ku amalwire gaawu.

¹⁸Awantu awa ewikeeno wianyaasianga, waalamiwua.

¹⁹Awantu wona waagalanga mbwe wamuambeko, aeniki amaani gaamuemangako ni galamia awalwire wona.

Awasereekwe na awatasereekwe

(Math 5:1–12)

²⁰Yesu yawarra awalonzi waae nikwo awalaga otino, “Musereekwe inywe awamanyire mbwe muri awataka awa ensereki ezia mu omwoyo, aeniki Owuami owua Katonda wuri owuinyu.

²¹Musereekwe inywe awari ne enzala nyingeeno, aeniki muuza okuigusiwua. Musereekwe inywe awarra nyingeeno, aeniki muuza okuseka.

²²Musereekwe inywe na awantu wawarega, ni wawalowa kandi ni wawanyega, ni waona amiina giinyu, ku olugonzi olwa mugonziizie nalwo Omuzia owa Omuntu.

²³“Musangaale kandi muomererwe, aeniki omugawo ogwa muwiikiirwe ku igulu guri omukaate. Aeniki, nintio waaguukwa waawu waakorra awagambi awakulu.

²⁴“Ni, muri owuwiiwi inywe awanyazi, aeniki mumiire okutuukra owulootu wuinyu.

²⁵Muri owuwiiwi inywe awaiguta ku enyingeeno, aeniki muriongera enzala. Muri owuwiiwi inywe awaseka ku enyinga zino aeniki muuza okurira na amaziga garerenga.

²⁶Muri owuwiiwi inywe awa awantu wagamba-gambako geeza, aeniki nintio lwona waaguukwa waawu waakorra awagambi awa owuweeyi.

Okuoloola owuoni ku owuoni kuganiziiwue

(Math 5:38–48)

²⁷“Ni mbalaga inywe awantegerezia, mbwe mugonzie awazigu wiinyu, mukorre awawarega geeza.

²⁸Musereke awantu awawafuuwa, kandi musawire awantu awawakorra ewintu ewiwiiwi.

- ²⁹No omuntu akukubre oluyu oluwega olulala, mugalusizie oluwega lundi lwona akube. No omuntu atoorre ikooti riao, otamulowera okutoola esaati yaa yooona.
- ³⁰Omuntu-umuntu okusawire ekintu mu-ee, kandi no omuntu atoorre ekintu kiao otamunigirizia akuiranizie.
- ³¹Kandi korra awandi ewia okaagala mbwe woona wakukorre.
- ³²“Iwue no ogonziizie mala awakugonziizie weng’ene, ao otio ekia okakaserekrwa niki? Aeniki namba ‘awooni’ woona wakola watio.
- ³³Kandi no okola geeza mala ku awantu awakukorra geeza, ao ekia okaserekrwa niki? Aeniki namba ‘awooni’ woona wakola watio.
- ³⁴Iwue no ozia mala awantu awaesa waakuiranizia, ao ekia okaserekerwa niki? Namba ‘awooni’ woona waozia ‘awooni’ awiina waawu ni warindirra okuiraniziwua.
- ³⁵Ni, mugonzie awazigu wiinyu, muwakorre geeza, kandi muwaozie ni mutawariire mbwe waaza okuwairanizia. Nikuemaomugawo gwinyu guuza okuwa omunene, kandi muuza okuwa awaana awa Katonda omunene, aeniki Katonda ari omusiza na awatairania otioo, na awa endandulu.
- ³⁶Muwe na amasaasra kiomo Soinyu ari na amasaasra.

Okukengera awandi ekiina kuganiziiwue

(Math 7:1–5)

- ³⁷“Otakengera owundi ekiina, kugere iwue oona otakengerwa ekiina. Otata owuoni ku omuntu nikwo iwue oona ngoriteewuako owuoni. Rekerwa awandi amawi gaawu nikwo iwue oona orirekerwa amawi gaao.
- ³⁸Ezania ku awandi nikwo iwue oona ooza okueewua, mu omurengo omulootu, uguigatiirwe kandi uguizuule gwasawaala, ooza okuteerwa mu amakono. Aeniki omurengo ogwa orenga nagwo, nigwo iwue oona ooza okurengerwa nagwo.”
- ³⁹Lwona yawalaga olugero otino, “Omuntu omuwuunu aesa otie okukangatra omuwuunu omwina waae? Woona ngawaaza okugwa mu owuina?”
- ⁴⁰Omuntu oigerera ngakira omugerezi waae, no omuntu-umuntu na agereerwe nawuno ainogerezie geeza, aesa okuwa ki omugerezi waae.
- ⁴¹Iwue niki ekigera no owarra akantu akatono akari mu eriiso eria omwina waa, no oguntu ogunene oguri mu eriiso riao omwene ngagukunyaasia?”
- ⁴²Oesa otie okulaga omwina waa mbwe, ‘Wamwifu, reka nkutoorroo akaatu akari mu eriiso riao,’ ni iwue omwene ngowona oguntu ogunene oguri mu eriiso riao? Iwue omuntu oisemerezia ono, sooka otooleo oguntu ogunene gueme mu eriiso riao, nikwo ooza okuwona geeza, kandi oese okutoolao akaatu akatono mu eriiso eria omwina waa.

Omuti gumanywa ne ensaafu ziafwo

(Math 7:16–18; 12:34b–35)

⁴³“Guwulao omuti omulootu oguama ensaafu embiwi, kandi guwulao omuti omuwiiwi oguama ensaafu endootu.

⁴⁴Kutio omuti ki omuti gumanywa ne ensaafu ziangwo. Ensaafu ezia emikuyu ngaziesa okunogwa okuema ku emiti egia amawua, nakuwa emizabiibu okuema ku omunyenya.

⁴⁵Omuntu omulootu afumia mala ewintu ewilootu okuema ku owulootu owuri mu omwoyo gwa, kandi omuntu omuwiiwi afumia mala ewintu ewiwiiwi okuema ku owuwi owuri mu omwoyo gwa. Aeniki ewintu ewia omunwa guwoola wiema mala ku ewiizuule omwoyo ogwa omuntu.

Omuomboki omumaya no omuomboki omuganga

(Math 7:24–27)

⁴⁶“Ekigera ni munyeta mbwe ‘Omwami, Omwami,’ ni ngamukola ewia mbalaga niki?

⁴⁷Nyiza okuwalaga kiomo omuntu onyizreko, owurra amang’ana gange kandi yakola nago, afwanana.

⁴⁸Afwanana no omuntu owa na aomboka enyumba, a-aawa na agia muni nawuno owulusa wuatuuka ku iwaale. Olwa omugera gwaza kandi amanzi gaika, gaikuba ku enyumba eyo, enyumba ngekazegera, aeniki yawanga ne eombookwe wukalu.

⁴⁹No omuntu owurra amang’ana gange ni yareka okukola nago afwanana no omuntu owaomboka enyumba ku ilowa na ataawre owulusa. Olwa amanzi gaaika, gaikuba ku enyumba eyo, yagwa ansi boo, mala eoneka chee.”

Luuka 7

Okuganya okwa omukangasi owa awa-iiye owa Awaruumi

(Math 8:5–13)

¹Olwa Yesu yamala okuwoola amang’ana gaa goona na awantu wamutegerezia, yaingira ku omugizi ogwa Kapernaumu.

²Omwo, yawangao omukangasi owa awa-iiye owa Awaruumi owa owemirimo waae owa yawanga na agonziizie ino yalwalanga ampi okufwa.

³Olwa omukangasi oyo yawurra mbwe Yesu ari ao, yatuma awagaaka Awayaudi okugia okumusawa mbwe aaze alامية owemirimo waae.

⁴Olwa waatuuka ku Yesu, waamuisasaama ni wawoola watino, “Omuntu ono osugaane omukorre geeza,

⁵aeniki agonziizie awiifu kandi yatuombokiire esinagoogi.”

⁶Kutio, Yesu yagia nawo. Olwa Yesu yatuuka ampi ne enyumba, omukangasi oyo yatuma awiiko waae wamulage watino, “Omwami, otainyaasia okuuzza ano, aeniki ng’ansugre iwue okuingira mu enyumba yange.

⁷Ekio niki ekigera ni nyawona mbwe ntakuuzako omwene. Ni woola-uwoola ing’ana, kandi owemirimo wange aaza okuwa omulamu.

⁸Inze omwene ndi omuntu ori ansi eya awandi, ni noona ndi na awa-iiye awakola ansi yange. Ni ndagre omulala mbwe, ‘Gia,’ agia kandi owundi mbwe ‘Iza ano,’ aaza-uuzza. Ndaga omukurumu wange mbwe, ‘Kola kino,’ kandi yakikola.”

⁹Olwa Yesu yawurra amang’ana gano, yaomererwa ino nae, kandi yagaluka awarra omurima ogwa awantu awaamulondanga awalaga otino, “Mbalaga mbwe namba mu ekialo ekia Israeli ano, okuamera ri nkiari okutuukrako omuntu namba omulala, ori no okuganya okunene kutino.”

¹⁰Nikuemao awantu awaatumwa waria waairana mu enyumba watuukra no owemirimo oyo amiire okulama.

Yesu aziusie omuzia owa omukazi omufwire

¹¹Enkio walwo, Yesu yagia ku omugizi oguetwa mbwe Naini, kandi omurima ogwa awantu alala na awalonzi waae waagia nae.

¹²Ni yatuuka ampi ne ekikulo ekia omugizi ogwo, ya-agaana awantu ni wagingre ekitundu ekia omufu ni wafuma nakio enze eya omugizi. Omufu oyo yawanga omuzia omulala eng’ene owa omukazi omufwire kandi awantu awangi awa ku omugizi ogwo waawanga no omukazi oyo.

¹³Olwa Omwami yamuwona, yamuambra amasaasra mu omwoyo mala amulaga otino, “Reka okurra.”

¹⁴Nikuemao yagia ampi a-amba iseero eringingrweko omufu oyo kandi awaawanga ni wamugingre waaimerra. Yawoola otino, “Omuwuuka ono, emaa!”

¹⁵Omufu oyo yaema aikala kandi atanika okugamba-gamba, kandi Yesu yamuiranzia ng’ina.

¹⁶Owuti owungi owuluguulwa wua-amba awantu awo ino kandi waatondowola Katonda ni wawoola watino, “Omugambi omunene afumre agati iifu. Katonda omwene amiire okuuzza okutunzia awantu waae.”

¹⁷Amang’ana agaaikola gano gaailanzia mu ewialo wiona ewia Yudeea ne ewialo windi ewiri ampi ao.

Yowaana Omubatiisi awuuzia ni Yesu ari Meesia

(Math 11:1–6)

¹⁸Awalonzi awa Yowaana Omubatiisi waamulaga ewintu ewiaikola wina wiona.

¹⁹Yaeta awawiri ku iwo awatuma ku Omwami Yesu, wagie wamuwuuzie watino, “Ni iwue omuntu owasugananga aaze, kusi tusugaane turindirre owundi?”

²⁰Olwa awantu wano waatuuka ku Yesu, waamulaga watino, “Yowaana Omubatiisi atutumre kugere tukuwuzie otino, ‘Ni iwue omuntu owasugananga aaze, kusi tusugaane turindirre owundi?’ ”

²¹Mu enyinga ezio, Yesu yalamia awantu awangi ku amalwire gaawu, awaawanga awatekere, awaawanga ne ewikeeno kandi yaigulao amiiso aga awantu awangi awaawanga awawuunu.

²²Nikuemao yawairania otino, “Mugie mulage Yowaana ewintu ewia muwuine ne ewia muwuriire: Awawuunu wawona, awarema wagenda-genda, awa owugenge walamiwua, awa amatwi amaziwu wawurra, awafu waziusiwua, kandi amang’ana amalootu galanziziwua awataka.

²³Omuntu otairana enyima ku amang’ana gange asereekwe.”

Yesu agamba-gamba ku Yowaana

(Math 11:7–11)

²⁴Olwa awatumwa awa Yowaana waamala okufuma wagia, Yesu yatanika okugamba-gambra omurima ogwa awantu ogwo ku Yowaana otino, “Olwa mwagia ku Yowaana mu ekeewa, ekia mwagia okuwona niki? Kusi ekituutu ekiyunziwua-yunziwua no omuyaga?

²⁵Ni kutari kutio, ekia mwagia enze eyo okuwona niki? Omuntu oingiizie enguwo endootu? Yawa! Awantu awaingizia enguwo endootu-ndootu kandi awamenyere owulamu owua kungulu, waituukrana mu amayumba aga awaami.

²⁶Ekia mwagia enze eyo okuwona katio niki? Omugambi? Ee, omugambi kandi mbalaga mbwe akirre omugambi no okukira.

²⁷Ono nio omuntu owajojwako kale mbwe, “ ‘Wona, nyiza okutuma omutumwa wange emberu waa, orikangata emberu waa akugolorre engira.’ ”

²⁸Mbalaga kuwuene mbwe ku awantu wona awa awakazi waiwuule, awulaoko namba omulala omiire okuwaa okira Yowaana. Kukawa kutio, omuntu omutono otuukre mu Owuami owua Katonda amukirre.”

²⁹Awantu wona namba awasolozu awa omusolo awaawurra okulanzia kwae, waaganya mbwe okwo nikwo okwawanga engira eya Katonda eri kuwuene, aeniki wona waabasiitwa ni Yowaana.

Yowaana ni Yesu walowerwe

(Math 11:12–19)

³⁰Na Awafarisaayo na awagerezi awa endagirra, iwo waalowa okuagala okwa Katonda mu owulamu wuawu, ku okulowa okubatiiswa ni Yowaana.

³¹“Awantu awa ikula rino nyesa okuwafwanania naki katio?

³²Wafwana awaana awaikaale mu ekiiya awaogerera ni waeta awaana awiina waawu watino, “ Twawakubra ekituutu, ni ngamukazina; Twawaembera olwembo olwa olumbe, ni ngamukarra.’

³³Yowaana Omubatiisi, iye ngakaweerao na aria kandi na anywa. Kino kiagera ni muwoola mbwe, ‘Omuntu ono ari ne ekikeeno!’

³⁴No Omuzia owa Omuntu iye aria kandi anywa, kandi okwo kugera ni muwoola mbwe, ‘Omuntu ono agonziizie okuria kandi ari omunyiwi. Lwona ari omwiko owa awasolozzi awa omusolo na awooni.’

³⁵No owuganga wulaganwa mu enkola.”

Orekeerwe owuoni owungi awa no olugonzi olungi

³⁶Omufarisaayo wundi yaeta Yesu owugeni okuria nae okuria okwa igulo. Kutio Yesu yagia mu enyumba yaae okuria.

³⁷Omukazi wundi owa ku omugizi ogwo, owawanga na amenyere owulamu owua owuoni, olwa yawurra mbwe Yesu aria omwa Omufarisaayo oyo, yareeta amavuta agawunya esaami mu ichupa eria alabasta.

³⁸Yagia aimerra emugongo nyamagulu aga Yesu owawanga na aigoloole na aria ku emeesa. Yarra amaziga ni gaika, kandi yatanika okuwaka amagulu aga Yesu na amaziga ago, na agaeeya ne emvwiri ezia ku omutwe gwae. Yamunuuna amagulu na amu-aa owuti kandi yagawaka na amavuta ago.

³⁹Olwa Omufarisaayo owamueta owugeni yawona ekiaikola kino, yawoola mu omwoyo gwae otino, “Kuweeko mbwe omuntu ono ari omugambi, akamanyire omukazi omuambreko ono, lwona akamanyire mbwe omukazi ono ari omwoni.”

⁴⁰Yesu yamuirania otino, “Simioni, kirio ekintu ekia nyagala okukulaga.” Simioni yamuirania otino, “Woola, omugerezi.”

⁴¹Yesu yatanika otino, “Awantu wawiri waawanga no omusango ogwa omuntu oozia awantu amasendi. Omulala yawanga no omusango ogwa edinaari mia witaanu no owundi ogwa edinaari amakumi ataanu.

⁴²Woonna wawiri waawulanga na amasendi agasuga aga wakamuoloola nago omusango ogwo. Kutio omwene amasendi yawarekera emisango egio. Naanu agati ya awawiri wano ooza okumugonzia ino okukira owundi?”

⁴³Simioni yairania otino, “Mbona mbwe no omuntu owarekerwa omusango omunene oria.” Yesu yamuirania otino, “Owoorre kuwene.”

⁴⁴Nikuemao, yagaluka awarra omukazi oyo nikwo alaga Simioni otino, “Owona omukazi ono? Nyizre mu enyumba yaa muno, ni ngokampa amanzi aga okuoza amagulu, ni iye anyoziizie amagulu na amaziga gaae kandi agaeeya ne emvwiri ziae.

⁴⁵Ngokankeezia na amakeezio aga olugonzi, no omukazi ono amiire okuwa na anuuna amagulu gange na ampa owuti okuemera nyingiire ano.

⁴⁶Ngokambaka amavuta ku omutwe, ni iye amiire okuwaka amagulu gange na amavuta agawunya esaami.

⁴⁷Kutio, nkulaga mbwe amiire okurekerwa owuoni wuae owungi, aeniki angonziizie owungi. Omuntu orekeerwe amatono, oona olugonzi lwae lutono.”

⁴⁸Nikuemao Yesu yalaga omukazi oyo otino, “Amawi gaao orekeerwe.”

⁴⁹Awageni wandi waatanika okung’ong’oona agati yaawu ni wawoola watino, “Ono no omuntuki ono, orekera awantu namba amawi gaawu?”

⁵⁰Yesu yalaga omukazi oyo otino, “Okuganya kwao kukununuule mu amawi, gia no owuolu.”

Luuka 8

Awakazi awaagenda-genda ni Yesu

¹Lunyima, Yesu yagia na awita mu emigizi eminene ne ewitemo wiona na alanzia amang’ana amalootu aga Owuami owua Katonda. Awalonzi waae ikumi ni wawiri waagia nae,

²alala na awakazi wandi awaalamiwua okuema ku ewikeeno na amalwire. Waawanga Maaria, omwala owa Eumagidaala owafumiziwuako ewikeeno musamvu,

³Yoani muka Chuuza owawanga omukangasi owa enyumba eya Eroode, Susaana, na awandi awangi. Awakazi wano waawanga ni wawariisia kandi ni wawarindre mala ne ewintu ewiawu aweene.

Olugero olwa omurimi owagia okumwa emwo

(Math 13:1–9; Mari 4:1–9)

⁴Owuire wundi awantu awangi, awaema mu emigizi egigawuke-gawuuke, waaikumia alala wagia ku Yesu kandi yawalaga mu olugero otino,

⁵“Omurimi yagia okumwa emwo yaae. Ni yamwanga, emwo indi yagwa ku engira, etazwa-tazwa kandi enyonyi ezia ku omuyaga ziaza zigiria chwe.

⁶Emwo indi yagwa ku olutare, kandi olwa yameranga, yakala aeniki amanzi gaawulanga mu ilowa.

⁷Ne emwo indi yagwa mu amawua, kandi amawua ago gaakoma nayo gaxisindigania mala ereka okukoma geeza.

⁸Ne emwo indi yagwa mu ilowa ilootu kandi yakoma geeza elawa emere enyingi, entunda mia kilala okukira eyamwewua.” Olwa yawoola amang’ana gano, yawasiagia otino, “Omuntu ori na amatwi aga okuwurra, ka-awurre!”

Awalonzi awa Yesu wasanukuriirwe amang’ana agaiwisre

(Math 13:10–17; Mari 4:10–12)

⁹Awalonzi waae waamuwuuzia ekia olugero olwo lulagana.

¹⁰Yesu yawalaga otino, “Inywe ni inywe awaerwe okumanya owueru owua ewintu ewiiwisre ewia Owuami owua Katonda. Ni ku awandi walagwa mu engero kugere, “ ‘kukawa mbwe wawarra, ni watawona, kandi kukawa mbwe wategerezia, ni watawurra.’

Ekia olugero olwa emwo eyamwewua lulagana

(Math 13:18–23; Mari 4:13–20)

¹¹“Kino niki ekia olugero luno lulagana. Emwo na amang’ana aga Katonda.

¹²Engira eya emwo yagwako eimeriire awantu awawurra amang’ana, ne Ekikeeno kiiza kiawanyaga amang’ana ago okuema mu emioyo giawu, kugere wataganya nago kandi wanunulwe.

¹³No olutare olwa emwo yagwako luimeriire awantu awa ni wawuriire amang’ana wagaingizia no owusangaavu. Ni wawula ne emizi, kutio wagaganyako ku amiire amatono, kandi enyinga ezia wageezaniwua, wagareka wairana enyima.

¹⁴Amawua aga emwo yagwamo gaimeriire awantu awawurra amang’ana, no okuingirizia okwa owulamu, ensemerezanio eya owunyazi alala ne ewisangaalo ewia ekialo, wisindigania amang’ana ago kandi ensaafu ziareka okutuuka.

¹⁵Ilowa ilootu eria emwo yagwamo, ri-imeriire awantu awawurra amang’ana aga Katonda kandi waga-ambirra wukalu mu emioyo emilootu kandi egiri no okuwurra, wawa nago nawuno ensaafu ziatuuka.

Kola no okumanya okwa ori nakwo

(Mari 4:21–25)

¹⁶“Awulao omuntu oka-ambia ekimuri kandi yakifunikira ne ekidida nakuwa yakiwisa mu enkuriri. Ni, akita ku emesa kugere awantu awaingira omwae wawone owueru owuo.

¹⁷Aeniki kiwulao ekintu ekiiwisre ekitarifuma kiwoneke, lwona kiwulao ekintu ekiiwisre mu omwoyo ekitarimanyika, namba ekitarireetwa ku owueru.

¹⁸Kutio muwarre geeza ku amang’ana aga muwurra. Aeniki, omuntu okola geeza ne ekia aegeekwe nio orisongwa. No omuntu otakola geeza ne ekia aegeekwe aaza okunyagulwa namba ekitono ekia yaegekwa.”

Ng’inwawu Yesu ni waamwawu Yesu awa kuwuene

(Math 12:46–50; Mari 3:31–35)

¹⁹Nikuemao ng’inwawu Yesu ni waamwawu waae awekizia waaza ku iye, ni ngawakaesanga okumutuukako aeniki omurima ogwa awantu waawanga ni wamuikumreko.

²⁰Omuntu wundi yamulaga otino, “Ng’inwao ni waamwinyu awekizia wari enze waagala okukuwona.”

²¹Ni Yesu yawairania otino, “Awantu awawurra amang’ana aga Katonda kandi waagalonda, niwo ng’inoifu ni waamwifu awekizia.”

Yesu aorezia omuyaga na amasiira

(Math 8:23–27; Mari 4:35–41)

²²Owuire wulala, Yesu yalaga awalonzi waae otino, “Tuambuke tugie engereka indi eya enyanza.” Kutio waaingira mu owuato wasiawala.

²³Ni waawungukanga, endoolo zaira Yesu. Omuyaga omuzito gwatemuka mu enyanza kandi owuato wuatanika okuizula na amanzi. Kutio waawanga mu eminyako-nyaako eminene aeniki owuato wuagalanga okuniwa.

²⁴Awalonzi waae waagia wamulamusia ni wawoola watino, “Omwami, Omwami, tufwa amanzi!” Yesu yaema kandi asikirra omuyaga na amasiira amakate-kaate ago kandi omuyaga ogwo gwaoreera kandi enyanza egwiriira ekitene.

²⁵Nikuemao yawawuuzia otino, “Okuganya kwinyu kuri?” Waawanga no owuti kandi waaluguula ni waiwuuzia aweene mbwe, “Ono no omuntuki ono, osikirra namba emiyaga na amasiira kandi gamuwurra?”

Yesu alamiizie omuntu ori ne ewikeeno

(Math 8:28–34; Mari 5:1–20)

²⁶Waawunguka nawuno watuuka mu ekialo ekia Geraasi eri oluwega lundi olwa enyanza no oema Galiili.

²⁷Ni Yesu yafuma mu owuato ataza ku ekialo, omuntu ori ne ewikeeno owaemanga ku omugizi ogwa ao yamuaganra. Ku amiire amangi, omuntu ono yawanga na akiari okuiwoya enguwo nakuwa okumenya mu enyumba, ni yawanga na amenyere mu ewiwaga.

²⁸Olwa yawona Yesu, yarra wukalu kandi akuba amasigamo emberi waae, nikwo awoola no omwoyo oguri kungulu otino, “Onyagalakooki Yesu Omuzia owa Katonda omunene okukira? Nkuiyembere, otammala!”

²⁹Okwo kwatuukra ni Yesu amiire okusiagizia ekikeeno ekiwiiwi ekio mbwe kifume kieme ku omuntu oyo. Kangi, ne ekikeeno ekio kiawanga ni kimuniinre, omuntu oyo yawutulanga eminyororo egia yasiwirwanga amakono na amagulu na aterwe asi eya owurinzi. Kandi ekikeeno ekio kiamuiranga mu ekeewa aa yaweranga omwene.

³⁰Nikuemao Yesu yamuwuuzia otino, “Eriina riao naanu?” Yamuirania mbwe, “Leejio,” aeniki ewikeeno ewingi wiawanga ni wimumenyere.

³¹Kandi wiaiyemba Yesu mbwe atawasikirra okuingira mu owuina owua olumbe.

³²Kuno kwatuukra no olwizo olwa enguruwe enyingi ziaaya ampi ao ku ekigiri. Kandi ewikeeno ewio wiaisasaama Yesu mbwe awiganyire wigie wi-ingire mu enguruwe ezio; kutio yawiganyira okukola otio.

³³Nikuemao, ewikeeno ewio wiafuma ku omuntu oyo wigia wi-ingira mu enguruwe ezio, kandi enguruwe ziona mu olwizo olwo ziagondoka ne ekibuusi zigia zigwa ku oluwanga, ziolomoka mu enyanza mala zifwa ziona.

³⁴Olwa awaayi awa enguruwe ezio waawona ekiaikola ekio, waarumuka wagia walaga awantu awa ku omugizi gwawu ni mu ekialo ekio.

³⁵Nikuemao awantu waafuma okugia okuwona ekintu ekiaikola ekio. Waatuuka ku Yesu kandi watuukra omuntu owa ewikeeno wiawanga ni wifumreko oyo na aikaale ansi mu amagulu aga Yesu, na aingiizie enguwo kandi omutwe gwae ni guri omulootu. Ekio kiagera owuti wuwa-amba ino.

³⁶Awantu awaawona ekintu kino waagia waalaga awantu kiomo omuntu owa ewikeeno wiawangako oyo yalamiziiwua.

³⁷Nikuemao, awantu woona awa mu ewitemo ewiri Geraasi waasawa Yesu mbwe awaemeko agie; aeniki owuti owungi wuwa-amba. Kutio Yesu yaingira mu owuato wasiawala ni wairana.

³⁸Omuntu owa ewikeeno wiawanga ni wifumreko oyo yaiyemba Yesu mbwe aganye agie nae. Ni Yesu yamulowera na amutuma otino,

³⁹“Irana engo, ogie owalage owulootu owua Katonda akukoriire.” Kutio, omuntu oyo yagia agenda-genda ku omugizi ogwo gwona na alaga awantu owulootu owua Yesu amukoriire.

Omwala owafwa aziuka, no omukazi omulwire owalama

(Math 9:18–26; Mari 5:21–43)

⁴⁰Olwa Yesu yairana, omurima ogwa awantu waamuaganra wamuingizia aeniki woona waamurindanga airane.

⁴¹Omuntu wundi owaetwanga mbwe Jairo, owawanga omukangasi owa esinagoogi, yaaza ku Yesu mala agwa mu amagulu gaae na amuiyemba mbwe wagie nae mu enyumba yaae,

⁴²aeniki omwala waae omulwala eng'ene owa emiaka ikumi ni iwiri yawanga omulwire ino ampi okufwa. Ni Yesu yawanga ku engira na agia, omurima ogwa awantu awangi waamusindiganiako embega ziona.

⁴³Yawangao omukazi wundi owa enda yawanga ne emiire okuwa ne esulula ku emiaka ikumi ni iwiri, na awulao omuntu owaesanga okumurera.

⁴⁴Yanyola agia nyamugongo ogwa Yesu a-amba enguwo yaae. Ku enyinga ezio, amasaai agaasululanga ago gaimerra kalala.

⁴⁵Yesu yawawuuzia otino, “Ompambre naanu?” Olwa awantu woona waalowa mbwe ngawakamuambako, Petro yamulaga otino, “Omwami, omurima guno gwona gukuisunguuzie kandi gukuisindiganieko.”

⁴⁶Ni Yesu yawoola otino, “Omuntu ampambre, aeniki mpuriire amaani ni gafuma ni gaanyemako.”

⁴⁷Olwa omukazi oyo yawona mbwe ngaesa okuiwisa areke okumanyika, yagia ku Yesu na adada kandi akuba amasigamo emberi waae. Nikuema yawoola na awantu woona wawurra ekiagera na amuambako, kandi kiomo alamre mala ku enyinga ezio.

⁴⁸Nikuema Yesu yamulaga otino, “Omwala wange, okuganya kwao kukulamiizie. Gia no owuolu.”

⁴⁹Ni Yesu yawanga na akiagamba-gamba, omuntu yaema mu enyumba eya Jairo aaza amulaga otino, “Omwala waa amiire okufwa. Katio otanyaasia Omugerezi wusaasa.”

⁵⁰No olwa Yesu yawurra eking’ana kino yalaga Jairo otino, “Otatia, ni wa-uwa no okuganaya, omwala waa aaza okuwa omulamu.”

⁵¹Olwa yatuuka ku enyumba, ngakaganyira awantu wandi okuingra nae, ni mala Petro, Yowaana ni Yakoobo, alala ni swawu omwana ni ng’inwawu omwana.

⁵²Awantu woona awaawanga ao waarranga omwala oyo ni wakuba enkweri. Yesu yawasarigizia na awalaga otino, “Mureke okurra, aeniki ngakafwa, na agona.”

⁵³Ni iwo waamusekera aeniki waawanga ni wamanyire mbwe amiire okufwa.

⁵⁴Ni yamuamba okukono amueta na awoola otino, “Omwana, ema.”

⁵⁵Omwoyo gwae gwairana kandi yaema enyinga ezio. Nikuema Yesu yawoola mbwe wa-ee omwala oyo okuria arie.

⁵⁶Ekintu kino kia-amba eminwa egia awiiwuzi waae, ni Yesu yawasikirra mbwe watalaga omuntu-umuntu ekiaikola ekio.

Luuka 9

Yesu atumre awatumwa waae ikumi ni wawiri

(Math 10:5–15; Mari 6:6b–13)

¹Ni Yesu yamala okueta awalonzi waae ikumi ni wawiri alala, yawa-aa amaani no owukire owua okufumia ewikeeno wiona no okulamia amalwire.

²Lwona yawatuma okugia okulanzia Owuami owua Katonda no okulamia awalwire.

³Yawalaga otino, “Mutaginga ekintu-ukintu ni mugia olugendo olwo; ewintu kiomo ensimbo, ensawo eya olugendo, omukaati na amasendi; lwona mutawa ne enguwo eya okugalusia.

⁴Mumenye mu enyumba-unyumba eya muingiziiwuemo, nawuno mueme ku omugizi ogwo.

⁵Ni, aa awantu watawaingiizie, mukukumule egunduusi eeme ku amagulu giinyu enyinga ezia mufuma ku omugizi ogwo ki ekisiagizio ku iwo.”

⁶Kutio waafuma wagia kandi waagenda-genda mu emigizi giona, ni walanzia injiili kandi ni walamia awalwire asi-uasi.

Eroode aluguula owa Yesu ari

(Math 14:1–2; Mari 6:14–16)

⁷Omwami Eroode yawurra ewintu wiona ewia Yesu yakolanga kandi yaluguula ino, aeniki awandi waawoolanga mbwe Yowaana Omubatiisi nio oziukre aemere ku awafu.

⁸Awandi waawoolanga mbwe Eliija nio ofumre owuyia, na wandi wona mbwe omulala ku awagambi awakulu nio oziukre.

⁹Ne Eroode yawoola otino, “Yowaana nyamala okumukenga omutwe afwa, ni ono naanu owa mpurrako amang’ana gano?” Kandi yaagala mbwe amuwone.

Yesu aeere awantu awakirre elufu witaanu okuria

(Math 14:13–21; Mari 6:30–44; Yowa 6:1–13)

¹⁰Olwa awatumwa waairana, waalaga Yesu ewintu ewia waakola. Yawatoola aingira nawo mu owuato wawalama wagia ku omugizi ogwa Bethsaida okuwa eyo aweene.

¹¹Olwa omurima ogwa awantu waagia wamanya mbwe wamiire okusiawala wagiire, waamulonda ni wawitra enze. Yesu yawaingizia atanika okugamba-gamba nawo ku Owuami owua Katonda, kandi alamia awaagalanga okulamiwua.

¹²Iguulo ne enyanga yawanga ne emiire okugwamo, awalonzi waae ikumi ni wawiri waamuuzako wamulaga watino, “Laga omurima ogwa awantu wano wagie mu emigizi ne ewitemo ewiri ampi ano, wagie waagale okuria no owugono, aeniki asi aa turi ano emigizi giwulao.”

¹³Yesu yawalaga otino, “Inywe aweene muwa-ee okuria warie.” Waamuirania watino, “Turi mala ne emikaati itaanu ne emvwa iwiri ziang’ene. Kusi owoola mbwe tugie tugule okuria okukasuga awantu wano wona?”

¹⁴Awantu awekisaaza weng’ene awaawanga ao waesanga okusuga elufu witaanu. Yalaga awalonzi waae otino, “Muwate waikale ansi mu ewifuwo ewia awantu amakumi ataanu-ataanu.”

¹⁵Awalonzi awo waakola watio kandi omuntu ki omuntu yaikala ansi.

¹⁶Yatoola emikaati itaanu ne emvwa iwiri ziria. Yaginga amiiso gaae ku igulu, airanzia Katonda otioo nikwo agigenyula agi-aa awalonzi waae kugere wagigawre awantu awo.

¹⁷Woonaa waaria waiguta du, kandi awalonzi waae waakunza ewimega ewia ewiokuria ewiasigala mala wiizula ewidida ikumi ni wiwiri.

Petro awoorre mbwe Yesu nio Meesia

(Math 16:13–20; Mari 8:27–30)

¹⁸Nyanga ni Yesu yawanga na asawa na awalonzi waae ni wari aweene, yawawuuzia otino, “Awantu wawoola mbwe ni inze anu?”

¹⁹Waamuirania watino, “Awandi wawoola mbwe ori Yowaana Omubatiisi, na awandi mbwe ori Eliija, na awandi woonaa mbwe ori omulala ku awagambi awakulu oziukre.”

²⁰Yawawuuzia kandi otino, “Ni inywe muwoola mbwe ni inze anu?” Petro yamuirania otino, “Iwue ni Meesia oemere ku Katonda.”

²¹Ni Yesu yawagaania na awasikirra mbwe watalaga omuntu wundi eking’ana ekio.

Yesu agamba-gambre ku okufwa kwae

(Math 16:21–23; Mari 8:31–33)

²²Yesu yalaga awalonzi waae kandi otino, “Omuzia owa Omuntu paka awone eminyako-nyaako mu engira enyingi, kandi aaza okulowua na awagaaka awa ediini eya Awayaudi, awakangasi awa awoozia, alala na awagerezi awa endagirra. Lwona aaza okuitwa, no owuire owua okusatu ariziuka.”

Oagala okuwa omulonzi wa Yesu paka aganye okufumia owulamu wuae

(Math 16:24–28; Mari 8:34—9:1)

²³Nikuemao yalaga awaamulondanga woonaa otino, “Omuntu oagala okundonda, paka asooke ailowe iye omwene kandi atoole omusalaaba gwae owuire ki owuire andonde.

²⁴Aeniki omuntu-umuntu oagala okununula owulamu wuae iye omwene, aaza okuwurigiza. No omuntu origiize owulamu wuae ku amang’ana gange, iye aaza okutuukra owulamu.

²⁵No owulootuuki owua omuntu akawona na ari no owunyazi owua ku ekialo kiona, na ateesie owulamu wuae?

²⁶Aeniki omuntu osuuka ni inze kandi na amang’ana gange, Omuzia owa Omuntu oona arisuuka nae olwa ariiza mu owunene wuae, no owua Swae, kandi no owua enyankoi aweeru.

²⁷Mbalaga kuwuene mbwe awandi ku awantu awari ano ngawarifwa ni wakiari okuwona Owuami owua Katonda.”

Embonekano eya Yesu egaluuke enzeru zerre

(Math 17:1–8; Mari 9:2–8)

²⁸Na amiire munaane gamiire okuwita okuamera yawoola ewintu wino, yatoola Petro, Yowaana ni Yakoobo aniina nawo ku ekigiri okugia okusawa.

²⁹Ni yawanga na asawa, embonekano eya owueni wuae wuagaluka, kandi enguwo ziae ziawa enzeru zerre ezing'ena-ng'ena.

³⁰Mu enyinga ezio, awantu wawiri, Muusa ne Eliija,

³¹waawafumira ao ni wari no owunene owua ku igulu, ni wagamba-gamba ni Yesu. Waawoolanga kiomo Yesu yagianga okutuusia okuagala okwa Katonda, ku okufwa okwa yagianga okufwa Yerusaleemu.

³²Petro na awiina waae waawanga ni wagona, no olwa waazamuka, waawona owunene owua Yesu na awantu awawiri awaawanga ni waimeriire ao nae awo waawanga nawuo.

³³Olwa awantu wano waareka Yesu ni wagia, Petro yalaga Yesu otino, “Omugerezi, kuri kulootu mbwe turi ano. Reka tuomboke ewigiti wisatu, ekilala kiwe ekiao, ekindi ekia Muusa ne ekindi ekia Eliija.” Ni ngakamanya ekia yawoolanga.

³⁴Ni yawanga na akiawoola amang'ana gano, ire rianza riwasanikizia, kandi owuti wuawa-amba olwa waingira mu ire erio.

³⁵Omwoyo gwaema mu ire erio ni guwoola gutino, “Ono no Omuzia wange, Omulowole. Mumuwurre!”

³⁶Olwa omwoyo ogwo gwamala okugamba-gamba waaizukirra ni Yesu asigaale omwene. Awalonzi awo waasagira kiri, kandi ngawakalaga omuntu wundi ekia waawona ekio mu amiire ago.

Yesu alamiizie omuzia owawanga ne ekikeeno

(Math 17:14–18; Mari 9:14–27)

³⁷Owuire owualondako, ni waamala okuiika waema ku ekigiri, omurima ogwa awantu awangi waamuagaana.

³⁸Nikuemao omuntu owawanga mu omurima ogwa awantu awo, yaeterezia wukalu otino, “Omugerezi, nkuiyembere mbwe okawariireko omuzia wange, aeniki nio omwana wange omulala eng'ene.

³⁹Ekikeeno kimuamba mala yarra wukalu nikwo kimugwisia ansi na aitaza-taza ifulo ni rimufumako mu omunwa. Kimuvulunga uwiiwi kandi ngakimureka yawuluuka.

⁴⁰Nyiyembre awalonzi waa mbwe wakifumie, no okukifumia kuwakirre.”

⁴¹Yesu yawalaga otino, “Oo inywe ikula erioneeke kandi eriwula no okuganya rino! Nyiza okuwa ni inywe ni nsikiizie omwoyo ku amang'ana giinyu kutuuka ri? Reeta omuzia waa oyo ano.”

⁴²No omuzia oyo yaazanga ampi nae, ekikeeno ekio kiamugwisia ansi kandi, atanika okuitaza-taza. Ni Yesu yasiagizia ekikeeno ekiwiiwi ekio kandi alamia omuzia oyo, nikwo amuirania ku swae.

⁴³Kandi awantu woona waaluguula owunene owua Katonda.

Yesu agamba-gambre kandi ku okufwa kwae

(Math 17:22–23; Mari 9:30–32)

Na awantu woona waaluguulanga ewintu wiona ewia Yesu yakolanga, yalaga awalonzi waae otino,

⁴⁴“Mutegerezie ewintu wino geeza, aeniki Omuzia owa Omuntu aaza okuguziwua, ateewue mu amakono aga awantu.”

⁴⁵Ni ngawakawurra ekia yawalaganga ekio, lwona gaawaiwisra kugera wareka okumanya isina riago. Ni waatia okumuwuuzia ekia eking’ana ekio kilagana.

Omunene okukira awandi mu Owuami owua Katonda

(Math 18:1–5; Mari 9:33–37)

⁴⁶Awalonzi waatanika okuikululana mu amang’ana ni wagala okumanya omunene okukira awandi, agati yaawu.

⁴⁷No olwa Yesu yamanya ekia emioyo giawu giaingirizianga ekio, yatoola omwana omuto amuimerezia ampi nae.

⁴⁸Nikuemao yawalaga otino, “Omuntu-umuntu oingiizie omwana omuto ki ono, ku eriina riange, anyingiizie inze. No omuntu onyingiizie, aingiizie kugia Katonda owantuma. Aeniki omuntu ori omutono ino agati iinyu, nio omuntu omunene okukira awandi woona.”

Omuntu otawalwiania ari oluwega lwinyu

(Mari 9:38–40)

⁴⁹Yowaana yamulaga otino, “Omugerezi, tuwuine omuntu wundi na afumia ewikeeno ku eriina riao, ni ifwe tumugaaniizie, aeniki iye ngakawanga omulala ku ifwe.”

⁵⁰Ni Yesu yamuirania otino, “Yawa, mutaaza mwamuemerezia okukola otio, aeniki omuntu-umuntu otawalwiania ari oluwega lwinyu.”

Awasamaria walowere okuingizia Yesu

⁵¹Ne enyinga ezia Yesu okugia ku igulu ziatuuka ampi, yakenga mu omwoyo gwae okufuma okugia Yerusaleemu.

⁵²Kutio, yatuma awantu wakangate emberi okugia okuta ewintu alala okuikagra okuuzwa kwae. Awantu awo waagia waingira ku omugizi omulala ogwa Awasamaria,

⁵³na Awasamaria awo ngawakawaingizia aeniki waawurra mbwe Yesu yagianga Yerusaleemu.

⁵⁴Olwa awalonzi wawiri, Yowaana ni Yakoobo, waawona watio waawuuzia Yesu watino, “Omwami, ngoreka tuete omurro gueme ku igulu guuze guwasambe wawue chwe?”

⁵⁵Ni Yesu yagaluka awawarra kandi awagaania wukalu.

⁵⁶Nikuemao, waafuma wagia ku omugizi gundi.

Ekia paka okole no oogala okulonda Yesu

(Math 8:19–22)

⁵⁷Ni waagenda-gendanga ku engira ni wagia, omuntu wundi yamulaga otino, “Nyiza okukulonda asi-uasi aa ogia.”

⁵⁸Yesu yamuirania otino, “Endenya ziri na amiina ziago, kandi enyonyi ziri ne entalala. No Omuzia owa Omuntu, iye awula ni aa yakaingizia omutwe.”

⁵⁹Nikuemao yalaga owundi otino, “Ndonde.” No omuntu oyo yairania otino, “Omwami, owusookere reka nsooke ngie nyawire soifu.”

⁶⁰Ni Yesu yamulaga otino, “Reka awafu waawire awafu awiina waawu. Ni ku iwue, gia olanzie Owuami owua Katonda.”

⁶¹Kandi owundi oona yamulaga otino, “Omwami, nyiza okukulonda, ni sooka oreke ngie nkubre awange ekurinde.”

⁶²Ni Yesu yamuirania otino, “Omuntu oambre embago eya eng’ombe erimira ni kandi akiawarra enyima aa aema, ngasugre no Owuami owua Katonda.”

Luuka 10

Yesu atuma awalonzi waae amakumi musamvu

¹Lunyima, Yesu kandi yatoola awalonzi waae amakumi musamvu, awatuma wawiri-wawiri kugere wakangate emberu ku omugizi ki omugizi ogwa yawanga ampi okugiamo.

²Yawalaga otino, “Ekialo kilawire, na awagesi wari watono. Kutio, musawe Omwami omwene igesa atume awemirimo mu emisiri giae okugesha.

³Mugie! Mbatuma ki ewimaatwa agati ya ensisi.

⁴Ni mugia, mutaginga ewibeeti nakuwa ensawo ezia olugendo nakuwa ewiraato, kandi mutakeezia omuntu-umuntu owa muagaane ku engira.

⁵“Enyumba-unyumba eya muingiiremo, owusookere muwoole mbwe, ‘Owuolu wuwe na awantu awa mu nyumba eno.’

⁶No omwene nyumba eyo ari omuntu ogonziizie owuolu, owuolu wuinyu wuuzwa okuwa nae; ni, ni kutari kutio, owuolu wuinyu wuuzwa okuwairanako.

⁷Mumenye mu enyumba yazane eyo ni muria kandi munywa nawo ewia wawaere, aeniki owemirimo asugaane no omugawo gwae. Mutaaza mwaluga-luga ni muema mu enyumba eno, ni mugia mu enyumba indi.

⁸Ni muingiire ku omugizi kandi muingiziiwue, murie ekintu-ukintu ekiteerwe emberu iinyu.

⁹Mulamie awalwire awari omwo kandi muwalage mutino, ‘Owuami owua Katonda wumiire okuutuuka ampi ni inywe.’

¹⁰Ni, ni muingiire ku omugizi ni wareke okuwaingizia, mugie mu engira ziangwo muwoole mutino,

¹¹‘Namba egunduusi eya ku omugizi gwinyu guno eri ku amagulu giifu tugikukumula ano okuwasiagizia. Kukawa kutio, mumanye kino: Mbwe Owuami owua Katonda wumiire okutuuka.’

¹²Mbalaga inywe, kuriweera awa omugizi ogwo wululu ino owuire owuo, okukira omugizi ogwa Sodooma.

Yesu asiagizia emigizi egialowa okumuingizia

(Math 11:20–23)

¹³“Kuriwaweera owululu inywe awantu awa Koraziini! Kuriwaweera owululu awantu awa Bethsaida! Kuweeko mbwe amankono agaakolwa agati iinyu gaakolwa mu emigizi egia Taaya ni Sidooni, kangato awaawangamo waagaluka kale, ni waingiizie enguwo ezikorre amakurugunya kandi ni wafukre igoke mu emiwiri giawu.

¹⁴Kuriweera emigizi egia Taaya ni Sidooni geeza-geezako owuire owua Katonda arikengra awantu ekiina, okukira kiomo kuriwaweera inywe!

¹⁵Kusi inywe awantu awa Kapernaumu, muingirizia mbwe muuza okugingwa kungulu ku igulu? Yawa, ni muuza okuisiwua ansi mu ekialo ekia awafu!

¹⁶“Omuntu owategerezia, ni inze ategerezia; no omuntu owalowa, ni inze alowere. No omuntu ondowere, alowere kugia Katonda owantuma.”

Ekiia omuntu aesa okusangaala nakio

¹⁷Awalonzi amakumi musamvu waria waairana no owusangaavu ni wawoola watino, “Omwami, namba ewikeeno wiona wituwurra ku eriina riao.”

¹⁸Iye yawairania otino, “Nyawona Sataani na aema ku igulu na agwa ansi ki olumesi.

¹⁹Miire okuwa-aa amaani aga okutaza enzoka ne ewitoomoni, okukira amaani aga omuzigu aa kiwulao ekintu ekikawanyaala.

²⁰Kukawa kutio, mutasangaala mbwe ewikeeno wiwawurra, ni musangaale mbwe amiina giinyu gajojerwe ku igulu.”

Awamanyire Yesu geeza wasereekwe

(Math 11:25–27; 13:16–17)

²¹Mu enyinga yazane eyo, Yesu na aizuule no owusangaavu owua Omwoyo Omweru yawoola otino, “Nkutondowoole Soifu Katonda, Omwami owa igulu ne ekialo, aeniki owisiire awaganga na awasomi ewintu wino, no owisasuriire awaana awato. Ee Soifu, aeniki kino niki ekilootu ekia wasangaala nakio okukola.

²²“Soifu anteriire ewintu wiona mu amakono. Awulao omanyire Omuzia ogawuuke ni Katonda Ise, kandi awulao omanyire Katonda Ise ogawuuke no Omuzia waae alala na awantu awa Omuzia awuine okumumanyisia.”

²³Nikuemao yagaluka awarra awalonzi waae awalaga ni wari aweene otino, “Awantu awawona ekia muwona ano wasereekwe!

²⁴Aeniki mbalaga mbwe awagambi na awaami awangi waawa na amiiga aga okuwona ewintu ewia muwona kandi okuwurra ewia muwurra nyingeeno wino, ni ngakukawaweera kutio”

Olugero olwa Omusamaria omulootu

²⁵Nikuemao omuntu oinogereezie mu endagirra yaimerra okugeezaania Yesu. Yamuwuzia otino, “Omugerezi, ekia nsugaane nkole niki kugere ntuukre owulamu owutariwua?”

²⁶Yesu yamuirania otino, “Ekijojerwe mu endagano niki; okiwurra otie no okisoma?”

²⁷Omuntu oyo yamuirania otino, “Gonzia Omwami Katonda waa no omwoyo gwao gwona, ne enkolo yaa yona, na amaani gaa goona, kandi na amaingirizio gaa goona, kandi gonzia omwina waa kiomo oigonziizie iwue omwene.”

²⁸Yesu yamuirania otino, “Oiraanie embuuzio eyo kuwene. Kola otio kandi oriwa omulamu.”

²⁹Ni iye yaagalanga okuilagana mbwe arindre ensikirra, kutio yawuuzia Yesu kandi otino, “Omwina wange naanu?”

³⁰Yesu yamuirania na amulaga olugero otino, “Omuntu yaikanga Yeriiko na aema Yerusaleemu. Ku engira na agia yaumuka ku awasakuzi. Waamuvuula enguwo wamukuba kandi warumuka wagia, wamureka na aguwa ari ampi okufwa.

³¹Omuzia wundi yawanga na aika ku engira eyo, no olwa yawona omuntu oyo yamuwita na aiwaza oluwega olundi olwa engira.

³²Lwona, omuntu owa ekiriango ekia Awalaawi yona, olwa yatuuka asi ao kandi amuwona, yawita wuangu-wuangu entulo eya engira agia.

³³No Omusamaria wundi owagenda-gendanga ku engira eyo, olwa yatuuka ku omuntu oyo mala amuwona, yamuambra amasaasra.

³⁴Yamugiako, amueeya ewisonga na amavuta kandi awiwaka ne edivaai, nikwo awisiwa ne ebandeechi. Nikuemao, yaginga omuntu oyo amuta ku entikiri yaae amuira mu enyumba eya awageni kandi amurinda ao geeza.

³⁵Owuire owualondako yatoola empiria eziera edinaari iwiri kandi aziezania ku omwene enyumba eya awageni, na amulaga otino, ‘Murinde geeza; kandi ni nyiza okuirana ndikuoloola empiria ezia oriwa no okorre nazio ziona.’

³⁶Oingirizia mbwe agati ya awantu awasatu wano, owawanga omwina owa omuntu owakubwa na awasakuzi ono, naanu?”

³⁷Omuntu owawanga na asomeere endagirra oyo yamuirania mbwe, “Omuntu owamuambra amasaasra oria?” Nikuemao Yesu yamulaga otino, “Gia okole otio iwue oona.”

Yesu aweere omugeni owa Mariitha ni Maaria

³⁸Ni Yesu na awalonzi waae waawanga ku olugendo lwawu, yatuuka mu ekitemo aa omukazi wundi oetwa Mariitha yamuingizia omwae.

³⁹Yawanga ni wamwawu waae owa ekiala oetwa Maaria, owawanga na aikaale ampi ni Yesu na ategerezia amang’ana aga yawoolanga.

⁴⁰Ni Mariitha iye, yawanga na atoorrwe ne emirimo emingi egia okuingizia awageni. Yawaazako kandi awalaga otino, “Omwami, wonako wamwifu ono, andekiire emirimo giona egia mu enyumba! Okumulagre aaze antunzie.”

⁴¹Ni Yesu yamuirania otino, “Mariitha! Mariitha! Oinyaasia kandi ori no okuagala okwa ewintu ewingi,

⁴²ne ekintu ekilala kieng’ene nikio ekiagalana. Maaria amiire okulowola ekintu ekilootu ekio, kandi ngarikinyagwa kieme mu amakono gaae yaaya.”

Luuka 11

Yesu agereere ku okusawa Katonda

(Math 6:9–13; 7:7–11)

¹Owuire wulala, Yesu yawanga na asawa asi andi. Olwa yamala okusawa, omulala ku awalonzi waae yamulaga otino, “Omwami, tugerere okusawa kiomo Yowaana oona yagerera awalonzi waae.”

²Kutio, Yesu yawalaga otino, “Ni musawa, muwoole mutino: “ ‘Soifu, eriina riao rieewue owuti, owuami wuao wuuze.

³Otu-ee okuria kwifu okwa owuire ki owuire.

⁴Oturekere amawi giifu, kiomo twona turekera awatukorra owuwiiwi. Kandi otareka tuingire mu okugeezaniwua.’ ”

⁵Nikuemao, yawalaga otino, “Tutoole mbwe omulala ku inywe ari no omwiko waae, kandi amugiireko owuire amulaga otino, ‘Omwiko wange, nyoziiko emikaati isatu,

⁶aeniki omwiko wange wundi owerenga mu olugendo aingiire omwange nyingeeno, ni mbula okuria okwa nyesa nyamu-aa.’

⁷Nikuemao omuntu ori mu enyumba oyo amuirania otino, ‘Reka okunyansia. Ekiriango kimiire okuigalwao kandi awaana wange wamiire okugona. Ng’anyesa okuema mbwe nku-aa ekintu.’

⁸Mbalaga mbwe, kukawa mbwe ngakaesanga okuema okuesania omukaati ku omwiko waae ono ku owuiko wueng’ene, ni ku enkarrizi eya omuntu oyo, aaza okuema amu-ee ewia aagala wiona.

⁹“Mbalaga ntino: Sawa, no ooza okueewua; aagala, kugere otuukre; kong’oota ekiriango, no ooza okuigurrwao.

¹⁰Aeniki omuntu ki omuntu osawire aeewua; oagala atuukra; kandi okong’oota ekiriango, aaza okuigurrwao.

¹¹“Naanu ku inywe waaswawu awaana, ooza yaesania enzoka ku omuzia waae na amusawire emvwa,

¹²nakuwa ekitomooni na amusawire igi?

¹³Ni kuri mbwe kukawa mbwe muri awooni, ni mumanyire oku-aa awaana wiinyu empanwa endootu, katio Soinyu ori ku igulu iye aaza oku-aa awantu awamusawa Omwoyo Omweru omungi owuagana wutie!”

Awantu waingirizia mbwe Yesu akola na amaani aga Belzebuuli

(Math 12:22–30; Mari 3:20–27)

¹⁴Yesu yawanga na afumia ekikeeno ku omuntu omurimba otagamba-gamba. Olwa ekikeeno ekio kiamala okufuma kigia, omuntu omurimba oyo yagamba-gamba kandi awantu awaawanga ao waaluguula ino.

¹⁵Na awandi ku iwo waawoola watino, “Omuntu ono afumia ewikeeno na amaani aga Beelzebuuli, omukangasi owa ewikeeno.”

¹⁶Na awandi awaagalanga okumugeezaania, waamusawa mbwe awalageko ekilago ekiemere ku igulu.

¹⁷Ni Yesu yamanya amaingirizio gaawu, kutio yawalaga otino, “Owuami ki owuami owugawukaane owuene wuuzwa okugwa wuoneke, kandi enyumba eya awantu wailwania aweene etanyika.

¹⁸Ni ni kuri mbwe Sataani kiona kigawuuke ekiene, owuami wuae wuesa wuaimerra wuawaaao wutie? Mboola otio aeniki muwoola mbwe mfumia ewikeeno na amaani aga Beelzebuuli.

¹⁹Ni, ni kuri mbwe mfumia ewikeeno na amaani aga mpeerwe ni Beelzebuuli, mundageko mbwe awantu wiinyu iwo wawifumia naki? Kutio awantu wiinyu awo niwo awaaza okuwakengera ekiina.

²⁰Ni, ni kuri mbwe mbifumia na amaani aga Katonda nio ompeere, kane kuri kuwuene mbwe Owuami owua Katonda wuwaazreko.

²¹“No omuntu omukalu arinda enyumba yaae omwene na ari ne ewia-iiye ewimusugre, ewintu wiae wiri geeza.

²²Ni, no omuntu wundi ori omukalu okumukira amugwireko ni iiye mala amukire, aaza yatoola ewia-iiye ewia omuntu oyo ateereko omwoyo, kandi yamusakula ewintu ewia mu enyumba yaae.

²³Omuntu otari oluwega lwange, nganyaagala, kandi omuntu otakunza alala ni inze, iye ataanyia.

Ekiikola ne ekikeeno kifumiiwue ku omuntu

(Math 12:43–45)

²⁴“Ekikeeno ni kifumre ku omuntu, kiyuga-yuga mu ewialo ewikarre aa amanzi gawula, ni kiagala aa kikawuluukra. Ni kitatuukiire, kiwoola kitino, ‘Reka nyirane omwange.’

²⁵Ni kiiraane kandi kituukre enyumba ne eri wusaasa, ne eeruuye kandi ne ewintu witeerwe geeza,

²⁶kigia okuagala ewikeeno windi musamvu ewiwiiwi okukikira. Nikuema wiona wiirana okumenya omwo kandi omuntu oyo airana yawa omuwiiwi okukira kiomo yawanga kuluweri.”

Awantu awasereekwe

²⁷Ni Yesu yawoolanga amang’ana gano goona, omukazi wundi mu omurima ogwo yawoola wukalu otino, “Ng’inwao owakwiwula kandi akunuunia asereekwe ino.”

²⁸Ni Yesu yamuirania otino, “Yaaya, awantu awasereekwe na awantu awawurra amang’ana aga Katonda kandi waakola nago.”

Awataganyire waaza okukirwa ne ekiina

(Math 12:38–42)

²⁹No omurima ogwa awantu gwaisonganga okuwa omunene, Yesu yawalaga otino, “Ikula eria awantu awawiiwi kandi awawula no okuganya, waagala mbwe wakorrwe ekilago. Ni kiwulao ekilago ekia waaza okueewua ekigawuuke ne ekilago ekia Yoona.

³⁰Mala kiomo Yoona yawa ekilago ku awantu awa Nineeve, nintio lwona Omuzia owa Omuntu ariwa ekilago ku awantu awataganyire wano.

³¹Omwami owekikazi owa ekialo ekiri Emulambo yoona ari-imerra mu ekiina ni ikula eria nyingeeno rino, kandi yoona arigera ekiina kiwakire. Ee, aeniki yaema

ale ino agia okuwurra amang'ana aga Sulumaani, ni wano walowere okuwurra omuntu okirre Sulumaani ale ori ano.

³²Awantu awa Nineeve wari-imerra mu ekiina na awantu awa ikula rino kandi warigera ekiina kiwakire. Ee, aeniki iwo waagaluka wareka amawi gaawu olwa Yoona yawalanzizia amang'ana aga Katonda, ni wano walowere amang'ana aga omuntu okirre Yoona ale, ori ano.

Yesu nio ng'ina owueru

(Math 5:15; Mari 4:21)

³³“Awulao omuntu oka-ambia ekimuri kandi yakita mu enkuriri nakuwa yakifunikira ne ekidida. Na akita ku emeesa, kugere awantu awaingira omwae wawone owueru.

Muingizie owueru owuema ku Yesu

(Math 6:22–23)

³⁴“Eriiso riao nirio ekimuri ekia omuwiri gwao. Ne eriiso riao riri ilootu, omuwiri gwao gwona guuza okuwa no owueru owungi. Ni ni ritari ilootu, omuwiri gwao gwona guwa ne ekierema ekingi.

³⁵Warra kuwuene owone mbwe owueru owua ori nawuo ngawuri ekierema yaaya.

³⁶Kutio, no owulamu wuao wuona wuri no owueru, kandi awulao akorre ekierema, wuuza okuwa no owueru owungi mala ki omuriikwe ne ekimuri.”

Yesu asiagizia awakangasi awa ediini eya Awayaudi

(Math 23:1–36; Mari 12:38–40)

³⁷Olwa Yesu yamala okugamba-gamba, Omufarisaayo wundi yamueta okuria naye. Kutio yaingira kandi waikala okuria alala nae.

³⁸No Omufarisaayo oyo yaluguula ino olwa yawona Yesu na aria na ataisaawre.

³⁹Omwami yamulaga otino, “Inywe Awafarisaayo mueruyia mala enze eya ewisanda ne endaawo ziinyu geeza ino, ni munsu mwazio ziizuule mala no owusakuzi ne enkola embiwi.

⁴⁰Inywe awamaya wano! Ngamumanyire mbwe owalonga enze nio omulala owalonga munsu mwona?

⁴¹Muesaanie ewintu wiinyu ku awataka ni kuemera mu emioyo giinyu egia munsu, kandi ewintu wiona wiiza okuwaweera ewieru.

⁴²“Kuriwaweera uwiiwi inywe Awafarisaayo, aeniki kukawa mbwe mufumia endala ku ikumi ku amandhaari agaema mu emisiri giinyu kiomo pilu-piilu, amatere alala na amavwa gandi amalulu, ni murekere owuigolovu no olugonzi olwa Katonda. Kulootu ni mulondokaane ne ensikirra ziona, aa mutagawuule ezia murinda, ne ezia mutarinda.

⁴³“Kuriwaweera uwiiwi, inywe Awafarisaayo, aeniki mugonziizie okuikala ku entewe endootu-ndootu mu amasinagoogi, na amakeezio aga mukeeziwua nago mu ewiyyia.

⁴⁴“Kuriwaweera uwiiwi inywe, aeniki mufwanana ne ewiwaga ewitawonekana, kandi awantu wawigenda-gendako ni watamanyire ewiri munsi.”

⁴⁵Omulala ku awantu awaasomera endagirra oria yamuirania otino, “Omugerezi, no owoola ewintu wino, ofwana mbwe ifwe twona otunyegere.”

⁴⁶Ni Yesu yawalaga otino, “Kuriwaweera uwiiwi inywe awaasomera endagirra mwona, aeniki mutwika awandi emisigo emizito okuginga, ni inywe aweene ngamuziirako namba ekiala ekilala okuziginga.

⁴⁷Kuriwaweera uwiiwi inywe, aeniki muombokra awagambi awa Katonda, awa waasoinyu waaita, ewiwaga.

⁴⁸Kutio, mulagana aweene mbwe muri awawoni kandi muganyire ne enkola ezia waasoinyu. Iwo waawaita, ni inywe eno muomboka ewiwaga wiawu.

⁴⁹Ku ing’ana rino, Katonda yawoola mu amaganga gaae otino, ‘Nyiza okuwatumra awagambi na awatumwa, kandi awandi ku iwo waaza okuitwa, na awandi waaza okunyaasiwua owululu.’

⁵⁰Kutio, amasaai aga awagambi awamiire okuitwa, okuamera mu owutanikro owua ekialo, gaaza okuwa ku emitwe egia awantu awa ikula rino,

⁵¹okutanikra ku amasaai aga Abeeli kutuuka ku aga Zakaria, owaitwa agati ya isiga eria omusango ne ekaalu eya Katonda. Ee, amasaai gaawu gariwa ku emitwe egia awantu awa ikula rino.

⁵²“Kuriwaweera uwiiwi inywe awaasomera endagirra, aeniki mumiire okutoola ekifunguo ekia enyumba eya amaganga, mugia nakio. Inywe aweene ngamuingira yawa, ni lwona muigariire awandi awagala okuingira wataingirra.”

⁵³Olwa Yesu yaema ao, Awafarisaayo na Awagerezi awa endagirra waatanika okulowa amang’ana gaae wukalu kandi ni wamuwuuzia embuuzia ku ewintu ewingi,

⁵⁴ni wamutega kugere wamuambe ku ekintu ekia akawoola omwene.

Luuka 12

Yesu asiagizia awalonzi ku okuisemerezia

(Math 10:26–27)

¹Mu enyinga ezio, na awantu awangi owuluku waamala okuikumia alala, Yesu yasooka agamba-gamba na awalonzi waae na awalaga otino, “Muirinde ku omumera ogwa Awafarisaayo, okuri okuisemerezia kwawu.

²Kiwulao ekintu ekisanikiirwe ekitaaza okusanukulwa, namba ekiwiserwe ekitaaza okufuma enze kiamanywa.

³Kutio, ekia owoorre mu ekierema kiiza okuwurrwa omuwasu ku owueru, ne ekia omonyereezie omuntu mu enyumba eya munsu kiiza okulanziwua ku olusala kungulu.

Mute okuganya kwinyu ku Katonda

(Math 10:28–31)

⁴“Awiiko wange, mbalaga mbwe mutaaza mwatia awantu awaita mala omuwiri gweng’ene, ni nikuemao ngawaesa okukola ekintu kindi okuwita ao.

⁵Ni nyagala okuwalaga omuntu owa musugaane mutie: Mutie mala Katonda owa na amiire okuita omuwiri, ari na amaani aga okugurigiza mu omurro ogutazima. Kuwuene mbalaga mbwe mumutie!

⁶Kane ewiyundigiri witaanu, ngawigulwa ne eela iwiri ziang’ene? Ni Katonda ngalawira namba endala yawio.

⁷Katonda amanyire namba embala eya emwiri ezia muri nazio ku omutwe. Kutio mutatia, aeniki Katonda awatoorre owuzito okukira ewiyundigiri.

Okusuuka ni Yesu kulowerwe

(Math 10:32–33; 12:32; 10:19–20)

⁸“Mbalaga mbwe omuntu-umuntu olagana emberu wa awantu mbwe ari owange, Omuzia owa Omuntu oona arimulagana emberu wa enyankoi awa Katonda.

⁹No omuntu-umuntu ondowa emberu wa awantu, yoona arilowua emberu wa enyankoi awa Katonda.

¹⁰Omuntu ogamba-gamba owuwiiwi ku Omuzia owa Omuntu arirekerwa amawi gae. No omuntu onyega Omwoyo Omweru, iye ngarirekerwa amawi gae.

¹¹“Ni wawairre mu ewiina emberu wa awaami na awagaaka awa amasinagoogi, na awari no owukire, mutainyaasia okuingirizia ekia mugia okuirania ni kiomo mugia okuirania, nakuwa ekia mugia okuwoola

¹²aeniki Omwoyo Omweru aaza okukugerera ekia osugaane owoole enyinga ezio.”

Olugero olwa omunyazi omumaya

¹³Omuntu wundi mu omurima ogwa awantu yamulaga otino, “Omugerezi, laga wamwifu angawre omugawo gwange ku ewintu ewia soifu yaturekiire.”

¹⁴Yesu yamuirania otino, “Iwue, naanu onteere omukengi owa ekiina nakuwa omugayi agati iinyu?”

¹⁵Nikuemao yawalaga otino, “Muwe amankaga kandi muirinde mutawa ne endandiire mu engira-ungira, aeniki owulamu owua omuntu ngawuema ku owunyazi owua ari nawuo.”

- ¹⁶Kandi yawalaga olugero luno, “Omusiri ogwa omunyazi wundi gwalawia emere endootu.
- ¹⁷Nikuemao, yaingirizia omwene otino, ‘Katio nkoleki? Mbula ne ewiagi ewisugre ewia nkawiikamo emere yange.’
- ¹⁸“Nikuemao yawoola otino, ‘Nintino nyiza okukola. Nyiza okutagula ewiagi wiange kandi nduke ewindi ewinene. Ni miire, nyiza okuwiika omwo emere alala ne ewintu wiange.
- ¹⁹Kandi ndiriwoola mu omwoyo gwange mbwe, “Ori ne ewintu ewilootu ewingi ewiiza okutoola emiaka emingi. Toola owulamu wuwuwu, no oria, no onywa, kandi no owa ne ekisangaalo!” ’
- ²⁰“Ni Katonda yamulaga otino, ‘Omusiru ono! Reero-ureero luno, ooza okunyagwa owulamu wuao. Katio naanu ooza okutoola ewintu ewia omiire okuiwiikra ewio?’
- ²¹“Nintio kuuza okuwa no omuntu oiwiikra ewintu ewingi, ni ngari omunyazi ku Katonda.”

Otareka okuwa no okuganya

(Math 6:25–34, 19–21)

- ²²Nikuemao Yesu yalaga awalonzi waae otino, “Kutio mbalaga mbwe emioyo giinyu gitainyaasizia owulamu wuinyu, ku ekia muuza okuria, namba ku emiwiri giinyu, ku ekia muuza okuiwoya.
- ²³Aeniki owulamu wukirre okuria-ukuria kandi omuwiri gukirre enguwo-unguwo.
- ²⁴Ingiriziako ku enyonyi: Ngazikomera lwona ngazigesha, kandi ziwula na amayumba aga owuwiiikro namba ewiagi; ni kukawa kutio Katonda aziriisia. Ni inywe ngamukirre enyonyi ezio ale!
- ²⁵Arioko ku inywe, omuntu oesa okusonga namba enyinga endala eng’ene mu owulamu wuae, ku okuinyaasia mu omwoyo?
- ²⁶Ni kuri mbwe ngoesa waakola ekintu ekitono kitio, katio ekikagera no oinyaasia mu omwoyo ku ewintu ewingi niki?
- ²⁷“Ingiriziako kiomo isuwi rikoma. Ngarikola emirimo lwona ngarinawa enguwo; ni kukawa kutio, mbalaga mbwe namba Omwami Sulumaani mu owunyazi wuae wuona ngakaingiziako geeza kiomo isuwi rino.
- ²⁸Ni kuri mbwe nintio Katonda aingizia isuwi erikoma eriene mu isaka, eriwaao reero, ne enkio ritoowa riarigizwa mu omurro, ngaaza okuwaingizia geeza owukirre? Oo inywe awantu awawula no okuganya wano!
- ²⁹Mutaingirizia mala ku ewia mukaria ne ewia mukanywa. Lwona, amang’ana ago gatawanyaasia mu emioyo, yaaya.

³⁰Aeniki awantu awatamanyire Katonda wooka warumukra ewintu wino, ni Soinyu Katonda amanyire mbwe muwiagala.

³¹Aa okukola otio, inywe musooke muagale Owuami owua Katonda, ni muuza okusongwa ewintu wino wiona.

³²“Mutatia, kukawa mbwe muri awantu awatono otio, aeniki Soinyu amiire okukenga mu omwoyo mbwe awaingizia mu owuami wuae.

³³Muguzie ewintu wiinyu kandi muesanie empiria ku awataka. Muwe ne ensawo ezia owuwiikro ezitaaza okukiriiya, muwe no owuwiikro owua ku igulu owutariwua. Ao omwiwi ngatuukao kandi emungu ngaziiza okuwiona.

³⁴Ni kutio aeniki, aa owuwiiko wua wuri, nio aa omwoyo gwao guuza okuweera.”

Muwe amankaga enyinga ziona

(Math 24:45–51)

³⁵Yesu kandi yalaga awalonzi waa otino, “Muwe amankaga ni muiwooye enguwo ezia emirimo kandi ewimuri wiinyu wieme,

³⁶kiomo awakozi awarindirra omwami waawu okuema mu omugomo ogwa enserezi, kugere na aazre akong’oote ekiriango, wamuigurreo kalala.

³⁷Kuriweera owulootu awakozi awa emirimo awa omukangasi waawu arituukra ni wari amiiso enyinga ezia ariizrako. Mbalaga mbwe omukangasi oyo ari-iwoya enguwo ezia emirimo atanike okuwakorra. Ariwiikazia ku emesa kandi awiiwurre okuria warie.

³⁸Kuriwaweera owulootu awakozi awa omukangasi waawu aaza okutuukra ni wamurindirra, kukawa mbwe aazre owuire agati nakuwa kungoko eya kuluweri.

³⁹Ni musugaane mumanye mbwe kuweeko mbwe omwene enyumba amanyire mbwe ne enyingaaki ezia owuire ezia omwiwi aaza okuuzrako, ngakarekere omwiwi avune aingire mu enyumba yaa.

⁴⁰Inywe mwona musugaane muwe amiiso, aeniki Omuzia owa Omuntu aaza okuirana enyinga ezia mutamanyire.”

⁴¹Ni Petro yamuwuzia otino, “Omwami olugero luno, otulaga ifwe nakuwa olaga awantu awari ano wooka?”

⁴²Omwami yamuirania otino, “Owemirimo omuganga kandi oirindre naanu katio? Owemirimo owa omukangasi waa ateere awemirimo wooka awa ku omugizi gwae mu amakono gaa, kugere awa-ee okuria mu enyinga ezisugre.

⁴³Kulootu omukangasi owa owemirimo oyo na airaane amutuukre na akola otio.

⁴⁴Mbalaga kuwue mbwe aaza okumuteera ewintu wiae wiona mu amakono, arinde.

⁴⁵Ni kuweeko mbwe owemirimo oyo awoorre mu omwoyo gwae mbwe, ‘Mfwaki? Omukangasi akiaza okuwa enze ku amiire amangi,’ nikuemao atanike okukuba awemirimo awekisaaza na awekikazi, kandi aingire mu okuria no okunywa kandi no okudung’a.

⁴⁶Omukangasi owa owemirimo oyo aaza okuuzza owuire owua ataingirizia, kandi enyinga ezia atamanyire. Nikuemao arimukenga-kenga kandi amute asi awiiwi alala na awantu awatarindre endagano.

⁴⁷Owemirimo omanyire geeza okuagala okwa omukangasi waae ni ngaitegre okukola emirimo egio lwona ngakola okuagala okwa omukangasi oyo, aaza okukubwa ewifunzi ewingi.

⁴⁸No owemirimo wundi okola ewintu ewisugaane no okuswawukwa na atamanyire, iye aaza okukubwa ewifunzi ewitono. Ku awamiire okueewua emirimo emingi, waaza okuagalwako amangi; kandi omuntu oerwe emirimo egia okuimerra ewintu ewingi, aaza okuagalwako ewingi.

Okutawurizania ne engawuzi

(Math 10:34–36)

⁴⁹“Nyizre okureeta omurro ku ekialo, kandi nkagonziizie mbwe guwe ni gumiire okuambiwua.

⁵⁰Ni ndi no owubatiiso owua eminyako-nyaako emilulu owua paka wunyiikorre, kandi ndi no omwoyo oguinyaasia nawuno wutuuke wuwite.

⁵¹“Kusi muingirizia mbwe okuuzza kwange kwazanga okureeta owuolu ku ekialo? Yawa, mbalaga mbwe kwareetre engawuzi.

⁵²Okuemerra enyinga zino, awantu wataanu awa mu enyumba endala, waaza okugawukana, wasatu ku wawiri kandi wawiri ku wasatu.

⁵³Engawuzi ziiza okuwaao agati ya swawu omuntu no omuzia waae, kandi omuzia ni swae; ng’ina no omwala waae kandi omwala ni ng’inwae; ng’inaziala no omukamwana waae, kandi omukamwana ni ng’inaziala waae.”

Awakangasi awa Awayaudi wagala wakorrwe amankono

(Math 16:2–3; Mari 8:11–13)

⁵⁴Yalaga omurima ogwa awantu otino, “Ni muwuine ire ni rirumuka okuema ewugwanyanga muwoola kalala mbwe, ‘Emvula egia okukuba,’ kandi kwaikola kutio.

⁵⁵Ni, no omuyaga oguema ewufumanyanga guwuuta, muwoola mbwe, ‘Iwasu ilulu riiza okuwaako,’ kandi kwaikola kutio.

⁵⁶Inywe awaisemerezia wano! Mumanyire kiomo owuire wuuzza okufwanana mala ku okusoma embonekano eya ekialo ni igulu kweng’ene. Ne ekigera ni mutamanyire okusoma ewiikola enyinga zino niki?

Muirane mu empurizanio ni Katonda

(Math 5:25–26)

⁵⁷“Ni katio, ekiwalowera inywe aweene okumanyirizia ekilootu ekisugaane niki?”

⁵⁸No ogia no omuntu okuingiriire emberi wa omukengi owa ekiina, kola wukalu owurizanie nae ni mukiari ku engira, aeniki wusa-wusa, aaza okuira ku omukengi owa ekiina. No omukengi owa ekiina iye aaza okukuta mu amakono aga omulangra, kandi omulangra oyo aaza okukuingizia mu owusiwe.

⁵⁹Nkulaga mbwe ngorifuma omwo nawuno o-oloole omusango ogwo gwona, aa namba eela neeza okusigala.”

Luuka 13

Galuka oreke owuoni owe omulamu

¹Awantu awaawanga ao mu enyinga ezio, waalaga Yesu ku okufwa okwa Awagaliili wandi awa Pilaato yaita ni wakola emisango.

²Yesu iye yawairania otino, “Muingirizia mbwe Awagaliili wano waawurra owululu otio aeniki waawanga awooni okukira Awagaliili wandi?”

³Ng’anintio yawa! Ni, mbalaga mbwe, ni mutagaluuke mureke amawi giinyu, mwona muuza okufwa muwue chwe.

⁴Nakuwa awantu ikumi ni munaane waria awaafwa olwa enyumba endiire okugia kungulu, yawagwako Siloamu; muingirizia mbwe waawanga awawiiwi ino okukira awaawanga ni wamenyere Yerusaleemu?

⁵Ng’anintio yawa! Ni Mbalaga mbwe inywe mwona ni mutagaluuke mureke amawi giinyu, mwona muuza okufwa mwena muwue chwe.”

Awakangasi awataamia ensaafu

⁶Nikuemao Yesu yawalaga olugero luno: “Omuntu wundi yawanga no omuti oguetwa mbwe omutiini ogwawanga ni gusimbrwe mu omusiri gwae ogwa omuzabiibu. Owuire wulala yagugiako okunoga ensaafu ziangwo, ni ngakagutuukrako ensaafu.

⁷Kutio yalaga omuntu owawanga na arinda omusiri ogwo otino, ‘Ku emiaka isatu giona miire okuwa ni nyiza okuagala ensaafu ku omuti guno ni nkiari okutuukra namba endala. Guteme guemeo! Guona ilowa wusa!’

⁸“Yamuirania otino, ‘Omukangasi, gureke ku omwaka guno gweng’ene, kandi nyiza okugurimirra ilowa nikwo ngufukre emborra.

⁹Ni guamre ensaafu kukawa okulootu; ni, ni gutaamre nikwo oguteme.’”

Omukangasi owa Awayaudi alwania Yesu

¹⁰Owuire owua Sabato Yesu yawanga na agerera mu endala ku amasinagoogi,

¹¹kandi omukazi wundi yawanga ao owawanga ne ekikeeno kiremiizie ku emiaka ikumi ni munaane. Yawanga na aikumbre aa ngakaesanga okuimerra owuigoloole.

¹²Olwa Yesu yamuwona yamueta agia emberu kandi amulaga otino, “Mukaziiwue, osiwuulwe ku owulwire wuao.”

¹³Nikuemao, yamutaako okukono, kandi aigolola kalala, atanika okutondowola Katonda.

¹⁴Omukangasi owa esinagoogi yakunyaazia owueni aeniki Yesu yalamia omuntu olwa Sabato, kandi yawoola otino, “Gario amiire mukaaga aga okukola emirimo, muuze amiire ago mulamiwue ni ng’ano olwa Sabato.”

¹⁵Omwami yamuirania otino, “Inywe awantu awaisemerezia wano! Mwona ngamusiwula eng’ombe nakuwa entikiri ziinyu okuema mu amagaari olwa Sabato okugia okuzinywesia?

¹⁶Ni katio omukazi ono, omwana owa Abraamu owa Ekikeeno kimiire okuta mu owusiwe ku emiaka ikumi ni munaane giona, owuwi wuriai na asiwuulwe ku owusiwe wuno owuire owua Sabato?”

¹⁷Olwa yawoola otio, awataamuagalanga wona waaiguunya emioyo. Na awantu wandi iwo waaomereziwua ne ewintu ewikate-kaate ewia yakolanga.

Olugero olwa emwo entono eya karadaali no olwa omumera

(Math 13:31–33; Mari 4:30–32)

¹⁸Nikuemao Yesu yawawuuzia otino, “Kane Owuami owua Katonda wufwanana wutie? Ekia nkawugeraania nawuo niki?

¹⁹Wufwanana ne emwo entono eya karadaali eya omuntu yatoola akomera mu omusiri gwae. Yakoma ewa omuti omunene, kandi enyonyi ezia ku emiyaga ziaza ziomboka ewitalala ku ensagia ziangwo.”

²⁰Yawalaga kandi otino, “Ekia nyakageraania no Owuami owua Katonda niki?

²¹Owuami owua Katonda wuesa okufwananiwua no amamera amatoono aga omukazi atoola yafuka ku owusie wungi yaduwania mala amamera gaazimbia owusie owuo wuona.”

Ekiriango ekinyigu eki-ingira ku igulu

²²Yesu yagenda-genda mu emigizi ni mu ewitemo, na agerera awantu na awariire Yerusaleemu.

²³Omuntu wundi yamuwuzia otino, “Omwami kane awantu awatoono weng’ene niwo awaaza okununulwa?” Yesu yairania otino,

²⁴“Mukole wukalu muingirre ekiriango ekinyigu, aeniki mbalaga mbwe awangi wariagala okuingra ni ngawari-ingra yawa.

²⁵No omwene enyumba amiire okuimerra aigaaleo ekiriango, muri-imerra enze ni mukong’oota ekiriango kandi ni muisasaama otino, ‘Omukangasi, tuigurreo ekiriango.’ Ni iye ariwairania otino, ‘Ng’amilyire aa muema.’

²⁶Nikuemao murimulaga mutino, ‘Ngatuarua ni iwue kandi wagereranga ku engira ezia emigizi giifu?’

²⁷Ni iye ariwagaania otino, ‘Ng’amilyire aa muemere. Munyemeko ampi, inywe awa enkola ezia owuoni wano!’

²⁸Ansi ao murirra kandi murisienenia amiino olwa muriwona Abraamu, Isaaka ni Yakoobo na awagambi woona ni wari mu Owuami owua Katonda, ni inywe aweene muluumwa enze.

²⁹Awantu wariemera ewufumanyanga ne ewugwanyanga, kandi embo ne emulambo, kandi waritoola iwaga riawu mu omugomo mu Owuami owua Katonda.

³⁰Kuwuene, awandi awari enyima warikangata, kandi awandi awakangaate wari-irana enyima.”

Yesu arra omugizi ogwa Yerusaleemu

(Math 23:37–39)

³¹Mu enyinga ezio Awafarisaayo wandi waaza ku Yesu wamulaga watino, “Ema asi ano ogie a-andi aeniki Eroode aagala okukuita.”

³²Yawairania otino, “Mugie mulage endenya eyo mbwe ‘Nyiza okufumia ewikeeno kandi ndamie awalwire reero ne enkio, kandi owuire owua okusatu nyiza okutuusia okuagala kwange.’

³³Ni kigwe kiole, nyiza okugia emberu no olugendo lwange reero, enkio, ni izuuzi, aeniki awulao omugambi otafwira enze eya omugizi ogwa Yerusaleemu!

³⁴“Oo inywe awantu awa Yerusaleemu! Oo inywe awantu awaita awagambi awa Katonda, kandi awakuba awamutumrweko na amawaale. Miire okuwa ni nyagala okuwakumia kiomo engoko ekumia winyuunyu wiayo mu embaya ziayo, ni mwalowere.

³⁵Muwoneko, enyumba iinyu ezirrwe. Mbalaga mbwe ng’amuuza okumbona inze, nawuno olwa muriwoola mbwe, ‘Omuntu ooza ku eriina eria Omwami Katonda, asereekwe.’ ”

Luuka 14

Awafarisaayo walwania Yesu

¹Owuire wulala owua Sabato, Yesu yagia owugeni mu enyumba eya omukangasi owa Awafarisaayo okuria. Awafarisaayo awo waamuwarranga kugere watuukre ekia wakamuambra.

²Omuntu yawanga emberi waae ao owalwalanga owulwire owuzimbia amagulu na amakono.

³Yesu yawuuzia Awafarisaayo na awaasomera ensikirra otino, “Mberi ensikirra etuganyiire okulamia omulwire nyanga olwa Sabato, nakuwa yaaya?”

⁴Ni, wasarigira kiri. Yesu yata okukono kwae ku omuntu oyo, amulamia kandi amureka agia.

⁵Nikuemao yawawuuzia otino, “Arioko omuntu ku inywe owa ne eng’ombe yaae nakuwa omwana waae agwire mu owuina olwa Sabato, akareka okumufumiamo ku enyinga ezio?”

⁶Na Awafarisaayo waawula ne ekia wakawoola.

Okuiisia ansi

⁷Olwa yawona awageni awaetrwe kiomo waaikala ku entewe ezia owukaate mu enyumba omwo, yawalaga olugero otino:

⁸“No oetrwe mu owugeni, otaaza walowola entewe eya owukaate oikaleko, aeniki andi omuntu omukaate okukukira aaza yawa mbwe aetrwe mu owugeni owuo.

⁹Ni kuri kutio omuntu owaetre oria aaza yakulaga otino, ‘Rekera omuntu ono entewe eyo.’ Kandi ooza okusuuka no ogia okuikala ku entewe indi eya ansi.

¹⁰Ni, no oetrwe, ikala ku entewe eya ansi kugere no omuntu owaetre oria aazre, aaza yakulaga otino, ‘Omwiko wange, gia oikale ku entewe endootu eria.’ Kandi ooza okueewua owuti emberi wa awageni awiina waa.

¹¹Aeniki awantu wona awainginga kungulu waaza okuisiwua ansi, kandi omuntu oiisiizie ansi aaza okugingwa kungulu.”

Okuwa no omwoyo ogwa okuingizia awantu wona

¹²Nikuemao, Yesu yalaga omuntu owamueta owugeni oyo otino, “No ofumbre okuria okwa owugeni, otaaza waeta mala awiiko waa, ni waamwinyu na awaganda waa, nakuwa awiinyu awari nawio. No okorre otio, wona waaza wakueta, kutio wawa ni wamiire okukuoloola.

¹³Ni no ori no owugeni, eta awataka, awarema, awarema awatagenda-genda alala na awawuunu.

¹⁴No okorre otio, ooza okuserekwa aeniki awo ngawaesa okukuoloola. Ni, ooza okuoloolwa mu okuziuka okwa awalongoole.”

Olugero olwa omugomo ogwa enserezi

(Math 22:1–10)

¹⁵Olwa omulala ku awaawanga ku emeesa ao yawurra amang’ana ago, yalaga Yesu otino, “Omuntu ooza okuria mu owugeni owua Owuami owua Katonda asereekwe.”

¹⁶Yesu yamuirania no olugero otino, “Omuntu wundi yakola owugeni owukaate kandi yaeta awageni awangi.

¹⁷Ne enyinga ezia owugeni ziatuuka, yatuma owemirimo waae agie alage awaaetwa otino, ‘Muuze, aeniki ewintu wiona wimiire okuwa ansi.’

¹⁸Na awantu awo wona waatanika okuwoola ewikagera wareke okuuza mu owugeni owuo. Osookere yawoola otino, ‘Inze nikwo ngurre omusiri, kandi paka ngie nguwane. Nsawa mbwe oganye ondekere.’

¹⁹Owundi yoona yawoola otino, ‘Nikwo nyema okugula amaiiri ikumi aga okurima nyingeeno, kandi ndi ku engira okugia okuzigeezaania mu omusiri. Nsawa mbwe oganye ondekere.’

²⁰Owundi yoona yawoola otino, ‘Nikwo nyema okutoola omweya nyingeeno, kutio ng’anyesa okuuza.’

²¹Kutio, owemirimo oyo yairana alaga omukangasi waae ekia wamulagre. Nikuema omwene enyumba oyo yawa no okusu mala alaga owemirimo waae oyo otino, ‘Gia wuangu mu amasangangira ne endwari ezia mu omugizi guno, ogie oreete muno awataka, awarema, awawuunu alala na awarema awatagendagenda.’

²²Owemirimo oyo yamulaga otino, ‘Omwami, ekia owoorre tumiire okukola, ni iwaga rikiario-uri.’

²³Nikuema omukangasi oyo yalaga owemirimo oyo otino, ‘Fuma ogie mu engira enene ne enzegeega ezia ku omugizi guno kandi oreete awantu muno kugere enyumba yange eizule du.

²⁴Nkulaga mbwe namba omulala ku awantu awanyaeta walowa okuuza, ngaaza okuria mu owugeni wuno.’ ”

Okuwa omulonzi owa Yesu

(Math 10:37–38; 5:13; Mari 9:50)

²⁵Omurima omunene gwagenda-gendanga ni Yesu, kandi Yesu yagaluka awawarra na awalaga otino:

²⁶“No omuntu anyizreko, na akiagonziizie swae namba ng’inwae, mukaae na awaana waae, ni waamwawu waae namba owulamu waae omwene okukira kiomo angonziizie inze, omuntu oyo ngaesa okuwa omulonzi wange.

²⁷Kandi omuntu otagingre omusalaaba gwae andonde ngaesa okuwa omulonzi wange.”

²⁸Yesu yagia emberu na awalaga otino, “Tuwoole mbwe omulala ku inywe aagala okuomboka enyumba eya egorofa. Ngasooka yaikala ansi yakola embala eya ewintu ewia enyumba eyo eeza okutoola, kugere awone na ari na amasendi agasugre okugimaariizia?

²⁹Aeniki, na aombooke atuuke ku owulusa, na akirwe okumaariizia enyumba eyo, awantu wooka awaaza okugiwona waaza okumusekera

³⁰ni wawoola watino, ‘Omuntu ono yatanika okuomboka, no okumaariizia enyumba kumukirre.’

³¹“Nakuwa, tuwoole mbwe omwami wundi aikaga okugia okulwana iye no omwami wundi ori na awa-iye elufu amakumi awiri. Ngasooka yaikala ansi yawona na aesa okumukira na awa-iye waae elufu ikumi weng’ene?”

³²Ni na awuine mbwe ngaesa okukira iye, aaza okutuma awantu waae emberi okuagaana na awantu awa omwami wundi oyo, ni wakiari okuwatuukako kugere wawurizanie nawo ku engira ezia okureeta owuolu.

³³“Kutio, nintio lwona, omuntu-umuntu otarekere ewintu ewia ari nawio wiona ngaesa yawa omulonzi wange.

³⁴Omuunyu mulootu. Ni, ni guteesiizie enzaziima yagwo, guesa okuirana guwe ne enzaziima kandi otie?”

³⁵Ngaguri omulootu okuteewua mu ilowa nakuwa mu ekituri ekia emborra, kutio gufukwa enze. “Omuntu ori na amatwi aga okuwurra, ka-awurre.”

Luuka 15

Olugero olwa igondi eriateeka

(Math 18:12–14)

¹Nyanga awasolozzi awa omusolo alala na awooni wooka waaikumia ku Yesu kugere wamutegerezie.

²Na Awafarisaayo na awagerezi awa endagirra waang’ong’oona ni wawoola watino, “Omuntu ono areeta otie okuikala alala na awooni kandi yaria nawo?”

³Nikuemao, Yesu yawalaga olugero luno:

⁴“Tutoole mbwe omulala ku inywe ari na amagondi mia kilala, ni ilala riteeke. Ngaaza okureka amakumi kienda ni kienda ago mu ekeewa, kandi agie okuagala ilala eriteekere riria, nawuno arituukre?”

⁵Na amiire okurituukra, aringinga ku amawega gaae kandi awa omusangaavu

⁶na agia nario engo. Nikuemao, aeta awiiko waae na awamenyere ampi nae, yawalaga otino, ‘Musangaale alala ni inze aeniki ntuukre igondi riange eriwanga ni riteekere.’

⁷Mbalaga mbwe nintio lwona ekisangaalo ekinene kiwa ku igulu no omwoni omulala agaluuke arekere owuoni okukira awantu amakumi kienda ni kienda awaiwona mbwe wawula no owuoni owua wakagaluka wareke.

Olugero olwa isendi eriateeka

⁸“Nakuwa, tutoole mbwe omukazi wundi ari na amasendi ikumi aga efeedha, na ateesie ilala. Ngaaza okuambia ekimuri, yaeeya enyumba na ariaagala geeza nawuno arituukre?”

⁹Na arituukiire, aeta awiiko waae na awamenyere ampi nae yawalaga otino, ‘Musangaale alala ni inze aeniki ntuukiire isendi riange eriwanga ni riteekere.’

¹⁰Mu engira efwanani eyo, mbalage mbwe ekisangaalo kirio emberu wa enyankoi awa Katonda, no omwoni omulala agaluuke arekere amawi.”

Olugero olwa omuzia owateeka

¹¹Yesu yagia emberu okuwalaga otino, “Yawangao omuntu owawanga na awazia awawiri.

¹²Omuzia omutono yalaga swae otino, ‘Soifu, mpe omugawo ogwa oluwega lwange ku ewintu wiao.’ Kutio, swawu yawagawa ewintu wiae agati yaawu.

¹³“Na amiire gakiari okuwita amangi, omuzia omutono oyo yakunza ewintu wiae wiona alala kandi afuma nawio okugia mu ewialo ewia ale. Na ari eyo, yaria omwandu gwae mu owulamu owua okuteesania agumala chwe!

¹⁴Ni yamala okuria ewintu wiae wiona, enzala enene yafuma mu ekialo ekio, kandi yatanika okuinyaasia ino.

¹⁵Kutio, yagia awa owemirimo owa omuntu wundi owa ekialo ekio, kandi omuntu oyo yamwira ku emisiri giae okuriisia enguruwe.

¹⁶Enzala yagera omwoyo gwae guagala namba okuria ewitorekerwa ewia enguruwe ziarianga ewio, kandi awulao omuntu owamu-aa ekia akaria.

¹⁷“Olwa yairana mu amaingirizio gae amalootu, yawoola omwene otino, ‘Awemirimo awa soifu awameka awaria okuria kwasigala, ni inze mpano enzala enzita ano!

¹⁸Nyiza okufuma nyirane ku soifu ngie mulage otino: Soifu miire okuona emberu wa Katonda kandi emberu waao oona.

¹⁹Ng’ansugaane okuetwa omuzia waao kandi. Ganya mbe ki omulala ku awemirimo waao.’

²⁰“Kutio, yatanika olugendo na airana ku swae. No olwa yawanga na akiari ale, swae yamuwona kandi yamuambra amasaasra. Yarumuka na agia okuaganra omuzia waae. Yamukunaania mu ekifuwa na amakono awiri na amukeezia no olugonzi.

²¹Omuzia oyo yalaga swae otino, ‘Soifu miire okukola owuwiiwi emberu wa Katonda, ne emberu waao oona. Ng’ansugaane okuetwa omuzia waao kandi.’

²²Ni swae yalaga awemirimo waae otino, ‘Mureete enguwo endootu ino mumuingizizie. Mute eteeru ku ekiala kiae kandi mumuingizizie ewiraato ku amagulu gaae.

²³Mureete ekimoori ekinovu mukiwaage. Muuze tuwe no omugomo kandi tusangaale.

²⁴Aeniki omuzia wange ono yawanga na afwire ni nyingeeno aziukre; yawanga na atekere ni nyingeeno aituukraane.’ Kutio waatanika omugomo.

²⁵“Gano ni gaikolanga, omuzia omukulu yawanga na akiari mu emisiri. Olwa yaaza ampi ne engo, yawurra owukana na amazina.

²⁶Kutio, yaeta omulala ku awemirimo amuwuuzia ekiaikolanga.

²⁷Yamuirania otino, ‘Wamwinyu airaane, kutio swao amuitiire akaiiri akanovu aeniki airaane geeza na ari omulamu.’

²⁸“Okusu kwa-amba omuzia omukulu oyo kandi alowa okuingira ku omugizi. Kutio swae yafuma okugia okugamba-gamba nae okumuiyemba aingire.

²⁹Ni iye yairania swae otino, ‘Katio wonako! Ku emiaka gino giona miire okuwa ni nkola emirimo giona kandi nkiari okulowako okuagala kwao. Ni kukawa kutio, okiari okumpa namba akawuzi akatono mbaage ndie na awiiko wange.

³⁰No olwa omuzia waa, omiire okuria ewintu wiao na awasoodo waae ono, airaane engo, omuitiire akaiiri akanovu arie!’

³¹“Swae yamulaga otino, ‘Mwana wange, iwue ori ni inze owuire ki owuire, kandi ewintu wiona ewia ndi nawio ne ewiao.

³²Ni, kutunigiriizie okugoma kandi okusangaala, aeniki wamwinyu ono yawerenga na afwire ni nyingeeno ari omulamu, kandi yawanga na atekere ni nyingeeno aituukraane.’ ”

Luuka 16

Olugero olwa omukangasi owa owemirimo omuwi

¹Yesu yalaga awalonzi waae otino: “Yawangao omuntu omunyazi owa omukangasi owemirimo giae yawoolwangako mbwe yarianga ewintu ewia omukangasi oyo.

²Kutio, yamueta antulo amuwuuzia otino, ‘Ekia nkuwurrako kino niki? Ndage kiomo omiire okuwa no okola na amasendi, aeniki ngoesa okuwa omukangasi owemirimo giange kandi.’

³“Omukangasi owemirimo oyo yaiwuuzia omwene otino, ‘Ekia nkakola niki? Omwene emirimo mpano andumusia mu emirimo gino ni mbula amaani aga okurima kandi nsuka okuwa omusawi-sawi.

⁴Manyire ekia ngia okukola kugere ne emirimo giange giwuere ano awantu wakiaza okuningizia mu amayumba gaawu.'

⁵"Kutio yaeta awantu awaawanga ne emisango egia omukangasi waae omulala ki omulala. Yawuuzia owaaza kuluweri otino, 'Ori no omusango ogwa omukangasi wange oguagana gutie?'

⁶Yamuirania mbwe, 'Amadebe mia munaane aga amavuta aga ensaafu ezia omuti ogwa zaituuni.' Omukangasi owemirimo oyo yamulaga otino, 'Ikala ansi, otoole itu eria omusango gwao kandi ojoje mbwe omusango gwao guri amadebe mia wine.'

⁷Nikuemao yawuuzia owa okuwiri otino, 'Ni iwue, ori no omusango oguagana gutie?' Yamuirania mbwe, 'Amagunia mia kilala aga engaano.' Kandi yamulaga otino, 'Toola itu eria omusango gwao ojoje mbwe gari amakumi munaane.'

⁸Omwene emirimo oyo yatondowola omukangasi owemirimo giae otaawanga omuigolovu oyo, aeniki yakola na amagezi gae ku awa emisango awo okuizuzia enkanga yaae omwene. Aeniki, awantu awa ekialo wamanyire okukola na awiina waawu na amagezi okukira awantu awari mu owueru owua Katonda.

⁹Mbalaga mbwe mukole no owunyazi wuinyu owua ku ekialo kino okuamba owuiko na awantu kugere ni wuwuere, muuza okuingiziwua mu owumenyo owua ku igulu.

¹⁰"Omuntu omuigolovu ku okurinda amatono namba amangi goona awa omuigolovu okurinda. No omuntu otari omuigolovu ku okurinda amatono namba amangi goona ngawa omuigolovu ku okurinda.

¹¹Kutio no otaweere omuigolovu ku okurinda owunyazi owua ku ekialo kuno, naanu katio ooza yakuteera owunyazi owua kuwene mu amakono mbwe orinde?

¹²Ni, no okiari okuwa omuigolovu ku okurinda ekintu ekia owundi, naanu okaku-aa ekintu kiao omwene?

¹³"Awulao oesa okukorra awaami wawiri geeza, wona. Aaza okugonzia omulala, no owundi arege; namba ate omwoyo gwae ku omulala, no owundi atoole owutono. Ngamuesa okukorra Katonda, kandi mwakorra amasendi, yawa."

¹⁴Awafarisaayo wona, awaawanga ni wagonziizie amasendi, waawurra amang'ana gano goona kandi waamusekera ni wamuzerenga.

¹⁵Yesu yawalaga otino, "Inywe ni inywe awaieta aweeru, ni Katonda amanyire emioyo giinyu. Ekia awantu watoola mbwe kinene mu amiiso gaawu, kiwula emirimo mu amiiso aga Katonda.

Ensikirra ezia Katonda ziri na amaani

¹⁶“Ensikirra ezia Muusa na amang’ana aga awagambi ziwanga na amaani nawuno Yowaana Omubatiisi yaaza. Okuamera ao, amang’ana amalootu aga Owuami owua Katonda gamiire okuwa ni galanziwua, kandi awantu woona walwana wukalu okuwuingiramo.

¹⁷Ni, kuri kunyoowu ekialo ni igulu witeeke, okukira enyukuta endala mu ebuuki ezia ensikirra okureka okutuuka.

¹⁸“Omuntu-umuntu orekaane no omukazi waae kandi yakwa owundi, ari owusoodani. Omuntu okwere omukazi omiire okurekana ni iwuae oona ari omusoodani.

Omuntu omunyazi, ni Lazaaro

¹⁹“Yawangao omuntu omunyazi owawanga na aiwoya enguwo endootu ezing’ena-ng’ena ezia iguzi eria kungulu, kandi owawanga na amenyere owulamu owulootu owuire ki owuire.

²⁰Ku ekiriwua kiae, yawangao omusawi-sawi owaetwanga Lazaaro, owa ewisonga wiawanga ni wimiire omuwiri pe.

²¹Kangi olusa lwamurianga ne ewiokuria ewiagwanga ansi eya emeesa eya omunyazi oyo. Namba embwa ziona ziazanga ni zimeena ewisonga wiae.

²²“Enyinga ziatuuka ezia omutaka oyo yafwa, kandi enyankoi waamuginga wamaira mu embavu ezia Abraamu. Omunyazi oria yoona yafwa aawirwa.

²³Na ari mu omurro, aa yawurranga owuwiiwi ino, yaginga amiiso kungulu awona Abraamu ale na ari ni Lazaaro ku entulo waae.

²⁴Kutio, yamueta otino, ‘Soifu Abraamu, mpambre amasaasra otume Lazaaro atoole ekiala kiae ainie mu amanzi, aaze anteere ku olurimi luole, aeniki mpurra owululu ino mu omurro guno.’

²⁵Na Abraamu iye yamuirania otino, ‘Omuzia wange, ingiriziako kiomo ni wawanga no okiari omulamu watuukranga ewintu wiona ewilootu, ni Lazaaro iye yatuukranga ewintu ewiwiiwi. Ni nyingeeno iye ari alootu ano, ni iwue oinyaasia owululu.

²⁶Ni namba ni turekere ago, agati iifu ni iwue owuina owuliire owutugawuule, aa awulao omuntu oesa okuambuka okuema eno na akuuzako eyo, nakuwa okuema eyo na atuuzako eno.’

²⁷“Omuntu oyo yairania otino, ‘Ni kuri kutio nkuiyembere, soifu no oganyire, tuma Lazaaro ku omugizi ogwa soifu,

²⁸aa waawamwifu wataanu wari. Agie awasiagizie kugere woona wataaza waaze asi aa eminyako-nyaako emilulu giri ano.’

²⁹“Ni Abraamu yamulaga otino, ‘Wari na amang’ana agaajojwa mu ebuuki ezia Muusa ne ezia Awagambi; wasugaane wagalonde.’

³⁰“Yamuirania otino, ‘Ngawagawurra yaaya soifu Abraamu; ni mala no omuntu aemere ku awafu awagieko nikwo wakagaluka wareke amawi gaawu.’

³¹“Abraamu yamulaga otino, ‘Ni walowere okuwurra amang’ana aga Muusa na awagambi, ngawaaza okuwurra namba aga omuntu oziukre oemere ku awafu.’ ”

Luuka 17

Ogera Omukristo na airana enyima mu okuganya ariwona owululu

(Math 18:6–7, 15, 21–22; Mari 9:42)

¹Yesu yalaga awalonzi waae otino, “Ewintu ewigera na awantu wairana enyima mu okuganya nawiiza okureka okuwaa. Ni kuriweera owululu omuntu-umuntu ogera na awandi wairana enyima mu okuganya.

²Kuri kulootu okukira no omuntu ogera omulala ku awakiari no okuganya okutono wano na airana enyima mu okuganya, na asiwirweko oluwaare ku igosi, agie arigizwe mu enyanza.

³Kutio, muwarre geeza ewintu ewia mukola! “Ni wamwinyu akorre owuoni, musiagizie. Ni na agaluuke areke amawi gaae, murekere.

⁴Na akuoneere entunda musamvu ku owuire, ni kandi akuiranako entunda musamvu ezio na akulaga mbwe ‘Nkuisasaama ondekere,’ iwue murekere.”

Ekia okuganya kuesa okukola

⁵Awatumwa awo waalaga Omwami otino, “Tusonge okuganya!”

⁶Omwami yawairania otino, “Muweeko namba no okuganya okutono okuagana ne emwo eya karadaali, mukalagre omuti ogwa omukuyu omunene guno mbwe ‘Iiya ne emizi kandi ogie oisimbe mu enyanza,’ kandi guuza okukuwurra.

Emirimo giifu ki awemirimo

⁷“Tutoole mbwe omulala ku inywe ari no owemirimo omurimira nakuwa omuaayira amagondi. Lwona akalaga owemirimo oyo na aemere mu omusiri nakuwa okuaaya mbwe aaze aikale arie nae ku emeesa?

⁸Yawa! Aa okukola otio, aaza okumulaga mbwe, ‘Mfumbre okuria okwa igulo, kandi owe ampi no ondeetra ewintu ni ndia kandi ni nywa. No omiire nikwo omwene ooze oikale orie kandi onywe’?

⁹Lwona aaza okuiranizia owemirimo oyo otioo aeniki akorre ewintu ewia amulagre mbwe akole?

¹⁰Kutio, inywe mwona ni mumiire okukola ewintu wiona ewia mwalagwa mbwe mukole, musugaane muwoole otino, ‘Ifwe na awemirimo-umirimo, kandi tumiire okukola mala emirimo egia tu-aa ni tusugaane tukole.’ ”

Awantu ikumi walamre owugenge

¹¹Ni yawanga ku engira na agia Yerusaleemu, Yesu yawitra agati eya ewialo ewia Samaria ni Galiili.

¹²Ni yawitanga omugizi gundi, awantu ikumi awaalwalanga owulwire owua owugenge waamuagaana. Waaimerra antulo,

¹³kandi waeta no omwoyo ogwa kungulu watino, “Yesu, Omukangasi, tuambreko amagongi!”

¹⁴Olwa yawawona yawalaga otino, “Mugie muilagane ku awoozia.” No olwa waagianga, emiwiri giawu giaona giwa emieru.

¹⁵Omulala ku iwo olwa yawona mbwe amiire okulama, yairana na atondowola Katonda no omwoyo ogwa kungulu.

¹⁶Yagwa mu amagulu aga Yesu na amuiranzia otioo. Omuntu oyo yawanga Omusamaria.

¹⁷Nikuemao, Yesu yawawuuzia otino, “Kane awaema okulamiwua ngawawerenga awantu ikumi? Ni kienda wandi wariai?”

¹⁸Awulao omuntu owawuine mbwe kulootu na airaane okutondowola Katonda, ni mala omuntu omulala omugeni ono?”

¹⁹Nikuemao yamulaga otino, “Ema ogie, okuganya kwao kukununuule.”

Owuami owua Katonda wutuukre

²⁰Olwa Awafarisaayo waawuuzia Yesu olwa Owuami owua Katonda wurituuka, Yesu yawalaga otino, “Owuami owua Katonda ngawuriiza muwuwone na amiiso giinyu,

²¹lwona awantu ngawariwoola mbwe mbuno wuri ano, nakuwa mbwe mbuuria wuri aaria. Ni kutia aeniki emirimo egia Owuami owua Katonda wuwarimo.”

Okuirana okwa Omuzia owa Omuntu

(Math 24:26–27, 37–41, 28)

²²Nikuemao, Yesu yalaga awalonzi waae otino, “Enyinga ziiza ezia muriagala okuwona namba owuire owulala owua Omuzia owa Omuntu, ni ngamuriwona.

²³Awantu wariwalaga mbwe nguuria ari aaria, nakuwa mbwe nguno ari ano! Ni mutarumuka ni muwalonda!

²⁴Aeniki mala kiomo olumesi lumesa lwamurika igulu riona okuemera oluwega olulala kutuuka oluwega lundi, nintio lwona okuirana okwa Omuzia owa Omuntu kuriwa.

²⁵No owusookere, paka arinyaasiwua ku owungi na alowua na awantu awamulwania wano.

²⁶“Mala kiomo kwawanga mu amiire aga Noowa, nintio lwona kuuza okuwa mu amiire aga Omuzia owa Omuntu ari-iranamo.

- ²⁷Awantu waaweerao ni waria, ni wanywa, kandi ni wakwezana nawuno owuire owua Noowa yaingira mu owuato. Kandi omugera gwaza gugia na awantu woona.
- ²⁸“Nintio lwona kwawanga mu amiire aga Luuti. Awantu waaweerangao ni waria, ni wanywa, ni wagula kandi ni waguzia ewintu, waakomeranga kandi waombokanga.
- ²⁹No owuire owua Luuti yafuma Sodooma, omurro na amawaale amayu le wiadodoka ansi ni wiema ku igulu kandi wiawasamba woona wawua chwe.
- ³⁰“Nintio lwona wari-izukirra okuuzza okwa Omuzia owa Omuntu.
- ³¹Omuntu ori ku olusala olwa enyumba yaae, ataika ansi aingire mu enyumba okutoola ewintu wiae ewiri omwo, yaaya. Ori mu omusiri, atairana engo.
- ³²Ingiriziako kiomo omukazi owa Luuti yawa!
- ³³Omuntu-umuntu okaagala okurinda owulamu wuae omwene aaza okuwuteesia, no omuntu oganyire okuteesia owulamu wuae, ariwutuukra.
- ³⁴Mbalaga kuwuene mbwe owuire owuo, awantu wawiri wariwa ni wagona ku ekitanda ekilala, omulala aritoolwa no owundi asigale.
- ³⁵Awakazi wawiri warituukrwa ni wasia, omulala aritoolwa, no owundi arisigala.
- ³⁶Awantu wawiri wariwa mu omusiri omulala, omulala aritoolwa, no owundi arisigala.”
- ³⁷Waamuwuuzia watino, “Ori-ikrai ao, Omwami?” Yawairania otino, “Aa ekintu kifwire, nio aa etaayi ziikumia.”

Luuka 18

Owutuukre awooni waaza okuswawukwa

- ¹Nikuemao, Yesu yalaga awalonzi waae olugero oluwagerera mbwe wasugaane wakole olutuunyo mu okusawa Katonda aa watafwire emioyo.
- ²Yawalaga otino, “Ku omugizi gundi yawangao omukengi owa ekiina owawanga na atatiire awantu namba Katonda.
- ³Yawangao oona omukazi omufwire ku omugizi ogwo owamuuzangako na amurra otino, ‘Kola geeza ongawule no omuzigu wange.’
- ⁴“Yamugiako entunda enyingi, na alowa-ulowa. No, owutuukre, yawoola mu omwoyo gwae otino, ‘Kukawa mbwe ng’antiire omuntu, lwona ng’antiire Katonda,
- ⁵ni, aeniki omukazi ono andambiizie no okuuzza kwae ano, nyiza okuwona mbwe mugawuule geeza no omuzigu waae ono, wusa-wusa aaza okunduyia.’ ”

⁶Nikuemao, Omwami yawalaga otino, “Muwuriire ekia omukengi owa ekiina omuwiiwi oyo yawoola?”

⁷Katio, Katonda ngaaza okukenga ekiina ekilootu ku awalowole waae awamusawa owuire no omuwasu? Kuwuene, ngaaza okukinda na akiari okuwatunzia.

⁸Mbalaga mbwe aaza okuwona mbwe watuukiire ekia waagala wuangu! Ni kukawa kutio, olwa Omuzia owa Omuntu ariiza, mberi arituukra awantu awari no okuganya ku ekialo?”

Olugero olwa Omufarisaayo no omusoloji owa omusolo

⁹Ku awantu wandi awaaingirizianga mbwe wari awalongoole emberu wa Katonda, ni kandi wakiaregere awantu wandi awa wawona ki awooni, Yesu yawakubra olugero luno:

¹⁰“Awantu wawiri waagia mu ekaalu okusawa. Omulala yawanga Omufarisaayo no owundi yawanga omusoloji owa omusolo.

¹¹Omufarisaayo yaimerra kuwuae atanika okusawa otino, ‘Katonda, nkuiranzia otioo aeniki ng’amfwanana na awantu wandi awari awasakuzi, awakola amawi, awasoodani, lwona ng’andi kiomo omusoloji owa omusolo ono.

¹²Nsiwa okuria kawiri ku omudiira kandi mfumia endala ku ikumi ku ewintu wiange wiona.’

¹³“No omusoloji owa omusolo, iye yaimerra antulo enyima kandi ngakaagalanga namba okuginga amiiso awarre ku igulu. Yakuba ekifuwa kiae okulagana mbwe owuoni wuae wumuwiire, na awoola otino, ‘Katonda, mpambre amagongi, ndi omwoni.’

¹⁴Mbalaga mbwe omuntu ono nio owagia engo na ari omweru emberu owa Katonda, ni ng’ani owundi ono. Aeniki omuntu oinginga kungulu emberu owa Katonda ari-isiwua ansi, no omuntu oiisiizie ansi aringingwa kungulu.”

Yesu asereke awaana awato

(Math 19:13–15; Mari 10:13–16)

¹⁵Awantu waareetanga namba awaana wato ku Yesu kugere awateeko okukono awasereke. Olwa awalonzi waae waawona watio, waasoozia awantu awo.

¹⁶Ni Yesu yawaeta mbwe wamuuzeko na awoola otino, “Mureke awaana awato wanyizeko, kandi mutawalowera yaaya. Aeniki Owuami owua Katonda wuri owua awantu awari ki awaana wano.

¹⁷Mbalaga kuwuene mbwe omuntu-umuntu otaingiizie Owuami owua Katonda no okuganya ki okwa omwana muto, ngariwuingiramo.”

Omuwuuka omunyazi

(Math 19:16–26; Mari 10:17–27)

¹⁸Omukangasi wundi yamuwuzia otino, “Omugerezi omulootu, ekia nsugaane nkole niki kugere ntuukre owulamu owutariwua?”

¹⁹Yesu yamuirania otino, “Onyeta omulootu kolaki? Awulao omuntu omulootu mala Katonda eng’ene.

²⁰Ngomanyire ensikirra: ‘Otasooda omukazi owa owundi, otaita, otaiwa, otata ku omuntu amang’ana aga owuweeyi, kandi tia swao ni ng’inwao.’ ”

²¹Yawoola otino, “Ensikirra zino ziona miire okurinda okuamera mu owuana wuto wuange.”

²²Olwa Yesu yawurra gano yamulaga otino, “Ekikukeeyire ne ekintu ekilala: Guzia ewintu wiao wiona, otoole amasendi ogawire awataka, nikwo ooza okuwa no owuwiiko ku igulu. No omiire okukola otio, ooze ondonde.”

²³Olwa omuntu oyo yawurra otio owusangaavu wuae wuwawua, aeniki yawanga omunyazi ino.

²⁴Yesu yamuwarra awona na awula owusangaavu mala awoola otino, “Kuri okukalu kutie ku awantu awari no owunyazi okuingira mu Owuami owua Katonda!

²⁵Aeniki, kuri kunyoowu engamia okuingira mu iwundu eria esindaano okukira omunyazi okuingira mu Owuami owua Katonda.”

²⁶Awantu awaawurra amang’ana gano waamuwuzia watino, “Oesa okununulwa katio naanu?”

²⁷Ni Yesu yawoola otino, “Ekintu ekitaesekana ku omuntu, kiesekana ku Katonda.”

Ekia turituukra ku okulonda Yesu

(Math 19:27–30; Mari 10:28–31)

²⁸Petro yamulaga otino, “Omwami, ifwe tureekere emigizi giifu giona tukulonda!”

²⁹Yesu yawawoorra otino, “Mbalaga kuwuene mbwe awulao omuntu orekere enyumba yaae, nakuwa omukazi, nakuwa waamwawu, nakuwa awiiwuzi, nakuwa awaana, ku amang’ana aga Owuami owua Katonda,

³⁰otaaza okutuukra ewintu wino entunda enyingi okukira mu owulamu wuno, ni mu amiire agaaza arituukra owulamu owutariwua.”

Yesu agamba-gambre olwa okusatu ku okufwa kwae

(Math 20:17–19; Mari 10:32–34)

³¹Yesu yatoola awalonzi waae ikumi ni wawiri awa nawo kuwuawu awalaga otino, “Wuno tugia Yerusaleemu, kandi ewintu wiona ewiajojwa na awagambi ku Omuzia owa Omuntu wigia okutuuka kuwuene.

³²Aeniki agia okuteewua mu amakono aga awatari Awayaudi, awaaza okumukorra amatiicha ne ewintu ewia ensuuko, ni wamufuuzako amate.

³³Waaza okumuswawuka enkowa nikwo wamuite. No owuire owua okusatu aaza okuziuka aeme ku awafu.”

³⁴Awalonzi waae awo ngawakawurra ekia yawalaganga. Ekia yawoolanga kiawaiwisra kandi ngawakamanya ekia yagamba-gambangako.

Yesu alamiizie omuntu omuwuunu

(Math 20:29–34; Mari 10:46–52)

³⁵Ni Yesu yawanga ampi ni Yeriiko, omuwuunu wundi yawanga na aikaale entulo eya engira na asawa-sawa.

³⁶Olwa yawurra omurima ogwa awantu ni guwita gugia, yawawuuzia ekiaikolanga.

³⁷Waamulaga mbwe, “Yesu Omunazareeti nio owita agia.”

³⁸Yaogerera wukalu otino, “Yesu, Omuzia owa Daudi, mpambre amagongi!”

³⁹Na awantu awaawanga emberi waamugaania ni wamulaga mbwe asarigire. Ni iye yagia emberi na akuba erioga ino otino, “Omuzia owa Daudi, mpambre amagongi!”

⁴⁰Yesu yaimerra kandi asikirra mbwe omuntu oyo areetwe ku iye. Olwa yaaza ampi, Yesu yamuwuuzia otino,

⁴¹“Ekia oagala nkukorre niki?” Yamuirania otino, “Omwami, nyagala amiiso gange gawone.”

⁴²Yesu yamulaga otino, “Amiiso gaa kagawone; okuganya kwao kukulamiizie.”

⁴³Ao-ao amiiso gaa gaiguka atanika okuwona, kandi yalonda Yesu na atondowola Katonda. Olwa awantu waawona ekiaikola kino, woona waatondowola Katonda.

Luuka 19

Sakaayo aweere omulonzi owa Yesu

¹Yesu yaingira ku omugizi ogwa Yeriiko kandi yawitanga omwo na agia.

²Omuntu wundi yawangao oetwa mbwe Sakaayo, omukangasi owa awasolozzi awa omusolo, kandi omuntu omunyazi ino.

³Yaagalanga okuwona kiomo Yesu afwanana, ni ngakaesanga aeniki yawanga omuntu omwimpi ino kandi omurima ogwaikumia ku Yesu gwamulowera okumuwona.

⁴Kutio yarumuka agia emberi kandi aniina omukuyu kugere amuwone, aeniki Yesu yaazanga okuwita ku engira eyo.

⁵Olwa Yesu yatuuka asi ao, yawarra kungulu amulaga otino, “Sakaayo, ika ansi wuangu-wuangu aeniki reero ngia okuwa omugeni omwao.”

⁶Kutio yaika ansi wuangu-wuangu kandi aingizia Yesu mu enyumba yaae ne ekisangaalo.

⁷Awantu wona awaawona ekiaikola kino waatanika okung’ong’oona ni wawoola watino, “Agiire okuwa omugeni owa ‘omwoni’.”

⁸Ni Sakaayo iye yaema awoola otino, “Omwami wona! Nyesania enusu eya ewintu ewiange ku awataka nyingeeno. Kandi ni nyatoola ekintu-ukintu ku omuntu ku engira eya owusakuzi, nyiza okumuiranzia aa kane.”

⁹Yesu yamulaga otino, “Reero owuinunuzi wuingiire mu enyumba eno, aeniki omuntu ono oona no omuzia owa Abraamu.

¹⁰Aeniki Omuzia owa Omuntu yaaza okuagarizia kandi okununula awantu awaateeka.”

Olugero olwa awemirimo ikumi awaagekwa amasendi aga edhaabu

(Math 25:14–30)

¹¹Ni waawanga ni wakiategerezia gano, Yesu yatanika okuwalaga olugero, aeniki yawanga na ari ampi okutuuka Yerusaleemu kandi awantu waingirizianga mbwe Owuami owua Katonda wuagianga okutuuka enyinga-uninga.

¹²Nikuemao yawalaga otino, “Omuntu wundi owaemanga mu owuiwulane owua awaami yagianga ku ekialo ekia ale, okuteewua ku entewe eya owuami nikwo airane.

¹³Kutio, ni yawanga na akiari okufuma, yaeta awemirimo waae ikumi awaageka amasendi aga edhaabu ikumi, omuntu ki omuntu endala-ndala. Nikuemao yawalaga otino, ‘Mukole amaara na amasendi aga mbaegeeke gano nawuno nyirane.’

¹⁴“Na awantu awayagianga okuwa omwami waawu waatuma omutumwa gumulonda, mbwe ngawamuagala awe omwami waawu.

¹⁵Kukawa kutio, yateewua ku entewe eya owuami kandi airana engo. Nikuemao, yatumania mbwe awemirimo waae awa yaegeka amasendi garia waetwe, kugere amanye ekia wamiire okutuukra kungulu.

¹⁶“Osookere yaaza emberi waae amulaga otino, ‘Omukangasi, isendi eria waanyegeka rimiire okuiwula agandi ikumi kungulu.’

¹⁷“Omwami waae yamulaga otino, ‘Okorre geeza ino iwue owemirimo omulootu kandi omuigolovu! Aeniki omiire okuwa omulongoole ku okurinda amatono geeza, katio nyiza okuegeka emigizi ikumi emikaate orinde.’

¹⁸“Owa okuwiri yaaza awoola otino, ‘Omukangasi, isendi eria waanyegeka riiwuule agandi itaanu kungulu.’

- ¹⁹“Omukangasi oyo yamulaga otino, ‘Iwue ooza okurinda emigizi emikaate itaanu.’
- ²⁰“Nikuemao owemirimo wundi yaaza amulaga otino, ‘Omukangasi, isendi riao eria waanyegeka ndino. Nyawanga ni ndisiwre mu ekiraka, ndiwiika ale.
- ²¹Nyawanga ni nkutiire, aeniki ori omuntu omugugu, otoola ewintu asi aa ataata ewiaae, kandi ogesa aa otaakomera.’
- ²²“Omukangasi waae yamulaga otino, ‘Nyiza okukengera ekiina nikulondokana na amang’ana agaemere mu omunwa gwao, iwue owemirimo omuwiiwi ono! Owuo owoola mbwe wawanga no omanyire mbwe ndi omuntu omugugu, otoola ewintu aa ataata ewiaae, kandi mbwe ngesa aa ntaakomera?’
- ²³Ni kuri kutio, kane ekiakulowera okuwiika isendi riange mu ebenki kugere ni nyiraane ndituukre ni rimiire okuiwula agandi kungulu niki?’
- ²⁴“Nikuemao yalaga awaawanga ni waimeriire antulo ao otino, ‘Mumutooleko isendi eria ari nario erio, mu-ee omuntu ori na amasendi ikumi oria.’
- ²⁵“Waamulaga watino, ‘Omukangasi, oria ari na amasendi ikumi goona!’
- ²⁶“Yawairania otino, ‘Mbalaga kuwuene mbwe omuntu-umuntu okola geeza ne ekia aegeekwe, nio orisongwa amangi. No omuntu otakola geeza ne ekia aegeekwe, aaza okunyagulwa namba ekitono ekia yaegekwa.
- ²⁷Ni ku awazigu wange awaalowa mbwe namba-aa omwami waawu waria, muwareete ano kandi muwaite emberu wange ano.’ ”

Yesu aingiziiwue Yerusaleemu ne ekisangaalo

(Math 21:1–11; Mari 11:1–11; Yowa 12:12–19)

- ²⁸Olwa Yesu yamala okuwoola gano, yagia emberu no olugendo lwae olwa okugia Yerusaleemu.
- ²⁹Olwa yatuuka ampi ni Bethfaage ni Bethania, ku ekigiri ekietwa mbwe Zaituuni, yatuma awatumwa waae wawiri emberu
- ³⁰na awalaga otino, “Mugie mu ekitemo ekiri emberu kiiria, aa ni muingira mugia okutuukra entikiri embuuka eya omuntu akiari okuniinako ne esiwirwe ku olugoe. Mugisiwule mugireete ano.
- ³¹No omuntu awawuuziizie mbwe ‘Ekigera ni mugisiwula niki?’ mumulage mbwe, ‘Omwami nio ogiagala.’ ”
- ³²Kutio, awaatumwa awo waafuma wagia watuukra entikiri eyo kiomo Yesu yawalaga.
- ³³Ni waasiwulanga entikiri eyo, aweeneyo waawawuuzia watino, “Ekigera ni musiwula entikiri eyo niki.”
- ³⁴Waawairania watino, “Omwami nio ogiagala?”

³⁵Waareeta entikiri eyo ku Yesu, wagiaziako enguwo ziawu nikwo waikazia Yesu ku omugongo gwayo.

³⁶Ni yagianga emberi, awantu waa-anzuula enguwo ziawu ku engira.

³⁷Olwa yatuuka ampi, ku ekiserengeto ekiika no oema ku ekigiri ekia Zaituuni, omurima ogwa awaamulondanga gwatanika okuogerera wukalu ne ekisangaalo ni watondowola Katonda ku ewintu ewikate-kaate ewia waawona.

³⁸Waawoola watino, “Asereekwe iye Omwami ooza ku eriina eria Omwami Katonda. Owuolu wuweeo ku igulu, kandi owunene wueewue ori kungulu okukira.”

³⁹Awafarisaayo wandi awaawanga mu omurima ogwo waalaga Yesu watino, “Omugerezi, gaania awalonzi waao wareke okuogerera!”

⁴⁰Yawairania otino, “Mbalaga mbwe ni wasarigiire namba amawaale gano gaaza okuogerera ni gatondowola Katonda.”

⁴¹No olwa yatuuka ampi kandi awona omugizi omunene ogwa Yerusaleemu, yagurra

⁴²na awoola otino, “Kanga mbwe namba inywe mwona mumanyire nyingeeno ekikawareetra owuolu. Ni kukawa kutio, kiwawisiire kandi ngamukiwona.

⁴³Amiire gaaza aga awazigu waao waaza okukuigarra wakusunguuzie embega ziona.

⁴⁴Warikugwisia ansi, iwue alala na awaana waao awakumenyeremo kandi ngawarireka namba iwaale ilala ni riigereeke ku rindi. Aeniki ngokamanya enyinga ezia Katonda yakuuzako okukununula.”

Yesu arumuusie awaguzi mu ekaalu olwa okuwiri

(Math 21:12–17; Mari 11:15–19)

⁴⁵Nikuemao, Yesu yaingira mu ekaalu atanika okurumusia awaguzi awaaguzianga ewintu mu ekaalu na awafumia omwo.

⁴⁶Yawalaga otino, “Kwajojwa mbwe ‘Enyumba yange eeza okuetwa enyumba eya okusawa’ ni inywe mugigaluusie ‘Owuiwiso owua awasakuzi.’”

⁴⁷Owuire ki owuire Yesu yagereranga mu ekaalu omwo. Awakangasi awa awoozia na awagerezi awa endagirra alala na awakangasi awa Awayaudi, waagalanga engira eya okumuita.

⁴⁸Kukawa kutio ngawakatuukra engira eya okukola otio, aeniki awantu awangi waawanga ni wamuikumiizieko ni wawurra amang’ana gaae.

Luuka 20

Awakangasi awa Awayaudi wawuuziizie Yesu aa amaani gaae gaema

(Math 21:23–27; Mari 11:27–33)

¹Owuire wulala, ni Yesu yawanga na agerera awantu mu ekaalu kandi na alanzia injiili, awakangasi awa awoozia, na awagerezi awa endagirra alala na awagaaka waamuuzako.

²Waamuwuzia watino, “Tulageko mbwe na amaniiki aga okola nago ewintu ewia okola wino? Okueere amani gano naanu?”

³Yawairania otino, “Noona nyagala okuwawuzia okuwuzia okulala, munyiranie.

⁴Amaani aga Yowaana yabatiisa nago awantu, gaaema ku igulu ku Katonda, kusi ku omuntu?”

⁵Waaiwuzia ku ing’ana rino agati yaawu aweene watino, “Ni tuwoorre mbwe ‘Gaamuemera ku igulu’ aaza okutuwuzia mbwe, ‘Ekiawalowera okumuganyako niki?’

⁶Ni, ni tuwoorre mbwe ‘Gaamuemera ku awantu,’ awantu wano woona waaza okutukuba na amawaale, aeniki waganyire kuwene mbwe Yowaana yawanga omugambi owa Katonda.”

⁷Kutio waamuirania mbwe, “Ngatumanyire aa gaaema.”

⁸Yesu yawalaga otino, “Noona ng’anyiza okuwalaga aa amani aga nkola nago ewintu wino gaema, yaaya.”

Olugero olwa awarimi awaakodeesa omusiri

(Math 21:33–46; Mari 12:1–12)

⁹Yesu yatanika okulaga awantu olugero luno: “Omuntu wundi yasimba emizabiibu mu omusiri gwae mala agu-aa awarimi wandi wagukodeesa wagurinde, nikuemao afuma agia mu ekialo kindi aweera eyo ku amiire amangi.

¹⁰Olwa enyinga ezia igesa ziatuuka, yatuma owemirimo wae ku awarimi awo kugere wamueeko ensaafu zindi ezia ku omusiri ogwa emizabiibu ogwo. Na awarimi awo waamukuba kandi wamurumusia airana amakono masa.

¹¹Yatuma owemirimo wundi, ni oyo oona waamukuba kandi wamukorra ewintu ewia ensuuko, nikwo wamurumusia airana amakono masa.

¹²Yatuma kandi owemirimo wundi owa okusatu. Ni ono waamukuba wamunyaala nikwo wamuzigiza enze eya omusiri.

¹³Nikuemao, omwene omusiri oyo yawoola otino, ‘Eki nkakola niki? Nyiza okutuma omuzia wange owa ngonziizie. Andi waaza waamu-aa owuti.’

¹⁴No olwa awarimi awo waamuwona, waawoola aweene watino, ‘Ono nio osugaane arie omwandu ogwa ng’ina omusiri. Mutumuute kugere omusiri guno gutusigarre.’

¹⁵Kutio waamurigiza enze eya omusiri kandi wamuita. “Katio niki ekia omwene omusiri aaza okukorra awantu awo?”

¹⁶Aaza okuita awarimi awo, nikuemao atoole omusiri ate mu amakono aga awandi.” Olwa waawurra amang’ana gano, waawoola watino, “Kino kitaaza kiaikola!”

¹⁷Yesu yawawarra nikwo awawuuzia otino, “Kane amang’ana agaajojwa mbwe, “‘Iwaale eria awaomboki waalowa nirio eriairana riwa ilootu eriambiriire enzizi eya enyumba,’ galaganaki?”

¹⁸Omuntu-umuntu oigunyire ku iwaale erio aaza okuvunika wutono-tono, no owa iwaale erio rigwireko riiza okumusia ki egunduusi.”

¹⁹Olwa waamanya mbwe niwo Yesu yawanga na akuba olugero luno, awagerezi awa endagirra na awakangasi awa awoozia waageraania engira eya okumuamba enyinga ezio, ni waatia awantu awaawanga ao.

Okufumizia Kaisaari omusolo

(Math 22:15–22; Mari 12:13–17)

²⁰Kutio, waamuwarranga ino kandi wamutumako awantu awaisemerezia mbwe wari nae owulootu kugere wamutuukreko owuwi ku ekintu ekia awoorre omwene, ekikagera wamuire emberu wa omukangasi owa ekialo.

²¹Waaza waamuwuuzia watino, “Omugerezi, tumanyire mbwe ewia owoola ne ewia ogerera wiri kuwuene, kandi ngotiire amiiso aga awantu. Ni, iwue ogerera mala engira eya Katonda mu engira eri kuwuene.

²²Tulageeko, mberi endagirra iifu etuganyiire okufumizia Omwami Kaisaari omusolo, nakuwa yaaya?”

²³Yesu yamanya owuchege wuawu, kandi awalaga otino,

²⁴“Mundageko isendi eria edinaari. Kino ne ekiiruuzia ekia anu? Kandi rino ne eriina eria anu?” Waamuirania watino, “Kaisaari.”

²⁵Nikuemao yawalaga otino, “Mu-ee Kaisaari ewia Kaisaari, ne ewia Katonda mu-ee Katonda!”

²⁶Ni ngawakaesanga okumuamba ku ekintu ekia yawoola emberu wa awantu ao. Ni waaluguula ino ku okuirania okwa yawairania, kutio waasarigira kiri.

Awasadukaayo wawuuzia Yesu ku okuziuka

(Math 22:23–33; Mari 12:18–27)

²⁷Awasadukaayo awaalowanga mbwe okuziuka okwa awafu kuwulao, waaza ku Yesu

²⁸waamuwuuzia watino, “Omugerezi, Muusa yatujojera mu ensikirra mbwe no omuntu afwire arekeo omukazi okiawula awaana, wamwawu osigaale paka agereme omukazi oyo, kugere afumie enyumba eya wamwawu.

- ²⁹Waawangao awazia musamvu awa omuntu omulala. Omukulu yatoola omukazi, ni yafwa na akiari okuiwula nae awaana.
- ³⁰Owa okuwiri yamugerema, ni oona yafwa na ataiwuule nae omwana.
- ³¹Nikuemao owa okusatu yamugerema, kandi nintio awazia musamvu awo woona waawa nae, ni wafwa ni wataiwuule nae omwana.
- ³²Lunyima, omukazi oyo oona yafwa.
- ³³Katio, olwa awantu wariziuka, omukazi oyo ariwa omukazi owa anu ku awasaaza musamvu awaawa nae ki awasaaza waae wano?”
- ³⁴Yesu yawairania otino, “Awantu awa ikula eria nyingeeno rino wakwa kandi wakwewua.
- ³⁵Na, awa Katonda awuine mbwe wasugre okuwa mu ikula eriiza kandi mu okuziuka okuema ku awafu, iwo ngawarikwa kandi ngawarikwewua.
- ³⁶Ngawarifwa mala kiomo enyankoi, kandi wariwa awaana awa Katonda awa aziusie okuema ku awafu.
- ³⁷Ni ku okuziuka okwa awafwu, namba Muusa oona yalagana mu omunayo ogwa isaka eriayianga mbwe awafu waesa okuziuka, olwa yaeta Omwami Katonda mbwe ‘Katonda owa Abraamu, Katonda owa Isaaka, kandi Katonda owa Yakoobo’
- ³⁸Ngari Katonda owa awafu, yaaya, na ari Katonda owa awalamu. Aeniki awantu woona watuukra owulamu ku iye.”
- ³⁹Awandi ku awagerezi awa endagirra waairania watino, “Owoorre geeza ino omugerezi!”
- ⁴⁰Kutio, awulao omuntu owasianiya okumuwuuzia embuuzia indi kandi.

Kristo ari Omuzia owa Daudi

(Math 22:41–46; Mari 12:35–37)

- ⁴¹Nikwo Yesu yawawuuzia otino, “Wareeta watie okuwoola mbwe Kristo no Omuzia owa Daudi?
- ⁴²Aeniki, Daudi omwene awoola mu ebuuki eya Zaburi mbwe, “ ‘Omwami Katonda yalaga Omwami wange otino, Ikala nyakukono kwange okusaaza,
- ⁴³nawuno nte awazigu waao ansi ya amagulu gao.’
- ⁴⁴Ni Daudi amueta mbwe Omwami waae, katio Kristo awa otie omuzia waae kandi?”

Yesu asiagizia awakangasi awa ediini eya Awayaudi

(Math 23:1–12; Mari 12:38–40)

- ⁴⁵Olwa awantu woona waamutegerezianga, Yesu yalaga awalonzi waae otino,

⁴⁶“Muwe amankaga ne enkola ezia awagerezi awa endagirra awagonziizie okugenda-genda ni waiwooye enguwo endiire-ndiire na amakeezio aga owuti aga wakeeziwua nago mu ewiyyia. Lwona wagonziizie okuikala ku entewe endowole mu amasinagoogi kandi warumukra amawaga agatengekrwe awakangasi mu emigomo.

⁴⁷Wasemerezia awakazi awafwire ni wawariako ewintu kandi wasawa okusawa okuliire okwa okuilagana emberu wa awantu. Iwo warikengerwa ekiina ekiwiiwi okukira awandi.”

Luuka 21

Omukazi omufwire afumiizie okukira wona

(Mari 12:41–44)

¹Ni Yesu yawanga mu olwanyu olwa ekaalu na agerera, yawona awanyazi ni wafumia ewintu wiawu ni wata mu esanduuki eya okuta amasendi agafumiziwua Katonda.

²Yawona omukazi omufwire omutaka na ataamo eela iwiri ziang’ene.

³Nikuemao yawoola otino, “Mbalaga kuwue mbwe omukazi omufwire omutaka ono afumiizie amangi okukira awantu wano wona.

⁴Aeniki awandi wona wafumiizie amatono okuema ku owunyazi owungi owua wari nawuo, no omukazi omutaka ono iye afumiizie goona aga awerenga nago mu owulamu wuae.”

Ekaalu eya Katonda eeza okuonwa

(Math 24:1–2; Mari 13:1–2)

⁵Awandi ku awalonzi wae waagamba-gambanga ku ekaalu, kiomo yaombokwa na amawaale amalootu agaomerezia kandi elongwa ne ewintu ewiafumiziwua Katonda. Yesu yawoola otino,

⁶“Amayumba aga muwona ano gano, goona gaaza okugemulwa gawuere ansi kandi riwulao namba iwaale ilala eriiza okusigala ni riigereeke ku erindi.”

Ewilago ewia owutuuko owua ekialo

(Math 24:3–14; Mari 13:3–13)

⁷Waamuwuzia watino, “Omugerezi, ni ri olwa ewintu wino wiriikola, kandi ewirilagana mbwe wiri ampi okuikola niki?”

⁸Yawairania otino, “Muwe amankaga mutaaza mwateesiwua no omuntu, aeniki awantu awangi waaza okuuzza ne eriina riange ni wawoola mbwe, ‘Ni inze Kristo, ni inze Kristo,’ kandi mbwe ‘Enyinga zimiire okutuuka.’ Ni mutawalonda.

⁹Ni muuza okuwurra mbwe amaye galwana, kandi mbwe awantu wataagulana, ago gatawatiisia. Aeniki ewintu wino paka wiikole owusookere, ni mumanye mbwe owutuuko ngawuuzza okutuuka ku enyinga ezio.”

- ¹⁰Nikuemao, yawalaga otino, “Enganda zirilwana, kandi ewialo ewia owuami wirilwana.
- ¹¹Okuzegera okunene okwa ekialo kuriwaaokandi enzala na amalwire amangi wiriwaao mu ewialo ewingi. Lwona ewintu ewitiisia wiriwaao, alala ne ewilago ewiluguulwa ku igulu.
- ¹²“Ni ne ewintu wino wiona wikiari, waaza okuwa-ambakandi wawanyaasie ino. Waaza okuwaira emberiwawa ewiina mu amasinagoogikandi wawaingizie mu owusiwe. Lwona, muuza okuirwamu ewiina emberiwawa awakangasi na awaami awa ewialo ku amang’ana aga eriina riange.
- ¹³Kuno kuriwa-aa iwaga eria okuwoola amang’ana gange emberiwawa.
- ¹⁴Mutainyaasia ni muingirizikiomo muuza okuwairania mu ekiina.
- ¹⁵Aeniki nyiza okuwa-aa amang’ana aga muriwoola na amaganga, aa awulao omuzigu wiinyu origalwaniakuwa origalowa mbwe ngagari kuwuene.
- ¹⁶Muuza okuguziwuwanamba na awiiwuziwiinyu, waamwinyu, awaganda wiinyu na awiiko wiinyu, kandi awandi ku inywe waaza okuitwa.
- ¹⁷Muriregwa na awantu awa ewialo wiona ku amang’ana gange.
- ¹⁸Kukawa kutio, awulao ku inywe oriteesia owulamu wuae.
- ¹⁹Ni muimerrewukalu nikwo murinunula owulamu wuinyu.

Emidambo egiriamba awantu awa Yerusaleemu

(Math 24:15–22; Mari 13:14–20)

- ²⁰“Ni muwuine omugizi ogwa Yerusaleemu ni gusunguuziwwue guteerwe agati na awa-iiye, mumanye mbwe guri ampi okuonwa.
- ²¹Kutio awantu awari Yudeea wasomoke wagie mu ewigiri, na awari mu emigizi emikaate wagifumemo kandi awari enze eya emigizi egio watagiiranamo.
- ²²Aeniki gano nigo amiire aga okuswawukwa okutuusia goona agaajojwa na awagambi awa Katonda.
- ²³Kuriweera awakazi, awa amiire ago garituukra ni wari awazito namba ni wanuunia, uwiiwi owufwana wutie? Aeniki emidambo egiluguulwagiriwa ku ekialo kandi Katonda ariswawuka awantu wano.
- ²⁴Awandi wari-itwa ne emiambe egia iiye na awandi wariambwa wairwe mu ewialo windi. Omugizi ogwa Yerusaleemu guritazwa-tazwako na awatari Awayaudi nawuno amiire aga waeerwe gawue.

Ewintu ewirilagana mbwe okuirana okwa Yesu kuri ampi

(Math 24:29–31; Mari 13:24–27)

²⁵“Ewilago wiriwaa ku enyanga, ku omwenzi ni ku eng’eni-ng’eni. Ni ku ekialo, awantu awa ewialo wiona wariwa no owuti ni waluguula ekiikola, olwa wariwurra okubolooka no okusawaala okwa amasiira aga enyanza.

²⁶Owuti wurigera omuuka guwuere awantu ni waingirizia ekiwi ekiluguulwa ekiiza okuikola ku ekialo kiona. Aeniki ewintu ewiri ku igulu wirizegera

²⁷kandi awantu wariwona Omuzia owa Omuntu na aaza mu ire na ari na amaani no owunene owungi.

²⁸Olwa ewintu wino wiritanika okuikola, mueme kandi muinge amiiso giinyu kungulu muwarre, aeniki owuinunuzi wuinyu wuriwa ampi okutuuka.”

Okuigerera ku omuti ogwa omukuyu

(Math 24:32–35; Mari 13:28–31)

²⁹Nikuemao yawalaga olugero luno: “Muwarreko omuti ogwa omukuyu, ne emiti gindi giona.

³⁰Enyinga ezia gisewuuke na amatu amaolu, muuza mwawona aweene kandi mwamanya mbwe entwigo eri ampi.

³¹Mu engira endala eyo, ni muwuine wino ni wiikola, muwe no okumanya mbwe Owuami owua Katonda wuri ampi.

³²Mbalaga kuwuene mbwe ikula rino ngariiza okuwita, wino wiona ni wikiari okuikola.

³³Igulu ne ekialo wiiza okuwua chwe, na amang’ana gange ngagariwua.

Awulao omanyire owuire owua okuirana okwa Yesu

(Math 24:36–44; Mari 13:32–37)

³⁴“Muwe amankaga kandi muirinde. Wusa-wusa emioyo giinyu giiza giatoolwa ne ewisangaalo ewia ekialo, okudung’a na amalwa, alala na amaingirizio aga ekialo, nawuno muizukirre owuire owuo ni wutuuka ni mutamanyire.

³⁵Aeniki awantu wona awamenyere mu ewitemo wiona ewia ku ekialo wari-izukirra owuire owuo kalala ki omuweto ni watamanyire.

³⁶Muwe amiiso amiire goona, kandi musawe Katonda kugere mumizuke ku ewintu ewiiza okuikola wino, kandi muimerre emberu wa Omuzia owa Omuntu.”

Yesu yagereranga owuire ki owuire mu ekaalu

³⁷Amiire goona Yesu yagereranga mu ekaalu omuwasu, kandi ni kwatuukanga igulo yagianga ku ekigiri, ekiaetwanga mbwe ekigiri ekia Zaituuni, aa yaweeranga owuire wuona.

³⁸Kandi awantu wona waazanga mu ekaalu kunkio okumutegerezia.

Luuka 22

Awakangasi awa ediini eya Awayaudi wagala okuita Yesu

(Math 26:1–5; Mari 14:1–2)

¹Omugomo ogwa Omukaati oguwulamo amamera, oguetwa mbwe Pasaaka, katio gwawanga ni guri ampi okutuuka.

²Awakangasi awa awoozia na awagerezi awa endagirra waagalanga engira eya okuita Yesu, ni waatia awantu.

Yudaasi aganyire okuguzia Yesu

(Math 26:14–16; Mari 14:10–11)

³Nikuemao Sataani yaingira mu omwoyo ogwa Yudaasi oetwa mbwe Iskarioti, owawanga omulala ku awalonzi ikumi ni wawiri.

⁴Yudaasi yagia ku awakangasi awa awoozia na awarinzi awakaate mu ekaalu agamba-gamba nawo ku kiomo akata Yesu mu amakono gaawu.

⁵Waasangaala ino kandi waaganyana okumu-aa amasendi.

⁶Kutio yaganya kandi yatanika okuagala iwaga eria okumuta mu amakono gaawu, aa awantu awangi wawula.

Okuikagra omugomo ogwa Pasaaka

(Math 26:17–19; Mari 14:12–16)

⁷Owuire owua omugomo ogwa Omukaati ogutazogrwe na amamera wuatuuika, olwa ekimaatwa ekia Pasaaka kiaitwanga ki omusango.

⁸Kutio, Yesu yatuma Yowaana ni Petro na awalaga otino, “Mugie mutuikazizie okuria asi aa tugia okuriira Pasaaka.”

⁹Iwo waawuuzia watino, “Omwami, na ai aa wagala mbwe tukuikazizie omugomo ogwo?”

¹⁰Yesu yawairania otino, “Ni munaingira ku omugizi omunene, muuza okuagana omusaaza ogingre entamu eya amanzi. Mumulonde paka mu enyumba eya agia okuingiramo.

¹¹Mulage omwene enyumba eyo mutino, ‘Omugerezi atutumre, tuuze tukuwuzie mbwe enyumba eya awageni eya akariiramo omugomo ogwa Pasaaka na awalonzi waae eriai?’

¹²Omuntu oyo aaza okuwalaga enyumba enkaate eri kungulu ku egoroofa erimo ewintu wiona ewiagalana. Ao nio mutuikazizie tuuze turiiremo.”

¹³Waagia watuukra ewintu wiona mala kiomo Yesu yawalaga otio. Kutio waafumba okuria okwa Pasaaka wakuikazia omwo.

Yesu aria okuria okwa Pasaaka na awalonzi waae

¹⁴Olwa enyinga ezia okuria ziatuuka, Yesu yaigolola okuria na awatume waae ku emeesa.

¹⁵Yawalaga otino, “Miire okuwa na amiiga aga okuria ni inywe okuria okwa Pasaaka kuno ni nkiari okuwona eminyako-nyaako emilulu.

¹⁶Aeniki mbalaga kuwuene mbwe ng’anyiza okuria ni inywe kandi, nawuno ekia okuria kuno kulagana kutuuke kuwuene mu Owuami owua Katonda.”

¹⁷Nikuemao yatoola ekikombe ekia edivaai, airania otioo nikwo awoola otino, “Mutoole ekikombe kino kandi mukinyweremo kusangu-sangu.

¹⁸Aeniki mbalaga mbwe okuemera nyingeeno, ng’anyiza okunywa edivaai eema ku ensaafu eya omuzabiibu kandi, nawuno Owuami owua Katonda wuuze.”

Amasaai aga endagano empia

(Math 26:26–29; Mari 14:22–25; 1Kori 11:23–25)

¹⁹Nikuemao, yatoola omukaati, kandi olwa yamala okuikazia Katonda, yagugenyula kandi agu-aa awalonzi waae na awalaga otino, “Guno no omuwiri gwange oguezaniiwue ku inywe. Mukole mutino ni munyingirizia nagwo.”

²⁰Mu engira yazane eyo, ni waamala okuria, yatoola ekikombe ekia edivaai awoola otino, “Ekikombe kino ne ekia endagano empia eya amasaai gange, aga mufukirwa.

Yesu awoorre ooza okumuguzia

(Math 26:20–25; Mari 14:17–21; Yowa 13:21–25)

²¹“Ni muwone, omuntu ogia okunguzia aria ni inze ku emeesa eno.

²²Aeniki Omuzia owa Omuntu aaza okufwa aemeo mala kiomo kwamala okuteewua kale. Ni kuriweera omuntu omuguziizie wululu ino!”

²³Awalonzi waae waatanika okuiwuuzia naanu agati yaawu okakola ekintu ekifwana kitio.

Oagala okukangata paka awe omukurumu owa awandi

(Math 20:25–28; 19:28; Mari 10:42–45)

²⁴Nikuemao waatanika okuikululana mu amang’ana agati yaawu ni waagala okumanya owawanga omunene agati yaawu.

²⁵Yesu yawalaga otino, “Awakangasi awa awantu awa ekialo kino walagana amaani aga wari nago ku awa wakangatiire. Kukawa kutio, wakiagala mbwe waetwe ‘awatunzi’ awa awantu.

²⁶Ni inywe mutawa otio. Owugawuuke nawo, omuntu ori omunene agati iinyu awe ki omwana omuto, kandi omukangasi awe ki owemirimo.

²⁷Agati ya omuntu oria ku emeesa no omuntu omureetra okuria, naanu ori omunene okukira owundi? Omuntu oria ku emeesa ng’anio ori omunene? Ni inze ndi agati iinyu ki owemirimo.

²⁸“Inywe muri awantu awamiire okuimerra ni inze mu eminyako-nyaako egia miire okuwona.

²⁹Kandi mba-aa amaani aga owuami, mala kiomo Soifu yoona yampa amaani aga owuami,

³⁰kugere murie kandi munywe ku emeesa eya ndiko mu owuami wuange, kandi muikale ku entewe ezia owuami okukengera ewiriango ikumi ni wiwiri ewia Israeli ekiina.”

Yesu awoorre mbwe Petro aaza okumulowa

(Math 26:33–35; Mari 14:29–31; Yowa 13:36–38)

³¹Yesu yalaga Petro otino, “Simioni, Simioni! Sataani aagala okuwaseesa ki amaemba.

³²Ni, miire okukusawira iwue Simioni, kugere okuganya kwao kutaaza kwairana enyima. Kandi no omiire okuimerra wukalu, okalangusie awiina waa.”

³³Yamuirania otino, “Omwami, inze nganyire okugia ni iwue mu owusiwe namba okukufwira.”

³⁴Yesu yamulaga otino, “Nkulaga Petro, engoko ngeeza okulagula owuire wuno, no okiari okulowa kasatu mbwe ngomanyire.”

Eminyako-nyaako egiri emberi

³⁵Nikuemao Yesu yawawuuzia otino, “Ni nyawatuma ni mutagingre ewibeeti, ensawo nakuwa ewiraato, kiriooko ekia mwataka?” Waamuirania mbwe, “Yaaya, kiwulao.”

³⁶Yesu yawalaga otino, “Ni nyingeeno no ori ne ekibeeti ne ensawo zitoole, kandi no owula no omwambe ogwa olugangala, guzia ikooti riao ogie ogule.

³⁷Kujojrwe mbwe, ‘Yateewua alala na awantu awooni’; kandi mbalaga mbwe kino paka kituuke kinyiikorre. Aeniki, ewintu ewiajojwa ku inze katio wituukre wiikola.”

³⁸Awalonzi waae waamulaga watino, “Omwami wona, gino ne emiambe iwiri egia olugangala.” Yawairania otino, “Agiogisugre!”

Yesu asawa Gethsemaani ku ekigiri ekia Zaituuni

(Math 26:36–46; Mari 14:32–42)

³⁹Yesu yafuma na agia ku ekigiri ekia Zaituuni kiomo kwawanga enkola yaae, kandi awalonzi waae waamulonda.

⁴⁰Olwa waatuuka asi ao, yawalaga otino, “Musawe kugere mutagwa ni mugeezaniwua.”

⁴¹Yawaemako agia emberi waawu ampi nawo, akuba amasigamo kandi atanika okusawa otino,

⁴²“Soifu, no okaganya, ntoorroo ekikombe ekia emidambo kino ntakinywa. Ni kutaaza kwawa okuagala kwange, no okuagala okwao kuwe mbwe nikwo okuikola.”

⁴³Enyankoi wundi yaema ku igulu kandi amukalangusia.

⁴⁴Ni aeniki yawanga no owululu mu omwoyo yasawa no omwoyo ogwa munsini, kandi oluuya olwa amasaai lwamuemako ni lutoonya ku ilowa.

⁴⁵Olwa yaema mu okusawa, yairana ku awalonzi waae atuukra ni waluyire ni wagona, ku okuwa okwa waawanga no owululu owua emioyo.

⁴⁶Yawawuuzia otino, “Mugona kolaki? Mueme musawe kugere mutagwa ni mugeezaniwua.”

Yesu aguziwe kandi a-ambrwe

(Math 26:47–56; Mari 14:43–52; Yowa 18:1–11)

⁴⁷Ni yawanga na akiagamba-gamba, omurima ogwa awantu gwaingira ni gukangatiirwe no omuntu oetwa Yudaasi, owawanga omulala ku awalonzi ikumi ni wawiri. Yagia ku Yesu okumukeezia na amunuuna,

⁴⁸ni Yesu yamuwuzia otino, “Yudaasi, owuo oguzia Omuzia owa Omuntu na amakeezio no okumunuuna?”

⁴⁹Olwa awalonzi awa Yesu waamanya ekiagianga okuikola waumulaga watino, “Omwami, mberi tukawalwania ne emiambe giifu?”

⁵⁰Omulala ku awalonzi awo yata omwambe ku owemirimo owa Omukangasi omunene owa awoozia, amukewa okutwi okusaaza, kuwuera ansi chee.

⁵¹Ni Yesu yawagaania otino, “Muwareke wakole ekia waagala.” Kandi yata okukono kwae ku okutwi okwa omuntu oyo kandi amulamia.

⁵²Nikuemao, Yesu yalaga awakangasi awa awoozia, na awakangasi awa ekaalu alala na awagaaka, awaaza okumuamba otino, “Munyiziire ne emiambe egia olugangala ne ewirungu ki awagiira omukangasi olwania esirikaali otino kolaki?”

⁵³Olwa nyawanga ni inywe owuire ki owuire mu olwanyi olwa ekaalu, mutampamba. Ni zino nizio enyinga ziinyu, ezia amaani aga ekierema gakola emirimo.”

Petro alowa mbwe ngamanyire Yesu

(Math 26:69–75; Mari 14:66–72; Yowa 18:25–27)

⁵⁴Waamuamba wagia nae kandi wamuiru mu enyumba eya Omukangasi omunene owa awoozia. Petro yawalonda enyima ale wutono.

⁵⁵Olwa waamala okukuma omurro agati eya olwanyi oluri agati eya amayumba kandi waikumia alala ku omurro ogwo, Petro oona yaaza aikala nawo.

⁵⁶Owemirimo owekiala yamuwona na aikaale mu owueru owua omurro. Yamuwarra geeza kandi awoola otino, “Omuntu ono oona yawanga nae.”

⁵⁷Ni iye yalowa na awoola mbwe, “Omukazi iwue, inze ng’amumanyire.”

⁵⁸Lunyima wutono, omuntu wundi yamuwona, mala awoola otino, “Kuwuene ori omulala ku iwo.” Ni Petro yamuirania otino, “Omugaaka iwue, inze ng’andi nawo.”

⁵⁹Ne enyinga ezikasuga enyinga endala ziawita, kandi omuntu wundi oona yawoola otino, “Kuwuene omuntu ono yoona yawerenga nae, aeniki ari Omugaliili.”

⁶⁰Ni Petro yamuirania otino, “Yaaya, inze ng’amanyire ekia owoola!” Ao-ao ni yawanga na akiagamba-gamba, engoko yalagula.

⁶¹Omwami yagaluka mala awarra Petro mu amiiso. Nikuemao Petro yaingirizia amang’ana aga Omwami, kiomo yamulaga mbwe, “Ne engoko ekiari okulagula owuire wuno, ooza okulowa kasatu mbwe ngomanyire.”

⁶²Yafuma enze kandi arra wululu ino.

Awarinzi wakorra Yesu amatiicha

(Math 26:67–68; Mari 14:65)

⁶³Awantu awaawanga ni warinda Yesu waatanika okumusekera kandi okumukuba.

⁶⁴Waamusiwa amiiso ne ekitambaaya nikwo wamuwuuzia watino, “Tulageeko amang’ana aga owugambi. Okukubre naanu?”

⁶⁵Kandi waawoola ewintu ewingi ewia amanyego ku iye.

Yesu airwe mu oluwuga olwa awagaaka

(Math 26:59–66; Mari 14:55–64; Yowa 18:19–24)

⁶⁶Olwa wuakia, awagaaka awa oluwuga olwa Awayaudi waaikumia alala, awagingre awakangasi awa awoozia na awagerezi awa endagirra. Yesu yatoolwa airwa emberu wa oluwuga olwa awagaaka. Waatanika okumuwuuzia watino,

⁶⁷“Ni kuri mbwe ni iwue Meesia, tulage.” Ni Yesu yawalaga otino, “Ni mbalagre, ngamuuza okuganya ni inze,

⁶⁸kandi ni mbawuuziizie ekintu, ngamuuza okunyirania.

⁶⁹No okuemera nyingeeno, Omuzia owa Omuntu aaza okuikala nyakukono okusaaza okwa amaani aga Omwami Katonda.”

⁷⁰Woonna waawuuzia watino, “Katio ni iwue Omuzia owa Katonda?” Yawairania otino, “Inywe aweene mumiire okuwoola mbwe ni inze.”

⁷¹Nikuemao waawoola watino, “Ekia tukiagarra awawoni wandi niki? Ifwe aweene tuwuriire ekia awoorre no omunwa gwae omwene.”

Luuka 23

Awayaudi waire Yesu ku Pilaato

(Math 27:1–2, 11–14; Mari 15:1–5; Yowa 18:28–38)

- ¹Nikuemao awagaaka awa Awayaudi woona waema kandi wamuirira ku Pilaato.
- ²Kandi waatanika okumingirra ni wawoola watino, “Tutuukiire omuntu ono na aona awiifu, na awalaga mbwe watafumia omusolo ku Omwami Kaisaari, kandi awoola mbwe iye ono ni iye Meesia, omwami!”
- ³Pilaato yawuuzia Yesu otino, “Mbwe iwue ni iwue omwami owa Awayaudi?” Yesu yamuirania otino, “Omwene ni iwue owoorre otio.”
- ⁴Nikuemao Pilaato yalaga Awakangasi awanene awa awoozia alala no omurima ogwo otino, “Kiwulao ekia ntuukiire ku omuntu ono ekia akairrwa mu ekiina.”
- ⁵Na awantu waamunigirizia ni wawoola watino, “Engerera yaae emiire okuwa ne ereeta erioga asi-uasi aa agiire mu ekialo ekia Awayaudi kiona. Yatanikra Galiili kandi nyingeeno atuukre ano.”

Yesu airwe mu ekiina emberi wa Eroode

- ⁶Olwa yawurra amang’ana ago, Pilaato yawuuzia ni kuri mbwe omuntu oyo yawanga Omugaliili.
- ⁷Kandi olwa yamanya mbwe Yesu yawanga owa ekialo ekia Eroode yawanga na arindre, yamutuma ku Eroode owawanga na ari Yerusaleemu ku enyinga ezio.
- ⁸Olwa Eroode yawona Yesu, yawa no owusangaavu ino, aeniki yawanga na amiire okuagala okumuwona ku amiire amangi. Ni, nikulondokana ne ekia yamuwurrangako, yarindiranga okumuwona na akola amankono.
- ⁹Yamuwuuzia embuuzia enyingi, ni Yesu ngakamuirania namba ing’ana ilala.
- ¹⁰Awakangasi awa awoozia alala na awagerezi awa endagirra awaawanga ni waimeriire ao waamuingirra ni wamuwoolako amang’ana amangi.
- ¹¹Eroode na awalangra waae waamunyaasia ni wamukorra amatiicha ni wamusekera. Nikuemao yamuingizizia enguwo endiire eya owuami kandi amuirania ku Pilaato.
- ¹²Owuire owuo Eroode ni Pilaato waawa awiiko, ne enyima waawanga awazigu.

Pilaato ateere Yesu mu amakono aga awantu wamuwambe

(Math 27:15–26; Mari 15:6–15; Yowa 18:39—19:16)

- ¹³Nikuemao Pilaato yaeta awakangasi awa awoozia, na awakangasi awa ekialo, alala na awantu wandi,
- ¹⁴awalaga otino, “Mundeetiire omuntu ono mumuingirra mbwe amiire okuwa na areeta erioga mu ewialo. Omwene miire okumugenderezia emberi wiinyu ano, ndeka okutuukra ekintu ekilamu ekia akairwa nakio mu ekiina.
- ¹⁵Namba Eroode oona ngakamutuukrako ekintu kandi wuno amuiraanie ku ifwe ano. Kiomo mwona muesa okuwona, kiwulao ekia akorre ekikagera akengerwe ekiina ekia olumbe.

- ¹⁶Kutio, nyiza okumuswawuka kandi musiwule agie.”
- ¹⁷Mu omugomo ogwa Pasaaka, omwaka ki omwaka, Pilaato yasugananga awasiwurre omusiwe omulala.
- ¹⁸Ni woona waaogerera wukalu no omwoyo omulala watino, “Mututooleko omuntu ono aemeo! Tusiwurre Barabaasi!”
- ¹⁹Barabaasi yawanga na aterwe mu owusiwe ku okureeta erioga ku omugizi omunene ao, no okuita omuntu.
- ²⁰Pilaato kandi yawaiyemba, aeniki mu omwoyo gwae yaagalanga asiwule Yesu.
- ²¹Ni iwo waagia emberu ni waogerera watino, “Muwambe! Muwambe ku omusalaaba!”
- ²²Yawaiyemba kandi olwa okusatu otino, “Kolaki? Niki ekia akorre ekisugre no olumbe? Inze ng’ankamutuukrako ekintu ekiwi ekisugre no olumbe. Kutio, nyiza okumuta aswawukwe, nikuemao musiwule agie.”
- ²³Ni iwo waaogerera wukalu ni wanigirizia mbwe Yesu awambwe ku omusalaaba, kandi erioga riawu riagera wakira.
- ²⁴Kutio Pilaato yakenga ekiina mbwe wakorrwe kiomo waagalanga.
- ²⁵Yasiwula omuntu owa waamusawa, owawanga na aterwe mu owusiwe ku okureeta erioga ku omugizi omunene no okuita omuntu. Ni yata Yesu mu amakono gaawu kugere wamukorre kiomo waagalanga.
- Okuwambwa okwa Yesu ku omusalaaba**
(Math 27:32–44; Mari 15:21–32; Yowa 19:17–27)
- ²⁶Ni waagianga nae, waagaana Simioni omuntu owa Kureene na aema olugendo enze, kandi kuno kwatuukra na aingira ku omugizi ogwo. Waamutwika omusalaaba ogwa Yesu na amaani, okuguginga na aema enyima wa Yesu.
- ²⁷Omurima omunene ogwa awantu gwamulonda, ni warimo awakazi awaamurranga ni wakuba enkweri.
- ²⁸Yesu yagaluka kandi awalaga otino, “Inywe awaala awa Yerusaleemu, mureke okundira. Ni muirre inywe aweene, kandi murre awaana wiinyu.
- ²⁹Aeniki enyinga ziiza ezia muuza okuwoola mutino, ‘Wari ne enkawi awakazi awaataiwula, enda ezitaaginga awaana, kandi embeere ezitaanuunia!’
- ³⁰Nikuemao waaza okugamba-gamba ne ewigiri mbwe, ‘Mutugweko!’ Kandi warilaga ewigiri ewitono mbwe wiwasanikre!
- ³¹Aeniki, ni kuri mbwe awantu wakola wino no omuti gukiari omuwisi, katio muingirizia mbwe niki ekiiza okuikola no omuti ogukarre?”

- ³²Awantu wawiri wandi, awaawanga awooni awakianyaanya, woona waairwa nae okugia okuitwa.
- ³³Olwa waatuuka asi aetwa mbwe Ekiyanga ekia Omutwe, waamuwamba ku omusalaaba ao alala na awooni wawiri awo, omulala nyakukono okusaaza no owundi nyakukono okumosi.
- ³⁴Yesu yawoola otino, “Soifu, warekere, aeniki ngawamanyire ekia wakola.” Kandi waagawana enguwo ziae ku okukuba ensiiti.
- ³⁵Awantu waimerra ao ni wawona ekiaikolanga; na awakangasi waawu iwo waamusekera ne ekirega watino, “Mbwe yanunula awandi, iye oona ainunuleko reero, ni kuri mbwe nio Kristo, Omulowole owa Katonda!”
- ³⁶Awalangra awo woona waamurizira amang’ana ni wamusekera. Waatoola amalwa amalulu pe watanika okumu-aa mbwe anywe
- ³⁷ni wamulaga watino, “Ni kuri mbwe ni iwue omwami owa Awayaudi, inunulako omwene!”
- ³⁸Riawangao ibaawu nyamutwe gwae kungulu ku omusalaaba eriajojwa otino: ono nio omwami owa awayaudi.
- ³⁹Omulala ku awooni awakianyaanya owaawamba nae, yamurizira amanyego otino, “Kane ngori Meesia? Inunulako omwene kandi twona otununule!”
- ⁴⁰No omwina wae yamugaania otino, “Iwue ngotiire Katonda, aeniki tukengeerwe ekiina owufwanani nae?”
- ⁴¹Ifwe okwifu kisugre ne enkola ziifu embiwi, no omuntu ono iye kiwulao ekiwi ekia akorre.”
- ⁴²Nikuemao yamulaga otino, “Yesu onyingirizie olwa oriiza mu owuami wuao.”
- ⁴³Yesu yamuirania otino, “Nkulaga kuwuene, mbwe reero ooza okuwa ni inze mu Paradiiso.”

Okufwa okwa Yesu ku omusalaaba

(Math 27:45–56; Mari 15:33–41; Yowa 19:28–37)

- ⁴⁴Ziawanga katio enyinga ezia mukaaga, kandi ekierema kia-amba ekialo kiona nawuno kutuuka enyinga ezia kienda,
- ⁴⁵aeniki enyanga yareka okuwala. Kandi epasia eya mu ekaalu yatanduka aa kawiri.
- ⁴⁶Nikuemao Yesu yaeterezia no omwoyo oguri kungulu otino, “Soifu, nteere omwoyo gwange mu amakono gaao.” Olwa yamala okuwoola amang’ana gano, yakewa enkolo.
- ⁴⁷Olwa omukangasi owa awa-iye yawona ewiaikola wino, yatondowola Katonda kandi awoola otino, “Kuwuene, omuntu ono kane yawanga omweru!”

⁴⁸Kandi olwa awantu woona awaikumia ao okuwona ekiagianga okuikola waawona agaikola gano, waaiamba ni wari no owululu, wafuma ni wagia.

⁴⁹Awantu woona awaawanga ni wamanyire Yesu alala na awakazi awaamulonda okuamera Galiili waawanga ni waimeriire ale ni wawona ewiaikolanga wino.

Owuawizi owua Yesu mu iwuuta

(Math 27:57–61; Mari 15:42–47; Yowa 19:38–42)

⁵⁰⁻⁵¹Yawangao omuntu wundi oetwa Yoseefu owaemanga ku omugizi ogwa Awayaudi oguetwa Arimathea mu ekitemo ekia Yudeea. Yawanga omuntu omulootu kandi omulongoole, owarindiranga okuuza okwa Owuami owua Katonda. Yawanga omulala ku awagaaka awa oluwuga, ni iye yagawukana na awiinae ku ewintu ewia waawisia kandi ewia waakolanga wino.

⁵²Omuntu ono yagia ku Pilaato amusawa omuwiri ogwa Yesu kandi Pilaato yamuganyira.

⁵³Nikuemao, yagia aguisia ansi aguwasaania ne ekitambaaya, kandi ogingizia mu iwuuta iyia eriwanga ni riawirwe mu iwaale, aa omuntu wundi yawanga na akiari okuawirwamo.

⁵⁴Wuawanga owuire owua okuikagra Sabato, kandi Sabato yawanga ne eri ampi okutanika.

⁵⁵Awakazi awaawanga ni waemere ni Yesu Galiili waria waawalonda, kandi wawona owuina owuo ni kimo omuwiri gwae gwateewua omwo.

⁵⁶Nikuemao waafuma wagia engo kandi waikazia emiti na amavuta agawunya esaami aga okuuza okuwaka nago omuwiri ogwa Yesu. Ni waawuluuka olwa Sabato kimo ensikirra yaagalanga.

Luuka 24

Okuziuka okwa Yesu

(Math 28:1–10; Mari 16:1–8; Yowa 20:1–10)

¹Nyanga olwa omudiira ogwa okuwiri kunkio ino, awakazi awo waagia ku ekiwaga ekia Yesu, ni wagingre emiti na amavuta agawunya esaami aga waaikazia.

²Waatuukra oguwaale ni gugalangasiwue gutoorrwe ku omunwa ogwa iwuuta.

³No olwa waingira, ngawakatuukra omuwiri ogwa Yesu omwo.

⁴Ni waawanga ni wakialuguula eking'ana ekio, waaizukira awantu awawiri awaiwooye enguwo enzeru zerre ni waimeriire ampi nawo.

⁵Owuti wuawa-amba kandi waafunamia emitwe ansi. Nikuemao awantu awo waawalaga watino, “Ekigera ni muagala omulamu agati eya awafu niki?”

⁶Muingirizie ekia yawalaga ni yawanga na akiari Galiili,

⁷mbwe Omuzia owa Omuntu ariteewua mu amakono aga awantu awooni, kandi ariwambwa ku omusalaaba afwe, no owuire owua okusatu ariziuka.”

⁸Nikuemao waaingirizia amang’ana aga yawalaga ago.

⁹Olwa waairana ni waema ku ekiwaga, waalaga awatumwa ikumi ni mulala, alala na awalonzi wandi wona, ewintu wino wiona.

¹⁰Maaria omwala owa Eumagidaala, ni Yoani, ni Maaria ng’inwawu Yakoobo na awakazi wandi awaawanga nawo, waalaga awatumwa amang’ana gano.

¹¹Ni iwo waatoola amang’ana aga awakazi awo ki amang’ana aga owusa, kandi waagalowa wasiriisia.

¹²Kukawa kutio, Petro iye yafuma arukumuka na agia ku ekiwaga. Yaikirra awarra munsu kandi awona ewitambaaya ewieru ni wiriao wusa, kandi yairana ku omugizi na aluguula ekiaikola kino.

Yesu afumiire awalonzi waae ku engira egia Emausi

(Mari 16:12–13)

¹³Owuire wuazane owuo, awalonzi wawiri waawanga ku engira ni wagia mu ekitemo ekietwa mbwe Emausi, ekiri emaeli musamvu okuema Yerusaleemu.

¹⁴Waagamba-gambanga alala ni wawoola ewintu wona ewiawanga ni wiikorre ampi.

¹⁵Ni waawanga ni wakiagamba-gamba ku amang’ana ago, Yesu yawaazako atanika okugenda-genda nawo alala.

¹⁶Ni waawiswa aa ngawakaesanga okumumanya.

¹⁷Yesu yawawuuzia otino, “Eki mugamba-gambako ni mugenda-genda kino niki?” Waimerra kalala, ewieni wiawu ni wilagana okuwula kwawu no owusangaavu.

¹⁸Omulala, ku eriina Kiliopaasi, yamuirania ne embuuzio otino, “Kane iwue eng’ene ni iwue omugeni otamanyire ewintu ewimiire okuikola Yerusaleemu wuangu ano?”

¹⁹Yesu yawawuuzia mbwe, “Ewintuki ewio?” Waamuirania watino, “Ewintu ewia izuuzi wiaikorra Yesu Omunazareeti. Yawanga omugambi owa amaani amangi ku amang’ana aga yawoolanga ne ewintu ewia yakolanga emberu wa Katonda na awantu wona.

²⁰Awakangasi awa awoozia alala na awakangasi wiifu izuuzi waamuingirra kugera akengerwa ekiina ekia olumbe, kandi wamuwamba ku omusalaaba.

²¹Ni ifwe twawanga no okuganya mbwe iye nio owaazanga okununula Awaisraeli. Nyingeeno no owuire owua okusatu okuamera ewintu wino wiikole.

²²Owukirre ago, awiina wiifu wandi awekikazi watuluguuzie na amang'ana mbwe wagiire ku ekiwaga reero kunkio ku amagambaazi,

²³ni wareka okutuukra omuwiri gwae! Mbwe wawuine owusasuko owua enyankoi awawalagre mbwe Yesu ari omulamu.

²⁴Nikuemao awiina wiifu awandi wagiire paka ku ekiwaga kandi wakituukra mala kiomo awakazi awo watulagre, ni ngawakawona omuwiri gwae.”

²⁵Yawalaga otino, “Muri awasiru awafwana watie, kandi muri awa emioyo emizito okuganya amang'ana aga awagambi wamiire okuwoola!

²⁶Kane Kristo ngayawanga mbwe paka ainyaasie ku ewintu wino nikwo aingire mu owunene wuae?”

²⁷Kandi yawalaga amang'ana goona agari mu endagano agamugamba-gambako, okutanikra ku Muusa na awagambi woona.

²⁸Olwa waatuuka ampi no omugizi ogwa Emausi ogwa waagiango, Yesu yaikola ki owita okugia emberi.

²⁹Ni waamuiyemba ni wamulaga watino, “Ingira owe ano ni ifwe, aeniki ekisirisiri mpano ki-ingira, kandi owuire mpano wuwuirre.” Kutio, yaingira aweera ao nawo.

³⁰Ni yawanga na aria ku emeesa nawo, yatoola omukaati, airania otioo nikwo agugenyula, kandi atanika okuwagawira.

³¹Nikuemao amiiso gaawu gaaiguka wamumanya, kandi ao-ao yateeka mu amiiso gaawu.

³²Waiwuuzia aweene watino, “Awiifu, owuolu ngawuwerenga ni wuizuuzie emioyo giifu enyinga ziona ezia awerenga na agamba-gamba ni ifwe ku engira, na atunawurra amang'ana agari mu endagano eya Katonda?”

³³Waaema kalala wairana Yerusaleemu wagia watuukra eyo awatumwa ikumi ni mulala waria, na awandi awaawanga nawo ni waikumre alala

³⁴ni wawoola watino, “Kuri kuwuene! Omwami aziukre, kandi afumiire Simioni amuwona.”

³⁵Nikuemao awawiri wano woona waawalaga ekiawaikorra ku engira, kandi kiomo waamanyirizia Yesu olwa yawagenyurra omukaati.

Yesu afumiizie owutumwa owunene
(Math 28:16–20; Mari 16:14–18; Yowa 20:19–23)

³⁶Ni waawanga ni wakiawoola amang'ana gano, waaizukira ni Yesu omwene aimeriire agati yaawu kandi awakeezia.

³⁷Waazinduka amasaai kandi owuti wuwa-amba ni waingirizia mbwe wawuine ekiiruuzia.

³⁸Yawalaga otino, “Ekigera ni muinyaasia mu emioyo giinyu kandi no okutaganya kuwa mu emioyo giinyu niki?”

³⁹Muwarre amakono gange na amagulu gange mumanye mbwe ono ni inze! Mumpambe muwone mbwe ng’andi ekiiruuzia, aeniki ekiiruuzia kiwula ne enyama ne ewigumba kiomo ndi ntino.”

⁴⁰Olwa yamala okuwoola amang’ana gano, yawalaga embala eziawanga ku amakono na amagulu gaae.

⁴¹Waawanga ni wakiari ni kaozi, ne eno ni waizuule no owusangaavu alala no okuluguula. Yesu yawawuuzia otino, “Mberi muri ne ekintu ano ekia tukaria?”

⁴²Waatoola emvwa ensambe wamu-aa,

⁴³kandi yagitoola agiria emberu waawu.

⁴⁴Yawalaga otino, “Wino niwio ewintu ewia nyawalaga olwa nyawanga ni inywe: Ewintu wiona ewiajojwa ku inze mu ensikirra ezia Muusa alala ne ebuuki ezia awagambi ni mu Zaburi wiona wiawanga mbwe paka wituuke kuwene.”

⁴⁵Nikuemao yaigulao amongo gaawu kugere wawurre amang’ana agari mu endagano.

⁴⁶Yawalaga otino, “Ni ntino kwajojwa, mbwe Kristo arinyaasiwua kandi afwe, no owuire owua okusatu ariziuka aeme ku awafu.

⁴⁷Kandi mbwe okugaluka okureka amawi no okurekerwa amawi kuuza okulanzwua ku eriina riae ku awantu awa ewialo wiona, okutanikra Yerusaleemu.

⁴⁸Inywe muri awawoni awa ewintu wino.

⁴⁹Ngia okuwatumra ekintu ekia Soifu yawaifuuwira. Ni mutafuma Yerusaleemu ano nawuno mutuukre amaani agaema ku igulu.”

Yesu aguluuke agiire ku igulu

(Mari 16:19; Awat 1:9–11)

⁵⁰Olwa yamala okuwafumia awaira enze ampi no omugizi ogwa Bethania, yaginga amakono gaae kungulu awasereka.

⁵¹Ni yawaserekanga otio, yawaemako awareka, kandi yatoolwa aniiniwua ku igulu.

⁵²Nikuemao waamusawa kandi wairana Yerusaleemu no owusangaavu owungi.

⁵³Kandi waaweera mu ekaalu enyinga ziona ni watondowola Katonda.

Yowaana

Yowaana 1

Ing'ana eriairana riwa omuntu

- ¹Mu owutanikro, ing'ana riawangao. Ing'ana riawanga ni Katonda kandi ing'ana riazane erio riawanga Katonda.
- ²Okuemera mu owutanikro, ing'ana rino rimiire okuwaa ni Katonda.
- ³Ewintu wiona wiawaa mala ni kuwita ku ing'ana, kandi kiwulao-uwula ekintu ekiawaa ni kutawitiire ku iye.
- ⁴Ing'ana riesana owulamu kandi owulamu owuo wuri owueru owumurikra awantu wona.
- ⁵Owueru wuwala mu ekierema ekiri mu ekialo, ni kukawa kutio, ekierema ekio ngakiesa okuwuzimia.
- ⁶Ario omuntu owa Katonda yatuma ku awantu. Omuntu ono yaetwanga mbwe Yowaana.
- ⁷Yaaza okulaga awantu amang'ana aga owueru owuo kugere ku amang'ana gaae, ni kuesekana, awantu wona waganye ku owueru wuazane.
- ⁸Iye omwene ngakawanga owueru owuo yaaya, ni yaaza mala okulaga awantu amang'ana ku owueru owuo.
- ⁹Owueru owua kuwuene wuno, owumurikra awantu wona, wuazanga ku ekialo.
- ¹⁰Yawanga ku ekialo, ni kukawa mbwe ekialo kialukwa ni kuwita ku iye, awantu awa ku ekialo ngawakamumanyirizia.
- ¹¹Yaaza ku awantu waae omwene, na awaae awo ngawakamuingizia.
- ¹²Na awantu wona awaamuingizia kandi awaaganya ku eriina riae, yawa-aa amaani aga okuwa awaana awa Katonda.
- ¹³Yaaya, ng'ana awaana awaaiwulwa mu engira eya amasaai, nakuwa mu okuagala okwa omuntu nakuwa omusaaza, ni na awaana awa Katonda nio ogerre ni wawa awaana waae.
- ¹⁴Ing'ana riawa omuntu kandi riamenya agati iifu. Tumiire okuwona owunene wuae — owunene owua omulala eng'ene owaaza na aema ku Soifu Katonda, na aizuule no owusiza no owuene.
- ¹⁵Yowaana na amugamba-gambako aogerera na awoola otino, "Ono nio owa nyawanga ni ngamba-gambako olwa nyawoola mbwe, 'Omuntu ooza enyima wange, ankirre ale aeniki yasooka okuwaa inze ni nkiari.' "

¹⁶Ee, ni kuema ku owusiza wuae owungi, tumiire okutuukra ensereki enyingi okukira eya twawanga nayo enyima.

¹⁷Kuri kutio aeniki ensikirra ziaezaniwua ni kuwitra ku Muusa, no owusiza no owuene wiaza ni kuwitra ku Yesu Kristo.

¹⁸Awulao-uwula omuntu omiire okuwona Katonda, ogawuuke no Omuzia owa Katonda omulala eng'ene, oisigikaane ni Katonda Soifu. Iye nio omiire okugera awantu ni wamanya Soifu Katonda.

Ekiagera Yowaana Omubatiisi na abatiisa awantu

¹⁹Kino nio ekintu ekia Yowaana yawoola olwa awakangasi awa ediini eya Awayaudi awa ku omugizi ogwa Yerusaleemu waamutumra awoozia na Awalaawi okumuwuuzia owa yawanga.

²⁰Yowaana ngakalowa okuwairania, ni yawoola owuigoloole geeza otino, "Inze ng'andi Meesia yaaya."

²¹Kutio waamuwuuzia kandi watino, "Kane ori anu? Ni iwue Eliija oiraane ku ekialo?" Yowaana yawairania mbwe, "Yaaya ng'ani inze." Waamuwuuzia kandi watino, "Kusi ni iwue Omugambi owa Katonda owa tumiire okuwa ni turindirra?" Ni Yowaana yawairania kandi na awoola mbwe, "Yaaya ng'andi iye."

²²Owutuukre, waamuwuuzia watino, "Katio ni iwue anu kane? Tulage kugere tutuukre ekia tugia okulaga awatutumre. Iwue, ekia okaiwoolako omwene niki?"

²³Yowaana yawairania na amang'ana aga Isaaya omugambi owa Katonda otino, "Ni inze omwoyo ogwa omuntu oetana mu ekeewa na awoola mbwe, 'Mugolole engira eya Omwami ewe enyigolovu.'"

²⁴Awantu awaatumwa ni waema ku Awafarisaayo waria

²⁵waamuwuuzia watino, "Ekigera no obatiisa awantu katio niki, ni kandi ngori Eliija, namba Meesia, ni lwona ngori Omugambi?"

²⁶Yowaana yawairania otino, "Inze mbabatiisa na amanzi, na ario omuntu agati iinyu owa mutamanyire.

²⁷Oyo nio omuntu ooza enyima wange, owa ng'asugre namba okusiwula engoe ezia ewiraato wiae."

²⁸Ewintu wino wiona wiaikola Bethania, eri nyaluwega olwa ewufumanyanga eya oluuzi olwa Yordaani, aa Yowaana yabatiisanga awantu.

Yesu Ekimaatwa ekia Katonda

²⁹Owuire owualondako Yowaana yawona Yesu na amuzako ampi. Yalaga awa yawanga nawo otino, "Muwoneko, ono nie Ekimaatwa ekia Katonda ekitoalao amawi aga ekialo.

³⁰Ni iye owa nyagamba-gambrengako olwa nyawoolanga mbwe, ‘Omuntu ooza enyima wange, ankirre ale aeniki yasooka okuwaaao inze ni nkiari.’

³¹Omwene ng’anyakawanga ni manyire mbwe ni iye Meesia, ni nyaaza okubatiisa awantu na amanzi kugere Awaisraeli wamumanye.”

³²Nikuemao, Yowaana yamuwoolako owuyanga otino, “Nyawona Omwoyo Omweru na aika okuema ku igulu mu embonekano eya iemba-emba, mala rimugwiriirako.

³³Katonda owantuma mbwe mbatiise awantu na amanzi, arekeko okundaga mbwe, ‘Omuntu owa oriwona Omwoyo Omweru ogwa Katonda na agwiriirako, oyo nio omuntu ooza okubatiisa awantu no Omwoyo Omweru ogwa Katonda,’ ng’ankamumanyiriizie mbwe ni iye Meesia.

³⁴Miire okuwona ekintu ekio ni kimwikolako, kandi mboola owuyanga mbwe ono nio Omuzia owa Katonda.”

Awalonzi awa Yesu awa kuluweri

³⁵Enkio walwo, Yowaana yawanga alala ao na awalonzi waae wawiri.

³⁶Olwa yawona Yesu na awita, yawoola otino, “Muwoneko, oria nio Ekimaatwa ekia Katonda!”

³⁷Olwa awalonzi waae wawiri wano waamuwurra na awoola otio, waatanika okulonda Yesu.

³⁸Yesu yawarra enyima, awona ni wamulonda mala awawuuzia otino, “Ekia muagala niki?” Waamuirania ni wamuwuuzia watino, “Rabii, omenyerei?” (‘Rabii’ rilagana mbwe ‘Omugerezi’)

³⁹Yesu yawairania otino, “Muuze muwone.” Kutio waagia nae wawona aa yawanga na amenyere kandi waweera ao nae owuire owuo. Waagia nae ni zigia okutuuka enyinga ine ezia kunkio.

⁴⁰Omulala ku awalonzi awa Yowaana owawurra ekia Yowaana yawoola mala atanika okulonda Yesu ono, yawanga Andereeya wamwawu Simioni Petro.

⁴¹Ekia Andereeya yasooka okukola, no okuagala wamwawu waae Petro, kandi olwa yamutuukra yamulaga otino, “Tutuukiire Meesia!” (‘Meesia’ ne eking’ana ekia Oluibrania ekilagana mbwe ‘Kristo, omulowole owa Katonda.’)

⁴²Nikuemao yatoola Petro aira ku Yesu. Olwa waamutuukra, Yesu yamuwariira aemao amulaga otino, “Iwue ni Simioni omuzia owa Yowaana. Ni, ooza okuetwa ne eriina ‘Keefa’ erigalusiwua mbwe Petro.” (‘Petro’ ne eking’ana ekia Olugiriiki ekilagana mbwe ‘olutare.’)

Yesu aetre Piliipo ni Nathanieli

⁴³Enkio walwo, Yesu yawona mbwe agie Galiili. Yagia atuukra Piliipo amulaga otino, “Ndonde.”

⁴⁴Piliipo yoona yaemanga ku omugizi ogwa Bethsaida aa Petro ni Andereeya woona waaemanga.

⁴⁵Piliipo yagia atuukra Nathanieli amulaga otino, “Nathanieli, mwakuuno tutuukiire omuntu owa Muusa yajojako mu ensikirra kandi owa awagambi awa Katonda woona waajojako. Omuntu wazane aetwa Yesu, omuzia owa Yoseefu, Omunazareeti.”

⁴⁶Nathanieli yamuirania otino, “Owoola mbwe Omunazareeti? Lwona kirio ekilootu ekikaema Nazareeti?” Piliipo yamulaga otino, “Iza owone kane.”

⁴⁷Olwa Yesu yawona Nathanieli na aaza ampi, yamulaga otino, “Awiifu muwoneko Omuisraeli omwene-omwene owulamo owuweeyi.”

⁴⁸Nathanieli yawuuzia Yesu otino, “Iwue oreetere otie okumanya?” Yesu yamuirania mbwe, “Nkuwuine olwa owerenga no okiaikaale ansi ku omukuyu aaria, Piliipo na akiari okukueta.”

⁴⁹Nikuemao, Nathanieli yairania Yesu na amulaga otino, “Omugerezi, kane ori Omuzia owa Katonda kuwuene! Ni iwue Omwami owa Awaisraeli.”

⁵⁰Yesu yamulaga otino, “Owuo oweere no okuganya aeniki nkulagre mbwe nkuwuine no okiaikaale ansi ku omukuyu? Ooza okuwona ewintu ewikate-kaate okukira ago.”

⁵¹Yagia emberi na awoola otino, “Kuwuene-kuwuene, mbalaga mbwe muuza okuwona igulu ni ri-iguka kandi ne enyankoi awa Katonda waniina kandi ni waika ku Omuzia owa Omuntu.”

Yowaana 2

Amankono aga Yesu yasooka okukola

¹Owuire owua okusatu, okuamera ao, omugomo ogwa okukwezana gwaikola ku omugizi ogwa Kaana mu ekialo ekia Galiili. Ng’inwawu Yesu yawanga mu omugomo ogwo

²kandi Yesu na awalonzi waae woona waaetwamo.

³Olwa awantu waanywa edivaai wamala chwe, ng’inwawu Yesu yamugiako amulaga otino, “Edivaai ewuere chwe, ewulao esigaale.”

⁴Yesu yairania ng’inwae otino, “Yaaya, ng’inaifu, ngosugaane ondage ekia nsugaane nkole. Enyinga ziange zikiari okutuuka.”

⁵Nikuemao ng’inwawu Yesu yalaga awemirimo otino, “Mukole ekintu-ukintu ekia awalagre mbwe mukole.”

⁶Awayaudi waawanga ne engira ezia waasawirangamo Katonda. Waawanga ne endagirra ezia kiomo omuntu yaesanga okuieruyia na amanzi. Kutio entamu ezia amanzi enkate-kaate mukaaga ziawanga ao. Entamu ki entamu yaginganga amadebe ataanu-ataanu aga amanzi.

⁷Yesu yalaga awemirimo awo otino, “Muizuzie entamu zino na amanzi.” Kutio awemirimo waazi-izuzia na amanzi du.

⁸Nikuemao, Yesu yawalaga otino, “Katio musene amanzi ago mutoole muirre omuntu okangatiire omugomo guno.” Awemirimo waasena amanzi,

⁹aga ku enyinga ezio gaawanga ni gamiire okugaluka edivaai, mala wairra omukangasi oyo agia agusa. Ngakamanya aa edivaai eyo yawanga ne eemere. (Na awemirimo iwo waamanya aeniki niwo awaawanga ni waturre amanzi ago.) Nikuemao omukangasi oyo yaeta ng’ina owukwe amulaga

¹⁰otino, “Kangi awantu wasooka wa-aa awageni edivaai endootu, ni, ni wamiire okunywa katio wadung’re, nikwo waaesana edivaai etari endootu. Ni iwue ogiire owiika edivaai endootu nawuno nyingeen!”

¹¹Amankono agaasooka gano Yesu yagakorra ku omugizi ogwa Kaana mu ekialo ekia Galiili. Ao otio Yesu yalagana owunene wuae kandi awalonzi wae waawa no okuganya ku iye.

¹²Nikuemao, Yesu yaika agia Kapernaumu alala ni ng’inwae, waamwawu na awalonzi wae, kandi waweera eyo ku amiire amatonu.

Yesu arumuusie awaguzi mu ekaalu olwa kuluweri

¹³Na amiire aga omugomo ogwa Pasaaka gaawanga ni gari ampi okutuuka, Yesu yaniina agia Yerusaleemu.

¹⁴Mu olwanyi olwa ekaalu, yatuukra awantu ni waguzia eng’ombe, amagondi na amaemba-emba, kandi awagalusi awa amasendi ni waikaale ku entewe ziawu ezia okugalusia amasendi.

¹⁵Yesu yaluka olukowa olwa engoe atanika okurumusia nalwo awantu wona, alala na amagondi ne eng’ombe, na awafumia enze eya ekaalu. Yafulukania emeesa eya awagalusi awa amasendi, amasendi gafugika ansi gataanyika.

¹⁶Yalaga awantu awaaguzianga amaemba-emba otino, “Mutoole ano amaemba-emba giinyu gano, muire ale. Mureeta otie okugalusia enyumba eya Soifu okuwa asi aa okuguzia ewintu!”

¹⁷Okwo kwagera awalonzi wae waingirizia kiomo kwajojwa mu ebuuki eya Zaburi mbwe, “Olugonzi olwa ngonziizie nalwo enyumba yaao, Oo Omwami Katonda, lurinyita.”

¹⁸Awakangasi awa Awayaudi waamugiako wamuwuuzia watino, “Ooza waakola amankonooki, kituweere ekilago mbwe ori na amaani aga okurumusia awantu wano ano?”

¹⁹Yesu yawairania otino, “Inywe, mugemule ekaalu eno, ni ku amiire asatu nyiza okugiomboka kandi.”

²⁰Awakangasi awo waamuiriania watino, “Ekaalu eno yatoola emiaka amakumi ane ni mukaaga ne eombokwa, katio iwue okagiomboka otie ku amiire asatu geng’ene?”

²¹Ne ekaalu eya Yesu yagamba-gambangako, yawanga omuwiri gwae omwene.

²²Lunyima, olwa yaziuka okuema ku awafu, awalonzi waae waaingirizia eking’ana ekia yawoolanga kino. Okwo kwagera wawa no okuganya ku amang’ana agari mu endagano na amang’ana aga Yesu yawanga na awoorre gano.

²³Ni Yesu yawanga na akiari Yerusaleemu mu omugomo ogwa Pasaaka, awantu awangi waawa no okuganya ku iye, ku amankono amakate-kaate aga waawonanga na akola.

²⁴Ni Yesu ngakaita ku amang’ana gaawu aeniki yawanga na amanyire emioyo egia awantu wano geeza.

²⁵Kutio, kiawulangao ekikagerre no omuntu amulaga ekiri mu omwoyo ogwa omuntu wundi aeniki iye omwene yawanga na amanyire ekia omuntu ari.

Yowaana 3

Amang’ana amayia aga Yesu yagerera Nikodeemo

¹Yawangao Omufarisaayo kandi omulala ku awakangasi owa Awayaudi, owaetwanga mbwe Nikodeemo.

²Nyanga yafuma owuire agia ku Yesu amulaga otino, “Omugerezi, tumanyire mbwe iwue ori omugerezi oemere ku Katonda aeniki awulao omuntu ooza yakola amankono aga okola gano, ni kutari mbwe Katonda ari nae.”

³Yesu yamuirania otino, “Nkulaga kuwuene mbwe awulao omuntu oesa okuwona Owuami owua Katonda na ataiwuulwe okuiwulwa okwa okuwiri.”

⁴Nikodeemo yamuwuuzia otino, “Omuntu akaiwulwa kawiri otie na amiire okuwa omuntu mukulu?” Yagia emberu na amulaga otino, “Kuwuene ngaesa okuingira mu enda eya ng’inwae amuiwule kandi!”

⁵Yesu yamuirania otino, “Nkulaga kuwuene mbwe awulao omuntu oesa okuingira mu Owuami owua Katonda na ataiwuulwe na amanzi kandi no Omwoyo Omweru.

⁶Omuntu atuukra owulamu wuae owua mu omuwiri okuema ku awiiwuzi waae mu okuiwulwa okwa omuwiri, no owulamu owua mu omwoyo wuema ku Omwoyo Omweru ogwa Katonda, mu okuiwulwa okwa omwoyo.

⁷Kutio, ngosugaane oluguule ni nkulaga mbwe, 'Paka muiwulwe kawiri.'

⁸Kuri mala kiomo omuyaga oguwuuta ni guwariire mala aa guagala. Okuwurra ooza wawurra erioga riagwo, ni ngoesa okumanya aa guema nakuwa aa gugia. Okuiwulwa no Omwoyo Omweru ogwa Katonda kwona nintio kufwanana."

⁹Nikodeemo yamuwuzia otino, "Kino kikaikola otie?"

¹⁰Yesu yamuirania otino, "Amang'ana gano ngagakingirra otie ni kandi ori omugerezi owa Awaisraeli omanyikaane?"

¹¹Mbalaga kuwuene mbwe ifwe tugamba-gamba ku ewintu ewia tumanyire kandi tulaga awantu ewintu ewia tumiire okuwona na amiiso. Kukawa kutio, inywe ngamuganya ewintu ewia tuwalaga.

¹²Ni mulowa okuganya ni mbalaga ewintu ewia ku ekialo kuno, katio muuza okuwa no okuganya otie ni mbalagre ewintu ewia ku igulu?

¹³Awulao namba omuntu omulala omiire okugia ku igulu ogawuuke no Omuzia owa Omuntu owaika ansi na aema ku igulu.

¹⁴Mala kiomo Muusa yafumuta omufwano ogwa enzoka eya ekiuma ku ekiti, agingirizia kungulu ni wari mu ekeewa, nintio lwona paka Omuzia owa Omuntu yoona aaza okugingiriziwua kungulu,

¹⁵kugere omuntu-umuntu omuganyireko atuukre owulamu owutariwua.

Owulamu owutariwua

¹⁶"Aeniki Katonda yagonzia ekialo ino, kugera atuma omuzia waae omulala eng'ene, mbwe omuntu-umuntu omuganyireko ataaza yateeka, na atuukre owulamu owutariwua.

¹⁷Katonda ngakatuma omuzia waae ku ekialo okuuzza okukengerwa ekialo ekiina, ni yamutuma kugere ni kuwita ku iye, awantu awari ku ekialo watuukre owuinunuzi.

¹⁸Omuntu-umuntu oweere no okuganya ku Omuzia owa Katonda ngarikengerwa ekiina. No olowere okuwa no okuganya ku iye, iye amiire okukengerwa ekiina ilala, aeniki alowere okuwa no okuganya ku omuzia omulala eng'ene owa Katonda.

¹⁹Nintino ekiina kirikengwa: Owueru wuaza ku ekialo, na awantu waagonzia ekierema okukira owueru aeniki enkola ziwu ziwanga embiwi.

²⁰Awantu wona awakola enkola embiwi waregere owueru kandi ngawaganya okuingira mu owueru. Ngawagala owueru aeniki watia mbwe enkola ziwu embiwi ziiza okusanukulwa ziwe ku owueru.

²¹No omuntu-umuntu okola ewintu ewiri kuwene ewia Katonda aganyire nawio, iye aaza ku owueru kugere kuwonekane geeza mbwe ewia akola ewio, awikola okusangaazia Katonda.”

Yowaana Omubatiisi agamba-gamba ku Yesu

²²Nikuemao Yesu yafuma na awalonzi waae agia nawo mu ekialo ekia Yudeea aa yawa nawo ku amiire, na abatiisa awantu.

²³Kuno kwatuukra Yowaana oona na abatiisa awantu Aenooni, a-ampi ni Saliimi aeniki amanzi gaawanga ao amangi kandi awantu awangi waamugiangako kugere awabatiise.

²⁴(Okwo kwatuukra ni Yowaana yawanga na akiari okuteewua mu owusiwe.)

²⁵Okuikululana mu amang’ana kwawaa agati ya awalonzi awa Yowaana no Omuyaudi wundi. Ekiawanyaasianga kiawanga enkola eya okueruyia omuntu namba ewintu, ku okuwiozia na amanzi.

²⁶Kutio awalonzi awa Yowaana waamugiako wamulaga watino, “Omugerezi, omuntu owawanga ni iwue engereka eya oluuzi olwa Yordaani, owa nyanga wagamba-gambako geeza oria, mbwe oona nyingeeno abatiisa awantu kandi awantu wona wamugiako.”

²⁷Yowaana yawairania otino, “Omuntu aesa okukola mala ekintu ekia Katonda nio omueere amaani aga okukola.

²⁸Inywe aweene mumanyire geeza kimo nyawalaga mbwe, ‘Inze ng’andi Meesia yaaya. Ni nyatumwa-utumwa emberu waae.’

²⁹Mu omugomo ogwa enserezi, omuzia ogia okukwa nio omwene omweya. Omwiko waae owekizia omwimeriire, atega amatwi na amurindirra kandi awa ne ekisangaalo ino na awurra omwoyo ogwa ng’ina omweya. Owusangaavu owuo niwuo owua ndi nawuo kandi nyingeeno katio omwoyo gwange guizuule du no owusangaavu.

³⁰Iye paka asonge okuwa no owunene okunkira, ni inze owunene wuange wuirane enyima.”

Omuntu oemere ku igulu

³¹Omuntu oemere ku igulu akirre awantu wona. No omuntu oemere ku ekialo, ari owa ku ekialo kandi agamba-gamba mala kimo oema ku ekialo kuno. Omuntu oemere ku igulu akirre wona.

³²Agamba-gamba ku ewintu ewia amiire okuwurra kandi ewia amiire okuwona. Ni kukawa kutio, awatono ino niwo awaganya amang’ana aga awoola.

- ³³Omuntu oganya nago alagana kuwuene mbwe Katonda ari kuwuene.
- ³⁴Ni kutio aeniki omuntu owa Katonda atumre awoola amang'ana aga Katonda kandi iye nio Katonda a-aa Omwoyo gwae Omweru kuwungi owukirre.
- ³⁵Katonda Ise agonziizie Omuzia waae kandi amiire okuta ewintu wiona mu amakono gaae.
- ³⁶Omuntu-umuntu oweere no okuganya ku Omuzia owa Katonda, ari no owulamu owutariwua. No omuntu-umuntu olowa Omuzia owa Katonda ngarituukra owulamu owuo yawa, aeniki Katonda aaza okuwaa na amuswawuka no okusu amiire goona.

Yowaana 4

Omukazi Omusamaria aweere no okuganya ku Yesu

- ¹Yesu yamanya mbwe Awafarisaayo waawanga ni wamiire okuwurra mbwe yawanga na agalusia awantu awangi okuwa awalonzi waae okukira Yowaana, kandi mbwe yawabatiisanga.
- ²(Kukawa kutio, Yesu omwene ngakabatiisanga, na awalonzi waae niwo awaabatiisanga awantu.)
- ³Okwo kwagera Yesu afuma aema Yudeea, airana mu ekialo ekia Galiili.
- ⁴Kugere atuuke Galiili, kwamunigirizianga mbwe paka awitre mu ekialo ekia Samaria.
- ⁵Yagia nawuno atuuka ku omugizi ogwa Sukaar, mu ekialo ekia Samaria. Omugizi guno gwawanga a-ampi ni ilowa eria Yakoobo ya-aa omuzia waae Yoseefu.
- ⁶Ekituko ekia Yakoobo kiawanga asi ao, kandi Yesu owawanga na amiire okugenda-genda alwire, yagia aikala kuntulo eya ekituko ekio. Ziawanga ni zimiire okuingira enyinga mukaaga ezia omuwasu.
- ⁷Omukazi Omusamaria yaaza ao okusena amanzi. Yesu yamusawa otino, "No oganyire mpeeko amanzi nywe."
- ⁸(Okwo kwatuukra na awalonzi waae wagiire okugula okuria ku omugizi.)
- ⁹Omukazi oyo yamuirania otino, "Iwue Omuyaudi oreeta otie okunsawa inze Omusamaria amanzi aga okunywa?" (Kwawanga omuziro ku Awayaudi okuizogaana na Awasamaria, nakuwa okukola ne ekintu-ukintu kiomo ewinywerwako namba ewiriirwako, ni kuri mbwe Omusamaria akiambreko.)
- ¹⁰Yesu yamuirania na amulaga otino, "Mukaziiwue, kuweeko mbwe omanyire empanwa eya Katonda aezania kandi omanyeko owa ndi inze okusawa amanzi ono, kangato ni iwue onsawire kugere nku-ee amanzi agareeta owulamu."

- ¹¹ Omukazi oyo yamuirania otino, “Omukangasi, nkuwona no owula ne ewia okasenera amanzi, ne ekituko kino ne ekiliire. Amanzi agareeta owulamu aga owoola ago, ooza okugatoolai?”
- ¹² Kusi, iwue okirre guukwa iifu Yakoobo owatu-aa ekituko kino? Iye omwene na awazia waae alala ne emiandu giawu, wona ngawakanywera mu ekituko kino?”
- ¹³ Yesu yamuirania na amulaga otino, “Owurra, omuntu-umuntu onywa amanzi aga mu ekituko kino aaza okuwurra owulwo kandi,
- ¹⁴ no omuntu onywere amanzi aga nyesana, iye ngariwurra owulwo kandi! Amanzi aga nyesana ago gaaza okuwa ki ekisulo ekitakamiira, ekifumia amanzi agareeta owulamu owutariwua.”
- ¹⁵ Omukazi oyo yairania Yesu otino, “Omukangasi, okaganya ompeeko amanzi ago, ntawurra owulwo kandi. Okwo kuuza okugera ndeke okuweerako ni nyiza ano okusena amanzi kusa-kusa.”
- ¹⁶ Yesu yamulaga otino, “Gia oete omusaaza waa, oirane ano nae.”
- ¹⁷ Omukazi oyo yamuirania otino, “Inze mbula no omusaaza.” Yesu yamuirania otino, “No owoorre mbwe owula no omusaaza, ao otio owoorre kuwuene.
- ¹⁸ Ee, omiire okuwa na awasaaza wataanu, kandi namba omusaaza owa omenyere nae nyingeeno oona ng’ari omusaaza waa yaaya. Kutio, ao owoorre kuwuene.”
- ¹⁹ Omukazi oyo yamuirania otino, “Omukangasi, ni nkuwariira, mbona mbwe ori omugambi.
- ²⁰ Ifwe Awasamaria, waaguukwa wiifu waasawanga Katonda ku ekigiri kino. Ni inywe Awayaudi muwoola mbwe Yerusaleemu eng’ene nio asi aa awantu wasugaane wasawire Katonda.”
- ²¹ Yesu yamulaga otino, “Mukaziiwue, ganya ni inze ni nkulaga mbwe amiire gaaza aga awantu ngawarisawa Katonda Ise Yerusaleemu namba ku ekigiri kino eng’ene.
- ²² Inywe Awasamaria musawa owa mutamanyire. Ni ifwe Awayaudi tusawa Katonda owa tumanyire aeniki omununuzi aema ku Awayaudi.
- ²³ Amiire gaaza kandi gamiire okutuuka, aga awantu awasawa Katonda kuwuene waaza okumusawa na amaani agawaeerwe no Omwoyo Omweru kandi mu engira eri kuwuene esugre ni kiomo ari. Awo niwo awa Katonda Ise aagala mbwe wamusawe.
- ²⁴ Nintio aeniki Katonda ari omwoyo omusa, kutio omuntu oagala okumusawa paka amusawe na amaani aga Omwoyo Omweru kandi mu engira eri kuwuene esugre nae.”

²⁵ Omukazi oyo yamuirania otino, “Manyire mbwe Meesia aaza okuuza” (eriina Meesia mu umunwa gundi ni Kristo). “Na aaza okuuza, aaza okutulaga owuene owua amang’ana gano goona.”

²⁶ Yesu yamuirania otino, “Inze ogamba-gamba ni iwue ono, ni inze iye.”

²⁷ Ku enyinga ezio awalonzi awa Yesu waairana ni waema okugula okuria ku omugizi kandi waawa no okuluguula ino olwa waatuukra ni Yesu agamba-gamba no omukazi owa Awasamaria. Kukawa kutio, awulao owamuwuzia ekia yamuagalangako nakuwa ekia yawoolanga nae.

²⁸ Nikuema, omukazi oyo yareka ao enswa yaae eya amanzi airana ku omugizi atanika okulaga awantu awa ku omugizi ogwo otino,

²⁹ “Awiifu muuze muwoneko omuntu ondagre enkola ziangе ziona ezia miire okuweerako ni nkola okuema ri! Muingirizia mbwe akawa Meesia?”

³⁰ Awantu waafuma ku omugizi ogwo wagia aa Yesu yawanga.

³¹ Mu iwaga erio kwatuukra na awalonzi awa Yesu wamuisasaama ni wamulaga watino, “Omugerezi toolako okuria orie!”

³² Ni iye yawairania otino, “Ndi no okuria okwa inywe mutamanyire.”

³³ Awalonzi awo waatanika okuiwuzia agati yaawu aweene watino, “Kusi ario omuntu omiire okumu-aa okuria ariire?”

³⁴ Yesu yawairania otino, “Inze okuria kwange no okukola okuagala okwa Katonda owantuma no okumariizia emirimo giae egia yampa mbwe nkole.

³⁵ Awantu ngawawoola mbwe, ‘Kutoola emienzi ine okuemera mu ikomera, nikwo awantu watanike igesa?’ Mbalaga mbwe muinge amiiso giinyu muwoneko kimo emere elawire mu omusiri kandi esugre okugeswa!

³⁶ Omuntu ogesa aoololwa ku emirimo giae kandi awakunza na awaira mu owulamu owutariwua. Kutio omuntu okomeere no omuntu ogesere, wona waaza okusangaala alala.

³⁷ Kane kuri kuwene na awantu wawoola mbwe, ‘Omuntu omulala akomera, no owundi nio ogesa.’

³⁸ Mbatumre okugia okugesа emisiri egia mutaarima. Awantu wandi wasaasa niwo awaakola emirimo emikalu, ni inywe nyingeeno ni inywe awatuukra emfuno okuema ku oluuya lwawu.”

³⁹ Awasamaria awangi awa ku omugizi ogwo waawa no okuganya ku Yesu nikulondokana na amang’ana aga omukazi oyo yawoola ku Yesu mbwe, “Andagre enkola ziangе ziona ezia miire okuweerako ni nkola okuemera ri.”

⁴⁰ Kutio olwa Awasamaria waamuuzako, waamuiyemba mbwe aganye aweeko nawo ao ku amiire gandi kandi Yesu yaganya ma awa nawo ku amiire awiri.

⁴¹Ku amang’ana aga Yesu yawagerera, awantu awangi okukira, waawa no okuganya ku iye.

⁴²Waalaga omukazi oyo watino, “Nyingeeno katio turi no okuganya ku iye, ni ng’ani ku amang’ana gaao geng’ene yaaya. Aweene tuwuriire amang’ana gaae kandi tumanyire mbwe kuwuene ari Omununuzi owa awantu woona awa ku ekialo kuno.”

Yesu alamiizie omuzia owa omukangasi

⁴³Ni Yesu yawanga na amiire okumala amiire awiri Samaria, yafuma ao agia Galiili.

⁴⁴Ao kwatuukra ni Yesu yawanga na amiire okuwoola mbwe omugambi ngaerwe owunene mu ekialo kiawu.

⁴⁵Olwa yatuuka Galiili, awantu awa Galiili waamungizia geeza. Waakola otio aeniki waawanga ni wamiire okuwona ewintu wiona ewia Yesu yakola Yerusaleemu, mu omugomo ogwa Pasaaka, ni waawanga mu omugomo ogwo.

⁴⁶Yesu yairana ku omugizi ogwa Kaana mu ekitemo ekia Galiili, aa yagalusia amanzi gawa edivaai. Yawangao omukangasi owa esirikaali owa omuzia waae yalwalanga ino ku omugizi ogwa Kapernaumu.

⁴⁷Olwa omukangasi oyo yawurra mbwe Yesu amiire okuema Yudeea airaane Galiili, yamuiyemba mbwe aganye aike agie alامية omuzia waae, aeniki yalwalanga ampi okufwa.

⁴⁸Yesu yamulaga otino, “Inywe ni mutawuine amankono ne ewintu ewikatekaate ewiluguulwa ni wiikola, ngamuesa okuwa no okuganya.”

⁴⁹Omukangasi oyo yamuirania otino, “Awiifu ganya tuike wuangu tuuza twatuukra na amiire okufwa.”

⁵⁰Yesu yamuirania otino, “Gia-ugia, omuzia waa aza okuwa omulamu.” Omuntu oyo yawa no okuganya ku amang’ana aga Yesu, kutio yafuma agia.

⁵¹Ni yawanga ku engira na agia, ya-agaana awemirimo waae awaamulaga watino, “Omuzia waa ari omulamu.”

⁵²Omuntu oyo yawawuuzia otino, “Yataniike okuwurra geeza mu enyingaaki?” Waamulaga watino, “Yataniike okuwurra geeza izo enyinga musamvu ezia omuwasu.”

⁵³Omuntu oyo yagia aingirizia mbwe ezio nizio enyinga ezia Yesu yamulagramo mbwe, “Omuzia waa aza okuwa omulamu.” Kutio iye alala na awa mu enyumba yaae woona, waawa no okuganya ku Yesu.

⁵⁴Gano nigo amankono aga okuwiri aga Yesu yakola Galiili ni yawanga na amiire okuema Yudeea.

Yowaana 5

Yesu alamiizie omuntu mu ekituko ekia Bethsaida

- ¹Lunyima Yesu kandi yafuma okugia Yerusaleemu mu omulala ku emigomo egia Awayaudi.
- ²Yerusaleemu omwo, ampi ne ekikulo ekia amagondi gaingirra ku omugizi, kiawangao ekituko kindi ekiaetwanga mu Oluibrania mbwe Bethsaida. Ekituko kino kiawanga ni kiombookweko ensala itaanu.
- ³Awalwire awatekere awangi, awagingre awawuunu, awarema na awa emiwiri giakwa eng'anzi, waagonanga kuntulo eya ekituko ekio ni warinda amanzi gakuyunziwue.
- ⁴Aeniki gario amiire aga enyankoi owa Katonda yaazanga mu ekituko omwo okukuyunzia amanzi ago. Amanzi ni gaamala okukuyunguka, omuntu-umuntu owasooka okuingira mu ekituko, yalamanga ku owulwire-uwulwire owua yawanga nawuo.
- ⁵Omuntu omulala owawanga na amiire okulwala ku emiaka amakumi asatu ni munaane, yoona yawanga ao.
- ⁶Olwa Yesu yamuwona na agonere asi ao kandi amanya mbwe amiire okulwala ku emiaka emingi otio, yamulaga otino, "Iwue, mberi oagala mbwe owe omulamu?"
- ⁷Omuntu oyo yamuirania otino, "Omukangasi, inze mbula no omuntu ooza yanyingizia mu ekituko enyinga ezia amanzi gakuyunziwue. Inze ni ngeezaania mbwe nyingiremo, ntuukra no omuntu wundi amiire okunsookeramo."
- ⁸Yesu yamuirania otino, "Ema, otoole iseero riao ogende-gende."
- ⁹Mu enyinga ezio, omuntu oyo yalama, atoola iseero riae atanika okugenda-genda. Ekintu kino kiaikola owuire owua Sabato.
- ¹⁰Kutio, awakangasi awa Awayaudi waawuuzia omuntu owalamiwua oyo watino, "Mberi omanyire mbwe reero no owuire owua Sabato kandi mbwe endagirra ngekuganyiire mbwe oginge ekintu-ukintu kugia iseero riao reero?"
- ¹¹Omuntu owalamiwua oyo yawairania otino, "Inze omuntu ondamiizie nio ondagre mbwe, 'Ema otoole iseero riao ogende-gende.'"
- ¹²Awakangasi awo waamuirania ni wamuwuzia watino, "Naanu oyo okulagre mbwe oginge iseero riao ogende-gende?"
- ¹³No omuntu owalamiwua oyo ngakawanga na amanyire omuntu owamulamia aeniki Yesu yawanga na amiire okumunywenkera mu awantu omwo.

¹⁴Lunyima Yesu yaaza atuukra omuntu wazane mu ekaalu amulaga otino, “Ngowona nyingeeno no ori omulamu katio? Kutio rekana no owuoni ilala. Wusa-wusa, ekintu ekiwiiwi ino kiiza kiakuikolako!”

¹⁵Omuntu oyo yagia alaga awakangasi awa Awayaudi mbwe Yesu nio omulamiizie.

Owulamu owua Yesu Omuzia owa Katonda atureetra

¹⁶Okukola okwa Yesu yakorra awantu ewintu ewilootu nyanga olwa Sabato kiomo yakorra omuntu ono, kwagera Awayaudi watanika okunyaasia Yesu mu engira enyingi.

¹⁷Ni Yesu yawalaga otino, “Soifu akola emirimo nawuno nyingeeno, kutio noona paka nkole emirimo.”

¹⁸Amang’ana aga Yesu yawoola gano gaagera awakangasi awa Awayaudi katio waagalanga ino okumuita, ni ng’ani mbwe aeniki yakola emirimo nyanga olwa Sabato kweng’ene yaaya. Ni ino-ino ku okuwoola okwa yawoolanga mbwe ari Omuzia owa Katonda. Ku iwo, Yesu yaifwananianga ni Katonda.

¹⁹Yesu yawairania otino, “Mbalaga kuwuene mbwe kiwulao-uwula ekintu ekia Omuzia akakola na amaani gaae omwene, ni mala ewintu ewia awona swae na akola. Wiona ewia Katonda Ise akola, niwio ewia Omuzia waae yoona akola.

²⁰Kuri kutio aeniki Katonda Ise agonziizie Omuzia waae kandi amulaga ewintu wiona ewia iye omwene akola. Ee kandi muuza okuluguula ino ni muwona ni nkola kugia ewintu ewikate-kaate ewikira wino, ewia aaza okundaga.

²¹Mala kiomo Soifu Katonda aziusia awafu, yawa-aa owulamu, nintio lwona inze Omuzia waae noona nyesana owulamu ku awantu awa omwene nyagala oku-aa.

²²Soifu Katonda iye omwene ngakengera omuntu-umuntu ekiina yaaya. Yampeere inze, Omuzia waae, amaani goona aga okukenga ekiina.

²³Yakorre kino kugere awantu woona wampe owuti mala kiomo waeere Soifu Katonda owuti. Omuntu-umuntu otampeere owuti, omuntu oyo ngaere Soifu Katonda owantuma owuti.”

²⁴Yesu yagia emberu na awalaga otino, “Kuwuene mbalaga mbwe omuntu-umuntu owuriire amang’ana gange kandi awe no okuganya ku omuntu ontumire, omuntu oyo amiire okutuukra owulamu owutariwua. Omuntu oyo ngaaza okukengerwa ekiina yaaya, na amiire okuema mu olumbe aingiire mu owulamu.

²⁵Mbalaga kuwuene mbwe enyinga ziiza kandi enyinga ezio zimiire mala okutuuka ezia awafu waaza okuwurra omwoyo ogwa Omuzia owa Katonda, kandi awarimuwurra woona waaza okuwa awalamu.

²⁶Mala kiomo Katonda Soifu omwene nio oesana owulamu, mu engira yazane eyo Katonda amiire oku-aa Omuzia waae amaani aga okuesana owulamu.

- ²⁷Kandi amiire oku-aa Omuzia amaani aga okukengera awantu ekiina aeniki ari Omuzia owa Omuntu.
- ²⁸Mutaaza mwawa no okuluguula ku amang’ana gano; amiire gaaza aga awafu woona waaza okuwurra omwoyo gwange
- ²⁹kugere waziuke waeme mu olumbe. Awantu awaakola geeza wariziuka watuukre owulamu owutariwua, na awaakola owuoni wariziuka wakengerwe ekiina.”
- ³⁰Yagia emberu na awoola otino, “Ng’ankola okuagala kwange omwene yaaya: Nyiza mala okukengera omuntu ekiina nikulondokana ni kiomo Soifu andagre mbwe nkenge. Okwo kuuza okugera nkenge ekiina mu engira endootu aeniki nyagala okukola okuagala okwa Soifu owantuma, okutari okwange inze omwene.
- ³¹“Muuzi mwalowa amang’ana gange aga mboola ku inze omwene, ni kuri mbwe ni inze eng’ene nio ogawoola.
- ³²Ni nyingeeno paka muganye aeniki ario owundi oona omiire okugamboolako, kandi manyire mbwe ewia amiire okumboolako wiri kuwuene.
- ³³“Yowaana yangamba-gambako olwa mwamutumako awantu, kandi yamboolako amang’ana agari kuwuene.
- ³⁴⁻³⁵Yowaana yafwananga ekimuri ekiawanga ni kikangaate okulagana engira. Mwawa no okuganya ku amang’ana gaae no owusangaavu ku amiire amatoono. Ng’amboola otio mbwe aeniki paka mboolweko amang’ana no omuntu owa ku ekialo kuno yaaya, ni mboola otio kugere inywe mutuukre owuinunuzi.
- ³⁶“Inze owuzito owua amankono aga nkola gangamba-gambako okukira okugamba-gamba okwa Yowaana yangamba-gambako: Emirimo egia Soifu yampa okukola, alala na amankono aga nkola gano goona galagana omuntu owa ndi, kandi galagana mbwe Soifu nio owantuma.
- ³⁷Soifu owantuma amiire okuwagamba-gambra ku inze, iye omwene. Inywe mukiari okuwurra omwoyo gwae namba mukiari okuwona kiomo afwanana,
- ³⁸kandi ngamuta emioyo giinyu ku amang’ana gaae aeniki ngamuri no okuganya ku inze omuntu owa yatuma.
- ³⁹Muigerera endagano ni muingirizia mbwe muuzi mwatuukra owulamu owutariwua ku okukola otio. Ni musugaane mumanye mbwe ni inze endagano egamba-gambako.
- ⁴⁰Inywe mulowa okuwa no okuganya ku inze. Muweeko no okuganya ku inze, mukatuukiire owulamu owutariwua.
- ⁴¹“Inze ng’anyagala owunene owua mpeewua na awantu.

⁴²Inze omwene mbamanyire geeza kandi manyire mbwe mu emioyo giinyu ngamugonziizie Katonda.

⁴³Nyizre ku eriina eria Soifu, ni ngamuingiizie amang’ana gange. Ni, no omuntu wundi musaasa aazre ku eriina riae omwene, muingizia amang’ana gaae.

⁴⁴Ni kuri mbwe muagala okutuukra owunene owuema ku awantu awiina wiinyu, no owunene owuema ku Katonda omulala eng’ene ngamuagala namba wutono, mukawa no okuganya ku inze otie?

⁴⁵“Ni lwona mutaingirizia mbwe ni inze ooza okugia okuwaingirra ku Soifu Katonda, yaaya! Muusa owa muteereko emioyo giinyu oyo, nio ooza okugia okuwaingirra ku Soifu Katonda.

⁴⁶Ni kuri mbwe mwawanga no okuganya ku amang’ana aga Muusa, kangato muri no okuganya ku amang’ana gange noona aeniki amang’ana aga Muusa gangamba-gambako.

⁴⁷Ni ni kuri mbwe mwalowa okuwa no okuganya ku amang’ana gaae, mukareeta otie okuwa no okuganya ku amang’ana gange?”

Yowaana 6

Yesu aeere awantu awakirre elufu witaanu okuria

(Math 14:13–21; Mari 6:30–44; Luuk 9:10–17)

¹Nikuemao, Yesu na awalonzi waae waatoola owuato waunguka wagia nyaluwega lundi olwa enyanza eya Galili, eetwa ne eriina rindi mbwe enyanza eya Tiberiasi.

²Omurima ogwa awantu awangi waamulonda na agia, aeniki waawona amankono amakate-kaate aga okulamia awalwire aga yakola.

³Nikuemao Yesu na awalonzi waae waaniina wagia waikala ku ekigiri ekitono.

⁴Kuno kwatuukra na amiire aga omugomo ogwa Awayaudi ogwa Pasaaka gari ampi.

⁵Nikuemao Yesu yagingirizia amiiso awona omurima ogwa awantu awangi ni wamuuzako. Kutio yawuuzia omulonzi waae oetwa Piliipo otino, “Oingirizia mbwe tukatuukra ai okuria okwa tuesa okugula okukasuga awantu wano?”

⁶Yesu yawuuzianga-uwuuzia otio okumugeezaania, aeniki omwene yawanga na amanyire ekia yagianga okukola.

⁷Piliipo yamuirania otino, “Okuria okwa omuntu ki omuntu ori ano aaza yairako okukono, no okutoola amasendi agakasuga edinaari mia wiwiri.”

⁸Omulonzi waae owundi oetwa Andereeya, wamwawu Simioni Petro, yamulaga otino,

⁹“Ario omuwuuka ori ano ne emikaati itaanu ne emvwa iwiri. Na ago gatio matono ino ku awantu wano woona!”

¹⁰Yesu yawalaga otino, “Mute awantu wano waikale ansi.” Owusuwi wuawanga asi ao owungi ino, kutio awantu woona waaikala ansi, awasaaza weng’ene waasuganga awantu elufu witaanu.

¹¹Nikuemao Yesu yatoola emikaati egio, kandi olwa yamala okuiranizia Katonda otioo, yagi-aa awalonzi waae kugere wagawire awantu awaawanga ni waikaale. Nintio lwona yakola ne emvwa ziria ziona kandi woona waaria kiomo waagalanga.

¹²Olwa waamala okuria waiguta, Yesu yalaga awalonzi waae otino, “Mukunze ewiokuria ewisigaale kugere ekintu kitaoneka.”

¹³Kutio waawikunza wiona wiizula ewidida ikumi ni wiwiri ewia ewimega ewia emikaati itaanu ewiasigala.

Awantu wagala okuta Yesu ku entewe eya owuami na amaani

¹⁴Olwa awantu waamala okuwona amankono aga Yesu yakola ago, waatanika okuwoola agati yaawu aweene watino, “Kuwuene ono nio Omugambi owa Katonda owagamba-gambwako mu endagano mbwe asugaane aaze ku ekialo.”

¹⁵Yesu yagia amanya mbwe awantu wano waagalanga okumunigirizia mbwe awe Omwami waawu. Okwo kwagera awaemako mpoola, agia mu ekigiri okuwa omwene.

Yesu agende-gendre ku amanzi

(Math 14:22–33; Mari 6:45–51)

¹⁶Olwa kwatuuka igulo, awalonzi awa Yesu waafuma waika ku omwalo,

¹⁷waniina owuato kandi wasiawala waunguka enyanza ni wagia Kapernaumu. Ekierema katio kiawanga ni kimiire okuamba ekialo, ni Yesu yawanga na akiari okuwatuukako.

¹⁸Ku owuziwa ni wagia, omuyaga omuzito gwatemuka kandi enyanza yawiia.

¹⁹Olwa waamala okuvuga owuliire owukasuga emaeli isatu kugia ine, waawona Yesu na agenda-genda ku amanzi na ari ampi okuwatuukako. Owuti wuawamba ino,

²⁰ni Yesu yawalaga otino, “Ono ni inze, mutawa no owuti.”

²¹Awalonzi waae waasangaala okuwa nae mu owuato, kandi ku enyinga entono, owuato wuagowa ku ekialo aa waagianga.

²²Enkio walwo, omurima ogwa awantu awangi awa Yesu ya-aa okuria awaasigala engereka indi eya enyanza eya Galiili waria, waagia wamanya mbwe no owuato wulala wueng’ene niwuo owuawanga ao. Lwona waamanya mbwe awalonzi awa Yesu niwo awaawuniina, wasiawala ni wagia, Yesu iye na akiasigaale enyima.

23-24 Waamuagala asi ao oona, ni ngawakamutuukra iye namba awalonzi waae. Waawona amaato agaaemanga ku omugizi ogwa Tiberiasi ni gagowa a-ampi ni aa awantu waaria emikaati, no Omwami yamala okuikazia Katonda aria. Kutio waaganiina wagia Kapernaumu okugia okumuagala eyo.

Yesu nio omukaati ogugera na awantu wawa no owulamu

25 Olwa awantu wano waamutuukra na ari engereka indi, waamuwuuzia watino, “Omugerezi, otuukre eno enyingaaki?”

26 Yesu yawairania na awalaga otino, “Kuwuene munyagarrenga mala ku emikaati egia izo mwariire ma muiguta, ni ng’ani ku ewilago ewia amankono ewia mwamiire okuwona yaaya.

27 Mutakola emirimo okutuukra okuria okutawuuzia. Ni, mukorre okuria okuwaaamiire goona, okwa Omuzia owa Omuntu aaza okuwa-aa. Iye nio owa Katonda Ise amiire okulagana mbwe aganyire nae.”

28 Nikuemao waamuwuuzia watino, “Ekia tusugaane tukole kugere tukole emirimo egia Katonda aagala niki?”

29 Yesu yawairania otino, “Emirimo egia Katonda aagala mbwe mukole ne emilala — okuwa no okuganya ku omuntu owa yatuma.”

30 Kutio waamuwuuzia watino, “Amankonooki aga oesa okutukorra gatuweere ekilago, kugere tuwe no okuganya ku iwue? Ee, ooza okutukorraki?”

31 Waaguukwa wiifu waaria maana ni waawanga mu ekeewa mala kiomo kwajojwa mbwe, ‘Yawa-aa omukaati ogwaema ku igulu warie.’”

32 Yesu yawairania otino, “Kuwuene mbalaga mbwe ng’ani Muusa nio owawa-aa omukaati ogwaema ku igulu yawa, ni ni Soifu Katonda nio owawa-aa omukaati ogwa kuwuene okuema ku igulu.

33 Aeniki inze ni inze omukaati ogwa Katonda aezania, owaika ansi ku ekialo, na aema ku igulu kandi ni inze oesana owulamu ku awantu awa ku ekialo.”

34 Awantu awo waamuirania watino, “Omukangasi, okutanikra nyingeeno tueeko omukaati ogwo.”

35 Yesu yawairania otino, “Inze ni inze omukaati ogwa no omuntu ariire, awa no owulamu. Onyizreko kandi awe no okuganya ku inze, omuntu oyo ngaaza okuwurra enzala, lwona ngaaza okuwurra owulwo yaaya.

36 Ni mala kiomo nyawalaga, inywe mumiire okumbona, ni kukawa kutio mukiawula no okuganya ku inze.

37 Awantu wona awa Katonda Ise ampeere, waaza okunyizako. Kandi awulao namba omuntu omulala onyizreko, owa nyiza okurumusia.

- ³⁸Aeniki nyaema ku igulu nyika ansi ku ekialo okuuzza okukola okuagala okwa Katonda owantuma, ni ng'ani okuuzza okukola okuagala kwange omwene yaaya.
- ³⁹No okuagala okwa owantuma kuri mbwe ntaaza nyateesia namba omulala ku awa ateere mu amakono gange, ni mbwe nyize mbaziusie waeme ku awafu Owuire owua Owutuuko.
- ⁴⁰Ni kutio aeniki okuagala okwa Soifu Katonda kuri mbwe omuntu-umuntu oteere omwoyo gwae ku inze Omuzia waae kandi oweere no okuganya ku inze, omuntu oyo aaza okutuukra owulamu owutariwua kandi Owuire owua Owutuuko ndimuziusia awe omulamu kandi.”
- ⁴¹Ing'ana eria Yesu yawoola mbwe ni iye omukaati oguema ku igulu guika ansi ku ekialo riagera awakangasi awa Awayaudi wawona uwiiwi nae.
- ⁴²Waawuuzia watino, “Ono ng'ani Yesu omuzia owa Yoseefu oria? Awiiwuzi waae ngatuwamanyire geeza? Katio nyingeeno areeta otie okuwoola mbwe yaika ansi ku ekialo na aema ku igulu?”
- ⁴³Yesu yawairania otino, “Mureke okuwona ni inze uwiiwi ku ekia mbalagre kino.
- ⁴⁴Awulao omuntu ooza yaanyizako ni kutari mbwe Soifu Katonda owantuma nio omukuluule na amureeta ku inze. No omuntu onyizreko, nyiza okumuziusia Owuire owua Owutuuko.
- ⁴⁵Omulala ku Awagambi awa Katonda yajoja otino, ‘Awantu woona warigererwa ni Katonda.’ Omuntu otegerezia amang'ana aga Soifu Katonda kandi oigerera okuema ku iye, nio onyizako.
- ⁴⁶Awulao omuntu omiire okuwona Katonda Ise ogawuuke ni inze owaema ku Katonda. Inze eng'ene ni inze omiire okumuwona.
- ⁴⁷“Mbalaga kuwue ne mbwe omuntu-umuntu oweere no okuganya ku inze ari no owulamu owutariwua.
- ⁴⁸Inze ni inze omukaati ogwa no omuntu ariire, awa no owulamu.
- ⁴⁹Ee, waaguukwa wiinyu waaria maana mu ekeewa, ni kukawa kutio woona waafwa.
- ⁵⁰No owa muri nae ano, nio omukaati oguika ansi okuema ku igulu ogwa no omuntu ariire ngafwa yaaya.
- ⁵¹Inze ni inze omukaati oguri no owulamu ogwaika ansi okuema ku igulu. Omuntu-umuntu oriire omukaati guno aaza okuwa omulamu amiire goona. Omukaati ogwo, no omuwiri gwange ogwa nyesanira awantu woona ku ekialo, kugere wawe no owulamu.”

⁵²Nikuemao enda ezia awakangasi awa Awayaudi ziayia ni ing'ana rino mala watanika okuwoola agati yaawu aweene no owululu ino watino, "Omuntu ono aesa okutu-aa omuwiri gwae otie mbwe turie?"

⁵³Yesu yawairania na awoola otino, "Kuwuene mbalaga mbwe ni mutariire-uria omuwiri ogwange kandi munywe amasaai gange, inze Omuzia owa Omuntu, muwula no owulamu chee!"

⁵⁴No omuntu-umuntu oriire omuwiri gwange kandi yanywa amasaai gange, iye ari no owulamu owutariwua kandi nyiza okumuziusia Owuire owua Owutuuko.

⁵⁵Aeniki omuwiri gwange no okuria kuwuene kandi amasaai gange ne ekinywewua kuwuene.

⁵⁶Oriire omuwiri gwange kandi anywe amasaai gange, aaza okuwa ni inze alala amiire goona kandi noona nyiza okuwa nae alala.

⁵⁷Mala kiomo Soifu Katonda omulamu yantuma kandi ndio omulamu ku amaani gae, nintio lwona omuntu oriire omuwiri gwange aaza okuwa omulamu ku amaani gange.

⁵⁸Inze ni inze omukaati ogwaika ansi ni guema ku igulu. Waaguukwa wiinyu waaria maana ni waafwa, no omuntu-umuntu oriire omukaati guno iye aaza okumenya owulamu owutariwua."

⁵⁹Amang'ana gano Yesu yagawoola na agerera awantu mu esinagoogi ku omugizi ogwa Kapernaumu.

Owungi owua awantu awaalondanga Yesu wamurekere

⁶⁰Olwa awalonzi awa Yesu waawurra amang'ana gano, waawoola watino, "Eno ne engerera enkalu efwanana etie eno? Naanu ooza yaganya nayo?"

⁶¹Yesu yawanga na amanyire mbwe awalonzi waae wawona uwiiwi ne engerera yaae eyo. Kutio yawalaga otino, "Kuwuene amang'ana aga mboorre ago ngagasugaane gawayiisie enda?"

⁶²Ni katio kuuza okuwa kutie ni muuza okuwona Omuzia owa Omuntu na aniina ku igulu aa yawanga ni yawanga na akiari okuika ku ekialo kuno?

⁶³Omwoyo Omweru ogwa Katonda nio ogera na awantu wawa awalamu; omuntu na amaani aga omuwiri omusaasa awula owuesani owua okureeta owulamu. Amang'ana aga mbalaga gagera ni mutuukra Omwoyo Omweru oreeta owulamu.

⁶⁴Kukawa kutio, wario awandi ku inywe awawula no okuganya." Yesu yawoola otio aeniki yawanga na amiire okumanya kale okuemera yatanika okuwagerera, mbwe ni naanu agati yaawu owawulanga no okuganya kandi owaazanga okumuguzia.

⁶⁵Yesu yagia emberi na awoola otino, “Kino niki ekiagera ni mbalaga mbwe awulao omuntu ooza yanyizako ni kutari mbwe Soifu Katonda nio omukuluule na amundeetako.”

⁶⁶Okuemera enyinga ezio, owungi owua awantu awaamulondanga, watanika okuirana enyima wareka okumulonda.

⁶⁷Yesu yawuuzia awalonzi waae ikumi ni wawiri otino, “Inywe mwona muagala okundeke mugie?”

⁶⁸Simioni Petro yamuirania otino, “Omwami, ifwe tukagia ku anu ni tukurekere? Iwue ni iwue ori na amang’ana agagera no omuntu awa no owulamu owutariwua.

⁶⁹Turi no okuganya kandi tumanyire mbwe iwue ni iwue Omweru oemere ku Katonda.”

⁷⁰Nikuemao Yesu yawairania otino, “Ng’ani inze owawalowola mwona inywe awantu ikumi ni wawiri? Ni kukawa kutio, omulala ku inywe ari ekikeeno!”

⁷¹(Ano Yesu yagamba-gambanganga ku Yudaasi omuzia owa Simioni Omuiskarioti owamuguzia lunyima, kukawa mbwe yawanga omulala ku awalonzi ikumi ni iwiri waria.)

Yowaana 7

Waamwawu Yesu wawula no okuganya ku iye

¹Nikuemao Yesu yafuma atanika okugenda-genda mu ekialo ekia Galiili. Ngakagalanga okugia Yudeea aeniki awakangasi awa Awayaudi awa Yudeea waamurindanga wamuite.

²Omugomo ogwa Awayaudi ogwa okumenya mu ewigiti gwawanga ampi.

³Kutio waamwawu Yesu waamulaga watino, “Ema ano, ogie oweere Yudeea kugere awalonzi waa wagie wawone amankono aga okola.

⁴Awulao omuntu oagala mbwe awe omuntu omanyiike ni kandi ano akola ewintu owuiwisi. Kutio, aeniki okola ewintu ewikate-kaate wino, fuma enze awantu wakuwone, mbenanu.”

⁵Waagamba-gambanganga otino aeniki namba iwo waamwawu waae waawulanga no okuganya ku iye.

⁶Yesu yawairania otino, “Enyinga ziang ezia nsugaane ngiiremo eyo zikiari okutuuka, ni inywe enyinga-uninga zivasuganiire okugia.

⁷Inywe awantu awa ku ekialo kuno ngawawaregere, ni inze wandegere aeniki enyinga ziona mbalaga mbwe enkola ziawu mbiwi.

⁸Mufume mugie mu omugomo. Inze nyingeeno ng’anyiza okugia eyo aeniki enyinga ezia nsugaane ngiiremo zikiari okutuuka.”

⁹Ni yamala okuwoola otio, yasigala akola okuweera Galiili.

Okutawurizania agati ya Yesu na awakangasi awa Awayaudi

¹⁰Kukawa kutio, olwa waamwawu waae waamala okuniina wagia mu omugomo, Yesu yoonu yafuma agenda eyo. Ni ngakagia owuyanga, ni yagia owuiwisi.

¹¹Awakangasi awa Awayaudi awaawanga mu omugomo ogwo waamuagala mu awantu ni wawuuzia watino, “Kane omuntu oyo ariai?”

¹²Mu omurima ogwa awantu omwo, awantu awangi waatanika okuimonyerezia. Awandi waawoolanga mbwe, “Omuntu oyo ari omuntu omulootu.” Na awandi woonu ni walowa mbwe, “Yawa, omuntu ono asemerezia awantu.”

¹³Na awulao omuntu namba omulala owaesanga okumugamba-gambako owuyanga aeniki waatianga awakangasi awa Awayaudi.

Yesu agereere mu omugomo

¹⁴Amiire aga omugomo gaatuuka agati nikwo Yesu yagia mu olwanyi olwa ekaalu atanika okugerera awantu.

¹⁵Awakangasi awa Awayaudi awaawanga omwo waawa no okuluguula ino kandi waaiwuuzia watino, “Omuntu ono atoorrei amaganga gano ni kandi ngakasoma?”

¹⁶Yesu yawairania otino, “Engerera eya mbagerera eno ng’ane eyange omwene yaaya, ne eema ku Katonda owantuma.

¹⁷Omuntu owisiizie mu omwoyo gwae okukola okuagala okwa Katonda, nio ooza okumanya ne engerera yange eema ku Katonda nakuwa ne eri eyange inze omwene.

¹⁸Omuntu oogala okuiyama iye omwene awoola amang’ana gaae omwene. No omuntu owa Katonda yatuma, iye aagala okutondowola Katonda. Omuntu oyo ari kuwene kandi awulamo owuoni.

¹⁹Kane Muusa, ngayawa-aa ensikirra mbwe mulonde? Ni kukawa kutio, awulao namba omulala ku inywe ozilonda. Ekigera ni muagala okunyita niki?”

²⁰Omurima ogwo gwamuirania gutino, “Thuu, oriko ekikeeno! Oagala okukuita naanu?”

²¹Yesu yawairania otino, “Muzinduuke kandi muwue uwiwi ku okukola okwa nkorre amankono aga okulamia omuntu olwa Sabato.

²²Ni aeniki Muusa yawa-aa endagirra eya okuira awaana wiinyu awekizia enyangu (ni, ni kuri kuwene, ni waaguukwa wiifu, otari Muusa niwo awawa-aa endagirra eyo namba ni Muusa yawanga na akiari okuiwulwa), kandi muira awaana enyangu namba nyanga olwa Sabato.

²³Ni kuri mbwe maira awaana enyangu kugia nyanga olwa Sabato, mala kugere mutuusie ekia endagirra eya Muusa ewoola, katio enda ziinyu ziyia ni inze kolaki ni ndamiizie nyanga olwa Sabato?

²⁴Mureke okufwa okukenga-ukenga ekiina ni muwarra mala ewintu ewiwonwa na amiiso. Ni mukenge ekiina nikulondokana no owuene owua amang'ana."

Awantu awangi waganyire mbwe Yesu ari Meesia

²⁵Ku enyinga ezio awandi ku awa Yerusaleemu waatanika okuwuuzia watino, "Omuntu ono ng'anio omuntu owa awakangasi wiifu waagala mbwe aitwe oria?

²⁶Na mpano nyingeeno ari ano kandi agamba-gamba-ugamba-gamba na awantu owuyanga, ni kiwulao ekia wamiire okumukorra. Kusi awakangasi awa Awayaudi woona nyingeeno waganyire nae mbwe iye nio Meesia?

²⁷Ni ifwe tumanyire mbwe Meesia na ariiza, awulao namba omuntu omulala orimanya owaawu aa aema. No omuntu ono iye tumanyire owaawu aa aema, kutio ngaesa okuwa Meesia."

²⁸Nikuemao, na akiagia emberi okugerera mu ekaalu, Yesu yawoola no omwoyo ogwa kungulu otino, "Ee, mpao muwoola mbwe mummanyire kandi mbwe mumanyire aa nyema. Ni muwe no okumanya mbwe ng'anyakaaza ano ku amaani gange omwene yaaya. Soifu Katonda ori kuwuene nio owantuma. Inywe ngamumumanyire,

²⁹ni inze mumanyire aeniki nio owa nyaemereko kandi nio owantuma."

³⁰Olwa awakangasi awa Awayaudi waamuwurra na awoola otio, waagalanga okumuamba. Kukawa kutio, awulao omuntu namba omulala owamutaako okukono, aeniki enyinga ezia Katonda yata mbwe aaza okuambrwamo ziawanga ni zikiari okutuuka.

³¹Ni kukawa kutio, owungi owua awantu mu omurima ogwo, waawa no okuganya ku Yesu. Wawoola watino, "Kutio olwa Meesia ariiza, arikola ewintu ewikate-kaate okukira ewia omuntu ono akola?"

Awakangasi awa Awayaudi waagala okuamba Yesu

³²Awafarisaayo waawurra kiomo omurima ogwa awantu waamonyerezianga amang'ana gano ku Yesu agati yaawu. Kutio iwo alala na awakangasi awa awoozia, waatuma awarinzi awa ekaalu wagie wa-ambe Yesu.

³³Yesu yawalaga otino, "Nkiaaza okuwa ni inywe ku emienzi gindi emitono, nikuemao nyiza okuirana ku Soifu owantuma.

³⁴Murinyaagala, ni ngamurintuukra; kandi aa nyiza okugia okuwa, ngamuesa okutuukao."

³⁵Awakangasi awa Awayaudi waatanika okuwuuzia agati yaawu aweene watino, "Aa omuntu ono aagala okugia na ai, aa awoola mbwe ngatuuza okumutuukra?"

Kusi aagala okugia mu ewialo ewia awantu wiifu waatanyika wagia wamenya agati eya Awagiriiki, agie agerere Awagiriiki awari eyo?

³⁶Ekia atulaga niki na awoola mbwe, ‘Murinyaagala ni ngamurintuukra’ kandi mbwe, ‘Aa nyiza okuwa ngamuesa okutuukao?’”

Okuza okwa Omwoyo Omweru ogwa Katonda

³⁷Owuire owutuukre owua omugomo ogwa okumenya mu ewigiti, owuawanga owunene ino, Yesu yaimerra nikwo awoola no omwoyo ogwa kungulu otino, “Na ario omuntu owurra owulwo, mureke anyizeko mu-ee amanzi anywe.

³⁸Endagano ewoola mbwe omuntu-umuntu oweere no okuganya ku inze, amanzi agaesana owulamu owutariwua gaaza okumufumako ni gaika ki amanzi aga mu oluuzi.”

³⁹Ku okuwoola otio, Yesu yagamba-gambanga ku Omwoyo Omweru ogwa Katonda owa awantu awari no okuganya ku iye waazanga okutuukra lunyima. Kutuuka enyinga ezio, Katonda yawanga na akiari okuesania Omwoyo gwae Omweru aeniki Yesu yawanga na akiari okuiraniziwua owunene owua yawanga nawuo kale.

Awantu wagawuuke ku owa Yesu ari

⁴⁰Awandi ku awantu awo, olwa waamuwurra na awoola amang’ana ago, waawoola watino, “Kuwuene omuntu ono no Omugambi owa Katonda owa tumiire okuwa ni turindirra.”

⁴¹Na awandi woona waawoola watino, “Ari Kristo.” Na awandi woona waawanga ni wakiawuuzia watino, “Kristo aesa okuwa mbwe aema Galiili otie?”

⁴²Kane endagano ngewoola mbwe Kristo aaza okuza okuema mu oluganda olwa Daudi kandi mbwe aaza okuiwulwa Bethleemu, omugizi ogwa Daudi yakomeramo?”

⁴³Kutio amaingirizio aga awantu gaagawukana ku amang’ana aga Yesu.

⁴⁴Awandi waagalanga okumuamba, na awulao omuntu namba omulala owamutaako okukono.

⁴⁵Owutuukre, awarinzi awa ekaalu wairana ku Awafarisaayo na awakangasi awa awoozia. Olwa waatuuka, waawawuuzia watino, “Ekigera ni mutamureetere niki?”

⁴⁶Awarinzi awo waawairania watino, “Awulao-uwula omuntu omiire okugamba-gamba geeza ki omuntu oria!”

⁴⁷Awafarisaayo waairania awarinzi awo watino, “Owuo inywe mwona omuntu oyo amiire okuwasemerezia?”

⁴⁸Arioko omukangasi namba Omufarisaayo omulala owa muwuine na amuganyako?

⁴⁹Awulao namba omulala! Omurima ogwa awantu awatamanyire ensikirra ezia Muusa wano, niwo awamuganyako. Iwo Katonda yamala okuwafuuwa.”

⁵⁰Nikodeemo owawanga na amiire okugiako ku Yesu owuire oria yawanga omulala ku Awafarisaayo awo. Yawuuzia awiina waae awo otino,

⁵¹“Endagirra iifu lwona etuganyiire okukengera omuntu ekiina na akiari okuetwa awantu wawurre ekia omwene awoola?”

⁵²Awafarisaayo awiina waae awo waamuirania watino, “Kuwonekana mbwe iwue oona oema Galiili. Warrako mu endagano mpoola, owone na ario omugambi owa Katonda omiire okuemako Galiili okuamera ri?”

⁵³[Nikuemao, omuntu ki omuntu yafuma ao ataa na agia engo waae.

Yowaana 8

¹Awantu ni waamala okugia mu emigizi giawu, Yesu iye yagia ku ekigiri ekia Zaituuni.

Omukazi owa-ambwa mu owusoodani

²Enkio walwo kunkio kumagambaazi, Yesu yairana mu olwanyi olwa ekaalu. Awantu awangi ino wamuikumiako aa yawanga kandi Yesu yaikala ansi atanika okuwagerera.

³Ni yagianga emberu no okugerera, awagerezi awa endagirra na Awafarisaayo wandi waamureetra omukazi owa-ambwa mu amiiso ngalulani na ari ku iseero no omusaaza otari owaae, mala wamuimerezia emberu wa Yesu.

⁴Waalaga Yesu watino, “Omugerezi, omukazi owa owona ono ya-ambrwe mu amiiso ngalulani na ari ku iseero no omusaaza otari owaae.

⁵Mu endagirra ziifu, Muusa yatusikirra mbwe omukazi ki ono, tumukube na amawaale tumuite. Ni iwue, tulageko ekia owoola ku eking’ana kino?”

⁶Waakola no okuwuuzia kuno, ki omutege kugere watuukre ekintu ekia waaesanga okumingirra nakio. Ni Yesu yaikirra ansi atanika okujoja ne ekiala kiae ansi ku ilowa.

⁷Olwa awantu wano waagia emberu okumuwuuzia eking’ana kino, yaimerra kungulu awalaga otino, “Na ario omuntu ku inywe ao okiari okukola owuoni, oyo awe mbwe nio osooka okumukuba ni iwaale.”

⁸Ni yamala okuwoola otio yaikirra kandi atanika okujoja ansi ku ilowa.

⁹Olwa Awagerezi awa endagirra na Awafarisaayo wano waawurra otio, waatanika okufuma omulala-lala ni wagia, okutanikra ku awanene waawu, nawuno wawua chwe. Owasigala ao, no omukazi oyo eng'ene.

¹⁰Yesu yaimerra kungulu awuuzia omukazi oyo otino, “Mukaziiwue, awantu awakuingiriire waria wagiirei?”

¹¹Omukazi oyo yamuirania otino, “Wawula ano omukangasi.” Nikuemao Yesu yoona yamulaga otino, “Noona ng'anyiza okukengera ekiina, yaaya. Gia, no oreke owuoni ilala.”]

Yesu nio owueru owua ekialo

¹²Yesu yagia emberi okugerera awantu mu ekaalu na awoola otino, “Inze ni inze owueru owumurika awantu mu ekialo. Omuntu-umuntu onondere ngaaza okugenda-genda mu ekierema yaaya, ni aaza okuwa no owueru owureeta owulamu.”

¹³Awafarisaayo waamuirania ni wamulaga watino, “Nyingeeno na mpano oigamba-gambako iwue omwene? Amang'ana aga omuntu aiwoolako iye omwene ng'ana amang'ana aga awantu wasugaane waganye nago.”

¹⁴Yesu yawairania otino, “Namba ni kuri mbwe nyiyamia omwene, okuiyamia kwange okwo kuri kuwue aeniki inze manyire aa nyaema ni aa nyiza okuirana. Ni inywe ngamumanyire aa nyaema na aa nyiza okugia.

¹⁵Inywe mukenga ekiina no omurengo ogwa awantu niwo awateereo, ni inze ng'ankengera omuntu ekiina yaaya.

¹⁶Ni, ni nkengeere omuntu ekiina, nkikenga mu engira esugaane aeniki ng'andi omwene yaaya, ni ndi ni Soifu owantuma.

¹⁷Mu endagano iinyu kujojerwe mbwe awantu wawiri ni wasigiike ing'ana, ing'ana erio risugre okuganywako.

¹⁸Inze ng'anyiisigika inze omwene, no owundi onsigika ku ewintu ewia mboola ni Soifu owantuma.”

¹⁹Nikuemao Awafarisaayo wano waamuwuzia watino, “Swao oyo ariai?” Yesu yawairania mbwe, “Inywe ngamumanyire kuwue owa ndi. Namba Soifu oona ngamumanyire. Kuweeko mbwe mumanyire owa ndi kuwue, kangato mumanyire Soifu oona.”

²⁰Yesu yawoola amang'ana gano goona na agerera awantu mu ekaalu ni yawanga nyaluwaala olwa esanduuki ezia amasendi agaafumiziwuanga Katonda ziateewua. Kukawa kutio, awulao omuntu owamuamba aeniki enyinga ezia yateerwa okuuzza okuambwa ziawanga ni zikiari.

Engerera eya Yesu ngeingirra Awafarisaayo

²¹Yesu kandi yainuula ing'ana eria yamala okuwalaga otino, “Nyiza okuwaemako ngie ale kandi muuza okunyagala. Muuza okufwa mu owuoni wuinyu kandi aa nyiza okugia inywe ngamuesa mwagio.”

²²Kino kiagera awakangasi awa Awayaudi awo waiwuuzia agati yaawu watino, “Kane omuntu ono aaza okuigoga? Andi ekio nikio ekigera na awoola mbwe, ‘Aa nyiza okugia inywe ngamuesa mwagio.’?”

²³Ni Yesu yagia emberu na awoola otino, “Inywe muemere asi ku ekialo, ni inze nyaema kungulu ku igulu. Muri awantu awa ku ekialo kino, ni inze ng'andi owa ku ekialo yaaya.

²⁴Nyamiire okuwalaga mbwe ni mulowere okuganya mbwe ndi owa mboola mbwe ndi, muuza okufwa mu owuoni wuinyu. Kandi ni kuwuene mbwe muuza okufwa mu owuoni wuinyu.”

²⁵Waamuwuuzia watino, “Iwue ori anu?” Yesu yawairania otino, “Ndi mala owa miire okuweerako ni mbalaga mbwe ndi enyinga zino ziona.

²⁶Ndi ne ewintu ewingi ewia nyiza nyawawoolako kandi ewia nyiza nyawakengerera nawio ekiina. Omuntu owantuma no omuntu owoola amang'ana agari kuwuene kandi ndaga awantu awa ku ekialo amang'ana aga nyawurra na awoola.”

²⁷Awantu wano ngawakamanya mbwe yawagamba-gambranga ku Swae owa ku igulu.

²⁸Kutio Yesu yawalaga otino, “Olwa murigingirizia Omuzia owa Omuntu kungulu, nikwo murimanya mbwe ndi owa mbalaga mbwe ndi. Lwona murimanya mbwe kiwulao ekintu ekia nkola omwene, ni mboola mala amang'ana aga Soifu nio owangerera.

²⁹Soifu owantuma oyo ari ni inze alala. Akiari okundeka nsigala omwene yaaya, aeniki inze nkola mala ewintu ewimuomerezia enyinga ziona.”

Awayaudi awangi waganyire ku Yesu

³⁰Ni yagamba-gambanga otio, awantu awangi waawa no okuganya ku iye.

³¹Ku Awayaudi awaawanga ni wamiire okuwa no okuganya ku iye, Yesu yawalaga otino, “Ni muisimbiriire ku igerera riange nikwo muuza okuwa awalonzi wange kuwuene.

³²Nikuemao muuza okumanya owuene kandi owuene owuo wuuzia okuwasiwula muwe owuyanga.”

Okugawukana okuri ku awaana awa Abraamu awa kuwuene

³³Awantu awo waamuirania watino, “Ifwe turi awiizukulu awa Abraamu, kandi okuemera ri tukiari okuwa awakurumu awa omuntu-umuntu. Katio iwue oreeta otie okuwoola mbwe tuuza okusiwulwa tuwe owuyanga?”

- ³⁴Yesu yawairania otino, “Mbalaga kuwuene mbwe omuntu okola owuoni ari omukurumu owa owuoni.
- ³⁵Omukurumu no omuntu omugenzi-genzi owula ni iwaga eria okuwa ku omugizi amiire goona. No omuzia oiwuulwe ku omugizi nio owa ku omugizi mu owulamu wuae wuona.
- ³⁶Kutio omuntu-umuntu owa Omuzia ateere owuyanga, ari owuyanga kuwuene.
- ³⁷Manyire mbwe muri awiizukulu awa Abraamu. Kukawa kutio, muitegere okunyita aeniki emioyo giinyu ngagi-ingiizie amang’ana gange.
- ³⁸Mbalaga ewintu ewia miire okuwona emberi wa Soifu, ni inywe mwona mukola ewintu ewia mumiire okuwurra ku soinyu.”
- ³⁹Awantu awo waamuirania watino, “Abraamu nio soifu.” Yesu yawalaga mbwe, “Kuweeko mbwe muri awaana awa Abraamu kuwuene, kangato mukola ewintu ewifwanana ne ewia Abraamu yakola.
- ⁴⁰Inywe muagala okunyita aeniki mbalagre owuene owua nyawurra ku Katonda. Mboola mbwe Abraamu ngakakola ewintu ewifwana witio yawa.
- ⁴¹Inywe mukola ewintu ewia soinyu nio okola.” Awantu awo waalowa wukalu ni wawoola watino, “Ifwe Katonda eng’ene nio Soifu, tuwula no owundi.”
- ⁴²Yesu yawalaga otino, “Kuweeko mbwe Katonda nio Soinyu kandi mbwe muri awaana waae, kangato mungonziizie. Aeniki inze nyaema ku Katonda kandi nyingeeno katio ndi ano ni inywe. Ng’ani inze omwene owawisia okuuzza ku ekialo kuno yaaya, ni, ni Katonda owantuma.
- ⁴³Ewia mboola ngawiwaingirra kolaki? Ngawiwaingirra aeniki mulowa okuwurra amang’ana aga mbalaga.
- ⁴⁴Inywe muri awa soinyu Ekikeeno kandi muagala okukola mala ewia soinyu oyo aagala. Iye yawanga omwisi okuemera mu owutanikro. Ngasigika owuene aeniki owuene wumuwulamo. Ni iye ng’ina owuweeyi, owa amang’ana goona aga owuweeyi gaemako, kandi na awoola owuweeyi afwana owoola omunwa ogwa yasimuka nagwo.
- ⁴⁵Kutio, kukawa mbwe inze mbalaga ewintu ewiri kuwuene, mulowa okuganya ni inze.
- ⁴⁶Arioko omuntu ku inywe oesa okuwoola ekintu ekilagana mbwe ndi omwoni? Ni mbalaga owuene otio, ekiwalowera okuganya ni inze katio niki?
- ⁴⁷Omuntu owa Katonda, awurra amang’ana aga Katonda. Inywe ekigera ni ngamuwurra agaae, ni mbwe ngamuri awantu awa Katonda yaaya.”
- ⁴⁸Awakangasi awa Awayaudi awo waamuirania watino, “Ni tuwoorre mbwe ori Omusamaria kandi mbwe oriko ekikeeno, ao otio tukaweeya?”

⁴⁹Yesu yawairania otino, “Inze ekikeeno ngakindimo yaaya. Inze mpa Soifu owuti, ni inywe ngamumpeere owuti yaaya.

⁵⁰Inze ng’anyagarra okueewua owunene na awantu yaaya, ni ni Soifu Katonda omukengi owa ekiina nio onyagarra owunene.

⁵¹Mbalaga kuwuene mbwe no omuntu-umuntu arindre amang’ana gange gano, ngarifwa yaaya.”

⁵²Olwa awakangasi awa Awayaudi waawurra Yesu na awoola otio, waamulaga watino, “Nyingeeno tumanyire kuwuene mbwe kane oriko ekikeeno! Abraamu na awagambi awakulu awa Katonda wona waafwa. Iwue oesa otie okutulaga mbwe omuntu-umuntu orindre amang’ana gao ngarifwa?

⁵³Kusi owuo oitoola omukaate okukira guukwa iifu Abraamu? Iye yafwa mala kiomo awagambi awakulu wona waafwa. Oingirizia mbwe iwue ori anu iwue?”

⁵⁴Yesu yawairania otino, “Ni kuri mbwe nyiitaako owunene inze omwene, owunene owuo wuwula ne emirimo. Ni, ompa owunene ni Katonda Soifu, owa muwoola mbwe ari Katonda iinyu oyo.

⁵⁵Kukawa mbwe inywe ngamumumanyire, inze mumanyire geeza, aa ni nyiizukiire nyawoola mbwe ng’amumanyire, nkawa omuweeyi ki inywe. Ee, mumanyire kandi nindre amang’ana gaae.

⁵⁶Guukwa iinyu Abraamu yasangaala ino ni yaingirizianga okuwona amiire aga okuuzwa kwange. Yakuwona kandi yawa ne ekisangaalo.”

⁵⁷Awakangasi awa Awayaudi awo waamuirania ni wamulaga watino, “Iwue okiari namba okutuusia emiaka amakumi ataanu, no owoola mbwe omiire okuwona Abraamu?”

⁵⁸Yesu yawairania otino, “Kuwuene mbalaga mbwe, nyawangao ni Abraamu akiari okuiwulwa.”

⁵⁹Olwa awantu wano wamuwurra na awoola otio, waatoola amawaale mbwe wamukube nago. Ni Yesu yawaiwisako aema mu olwanyi olwa ekaalu owateekako.

Yowaana 9

Yesu alamiizie omuwuunu

¹Ni Yesu yagenda-gendanga, yawona omuntu omuwuunu owaiwulwa na ari omuwuunu.

²Awalonzi waae waamuwuuzia watino, “Omugerezi, agati ya omuntu ono na awiiwuzi waae, owakola owuoni owuagera no omuntu ono awa omuwuunu naanu?”

³Yesu yawairania otino, “Yaaya, awulao agati yaawu owakola owuoni owuagera no omuntu ono awa omuwuuwu otino. Ni kino kiaikola kugere amaani aga Katonda gaaze gawonwe ni gakola emirimo ku omuntu ono.

⁴Ne ekialo kikiari omuwasu paka tukole emirimo egia Katonda yantuma okukola aeniki ekierema kiiza aa awulao ooza okukola emirimo.

⁵Ni nkiari ku ekialo kuno, ni inze owueru ku awantu awa ku ekialo.”

⁶Ni yamala okuwoola otio, yafuuzza amate ansi, akonya itosi na amate nikuemao atoola itosi erio awaka ku amiiso aga omuntu omuwuunu oyo.

⁷Nikuemao yalaga omuntu oyo otino, “Fuma ano ogie oozie ekieni kiao mu ekituko ekietwa Siloamu.” (Eriina Siloamu rilagana mbwe okutumwa.) Kutio omuntu oyo yafuma agia aozia ekieni kiae airana na amiiso gawona.

⁸Olwa awantu awaawanga ni wamenyere a-ampi nae alala na awantu awaamuwonanga na asawa-sawa awantu ewintu waamuwona na awona, waaiwuuzia aweene mbwe, “Ono ng’anio omuntu owaweerenga na asawa-sawa awantu ewintu oria?”

⁹Awandi waaganya mbwe, “Ee, ni iye.” Na awandi wona waalowa ni wawoola watino, “Yaaya, ono ng’ani iye. Okufwanana nikwo wafwanana.” No omuntu oyo yawalaga kang’i otino, “Ono ni inze oyo.”

¹⁰Olwa yawoola otio, awantu awo waamuwuuzia watino, “No owoola otio, kane amiiso gaao gataniike okuwona na ngiraaki?”

¹¹Omuntu ono yawairania na awoola otino, “Omuntu owa waeta mbwe Yesu nio owakonyere itosi na amate gaae, atoola itosi erio awaka ku amiiso gange nikwo andaga mbwe ngie nyozie ekieni kiange mu ekituko ekietwa mbwe Siloamu. Olwa ngiire nyozia-uozia ekieni kiange otino, amiiso gange gaiguuke ntanika okuwona.”

¹²Waamuwuuzia watino, “Omuntu oyo ariai?” Ni iye yawairania otino, “Inze ng’amanyire aa agiire.”

¹³Nikuemao awantu awo waatoola omuntu owawanga omuwuunu ono wamuirira ku Awafarisaayo.

¹⁴Owuire owua Yesu yaigurrao amiiso aga omuntu ono wuawanga owuire owua Sabato.

¹⁵Awafarisaayo wano wona waawuuzia omuntu ono kiomo amiiso gaae gataniike okuwona. Omuntu oyo yawairania otino, “Yesu nio otoorre itosi ata mu amiiso gange. Ngiire ngaozia kandi nyingeeno katio mbona.”

¹⁶Awafarisaayo wandi waawoola watino, “Omuntu owa owoola oyo, ng’ari omuntu oemere ku Katonda yaaya, aeniki akola emirimo egitasugaane gikolwe olwa Sabato.” Kukawa kutio awandi ku iwo waawawuuzia watino, “Omuntu ono

na ataemere ku Katonda, akakola amankono agafwana gatio otie?” Kutio okugawukana kwawaa agati ya Awafarisaayo wano.

¹⁷Owutuukre, Awafarisaayo waaeta omuntu owawanga omuwuunu oria watanika okumuwuuzia kandi watino, “Iwue ekia ooza wawoola ku omuntu ono niki? Ee, ni iwue aiguuleo amiiso gaao.” Omuntu oyo yawairania otino, “Oria no omugambi owa Katonda.”

¹⁸Awakangasi awa Awayaudi wano ngawakaganya mbwe omuntu owawanga na awona oyo yawanganga omuwuunu. Okwo kwagera waeta awiiwuzi waae waaza emberu waawu.

¹⁹Nikuemao waawawuuzia watino, “Ono no omwana iinyu? Ni iye owa muwoola mbwe yaiwulwa na ari omuwuunu? Ni kuri kutio, kuweere kutie mbwe nyingeeno awona?”

²⁰Awiiwuzi awo waawairania watino, “Ifwe tumanyire mbwe ono no omwana iifu kandi mbwe twamuiwula na ari omuwuunu.

²¹Ni kiomo areetere okuwona nyingeeno namba omuntu omuiguuleo amiiso, ifwe ngatumanyire! Mumuwuuzie awalage aeniki ari omuntu mukulu, oesa okuwoola ekimuikoriire iye omwene.”

²²Awiiwuzi waae waawoola watino aeniki waatianga awakangasi awa Awayaudi aeniki awakangasi wano waawanga ni wamiire okuwisia mbwe omuntu-umuntu oganyire mbwe Yesu nio Kristo omulowoole owa Katonda, arumusiwua ilala mu esinagoogi.

²³Kino niki ekiagera awiiwuzi waae ni wawoola mbwe, “Mumuwuuzie awalage aeniki ari omuntu mukulu.”

²⁴Waaeta omuntu owawanga omuwuunu ono olwa okuwiri wamulaga watino, “Katonda, otari omuntu ono, nio osugaane o-ee owunene, aeniki omuntu ono iye tumanyire mbwe ari omwoni.”

²⁵Ni iye yawairania na awoola otino, “Inze ng’amanyire ni kuri mbwe Yesu oyo ari omwoni nakuwa yaaya. Ne ekintu ekilala ekineene ekia manyire ni mbwe nyawanga omuwuunu, ni nyingeeno mbona!”

²⁶Nikuemao waamuwuuzia watino, “Yakukorraki? Yaiguulao amiiso gaao otie?”

²⁷Omuntu oyo yawairania otino, “Kane ng’amiire okuwalaga kiomo yaiguulao amiiso gange ni mulowere okuganya na amang’ana gange. Ekigera ni muagala mbwe mbalage kandi niki? Kusi mwona muagala okuwa awalonzi waae?”

²⁸Waanika okumurigizra amang’ana aga amanyego ni wawoola watino, “Ni iwue omulonzi waae, ifwe turi awalonzi awa Muusa!

²⁹Ifwe tumanyire mbwe Katonda yagamba-gamba ni Muusa. No omuntu ono, iye ngatumanyire namba aa aemere.”

³⁰Omuntu oyo yawairania otino, “Awiifu agiinyu ago katio makalu! Owuo muwoola mbwe ngamumanyire aa omuntu ono aemere, ni kandi muwona na aiguuleo amiiso gange!”

³¹Ifwe tumanyire mbwe okuemera ri Katonda ngategerezia okusawa okwa omuntu omwoni. Okusawa okwa omuntu omueere owuti kweng’ene nikwo okwa ategerezia.

³²Awulao omiire okuwurrako mbwe omuntu agerre amiiso aga omuntu owaiwulwa omuwuunu ni gawona.

³³Kuweeko mbwe omuntu ono ngakaema ku Katonda, ewulao-uwula engira eya akakorremo ekintu ekifwanana ne ekia ankoriire kino.”

³⁴Olwa awakangasi awa Awayaudi awo waawurra omuntu oyo na awalaga otio, waamuirania no okusu ni wawoola watino, “Wonako omuntu omwoni owaiwulwa mu owuoni ono. Owuo iwue oona oagala okutugerera!” Nikuemao waamurumusia omwo.

Okuwa omuwuunu mu amang’ana aga Katonda

³⁵Yesu yawurra mbwe awantu awo warumuusie omuntu owa yaigulao amiiso oyo. Olwa yamuagaana, yamuwuzia otino, “Mberi ori no okuganya ku Omuzia owa Omuntu?”

³⁶Omuntu oyo yamuirania otino, “Ndage Omuzia owa Omuntu oyo kugere muganyeko.”

³⁷Yesu yamulaga otino, “Wamiire okumuwona, kandi nio ogamba-gamba ni iwue ono.”

³⁸Nikuemao yamuikirra no owuti mala amulaga otino, “Omwami, nganyire ku iwue.”

³⁹Owutuukre, Yesu yalaga awantu awaawanga ao otino, “Okuuza kwange kureeteere awantu ekiina, kugere awantu awa amiiso gaawu mawuunu watanike okuwona, na awaingirizia mbwe wawona, iwo wawe awawuunu.”

⁴⁰Olwa Awafarisaayo wandi awaawanga nae ao waawurra ekia yawoola ekio, waamuwuzia watino, “Owuo owoolaki ekio? Kusi ifwe twona turi awawuunu?”

⁴¹Yesu yawalaga otino, “Kuweeko mbwe muri awawuunu, kangato Katonda ngawa-ambira owuoni, ni aeniki aweene muieta mbwe amiiso giinyu gawona, Katonda awa-ambira owuoni owua mukola.”

Yowaana 10

Olugero olwa omwayi owa amagondi omulootu

- ¹Yesu yagia emberi na awalaga otino, “Mbalaga kuwuene mbwe omuntu otalonda ekikulo na aingira mu ekikaari ekia amagondi, ni iye amaala oluwago yagwa muni, omuntu oyo no omwiwi kandi omusakuzi.
- ²Omuntu oingirra mu ekikulo na aingira mu ekikaari, nio omwayi omwene amagondi.
- ³Omurinzi amuigurrao ekikulo kandi amagondi gaae gamuwurra na agamba-gamba. Aeta amagondi gaae na amiina gago kandi agakangatra na agafumia enze eya ekikaari.
- ⁴Na amiire okugafumia enze, akangata emberi wago, ni igo gamulonda enyima aeniki gamanyire omwoyo gwae.
- ⁵Ngagaaza gaalonda omuntu owa gatamanyire. Ni gawuine omuntu omugeni owa gatamanyire, gamusomoka ni gamuemako aeniki ngagamanyire omwoyo ogwa omuntu omugeni.”
- ⁶Yesu yagamba-gamba nawo mu olugero luno, ni ngawakawurra ekia yawalaganga.
- ⁷Yesu yawalaga kandi otino, “Kuwuene mbalaga mbwe ni inze ekikulo ekia amagondi galonda.
- ⁸Awantu awaansookera wona waaza ni waisemerezia mbwe waazre okurinda amagondi. Iwo waawanga awiwi na awasakuzi, kandi amagondi gaalowa okuwategerezia.
- ⁹Inze ni inze ekikulo. Omuntu-umuntu ombitiireko na aingira, arilama. Omuntu oyo aaza okuwa owuyanga okuingira muni no okufuma enze kandi aaza okutuukra owuayiro.
- ¹⁰Omwiwi iye aaza mala okuiwa, okuita no okuona ewintu. Ni inze nyaaza kugere awantu watuukre owulamu, owulamu owusugre owutakeeyiremo ekintu.
- ¹¹“Ni inze omwayi omulootu. Omwayi omulootu afumizia amagondi gaae owulamu wuae.
- ¹²Omwayi omujoje, iye ngatoola amagondi ki agaae. Kutio na awuine ensisi ne eeza, asomoka yareka amagondi. Ensisi egwa ku amagondi kandi amagondi gatanyika.
- ¹³Arumuka aeniki iye ari mala omujoje otawurra amagondi owululu.
- ¹⁴“Inze ni inze omwayi omulootu. Manyire amagondi gange kandi amagondi gange goona gammanyire.
- ¹⁵Soifu Katonda ammanyire kandi noona mumanyire, kandi nyifumiizie okufwira amagondi gange.

¹⁶Ndi na amagondi gandi agatari aga ekikaari kino. Goona gaaza okuwurra omwoyo gwange kandi gaaza okuizoga ni gano gawe olwizo olulala oluri no omwayi omulala.

¹⁷Soifu Katonda angonziizie aeniki nganyire okufumia owulamu wuange. Ni miire okufumia owulamu wuange, mbutuukra kandi nyawa omulamu.

¹⁸Awulao omuntu oesa okuntoolako owulamu wuange. Omwene ni inze owufumia ku okuagala kwange. Ndi na amaani aga okuganya okufwa na aga okuirana nyawa omulamu kandi. Soifu Katonda nio owansikirra mbwe nyize nkole otio.”

¹⁹Ku okuwoola otio, okugawukana kwawaa agati ya awakangasi awa Awayaudi.

²⁰Owungi wuawu waawoola watino, “Katio ngamuwurrako ewia awoola, omuntu ono kane ilalu rimuambre kandi ariko ewikeeno. Kiwulao ekigera ni tutegerezia amang’ana gaae.”

²¹Na awandi waawoola watino, “Awiifu omuntu ori ne ewikeeno ngaaza yagamb-gamba otio, yaaya. Ekikeeno kikaiguuleo otie amiiso aga omuwuunu?”

Awakangasi awa Awayaudi walowere amang’ana aga Yesu

²²Nikuemao, gwawangao omugomo ogwa okuingirizia amiire aga ekaalu yaeruziwua Yerusaleemu. Ziawanga mu amiire aga entwigo

²³kandi kwatuukra Yesu ni yawanga na agenda-genda mu olwanyo olwa ekaalu, asi aetwa mbwe ekiwiidi ekia Solomooni.

²⁴Awakangasi awa Awayaudi waamuikumiako watanika okumuwuuzia watino, “Tuuza okuweerako ni tuiwuzia-wuuzia otino ku iwue kutuuka ri? No ori Meesia ngotulaga-ulaga kalala kugere tumanye!”

²⁵Yesu yawairania otino, “Miire okuwalaga ni mulowere okuwa no okuganya. Amankono aga nkola na amaani aga Soifu Katonda goona galagana owa ndi.

²⁶Ngamuri no okuganya aeniki ngamuri amagondi gange.

²⁷Amagondi gange gategerezia omwoyo gwange, gammanyire kandi gandonda.

²⁸Nga-aa owulamu owutariwua kandi ngagarifwa. Awulao-uwula omuntu oesa okugatoola mu amakono gange.

²⁹Soifu Katonda owawata mu amakono gange ari na amaani okukira ewintu wiona. Kutio awulao-uwula omuntu ooza yagatoola mu amakono aga Soifu Katonda.

³⁰Inze ni Soifu Katonda turi ekintu ekilala.”

³¹Olwa yawoola-uwoola otio otino, awakangasi awa Awayaudi kandi waatoola amawaale mbwe wamukube nago.

³²Ni Yesu yawalaga otino, “Miire okuwakorra ewintu ewikate-kaate ewingi, na amaani aga Soifu Katonda, muwona na amiiso. Kutio mundageko ekilala ekia muagala okunkubra na amawaale?”

³³Iwo waamuirania watino, “Ngatuagala okukukuba namba ku ekilala ku ewia omiire okukola wino, ni tuagala okukukuba aeniki oona eriina eria Katonda. Iwue omuntu-umuntu ono okaifwanania ni Katonda otie?”

³⁴Yesu yawairania otino, “Mukawoolaki ku amang’ana agaajojwa mu Ensikirra ziinyu agawoola mbwe, ‘Inze Katonda mboorre mbwe muri katonda.’

³⁵Ee ni kuwue mbwe Katonda yaeta awantu awaya-aa endagano yaae mbwe wari katonda. Kiomo tumanyire mbwe endagano ngeonwa,

³⁶muingirizia mutie ku omuntu owa Katonda omwene nio owalowola amutengeka ki owaae omwene kandi amutuma ku ekialo? Katio muingirizia mbwe mukola geeza okuningirra mbwe nyona eriina eria Katonda ni mboola mbwe, ‘Ndi Omuzia owa Katonda?’

³⁷Ni kuri mbwe ng’ankola ewintu ewia Soifu Katonda akola, ao otio mulowe okuwa no okuganya ku inze.

³⁸Ni, ni nkola emirimo egia Soifu Katonda, namba ni mutaweere no okuganya ku inze, muwe no okuganya ku amankono ago mbenanu. Kandi ni mukorre mutio, muuza okumanya muwule ni kaozi, mbwe Soifu Katonda andimo kandi noona murimo — turi ekintu ekilala.”

³⁹Awakangasi awa Awayaudi kandi waageezaania mbwe wamuambe, ni Yesu yamizuka mu amakono gaawu agia.

⁴⁰Yesu yairana enyima kandi agia a-ambuka oluuzi olwa Yordaani, agia akola okuweera asi aa Yowaana Omubatiisi yawanga na abatiisa awantu kale,

⁴¹kandi awantu awangi waamugiako. Waawoola agati yaawu aweene watino, “Kukawa mbwe Yowaana ngakakola amankono namba kalala, na amang’ana goona aga yawoola ku omuntu ono gari kuwue.”

⁴²Awantu awangi ino awaawanga ao waawa no okuganya ku Yesu.

Yowaana 11

Owulwire owua Lazaaro

¹Yawangao omuntu wundi ku omugizi ogwa Bethania owaetwanga mbwe Lazaaro. Yawanga na amenyere Bethania eyo ni waawamwawu waae awekiala Maaria ni Mariitha. Omuntu ono nyanga omuwiri gwamukuba wukalu ino.

²Maaria wamwawu Lazaaro ono, nio owa lunyima yafuka amavuta ku amagulu aga Yesu, nikuemao atanika okugaeya ne emvwiri ziae.

³Kutio, waamwawu Lazaaro awekiala wano waatumra Yesu amang'ana mbwe, "Omwami, Lazaaro omwiko waa owa ogonziizie ari omulwire ino."

⁴Olwa Yesu yawurra omutumwa ogwo, yalaga awalonzi waae otino, "Owulwire wuno ngawuza okuita Lazaaro ilala, yaaya. Ni kuno kuikorre oku-aa Katonda owunene kandi kugere Omuzia owa Katonda aeewue owunene."

⁵Yesu yawanga na agonziizie Lazaaro alala ni waamwawu waae Maaria ni Mariitha.

⁶Kukawa mbwe yawagonzia otio, olwa yawurra mbwe Lazaaro ari mulwire, yamala amiire awiri nikwo afuma na agia aa Lazaaro.

Okufwa okwa Lazaaro

⁷Nikuemao, Yesu yalaga awalonzi waae otino, "Mutuirane Yudeea."

⁸Awalonzi waae waamuirania watino, "Omugerezi, oogala mbwe tuirane Yudeea ni izuuzi ano awakangasi awa Awayaudi waagalanga okukuba eyo na amawaale?"

⁹Yesu yawairania mu olugero otino, "Omuwasu ngaguri ne enyinga ikumi ni iwiri ezia okukola emirimo? Omuntu ogenda-genda omuwasu ngaiguunya yaaya aeniki awona no owueru owumurika ekialo kino.

¹⁰Ogenda-genda owuire iye aiguunya aeniki agenda-genda aa owueru wuwula."

¹¹Ni Yesu yamala okuwalaga otio yagia emberu na awalaga otino, "Omwiko iifu Lazaaro ari mu endoolo agona. Ni ngenda eyo okumulamusia."

¹²Awalonzi waae waamuirania watino, "Omwami, ni kuri mbwe ari mu endoolo agona, kane aaza okugia geeza."

¹³Yesu iye yawanga na agamba-gamba ku okufwa okwa Lazaaro, na awalonzi waae iwo waingirizianga mbwe yagamba-gambanganga ku endoolo ezia awantu wagona zino.

¹⁴Kutio Yesu yawalaga owuigoloole otino, "Lazaaro amiire okufwa,

¹⁵kandi nsangaarre ino mbwe okwo kuikorre ni mbula a-ampi ao, aeniki okwo kuuza okugera muwe no okuganya ku inze. Ni mutugie aa ari."

¹⁶Thomaasi (owalukwa eriina Mulongo) yalaga awalonzi awiina waae otino, "Mutugie no Omwami twona, aa namba na agia okuitwa, tugie tufwe nae."

Yesu awoorre mbwe nio okuziuka kandi nio owulamu

¹⁷Olwa Yesu na awalonzi waae waatuuka a-ampi no omugizi, yatuukra Lazaaro na amiire okumala amiire ane mu iwuuta omwa ya-awirwamo.

¹⁸Omugizi ogwa Bethania gwawanga owuliire owukasuga emaeli iwiri okuema Yerusaleemu.

¹⁹Kwatuukra na Awayaudi wangi ino waaza Bethania, aawu Maaria ni Mariitha okuwaoreezia emioyo ku okuteesia Lazaaro wamwawu.

²⁰Olwa Mariitha yawurra mbwe Yesu aaza, yafuma okugia okumuaganra, ni Maaria iye yasigala engo.

²¹Mariitha yalaga Yesu otino, “Omwami, kuweeko mbwe wawerenga ano, wamwifu ngakafwire yaaya!

²²Ni manyire mbwe namba nyingeeno Katonda aaza okuku-aa ekintu-ukintu ekia omusawire.”

²³Yesu yamuirania otino, “Wamwinyu aaza okuziuka awe omulamu.”

²⁴Maritha yamuirania otino, “Manyire mbwe aaza okuziuka nyanga olwa owuire owua owutuuko.”

²⁵Yesu yamulaga otino, “Inze ni inze oziusia awantu kandi ni inze o-aa awantu owulamu. Omuntu-umuntu ori no okuganya ku inze aaza okuwa omulamu kandi, namba ni kuri mbwe amiire okufwa.

²⁶Kandi omuntu-umuntu ori omulamu na aweere no okuganya ku inze ngarifwa. Mberi oganyire na amang’ana ago?”

²⁷Mariitha yamuirania otino, “Ee Omwami, ndi no okuganya mbwe iwue ni iwue Meesia, Omuzia owa Katonda, owawanga na asugaane aaze ku ekialo.”

Amaziga aga Yesu gayookere

²⁸Ni Mariitha yamala okuwoola otio, yairana engo agia aeta Maaria na awantu watamanyire amulaga otino, “Omugerezi amiire okuuza ari a-ampi ano akueta.”

²⁹Olwa Maaria yawurra amang’ana ago yaema afuma wuangu-wuangu okugia okuaganra Yesu.

³⁰Yesu yawanga na akiari okuingira ku omugizi ogwa Bethania, ni yawanga na akiari mala aa Mariitha yawanga na amurekere.

³¹Awayaudi awaawanga ni Maaria mu enyumba ni wamuoreezia omwoyo waafuma okumulonda olwa waamuwona na afuma enze wuangu-wuangu. Iwo waaingirizianga mbwe owuo afuma agia ku ekiwaga ekia wamwawu okurra.

³²Olwa Maaria yatuuka aa Yesu yawanga mala amuwona, yakuba ansi amasigamo atanika okuwoola otino, “Omwami, kuweeko mbwe owerenga ano, wamwifu ngakafwire yaaya!”

³³Olwa Yesu yamuwona na arra wululu, alala na Awayaudi awaaza okumuoreezia omwoyo woona ni warra wululu otio, yawurra owululu kandi yainyaasia ino mu omwoyo gwae.

³⁴Yawawuuzia mbwe, “Mumuawiirei?” Awantu awo waamuirania watino, “Omwami iza tugie owone aa tumuawiire.”

³⁵Yesu yarra amaziga gayooka.

³⁶Okwo kwagera Awayaudi awaawanga ao wawoola watino, “Awiifu muwoneko kiomo yawerenga na agonziizie Lazaaro!”

³⁷Na awandi ku iwo waawoola watino, “No omuntu ono yaiguulao amiiso aga omuntu omuwuunu, ngaeserenga okuigarra olumbe luno lureke okuita Lazaaro?”

Yesu aziuusie Lazaaro

³⁸Amasaasra kandi ga-amba Yesu agia ku ekiwaga aa waawanga ni wamuawiire. Ekiwaga kiawanga iwuuta eria iwaale riteerwe ku omunwa.

³⁹Yesu yalaga awantu awaawangao awo otino, “Mutooleo oguwaale oguri ku omunwa ao ogwo.” Ni Maritha wamwawu Lazaaro yamuirania otino, “Omwami nyingeeno katio awunya ekivundu aeniki amiire okumala amiire ane mu iwuuta.”

⁴⁰Olwa yawoola otio Yesu yamuirania otino, “Ng’amberenga ni miire okukulaga mbwe no oweere no okuganya, ooza okuwona amaani aga Katonda?”

⁴¹Kutio waatoolao oguwaale ogwo. Nikuema Yesu yawarra kungulu awoola otino, “Soifu Katonda, nkuikaziizie aeniki otegerezia okuagala kwange enyinga ziona ezia nkusawire. Nyingeeno nkusawa mbwe olagane amaani gao kugere awantu wano wagawone.

⁴²Manyire mbwe ompurra enyinga ziona. Ni nkusawa no omwoyo oguri kungulu otino kugere awantu awaimeriire ni inze ano wano, wawe no okuganya mbwe ni iwue owantuma.”

⁴³Ni yamala okuwoola otio, yaetania no omwoyo ogwa kungulu otino, “Lazaaro, fuma enze!”

⁴⁴Lazaaro yafuma enze na awasaniwue amagulu, amakono ne ekieni ne enguwo ezia ya-awirwa nazio. Nikuema Yesu yalaga awantu awo otino, “Mumusiwuleko enguwo ezio mumureke agie.”

Awakangasi awa Awayaudi waagala engira eya okuita Yesu

⁴⁵Owungi owua awantu awaawanga ni waazre okuwona Maaria waawona ekintu ekia Yesu yakola ekio kandi waawa no okuganya ku iye.

⁴⁶Na awantu wandi waairana ku Awafarisaayo wagia wawalaga ekia Yesu akorre.

⁴⁷Kutio Awafarisaayo na awakangasi awa awoozia waaikazia ekiina alala na awagaaka awa Awayaudi waiwuuzia watino, “Ekia tuesa okukola niki, nikulondokana na amankono amakate-kaate aga omuntu ono akola.”

⁴⁸Ni tumuganyiire agie emberi okukola amankono otino, awantu woona waaza okumuganyako. No okwo kuuza kwagera awakangasi awa Awarumi waaza waaona ekaalu iifu eno alala ne ekialo kiifu kino kiona.

⁴⁹Omulala ku awakangasi owa awoozia awa omwaka ogwo, oetwa mbwe Kaifa yawalaga otino, “Awiifu kane kiwulao ekintu ekia mumanyire!

⁵⁰Mberi mumanyire mbwe kulootu no omuntu mulala afwiriire awantu wiifu woona, okukira ne ekialo kiifu kiona kionerwe?”

⁵¹Olwa Kaifa yawoola otio ngaakawoola amang’ana gaae omwene yaaya. Ni, kiomo Omukangasi owa awoozia ku omwaka ogwo, yawoolanga mala owugambi owuemere ku Katonda mbwe Yesu aaza okufwira ekialo ekia Awayaudi.

⁵²Ni ng’ane ekialo ekio kieng’ene, ni yaazanga okufwira kugia awaana awa Katonda awatanyiike mu ewialo wiona, awakumie awate wawe ekintu ekilala.

⁵³Okuemera nyanga olwo awakangasi awa Awayaudi waatanika okuagala engira eya okuita Yesu.

⁵⁴Kutio Yesu yatanika okugenda-genda mu ekialo ekia Yudeea owuiwisi kugere watamuita. Nikuema yafuma ao agia mu ekitemo kindi ekiri a-ampi ne ekeewa. Yagia ku omugizi oguetwa mbwe Ifraimu, agia akola okuweera eyo na awalonzi waae.

⁵⁵Omugomo ogwa Awayaudi ogwa Pasaaka gwawanga ni guri ampi okukolwa. Kutio Awayaudi awangi okuema mu ekialo ekia Israeli kiona, waawanga ni wamiire okuniina Yerusaleemu okugia okuieruya no omugomo ogwo gukiari.

⁵⁶Awantu awaawanga ni waikumiiizie muno wano waakubanga amiiso gaawu ku engira ni wakawona Yesu na aaza kandi waaiwuuzia agati yaawu aweene watino, “Awiifu muingirizia mutie, mberi aesa okuuzi mu omugomo ogwa mwakuuno guno? Kusi ogwa mwakuuno guno gunamureka enze?”

⁵⁷Awakangasi awa awoozia na Awafarisaayo waawanga ni wateereo ensikirra mbwe omuntu-umuntu na awuine Yesu awalage kugere wamuambe.

Yowaana 12

Maaria awakre amagulu aga Yesu na amavuta

¹Na amiire mukaaga gaawanga ni gakiari kugere omugomo ogwa Pasaaka gutuuke, Yesu yairana ku omugizi ogwa Bethania aa Lazaaro yawanga na amenyere. Lazaaro ono nio owa Yesu yawanga na aziusie amutoola ku awafu.

²Yesu yaikaziwua okuria okwa igulo kandi Mariitha nio owawanga na a-aa awageni okuria, ni Lazaaro oona yawanga omulala ku awaarianga na awageni awaawanga ni Yesu ku emeesa.

³Nikuema Maaria yatoola amavuta agawuya esaami aga naadi agakasuga enusu eya eliita kandi aga iguzi eria kungulu, agafuka ku amagulu aga Yesu nikwo atanika okugaeya ne emwiri ziae omwene. Okuwunya okulootu okwa amavuta ago kwaizula enyumba eyo yoona.

⁴Ni Yudaasi Iskarioti, omulala ku awalonzi waae owa lunyima yamuguzia, yawoola otino,

⁵“Ekigera na amavuta ago gataguziiwue amasendi aga omusaara ogwa omuntu akaria ku omwaka omulala, kugere amasendi ago gagawirwe awataka niki?”

⁶Yudaasi ngaakawoolanga otio mbwe ya-ambranga awataka amasaasra yaaya, ni yawoolanga otio aeniki yawanga omuwiiki owa amasendi kandi yaiwanga amasendi agaateewuanga mu amakono gaae mbwe awiike.

⁷Ni Yesu yamuirania otino, “Mureke okunyaasia omukazi ono. Mureke awake omuwiri gwange amavuta okuguikagia ku owuire owua owuawizi wuange.

⁸Awataka awo mukiaza okuwa nawo amiire goona, ni inze ngamuuzza okuwa ni inze amiire goona.”

Awakangasi awa awoozia waagala engira eya okuita Lazaaro

⁹Ni wino wiaikolanga, omurima ogwa awantu awangi waawurra amang’ana mbwe Yesu ari Bethania kandi waamuuzako. Ngawakaaza okuwona Yesu kweng’ene, ni waaza ino-ino okuwona Lazaaro owa Yesu yaziusia aema ku awafu.

¹⁰Kutio awakangasi awa awoozia waatanika okuagala engira eya wakaitiramo Lazaaro yoona

¹¹aeniki ku amang’ana aga okuziuka kwae okwo, Awayaudi awangi waawa no okuganya ku Yesu.

Yesu aingiziiwue Yerusaleemu ne ekisangaalo

(Math 21:1–11; Mari 11:1–11; Luuk 19:28–40)

¹²Enkio walwo omurima ogwa awantu awangi awaawanga ni waazre mu omugomo Yerusaleemu waawurra mbwe Yesu ari ku engira agia Yerusaleemu.

¹³Kutio waavuna ensagia ezifwanana ne ezia omuti ogwa enaasi, wagia nazio okuagaanra Yesu ni waogerera watino, “Osaana! Asereekwe iye ooza ku eriina eria Omwami Katonda! Omwami owa Awaisraeli asereekwe!”

¹⁴Yesu yatuukra entikiri ekiari embuuka aniina aikalako na agia mala kiomo endagano ewoola mbwe,

¹⁵“Mutawa no owuti inywe awantu awa Yerusaleemu. Muwoneko Omwami iinyu aaza na aniinre entikiri ekiari embuuka.”

¹⁶Awalonzi awa Yesu ngawakamanya ekia ekiaikola kino kialagananga. No olwa Yesu yaziusiwua aema ku awafu kandi aeewua owunene, awalonzi waae waagia wamanya mbwe yakorrwa ewintu ewia yajojwako kale mbwe arikorrwa.

¹⁷Omurima ogwa awantu awaawanga ni Yesu olwa yaziusia Lazaaro okuema ku awafu waagia emberu okulanzia amang’ana aga okuziuka okwa Lazaaro.

¹⁸Awantu awangi awaawurra amang’ana aga amankono aga Yesu yakola gano waagia okumuagaanra.

¹⁹Kutio Awafarisaayo waatanika okuwoola agati yaawu aweene watino, “Muwona, ifwe kiwulao ekia tukola. Ngamuwonako kiomo ekialo kiona kigaluuke kimulonda?”

Awagiriiki wagala okuwona Yesu

²⁰Awandi ku awantu awaawanga ni wagiire okusawa Katonda Yerusaleemu, mu omugomo ogwa Pasaaka ogwo, waawanga Awagiriiki.

²¹Awagiriiki awo waagia ku Piliipo, owawanga na aema Bethsaida mu ekialo ekia Galiili, wamusawa watino, “Omukangasi, tuagiilenga okuwona Yesu.”

²²Piliipo yagia alaga Andereeya amang’ana ago, nikwo waagia alala wairra Yesu amang’ana ago.

²³Yesu yawairania na awalaga otino, “Amiire aga oku-aa Omuzia owa Omuntu owunene gamiire okutuuka.

²⁴Kuwuene mbalaga mbwe ne emwo eya emere ekiari okugwa mu ilowa efwe, esigala-usigala endala otio. Ni ne efwire, efumia emwo enyingi okukira kiomo yawanga endala.

²⁵Omuntu ogonziizie owulamu wuae omwene aaza okuwuteesia, no omuntu oregere owulamu wuae ku ekialo kino, iye ariwutuukra mu omulamu owutariwua.

²⁶Omuntu onkorra paka andonde, kandi asi-uasi aa ndi, awemirimo wange woona wariwaa. Soifu Katonda aaza oku-aa awankorra emirimo owunene.”

Yesu agambe-gambre ku okufwa kwae

²⁷Yesu yagia emberu na awoola otino, “Nyingeeno omwoyo gwange guinyaasia kandi ng’amanyire mbwe mboole mbwe, ‘Soifu nunule ku emidambo egiri emberu wange gino?’ Yaaya, kino nikio ekiandeeta okukola, kutio ng’anyiza okuwoola ekintu.

²⁸Soifu Katonda, aa eriina riao owunene!” Nikuema, omwoyo gwaema ku igulu ogwawoola gutino, “Miire oku-aa eriina riange owunene kandi nkiaza okuri-aa owunene.”

²⁹Omurima ogwawanga ao gwawurra omwoyo ogwo kandi waawoola mbwe gwaduma. Na awandi waawoola mbwe enyankoi nio owagamba-gamba ni Yesu.

³⁰Yesu yawalaga otino, “Ni inywe omwoyo oguemere ku igulu guno guuzre okutunzia, ni ng’ani inze yaaya.

³¹Zino nizio enyinga ezia Katonda aaza okukengera ekialo kino ekiina kandi ezia Katonda aaza okurumusia Sataani omukangasi owa ekialo kino.

³²Ni, ni miire okugingiriziwua kungulu, nyiza okureeta awantu woona ku inze.”

³³Yesu yawoola otio okulagana olumbe olwa yaazanga okufwa.

³⁴Omurima ogwa awantu ogwo gwamuirania gutino, “Kane ngatwamiire okuwurra ni kuema ku ensikirra ezia Katonda mbwe Kristo ariwaa omulamu amiire goona? Kandi katio iwue oreeta otie okuwoola mbwe, ‘Omuzia owa Omuntu paka agingiriziwue kungulu?’ Kusi ‘Omuzia owa Omuntu’ oyo naanu?”

Yesu nio owueru owua ekialo

³⁵Nikuemao Yesu yawalaga otino, “Muuza okuwa no owueru mala ku amiire amatono. Mugende-gende no owueru wukiario, ekierema ni kikiari okuamba ekialo kiwasanikire. Omuntu ogenda-genda mu ekierema ngamanyire aa agia.

³⁶Mute okuganya kwinyu ku owueru, ni mukiari nawuo. Okwo kuuza okugera muwe awazia awa owueru.” Ni Yesu yamala okuwoola amang’ana gano goona, yawaiwisako afuma awareka ao agia.

³⁷Kukawa mbwe Yesu yawanga na amiire okukola amankono amangi ino emberi waawu, ni ngawakawa no okuganya ku iye.

³⁸Kuno kwaikola kugere amang’ana aga Isaaya omugambi owa Katonda yawoola gatuuke kuwuene, olwa yawoola mbwe: “Oo! Omwami Katonda, naanu omiire okuganya amang’ana aga tulanzia? Kusi naanu owa omiire okulaga amaani aga okukono kwao?”

³⁹Kutio ngawakaesanga okuwa no okuganya ku Yesu, mala kiomo Isaaya yawoola a-andi mbwe,

⁴⁰“Katonda amiire okuziwa amiiso gaawu, kandi amiire okugera emioyo giawu giwa emikalu ng’a. Wusa-wusa, amiiso gaawu gaaza gawona kandi emioyo giawu giiza giaingizia amang’ana, mala wakagaluuke wagie ku Katonda awalamie.”

⁴¹Isaaya yagamba-gambanga otio aeniki yawona owunene owua Yesu yaazanga okuwa nawuo.

⁴²Kukawa kutio, awantu awangi ino, kugia awandi ku awakangasi awa Awayaudi, waamuganyako. Ni ku okutia okwa waatia Awafarisaayo, ngawakawoolanga owuyanga mbwe woona waawanga no okuganya ku Omwami Yesu. Waatia mbwe wakarumusiiwue mu esinagoogi.

⁴³Kuno kulagana mbwe waagonzia okutondowolwa na awantu okukira okutondowolwa ni Katonda.

Olowere okuganya ku Yesu alowere okuganya ku Katonda

⁴⁴Nikuemao kandi, Yesu yawoola no omwoyo ogwa kungulu otino, “Omuntu oweere no okuganya ku inze, omuntu oyo ngaganyire mala ku inze nyeng’ene, na aganyire kugia ku Katonda owantuma.

⁴⁵Kandi na ambarra, awona Katonda owantuma.

⁴⁶Nyizre ku ekialo kuno ki owueru, kugere omuntu-umuntu onganyireko atawa mu ekierema.

⁴⁷Owurra amang'ana gange, ni yareka okugarinda, inze ng'amukengera ekiina. Ni kutio aeniki ng'anyakaaza ku ekialo okukengera awantu awari ku ekialo ekiina, ni nyaaza okuwanunula.

⁴⁸Omukengi owa ekiina, ooza okukengera awantu awandowa kandi awataganya amang'ana gange, no owundi. Amang'ana aga miire okuwoola nigo agarikengra awantu awo ekiina ekia awooni, owuire owua owutuuko.

⁴⁹Nintio aeniki ng'anyakawalaga amang'ana gange omwene yaaya. Soifu Katonda awantuma nio owansikirra amang'ana aga nsugaane mboole, ni kiomo nsugaane ngawoole.

⁵⁰Manyire ewintu ewia asikiriire ewiiza okuira awantu mu owulamu owutariwua. Kutio wiona ewia mboola wiri ewia Soifu Katonda yandaga mbwe nyize mboole.”

Yowaana 13

Yesu aozizie amagulu aga awalonzi waae

¹Omugomo ogwa Pasaaka gwawanga ampi. Yesu yawanga na amiire okumanya mbwe enyinga ziae ezia okuema ku ekialo kuno airane ku Katonda swae ziwanga ni zimiire okutuuka. Aeniki Yesu yawanga na agonziinzie awantu waae awa yawanga nawo ku ekialo kuno ino, owuire wuno yawalaga olugonzi lwae lwona aa luaganiire.

²Okuria okwa igulo kwawanga ni kureetwa ku emeesa. Okwo kwatuukra ne Ekikeeno kimiire okuniina Yudaasi Omuiskarioti omuzia owa Simioni, agie aguzie Yesu.

³Yesu yawanga na amanyire mbwe Katonda Swae yawanga na amiire okuta ewintu wiona mu amakono gaae. Lwona yawanga na amanyire mbwe yawanga ampi okuirana ku Katonda owa yaemako.

⁴Kutio Yesu yaema avuula enguwo yaae eya kungulu nikwo atoola etawulo asiwa mu ensinzi yaae.

⁵Nikuemao yafuka amanzi mu ebeseeni atanika okuoza amagulu aga awalonzi waae, kandi na agakazia ne etawulo eya yawanga na asiwre mu ensinzi.

⁶Olwa yatuuka mbwe katio agia okuoza amagulu aga Simioni Petro, Petro yamulaga otino, “Yaaya Omwami, inze ngosugaane oozie amagulu gange yawa!”

⁷Yesu yawairania otino, “Ekia nkola nyingeeno kino, iwue ngokimanyire. Ne emberu eyo, ooza okukimanya.”

⁸Petro yamulaga otino, “Yaaya, inze otaaza wanyozia amagulu.” Yesu yamuirania mbwe, “Ni ntaoziizie amagulu gaao, ngori omulala ku awantu wange!”

⁹Simioni Petro yamuirania na awoola otino, “Omwami ni kuri kutio, otaozia amagulu gange geng’ene, ni kane nyozie namba amakono no omutwe gwange gwona!”

¹⁰Yesu yamuirania otino, “Owurra! Omuntu omiire okuiyoga omuwiri gwae gwona guri omweru. Ekisigaale no okuoza amagulu geng’ene. Mwona muri awantu aweeru, ni mala omuntu omulala eng’ene nio otari omweru.”

¹¹Yesu yawoola mbwe, “Omuntu omulala eng’ene nio otari omweru,” aeniki yawanga na amanyire omuntu owaazanga okumuguzia.

¹²Ni Yesu yawanga na amiire okuoza amagulu aga awalonzi waae, yatoola enguwo yaae eya kungulu aiwoya nikwo airana agia aikala aa yawanga na aikaale. Yalaga awalonzi waae otino, “Mberi mumanyire ekia ekintu ekia nyema okuwakorra ekio kilagana?”

¹³Munyeta ‘Omugerezi’ kandi ‘Omwami.’ Mukola geeza ni munyeta otio, aeniki ndi Omugerezi kandi ndi Omwami.

¹⁴Katio ni kuri mbwe inze Omwami kandi Omugerezi iinyu, ni inze oiisiizie nyaozia amagulu giinyu, mwona musugaane muozie amagulu aga awiina wiinyu.

¹⁵Mbaeere ekilago mbwe musugaane mukole kiomo mbakoriire.

¹⁶Mbalaga kuwuene mbwe awulao owemirimo ori omukaate okukira omuntu owa akorra. Lwona awulao omutumwa okirre omutumre.

¹⁷Katio aeniki mumanyire ewintu wino, Katonda aaza okuwasereka ni mulondokaane nawio.”

¹⁸Yesu yagia emberu na awoola otino, “Ni mboorre otio, ng’angamba-gamba ku inywe mwona, yaaya. Omwene manyire awa miire okulowola. Paka kuwe kutio kugere amang’ana agaajojwa mu endagano agawoola mbwe ‘Omuntu oria ni inze ku emeesa angaluukeko,’gatuuke kuwuene.

¹⁹Mbalagre amang’ana gano ni gakiari okuikola, kugere ni muuza okugawona ni gaikola, muwe no okuganya mbwe kuwuene ndi Meesia.

²⁰“Mbalaga kuwuene mbwe omuntu oingiizie omuntu-umuntu owa ntumre, ni inze aingiizie; kandi omuntu onyingiizie, aingiizie Katonda owantuma.”

Yesu awoorre ooza okumuguzia

(Math 26:20–25; Mari 14:17–21; Luuk 22:21–23)

²¹Ni yamala okuwoola otio, Yesu yainyaasia mu omwoyo gwae mala awoola otino, “Mbalaga kuwuene mbwe omulala ku inywe aaza okunguzia.”

- ²²Awalonzi waae waatanika okuiwarra agati yaawu aweene ne emioyo giawu giluguula ino omuntu owa Yesu agamba-gambako mbwe yagianga okumuguzia.
- ²³Ku enyinga ezio, omulala ku awalonzi awa Yesu owa Yesu yawanga na agonziizie ino, yawanga na aiyegeeke ku ekifuwa ekia Yesu.
- ²⁴Simioni Petro yasimia omulonzi owa Yesu oyo otino, “Muuuzieko mbwe owa awoola oyo naanu?”
- ²⁵Nikuemao omulonzi owa Yesu owawanga na amuiyegeekeko oyo yamuwuzia otino, “Oyo naanu ooza okukorra otio, Omwami?”
- ²⁶Yesu yamuirania otino, “Omuntu owa nyiza oku-aa omukaati ogwa ngia okuinia mu oludaawo, niye.” Kutio ni yamala okuinia omukaati mu oludaawo, yagu-aa Yudaasi omuzia owa Simioni Omuiskarioti.
- ²⁷Olwa Yudaasi yatoola-utoola omukaati ogwo aguria otino, Sataani yamuingiramo. Nikuemao Yesu yamulaga otino, “Ekia oogala okukola ekio, kikole wuangu-wuangu.”
- ²⁸Ku awantu wona awaawanga ni waria nae ku emeesa, awulao namba omulala owamanya ekia Yesu yalaganga Yudaasi.
- ²⁹Awandi waaingirizianga mbwe andi Yesu amulaga mbwe agie agule ewintu ewia enkio waazanga okukola nawio mu omugomo nakuwa mbwe atooleko ekintu a-ee awataka, aeniki Yudaasi nio owawanga omuwiiki owa amasendi.
- ³⁰Olwa Yudaasi yamala okuria omukaati ogwo otino, yafuma enze wuangu-wuangu. Ezio ziwanga enyinga ezia owuire.
- ³¹Ni Yudaasi yawanga na amiire okugia, Yesu yalaga awalonzi wandi awaasigala nae otino, “Nyingeeno enyinga zituukre ezia Omuzia owa Omuntu aaza okuwua owunene kandi Katonda oona atuukre owunene ni kumuwitirako.
- ³²Ni Katonda na atuukiire owunene ni wumuemako, omwene aaza oku-aa omuzia waae owunene wuae kandi aaza okukola otio wuangu ino.
- ³³Waana wange, nyiza okuwa ni inywe ku enyinga entono ino. Mala kiomo nyalaga Awayaudi, nintio mwona mbalaga nyingeeno mbwe, ‘Aa ngenda, inywe ngamuuza mwagio.’
- ³⁴Mba-aa ensikirra empia ewoola mbwe, Mugonzanie agati iinyu omuntu no omwina waae. Mala kiomo miire okuwagonzia, nintio mwona musugaane mugonzanie omuntu no omwina waae.
- ³⁵Ni mukorre mutio nikwo awantu waaza okumanya mbwe muri awalonzi wange kuwuene.”

Yesu awoorre mbwe Petro aaza okumulowa

(Math 26:33–35; Mari 14:29–31)

³⁶Simioni Petro yamuwuzia otino, “Omwami ooza okugiai?” Yesu yamuirania mbwe, “Aa ngia ngamuesa okundonda mugie eyo nyingeeno. Ni murindonda eyo nyanga.”

³⁷Petro yamuwuzia otino, “Omwami, ekiiza kiandowera okukulonda nyingeeno niki? Nganyire okukufumizia owulamu wuange nkufwire.”

³⁸Yesu yamuirania otino, “Owoola mbwe ooza okumfumizizia owulamu wuao omfwire? Nkulaga kuwuene mbwe, engoko ngeeza okulagula no okiari okulowa kasatu mbwe ngomanyire.”

Yowaana 14

Yesu a-ambiizie awalonzi waae amaani

¹Yesu yagia emberi na awalaga otino, “Mutaaza mwawa no okuinyaasia mu emioyo giinyu. Mute okuganya kwinyu ku Katonda, kandi ku inze noona.

²Nyagala mumanye mbwe mu enyumba eya Soifu Katonda garimo amayumba amangi kandi gawuleoko, nkawalagre otio. Ngia eyo okuwalongera owumenyo.

³Ni ngiire male okuwalongera owumenyo, nyiza okuirana ku ekialo kuno okuwaiyukira mbiire asi aa ndi, kugere mwona mugie muwe alala ni inze aa ndi.

⁴Mumanyire engira eira awantu aa ngenda.”

⁵Omulala ku awalonzi waae oetwa mbwe Thomaasi yamuwuzia otino, “Omwami, tukamanya otie engira eira awantu asi aa ogia, ni ifwe ngatumanyire aa ogia ao?”

⁶Yesu yamuirania otino, “Inze ni inze engira, ni inze owuene kandi ni inze owulamu. Awulao omuntu ooza yagia ku Soifu na atambitreko.

⁷Kuweeko mbwe mumanyire, mukamanyire Soifu yona. Okuemera reero, mumumanyire kandi mumiire okumuwona.”

⁸Nikuemao Piliipo yamulaga otino, “Omwami, tulage Soifu oyo kandi no omiire, okwo kuuza okutusuga.”

⁹Yesu yamuirania otino, “Piliipo, miire okuwa ni inywe ku amiire amangi otino, no owoola mbwe ngomanyire? Ngomanyire mbwe omuntu ombwine, awuine Soifu? Kandi iwue oreeta otie okumbuuzia mbwe, “Tulageko Soifu oyo?”

¹⁰Iwue ngoganya ni mboola mbwe Soifu andimo kandi mbwe noona murimo — turi ekintu ekilala? Amang’ana aga mboola ng’ana agange omwene yaaya. Ni, Soifu ammenyeremo kandi nio ompa amaani aga okukola emirimo giae.

¹¹Muwe no okuganya ni mbalaga mbwe Soifu andimo kandi noona murimo. Ni, ni muwona owukalu okukola otio, muganye ewilago ewia amankono aga nkola gano mbenanu.

¹²Mbalaga kuwuene mbwe omuntu-umuntu ori no okuganya ku inze aaza okukola ewintu ewia miire okuweerako ni nkola, namba ewikaate okukira aeniki ngia ku Soifu.

¹³Ekintu-ukintu ekia musawire Katonda ku eriina riange, nyiza okuwa-aa kugere inze Omuzia owa Katonda, ndeetere Soifu owunene.

¹⁴Musawe-usawa ekintu-ukintu ku eriina riange, kandi omwene nyiza okukikola.

¹⁵“Ni mungonziizie, muuza okurinda ensikirra ziangе.”

Yesu aifuuwre okutumra awalonzi waae Omwoyo Omweru

¹⁶“Nyiza okusawa Soifu, kandi ariwa-aa Omukengi owa Amagezi, oriwa ni inywe amiire goona.

¹⁷Oyo no Omwoyo Omweru ori kuwuene. Awantu awa ekialo ngawaesa okumuganya aeniki ngawaesa okumuwona, lwona ngawaesa okumumanya. Ni inywe mumumanyire aeniki amiire okuwa na amenyere ni inywe, ni nyingeeno aaza okuwamenyamo.”

¹⁸Yesu yagia emberi na awalaga otino, “Ng’anyiza okuwareka ki awawisa yaaya, ni nyiza okuwaazako.

¹⁹Wuangu ano awantu awa ekialo ngawaaza okumbona kandi, ni inywe muuza okumbona. Okuwa kwange omulamu kuuza okugera mwona muwe awalamu.

²⁰Owuire owuo murimanya mbwe inze ndi mu Soifu — turi ekintu ekilala, kandi mbwe inywe awanganyireko mbarimo kandi mwona mundimo — turi ekintu ekilala.

²¹“Omanyire ensikirra ziangе kandi yalondokana nazio nio omuntu ongonziizie. Ongonziizie aaza okugonziwua ni Soifu Katonda. Inze noona nyiza okumugonzia kandi nyiza okumufumira ambone.”

²²Nikuemao, omulala ku awalonzi waae oetwa mbwe Yudaasi (Yudaasi ono agawuuke ni Yudaasi Omusikarioti) yamuwuzia otino, “Omwami, ekigera no oagala mala okuza okutuifumira ifwe tweng’ene na awantu awa ekialo ngooza okufumira niki?”

²³Yesu yamuirania otino, “Omuntu na angonziizie, aaza okurinda ensikirra ziangе. Soifu Katonda aaza okumugonzia kandi inze alala ni Soifu tuuza okumuuzako tumumenyemo.

²⁴Omuntu otangonziizie, iye ngaaza okurinda ensikirra ziangе. Amang’ana aga muwurra ni ngerera gano ngagari agange omwene yaaya, ni gari aga Soifu Katonda owantuma.

²⁵“Mbalagre amang’ana gano goona ni nkiari ni inywe ano.

²⁶Ni, olwa Omwoyo Omweru ogwa Katonda ori Omukengi owa Amagezi, owa Soifu Katonda aaza okutuma ku eriina riange aaza okuuza, aaza okuwagerera ewintu wiona. Lwona aaza okuwaizurizia ewintu wiona ewia miire okuweerao ni mbalaga.

²⁷“Mbarekera owuolu, muwe no owuolu wuange owua mbaeere. Ng’amba-aa owuolu owua awa ekialo waesana yaaya. Mutaganya emioyo giinyu giinyaasie kandi mutatia ekintu.

²⁸“Muwuriire ni mboola mbwe, ‘Nyiza okuwareka ngie ale, nikuemao kandi mbairaneko.’ Kuweeko mbwe mungonziizie, kangato muri no owusangaavu mbwe ngia ku Soifu Katonda, aeniki Katonda mukaate okunkira inze.

²⁹“Muwurre! Mbalagre amang’ana gano kale ni gakiari okuikola kugere ni muuza okugawona ni gaikola, muwe no okuganya.

³⁰“Ng’anyiza okugia emberu ni ngamba-gamba ni inywe ino, aeniki Sataani omukangasi owa ekialo kino ari ampi aaza. Na awula na amaani ku inze namba wutono,

³¹ni nganyire gano ganyiikorre kugere awantu awa ekialo wamanye mbwe ngonziizie Soifu Katonda kandi mbwe nkola mala ewia ansikiriire okukola wieng’ene. Mueme katio, tugie tueme ano.”

Yowaana 15

Yesu nio omuzabiibu ogwa kuwuene

¹Yesu yagia emberu na alaga awalonzi waae otino, “Inze ni inze Omuzabiibu ogwa kuwuene kandi Soifu Katonda nio omurimi.

²Aalula ensagia ziangie ziona ezitaama ensaafu, ne ensagia ziona eziamu ensaafu azialurra geeza kugere zisewuke zisonge okuama ensaafu enyingi ino.

³Inywe mumiire okuwa aweeru aeniki amang’ana agamiire okuweerako ni mbalaga gamiire okuwaeruya.

⁴Mumbeeko enyinga ziona, ni noona nyiza okuwa ni inywe enyinga ziona. Luwulao-uwula olusagia oluesa lwa-ama ensaafu kulwayo ni luta-ambaane ku omuzabiibu, yaaya. Nintio mwona ngamuesa okuama ensaafu mu enkola ziinyu, ni mutaweere ku inze enyinga ziona.”

⁵Yesu yasonga okuwalaga otino, “Inze ni inze omuti ogwa omuzabiibu, ni inywe muri ensagia. No omuntu aweere ku inze enyinga ziona kandi noona nyawa nae enyinga ziona, omuntu oyo aaza okuama ensaafu enyingi ino mu enkola ziae. Ni mutaweere ku inze, kiwulao-uwula ekintu namba ekilala ekisugre emberu wa Katonda ekia aweene muesa okukola.

⁶Omuntu otaweere ku inze enyinga ziona, iye afwanana ne ensagia ezirigiizwe ale no omuti, ziakala no okukala. Ensagia ki ezio, zikunzwa zialuumwa mu omurro ziaiyia chwe.

⁷Ni muweere ku inze enyinga ziona, kandi amang'ana gange gawe mu emioyo giinyu enyinga ziona, muri iwaga okusawa ekintu-ukintu ekia muwuine, kandi Katonda aaza okuwa-aa ekintu ekio.

⁸Ni muamiizie ensaafu enyingi mu enkola ziinyu, kandi ni muilagana ki awalonzi wange, Soifu Katonda aaza okutuukra owunene.

⁹Kiomo Soifu amiire okungonzia, nintio noona miire okuwagonzia. Kutio muwe no olugonzi olwa miire okuwagonzia nalwo.

¹⁰Ni murindre ensikirra ziange, nikwo muuza okuwa no olugonzi olwa mbagonziizie nalwo enyinga ziona. Kuri mala kiomo noona miire okurinda ensikirra ezia Soifu kandi ndi no olugonzi olwa angonziizie nalwo enyinga ziona.

¹¹Miire okuwalaga ewintu wino wiona kugere muwe no owusangaavu owua ndi nawuo kandi muizule no owusangaavu.

¹²Ensikirra yange eya mba-aa ne eno: Mugonzie awiina wiinyu kiomo miire okuwagonzia.

¹³Luwulao olugonzi olukaate olwa omuntu aaza yawa nalwo olukira omuntu okuganya okufwira awiiko waae.

¹⁴Muri mala awiiko wange ni murindre ensikirra ziange.

¹⁵Ngambaeta awakurumu wange kandi yaaya, aeniki omukurumu iye ngamanyire ewintu ewia omukangasi waae owa akorra aagala okukola. Aa okukola otio, mbaeta mbwe muri awiiko wange, aeniki miire okuwalaga ewintu ewia nyaigerera ku Soifu Katonda wiona.

¹⁶Aweene ngamukandowola yawa, ni inze ni inze owawalowola kandi mbatuma mbwe mugie muame ensaafu. Ni ng'ane ensaafu-usaafu, ni ne ensaafu eziiza okuwaao amiire goona. Ni mukorre mutio nikwo Soifu aaza okuwa-aa ekintu-ukintu ekia mumusawire ku eriina riange.

¹⁷Eno nie ensikirra eya mbaeere: Mugonzanie omuntu no omwina waae.

Awekialo waaza okurega awalonzi awa Yesu

¹⁸“Na awantu awa ekialo wawaregere, muwe no okumanya mbwe inze ni inze waasooka okurega kuluweri.

¹⁹Mufwananeko na awantu awa ku ekialo kuno, kangato awantu awa ekialo wawagonziizie ki awalala ku iwo. Ni inywe mugawuuke nawo mu enkola, aeniki nyawalowola ni mbatoola agati ya awantu awa ekialo kino. Kino nikio ekineene ekigera na awantu awa ekialo wawaregere.

²⁰Mutalawira amang’ana aga nyawalaga mbwe, ‘Owemirimo ngari omunene okukira omwene emirimo.’ Ni kuri mbwe ni inze owa waanyaasia wululu, mwona waaza okuwanyaasia wululu. Ni kuri mbwe waarinda amang’ana gange, waaza okurinda amang’ana giinyu mwona.

²¹Waaza okuwakorra uwiiwi otio ku okuwa okwa muri awantu wange, aeniki ngawamanyire Katonda owantuma.

²²“Kuweeko mbwe omwene ng’anyakaaza kandi ngamba-gamba nawo, ao otio ngawawaliirwe owuoni. Kutio nyingeeno wawula ne ekia wakaiyambiako ku okukola owuoni.

²³Omuntu-umuntu ondegere, iye aregere kugia Soifu oona.

²⁴Kuweeko mbwe ng’ankakola agati yaawu ewintu ewia awulao namba omulala owamala okukolako, kangato ngawakawaliirwa owuoni yaaya. Ni iwo kukawa mbwe wamiire okuwona amankono aga miire okukola goona, wandegere inze alala ni Soifu oona.

²⁵Ekia wakola kino, kituusia amang’ana agaajojwa mu Ensikirra ezia Katonda mbwe: ‘Waa-ndega wusaasa, ni wawula ne ekigera.’

²⁶“Olwa Omukengi owa Amagezi owa ngia okuwatumra ni kuema ku Soifu aaza okuuzza, aaza okulaga awantu amang’ana ku inze. Ee, iye nio Omwoyo Omweru ori kuwuene otumwa okuema ku Soifu Katonda.

²⁷Ni mwona paka mulage awantu ewintu ewia mumanyire ku inze, aeniki mumiire okuwa ni inze okuemera olwa nyatanika emirimo giange.”

Yowaana 16

¹Yesu yagia emberi na awalaga otino, “Mbalagre amang’ana goona kugere mutaaza mwareka engira yange muteeke.

²Muwe no okumanya mbwe waaza okuwarumusia wawafumie enze eya amasinagoogi. Kuwuene amiire gaaza aga awantu awariwaita warikola otio ni waingirizia mbwe wakola geeza emberi wa Katonda.

³Waaza okukola ewintu ewiwiiwi ki ewio aeniki ngawamanyire Soifu, ni inze noona.

⁴Mbalaga amang’ana gano kale ni gakiari okuikola kugere ni muuza okuwona ni gaikola, muingirizie mbwe nyawanga ni miire okuwasiagizia. Ng’ankawalaga amang’ana gano kuluweri olwa nyawaeta aeniki nyawanga ni ndi ni inywe.

Emirimo egia Omwoyo Omweru ogwa Katonda

⁵“Nyingeeno mpano ngia ku Katonda owantuma, na awulao namba omulala ku inywe ombuuzia aa ngia.

⁶Muiyumbire muwula no owusangaavu aeniki mbalagre amang’ana gano.

⁷Ni mbalaga kuwuene mbwe kuri kulootu ku inywe ni ngiire, aeniki ni ntagiire, Omukengi owa Amagezi ngaaza okuwaazako. Ni ni ngiire, ngia okumutuma ku inywe awaazeko.

⁸Na aaza okuuza, arikira awantu awa ekialo ne ekiina mbwe wari awooni nikulondokana ne ewintu ewisatu: owuoni, owuigolovu alala no okukenga ekiina.

⁹Ngawarikira ekiina nikulondokana no owuoni aeniki waalowa okuganya ku inze.

¹⁰Ngawarikira ekiina nikulondokana no owuigolovu aeniki ngia ku Soifu aa ngamuuza okumbona kandi.

¹¹Lwona ngawarikira ekiina nikulondokana ni kiomo Katonda akengera awantu awa ekialo ekiina aeniki Sataani omukangasi owa ekialo kino nyingeeno amiire okukengerwa ekiina ekiwi ekia owuoni ni Katonda.

¹²“Nkiari na amang’ana amangi aga nsugaane mbalage, ni gari amazito ku inywe gawakirre okuingizia nyingeeno.

¹³Ni, no Omwoyo Omweru ogwa Katonda ori kuwuene aaza okuuza, ariwaira mu okumanya owuene wuona owuri ku Katonda. Ngariwoola amang’ana gaae omwene yaaya, ni mala ewia awuriire ku Katonda wieng’ene. Lwona ariwalaga ewintu ewiiza okuikola emberu eyo.

¹⁴Aaza okumpa owunene, aeniki aaza okuntoolako amang’ana kandi agamanyisie geeza ku inywe.

¹⁵Ewintu wiona ewia Soifu ne ewiange. Ekio niki ekigerre ni mbalaga mbwe Omwoyo Omweru ogwa Katonda aaza okuntoolako amang’ana, kandi agamanyisie geeza ku inywe.”

Okuiyumba okwa awalonzi kurigaluka kuwe owusangaavu

¹⁶Yesu yagia emberu na awalaga otino, “Nyiza okuwareka mbaemeko mu amiiso wuangu ano, ni kandi kuwuangu nyiza okuirana mumbone kandi.”

¹⁷Awandi ku awalonzi waae waatanika okuiwuuzia agati yaawu aweene watino, “Na awoola mbwe, ‘Nyiza okuwareka mbaemeko mu amiiso wuangu ano, ni kandi kuwuangu nyiza okuirana mumbone kandi’ lwona mbwe, ‘Aeniki ngia ku Soifu,’ ao ekia alagana niki?”

¹⁸Waagia emberu ni waiwuuzia mbwe, “Alaganaki na agamba-gamba ku ‘kuwuangu?’ Ifwe ngatuwurra ekia awoola.”

¹⁹Yesu yamanya mbwe awalonzi waae waagalanga okumuwuuzia eking’ana kino, kutio yawawuuzia otino, “Owuo muiwuuzia aweene ku ekia amang’ana aga mboorrena mbwe, ‘Nyiza okuwareka mbaemeko mu amiiso wuangu ano, ni kandi kuwuangu nyiza okuirana mumbone kandi’ galagana?”

- ²⁰Mbalaga kuwuene mbwe muuza okuweerao ni murra wululu, na awantu awa ekialo iwo ni wari no owusangaavu. Muuza okuwona owululu, na amaziga giinyu gaaza okuwua kandi muwe awasangaavu.
- ²¹Kuri kiomo ewisa ewiluma omukazi omuzito oogala okuigawula, enyinga ziae ni zimiire okutuuka. Ni, na amiire okuigawula-ugawula otino, owusangaavu owua okutuukra omwana oozre ku ekialo wugera yalawira emidambo egia awitiiremo.
- ²²Nintio kuuza okuwaweera inywe: Zino nyingeeno nizio enyinga ziinyu ezia okuwona owululu, ni muuza okumbona kandi. Kino kiiza okugera muwe awasangaavu kandi awulao oriwanyaga owusangaavu owuo.
- ²³Owuire owuo, ngamurimbuuzia ekintu-ukintu kandi. Mbalaga kuwuene mbwe Soifu Katonda ariwa-aa ekintu-ukintu ekia murimusawa ku eriina riange.
- ²⁴Nawuno reero kiwulao ekintu ekia mumiire okusawako Katonda ku eriina riange. Nyingeeno katio musawe kandi muuza okueewua kandi owusangaavu wuinyu wuuza okuizula.
- ²⁵Kukawa mbwe miire okuwa ni mbagamba-gambra mu engero, amiire gaaza aga nyiza okuwalaga amang'ana aga Soifu mu engira ewurikana geeza, ni ntakola ne engero.
- ²⁶Mu amiire ago, muuza okusawa Katonda ewia muagala ku eriina riange. Ng'amboola mbwe ni inze ooza okuwasawira Soifu Katonda, yaaya.
- ²⁷Soifu Katonda omwene awagonziizie, aeniki mungonziizie kandi mumanyire mbwe nyamuemako.
- ²⁸Ee nyaema ku Soifu ni nyika ku ekialo kuno, kandi wuno nyingeeno katio ndi ampi okuirana ku Soifu.
- ²⁹Nikuemao, awalonzi waae waamulaga watino, "Nyingeeno katio ogamba-gamba mu engira ewurikana geeza kandi ngokola ne engero.
- ³⁰Nyingeeno katio tumanyire mbwe iwue omanyire ewintu wiona. Twona tukuwurra geeza ino, aa kiwulao katio ekintu ekia omuntu akawuuzia ku ewia owoola. Kino kigera ni tuganya mbwe ni kuwuene mbwe waema ku Katonda."
- ³¹Yesu yawairania otino, "Thoo, nyingeeno katio muganyire!
- ³²Enyinga ziiza, kandi zimiire mala okutuuka, ezia muuza okutanyika omuntu ki omuntu na agia engo waae, kandi ndisigala omwene. Ni ngandisigala omwene, aeniki Soifu ariwa ni inze.
- ³³Mbalagre amang'ana gano kugere mu okuwa kwinyu mu owulala ni inze, muwe no owuolu. Muwe no okumanya mbwe mu ekialo kino, muuza okuwona emidambo. Ni muwe no owusiani aeniki miire okukira amaani goona agakola ku ekialo kino!"

Yowaana 17

Yesu aisawira omwene

¹Ni Yesu yamala okulaga awalonzi waae amang'ana gano, yaginga amiiso gaae awarra kungulu ku igulu mala atanika okusawa Katonda otino, "Soifu Katonda, enyinga ziangе katio zimiire okutuuka. Ganya o-ee Omuzia wao owunene kandi Omuzia oona aku-ee owunene.

²Wampa amaani ku awantu wona kugere nyezanie owulamu owutariwua ku awantu wona awa wanteera mu amakono.

³Owulamu owutariwua owuo wuema ku okukumanya iwue Katonda omulala eng'ene ori kuwuene, ni inze Yesu Kristo owa iwue omwene watuma.

⁴Emirimo egia wampa miire Soifu, kandi ku okukola otio awantu awangi ku ekialo kuno, wamiire okuwona owunene wua.

⁵Soifu, nyingeeno katio mpe owunene emberi wao omwene, owunene owua nyawanga nawuo ni iwue kale ne ekialo kikiari okuwaa.

Yesu asawira awalonzi waae

⁶"Soifu, miire okugera awantu awa wampa, no owatoola agati ya awantu awa ekialo, wakumanya. Awantu wano waawanga awaa omwene, ni wawata mu amakono gange kandi wamiire okurinda ansikirra ziao.

⁷Nyingeeno katio wamanyire mbwe ewintu ewia miire okuwa ni nkola wiona, miire okukola na amaani agakuemako.

⁸Nyawa-aa amang'ana gao aga wampa kandi waganya wagaingizia. Wamiire kumanya kuwuene mbwe nyakuemako kandi waganya mbwe ni iwue owantuma.

⁹Ngansawira awantu awa ku ekialo yaaya, ni nsawira awantu awa wampa wano, aeniki wari awantu wao omwene.

¹⁰Ewintu ewia ndi nawio wiona ne ewiao kandi ewia ori nawio wiona ne ewiange. Owulamu wuwu wulagana ku awantu owunene owua ndi nawuo.

¹¹Inze amiire gange aga okuwa ku ekialo kuno gawuere, ni iwo wakiaza okuwa ku ekialo. Soifu Katonda Omweru, warinde na amaani aga eriina riao, eriina eria wampa, kugere wona wawe ekintu ekilala mala kiomo iwue ni inze turi ekintu ekilala.

¹²Ni nyawanga ni nkiari nawo, nyawarinda geeza na amaani agari ku eriina eria wampa. Awulao namba omulala omiire okuteeka, ni mala omulala owawaa mbwe paka ateeke okutuusia amang'ana aga endagano yawoola kale.

¹³“Nyingeeno ndi ampi okukuuzako, ni mboola amang’ana gano ni nkiari ku ekialo kuno. Nkola ntino aeniki nyagala mbwe wawe no owusangaavu owungi owukirre mu emioyo giawu, kiomo noona nyizuule no owusangaavu.

¹⁴Miire okuwa-aa amang’ana gao kandi awantu awa ekialo wawaregere. Wawarega aeniki owulamu wuawu ngawufwanana no owua awantu awa ekialo, mala kiomo noona ngawukaane nawo.

¹⁵Okusawa kwange ngakuri mbwe owatoole ku ekialo, yaaya. Ni nkusawa mbwe owarinde ku Omwoni.

¹⁶Iwo owulamu wuawu ngawufwanana no owua awantu awa ekialo, mala kiomo noona ngawukaane nawo.

¹⁷Soifu, waeruyie na amang’ana gao agari kuwuene. Ee amang’ana gao no owuene.

¹⁸Kiomo wantuma ku awantu awa ku ekialo, nintio noona mbatumre ku awantu awa ku ekialo.

¹⁹Nyaifumia okukukorra kugere woona waifumie wawe awaao kuwuene.

Yesu asawira awantu woona awaazanga okumuganyako

²⁰“Katonda Soifu, okusawa kwange ngakuri ku iwo weng’ene, yaaya, ni nsawira namba awantu woona awaaza okuwa no okuganya ku inze ni kuwitra ku amang’ana aga waaza okuwalanzizia.

²¹Nkusawa Soifu mbwe ogere wawe ekintu ekilala, mala kiomo nkurimo ni oona ondimo. Ganya woona watuweemo kugere ekialo kiganye mbwe kuwuene ni iwue owantuma okuza ku ekialo kuno.

²²Miire okuwa-aa owunene owua iwue oona wampa, kugere wawe ekintu ekilala kiomo iwue ni inze turi ekintu ekilala:

²³Inze mbaweemo, ni iwue ombeemo. Ganya owareete mu owulala wa-ambaane ti, kugere awantu awa ku ekialo wamanye mbwe ni iwue owantuma kandi mbwe owagonziizie mala kiomo ongonziizie.

²⁴“Soifu, nyagala mbwe awantu awa omiire okumpa waaze wawe ni inze aa nyiza okuwa kandi mbwe waaze wawone owunene owua ndi nawuo. Owunene owua iwue omwene wampa aeniki wangonzia namba ne ekialo kiawanga ni kikiari okulukwa.

²⁵“Soifu Omuigolovu, kukawa mbwe awantu awa ekialo ngawakumanyire, inze nkumanyire kandi wano woona wamiire okumanya mbwe ni iwue owantuma.

²⁶Miire okukumanyisia ku iwo kandi nkiaza okukumanyisia ku iwo kugere wawe no olugonzi olwa ongonziizie nalwo, kandi mbwe inze omwene mbaweemo.”

Yowaana 18

Yesu aguziwe kandi a-ambwe

(Math 26:47–56; Mari 14:43–52; Luuk 22:47–53)

- ¹Olwa Yesu yamala okusawa otio, yafuma na awalonzi waae owuire mala wa-ambuka ekiriwo ekietwa mbwe Kidrooni, wagia waingira mu omusiri ogwa zaituuni ogwawanga engereka indi.
- ²Yudaasi omuguzi, yawanga na amanyire asi ao aeniki Yesu yagonzianga okugenda ao na awalonzi waae.
- ³Kutio Yudaasi yatoola omurima ogwa awa-iiye awa Awaruumi na awarinzi awa ekaalu, awaatumwa na awakangasi awa awoozia na Awafarisaayo, aaza nawo ao ni wagingre ewigenga ewiema ne ewimuri, ne ewia-iiye.
- ⁴Ni Yesu yawanga na amiire okumanya wiona ewiagianga okumuikorra. Kutio yafuma agia awawuuzia otino, “Muagala anu?”
- ⁵Wamuirania mbwe, “Yesu Omunazareeti.” Yesu yawalaga mbwe, “Ni inze.” (Enyinga ezio Yudaasi omuguzi owaaza okumuguzia yawanga na aimereere nawo ao.)
- ⁶Olwa Yesu yawoola-uwoola mbwe, “Ni inze,” awantu awo wairana enyima wagwa ansi.
- ⁷Yesu yawawuuzia olwa okuwiri otino, “Muagala anu?” Wamuirania kandi mbwe, “Yesu Omunazareeti.”
- ⁸Yesu yawairania na awoola otino, “Miire okuwalaga mbwe ni inze kutio ni kuri mbwe ni inze muagala, mureke awalonzi wange wano wagie.”
- ⁹Kino kiaikola okutuusia amang’ana aga Yesu yamala okuwoola mbwe, “Nkiari okuteesia namba omulala ku awantu awa wampa.”
- ¹⁰Nikuemao, Simioni Petro yazomola omwambe ogwa yawanga nagwo aguta ku owemirimo owa Omukangasi omunene owa awoozia, amukewa okutwi okusaaza kuwuera ansi chee. Eriina eria owemirimo oyo riawanga Malkoosi.
- ¹¹Yesu yasiagizia Petro otino, “Irania omwambe mu ensawo yagwo! Oingirizia mbwe nkalaga omugongo ekikombe ekia emidambo ekia Soifu aagala mbwe nywe?”
- ¹²Kutio, awa-iiye awa Awaruumi, no omukangasi waawu, alala na awarinzi awa ekaalu eya Awayaudi waria, wa-amba Yesu kandi waamusiwa wukalu.
- ¹³Owusookere, waamuirira ku Anaasi, omugaaka owa Kaifa owawanga Omukangasi omunene owa awoozia omwaka ogwo.
- ¹⁴Kaifa ono nio owakengera Awayaudi amagezi mbwe kwawanga kulootu no omuntu omulala afwiriire Awayaudi wona.

Petro alowa olwa kuluweri mbwe ngamanyire Yesu

(Math 26:69–70; Mari 14:66–68; Luuk 22:54–57)

¹⁵Simioni Petro yalonda Yesu enyima alala no omulonzi wundi oona. Aeniki omulonzi wundi ono yawanga na amanyaane no Omukangasi omunene owa awoozia, iye yaingira mu olwanyi olwa Omukangasi omunene owa awoozia alala ni Yesu.

¹⁶Ni Petro iye yasigala enze ku ekiriango. Omulonzi ono yagia agamba-gamba no omurinzi owa ekiriango owekiala owawanga mu emirimo enyinga ezio nikwo Petro aingira muni.

¹⁷Owemirimo owekiala owawanga na arinda ku ekiriango yawuuzia Petro otino, “Iwue oona ngori omulala ku awalonzi awa omuntu ono?” Ni Petro yamuirania otino, “Yaaya, ngandi omulala ku iwo.”

¹⁸Awemirimo awa awakangasi awa Awayaudi alala na awarinzi awa mu ekaalu waakuma omurro kugere waote aeniki ekialo kiawanga ekiolu. Waawanga ni waimeriire ni waota omurro ogwo, kandi Petro oona yawanga na aimereere nawo oona aota omurro.

Yesu airrwe emberi wa Anaasi Omukangasi owa awoozia

(Math 26:59–66; Mari 14:55–64; Luuk 22:66–71)

¹⁹Nikuemao, Omukangasi omunene owa awoozia yawuuzia Yesu ku awalonzi waae, alala ne engerera yaae.

²⁰Ni Yesu yamuirania otino, “Miire okuwa ni ngamba-ngamba owuyanga emberi wa awantu wona kandi enyinga ziona miire okuwa ni ngerera awantu mu amasinagoogi namba mu ekaalu, na asi-uasi aa Awayaudi waaikumia alala. Kiwulao ekintu ekia nyawoola owuiwisi, yaaya.

²¹Kutio ng’ambona ekigera ni mumbuuzia ewintu wino. Muwuuzie awamiire okuwa ni wampurra mbenanu. Kuwuene wamanyire ewia miire okuwa ni mboola.”

²²Olwa Yesu yawoola-uwoola otio, omulala ku awarinzi awa ekaalu owawanga ampi nae yamukuba oluyu wukalu nikwo amuwuuzia wukalu otino, “Nintio oirania Omukangasi omunene owa awoozia?”

²³Yesu yamuirania na awoola otino, “Ni kuri mbwe kirio ekintu ekiwiiwi ekia mboorre oesa okukiwoola. Ni, ni mboorre ewiri kuwuene, katio onkuba kolaki?”

²⁴Nikuemao Anaasi yawoola mbwe airwe ku Kaifa Omukangasi owa awoozia mala kiomo Yesu yawanga na akiasiwirwe otio.

Petro alowa olwa okuwiri no olwa okusatu mbwe ngamanyire Yesu

(Math 26:71–75; Mari 14:69–72; Luuk 22:58–65)

²⁵Simioni Petro yawanga na aimeriire na akiaota omurro. Awaawanga ao waamuwuzia watino, “Iwue oona ngori omulala ku awalonzi waae?” Ni iye yalowa amang’ana ago na awoola otino, “Yaaya, ng’ani inze.”

²⁶Omulala ku awemirimo awa Omukangasi omunene owa awoozia owawanga omuda owa omuntu owa Petro yakenga okutwi kwae, yamutang’ang’ia otino, “Otalowa, iwue ng’anyakuwona nae mu omusiri aria?”

²⁷Petro kandi yalowa asiriisia mbwe ngamanyire Yesu, kandi ku enyinga ezio, engoko yalagula.

Awayaudi waire Yesu ku Pilaato

(Math 27:1–2, 11–31; Mari 15:1–20; Luuk 23:1–5, 13–25)

²⁸Nikuemao, Awayaudi waatoola Yesu okuema aa Kaifa wamuirira ku omugizi ogwa omukangasi awa Awaruumi. Ziawanga enyinga ezia kunkio ino. Aeniki waagalanga okugomera Pasaaka, Awayaudi awo ngawakaingira omwa omukangasi owa Awaruumi oyo kugere wataiwaka egaasi ekawalowera okuria Pasaaka nikulondokana ne endagirra ziawu.

²⁹Kutio Pilaato yafuma awaazako kandi awawuuzia otino, “Niki ekia muingiriire nakio omuntu ono?”

³⁰Waamuirania watino, “Kuweeko mbwe ngari omuntu omuwiiwi ino, kangato ngatukamureetere ku iwue.”

³¹Pilaato yawalaga mbwe wamutoole wagie wamukengere ekiina nikulondokana ne endagirra ziawu aweene. Ni iwo waalowa ni wawoola watino, “Yaaya, ifwe tuwula na amaani aga okukengera omuntu ekiina ekia olumbe.”

³²Kino kiaikola okutuusia amang’ana aga Yesu omwene yawoola emberu ku olumbe olwa yagianga okufwa.

³³Nikuemao Pilaato yairana mu enyumba kandi alagirra mbwe Yesu areetwe emberu waae. Yamuwuzia otino, “Mbwe iwue ni iwue omwami owa Awayaudi?”

³⁴Kuno kwagera Yesu amuwuzia otino, “Okwo no okuingirizia kwao omwene, nakuwa awandi wagamba-gambre ni iwue ku inze?”

³⁵Pilaato yamuirania otino, “Inze ng’andi Omuyaudi. Awiinyu na awakangasi awa awoozia wiinyu awakureetere ku inze, niwo awawoola watino. Katio nyagala ondage ekia okorre.”

³⁶Yesu yamulaga otino, “Owuami wuange ng’awuri owua ku ekialo kuno, yaaya. Wuweeko owua ku ekialo, awemirimo wange wakandwaniire ntaaza nyateewua mu amakono aga Awayaudi. Ni wuri owua a-andi asaasa.”

³⁷Okwo kwagera Pilaato amuwuzia otino, “Kutio ori omwami kane?” Yesu yamuirania otino, “Iwue ni iwue owoola mbwe ndi omwami. Ekio nikio ekiagera

ni nyiwulwa kandi nikiyo ekiandeeta ku ekialo okulagana ekia owuene wuri. Omuntu-umuntu ogonziizie owuene, awurra amang'ana gange.”

³⁸Pilaato yamuwuzia otino, “Owuene niki?” Nikuemaoyafuma airana ku Awayaudi awalaga mbwe, “Wuwulao owuwiiwi owua ntuukiire ku omuntu ono owusugre ne ekiina.

³⁹Ni mumanyire mbwe turi ne endagirra enganyira mbwe mbasiwurre omusiwe omulala mu omugomo ogwa Pasaaka. Mberi mukaagala mbwe mbasiwurre Omwami owa Awayaudi ono?”

⁴⁰Awayaudi iwo waaogerera wukalu watino, “Yawa, ng'ano omuntu ono, ni tuagala otusiwurre Barabaasi!” Barabaasi yawanga omuntu owalwanianga owukangasi owua Awaruumi.

Yowaana 19

Awa-iye wasuusia Yesu

(Math 27:27; Mari 15:16–20)

¹Nikuemaoyafuma Pilaato yaesana Yesu aswawukwe enkowa.

²Awa-iye waazinga engata eya amawua wateera Yesu ku omutwe ki ekigudu ekia owuyaayi, nikwo wamuingizizia enguwo endiire eya igondo enzakanyu-kanyu.

³Waamugiako wamulaga ne ekirega watino, “Oikaziwue, Omwami owa Awayaudi!” ne eno wamukuba wukalu ku owueni.

Okusiwula Yesu kukirre Pilaato

⁴Pilaato yatanika kandi airana ku Awayaudi awalaga otino, “Muwurre, mufumia awaazeko kugera mumanye mbwe kiwulao-uwula ekiwiiwi ekia mutuukiireko ekisugre ne ekiina.”

⁵Olwa Yesu yafuma enze na aingiizie engata eya amawua ne enguwo endiire eya igondo ebuluu erimo owuakanyu-kanyu eria, Pilaato yawalaga otino, “Omwene nguno, mumuwone!”

⁶Olwa awakangasi awa awoozia alala na awarinzi awa ekaalu waamuwona-uwona watino, waaogerera wukalu watino, “Muwambe ku omusalaaba! Muwambe!” Ni Pilaato yawairania otino, “Aweene mumutoole mugie mumuwambe ni muagala, aeniki inze ng'ankamutuukrako owuwi owua akorre owusugre ne ekiina.”

⁷Ni iwo waamuirania ni wawoola watino, “Turi ne endagirra ewoola mbwe omuntu-umuntu ki iye owoola mbwe ari Omuzia owa Katonda paka aitwe.”

⁸Olwa Pilaato yawuurra amang'ana ago, owuti wuamuamba ino.

- ⁹Kutio yairana mu enyumba ni Yesu kandi amuwuuzia otino, “Oiinyu aa oemera na ai?” Ni Yesu ngakamuirania ekintu. Kuno kwagera Pilaato amuwuuzia
- ¹⁰otino, “Owuo olowa okugamba-gamba ni inze? Ngomanyire mbwe ni inze ori na amaani aga okukulekula ogie, namba okukuwamba ku omusalaaba?”
- ¹¹Yesu yamuirania otino, “Kuweeko mbwe amaani ago ngagakakuemera ku igulu, iwue okatoorrei amaani ku inze? Kutio onteere mu amakono gaao nio ori no owuoni owukirre owuao.”
- ¹²Okuemera ao Pilaato yakola wukalu ino okulekula Yesu, na Awayaudi waagia emberu okuogerera wukalu watino, “No omulekuule-ulekula agie, kane ngori omwiko owa Kaisaari aeniki omuntu-umuntu owoola mbwe ari omwami, ngatiire Kaisaari omwami owa Rooma.”
- ¹³Olwa Pilaato yawurra otio, yafumia Yesu enze nikwo aikala ku entewe eya ewiina wikengerwa, asi aetwa mbwe Olwany olwa Iwaale (oluetwa mu omunwa ogwa Awayaudi mbwe Gabaata).
- ¹⁴Wuwawanga owuire owua okuikagra Sabato eyawanga ku omudiira ogwa omugomo ogwa Pasaaka, mu enyinga ezigia ikumi ni iwiri kunkio. Pilaato yalaga Awayaudi otino, “Omwami iinyu nguno!”
- ¹⁵Ni iwo waaogerera wukalu watino, “Aitwe aemeo! Aitwe aemeo! Mumuwambe ku omusalaaba!” Pilaato yawawuuzia otino, “Muagala tuwambe omwami iinyu?” Na awakangasi awa awoozia waamuirania watino, “Ifwe tuwula no omwami wundi ogawuuke ni Kaisaari.”
- ¹⁶Nikuemao Pilaato yata Yesu mu amakono gaawu wagie wamuwambe ku omusalaaba.

Okuwambwa okwa Yesu ku omusalaaba

(Math 27:32–44; Mari 15:21–32; Luuk 23:26–43)

- ¹⁷Kutio, waafuma wagia ni Yesu na agingre omusalaaba ogwa yagianga okuwambwako omwene nawuno watuuka asi aetwa mbwe asi aa Ekiyanga ekia Omutwe, ni mu Oluibrania mbwe Goligotha.
- ¹⁸Ao nio waamuwambra agati ya awantu wawiri, omulala nyakukono okumosi no owundi nyakukono okusaaza.
- ¹⁹Pilaato yafumia amang’ana mbwe ibaawu riteewue kungulu ku omusalaaba erijojerweko mbwe: yesu omunazareeti, omwami owa awayaudi.
- ²⁰Awayaudi awangi waarisoma aeniki aa Yesu yawambwira yawanga a-ampi no omugizi kandi amang’ana gano gaajojwa mu Oluibrania, Olulatiini no Olugiriiki.
- ²¹Awakangasi awa awoozia awa Awayaudi waaira amaziga gaawu ku Pilaato ni wamulaga watino, “Yaaya, otajojja mbwe ‘Omwami owa Awayaudi’ ni joja mbwe omuntu ono yawoolanga mbwe ari omwami owa Awayaudi.”

²²Ni Pilaato yawairania otino, “Ekia miire okujoja, miire okujoja!”

²³Awa-iye waavuula Yesu enguwo nikwo wamuwamba ku omusalaaba. Ni waamala okukola otio, waatoola enguwo ziae wazigawana aa kane, kugere omulala ki omulala ku iwo atuukre. Enguwo eyasigala ne eya muni eyawanga eya ekiraka ekilala eki-ambaane okuemera kungulu paka ansi.

²⁴Okukigawa kwawakira kutio waawona mbwe wakube ensiiti wawone ogitoola agati yaawu. Okwo kwaikola okutuusia endagano ewoola mbwe, “Waagawana enguwo ziangе agati yaawu kandi wakubra enguwo ziangе ensiiti.” Kutio kino nikio awa-iye awo waakola.

²⁵Kwatuukra Maaria ng’inwawu Yesu, ni ng’inalaga Yesu, ni Maaria muka Kilopaasi, alala ni Maaria omwala owa Eumagidaala ni waimeriire ampi no omusalaaba ogwa Yesu yawambwako.

²⁶Olwa Yesu yawona ng’inwae no omulonzi owayawanga na agonziizie ino na aemereere ampi ao, yalaga ng’ina otino, “Ng’inoifu, omuzia waaо nguno.”

²⁷Yairana kandi alaga omulonzi waae oyo mbwe, “Ng’inwao nguno.” Okuemera ao omulonzi oyo yatoola ng’inwawu Yesu amenya nae omwae.

Okufwa okwa Yesu ku omusalaaba

(Math 27:45–56; Mari 15:33–41; Luuk 23:44–49)

²⁸Yesu yawanga na amanyire mbwe ewintu wiona ewia yasugananga akorrwe wiawanga ni wiwuere kandi kugere endagano etuuke kuwuene, yawoola otino, “Mpurra owulwo.”

²⁹Awa-iye waatoola amalwa amalulu pe agaawanga ao, waingiziamo esiponji mala eizula na amalwa ago. Nikuemaо waagisiwa ku ekiti ekia omuti oguetwa mbwe Aisooпу, wairra Yesu ku omunwa mbwe anywe.

³⁰Olwa Yesu yamala okugagusa, yawoola otino, “Ewintu wiona wiwuere.” Nikuemaо yaisia omutwe kandi omwoyo gwae gugia.

Yesu afumuutwe ni ifumo mu embavu

³¹Wuawanga owuire owua okuikagra Sabato kandi enkio walwo wuagianga okuwa owuire owua Sabato owutiirwe ino. Awayaudi ngawakaagalanga mbwe emiwiri egia awafu girekwe enze nyanga olwa Sabato. Kutio waagia ku Pilaato okumusawa mbwe amagulu gaawu gavunwe, wafwe wuangu, kugere emiwiri giawu giisiziwue ansi gieme ku emisalaaba.

³²Kutio awa-iye waagia wavuna amagulu aga awantu wawiri awaawambwa ni Yesu waria.

³³No olwa waatuuka ku Yesu, waatuukra na amiire okukewa enkolo afwire, kutio ngawakamuvuna amagulu.

³⁴Omulala ku awa-iiye yamufumuta ni ifumo mu embavu, amasaai na amanzi gafugika amangi kalala.

³⁵Owawona ewintu wino ni wiikola omwene nio ogamba-gambre ku amang'ana gano kandi ewia awoorre wiri kuwuene. Agafumiizie kugera iwue ogawurra oona oganye ku Yesu.

³⁶Gano gaaikola kugere amang'ana agaajojwa mu endagano mbwe, "Namba ekilala ku ewigumba wiae ngawirivunwa" gatuuke kuwuene.

³⁷Lwona mala kiomo endagano indi yona ewoola mbwe, "Wariwarra owa waafumuta ni ifumo."

Owuawizi owua Yesu mu iwuuta

(Math 27:57–61; Mari 15:42–47; Luuk 23:50–56)

³⁸Nikuemao Yoseefu awaemanga Arimathea kandi owawanga omulonzi owa Yesu owuiwisi, aeniki yatianga Awayaudi, yagia asawa Pilaato omuwiri ogwa Yesu agie aguawre kandi Pilaato yamuganyira. Kutio, yaaza atoola omuwiri ogwa Yesu agia nagwo.

³⁹Yawanga ni Nikodeemo, omuntu owa nyanga lundi yagia ku Yesu owuire oria. Nikodeemo yareeta amavuta no omuti ogwa okurinda omuwiri ogwa omufu kandi ewiwunya esaami egikasuga ekiilo amakumi asatu ni iwiri.

⁴⁰Waatoola emitu na amavuta agawunya esaami ago wafuka ku omuwiri ogwo nikwo wagutoola waguwasania mu ekitambaaya ekia enguwo, kiomo enkola eya Awayaudi eya owuawizi efwanana.

⁴¹Asi aa Yesu yawambwa ao yawangao omusiri ogwawangamo iwuuta iyia eria omuntu wundi yawanga na akiari okuawirwamo.

⁴²Omwo nimwo omwa waaingizia omuwiri ogwa Yesu aeniki yawanga ampi kandi lwona wuawanga owuire owua okuikagra Sabato.

Yowaana 20

Okuziuka okwa Yesu

(Math 28:1–10; Mari 16:1–8; Luuk 24:1–12)

¹Wuawanga nyanga olwa omudiira ogwa okuwiri, kunkio ziri ku amagambaazi, Maaria omwala owa Eumagidaala yafuma agia ku ekiwaga ekia Yesu. Yatuukra no oguwaale ogwawanga ni guteerwe ku omunwa ogwa iwuuta gumiire okutoolwao.

²Kutio yasomoka agia alaga Simioni Petro no omulonzi wundi oria, owa Yesu yawanga na agonziizie ino, otino, "Awiifu, omuwiri ogwa Omwami gutoorrwe mu iwuuta guirrwe aa tutamanyire."

³Nikuemao Petro alala no omulonzi wundi oyo waafuma wagia ku ekiwaga ekia Yesu.

⁴Waafuma ne embiro woona wawiri, kukawa mbwe omulonzi wundi oyo yasowia Petro mu embiro mala amusookera okutuuka mu iwuuta.

⁵Yaikirra mala ekengeera mu owuina munsu, kandi yawona ewitambaaya ewia enguwo ezia Yesu ya-awirwa nazio ni ziri ao wusa, ni ngakaingira mu iwuuta munsu.

⁶Nikuemao Simioni Petro, owaemanga enyima, yatuuka kandi iye yaingira mu owuina munsu, awona ewitambaaya ewia enguwo ni wiri ao wusa,

⁷alala ne ekitambaaya ekiawanga ni kisiwirwe ku omutwe gwa. Enguwo eno yawanga kuwuayo ne eizingre alala, ale ne ewitambaaya ewia enguwo wino.

⁸Nikuemao omulonzi owawanga na asookere okutuuka ku ekiwaga oria, oona yaingira mu iwuuta omwo. Yawona ekiaikola ekio kandi yaganya.

⁹Okutuuka enyinga ezio, waawanga ni wakiari okumanya ekia amang'ana agari mu endagano agawoola mbwe Kristo paka aziuke aeme ku awafu, galagana.

¹⁰Nikuemao awalonzi wano waafuma wagia mu emigizi giawu.

Yesu afumiire Maaria owa Eumagidaala

¹¹Ni Maaria iye yasigala na aimerre-uimerra enze eya iwuuta na arra. Olwa yarranga otio, yaikirra okukuba amiiso gae mu iwuuta munsu.

¹²Olwa yakola otio, yawona enyankoi wawiri awaiwooye enguwo enzeru zerre ni waikaale asi aa omuwiri ogwa Yesu gwawanga ni guteerwe: omulala nyamutwe no owundi nyamagulu.

¹³Enyankoi wano waamuwuzia watino, "Mukaziiwue, orraki?" Maaria yawairania otino, "Awantu waazre muno watoola omuwiri ogwa Omwami wange, ni ng'amanyire aa waguirre!"

¹⁴Olwa yamala okuwairania otio, yagaluka enyima awona Yesu na aimeriire aa yawanga ao, ni ngakamanya mbwe yawanga Yesu.

¹⁵Yesu oona yamuwuzia otino, "Mukaziiwue, orraki? Kane omuntu owa oogala oyo naanu?" Maaria yaingirizianga mbwe omwene omusiri nio owawanga na agamba-gamba nae, kutio yamuirania otino, "Omukangasi, ni kuri mbwe ni iwue omutoorre munsu muno omuira a-andi, ni ndage aa omuirre kugere ngie mutoole."

¹⁶Yesu yamueta ne eriina mbwe, "Maaria." Olwa Maaria yaria-uria omwoyo gwa otino, oona yagaluka amueta mu omunwa ogwa Awayaudi mbwe, "Rabooni!" (Okulagana mbwe 'omugerezi.')

¹⁷Yesu yamulaga otino, "Otaaza wampamba aeniki nkiari okuirana ku Soifu. Ni gia ku waamwifu awalonzi wange, ogie owalage mbwe ngia ku Soifu kandi Katonda wange ori Soinyu kandi Katonda wiinyu oona."

¹⁸Maaria omwala owa Eumagidaala yagia alaga awalonzi awa Yesu otino, “Mbwine Omwami iifu na amiiso!” Kandi yawalaga amang’ana goona aga yamulaga.

Yesu afumiire awalonzi waae olwa kuluweri

¹⁹Nyanga olwo igulo, owuire owulonda owua Sabato, awalonzi awa Yesu waaikumia mu enyumba alala kandi waigalao ekiriango aeniki waatia awakangasi awa Awayaudi. Waaizukira ni Yesu ari nawo omwo kandi aimeriire agati yaawu. Yawakeezia na awoola otino, “Muwe no owuolu inywe mwona.”

²⁰Olwa yamala okuwoola amang’ana gano, yawalaga embala ezia ku amakono gae ni ku embavu aa yafumutwa ni ifumo. Awalonzi waae waawa no owusangaavu owuluguulwa olwa waawona Omwami waawu.

²¹Yesu yawalaga kandi otino, “Muwe no owuolu! Mala kiomo Katonda Soifu yantuma ku ekialo, nintio noona mbatuma nyingeeno ku awantu woona ku ekialo.”

²²Ni yamala okuwalaga otio, yawawuutako omuuka na awoola otino, “Mutuukre Omwoyo Omweru ogwa Katonda.

²³Omuntu-umuntu owa murekiire owuoni wuae, Katonda oona amurekiire kandi omuntu-umuntu owa mutarekiire owuoni wuae, Katonda oona ngamurekiire yaaya.”

Yesu afumiire Thomaasi na awalonzi wandi

(Mari 16:14; Luuk 24:36–49)

²⁴Omulala ku awalonzi waae oetwa mbwe Thomaasi, owaetwanga ku eriina rindi mbwe Mulongo, iye yawulangao olwa Yesu yafumira awalonzi waae.

²⁵Kutio olwa yaaza, awalonzi awa Yesu awiina waae wano waamulaga watino, “Ifwe tuwuine Omwami iifu.” Ni Thomaasi iye yawairania otino, “Ni ntawuine embala ezia emisumaari ku amakono gae ne embavu ziae aa ifumo riafumuta nawuno noona ngateeko ewiala wiange wino ngawurre mbwe nigo, ng’anyiza okuwa no okuganya ku amang’ana aga mundaga ago, yaaya.”

²⁶Lunyima no omudiira omulala gwamala okuwua, awalonzi awa Yesu wano kandi waawanga ni wari mu enyumba. Thomaasi yoona yawanga na ari nawo mu enyumba omwo. Kukawa mbwe ekiriango kiawanga ni kiigalweo ti, waaizukirra ni Yesu aingiire aimeriire agati yaawu. Yesu yawalaga otino, “Muwe no owuolu.”

²⁷Nikuemao yalaga Thomaasi otino, “Warrako amakono gange gano. Toola ewiala wiao ote ku amakono gange ni ku embavu ziange aa nyafumutwa ifumo. Otalowa okuwa no okuganya, ni wa no okuganya mbwe ndi omulamu.”

²⁸Thomaasi yamuirania otino, “Ori Omwami wange kandi Katonda wange!”

²⁹Nikuemao Yesu yamuirania otino, “Owuo katio oweere no okuganya aeniki ombwine na amiiso? Wari awasereke, awantu awawa no okuganya namba ni watawuine na amiiso.”

³⁰Mu owulamu wuae wuona Yesu yakola amankono amangi ino emberu wa awalonzi waae, ni wagawona. Owungi owua amankono gano ngagakajojwa mu ebuuki eno.

³¹Ni agari mu ebuuki eno gano, gajojerwe kugere muwe no okuganya mbwe Yesu nio Kristo, Omuzia owa Katonda kandi mbwe, ku okuganya okwo, mutuukre owulamu owutariwua ku eriina riae.

Yowaana 21

Yesu aeere awalonzi waae omukaati ne emvwa waria

¹Na amiire gandi gaamala okuwita, Yesu kandi yairana afumira awalonzi waae ku ensanyaata eya omwalo ogwa Galiili.

²Awalonzi waae awaawanga ao waawanga Simioni Petro, Thomaasi oetwa ne eriina rindi mbwe Mulongo, Nathanieli oema ku omugizi ogwa Kaana mu ekialo ekia Galiili, awazia awawiri awa Zebeedi na awalonzi waae awandi wawiri wona waawanga ao.

³Simioni Petro yalaga awalonzi awiina waae otino, “Inze mfuma ngia okuvuwa.” Awalonzi awa Yesu awiina waae waamuirania watino, “Ifwe twona tugia ni iwue.” Kutio wona waagia waniina owuato okugia okuvuwa ku owuziwa. Waavuwa owuire owulamba, ni ngawaka-amba namba emvwa endala.

⁴Kunkio ziri ni wukia, Yesu yawafumira na aimeriire ku ensanyaata, na awalonzi waae ngawakamumanyirizia mbwe yawanga iye.

⁵Yesu yawaeterezia na awawuuzia otino, “Waana wange, muriko ne emvwa namba endala?” Waamuirania mbwe, “Yaaya, tuwula nayo.”

⁶Nikuemao Yesu yawalaga otino, “Kane mutege olugoe lwinyu nyakukono okusaaza, ni muuza okuamba.” Olwa waakola-ukola otio, okuingizia olugoe mu owuato kwawakira aeniki wa-amba emvwa enyingi ino.

⁷Omulonzi owa Yesu yawanga na agonziizie ino oria yagia amanya nikwo alaga Petro otino, “Oria no Omwami!” Olwa Petro yawurra-uwurra na awoola mbwe, “Oria no Omwami,” yatoola enguwo yaae aiwasaania nayo. Kwatuukra ni yawanga na agivuurre mu owuato ni wawuwa. Nikuemao yaduuma mu amanzi.

⁸Awalonzi wandi waria waaikanga no owuato, ni wakulula olugoe olwawanga ni luizuule du ne emvwa, aeniki ngawakawanga ale ino ne ensanyaata, owuliire owukasuga efuuti mia wisatu.

⁹Olwa waaika wagowa ku ensanyaata, waatuukra omurro ni gukumirwe ao guema kandi emvwa eteerweko esambwa. Emikaati gindi giona giawanga ao.

¹⁰Yesu yawalaga otino, “Mutoole emvwa zindi ezia muema okuamba nyingeeno mureete ano.”

¹¹Nikuemao, Petro yagia okulula olugoe olwawangamo emvwa alureeta ku ensanyaata. Emvwa enene-nene eziawangamo ziwanga mia kilala na amakumi ataanu ni isatu, ni kukawa kutio olugoe ngalukatanduka.

¹²Ne emvwa ziamala okuyia, Yesu yawaeta na awalaga otino, “Muuze mutoole okuria okwa okuangula enda kuno murie.” Nyingeeno katio awalonzi waae wano waawanga ni wamumanyiriizie geeza aa awulao owamuwuzia mbwe, “Iwue ni iwue anu?” Woono waamanya geeza mbwe yawanga Omwami Yesu.

¹³Yesu yagia atoola emikaati ne emvwa awa-aa waria.

¹⁴Kuno katio kwawanga okufuma okwa okusatu okwa Yesu yafumiranga awalonzi waae lunyima na amiire okuziuka okuema ku awafu.

Yesu a-ambiizie Petro amaani

¹⁵Ni waamala okuria emikaati ne emvwa, Yesu yawuuzia Simioni Petro otino, “Simioni omuzia owa Yowaana, mberi ongonziizie okukira wano woono?” Simioni yamuirania otino, “Ee Omwami, omanyire geeza mbwe nkugonziizie.” Yesu yamulaga mbwe, “Rinda ewimaatwa wiange geeza.”

¹⁶Yesu yamuwuzia olwa okuwiri otino, “Simioni omuzia owa Yowaana, mberi ongonziizie kuwene?” Simioni kandi yamuirania otino, “Ee Omwami, omanyire geeza mbwe nkugonziizie.” Yesu yamulaga mbwe, “Rinda amagondi gange geeza.”

¹⁷Yesu kandi yamuwuzia olwa okusatu otino, “Simioni omuzia owa Yowaana, mberi ongonziizie?” Simioni yawa no omwoyo omululu aeniki Yesu yamuwuzia kasatu embuuzia endala eyo mbwe, “Mberi ongonziizie?” Yairania Yesu otino, “Omwami iwue omanyire ewintu wiona. Omanyire geeza mbwe nkugonziizie.” Yesu yamulaga otino, “Rinda amagondi gange geeza.”

¹⁸Yesu yagia emberu na amulaga otino, “Kuwene nkulaga mbwe ni wawanga no okiari omuwuuka wasiwanga omukanda gwao omwene nikuemao wafuma no ogia aa oogala okugia. Ni, no ooza okukiriiya ooza okugolola okukono kwao omuntu wundi musaasa akusiwre omukanda kandi akuire namba asi aa otaagala okugia.”

¹⁹(Yesu yakola no olugero luno kugere alage Petro olumbe olwa yazanga okufwa kimo lwazanga oku-aa Katonda owunene.) Nikuemao yalaga Petro otino, “Petro ndonde.”

²⁰Olwa Petro yawarra enyima, yawona omulonzi owa Yesu yawanga na agonziize ino oria na ari enyima awalonda. Omulonzi owa Yesu ono nio owawanga na aiyegeeke ku ekifuwa ekia Yesu olwa waarianga okuria okwa igulo okutuukre ni

Yesu akiari okufwa. Kandi nio owawuuzia Yesu mbwe, “Omwami, naanu ooza okukuguzia?”

²¹Olwa Petro yamuwona, yawuuzia Yesu otino, “Omwami, iye ekiiza okumuikorra niki?”

²²Yesu yamuirania otino, “Katio namba ni ngonziizie mbwe awe omulamu nawuno nyanga nyirane kandi, katio ekio kikuambre otie? Iwue ekia okole ni mbwe ndonde.”

²³Amang’ana aga Yesu yawoola gano gaawurikana mu amatwi aga owungi owua awantu awaalondanga Yesu mbwe, omulonzi owa Yesu ono iye ngakaazanga okufwa yaaya. Ni Yesu ngakawoola mbwe omulonzi waae oyo ngaaza okufwa, ni yawoola mala mbwe, “Katio namba ni ngonziizie mbwe awe omulamu nawuno nyanga nyirane kandi, katio ekio kikuambre otie?”

²⁴Omulonzi owa Yesu ono nio owajoja ebuuki eno. Yawona ewintu wino wiona ni wiikola kandi tumanyire mbwe ewia awoola wino wiri kuwuene.

²⁵Wirio ewintu windi ewingi ewia Yesu yakola wiona. Kuweeko mbwe wiajojwa wiona, inze ni mpingirizia, ebuuki ezia wikajojerwemo zikaizuula ekialo kiona nawuno iwaga rikeeye.

Awatumwa

Awatumwa 1

¹Otiirwe Tiofiila: Mu ebuuki yange eyasooka nyajoja amang’ana goona aga Yesu yagerera ne ewintu ewia yakola okuemera olwa yatanika emirimo giae ku ekialo kuno,

²kutuuka owuire owua yatoolwa airwa ku igulu. Ni yawanga na akiari okuirwa ku igulu, Omwoyo Omweru ogwa Katonda yamu-aa amaani aga okulaga awatumwa waae awa yalowola ewintu ewia wasugaane wakole.

³Ni Yesu yamala okufwa kandi aziuka, yafumira awatumwa waae kangu ku amiire amakumi ane. Yawafumira mu engira enyingi okwagera waganya mbwe Yesu ari omulamu. Ni yawafumranga, waamuwona kandi yawalaganga amang’ana aga Owuami owua Katonda.

⁴Owuire wulala, ni yawanga na aria na awatumwa waae, yawasikirra otino, “Mutaaza mwaema Yerusaleemu ano, ni muweeremo murindirre ekintu ekia nyawalaga mbwe Soifu Katonda yaifuuwa mbwe aaza okuwa-aa.

⁵Yowaana yawabatiisa na amanzi masa, ni wuangu ano muuza okubatiiswa no Omwoyo Omweru ogwa Katonda.”

⁶Olwa awatumwa awa Yesu waaikumia alala ni Yesu, waamuwuzia watino, “Omwami, nyingeeno katio ngoza okutoola owuami ote mu amakono aga Awaisraeli?”

⁷Yesu yawairania otino, “Inywe ngamusugaane mumanye amiire ne enyinga aeniki Soifu Katonda nio ori na amaani aga okutaa olwa ewintu wino wiriikola.

⁸Ni inywe, muuza okutuukra amaani olwa Omwoyo Omweru ogwa Katonda aaza okuwaizuzia. Muuza okuwa awawoni wange mu ewialo ewia Yerusaleemu, Yudeea, Samaria ne embega ziona ezia ekialo, kandi murilaga awantu wona ewia mumanyire ku inze.”

Yesu aguluuke agiire ku igulu

(Mari 16:19)

⁹Olwa Yesu yamala okuwalaga otio, yaguluka agia ku igulu awatumwa waae ni wamuwarra nawuno awuereezia mu ire, ateka mu amiiso gaawu.

¹⁰Ni waawanga ni wakiateere amiiso gaawu kungulu ni wawarra aa Yesu agiire, waaizukirra awantu wawiri awaiwooye enguwo endiire enzeru zerre ni waimeriire ampi nawo ao.

¹¹Awantu wano waalaga awatumwa awa Yesu watino, “Inywe awantu awa Galiili wano, ekigera ni mukiateere amiiso giinyu ku igulu otio niki? Yesu owa muwona na agia ku igulu ono, aaza okuirana ku ekialo kuno mala kiomo muwuine na agia ku igulu otio.”

Mathiasi alowoolwe okutoola aa Yudaasi

- ¹²Nikuemao awatumwa awa Yesu waaema ku ekigiri ekia Zaituuni waika Yerusaleemu. Ekigiri ekia Zaituuni kiawanga ni kiri ampi no omugizi ogwa Yerusaleemu (owuliire owukatuuka ekilomita wisatu nakuwa emaeli endala ne enusu.)
- ¹³Olwa waatuuka, waaniina waingira mu enyumba eya goroofa nyaluwega olwa waawanga ni wamenyere. Awaawangao ni Petro, Yowaana, Yakoobo, Andereeya, Piliipo, Thomaasi, Batholomeo, Mathaayo, Yakoobo omuzia owa Alfaayo, Simioni (owawanga na agonziizie ekialo kiawu) ni Yudaasi omuzia owa Yakoobo.
- ¹⁴Awantu wano woona waaganya no omwoyo mulala okuikumia enyinga ziona ni wasawa Katonda. Waasawanga otio alala ni waamwawu Yesu ni Maaria ng'inwawu Yesu na awakazi wandi woona.
- ¹⁵Mu amiire ago Petro yaimerra agati ya awantu awakasuga mia kilala na amakumi awiri awaawanga ni waganyire ku Yesu, atanika okuwalaga otino,
- ¹⁶“Waamwifu, amang’ana agari mu endagano eya Katonda aga Omwoyo Omweru ogwa Katonda yawoola ku Yudaasi ni kuwitra ku omukurumu owa Katonda Omwami Daudi, gaawanga ni gari mbwe paka gaikole. Yudaasi ono nio owakangatra awantu awa-amba Yesu.
- ¹⁷Yawanga omulala ku ifwe kandi yakola ni ifwe emirimo gino alala.”
- ¹⁸Otiirwe Tiofiila, nyagala omanyeye mbwe Yudaasi yagula omusiri na amasendi aga yaeewua ku okukola ekintu ekiwiiwi ekio. Mu omusiri omwo nimwo omwa Yudaasi yagwa a-atika enda, ewia munda wifuma afwa.
- ¹⁹Awantu woona awaawanga Yerusaleemu waawurra eking’ana ekio kutio waaeta asi ao mu omunwa gwawu mbwe Akeldaama. (Okwo kulagana mbwe no omusiri ogwa amasaai.)
- ²⁰Petro yagia emberu na awoola otino, “Mu ebuuki eya Zabuuri Daudi yajoja mbwe, ‘Mung’aanye mu enyumba yaae mugireke ifulukwa kandi omuntu atagimenyamo.’ Ni lwona kwajojwa otino, ‘Mureke owundi musaasa atoole owukangasi wuae.’
- ²¹⁻²²“Kutio kuri kulootu ni tulwoole omuntu omulala ooza okuwa ni ifwe mu emirimo egia okulaga awantu amang’ana aga okuziuka okwa Omwami Yesu. Omuntu ono paka awe omulala ku awantu awamiire okuwa ni ifwe amiire goona aga Yesu yawanga agati iifu; okutanikra mu amiire aga Yowaana yabatiisangamo kutuuka olwa Yesu yatoolwa airwa ku igulu.”
- ²³Okwo kwagera walowola awantu wawiri awaawanga Yoseefu, owa eriina riae rindi riawanga Barsaaba (nakuwa Yuusto), ni Mathiasi.

²⁴Nikuemao waasawa Katonda watino, “Omwami Katonda, iwue ni iwue omanyire emioyo egia awantu wona. Kutio Omwami, ganya otuloworre omuntu omulala ku awantu wawiri wano owa

²⁵omwoyo gwao guagala, omuntu ooza okutoola emirimo egia owutumwa egia Yudaasi yarekere na agia oluwega olusugaane ne enkola yaae.”

²⁶Olwa waamala okusawa otio, waakuba ensiiti kandi ensiiti ya-amba Mathiasi, kutio Mathiasi nio owasongwa ku awatumwa awa Yesu ikumi ni mulala.

Awatumwa 2

Omwoyo Omweru ogwa Katonda aikire ku awantu

¹Olwa omugomo ogwa Pendekosti gwatuuka, awalonzi awa Yesu wona waikumia alala mu enyumba.

²Waaizukirra ni wawurra erioga eringi erifwana eria omuyaga omuzito oguwuuta ni guemerra ku igulu ri-ingira ri-izula enyumba eya waawangamo.

³Nikuemao waawona ewintu ewifwana ne endimi ezia omurro ni zifuma enyingi kandi ziagwirra ku omuntu ki omuntu owawanga mu enyumba omwo.

⁴Wona waaizuziwua no Omwoyo Omweru ogwa Katonda mala waatanika okuwoola eminwa egigawukane-gawukaane, owuagani ni kiomo Omwoyo Omweru yawa-aa amaani.

⁵Okwo kwatuukra na Awayaudi awatiire Katonda awaawanga ni wamenyere Yerusaleemu na awandi awaemere embega ziona ezia ku ekialo kuno, waazre Yerusaleemu mu omugomo ogwa Pendekosti.

⁶Olwa waawurra erioga erio, omurima ogwa awantu gwaikumia asi ao okuwona ekintu ekiikola. Waaluguula ino olwa omuntu ki omuntu yawurra awalonzi awa Yesu ni wagamba-gamba mu omunwa gwae omwene.

⁷Kino kia-amba awantu wano eminwa, mala watanika okuiwuuzia aweene watino, “Awiifu, awantu wano wona kane ngawaema Galiili?

⁸Ekigera ni tuwurra ni wawoola eminwa egigawukane-gawukaane niki? Niki ekigera ni nyingeeno twona kiomo turi ano tutino, omuntu ki omuntu awurra no omunwa gwawu nigwo ogwa wawoola ni kandi tuemere mu ewialo ewigawukaane? Awandi ku ifwe waemere

⁹Paasia, Miidia, Elaami ni Mesopotaamia, na awandi waemere Yudeea, Kapadookia, Pontuusi ni Eesia. Na awandi wona waemere mu ewialo ewia

¹⁰Firiigia, Pamfiilia, Misiri ne ekialo ekia Liibia ampi no omugizi ogwa Kureene, na awaemere Rooma.

¹¹Lwona aa turi ano kukawa mbwe awandi na Awayaudi, awandi na awantu awaagaluka mu ediini eya Awayaudi, na awandi waemere Kireete, kandi awandi

na awa Araabu, ni tuwurra awantu wano ni wagamba-gamba mala mu eminwa giifu aweene kandi wawoola ewintu ewikate-kaate ewia Katonda amiire okukola!”

¹²Amang’ana gano ga-amba awantu wano eminwa kandi okuingirizia kwawateeka aa waaiwuzianga aweene mbwe, “Awiifu, kuno kulaganaki?”

¹³Ni kukawa kutio, awantu wandi waatanika okusekera awalonzi awa Yesu wano ni wawoola watino, “Awantu wano andi wanywere amalwa nikio ekigera ni wagamba-gamba watio.”

Petro agamba-gambra awantu

¹⁴Nikuemao, Petro yaimerra alala na awatumwa awa Yesu awiina waae ikumi ni mulala. Yagamba-gambra awantu no omwoyo oguri kungulu na awoola otino, “Inywe awantu awamenyere Yerusaleemu ano, na awiifu Awayaudi mwona, musarigire mbalage ekintu ekiikola kino kugere mukimanye.

¹⁵Awantu awa muwona wano ngawakanywa amalwa kiomo muingirizia mutio yaaya, ni lwona nikwo ziri enyinga isatu ezia kunkio, iwo wanywerei amalwa ago?

¹⁶Ewiikola wino ne ewintu ewia Yoeli omugambi owa Katonda yagamba-gambako emiaka emikulu egiawita olwa yawoola otino:

¹⁷“ Inze Omwami Katonda mboola mbwe, amiire aga owutuuko, nyiza okutumra awantu wona Omwoyo gwange Omweru. Awaala na awazia wiinyu waaza okugamba amang’ana agaemere ku inze, lwona owueru owua ewintu wiange wuuzwa okusasukra awawuuka wiinyu kandi awagaaka wiinyu waaza okuloota amalooto aganyemereko.

¹⁸Namba awakurumu wange awekikazi na awekisaaza, nyiza okuwatumra Omwoyo gwange Omweru mu amiire ago, kandi wona warigamba amang’ana agaemere ku inze Omwami Katonda.

¹⁹Ndirikola amankono ku igulu kungulu kandi ewintu ewiluguulwa wiriikola ansi ku ekialo. Muriwona omurro na amasaai ne eriosi eriambanre ti ku ekialo kuno.

²⁰Enyanga erimwama ti, no omwenzi guriwa omwakanyu ka ki amasaai. Wino wiriikola no Owuire owua Omwami owunene kandi owuluguulwa wukiari okutuuka.

²¹Mu amiire ago omuntu-umuntu orieta eriina eria Omwami mbwe amusaasre, arinunulwa!’ ”

²²Petro yagia emberu na awalaga otino, “Inywe Awaisraeli, mutege amatwi muwurre amang’ana gano. Yesu Omunazareeti yawanga omuntu owa Katonda yalagana mbwe nio omulowole waae olwa yakola amankono amangi ne ewintu ewikate-kaate ewiluguulwa okuwitra ku iye. Inywe mwona muwimanyire aeniki ewintu ewio yawikola agati iinyu mu ekialo kiinyu muno.

- ²³Yateewua mu amakono giinyu kandi mwamuita olwa mwamuta mu amakono aga awantu awatari Awayaudi awaamuwamba ku omusalaaba. Ne ekio kiaikola kiomo Katonda yawanga na amiire okutaa kale.
- ²⁴Ni Katonda yamuziusia amutoola ku awafu, kutio yamusiwula mu owululu owua olumbe aeniki Yesu ngakaesanga okufwa ilala.
- ²⁵“Omwami Daudi oona yamugamba-gambako na awoola otino, “ ‘Nyawona Omwami na ari ampi ni inze enyinga ziona kandi ari nyakukono kwange okusaaza, kutio ng’anyiza okutia ekintu-ukintu.
- ²⁶Kutio ndi no owusangaavu mu omwoyo gwange kandi ngamba-gamba no owusangaavu, aeniki ndi no owuolu mu omwoyo gwange ni manyire mbwe kuwene ni iwue ooza okuntunzia.
- ²⁷Manyire mbwe ngoriganya oreke omwoyo gwange guweere mu ekialo ekia awafu amiire goona, lwona ngorireka omuwiri ogwa omukurumu waa guwole.
- ²⁸Omiire okugera manya engira ezia owulamu. Kandi ooza okugera mbe omusangaavu ino emberi waa.’
- ²⁹“Awiifu mbalaga kuwene mbwe guukwa iifu Daudi yafwa kandi ya-awirwa. Kuri kuwene mbwe ekiwaga kiae kikiario aa turi ano nawuno reero.
- ³⁰Okuwa kwae okwa yawanga omugambi owa Katonda kandi okumanya okwa yamanya mbwe Katonda yamuifuwira mbwe aaza okuta omulala ku awiizukulu waae awe omwami,
- ³¹yakiwona kale kandi yagamba-gamba ku okuziuka okwa Kristo mbwe omuwiri gwae ngaguuza okulawirwa ku awafu kandi ngaguuza okurekwa guwole.
- ³²“Yesu wazane ono, Katonda yamala okumuziusia kandi ifwe turi awawoni ku eking’ana ekio.
- ³³Amiire okugingiriziwua kungulu aa aikaale nyakukono okusaaza okwa swae Omwami Katonda kandi Katonda amiire okumu-aa Omwoyo gwae Omweru kiomo yawanga na amiire okumuifuwira okutufukako. Ni iye ogerre ne ewintu ewia muwurra kandi ewia muwona wino ni wiikola.
- ³⁴Omwami Daudi ngakaniina agia ku igulu yaaya, ni kukawa kutio iye ni iye owawoola omwene otino, ‘Omwami Katonda yalaga Omwami wange otino, ikala nyakukono kwange okusaaza
- ³⁵nawuno kutuuke ntoole awazigu waa woona nte ansi otaze na amagulu gaao.’ ”
- ³⁶Petro yamariizia na awoola otino, “Kutio, inywe Awaisraeli, muwe no okumanya kuwene mbwe Yesu owa mwawamba ku omusalaaba ono nio owa Katonda amiire okulowola mbwe awe Omwami kandi Meesia.”

³⁷Olwa Petro yamala okuwalaga otio, amang’ana ago gaafumuta emioyo egia awantu ino, kutio waawuzia Petro na awatumwa wandi watino, “Awiifu, katio ifwe, ekia tusugaane tukole niki?”

³⁸Petro yawairania na awalaga otino, “Omuntu ki omuntu agaluke no omwoyo gwae ogwa munsu areke amawi kandi abatiiswe ku eriina eria Yesu Kristo kugere Katonda amurekere amawi gaae nikwo aaza okutuukra Omwoyo Omweru ogwa Katonda.

³⁹Muuzi okumutuukra aeniki Katonda yamala okuifuuwa na awoola mbwe, inywe na awiizukulu wiinyu alala no omuntu-umuntu namba oemere mu ewialo ewia ale, awantu wona awa Katonda aetre waaza okutuukra Omwoyo gwae Omweru.”

⁴⁰Petro yawalaga amang’ana amangi aga Katonda na awasiagizia otino, “Awiifu muinunule ku eminyako-nyaako egiiza okuamba ikula eria enkola embiwi eno!”

⁴¹Nyanga olwo awantu awakasuga elufu wisatu waaingizia amang’ana aga Katonda aga Petro yawalaga nikwo waabatiiswa kandi waisonga ku owulala owua awalonzi awa Yesu.

⁴²Okuemera nyanga olwo, awantu wano waata emioyo giawu ku okuwurra engerera eya awatumwa, okuikumia alala, okuria isawo eria Omwami, no okusawa Katonda.

Owulala owua awalonzi awa Yesu

⁴³Awatumwa awa Yesu wano waakola amankono amangi ne ewintu ewingi ewiluguulwa ewiagera waeewua owuti ino.

⁴⁴Awantu wona awaawanga no okuganya ku Yesu waawanga alala enyinga ziona kandi waasangirizianga ewintu wiawu.

⁴⁵Waaesanga okuguzia ewintu ewia waawanga nawio, na amasendi aga watuukiire waagawananga agati yaawu aweene nikulondokana no okuagala okwa omuntu yawanga nakwo.

⁴⁶Owuire ki owuire waaikumianga mu ekaalu kandi waarianga isawo eria Omwami alala ni wari mu emigizi giawu. Waaikumianga alala mu ewidiori ni waria ne emioyo emisiza kandi ni wari no owusangaavu,

⁴⁷ni watondowola Katonda kandi waagonziwua na awantu wona. Owuire ki owuire Katonda yasonganga mu owulala wuawu awantu awaanunulwanga ku eriina eria Yesu.

Awatumwa 3

Okulama okwa omurema

¹Owuire wulala Petro ni Yowaana waagia okusawa mu ekaalu kiomo waakolanga owuire ki owuire mu enyinga ezia kienda igulo.

²Waagia watuukra no omuntu omurema owadembuka amagulu okuemera mu okuiwulwa, na agingrwe ateerwe ku ekikulo ekia olwanyi olwa ekaalu ekiaetwanga mbwe ekikulo ekilootu, okusawa awantu amasendi.

³Olwa yawona Petro ni Yowaana ni waingira mu ekikulo, yawasawa mbwe wamueeko amasendi.

⁴Waamugiako ampi kandi wamuwarra mu amiiso tiiri. Nikuemao Petro yamuirania otino, “Tuarre owone!”

⁵Yagingirizia omutwe okuwawarra na aingirizia mbwe wagala okumu-aa ekintu.

⁶Petro yamulaga otino, “Owurra, inze mbula na amasendi namba amatoono, ne ekia ndi nakio nyiza okuku-aa. Mboola mbwe ku eriina eria Yesu Kristo Omunazareeti, ema ogende-gende!”

⁷Petro yamuamba okukono okusaaza amuemia kungulu. Ao ao, amaani gaaingira mu amagulu gaae kandi endendegere ziae ziona ziawa na amaani.

⁸Omuntu ono yaimerra, aduuma kungulu kandi atanika okugenda-genda. Yaingira nawo mu ekaalu na aduma-duuma kandi na atondowola Katonda.

⁹Awantu woona awaawanga ampi ao waamuwona na agenda-genda kandi na atondowola Katonda.

¹⁰Olwa waamanya mbwe ono nio omuntu owawerenga na aikala ku ekikulo ekia ekaalu ekietwa mbwe ekikulo ekilootu, na asawa-sawa awantu amasendi oria, ekintu ekio kiawa-amba eminwa kandi waaluguula ekintu ekiikoriirwe omuntu oyo ekio.

Petro alagaane kiomo omurema alamre

¹¹Omuntu owa Katonda yalamia oyo yawanga na akia-andre ku Petro ni Yowaana. Awantu woona waawa no okuluguula ino kutio waafuma ne embiro okuwagiako mu ekiwiidi ekia Solomooni.

¹²Olwa Petro yawona kiomo ekintu ekiikorre ekio kiwang’ang’aazie yawawuuzia otino, “Awiifu Awaisraeli, ekigera ni muluguula ekintu ekiikorre kino niki? Nakuwa ekigera ni mutuwarra otio niki? Owuo muingirizia mbwe na amaani giifu aweene nakuwa owulootu wuifu emberi wa Katonda niwuo owugerre omuntu ono na agenda-genda?”

¹³Yaaya! Ogerre omuntu ono na agenda-genda ni Katonda owa Abraamu, Isaaka ni Yakoobo waasawanga. Katonda owa waaguukwa wiifu nio okorre amankono gano kugere a-ee Yesu omukurumu waae owunene. Ni inywe mwatoola Yesu ono mumuta mu amakono aga awakangasi wiinyu. Namba olwa Pilaato yamukengera ekiina mbwe alekulwe, inywe mwamulowa emberi wa Pilaato.

¹⁴Ni inywe mwalowa Kristo omuntu omuigolovu kandi omweru owa Katonda ono, ni musawa Pilaato mbwe awalekurre omwisi owaita omuntu mu iye.

¹⁵Kutio, inywe mwaita omuntu oesana owulamu, ni Katonda yamuziusia amutoola ku awafu kandi ifwe turi awawoni ku amang'ana gano mbwe gari kuwuene.

¹⁶Omuntu owa mwaweerenga ni mumanyire kandi owa mwawuinenga na ari omurema ono nyingeeno alamire geeza, ku okuwa no okuganya ku amaani aga eriina eria Yesu. Kuwuene okuganya ku Yesu nikwo okugerre ni muwona omuntu ono na awa omulamu ng'ese kiomo mumuwona otino.”

¹⁷Petro yagia emberu na awalaga otino, “Awiifu manyire mbwe ewintu ewia inywe alala na awakangasi wiinyu mwakorra Yesu, mwawikola mu okutamanya.

¹⁸Ni kukawa kutio, Katonda yatuusianga amang'ana aga yawoola ni kuwitra ku awagambi waae wona kale mbwe Kristo owa Katonda arinyaasiwua.

¹⁹Kutio, mugaluke mureke amawi giinyu kugere Katonda awaeruyie ku amawi,

²⁰kugere Katonda awa-ee enyinga ezia emioyo giinyu giesa okutuukra amaani amayia ku iye kandi kugere Katonda awatumre Yesu Kristo owa mwamala okuloworrwa kale.

²¹Yesu oyo aaza okuwa ku igulu nawuno kutuuke enyinga ezia ewintu wiona wiiza okugaluka wiwe ewintu ewiyia mala kiomo Omwami Katonda yamala okuwoola kale ni kuwitra ku awagambi waae awakulu.

²²Ni kuwuene aeniki Muusa yawoola mbwe, ‘Omwami Katonda, ori Katonda iinyu, aaza okuwatumra omugambi waae kiomo antumre otino, okuema ku awantu wiinyu. Paka mulonde amang'ana goona aga aaza okuwalaga.

²³Omuntu-umuntu orilowa okuwurra amang'ana gaae arirumusiwua ilala ku awantu awa Katonda, arekwe enze.’

²⁴“Ni lwona awagambi awa Katonda wona, okutanikra ku Samweli na awandi awaawao ni Samweli amiire okufwa, wona waagamba-gamba ku amang'ana agaikola nyingeeno gano.

²⁵“Amang'ana gano Katonda yawaifuwira olwa yakolanga endagano ni waaguukwa wiinyu ni kuwitra ku awagambi waae; kutio mwona mugarimo. Kino kiaikola olwa yalaga Abraamu mbwe, ‘Abraamu, ni kuwitra ku awiizukulu wao, nyiza okusereka awantu wona awa ku ekialo kiona.’

²⁶Kutio Katonda yalowola omukurumu waae kandi asooka amutuma ku inywe kugere awasereke na awagalusia okuema mu enkola ziinyu embiiwi.”

Awatumwa 4

Petro ni Yowaana wairrwe mu ekiina

- ¹Olwa Petro ni Yowaana waawanga ni wakiagamba-gamba na awantu, awoozia wandi no omukangasi owa awarinzi awa ekaalu alala na Awasadukaayo wandi waawatuukako.
- ²Enda ziwu ziwanga ni ziyiire ino ni Petro ni Yowaana aeniki awatumwa wawiri wano waagereranga kandi waalanzizianga awantu mbwe Yesu amiire okuziuka, kutio mbwe awafu waaza okuziuka.
- ³Kutio wa-amba Petro ni Yowaana wata mu owusiwe wagonamo nawuno owuire wukia aeniki wa-ambwa no owuire wumiire okuira.
- ⁴Ni kukawa kutio, awantu awangi awaawurra amang'ana aga Petro ni Yowaana waawa no okuganya ku Yesu. Okwo kwasonga awantu awari no okuganya, awa ekisaaza weng'ene wawa awantu elufu witaanu.
- ⁵Enkio walwo, awakangasi na awagaaka awa Awayaudi alala na awagerezi awa endagirra wona waikumia Yerusaleemu.
- ⁶Waaikumia alala mu ekiina na Anaasi Omukangasi omunene owa awoozia, alala na awandi kiomo Kaifa, Yowaana, Aleksanda na awantu wandi wona awaema mu ekiriango ekia awoozia.
- ⁷Nikuemao, waaimerezia Petro ni Yowaana agati ya awantu, watanika okuwawuuzia watino, "Tuagala mutulage geeza, aa mutoorre amaani aga mulamiizie nago omuntu ono? Nakuwa mumulamiizie ku eriina eria anu?"
- ⁸Petro, na aizuziiwue no Omwoyo Omweru ogwa Katonda, yaema awairania otino, "Awiifu inywe awakangasi na awagaaka awa Awayaudi,
- ⁹ni kuri mbwe reero luno mutuwuuzia amang'ana aga ekintu ekilootu ekikoriirwe omuntu ewerenga omurema ono kandi mbwe ne engiraaki eya alamremo,
- ¹⁰kane inywe alala na Awaisraeli wona musarigire muwurre. Nyagala mumanye mbwe, omuntu owa muwona na eimeriire ano ono, yalamire geeza otino ku amaani aga Yesu Kristo Omunazareeti owa inywe mwawamba ku omusalaaba, ni Katonda yamuziusia aema ku awafu.
- ¹¹Yesu ono nio owa endagano eya Katonda yagamba-gambako ne ewoola mbwe, 'Iwaale eria awaomboki waarega nirio eriairana riwa iwaale eria-ambirra enyumba.'
- ¹²Awulao omuntu wundi owa Katonda atueere otari Yesu, kandi iye eng'ene nio owa tuesa okutuukrako owuinunuzi aeniki riwulao eriina rindi mu ekialo kiona eria tuesa okutuukrako owuinunuzi."
- ¹³Olwa awakangasi wano waawona kiomo Petro ni Yowaana waagamba-gambanga no owusiani ni kandi na awantu-uwantu awaatasoma, waawa no

okuluguula ino. Ni waairana wamanya mbwe awantu wano waagenda-gendanga ni Yesu.

¹⁴Amang’ana ago gaawa-amba eminwa aeniki omuntu owalamiwua oyo yawanga na aimeriire nawo ao.

¹⁵Kutio awakangasi wano waawoola mbwe wafumiziwue enze eya enyumba kandi watanika ekiina ni waiwuuzia aweene watino,

¹⁶“Katio ekia tusugaane tukorre awantu wano niki? Ekintu ekiikorre ku omugizi ogwa Yerusaleemu kino, na amankono amanene aga Katonda aa tutaesa okuwoola mbwe no owuweeyi.

¹⁷Ni kugere eking’ana kino kireke okugia emberu ni kiianza, tusiagizie awantu wano wareke okugamba-gambra awantu ku eriina eria Yesu.”

¹⁸Nikuemao waawaeta waingira mu enyumba kandi wawagaania ni wawasiagizia mbwe wataaza waagerera namba waalaga awantu amang’ana ku eriina eria Yesu.

¹⁹Ni Petro ni Yowaana waawairania ni wawoola watino, “Inywe aweene mutulage ekintu ekilootu ekia tusugaane tukole emberu wa Katonda. Muingirizia mbwe tusugaane tutie amang’ana aga Katonda nakuwa tutie amang’ana giinyu?”

²⁰Mumanye mbwe ifwe tuwula na amaani aga okureka okugamba-gamba ku ewintu ewia twawurra kandi ewia twawona na amiiso.

²¹Kukawa kutio, awakangasi wano waagia emberu okuwatiisia kandi waawasiagizia ino. Nikuemao, waawalekula wagia, aeniki okuwa okwa awantu awangi ao awaaton dowolanga Katonda ku ekintu ekinene ekiaikola kwawanyaga iwaga eria okuwakorra ekintu ekiwiiwi.

²²Omuntu owa Katonda yakorra amankono aga okumulamia oyo yawanga ne emiaka egikira amakumi ane.

Okusawa okwa awantu awari no okuganya

²³Olwa Petro ni Yowaana waamala okulekulwa watino, waafuma wairana ku awalonzi awiina waawu. Kandi waawalaga kiomo awakangasi awa awoozia alala na awagaaka wawasiagiizie.

²⁴Olwa awiina waawu waawurra amang’ana ago wona waatanika okusawa Katonda ni wawoola watino, “Oo Omwami Katonda, omulusi owa ekialo ni igulu ne enyanza ne ewintu wiona ewiwirimo!

²⁵Iwue wawoola kale ni kuwitra ku omukurumu wao guukwa iifu Daudi olwa yawoola ku amaani aga Omwoyo gwao Omweru mbwe: “ ‘Ekigera ne enda ezia awantu awatari Awayaudi ziayia niki? Kandi ekiagera na Awayaudi waingirizia okukola ewintu ewia owusa niki?

²⁶Awaami awa ekialo waaikaga okugia mu iye, awakangasi wiifu waagana alala okuwarra engira ezia okulwana. Ee, okulwania Omwami Katonda ni Kristo omulowole waae.’

²⁷Kuwuene Katonda, ekio nikiu ekintu ekiaikola ku omugizi guno olwa Omwami Eroode alala no omukangasi Pontias Pilaato waaikumia alala na Awaisraeli na awatari Awayaudi okuwurizania ku amang’ana aga okulwania Yesu Kristo omukurumu waa omulowole.

²⁸Ne ewia waakola wino wiawanga ewintu ewia wawanga no omanyire mbwe wiiza okuikola aeniki wamala okuwitaa na amaani gaao.

²⁹Ni katio Katonda Omwami iifu, nyingeeno wonako kiomo awantu wano watusiagizia. Tucusawa mbwe ganya otu-ee amaani kugere tulanzie amang’ana gaao no owusiani.

³⁰Golola okukono kwao okusiza tulamie awalwire kandi tukole amankono ne ewintu ewikate-kaate ewiluguulwa ku eriina erieru eria omukurumu waa Yesu Kristo.”

³¹Olwa waamala-umala okusawa otino, asi aa waawanga ni wasawira ao yazegera kandi wona waizuziwua no Omwoyo Omweru ogwa Katonda owagera watanika okulanzia amang’ana aga Katonda no owusiani.

Awalonzi awa Yesu waganyaane okukunza ewintu wiawu alala

³²Awalonzi awa Yesu waawanga ni wamenyere no owulala kandi ewintu wiona ewia waawanga nawio waasangirizianga alala, aa awulao owawoolanga mbwe ekia ari nakio, ne ekiae omwene.

³³Awatumwa awa Yesu waatanika okulaga awantu amang’ana aga okuziuka okwa Omwami Yesu na amaani kandi Katonda yawasereka ino mu emirimo giawu.

³⁴Ku awantu wano, awulao omuntu owatakayia ekintu aeniki awantu awaawanga ni wari na amalowa namba na amayumba agati yaawu waagaguzianga

³⁵ni wareeta amasendi ni wata mu amakono aga awatumwa. Amasendi ago waagawananga nikulondokana no okuagala okwa omuntu yawanga nakwo.

³⁶Kiomo mu amiire ago, yawangao omuntu owaetwanga Yosefu, owa awatumwa waaluka mbwe Baranabaasi, (okulagana mbwe no omuntu oambia awandi amaani) owawanga Omulaawi owaiwulwa mu ekizinga ekia Saipraasi.

³⁷Omuntu ono yaguzia ilowa riae atoola amasendi ago agia ata mu amakono aga awatumwa.

Awatumwa 5

Anania ni mukaae Safiira

- ¹Yawangao omuntu wundi owaetwanga mbwe Ananiasi no omukazi waae owaetwanga mbwe Safiira. Omuntu ono oona yaguzia ilowa riae.
- ²Ku amasendi aga yatuukra yagawula agandi areka mu enyumba, na agandi aira agia ata mu amakono aga awatumwa, awasemerezia mbwe ago geng'ene nigo amasendi aga atuukiire. Mukaae oona yamanya eking'ana ekio.
- ³Olwa Ananiasi yaira amasendi ago, Petro yamuwuzia otino, "Ananiasi, ekigera no oganyiire Ekikeeno kikuingiramo mu omwoyo niki? Katio nyingeeno osemerezia Omwoyo Omweru ogwa Katonda mbwe gano nigo amasendi goona aga waguziizie ilowa, ne eno ogawuule agandi oreka mu enyumba.
- ⁴Kane ilowa rino ngariawerenga eriao, namba olwa wariguziizie, amasendi ago goona ngagaweerenga agaa? Katio ekigera no okengere mu omwoyo gwao okukola ekintu ekiwiiwi kino niki? Reka nkulage: ngokaweeyira omuntu, no oweeyire emberu wa Katonda."
- ⁵Olwa Ananiasi yawurra amang'ana gano otino, yagwa ansi afwa. Kandi owuti wua-amba awantu wona awaawurra ekintu ekiaikola ekio.
- ⁶Nikuemao, awazia waaza wawasaania omuwiri gwae ne enguwo kandi wamuginga wamufumia enze, wagia wamuawira.
- ⁷Lunyima ne enyinga isatu zimiire okuwita, omukazi waae yona yaingira na atamanyire ekintu ekiikorre.
- ⁸Petro yamuwuzia otino, "Safiira, iwue oona omanyire mbwe gano geng'ene nigo amasendi aga mutuukiire ku ilowa riinyu eria mwaguziizie?" Safiira oona yaganya mbwe, "Ee, ago geng'ene nigo amasendi aga twatuukiire."
- ⁹Petro yamuirania otino, "Ekigera ni iwue alala no omusaaza waa muwurizaanie okugeezaania Omwoyo Omweru ogwa Katonda niki? Wona awazia awaawiire omusaaza waa wamiire okuirana kandi waimeriire mu ekiriango, iwue oona waaza okukutoola wagie wakuawire nyingeeno."
- ¹⁰Ao ao, Safiira oona yagwa ansi afwa emberu wa Petro ao. Olwa awazia waria waaingira waamutuukra na amiire okufwa. Kutio waamuginga wagia wamuawira ampi no omusaaza waae.
- ¹¹Owuti owungi wua-amba awantu wona awaawanga no okuganya ku Yesu na awantu wandi wona, olwa waawurra ekintu ekiaikola ekio.

Awatumwa awa Yesu walamiizie awantu awangi

- ¹²Awatumwa awa Yesu waakorra awantu amankono amangi ne ewintu ewingi ewikate-kaate ewiluguulwa. Awantu awari no okuganya ku eriina eria Yesu wona waikumia alala asi aetwa mbwe ekiwiidi ekia Solomooni.
- ¹³Awulao omuntu otaawanga mulala ku iwo owasianiya okuikumia nawo alala asi ao, kukawa mbwe awantu waawa-aa owuti ino.

¹⁴Kukawa kutio, awantu awangi awekisaaza na awekikazi, waagaluka wawa no okuganya ku Yesu, kandi okwo kwagera awantu awari no okuganya ku Yesu wawa awangi.

¹⁵Ewintu ewia awatumwa awa Yesu waakolanga wiagera awantu awalwire awangi waagingwa ku amaseero ni ku empambo wareetwa ku engira, mbwe enyinga ezia Petro aaza okuwita, namba ekiiruuzia kiae kituuke ku awandi ku iwo.

¹⁶Awantu awangi awaawanga ni wamenyere mu emigizi egiawanga ampi no omugizi ogwa Yerusaleemu, waareeta awantu waawu awaalwalanga na awaawanga ne ewikeeno ku awatumwa, kandi wona waalamiwua ku amalwire aga waawanga nago goona.

Awatumwa watuukiire eminyako-nyaako

¹⁷Omukangasi owa awoozia alala na awiina waae awayawanga nawo mu owulala owua Awasadukaayo waawa ne endandulu na awatumwa awo. Kutio

¹⁸waa-amba awatumwa wano wata mu owusiwe.

¹⁹Olwa kwatuuka owuire, enyankoi owa Katonda yaaza aigulao ekiriango ekia enyumba eya owusiwe afumia awatumwa enze, nikuemao awalaga otino,

²⁰“Mugie mu ekaalu mulanzizie awantu amang’ana aga owulamu owuyia wuno.”

²¹Awatumwa waaganya okukola otio. Kutio kunkio kumagambaazi waagia mu ekaalu watanika okulanzizia awantu amang’ana ago. Olwa Omukangasi owa awoozia alala na awakangasi awiina waae waatuuka, waaeta ekiina ekinene ekia awakangasi na awagaaka awa Awayaudi wona. Nikuemao, waatumania amang’ana mu owusiwe mbwe awatumwa awa Yesu awari mu owusiwe omwo wareetwe emberu waawu.

²²No olwa awakangasi awa awa-iiye waagia watuuka mu owusiwe, waatuukra mbwe awatumwa awa Yesu wawulamo. Kutio waairana ku awakangasi awaawatuma wawairanzia amang’ana watino,

²³“Olwa tugiire mu enyumba eya owusiwe, tugiire tutuukra ewiriango wiona ni wiigalweo wukalu geeza kandi awarinzi wona waweerenga ao ni warinda geeza. No olwa tuiguuleo, tuingiire tutuukra omuntu na awulamo namba omulala!”

²⁴Olwa omukangasi okangatiire awarinzi awa owusiwe na awakangasi awa awoozia waawurra amang’ana ago, waazinduka amasaai watanika okuiwuuzia aweene ni waluguula watino, “Ekiikoriire awantu awo niki?”

²⁵Nikuemao omuntu wundi yaaza awalaga otino, “Awiifu mumanyireko, awantu awa mwaweerenga ni muteere mu owusiwe waria, mbaaria nyingeeno waimeriire mu ekaalu muria wagerera awantu!”

- ²⁶Olwa waawurra otio, omukangasi okangatiire awarinzi yatoola awantu waae wagia wa-amba awatumwa awa Yesu wawareeta mu ekiina. Awarinzi wano waaira awatumwa wano mpoola aeniki waatianga mbwe ni wakorre nawo iye, awantu waaza wawakuba na amawaale.
- ²⁷Waatoola awatumwa awa Yesu wano waimerezia emberu owa awakangasi awa ekiina kandi Omukangasi owa awoozia yatanika okuwawuuzia otino,
- ²⁸“Ngatwamala okuwagaania kandi tulowa tusiriisia mbwe mutaaza mwagerera awantu ku amang’ana aga omuntu ono? Ni inywe mugia emberu kandi nyingeeno mumiire okuizuzia amatwi aga awantu woona awari Yerusaleemu ano na amang’ana aga omuntu ono, kandi muwoola mbwe ni ifwe awaamuita!”
- ²⁹Ni Petro na awatumwa wandi waamuirania watino, “Ifwe, kukawa kutie, tuuza okukola okuagala okwa Katonda ni ngatuuza okukola okuagala okwa omuntu yawa.
- ³⁰Olwa inywe mwamala okuita Yesu ni mumuwambre ku omusalaaba, Katonda owa waaguukwa wiifu yamuziusia amutoola ku awafu.
- ³¹Katonda yamugingirizia kungulu amuta nyakukono okusaaza kiomo Omwami kandi Omununuzi, kugere aezanie iwaga ku Awaisraeli eria okugaluka okuema ku amawi kugere warekerwe amawi gaawu.
- ³²Kandi ifwe alala no Omwoyo Omweru ogwa Katonda owa Omwami Katonda a-aa awantu awakola okuagala kwae twawona Yesu na aziukre kandi ari omulamu kandi tulaga awantu otio.”
- ³³Olwa awekiina waawurra ni Petro awoola otio, enda ziauwu ziauya ino kandi waagalanga mbwe wa-ambwe waitwe.
- ³⁴Na ario Omufarisaayo omulala owaetwanga mbwe Gamalieli, owawanga omugerezi owa endagirra. Oona yawanga omulala ku awakangasi awa ekiina kandi yawanga omuntu otiirwe ino. Iye yaimerra mu ekiina alaga awarinzi mbwe wafumie awatumwa awa Yesu enze.
- ³⁵Nikuemao yalaga awakangasi awiina waae otino, “Awiifu Awaisraeli, muingirizie geeza ekintu ekia muagala okukorra awantu wano!
- ³⁶Aeniki mu emiigo egiwitre, nintio Thadaayo oona yafuma atanika okuwoola mbwe ari omuntu omunene; kandi awantu awakasuga mia wine waaganya okutanika okumulonda. Ni lunyima ngayaitwa kugera awantu waae woona waatanyikana kandi engira ziae ezio ziona ziauwu.
- ³⁷Nikuemao Omugaliili wundi oetwa Yudaasi oona yaaza, mu amiire aga awantu waawalwanga, atanika okuvuwa awantu ni wamugiako; iye oona yaitwa kandi awantu waae woona waatanyika.

³⁸Kutio inze mboola ntino, mureke-ureka awantu wano wawe. Mutawakorra ekintu aeniki ni kuri mbwe wakola mala okuagala kwawu, amang’ana ago gaaza okuwua ageene.

³⁹Ni, ni kuri mbwe Katonda nio okola nawo, mbalaga mbwe waaza okugia emberi kandi ngamuuzza okuwakira. Muuza mwatuukra mbwe inywe ni inywe awalwania emirimo egia Katonda!”

⁴⁰Awakangasi awa ekiina waaganya na amang’ana aga Gamalieli. Nikuemao waeta awatumwa awa Yesu wawaswawuka enkowa kandi wawagaania wukalu mbwe wataaza wagamba-gamba ku amang’ana aga Yesu kandi kawiri. Ni waamala okukola otio, waawalekula wagia.

⁴¹Awatumwa awa Yesu waafuma ni wagia ni wari no owusangaavu ino. Ku iwo, Katonda nio owawalowola mbwe wasugre no okuwona eminyako-nyaako ku okuwa awalonzi awa Yesu.

⁴²Owuire ki owuire waagianga mu ekaalu ni mu emigizi egia awantu ni walanzia kandi ni wagerera awantu mbwe Yesu nio omulowole owa Katonda.

Awatumwa 6

Owulowozi owua awantu musamvu

¹Mu amiire ago na awalonzi awa Yesu waaisonganga okuwa awangi, okuirizia kwafuma agati ya Awayaudi awaawoolanga Olugiriiki na Awayaudi awaawoolanga Oluibrania. Awayaudi awaawoolanga Olugiriiki waarranga mbwe awakazi waawu awafwire ngawakatuukranga emigawo giawu egia owuire ki owuire owuagani na awakazi awafwire awiina waawu awaawoolanga Oluibrania.

²Kuno kwagera awatumwa awa Yesu ikumi ni wawiri waeta awalonzi awa Yesu wooka alala, nikwo wawalaga watino, “Awiifu ngatusugaane tureke emirimo egia okulanzia amang’ana aga Katonda mbwe tuwarra amang’ana aga okugawa ewiokuria.

³Kutio, mulowole awantu musamvu agati iinyu aweene awa mumanyire mbwe wari na amaganga geeza. Kandi wasugaane wawe awantu awaerwe owuti kandi awaizuziiwue no Omwoyo Omweru ogwa Katonda, awatuesa oku-aa emirimo egia okuwarra kiomo ewintu wisugaane wigawue.

⁴Ni ifwe tuwe mbwe enyinga ziona tusawa kandi tulanzia amang’ana aga Katonda.”

⁵Eking’ana ekia awatumwa waaingirizia ekio kiasangaazia awantu wooka kandi waaganya nakio. Kutio waalowola Stefaano (omuntu owawanga no okuganya kandi no Omwoyo Omweru ogwa Katonda), ni Piliipo, Prokoraasi, Nikanoori, Parmeena, alala ni Nikolao owaemanga ku omugizi ogwa Antioki. Nikolao ono yagaluka awa no okuganya okwa Awayaudi nikwo lunyima awa omulonzi owa Yesu.

⁶Olwa awalonzi awa Yesu waamala okulowola awantu wano, waawiira emberi wa awatumwa, awaawasawira Katonda ni wawateereko amakono gaawu.

⁷Nikuemao amang'ana aga Katonda gaagia emberi okuilanzia mu awantu. Kutio awalonzi awa Yesu waawa awangi ino mu omugizi ogwa Yerusaleemu. Namba awoozia awangi woona waaganya okuwa no okuganya ku Yesu.

Stefaano a-ambwe

⁸Stefaano yawanga omuntu owa Katonda asereeke ino kandi owa ya-aa amaani amangi. Yakola amankono amangi ne ewintu ewikate-kaate ewiluguulwa agati ya awantu.

⁹Awantu awaema mu owulala owua esinagoogi (owuetwa mbwe Esinagoogi eya Awantu Awasiwuulwe) waatanika okulowa amang'ana gae. Waawanga Awayaudi awaema Kureene ni Aleksandaria, na awandi waaema Siliisia ni Eesia.

¹⁰Na awulao omuntu owaesanga okukira Stefaano ni yagamba-gambanga aeniki yawanga na amaganga amangi aga yaeewua no Omwoyo Omweru ogwa Katonda.

¹¹Kutio awantu wano waagia owuiwisi wawurizania na awandi mbwe wawoole watino, "Tumiire okuwurra omuntu ono na agamba-gamba uwiiwi ku eriina eria Muusa ne eriina eria Katonda."

¹²Amang'ana aga awantu wano waawoola gano gaagera enda ezia awagaaka, awagerezi awa endagirra na awantu woona awaawanga ao ziyia ni Stefaano ino. Kutio waamuamba wamuirira emberi wa awagaaka awa ekiina.

¹³Olwa waamuirira ao, waareeta awawoni awa owuweeyi watanika okumuwoolako amang'ana aga owuweeyi watino, "Omuntu ono amiire okuweerako na agamba-gamba uwiiwi ku endagirra ezia Muusa ne ekaalu iifu enzeru eno.

¹⁴Ifwe aweene tumiire okumuwurra na awoola mbwe Yesu Omunazareeti aaza okuona ekaalu eno kandi aaza okugalusia enkola ezia twatoola ku endagirra ezia Muusa."

¹⁵Awantu woona awaawanga mu ekiina ekio waata ku Stefaano mala ekiwi ekia amiiso. Waawona ekieni kiae ni kiwonekana ki ekieni ekia enyankoi.

Awatumwa 7

Stefaano agamba-gambra awagaaka awa ekiina

¹Olwa waamala okumuwoolako amang'ana ago, Omukangasi owa awoozia yawuuzia Stefaano otino, "Amang'ana aga oingiriirwe nago gano gari kuwuene?"

²Stefaano yamuirania otino, "Awagaaka ni waamwifu, mutege amatwi muwurre ekia mbalaga! Katonda ori no owunene yailaganira guukwa iifu Abraamu ni yawanga na amenyere mu ekialo ekia Mesopotaamia, na akiari okugia okumenya ku omugizi ogwa Araani.

- ³Katonda yamulaga otino, ‘Ng’aanya oreke ekialo kiinyu kino ni waamwinyu, ofume ogie omenye mu ekialo ekia nyiza okugia okukulaga.’
- ⁴“Kutio yang’aanya mu ekialo ekia Mesopotaamia mu ekitemo ekia Awakaldea agia amenya mu omugizi ogwa Araani. Olwa swae yamala okufwa, Katonda yamulaga mbwe aaze amenye mu ekialo ekia mumenyeremo nyingeeno kino.
- ⁵Ni riwulao ilowa eria Katonda yamu-aa ano namba erikasuga entambuko endala. Kukawa kutio, Katonda yamuifuuwira mbwe aaza okumu-aa ilowa erio kandi mbwe riiza okuwa eriae na awiizukulu waae. Mumiire aga Katonda yakolanga empurizanio eno, kwatuukra Abraamu na akiawula omwana.
- ⁶Katonda yamulaga mbwe awiizukulu waae waaza okumenya mu ekialo ekitari ekiawu ku emiigo mia wine, kandi ku emiigo egio giona waaza okuwa awakurumu awa awantu awa ekialo ekio kandi wariwanyaasia ino!
- ⁷Katonda yagia emberu na awoola otino, ‘Nyiza okuswawuka awantu awariwanyaasia awo. Nikuema awiizukulu wao awo waaza okuema mu ekialo ekio waaze wansawe ano.’
- ⁸Ni Katonda yamala okuwoola otio, yataao endagano eya okuira awaana awekizia enyangu, ni Abraamu. Kutio Abraamu yaira Isaaka enyangu owuire owua munaane okuamera mu okuiwulwa. Isaaka yaira Yakoobo enyangu, ni Yakoobo yaira awazia waae ikumi ni wawiri enyangu. (Wano niwo awaiwula ewiriango ikumi ni wiwiri ewia Awaisraeli.)”
- ⁹Stefaano yagia emberu na awoola otino, “Awa Yakoobo waawa ni iyari ni Yoseefu wamwawu. Kutio waamuguzizia awantu awa Misiri. Kukawa kutio Katonda yawanga ni Yoseefu.
- ¹⁰Kandi yamurinda mu eminyako-nyaako giae giona. Olwa Yoseefu yagia emberu owa omwami owa Misiri, Katonda yamu-aa amaganga agaagera asangaazia omwami ino kandi okwo kwagera omwami amuta awa omukangasi owa omugizi gwae.
- ¹¹“Lunyima enzala ya-amba ekialo ekia Misiri ne ekialo ekia Kanaani, okwagera awantu wawa ne eminyako-nyaako emingi kandi waaguukwa wiifu waawulanga no okuria okwa waria.
- ¹²Kutio olwa Yakoobo yawurra mbwe emere eituukrana Misiri, yatuma awazia waae, awari waaguukwa wiifu mbwe wagie watunde emere eyo wareete. Okwo nikwo okwawanga okugia kwawu eyo okwa oluweri.
- ¹³Olwa waairana olwa okuwiri, Yoseefu yaimanyisia ku waamwawu waae kandi omwami owa Misiri oona yaaza amanya amang’ana aga waamwawu Yoseefu ni swae.

- ¹⁴Nikuemao Yoseefu yatuma waamwawu waae awo wagie walage swae Yakoobo aaze na awantu waae woona wamenye Misiri. Awiiwulane awa Yakoobo waawanga awantu amakumi musamvu ni itaanu.
- ¹⁵Kutio Yakoobo yang'aanya na awantu waae woona agia amenya mu ekialo ekia Misiri aa iye ni waaguukwa wiifu wandi waafwira lunyima.
- ¹⁶Emiwiri giawu giagingwa gigia giawirwa Sekeemu mu owuina owua Abraamu yawanga na amiire okugula na amasendi ku awantu awa Amoori.
- ¹⁷"Kiomo amiire aga Katonda yawoola mbwe aaza okutuusia endagano yaae ni Abraamu gaasonga okutuuka ampi, nintio awantu wiifu waasonga okuwa awangi mu ekialo ekia Misiri.
- ¹⁸Mu amiire ago, omwami wundi musaasa otaamanya Yoseefu ne ewia yakola nio owatoola owukangasi mu ekialo ekia Misiri.
- ¹⁹Omwami oyo yasemerezia waaguukwa wiifu kandi yata waaguukwa wiifu mu eminyako-nyaako eminene. Yawanigirizia mbwe wareke awaana wato awa waiwuule enze wafwe.
- ²⁰"Mu amiire gano nigo Muusa yaiwurrwamo, kandi yawanga omwana omulootu oluguulwa. Awiiwuzi waae waamurinda owuiwisi mu enyumba yaawu ku emienzi isatu.
- ²¹Olwa awiiwuzi waae waamuta enze eya enyumba yaawu, omwala owa omwami owa Misiri nio owamuambula, agia nae okumufuga kiomo omwana waae.
- ²²Muusa yagererwa amaganga goona aga awantu awa Misiri kandi yawa omuntu otiirwe mu enkola ziae na amang'ana aga yawoolanga.
- ²³"Olwa Muusa yawanga ne emiaka amakumi ane, yakenga mu omwoyo gwae mbwe agie awoneko Awaisraeli awiina waae.
- ²⁴Olwa yagia, yatuukra Omumisiri na akuba Omuisraeli, kutio yatunzia Omuisraeli owa Omumisiri yakubanga ono. Muusa yakuba Omumisiri oyo amuita ku eking'ana ekio.
- ²⁵(Muusa yaingirizianga mbwe Awaisraeli waaza okumanya mbwe Katonda amueere amaani aga okuwatoola nago mu owusiwe ni ngawakamanya.)
- ²⁶"Enkio walwo, Muusa yawona Awaisraeli wawiri ni walwana aweene. Yawagiako mbwe agia okuwagaya na awalaga otino, 'Awiifu, mukubanraki ni kandi muri awada?'
- ²⁷No owundi owawanga na akuba omwina waae yasindika Muusa na amuwuuzia otino, 'Okuteere omukangasi kandi omukengi owa ekiina agati iifu naanu?'
- ²⁸Kusi oogala okunyita kiomo izo waitre Omumisiri oria?'

- ²⁹Olwa Muusa yawurra otio, owuti wuamuamba arumuka aema Misiri agia okumenya mu ekialo ekia Miidia. Miidia eyo yakwao omukazi waiwula nae awazia wawiri.
- ³⁰“Lunyima emiaka amakumi ane ni gimiire okuwita, Katonda yafumira Muusa mu embonekano eya enyankoi mu akasaka akaawonekananga mbwe kayia. Ekio kiamuikorra na ari mu ekeewa ampi ne ekigiri ekia Sinaai.
- ³¹Ekintu ekia Muusa yawona kino kiamuluguuzia ino. Kutio yakigiako ampi okuwona ekiikola. Yawurra omwoyo ogwa Katonda na agamba-gamba nae okuema mu akasaka ako, na amulaga otino,
- ³²‘Inze ni inze Katonda owa Abraamu, Isaaka ni Yakoobo.’ Owuti wuamba Muusa, atanika okuadada kandi owuti wuagera areka okuwarra akasaka ako.
- ³³Nikuemao, Katonda yamulaga otino, ‘Vuula ewiraato ku amagulu gaao aeniki asi aa oimeriire ano na asi aeeru.
- ³⁴Kuwuene miire okuwona kiomo awantu awa Misiri wanyaasia awantu wange. Miire okuwurra amaziga gaawu, kutio miire okuiika ansi kugere mbatoole mu owusiwe owua warimo. Katio nyagala okukutuma Misiri.’ ”
- ³⁵Stefaano yagia emberu na awalaga otino, “Muusa ono nio owa Awaisraeli waalowa ni waumulaga watino, ‘Awulao okuteere omukangasi kandi omukengi owa ekiina kiifu?’ Kane Omwami Katonda nio owawanga na amiire okumutuma okuwarinda kandi okuwatoola mu owusiwe owua waawangamo. Kandi Katonda owamufumira mu embonekano eya enyankoi mu akasaka akayia nio owamu-aa amaani aga okukola emirimo egio.
- ³⁶Yawakangatra na awafumia Misiri kandi yakola amankono agaluguulwa. Amankono gano yagakola Misiri, agakola mu enyanza enzakanyu kandi yagakola mu ekeewa ku emiaka amakumi ane goona ni wari eyo.
- ³⁷Muusa ono nio owalaga Awaisraeli otino, ‘Katonda aaza okuwaloworra omugambi ofwana ni inze okuema ku awantu wiinyu aweene.’
- ³⁸Muusa yawanga mu okuikumia okwa waaguukwa wiifu mu ekeewa. Eyo nio enyankoi owa Katonda yagamba-gamba nae mu ekigiri ekia Sinaai na amulaga amang’ana aga Katonda agaesania owulamu, galagwe Awaisraeli wona kutuuka ku ikula riifu rino.
- ³⁹“Ni waaguukwa wiifu waalowa Muusa kandi mu emioyo giawu egia muni, waagala ino mbwe wairane Misiri.
- ⁴⁰Awaisraeli waagia walaga Aruuni otino, ‘Tuagala otulongere katonda eziiza okutukangatra. Omwina iifu Muusa omiire okuwa na atukangatiire ni tuema Misiri, ngatumanyire mbwe ekimuikoriire niki?’

⁴¹Kutio mu amiire ago nigo aga waalongeramo katonda ensaasa ne edhaabu mu embonekano eya ekimoori, kandi waagikorra emisango egia emiandu. Waakola emigomo egikorra katonda ensaasa ezia waalonga aweene.

⁴²Ekio kiagera Omwami Katonda awalowa kandi awareka watanika okusawa ewintu ewifwana enyanga, omwenzi ne eng'eni-ng'eni ezia ku igulu. Kuno kuri kiomo Katonda yawoola ni kuwitra ku omugambi waae owajoja otino, 'Inywe Awaisraeli mukawoola mbwe ni inze owa mwakorranga emisango ne emiandu egia mwaitanga mu ekeewa ku emiaka amakumi ane?

⁴³Ansi-uansi aa mwagianga mwaginganga eema eya mwagingamo katonda ensaasa eetwa mbwe Malooki eya mwasawanga, kandi lwona mwaginga katonda ensaasa eimeriire aa eng'eni-ng'eni eetwa Rafeeni. Mwalonga katonda ensaasa zino kugere muzikubre ansi amasigamo ni muzisawa aa mukansawa. Okwo kugera nyiza okuwaira asi ale okutambuka ekialo ekia Babulooni.' "

⁴⁴Stefaano yagia emberi na awoola otino, "Waaguukwa wiifu waawanga ne eema ekialagananga mbwe Katonda ari nawo ni waawanga mu ekeewa. Waakilonga owufwanani ni kiomo Katonda yalaga Muusa mbwe akilonge, kandi kuwuene kiawonekananga kiomo Katonda yamulagirizia.

⁴⁵Lunyima waaguukwa wiifu waatoola eema eyo okuema ku waaswawu aweene. Nikuemaao waaza nayo nawuno watuuka nayo mu ekialo ekia turiko kino ni wari ni Yoswa. Mu amiire ago nigo waatoorrako ekialo kino. Amaani aga Katonda gaagera walwania awantu awaawanga ni wamenyere mu ewialo ewio nawuno wawavuna. Eema eyo yaweera ku ekialo kino nawuno kutuuka olwa Daudi yawanga Omwami owa ekialo kino.

⁴⁶Omwami Daudi yasangaazia Katonda ino kandi yasawa Katonda mbwe amuganyire aombokere Katonda owa Yakoobo na awiizukulu waae enyumba.

⁴⁷Ni Sulumaani omuzia waae nio owaomboka enyumba eya okusawa Katonda.

⁴⁸"Ni kukawa kutio, Omwami Katonda okangatiire ewintu wiona ngamenya mu enyumba eombookwe no omuntu. Mala kiomo omugambi owa Katonda yajoja na awoola kiomo

⁴⁹Katonda yawoola otino, 'Ku igulu nio aa entewe eya owuami wuange eri, ne ekialo nikio ekisigikro ekia nsigikako amagulu. Inywe muuza okunyombokra enyumba efwana otie menyemo? Nakuwa na ai aa nkawuluukra?

⁵⁰Inze omwene ng'ani inze owaluka ewintu wiona ewiri ku ekialo ne ewiri ku igulu na amakono gange? "

⁵¹Stefaano yagia emberi na awoola otino, "Muri awantu awa emitwe emikalu awatatiire kandi awatawurra amang'ana aga Katonda. Lwona mukola enkola embiiwi ino mala kiomo waaguukwa wiinyu. Aeniki mugia mala emberi okulowa ewintu ewia mulagwa no Omwoyo Omweru ogwa Katonda.

⁵²Waaguukwa wiinyu ngawaata awagambi awa Katonda woona mu eminyako-nyaako? Lwona ngawaaita namba awagambi awa Katonda awakulu awaawoolanga mbwe Kristo aaza okuuzza kandi mbwe iye nio ooza okukola ewintu ewiigolovu ku Katonda? No olwa yaaza, ngamwamuguzizia awandi kandi mugera wamuita?

⁵³Mwatuukra endagirra eziaema ku Katonda ezia enyankoi waalaga waaguukwa wiinyu mbwe watie, ni inywe ngamuziere owuti.”

Stefaano akubirwe na amawaale

⁵⁴Olwa awakangasi awa ekiina waamuwurra na awoola otio, waawa no okusu okungi ino aa waatanika okuluma-luma ewiala.

⁵⁵Ni Stefaano owawanga na aizuziwwue no Omwoyo Omweru ogwa Katonda yawarra kungulu ku igulu awona owunene owua Katonda kandi awona Yesu na ari nyakukono okusaaza okwa Katonda.

⁵⁶Yawalaga otino, “Muwoneko! Mbona igulu ni ri-igulweo kandi Omuzia owa Omuntu aimeriire nyakukono okusaaza okwa Katonda.”

⁵⁷Olwa awakangasi awo waawurra ni Stefaano awoola otio, waakuba erioga wukalu kandi waziwa amatwi gaawu ne ewiala kugere watamuwurra na agambagamba. Waamugiako kalala woona

⁵⁸wagia wamuamba watanika okumukulula ni wamufumia enze eya omugizi ogwa Yerusaleemu nikwo watanika okumukuba na amawaale wamuite. Awantu awaamuingirra awo waavuula enguwo ziwu ezia kungulu wagia wata ampi na amagulu aga omuzia oetwa Saulo.

⁵⁹Waagia emberu ni wakuba Stefaano na amawaale ni Stefaano iye yasawanga Katonda na awoola otino, “Omwami Yesu, ganya otoole omwoyo gwange.”

⁶⁰Nikuemao, yakuba ansi amasigamo atanika okuwoola no omwoyo ogwa kungulu otino, “Omwami Yesu, nkusawa mbwe ganya owarekere amawi aga wakola.” Olwa yamala okusawa otio, yafwa.

Awatumwa 8

¹Saulo yawanga ao kandi yoona yaganya no okuitwa okwa Stefaano.

Awalonzi awa Yesu wawona eminyako-nyaako

Okuemera nyanga olwo awantu woona awari no okuganya ku Yesu awaawanga Yerusaleemu waatanika okuwona eminyako-nyaako emilulu. Awatumwa awa Yesu eng'ene niwo awaasigala Yerusaleemu na awantu woona awasigaale awaawanga no okuganya ku Yesu waatanyika mu ewitemo ewia Yudeea ni Samaria.

²Awantu awatiire Katonda waatoola Stefaano wamuawira kandi waamurra no owululu ino.

³Ni Saulo yatanika okunyaasia awalonzi awa Yesu wululu kandi yagia mu enyumba ki enyumba na akulula awantu awelikazi na awekisaaza awari no okuganya ku Yesu na awata mu owusiwe.

Piliipo alanziizie amang'ana aga Katonda ku omugizi ogwa Samaria

⁴Awantu awari no okuganya ku Yesu waatanyika wagia mu ewialo ewigawuke-gawuuke watanika okulanzia amang'ana aga Yesu.

⁵Piliipo iye yagia ku omugizi ogwa Samaria atanika okulanzizia awantu amang'ana amalootu aga Kristo.

⁶Olwa awantu waawurra amang'ana aga Piliipo kandi wawona amankono aga yakolanga, waatega amatwi gaawu ino okuwurra amang'ana gaae.

⁷Ewikeeno wiafuma ku awantu awangi ni wirra wukalu. Awantu awangi awaawanga no owulwire owua okufwa ng'anzi na awarema awangi woona waalamiwua.

⁸Kino kiagera awantu awa ku omugizi ogwa Samaria wawa ne ekisangaalo ekinene.

Simioni omulaguzi

⁹Yawangao omuntu oetwa mbwe Simioni. Yawanga na amiire okuweerako na akola emirimo egia owulaguzi ku omugizi ogwo ino. Kandi yaitumbulanga mbwe ari omuntu omunene ino.

¹⁰Awantu woona okuemera ku awantu awanene kutuuka ku awantu awatono wamutegerezianga ino. Kandi waawoolanga watino, "Kuwuene omuntu ono nio ori na amaani aga Katonda agaetwa mbwe amaani amanene!"

¹¹Awantu waamutegerezianga aeniki owulaguzi wuae wuawaluguzia ku amiire amangi.

¹²Kukawa kutio olwa awantu wano waawurra Piliipo na alanzia amang'ana aga Owuami owua Katonda kandi na alanzia amang'ana ku eriina eria Yesu Kristo, waawa no okuganya. Awantu awelikazi na awekisaaza awaawa no okuganya ku amang'ana ago waabatiiswa.

¹³Namba Simioni oona yawa no okuganya kandi oona yabatiiswa. Olwa yamala okubatiiswa yaweerako na alonda Piliipo asi-uasi aa Piliipo yagendanga; kandi amankono ne ewintu ewikate-kaate ewia yawona ni Piliipo akola wiamuamba omunwa.

¹⁴Olwa awatumwa awa Yesu awaasigala Yerusaleemu waawurra amang'ana, kiomo awantu awa ku omugizi ogwa Samaria wamiire okuwa no okuganya ku amang'ana aga Katonda, waawatumra Petro ni Yowaana okugia okuwa eyo nawo.

¹⁵Olwa waatuuka, waasawira awantu awaawanga no okuganya wano mbwe watuukre Omwoyo Omweru,

¹⁶aeniki awulao omuntu owawanga na amiire okutuukra Omwoyo Omweru ku awantu awo namba omulala, ni waawanga mala ni wamiire okubatiiswa ku eriina eria Omwami Yesu Kristo.

¹⁷Nikuemao Petro ni Yowaana waawataako amakono ni waawasawira kandi waatuukra Omwoyo Omweru.

¹⁸Olwa Simioni yawona mbwe okuta okwa Petro ni Yowaana waata amakono gaawu ku awantu kwagera na awantu watuukra Omwoyo Omweru, yafumia amasendi oku-aa awatumwa wano

¹⁹na awalaga otino, “Awiifu noona mumpeeko amaani gano, kugere ni nteere amakono gange ku omuntu, omuntu oyo atuukre Omwoyo Omweru.”

²⁰Petro yamuirania otino, “Origizwe mu omurro ogutafwa, iwue alala na amasendi gaao ago. Oingirizia mbwe oesa okugula ekintu ekia Katonda aesana wusa na amasendi!

²¹Iwue owula no omugawo ku emirimo egia Katonda egia tukola gino aeniki omwoyo gwao ngamulootu emberi wa Katonda.

²²Galuka oreke amawi gaao aga okuwa na amaingirizio amawiiwi gano kandi osawe Katonda wukalu kugere ni kuesekana akurekere amawi gaao aga okuwa na amaingirizio aga ori nago mu omwoyo gwao gano,

²³aeniki ni nkuwariira, ori omuntu oizuule ni iyari kandi ori mu owusiwe owua owuoni.”

²⁴Simioni yalaga Petro ni Yowaana otino, “Awiifu munsawire Katonda kugere ewintu ewia muwoorre ewio witaaza wianyikorra.”

²⁵Olwa waamala okulaga awantu amang’ana ku ewintu ewilootu ewia waawona ni wari ni Yesu Kristo, waairana Yerusaleemu. Ku engira ni wairana, waalanzizia awantu awa ku emigizi egia Samaria amang’ana amalootu aga Katonda.

Piliipo abatiisre Omuthoopia

²⁶Nikuemao, enyankoi owa Katonda yalaga Piliipo otino, “Fuma oambe engira eya ansi eema Yerusaleemu ne egia Gaaza.” (Engira eno ngekalondwanga.)

²⁷Kutio Piliipo yatanika olugendo na agia. Ku engira na agia, ya-agaana Omuthoopia omusowole, owawanga omuntu omunene ino mu ekialo kiawu. Omuntu ono yawanga omuwiiki owa amasendi aga Kandake omwami owekikazi owa Ithoopia. Yawanga na agiire Yerusaleemu okusawa Katonda.

²⁸Wuno katio yawanga ku engira na airana. Yawanga na aikaale mu egaare ekululwa ne efaraasi, na asoma ebuuki eyajojwa ni Isaaya omugambi owa Katonda.

²⁹Omwoyo Omweru ogwa Katonda yalaga Piliipo otino, “Gia owe ampi ne egaare ekululwa eeria.”

³⁰Kutio Piliipo yasomoka agia aa yalagwa, kandi yawurra Omuihoopia oyo na asoma ebuuki eya Isaaya omugambi owa Katonda. Piliipo yamuwuzia otino, “Mberi amang’ana aga osoma ago gakuvingirra?”

³¹Omuihoopia yamuirania otino, “Yaaya, ng’aganyingirra, mala no omuntu agansanukuriire geeza.” Kutio yasawa Piliipo mbwe aniine aikale nae mu egaare yaae eyo.

³²Mu ebuuki eya Isaaya, omuntu ono yawanga na asoma asi ajojerwe mbwe: “Yakangasiwua ki igondi eri-irwa okugia okuitwa, kiomo ekimaatwa ekitameera ni kiwegwako owuwiri wuakio, nintio oona yasarigira.

³³Waamusuusia kandi ngawakamukengera ekiina geeza. Awulao oesa okugamba-gamba ku awiizukulu waae aeniki owulamu wuae owua ku ekialo wuamalwanga!”

³⁴Omuihoopia oyo yawuuzia Piliipo otino, “Katio ndage tuwone, omugambi owa Katonda ono agamba-gamba ku anu? Agamba-gamba ku iye omwene nakuwa ku omuntu wundi omusaasa?”

³⁵Piliipo yamutanikra okuema ku amang’ana aga Omuihoopia asomerenga kandi amulaga amang’ana amalootu ku Yesu Kristo.

³⁶Ni waawanga ni wakiari ku engira ni wagia, waaika watuuka asi aa amanzi gari. Kutio omuntu Omuihoopia ono yalaga Piliipo otino, “Wonako! Mpano amanzi gari ano. Kirio kandi ekikagera ndeke okubatiiswa?”

³⁷[Piliipo yamuganyira otino, “Ee, nyesa mala okukubatiisa no oganyire ku Yesu Kristo no omwoyo gwao gwona.” Omuntu oyo yairania Piliipo mbwe, “Ee, omwoyo gwange guri no okuganya mbwe Yesu Kristo ari Omuzia owa Katonda.”]

³⁸Nikuemao omukangasi oyo yalaga awantu waae mbwe waemerezie efaraasi eyamukululanga kandi iye alala ni Piliipo waaika wagia aa amanzi gaawanga. Kutio Piliipo yamubatiisa.

³⁹Olwa waamala okuema mu amanzi, Omwoyo Omweru ogwa Katonda yatoola Piliipo ao. Omukangasi ono ngakamuwona kandi, ni yagia mala emberu no olugendo lwae, na ari no owusangaavu owungi.

⁴⁰Piliipo yaizukira na atuukre Azotuusi kandi yagenda-genda na alanzia amang’ana aga Yesu Kristo mu emigizi giona egiawanga ao nawuno atuuka Kaisaria.

Awatumwa 9

Saulo agaluuke

¹Saulo iye yawanga na akiagia emberu na atiisia awalonzi awa Yesu no olumbe mu amiire ago. Yagia ku Omukangasi owa awoozia

- ²amusawa ebaruwa ezia okumumanyisia ku awakangasi kandi ezia okumuganyira okugia mu amasinagoogi agari Damaskaasi. Yakola otio kugere na atuuikiire omuntu olondokana ne engira eya Omwami Yesu, awe omukazi namba awe omusaaza amuambe amuire mu owusiwe Yerusaleemu.
- ³Ni yawanga ku engira na ari ampi okutuuka Damaskaasi, yaizukira na awona idangaala eria owueru ni wuaema ku igulu ni wumuikako.
- ⁴Yagwa ansi ku engira kandi yawurra omwoyo ni gumulaga gutino, “Saulo, Saulo, ekigera no ondambiizie wululu otio niki?”
- ⁵Saulo yamuwuzia otino, “Omwami, iwue ni iwue anu?” Omwoyo ogwo gwamulaga gutino, “Inze ni inze Yesu owa odambiizie wululu.
- ⁶Ni, ema ogie ku omugizi ogwa Damaskaasi kandi ooza okugia okulagwa ekia osugaane okole.”
- ⁷Awantu awaagenda-gendanga ni Saulo waawanga ao kandi ekintu ekio kiawamba aminwa. Waawurra omwoyo ni gugamba-gamba ni ngawakawona omuntu.
- ⁸Saulo yaimerra aema ansi. Olwa yasanukula amiiso gaae kiwulao ekintu ekia yaesanga okuwona. Kutio awantu awayawanga nawo awo waamuamba okukono wamuirira Damaskaasi.
- ⁹Ku amiire asatu yawa omuwuunu kandi ngakanywa namba ngakaria ekintu.
- ¹⁰Yawangao omuntu wundi Damaskaasi oetwa Ananiasi, owawanga omulonzi owa Yesu. Katonda yagamba-gamba nae mu owusasuko na awoola otino, “Ananiasi!” Yamuirania otino, “Ndi ano Omwami.”
- ¹¹Yesu yamulaga otino, “Ema ogie mu enyumba eya Yudaasi eri ku engira eetwa mbwe Enyigolovu, ogie owuuzie mbwe oogala omuntu oemere Taaso oetwa mbwe Saulo. Ari ao nyingeeno asawa,
- ¹²kandi amiire okuwona mu owusasuko no omuntu oetwa mbwe Ananiasi aingira aa ari kandi amutaako amakono gaae, kugere awone kandi.”
- ¹³Ananiasi yamuirania otino, “Omwami, awantu awangi wamiire okundaga amang’ana amangi ku omuntu ono kandi kiomo amiire okuweerako na akorra awalowole waa ewintu ewiwiiwi ewingi Yerusaleemu.
- ¹⁴Kandi katio nyingeeno aazre ano ne ebaruwa eemere ku Omukangasi owa awoozia okuuzza okuamba awantu wona awaganyire ku iwue.”
- ¹⁵No Omwami Yesu yamuirania otino, “Iwue gia aeniki miire okumulowoola okukola emirimo giange; egia okulanzia amang’ana gange ku awantu awatari Awayaudi, awaami waawu na awantu wona Awaisraeli.
- ¹⁶Kandi inze omwene nyiza okumulagirizia kiomo kuuza okumunigirizia okunyaka-nyaakra eriina riange.”

¹⁷Kutio Ananiasi yaema agia aingira mu enyumba omwo. Yata amakono gae ku Saulo na amulaga otino, “Wamwifu Saulo, Omwami Yesu owakufumira no ori ku engira no ooza ano antumre ku iwue kugere otanike kandi okuwona, kandi oizuziwue no Omwoyo Omweru ogwa Katonda.”

¹⁸Ao ao, ewintu ewifwanana na amagamba aga emvwa wiaema ku amiiso aga Saulo wigwa ansi kandi amiiso gae gaaiguka. Yaema kungulu kandi abatiiswa.

¹⁹Olwa yamala okuria, amaani gaamuiranira kandi.

Saulo alanziizie amang’ana aga Yesu Damaskaasi

Saulo yawa na awantu awaganyire ku Yesu Damaskaasi ku amiire amatono.

²⁰Yagia mu esinagoogi atanika kalala okulanzizia awantu omwo, mbwe Yesu no Omuzia owa Katonda.

²¹Awantu woona awaamuwurra waawa no okuluguula ino kandi waatanika okuiwuuzia watino, “Ono ng’anio omuntu owaitanga awantu awaganyire ku eriina eria Yesu Yerusaleemu? Kandi owuo katio ngaazre ano okuamba awantu awakola watio okuirra awakangasi awa awoozia?”

²²Kukawa kutio, okulanzia okwa Paulo kwasonga okuwa na amaani amangi ino kandi engira ezia yalaganiramo mbwe Yesu nio Meesia kwang’ang’aazia Awayaudi awaawanga ni wamenyere Damaskaasi, aa awulao omuntu owaesanga okumuirania eking’ana.

²³Na amiire amangi gaamala okuwita, Awayaudi wandi waaikumia alala okuagala engira eya okuita Saulo,

²⁴ni Saulo yagia amanya okuagala kwawu. Owuire no omuwasu waamuiteganga mu ewikulo ewi-ingira mu omugizi ogwa Damaskaasi ni wagala mbwe wamuite.

²⁵Okwo kwagera owuire wundi awalonzi waae wamuta mu entayi owuire wamuisia ansi kuwitra mu iwanga eriawanga ku enzizi eya omugizi.

Saulo agia Yerusaleemu

²⁶Olwa Saulo yairana Yerusaleemu, yagalanga mbwe aizoge na awalonzi awa Yesu awawangao ni waamutia aeniki ngawakawa no okuganya mbwe Saulo oona no omulonzi owa Yesu.

²⁷Kutio Baranabaasi nio owamutoola amuira ku awatumwa awa Yesu awalaga kiomo Saulo yawuine Omwami Yesu ku engira kandi kiomo Omwami Yesu yamugamba-gambiire kandi lwona kiomo yalanziizie amang’ana ku eriina eria Yesu Damaskaasi no owusiani.

²⁸Kutio Saulo yawa nawo ao kandi yagenda-genda mu omugizi ogwa Yerusaleemu na alanzia amang’ana ku eriina eria Omwami Yesu no owusiani.

²⁹Yagamba-gamba kandi yaikululana mu amang’ana na Awayaudi awaawoolanga Olugiriiki. Na awantu wano waageezaania mbwe wamuite.

³⁰Olwa awalonzi wandi waamanya eking’ana kino, waatoola Saulo wamuisia Kaesaria kandi wamutuma mbwe agie Taaso.

³¹Nikuemao katio awantu awaganyire ku Yesu awari mu ewitemo wiona ewia Yudeea, Galiili ni Samaria waawa no owuolu. Omwoyo Omweru ogwa Katonda yawa-aa amaani kandi waaisonga wawa awangi ino. Kandi waamenya ni waere Katonda owuti.

Petro alamiizie omuntu Liida

³²Petro yagenda-genda mu embega ziona ezia ekialo ekio. Owuire wulala yagia okuwona awiina waae awari no okuganya ku Yesu awaawanga ni wamenyere Liida.

³³Liida ao yatuukrao omuntu oetwa mbwe Ainea owawanga omulwire owa omuwiri ogufwa ng’anzi kandi yawanga na amiire okuwa na ari ku iseero na atagenda-genda ku emiaka munaane.

³⁴Olwa Petro yamuwona yamulaga otino, “Ainea! Yesu Kristo amiire okukulamia. Ema oazie owuriri.” Ainea yaema kungulu kalala.

³⁵Awantu wona awamenyere Liida na awamenyere Sarooni waamuwona na alamre kugera waganya ku Yesu.

Petro aziusie Tabiitha

³⁶Yawangao omukazi oetwa mbwe Tabiitha owawanga na amenyere Yoopa. (Mu Olugiriiki yaetwanga mbwe Dorkaasi.) Omukazi ono yawanga omulonzi owa Yesu. Yawanga omukazi owa enkola endootu kandi yatunzianga awantu awataka.

³⁷Mumiire ago omuwiri gwamukuba alwala nawuno afwa. Omuwiri gwae gwaoziwua geeza gugia guteewua mu enyumba eya goroofa kungulu.

³⁸Yoopa yawanga ampi ni Liida. Kutio olwa awalonzi awa Yesu waawurra mbwe Petro ari Liida, waatuma awantu wawiri mbwe wagie wamulage mbwe awagieko wuangu-wuangu.

³⁹Kutio Petro yaema agia na awantu awaatumwa awo; kandi olwa waatuuka, yatoolwa airwa mu enyumba eya kungulu aa omuwiri ogwa Tabiitha gwawanga ni guteerwe. Awakazi awafwire wona waaikumia ku Petro ni warra kandi ni wamulaga enguwo ezigawukane-gawukaane ezia Dorkaasi yawanawranga ni yawanga na akiari omulamu.

⁴⁰Petro yawafumia wona mu enyumba, nikuemao akuba ansi amasigamo atanika okusawa Katonda. Olwa yamala okusawa, yagaluka awarra omuwiri ogwa Tabiitha kandi awoola otino, “Tabiitha, ema kungulu!” Tabiitha yasanukula amiiso, olwa yawona Petro yaema aikala.

⁴¹Petro yamuamba amakono amuemia kungulu. Nikuemao Petro yaeta awakazi awafwire na awantu wandi woona awari no okuganya ku Yesu atoola Tabiitha awa-aa na ari omulamu.

⁴²Ekintu kino kiamanyikana mu ekialo ekia Yoopa kiona kandi kiagera awantu awangi wawa no okuganya ku Yesu.

⁴³Petro yamenya Yoopa ao ku amiire amangi no omuntu oetwa mbwe Simioni owakolanga emirimo egia okutowoka amaseero.

Awatumwa 10

Kornelio alagiriire Petro

¹Yawangao omuntu ku omugizi ogwa Kaisaria owaetwanga mbwe Kornelio, owawanga omukangasi owa omuganda ogwa awa-iiye ogwaetwanga mbwe omuganda ogwa Itaalia.

²Iye alala na awantu awa mu enyumba yaae woona waawanga ni watiire Katonda ino. Ku owusiza wuae yatunzianga Awayaudi awataka kandi yasawanga Katonda owuire ki owuire.

³Owuire wulala igulo mu enyinga ezia kienda, yawona owusasuko aa enyankoi owa Katonda yamufumira geeza mala amueta otino, "Kornelio."

⁴Olwa Kornelio yagingirizia amiiso kungulu mala awona enyankoi oyo, yamuirania no owuti wumuambre ino otino, "Ndi ano Omwami." Enyankoi oyo yamuirania otino, "Okusawa kwao alala ne ewintu ewia omiire okuwaa no otunzia nawio awantu awataka wimiire okutuuka ku Katonda, kutio Katonda akuingiriizie.

⁵Kutio tuma awantu Yoopa wagie wakuetre omuntu oetwa mbwe Simioni, oetwa ku eriina rindi mbwe Petro.

⁶Ari mu enyumba eya Simioni omutowoki owa amaseero, omenyere ampi no omwalo."

⁷Olwa enyankoi oyo yamala okugia, Kornelio yaeta awemirimo waae wawiri alala no omulala ku owa-iiye waae owamutunzianga kandi owawanga na atiire Katonda.

⁸Yawalaga ewintu wiona ewiaikola, nikwo awatuma Yoopa.

Katonda asasuriire Petro amang'ana

⁹Enkio walwo mu enyinga ezia mukaaga na awatumwa awa Kornelio waawanga ampi okutuuka ku omugizi ogwa Yoopa, Petro yaniina ku olusala kungulu okugia okusawa.

¹⁰Yawanga na awurra enzala, kutio yaagalanga okuria. Ni no okuria kwawanga ni kukiafumbwa, Katonda yamusasurra ekintu.

- ¹¹Mu owusasuko omwo, yawona igulu ni ri-iguukeo kandi ekintu ekifwana enguwo enene eyanzuulwe ne eisiziwua ansi ku ekialo.
- ¹²Mu enguwo omwo yawona entiang'i ziona ne enyonyi alala ne entiang'i ezimoola ansi ni zirimo.
- ¹³Nikuemao yawurra omwoyo ni gumulaga gutino, "Petro ema oite ewintu wino orie."
- ¹⁴Petro yamuirania otino, "Yaaya, Omwami, okuemerra ri nkiari okuria ekintu-ukintu ekitari ekieru nikulondokana no okuagala okwa endagirra iifu."
- ¹⁵Omwoyo ogwo kandi gwamulaga gutino, "Otaaza waaeta ekintu-ukintu ekia Katonda amiire okueruyia mbwe kimwamu."
- ¹⁶Kino kiaikola kasatu, nikuemao enguwo eyo yairaniziwua ku igulu.
- ¹⁷Mu amaginga aga Petro yawanga na akiaingirizia ekintu ekia Katonda yawanga na amulaga mu owusasuko omwo, awantu awa Kornelio yatuma waawanga ni wamiire okumanya aa yawanga kandi waawanga ku ekiriango. Waatuuka ku ekikulo ekia enyumba eya yawanga na arimo.
- ¹⁸Waawuuzia ni kuri mbwe omwo nimwo Simioni Petro ari.
- ¹⁹Ni Petro yawanga na akiaingirizia ekia Katonda yamulaga mu owusasuko owuo, Omwoyo Omweru yamulaga otino, "Petro, wario awantu wasatu awakuagala.
- ²⁰Kutio ema oike ansi kandi ogie-wugia nawo aa waemere aeniki ni inze owatumre ku iwue."
- ²¹Kutio Petro yaika ansi. Olwa yawona awantu awo, yawalaga otino, "Inze ni inze owamuagala; ekia munyagarra niki?"
- ²²Awantu awo waamuirania watino, "Omukangasi owa awa-iiye oetwa mbwe Kornelio nio otutumre. Kornelio ari omuntu otiire Katonda ino kandi Awayaudi woona wamueere owuti. Nikulondokana no owuigolovu wuae emberi owa Katonda, enyankoi omweru owa Katonda amulagre mbwe atume awantu waaze wakuete ogie mu enyumba yaae kugere omuwoorre ekia ori nakio."
- ²³Kutio Petro yawaingizia omwa yawanga, wawa awageni waae.

Petro aweere omugeni owa Kornelio

Owuire owualondako, Petro yafuma na awantu awo alala na awantu wandi awaawanga ni waganyire ku amang'ana aga Yesu mu omugizi ogwa Yoopa agia nawo.

- ²⁴Olwa waatuuka Kaisaria enkio walwo, waatuukra ni Kornelio aetre awaganda waae alala na awiiko waae kandi waikumiizie alala aeniki Kornelio yawanga na arindirra ino waawu Petro watuuke.

²⁵Olwa Kornelio yawona Petro na aingira, yagia okumuagaanra. Yagwa mu amagulu aga Petro amuifunamira.

²⁶Ni Petro yamuemia kungulu na amulaga otino, “Reka okunyifunamira aeniki inze noona ndi omuntu ki iwue!”

²⁷Petro yagamba-gamba nae ni waingira mu enyumba omwa yatuukra awantu awangi ino ni waikumiizie omwo.

²⁸Yalaga awantu otino, “Inywe aweene mumanyire geeza mbwe ifwe Awayaudi endagirra iifu ngetuganyiire okuwa alala na awantu awatari Awayaudi. Ni Katonda amiire okundaga mbwe ng’ansugaane mboole mbwe omuntu-umuntu ari mumwamu.

²⁹Kutio olwa ntuukiire owutumwa mbwe nyetwa, nyizre-uuza aa ntaingiriizie ekintu-ukintu. Kutio ndage ekia onyetiire.”

³⁰Kornelio yamuirania otino, “Amiire ane agawitre, ni nyawanga mu enyumba yange ni nsawa mu enyinga ezia kienda igulo. Nyaizukra ni mbona omuntu na aimeriire emberu wange na aingiizie enguwo enzeru zerre.

³¹Omuntu ono yandaga mbwe, ‘Kornelio! Katonda amiire okuwurra okusawa kwao kandi amiire okukuingirizia ku owu-aani wuao ku awataka.

³²Kutio, tuma awantu Yoopa, wagie wakuetre omuntu oetwa mbwe Simioni Petro. Ari omugeni owa Simioni omutowoki owa amaseero omenyere ampi ni kumwalo.’

³³Ekio nikiro ekiagera ni ntuma awatumwa wuangu-wuangu kugere wakulagirre ooze. Okorre geeza ino okuuza. Kutio twona turi ano emberu wa Katonda turindra okuwurra kandi okukola kiomo Katonda amiire okukulaga mbwe otulage.”

Petro agamba-gambiire awantu awatari Awayaudi

³⁴Petro yatanika okuwagamba-gambra na awoola otino, “Reero manyire mbwe Katonda kane ngagawula awantu, na awona awantu woona owuagani.

³⁵Aingizia omuntu-umuntu okola geeza kandi omueere owuti akawa omuntuki.

³⁶Mumanyire amang’ana aga Katonda yatumra Awaisraeli okuwitra ku Yesu ori Omwami owa awantu woona, owalanzia amang’ana amalootu agareetra awantu owuolu.

³⁷Lwona mumiire okuwurra ewintu wiona ewimiire okuikola mu ekialo ekia Yudeea okutanikra mu ekitemo ekia Galiili lunyima ni Yowaana yamala okulanzizia awantu amang’ana aga owubatiiso.

³⁸Kiomo Katonda yalowola Yesu Omunazareeti owa yaizuzia no Omwoyo Omweru na amaani, kandi asi wuansi aa yagia yakorra awantu geeza na alamia awantu woona awaawanga mu owusiwe owua Ekikeeno, aeniki Katonda yawanga nae.

³⁹Ifwe twawona ewintu wiona ewia Yesu yakola mu ekialo ekia Awayaudi ni ku omugizi ogwa Yerusaleemu na amiiso giifu. Ni kukawa mbwe Awayaudi waamuita, olwa waamuwamba ku omusalaaba,

⁴⁰Katonda yamuziusia owuire owua okusatu kandi yagera awonwa, ng'ani na awantu wona, ni mala ni ifwe awa

⁴¹Katonda yawanga na amiire okulowola okuwa awawoni ku amang'ana gano. Ifwe twaria kandi twanywa nae, na amiire okuziuka aemere ku awafu.

⁴²Yatusikirra mbwe tulanzizie awantu ni tuwalaga mbwe nio owa Katonda yalowola okuwa omukengi owa ekiina ku awantu wona, awalamu na awafu.

⁴³Iye nio owa awagambi awa Katonda wona waagamba-gambako ni wawoola mbwe omuntu-umuntu oweere no okuganya ku eriina riae, Katonda aaza okumurekera owuoni wuae.”

Awatari Awayaudi waizuziwe no Omwoyo Omweru

⁴⁴Ni Petro yawanga na akiagamba-gamba, Omwoyo Omweru ogwa Katonda yaizuzia awantu awatari Awayaudi awaamutegerezianga wano wona.

^{45.46}Olwa Awayaudi awaawanga ni waganyire ku Yesu Kristo awaawanga ni waazre ni Petro waawona na awantu awaategerezianga Petro ni wagamba-gamba mu eminwa egigawuke-gawuuke kandi ni watondowola Katonda, waawa no okuluguula ino aeniki Katonda ya-aa namba awatari Awayaudi Omwoyo gwae Omweru. Petro yawalaga otino,

⁴⁷“Awiifu awantu wano wona mpano watuukiire Omwoyo Omweru ogwa Katonda kiomo twona twatuukra, katio ekinawalowera okubatiiswa na amanzi niki?”

⁴⁸Kutio yasikirra mbwe wabatiiswe ku eriina eria Yesu Kristo. Nikuema awantu awo waasawa Petro mbwe aweeko nawo ku amiire amatono.

Awatumwa 11

Petro alaga awalonzi ewimuikoriire

¹Awatumwa alala na awantu wona awaawanga ni waganyire ku amang'ana aga Katonda, mu ekialo ekia Yudeea waawurra mbwe namba awantu awatari Awayaudi wona wamiire okutuukra amang'ana aga Katonda.

²Kutio olwa Petro yagia Yerusaleemu Awayaudi wandi ku awaawanga ni waganyire ku Yesu waamusoozia ni wawoola watino,

³“Ekigera ni iwue oingira mu amayumba aga awantu awatairwe enyangu kandi oria nawo niki?”

⁴Petro yatanika okuwalaga ewintu wiona ewiaikola ni kiomo wiaikola otino,

- ⁵Owuire wulala nyawanga ni nsawa Katonda ni ndi ku omugizi ogwa Yoopa. Nyawona enguwo enene eyanzuulwe ne eema ku igulu mu owusasuko owua nyareeterwa ni Katonda, kandi yareetwa nawuno aa nyawanga.
- ⁶Olwa nyawarra mumsi geeza, nyawona entiang'i ezia mu isaka enyingi ezifwana ne entiang'i ezia amagulu ane, entiang'i ezimoola ansi, alala ne enyonyi.
- ⁷Nyawurra omwoyo ni gundaga mbwe, 'Petro! Ita ewintu wino orie.'
- ⁸Nyamuirania ntino, 'Yaaya Omwami, okuema kale ekintu-ukintu ekitari ekieru, nikulondokana ne endagirra ziifu, kikiari okuingira mu omunwa gwange.'
- ⁹Omwoyo ogwo gwanyirania olwa okuwiri ni guemera ku igulu mbwe, 'Otaaza waeta ekintu-ukintu ekia Katonda amiire okueruyia mbwe ekimwamu.'
- ¹⁰Kino kiaikola kasatu, nikuemao enguwo eyo yairaniziwua ku igulu.
- ¹¹"Mu enyinga ziazane ezio awantu wasatu waaza okunyeta mu enyumba eya nyawanga ni menyere ni waema ku omugizi ogwa Kaisaria.
- ¹²Omwoyo Omweru yandaga mbwe ngie-wugia nawo. Nyatoola awiina wange mukaaga wano ngia nawo paka mu enyumba eya Kornelio, owatuma awantu wasatu awo.
- ¹³Olwa twatuuka, Kornelio yatulaga kimo enyankoi owa Katonda yamufumira mu enyumba yaae amulaga mbwe atume omuntu Yoopa agie amuetre Simioni oetwa ne eriina rindi mbwe Petro.
- ¹⁴Aaza okukulaga amang'ana agaaza okukununula iwue alala na awantu woona awa omenyere nawo.
- ¹⁵"No olwa nyatanika-utanika okuwagerera amang'ana aga Katonda otino, Omwoyo Omweru yawaizuzia kimo yatuizuzia oluweri.
- ¹⁶Kino kianyizurizia ekia Omwami yawoola, olwa yawoola mbwe, 'Yowaana yabatiisa na amanzi masa, ni inywe muuza okubatiiswa no Omwoyo Omweru ogwa Katonda.'
- ¹⁷Kutio ni Katonda yawa-aa ekia yatu-aa owuagani olwa twaganya ku Yesu Kristo, katio inze ndi ki okalowera Katonda okukola okuagala kwae?"
- ¹⁸Olwa waawurra amang'ana gano ngawakawuuzia ekintu kindi kandi, ni waatondowola Katonda ni wawoola watino, "Awiifu kane kuwonekana mbwe Katonda amiire oku-aa namba awatari Awayaudi iwaga eria okugaluka okuema ku amawi gaawu kugere watuukre owulamu owutariwua."

Ekaniisa eya ku omugizi ogwa Antioki

- ¹⁹Nikulondokana ne eminyako-nyaako egia awatumwa waatuukra olwa Stefaano yaitwa, awantu awaawanga ni waganyire ku eriina eria Yesu waatanyika waagia mu ewialo ewigawuke-gawuuke. Awandi ku iwo waagia Foeniisia, awandi waagia

Saipraasi na awandi waagia Antioki. Mu ewialo ewia waagiamo ewio Awayaudi weng'ene niwo awa waalanzizia amang'ana aga Katonda.

²⁰Kukawa kutio, awandi ku iwo awaaemanga mu emigizi egia Saipraasi ni Kureene, waagia Antioki kandi watanika okulanzizia Awagiriiki amang'ana aga Omwami Yesu.

²¹Amaani aga Katonda gaawanga nawo kandi kino kiagera awantu awangi waganya okulonda Omwami Yesu.

²²Olwa amang'ana gano gaatuuka ku ekaniisa eya Yerusaleemu, awatumwa waatuma Baranabaasi okugia okuwona ekiaikolanga eyo.

²³Olwa yatuuka kandi awona ewintu ewilootu ewiaikola ku owusiza owua Katonda, yasangaala ino. Kutio yawa-ambia amaani na awasikirra mbwe wagie emberu okuwa no okuganya kandi wakole emirimo egia Omwami ne emioyo giawu giona.

²⁴Baranabaasi yawanga omuntu omulootu ori no okuganya okungi kandi oizuziwwue no Omwoyo Omweru. Kandi awantu awangi waawa no okuganya ku Omwami Yesu.

²⁵Nikuemao Baranabaasi yagia Taaso okuagala Saulo.

²⁶Olwa yamutuukra yamureeta Antioki aa waaweera nae ku omwaka omulala ni wagerera awantu awangi ino mu ekaniisa eyo amang'ana aga Katonda. Antioki ano nio awalonzi awa Yesu waasooka okuetrwa mbwe Awakristo.

²⁷Mu amiire ago awagambi wandi awa Katonda waaema Yerusaleemu waaza Antioki.

²⁸Omulala ku awagambi awa Katonda owaetwanga mbwe Agaabo, ku amaani aga Omwoyo Omweru ogwa Katonda, yagamba mbwe enzala yaazanga okuamba ekialo kiona ekia owuami owua Awaruumi. (Enzala eno yawaa mu amiire aga owuami owua Omwami Klaudiasi.)

²⁹Kutio awalonzi awa Yesu woona waaganyana aweene okutunzia awiina waawu awaawanga ni wamenyere Yudeea nikulondokana no owunyazi owua omuntu ki omuntu yawanga nawuo.

³⁰Waakola watio ni kuwitra ku Baranabaasi ni Saulo, awa wa-aa ewintu ewio okuirra awagaaka awaawanga ni wakangatiire Awakristo awa Yudeea.

Awatumwa 12

Awakristo wawona eminyako-nyaako emizito

¹Mu amiire gano, Omwami Eroode Agiriipa yatanika okuamba kandi okunyaasia awantu awari no okuganya ku Yesu wululu.

²Ni iye owasikirra awantu waae okuita Yakoobo wamwawu Yowaana no omwambe.

³Olwa yawona mbwe okufwa okwa Yakoobo kwasangaazia Awayaudi, yagia emberu a-amba Petro. Kino kiaikola mu amiire aga omugomo ogwa okuria omukaati no owusie owuwulamo amamera.

⁴Olwa waamala okuamba Petro, waamuta mu owusiwe mu amakono aga awarinzi ikumi ni mukaaga, awaamurindanga wane-wane nawuno owuire owua Pasaaka wuwue nikwo afumiwue airwe emberu wa awantu okugia okukengerwa ekiina.

⁵Kutio Petro yateewua mu owusiwe. Ni yawanga muni, Awakristo waamusawira Katonda ino.

Petro afumre mu owusiwe

⁶Owuire owua ekiina ekia Petro kiawanga ni kigoneere mbwe enkiro kirikengwa, Petro yawanga na agona agati ya awarinzi wawiri na asiwirwe amakono ne eminyororo iwiri kandi awarinzi wandi ni waemereere mu ekiriango.

⁷Kwaizukira ne enyankoi owa Katonda aimeriire ampi ni Petro kandi owueru wuawa mu enyumba eya owusiwe. Enyankoi yakuba-kuba iwega eria Petro na amulamusia otino, "Petro ema!" Ao ao, eminyororo giaema mu amakono aga Petro gigwa ansi.

⁸Enyankoi yamulaga otino, "Ingizia enguwo ziao ne ewiraato wiao." Ni Petro yamala okukola otio, enyankoi kandi yamulaga otino, "Ingizia enguwo yao eya kungulu ondonde."

⁹Petro yamulonda ni wafuma mu owusiwe. Kukawa kutio ngakawanga na amanyire mbwe ekiaikolanga ekio kiaikolanga kuwue. Iye yaingirizianga mbwe aloota, nakuwa awona owusasuko.

¹⁰Olwa waamala okuwita ku awarinzi awa emberu na awalondako, waatuuka mu ekikulo ekinene ekia ekiuma eki-ingira mu omugizi ogwa Yerusaleemu. Ekikulo ekio kiaigukao ekiene kandi waakiwitako ni wagia. Ku engira ni wagia, Petro yaizukira ne enyankoi amiire okumureka.

¹¹Ao nio Petro yamanyira ekimuikoriire. Kandi yawoola otino, "Nyingeeno katio manyire geeza mbwe ni kuwue, mbwe Omwami atumire enyankoi okuza okumfumia mu amakono aga Eroode ni ku ewintu wiona ewia Awayaudi wagiilenga okunkorra."

¹²Olwa yamala okumanya owueru owua ekintu ekiaikola ekio, yagia mu enyumba eya Maaria ng'inwawu Yowaana. Yowaana oyo yaetwanga ne eriina rindi mbwe Mariiko. Awantu waawanga ni waikumiiizie omwo kandi waasawanga Katonda.

¹³Petro yakong'oota ekiriango ekia enze na agala mbwe aigurrweo. Omwala owemirimo oetwa mbwe Rooda yaaza okumuigurra ekiriango.

¹⁴Olwa yaria omwoyo ogwa Petro yawa no owusangaavu ino kugera asomoka na airana na ataiguuleo ekiriango, kandi agia alaga awantu wandi awaawanga mu enyumba omwo mbwe Petro nio ori enze ku ekiriango.

¹⁵Awantu awo waamuirania watino, “Thuu! Omwala ono kane ilalu rikuambre! Omwala ono omutwe gwae muwiiwi.” Ni iye yagia emberu na awalaga otino, “Yaaya ng’ambasemerezia, ni mbalaga kuwuene.” Waamulaga watino, “Andi oyo ne enyankoi waae.”

¹⁶Ni Petro iye yagianga emberu okukong’oota ekiriango. Waaigulao watuukra mbwe kuwuene ni iye kandi waawa no okuluguula ino.

¹⁷Iye yawasarigizia no okukono kwae mbwe wasarigire, nikwo yawalaga geeza kiomo Omwami Katonda amufumiizie mu owusiwe. Yawalaga mbwe, “Amang’ana gano mugalage Yakoobo na awiina wiifu wandi wona.” Nikuemao yafuma ao agia asi andi.

¹⁸Olwa owuire wuakia, awarinzi waakuba eno ne eno watuukra mbwe Petro awulao. Ekintu ekio kiawa-amba eminwa aa awulao owaesanga okuwoola aa ari ne ekimuikoriire.

¹⁹Eroode yafumia amang’ana mbwe Petro aagalwe. Olwa waamuagala wareka okumutuukra, Eroode yaeta awarinzi waria mbwe wawoole kiomo awateekereko. Nikuemao, yafumia ensikirra mbwe waitwe. Olwa Eroode yamala okukola otio yafuma aema Yudeea agia akola okuweera Kaisaria.

Okufwa okwa Eroode

²⁰Eroode yawanga ni iye na awantu awa Taaya ni Sidooni. Na awantu awa ewialo wino waatuukranga okuria kwawu okuema mu ekialo ekia Omwami Eroode. Kuno kwagera watuma awandi ku iwo wagie walonge empurizanio nae. Awantu wano waagia wagamba-gamba ni Blasto owaawanga omukozi owemirimo omunene omwa Eroode, awa nyaluwega lwawu nikwo wagia ku Eroode.

²¹Olwa owuire owulowole wuatuuka, Omwami Eroode yaiwoya enguwo ziae ezia owuami aikala ku entewe eya owuami atanika okugamba-gambra awantu.

²²Awantu waatanika okuogerera watino, “Oyo ni katonda nio ogamba-gamba, ng’ano omuntu yaaya!”

²³Ao ao, enyankoi owa Omwami Katonda yakuba Omwami Eroode ansi aeniki Eroode yaganya na awantu wamueta Omwami Katonda. Yariiwua ne enyende afwa.

²⁴Na amang’ana aga Katonda gaagia emberu okuilanzia kandi gaakoma.

²⁵Olwa Baranabaasi ni Saulo waamala emirimo giawu, waema Yerusaleemu wairana Antioki. Waatoola Yowaana, owa eriina riae erindi riaetwanga mbwe Mariiko, waaza nae.

Awatumwa 13

Baranabaasi ni Saulo walowoolwe okugia okulanzia amang'ana aga Yesu

¹Awagambi awa Katonda na awagerezi waawanga mu ekaniisa eya Antioki. Waawanga Baranabaasi, Simoni owaetwanga mbwe omuntu omumwamu, Lukiio owaemanga Kureene, Manea owakoma alala no Omwami Eroode, ni Saulo.

²Ni waawanga ni wasawa Katonda ni wasiwa aa wataria okuria, Omwoyo Omweru yawalaga otino, "Munteere Baranabaasi ni Saulo entulo, okuuzza okukola emirimo egiagera ni mbaeta."

³Kutio olwa waamala okusiwa ni wasawa, awagambi awa Katonda na awagerezi wano waawataako amakono, nikuemao waawatuma okugia okulanzia amang'ana aga Katonda.

Baranabaasi ni Saulo waagaane no omulaguzi

⁴Kiomo Baranabaasi ni Saulo waatumwa no Omwoyo Omweru ogwa Katonda, nintio waafuma waika Seluukia, nikuemao waunguka wagia ku izinga eria Saipraasi.

⁵Olwa waatuuka Salamiisi, waalanzia amang'ana aga Katonda mu amasinagoogi aga Awayaudi. Yowaana owa eriina riae rindi riaetwanga mbwe Mariiko yawanga nawo na awatunzia mu emirimo.

⁶Waagenda-genda mu ekizinga ekia Kureene kiona nawuno watuuka Paafo aa waatuukra Omuyaudi omulaguzi oetwa mbwe Bar Yesu owawanga omugambi owa owuweeyi.

⁷Yawanga omwiko owa Sergio Paulo owawanga omukangasi owa ekizinga ekio kandi omuntu omuganga ino. Omukangasi ono yaeta Baranabaasi ni Saulo mbwe wamugieko aeniki yagalanga okuwurra amang'ana aga Katonda.

⁸No omulaguzi ono owaetwanga mu Olugiriiki mbwe Eluuma yalwiania amang'ana gaawu kandi yaagalanga okugalusia okuganya okwa omukangasi mbwe ataganye awe Omukristo.

⁹Na aizuziwwue no Omwoyo Omweru ogwa Katonda, Saulo owa eriina riae rindi riaetwanga mbwe Paulo yamuwarra mu amiiso tiiri,

¹⁰amulaga otino, "Iwue omuntu owa Ekikeeno ono! Iwue ori omuzigu owa ekintu-ukintu ekilootu ekiikola. Oizuule ne engira ziona ezia okusemerezia awantu kandi enyinga ziona ogeezaania okugalusia ewintu ewia Katonda ewiri kuwue ne okuwa ewia owuweeyi!

¹¹Wurra, nyingeeno amaani aga Katonda gaaza okukugwako. Ooza okuwa omuwuunu ku amiire kandi ngooza okuwona owueru owua enyanga." Ao ao, Eluuma yawona ifu imwamu ti ni risanikizia amiiso gae kandi yatanika okuagala omuntu okamuamba okukono na agenda-genda.

¹²Olwa omukangasi ono yawona ekiaikola kino yaluguula ino kutio yawa no okuganya ku amang’ana aga Yesu.

Paulo ni Baranabaasi watuukre Antioki mu ekialo ekia Pisiidia

¹³Paulo na awiina waae waaema Paafo waunguka wagia ku omugizi ogwa Peega mu ekialo ekia Pamfiilia. Ni Yowaana, owa eriina riae rindi riaetwanga mbwe Mariiko, iye yawareka airana Yerusaleemu.

¹⁴Nikuemao, waaema Peega wagia ku omugizi ogwa Antioki mu ekialo ekia Pisiidia. Olwa owuire owua Sabato wuatuuka, waagia waingira mu esinagoogi wagia waikala ansi.

¹⁵Olwa waamala okusoma amang’ana agaajojwa mu ensikirra eya Muusa kandi na amang’ana agaajojwa na awagambi awa Katonda, awakangasi awa Sinagoogi waawatumra omutumwa oguwoola gutino, “Waamwifu, tusawa mbwe ni muri na amang’ana aga okuambia awantu amaani, mueme mugambe-gambe na awantu!”

¹⁶Kutio Paulo yaema asooka awasarigizia na amakono nikwo atanika okugambagamba nawo otino, “Awaisraeli awiina wange na awatari Awayaudi awasawa Katonda awari ano, musarigire muwurre ekia mbalaga!

¹⁷Katonda owa awantu Awaisraeli wano yalowola waaguukwa wiifu kandi awata wawa awantu awatiirwe mu amiire aga waawanga ni wamenyere ki awageni mu ekialo ekia Misiri. Katonda yawafumia Misiri na amaani gae

¹⁸kandi awa nawo mu ekeewa na awarinda ku emiaka amakumi ane.

¹⁹Katonda yavuna enganda musamvu mu ekialo ekia Kanaani nikuemao ataa awantu waae wano okuwa aweene ekialo ekio ku emiaka mia wine na amakumi ataanu.

²⁰Nikuemao, Katonda yawa-aa awakengi awa ekiina wawakangatre, kandi waawaaao kutuuka ku Samweli omugambi owa Katonda.

²¹Lunyima olwa awantu waasawa mbwe wagala omwami, Katonda yawa-aa Saulo omuzia owa Kiisi owaema mu ekiriango ekia Benjamiini okuwa omwami ku emiaka amakumi ane.

²²Katonda yatoolao Saulo ku entewe, ataa Daudi. Daudi ono nio owa Katonda yagamba-gambako na awoola otino, ‘Miire okutuukra Daudi omuzia owa Yese omuntu owa omwoyo gwange gugonziizie kandi ooza okukola wiona ewia nyagala mbwe ankorre.’

²³Yesu omuizukulu owa Daudi nio owa Katonda yata awa Omununuzi owa Awaisraeli kiomo yawanga na amiire okuifuuwa mbwe aaza okukola.

²⁴Ni Yesu yawanga na akiari okutanika okulanzia amang’ana aga Katonda, Yowaana yalanzizia Awaisraeli owubatiiso owua okugaluka okureka amawi.

²⁵Kandi ni Yowaana yawanga na ari ampi okumala emirimo giae, yalaga awantu otino, ‘Inywe muingirizia mbwe ni inze anu? Inze ng’andi omuntu owa murindirra, yaaya. Muwurre! Iye aaza enyima wange kandi ng’ansugaane nsiwule namba engoe ezia ewiraato wiae.’

²⁶“Waamwifu, awiizukulu awa Abraamu na awantu woona awatari Awayaudi awari ano awasawa Katonda, ni ifwe awaatumirwa amang’ana aga owuinunuzi gano!

²⁷Awantu awa Yerusaleemu na awakangasi waawu ngawakamanya mbwe Yesu nio Omununuzi, kandi okumulowa okwa waamulowa okwo kwatuusianga amang’ana aga awagambi awa Katonda agasomwa Sabato ki Sabato.

²⁸Kukawa mbwe ngawakatuukra owuoni ku Yesu owuasugananga no olumbe, waasawa Pilaato mbwe aganye Yesu aitwe.

²⁹Olwa waamala okukola ewintu wiona ewiajojwa ku okufwa kwae, waamutoola ku omusalaaba wamuisia ansi wamuta mu owuina.

³⁰Ni Katonda yamuziusia okuema ku awafu

³¹kandi yafumira awantu awaagenda-gendanga nae okuemera Galiili na agia Yerusaleemu ni wamuwona ku amiire amangi. Awantu awo niwo nyingeeno walaga Awaisraeli amang’ana gae.

³²“Nyingeeno tuwareetiire ano amang’ana amayia amalootu aga Katonda yaifuuwira waaguukwa wiifu mbwe aaza okukola,

³³aga amiire okutuusia ku ifwe awiizukulu waawu; olwa yaziusia Yesu awa omulamu. Kuno kuri kiomo kwajojwa mu ebuuki eya Zaburi iwiri ewoola mbwe, ‘Ori omuzia wange; miire okuwa Swao reero!’

³⁴Amang’ana aga Katonda yawoola ku okuziuka kwae okuema ku awafu kandi mbwe omuwiri gwae ngaguriwola, gawoola mbwe, ‘Nyiza okukusereka no okusereka okweru kandi okuri kuwene okwa nyaifuuwira Daudi.’

³⁵Lwona kwajojwa asi andi oona mbwe, ‘Ngoriganya omukurumu waa omweru omuwiri gwae guwole.’

³⁶Owa Katonda yagamba-gambako ngakawanga Daudi aeniki Daudi iye olwa yamala okukola emirimo egia Katonda mu amiire gae, yaemao afwa kandi aawirwa ampi ni aa waaguukwa wae wa-awirwa, kandi omuwiri gwae gwawola.

³⁷No omuntu owa Katonda yaziusia atoola ku awafu ono, iye omuwiri gwae ngagukawola.

³⁸⁻³⁹Kutio waamwifu, mwona nyagala mumanye kuwene mbwe ni kuwitra ku Yesu ono, reero mulanziziwua amang’ana aga okurekerwa amawi giinyu. Kandi musugaane mumanye mbwe ni kuwitra ku Yesu, omuntu-umuntu ori no

okuganya ku iye awa ne empurizanio ni Katonda, ekintu ekia endagirra ezia Muusa ngazikaesanga okukola.

⁴⁰Kutio muwarre muwone mbwe ewintu ewia awagambi awa Katonda waawoola witaaza wiawiikorra. Waawoola watino:

⁴¹'Muwone, inywe awantu awa ekiregerezia wano! Mutang'ang'e kandi mufwe muemeo. Aeniki ekintu ekia nyiza okukola mu amiire giinyu ne ekintu ekia mutaaza okuganya namba no omuntu awakilagre geeza!'

⁴²Olwa Paulo ni Baranabaasi waafumanga ni wagia ni wamiire okumala, awantu awo waawasawa kandi mbwe wairane olwa Sabato eeza wasonge kandi okuwagamba-gambra ku amang'ana ago.

⁴³Awantu ni waatanyikanga ni waema mu esinagoogi, Awayaudi awangi na awantu awatari Awayaudi awaalondanga enkola eya Awayaudi waatanika okulonda Paulo ni Baranabaasi. Paulo ni Baranabaasi waagamba-gamba nawo kandi waawiyemba mbwe wagie emberu okumenya mu owusiza owua Katonda.

⁴⁴Olwa owuire owua Sabato owulondako wuatuuka, ampi awantu wona awa ku omugizi ogwo waawuera ao okuwurra amang'ana aga Katonda.

⁴⁵Olwa Awayaudi waawona kiomo awantu awangi waaza mu esinagoogi, iyari riawa-amba watanika okugamba-gamba uwiiwi ku amang'ana aga Paulo yawoola kandi ni wamunyega.

⁴⁶Ni Paulo ni Baranabaasi nikwo waagamba-gamba no owusiani ni wawalaga watino, "Inywe ni inywe awatusugaane tusooke okulanzizia amang'ana amalootu aga Katonda. Ni aeniki mugalowa, muilagana mbwe inywe ngamusugre okutuukra owulamu owutariwua. Kutio, nyingeeno katio tugairra awantu awatari Awayaudi.

⁴⁷Aeniki eno nio ensikirra eya Katonda yatusikiriire, 'Nkutumre mbwe ogie owe owueru ku awantu awatari Awayaudi, kugere oire amang'ana aga owuinunuzi mu ekialo kiona.'

⁴⁸Olwa awantu awatari Awayaudi waawurra amang'ana ago, waaingizia amang'ana aga Katonda no owuti kandi no owusangaavu. Kandi awantu wona awaalloworrwa owulamu owutariwua waawa no okuganya ku amang'ana aga Yesu.

⁴⁹Kutio amang'ana amalootu aga Katonda gaailanzia mu ekialo ekio kiona.

⁵⁰Na Awayaudi waatanika okusiigania awakazi awatari Awayaudi awanene-nene kandi awatiirwe awaawanga ni watiire Katonda, alala na awasaaza awaawanga ni wakangatiire omugizi ogwo, watanika okukorra waawu Paulo ni Baranabaasi ewintu ewiwiwi kandi wawasomosa mu ekitemo kiawu.

⁵¹Kutio Paulo ni Baranabaasi waakukumula egunduusi eya ku amagulu gaawu ni wafuma ao. Waaema ao wagia nawuno watuuka Ikoonia.

⁵²Awakristo awaawanga Antioki waawanga no owusangaavu kandi waaizuziwua no Omwoyo Omweru ogwa Katonda.

Awatumwa 14

Paulo ni Baranabaasi walanzia amang’ana aga Katonda Ikoonia

¹Ewia Paulo ni Baranabaasi waakola Antioki, niwio ewia waakola Ikoonia. Waaingira mu esinagoogi eya Awayaudi, watanika okugamba-gambra awantu ku amang’ana amalootu aga Katonda nawuno Awayaudi awangi na awatari Awayaudi wona awangi wawa no okuganya ku Yesu Kristo.

²Na Awayaudi awaalowa okuwa no okuganya ku Yesu Kristo waaona emioyo egia awantu awatari Awayaudi kandi wawasigania ni Paulo ni Baranabaasi.

³Kukawa kutio, awatumwa waawa ao ku amiire amangi ni wagamba-gamba ku amang’ana aga Omwami Yesu ni wari no owusiani. Kandi Katonda yawa-aa amaani aga okukola amankono ne ewintu ewiluguulwa. Yakola otio okulagana mbwe amang’ana aga owusiza wuae aga waalanzia gaawanga kuwue.

⁴Awantu awa ku omugizi ogwo waagawukana. Awandi waaizogaania na Awayaudi na awandi wawa nyaluwega olwa awatumwa awa Yesu.

⁵Awayaudi na awatari Awayaudi, alala na awakangasi waawu, waawurizania okunyaasia kandi okukuba awatumwa awa Yesu na amawaale.

⁶Olwa awatumwa waamanya amang’ana ago, waasomoka waaema ao wagia Lustra ni Deebe, emigizi egiri mu ekitemo ekia Lukaonia alala ne ewialo ewia ampi ao.

⁷Kandi waalanzia amang’ana amalootu aga Yesu mu ewialo ewia ao.

Paulo ni Baranabaasi walamiizie omuntu Lustra

⁸Yawangao omuntu owawanga na amenyere ku omugizi ogwa Lustra owawanga omurema. Yaremera okuamera mu okuiwulwa kwae kandi yawanga na akiari okugenda-genda okuema ri.

⁹Omuntu ono yatega amatwi okuwurra amang’ana aga Paulo yalanzianga. Olwa Paulo yamuwona, yamuwarra mu amiiso tiiri mala amuwona na ari no okuganya okusugre alamiwue.

¹⁰Nikuemao, yamulaga no omwoyo ogwa kungulu otino, “Ema kungulu!” Omuntu oyo yaema kalala atanika okugenda-genda enyinga ezio.

¹¹Olwa awantu waawona ekintu ekia Paulo yakola ekio, waatanika okugamba-gamba ne emioyo egia kungulu mu omunwa gwawu mbwe, “Awiifu katonda zituuziire mu embonekano eya awantu!”

¹²Waaluka Baranabaasi mbwe Zeeu ni Paulo owawanga omugambi omunene waumuluka mbwe Emeesi.

¹³Omuozia owa Zeeu katonda, owa ekaalu yaae yaombokwa enze eya omugizi ogwo yareeta amaiiri aga eng'ombe na amauwa mu ekikulo, okukorra awatumwa wano omusango.

¹⁴No olwa Paulo ni Baranabaasi waamanya ekia awantu awo waagalanga okukola ekio, waatandula enguwo ziauwu wasomoka ni wawagiako ni wakuba erioga ni wawagaania wukalu watino,

¹⁵“Awiifu awantu wano, muagala okukolaki kino? Mberi mumanyire mbwe ifwe twona turi mala awantu ki inywe? Ifwe tuwaretiire-ureetra amang'ana amalootu aga Katonda, agawalaga mbwe musugaane mugaluke mureke enkola ziinyu eziwula ne emirimo zino. Musawe Katonda owaluka ekialo ni igulu ne enyanza ne ewintu wiona ewirimo.

¹⁶Mu amakula agaawita, yaganyira awantu okulonda engira ziauwu aweene.

¹⁷Namba ni kwawa kutio, iye yailagana ku inywe mbwe ario, ni kuwitira ku ewintu ewia yawakorra kimo okuwa-aa emvula okuemera ku igulu kandi ne emere elawa mu enyinga endootu. Awa-aa okuria kandi aizuzia emioyo giinyu no owusangaavu.”

¹⁸Kukawa mbwe awatumwa waawagaania otio, ngakukaweera awantu wano owuwuwu okureka okuwakorra omusango.

¹⁹Nikuemao Awayaudi wandi waaema Antioki na awandi waaema Ikoonia, wawuwa awantu wawatoola ku awatumwa. Waakuba Paulo na amawaale nikuemao wamukulula wamufumia enze eya omugizi ni waingirizia mbwe afwire.

²⁰No olwa Awakristo waamuikumiako, yaema kungulu airana nawo ku omugizi. Enkio walwo, Paulo ni Baranabaasi waema ao wagia Deebe.

Paulo ni Baranabaasi wairaane Antioki mu ekialo ekia Siiria

²¹Olwa Paulo ni Baranabaasi waamala okulanzia amang'ana aga Katonda mu omugizi ogwa Deebe kandi wagalusia awantu awangi wawa awalonzi awa Yesu, waafuma ao wagia. Ni waaema ao, waairana Lustra nikwo wagia Ikoonia kandi wagia Antioki mu ekialo ekia Pisiidia.

²²Wa-ambia Awakristo amaani ni wawalaga mbwe wagie emberu no okuwa no okuganya ku Yesu kandi okuganya okwa kuwene. Waawagerera watino, “Kugere tuingire mu Owuami owua Katonda, paka tuwite mu eminyako-nyaako emingi.”

²³Waalowola awakangasi mu ekaniisa ki ekaniisa. Olwa waamala okusiwa ni wasawa, waawata mu amakono aga Omwami Katonda owa waawanga ni waganyireko.

- ²⁴Waawita mu ekialo ekia Pisiidia, waagia Pamfilia.
- ²⁵Olwa waamala okulanzia amang'ana aga Katonda Peega waaika Ataalia.
- ²⁶Ao waatoola owuato waunguka ni wairana Antioki. Antioki ano nio waateewua mu amakono aga Katonda, warekwa mu owusiza wuae ku emirimo egia waamaarizianga gino.
- ²⁷Olwa waatuuka Antioki waakumia awantu awa mu ekaniisa woona kandi wawalaga ewintu wiona ewia Katonda akorre nawo kandi kiomo aiguriire awantu awatari Awayaudi engira eya okuwa no okuganya ku Yesu.
- ²⁸Waawa na awalonzi awa Yesu ao ku amiire amangi.

Awatumwa 15

Ngakunigirizia Awakristo awatari Awayaudi okulonda enkola ezia Awayaudi

- ¹Awayaudi wandi waaema Yudeea waaza Antioki watanika okugerera Awakristo awatari Awayaudi watino, “Ni mutairrwe enyangu kiomo endagirra eya Muusa eagala, ngamuesa okununulwa.”
- ²Olwa Paulo ni Baranabaasi waawurra engerera yaawu eyo, waagilowa kandi kino kiareeta olusoolo agati yaawu nawo. Kutio Paulo ni Baranabaasi waalowolwa alala na awalonzi wandi, watumwa wagia Yerusaleemu ku awatumwa na awagaaka awa Awakristo okuwawuuzia eking'ana kino.
- ³Na Awakristo waamala okuwata mu amakono aga Katonda, waawitra mu ewialo ewia Foeniisia ni Samaria. Ni waawitanga mu ewialo wino, waalaga awantu kiomo awatari Awayaudi wamiire okugaluka wawa Awakristo. Kino kiasangaazia Awakristo awiina waawu awaawurra amang'ana ago ino.
- ⁴Olwa waatuuka Yerusaleemu, Awakristo woona awari eyo na awatumwa alala na awagaaka waawu, waawaingizia kandi waawalaga ewintu ewia Katonda amiire okukola nawo.
- ⁵Awandi ku Awafarisaayo awaganyire ku Yesu waimerra wawoola watino, “Awatari Awayaudi awagala okuwa Awakristo kunigirizia mbwe paka wairwe enyangu kandi walagwe okukola kiomo endagirra eya Muusa eagala.”
- ⁶Awatumwa na awakangasi awa Awakristo waaikumia alala okutegerezia ing'ana erio.
- ⁷Ni waamala okugamba-gamba kuwungi, Petro yaimerra kandi awalaga otino, “Awiina wange, mumanyire mbwe kaleko wutono, Katonda yandowola ku inywe mbwe ndanzizie awatari Awayaudi amang'ana amalootu gano kugere wagawurre kandi waganye ku Yesu.
- ⁸Katonda omanyire emioyo giifu, ya-aa awantu wano Omwoyo Omweru, ekilago mbwe aganyire nawo mala kiomo yatukorra.

- ⁹Ngakagawula agati iifu nawo aeniki yawaeruyia emioyo ku okuganya ku Yesu kiomo twona yatukorra.
- ¹⁰Kutio ekigera ni muagala okugeezaania Katonda, ku oku-aa awalonzi wano emisigo emizito egia ifwe namba waaguukwa wiifu ngawakaesanga okuginga niki?
- ¹¹Yaaya! Tumanyire mbwe kiomo tununulwa ku owusiza owua Omwami Yesu nintio iwo woona wanunulwa.”
- ¹²Kutio awantu woona waasarigira kandi wawurra kiomo Katonda amiire okukorra awantu awatari Awayaudi amankono ne ewilago ni kuwitra ku Paulo ni Baranabaasi.
- ¹³Ni waamala okugamba-gamba, Yakoobo yaimerra awoola otino, “Muwurre!
- ¹⁴Simioni Petro amiire okutulaga kiomo Katonda ampi ano yalagana olugonzi lwae olwa yalowola awantu wandi ku awatari Awayaudi mbwe wawe awantu waae omwene.
- ¹⁵Kandi nintio amang’ana aga awagambi awa Katonda goona gawoola, kiomo kwajojwa mu endagano mbwe,
- ¹⁶“ ‘Ni kino kimiire okuikola, ndiriirana kandi ndiriimeerezia enyumba eya Daudi emiire okugwa. Ndiomboka asi-uasi agemuuke nawuno ngiimerezie kandi.
- ¹⁷Kugere awantu woona mu ekialo kiona wanyizeko namba awalowole wange awatari Awayaudi awa miire okueta okuwa awange.
- ¹⁸Omwami Katonda owawoola amang’ana gano kale, nio owoola otio.’ ”
- ¹⁹Yakoobo yagia emberu okuwoola mbwe, “Kutio inze mbona mbwe ngatusugaane tunyaasie awantu awatari Awayaudi awagalooke okuza ku Katonda mbwe walonde endagirra ziifu.
- ²⁰Ni tusugaane tuwajojere ebaruwa tuwalage mbwe wawe ale ne ewiokuria ewitari ewieru emberu wa Katonda ewifumiziiwue katonda ensaasa emisango, watasooda, wataria ewintu ewigogerwe wifwa, ni lwona watanywa amasaai.
- ²¹Ago gasugre aeniki okuemera kale endagirra ezia Muusa zimiire okuweerwako ni zisomwa amiire goona aga Sabato mu amasinagoogi. Kandi amang’ana gaae ago galanziwua mu emigizi giona.”
- ²²Nikuemao, awatumwa, awagaaka alala na Awakristo woona waawona mbwe walowole awantu wandi agati yaawu aweene kugere wawatume alala ni Baranabaasi ni Paulo ku Awakristo awiina waawu awari Antioki. Waatuma Yudaasi owaetwanga mbwe Baranabaasi alala ni Siila, awantu awa Awakristo waawanga ni waeere owuti ino.

- ²³Ebaruwa yajojwa etino: “Ku waamwifu Awakristo awatari Awayaudi awamenyere Antioki, Siiria ni Siliisia. Mutuukre amakeezio okuema ku ifwe waamwinyu ku Kristo, awagaaka alala na awatumwa.
- ²⁴Tumiire okuwurra kiomo awiina wiifu awandi wamiire okuuzza eyo kandi wawalaga amang’ana gandi agawanyaasia emioyo. Ifwe ngatukawatuma, yaaya.
- ²⁵Kutio twona tuwuine mbwe tulowole awantu wandi ku ifwe kugere tuwatume ku inywe na awiiko wiifu Paulo ni Baranabaasi,
- ²⁶awamiire okuganya okufwira eriina eria Omwami Yesu Kristo.
- ²⁷Kutio tutumire Yudaasi ni Siila awaaza okuwalaga ne eminwa giawu aweene ekia tuwajojeere mu ebaruwa eyo.
- ²⁸Tuagala mumanye mbwe okuagala kwifu no okuagala okwa Omwoyo Omweru ogwa Katonda kuri mbwe ngatusugaane tuwanyasie okulonda endagirra ziifu ziona, ni
- ²⁹mutaria okuria okukoriirwe katonda ensaasa emisango, mutanywa amasaai namba okuria ewintu ewigogerwe wifwa. Lwona mutasooda. Ni muirindre ku ewintu ewio, muuza okugia emberi geeza. Ewarinde.”
- ³⁰Kutio, olwa awatumwa awo waamala okuwakubra ekurinde, waafuma wagia Antioki aa waaeta awantu wona awaganyire ku Katonda waikumia alala. Nikuema waawa-aa ebaruwa eya waaewua mbwe wawairre.
- ³¹Ni waamala okugisoma, waasangaala ino ku amaani aga waawa-ambia.
- ³²Yudaasi ni Siila awaawanga awagambi awa Katonda, waawagamba-gambra ni wawa-ambia amaani ku amang’ana amangi.
- ³³Ni Yudaasi ni Siila waamala okuweera eyo ku emidiira egisugre, awiina waawu awo waawasewula wairane no owuolu ku awaawatuma.
- ³⁴[Ni Siila iye yakenga okusigala eyo.]
- ³⁵Ni Baranabaasi yasigala ni Paulo Antioki aa iwo na awantu wandi awangi waalanzia kandi waagerera amang’ana aga Katonda.

Paulo ni Baranabaasi wagawukaane

- ³⁶Lunyima na amiire gandi gaawanga ni gamiire okuwita, Paulo yalaga Baranabaasi otino, “Tuirane mu emigizi giona egia twamiire okulanziamo amang’ana aga Katonda, kugere tugie tuwone kiomo wagia.”
- ³⁷Baranabaasi yaagalanga mbwe wagie ni Yowaana, oetwa ne eriina rindi mbwe Mariiko,
- ³⁸ni Paulo ngakaganya no okuagala kwae okwo aeniki Yowaana yawanga na awareekere mu ekialo ekia Pamfilia, airana ni wakiari okumala emirimo giawu.

³⁹Ekio kiagera Paulo wagalusania amang’ana ni Baranabaasi wukalu ino. Owutuukre waagawukana. Baranabaasi yatoola Mariiko wa-ambuka wagia mu ekialo ekia Saipraasi.

⁴⁰Paulo iye yatoola Siila, wafuma ni wagia olwa waamala okuteewua mu amakono aga Katonda na awiina waawu.

⁴¹Yagenda-genda mu ekialo ekia Siiria ne ekialo ekia Siliisia na alanzia amang’ana amalootu kandi na a-ambia awantu wona awaganyire ku Yesu Kristo amaani.

Awatumwa 16

Timotheo agia ni Paulo ni Siila

¹Paulo ni Siila waagia ku omugizi oguetwa mbwe Deebe, nikuemao agia paka Lustra aa yatuukra omulonzi wundi oetwa mbwe Timotheo owa ng’inwae yawanga Omuyaudi oganyiire ku Kristo, ni swae yawanga Omugiriiki.

²Awakristo awiina waae awa ku emigizi egia Ikoonia ni Lustra waagambanga geeza ku Timotheo.

³Paulo yaagalanga mbwe Timotheo agie nae, kutio yamaira enyangu aeniki Awayaudi awaawanga ni wamenyere ampi ao waawanga ni wamanyire mbwe swawu Timotheo yawanga Omugiriiki.

⁴Ni waagenda-gendanga, waalaga Awakristo awa mu emigizi giona egia waawitamo ewintu ewia awatumwa na awakangasi awari Yerusaleemu waawisia kugere wona wawilonde.

⁵Kutio, awantu awa mu amakaniisa waasonga okuwa na amaani mu okuganya kwawu kandi waisonga okuwa awangi owuire ki owuire.

Owusasuko owua Paulo yawona Troowa

⁶Paulo na awiina waae wano waagenda-genda mu ewitemo wiona ewia Firiigia ni Galatia ni walanzia amang’ana amalootu aga Katonda, aeniki Omwoyo Omweru ogwa Katonda yawagaania mbwe watalanzia amang’ana amalootu ago Eesia.

⁷Olwa waatuuka ku oluwuwi olwa Miisia ni Bitiinia, waagalanga okuingira Bitiinia, no Omwoyo Omweru ogwa Yesu yawagaania.

⁸Kutio waawitra mu ekialo ekia Miisia waika ku omugizi ogwa Troowa.

⁹Owuire ni wagona, Paulo yawona mu owusasuko no Omumakedoonia amuisasaama na amulaga otino, “Iza Makedoonia eno otutunzie.”

¹⁰Ni Paulo yamala okuwona owusasuko owuo wutino, twakenga mbwe tufume kalala tugie Makedoonia ni tumanyire mbwe Katonda nio owawanga na atueta mbwe tugie tulanzizie awantu awo amang’ana gaae amalootu.

Luudia aganyire ku Kristo

¹¹Twaema Troowa tuwunguka tugia Samotraake. Enkio walwo twa-ambuka tugia Neapooli.

¹²Nikuemao twagenda-genda na amagulu nawuno twatuuka Filiipi, omugizi omunene ogwa Makedoonia ogwawanga omugizi ogwa Awaruumi. Twawao ku amiire agasugre.

¹³Olwa owuire owua Sabato wuatuuka, twafuma enze eya omugizi ogwo, tugia ampi no oluuzi aa twaingirizianga okutuukra asi aa awantu waasawanga. Twatuukra awakazi wandi ni waikumiiizie ao ni wasawa, kutio twona twaikala asi tutanika okugamba-gamba nawo.

¹⁴Omulala ku awakazi awo yaetwanga mbwe Luudia. Omukazi ono yawanga na aemere asi aetwa mbwe Thiatiira. Yawanga omuntu otiire Katonda kandi yawanga na akuba amaara aga enguwo ezia ebeeri eri kungulu ino. Katonda yaingira mu omwoyo gwae okwagera ategerezia kandi aingizia amang'ana goona aga Paulo yawoola.

¹⁵Olwa iye alala na awantu awa mu enyumba yaae waamala okubatiiswa, yatueta mu enyumba yaae na awoola otino, “Ni muwona mbwe kuwene noona ndi no okuganya ku Yesu, kane mutugie omwange muwe awageni wange.” Kutio ku amang'ana ago yagera tugia omwae.

Paulo ni Siila wateerwe mu owusiwe Filiipi

¹⁶Owuire wulala ni tuagianga asi aa okusawa, twa-agaana omwala owemirimo omugule owawanga ne emisambwa egia okulagula awantu. Kandi kuno kwareetranga awaamugula emfuno enyingi ino aeniki yalagulanga awantu na awalaga ewintu ewiazanga okuwiikorra ni wamuoloola.

¹⁷Omwala ono yalonda Paulo alala ni ifwe na aogerera otino, “Awantu wano na awakurumu awa Katonda omwene omwene owa ku igulu. Wawalanzizia kiomo muesa okutuukra owuinunuzi.”

¹⁸Yagia emberu na akola otio ku amiire amangi nawuno enda eya Paulo yagia eyia ne ekikeeno ekio, agaluka akilaga kitino, “Ku eriina eria Yesu Kristo, nkusikirra mbwe fuma ku omwala oyo!” Kandi ekikeeno ekio kiafuma ku omwala oyo kalala.

¹⁹No olwa awantu awaagula omwala ono waawona mbwe engira yaawu eya okutuukra amasendi eoneeke, wa-amba Paulo ni Siila wawakulula wawaira mu olwanyu olwa omugizi ku awakangasi.

²⁰Waawareeta emberu wa awakengi awa ekiina, wawaingirra watino, “Wano na Awayaudi. Wamiire okureeta erioga eringi mu omugizi gwifu guno.

²¹Waona awantu wuona ni wawagerera enkola ezia ifwe Awaruumi endagirra ziifu ngazituganyire okulonda namba okukola.”

- ²² Omurima ogwawanga ao gwaizogaana na awantu wano okuingirra Paulo ni Siila, kutio awakengi awa ekiina waawatandulako enguwo kandi wasikirra mbwe waswawukwe enkowa.
- ²³ Ni waamala okuswawukwa ino, waawarigiza mu owusiwe kandi omurinzi yasikirra mbwe awawarre ino watafuma.
- ²⁴ Olwa omurinzi yawurra amang'ana ago, yawatoola awata mu akayumba aka muni mu enyumba eya owusiwe, mala atoola amagulu gaawu asiwa ku ewisiki ewia okusiwa awasiwe.
- ²⁵ Owuire agati, ni Paulo ni Siila waasawanga kandi ni waemba enyembo ezia okutondowola Katonda, na awasiwe awiina waawu na wasarigiire wawategerezia,
- ²⁶ waizuikra ne ekialo kizegera kalala wukalu aa owulusa owua enyumba eya owusiwe wuona wuazegera. Mu enyinga ezio, ewiriango ewia enyumba eya owusiwe wiaiguka namba ewiuma ewia waawanga ni wasiwirwe nawio wiasiwuka.
- ²⁷ Olwa omurinzi ya-azamuka mu endoolo atuukra mbwe ewiriango wiiguuke, yaingirizia mbwe awasiwe wafumre, kutio yazomola omwambe kugere aifumute afwe.
- ²⁸ Ni Paulo yaogerera wukalu na awoola otino, "Yawa! Otaaza waona owulamu wuao wusaasa. Turiano twona."
- ²⁹ Omurinzi oyo yaeterezia mbwe ewimuri wireetwe. Yasomoka aingira mu owusiwe muni agia agwa ansi mu amagulu aga Paulo ni Siila na adada no owuti.
- ³⁰ Nikuema yawafumia enze awawuuzia otino, "Awakangasi, nkoleki kugere ntukre owuinunuzi?"
- ³¹ Waamuirania watino, "Ganya ku Omwami Yesu Kristo kugere onunulwe iwue na awa mu enyumba yaa woona."
- ³² Kutio Paulo ni Siila waagerera omurinzi oyo na awantu awa mu enyumba yaa woona amang'ana aga Katonda.
- ³³ Mu enyinga ezia owuire ezio omurinzi oyo yatoola Paulo ni Siila, agia awaozizia ewisonga ewiawanga ku emiwiri giawu, nikwo iye alala na awa mu enyumba yaa waabatiiswa.
- ³⁴ Nikuema yawatoola agia nawo omwae awiikazizia okuria emberu waawu mbwe warie. Iye na awa mu enyumba yaa waawa no owusangaavu ino ku okuwa mbwe waganyire ku Katonda.
- ³⁵ Olwa owuire wuakia, awakengi awa ekiina waatumra omurinzi owa owusiwe omulangra okumulaga otino, "Reka awantu awo wagie."

³⁶Omurinzi oyo yalaga Paulo otino, “Awakengi awa ekiina watumre amang’ana mbwe mbareke mugie. Kutio muri iwaga, mufume mugie no owuolu.”

³⁷Ni Paulo yawalaga otino, “Muwurre, ifwe turi Awaruumi, ni kukawa kutio izo waggerre tukubwa wusaasa emberu wa awantu ni wakiari okutuukra owuoni wuifu kandi watuingizia mu owusiwe. Katio ekigera ni wagala okutusiwula owuiwisi niki? Tulowere ngatufuma muno. Mugie muwalage waaze watufumie iwo aweene.”

³⁸Omulangra oyo yagia alaga awakengi awa ekiina eking’ana kino. Olwa waamanya mbwe Paulo ni Siila waawanga Awaruumi, owuti wuawa-amba ino.

³⁹Waagia aweene wairizizia Paulo ni Siila mbwe wawarekere. Waawafumia enze kandi wawiiyemba mbwe waganye wafume ku omugizi gwawu ogwo wagie.

⁴⁰Kutio ni Paulo ni Siila waamala okufuma mu owusiwe, waagia wawa awageni awa Luudia. Waagaana na Awakristo ao, awa wa-ambia amaani nikwo wafuma ni wagia.

Awatumwa 17

Paulo ni Siila mu ekialo ekia Thesaloniika

¹Paulo ni Siila waawitra mu ewialo ewia Amfipooli ni Apoloonia, waaza Thesaloniika aa esinagoogi eya Awayaudi yawangamo.

²Kutio kiomo kwawanga enkola yaae Sabato ki Sabato, Paulo yagia omwo kandi agerera amang’ana aga Katonda ku emidiira isatu.

³Yalaga awantu awaawanga omwo geeza mbwe kwanigirizia Kristo okuinyaasia, no olwa yamala okufwa yaziuka aema ku awafu. Paulo yawalaga otino, “Kutio Yesu owangerera amang’ana gaae ono nio Meesia.”

⁴Awandi ku Awayaudi awaawanga omwo waaganya ku amang’ana ago kandi walonda Paulo ni Siila. Awandi wona awatari Awayaudi awaawanga ni waganyire ku amang’ana aga Katonda, alala na awakazi wandi awangi kandi awamanyikaane, wona waaganya amang’ana gaawu ago.

⁵Kukawa kutio, iyari ria-amba Awayaudi wandi mala wagamba-gamba na awantu wandi awa enkola embiiwi ku omugizi ogwo, nikuemao watanika okukuba erioga alala nawo. Waagia mu enyumba eya Yasooni okuwarra Paulo ni Siila kugere wawareete emberu wa awantu.

⁶Olwa waatuukra mbwe wawula omwo, wa-amba Yasooni na Awakristo wandi wawareeta emberu wa awakangasi awa omugizi ogwo. Waawaingirra watino, “Awantu wano wamiire okureetra ewialo ewingi eminyako-nyaako. Wuno waazre okutusingania ifwe twona.

⁷Ni Yasooni yawaingiizie omwae. Wona wamiire okuona endagirra eya Omwami Kaisaari ku okuwoola mbwe ario omwami wundi oetwa mbwe Yesu.”

⁸Olwa awakangasi alala na awantu awaawanga ao waawurra amang’ana ago, enda ziwu ziayia ino.

⁹Waakenga mbwe Yasooni na awiina waae waoloole amasendi. Waaoolola nikwo wawareka wagia.

Paulo ni Siila watuukiire eminyako-nyaako Berea

¹⁰Nyanga olwo owuire, Awakristo waafumia Paulo ni Siila wagia Berea. Olwa waatuuka Berea, waagia mu esinagoogi omwa Awayaudi waasawiranga.

¹¹Awayaudi awaawanga ni wamenyere Berea waawanga awantu awalootu awari no okuwurra okukira awiina waawu awaawanga ni wamenyere Thesaloniika. Iwo waategerezia amang’ana goona aga Paulo ni Siila waawagerera kandi waasomanga endagano, okumanya kuwuene mbwe ewintu ewia Paulo ni Siila waawagereranga wiawanga ni wiri kuwuene.

¹²Kutio Awayaudi awangi na awakazi awangi awatari Awayaudi awamanyikaane alala na awasaaza awatari Awayaudi, waaganya ku amang’ana aga Katonda.

¹³Olwa Awayaudi awaawanga ni wamenyere Thesaloniika waawurra mbwe Paulo ni Siila walanzia amang’ana aga Katonda Berea, waawalonderezia kandi wawasigania na awantu awa Berea wona.

¹⁴Kutio olwa Awakristo waawona otio, waalaga Paulo afume ku omugizi ogwo, agie ku ensanyaata eya omwalo ogwa Makedoonia. Siila ni Timotheo iwo waasigala.

¹⁵Ni Paulo yamala okufuma ku omugizi ogwo, yagia ku omugizi oguetwa mbwe Atheene. Olwa yatuuka eyo, yalaga awantu awaamureeta mbwe wagie walage Siila ni Timotheo mbwe awarinda, waaze wuangu-wuangu.

Paulo alanziziie awa Atheene amang’ana aga Katonda

¹⁶Ni Paulo yawanga na akiarinda Siila ni Timotheo ku omugizi ogwo Atheene, yawa no owululu ino olwa yawona mbwe katonda ensaasa ziri asi-uasi ku omugizi ogwo.

¹⁷Ekio kiagera Paulo agia mu esinagoogi kandi agerera Awayaudi na awatari Awayaudi awaasawanga Katonda kiomo Katonda aagala. Owuire ki owuire, yagianga mu olwanyi olwa omugizi okulanzizia awantu awaawanga ao amang’ana aga Katonda.

¹⁸Awantu wandi awaawanga ni waganyire ku igerera eria Epukuuri na awandi awaawanga ni waganyire ku igerera eria Stoiko, ngawakaganya ne ekia Paulo yagereranga. Awandi ku iwo waaiwuuzia agati yaawu aweene watino, “Kane omuntu ofwa okugamba-gamba ugamba-gamba ono, awoola ki?” Awandi waawairania watino, “Kuwonekana mbwe agamba-gamba ku katonda zindi empia.” Waawoola watio aeniki Paulo yawanga na agamba-gamba ku Yesu ni ku okuziuka okwae.

- ¹⁹Awantu awo waatoola Paulo waira ku oluwuga oluetwa Areopaago mala wamuwuzia watino, “Amang’ana aga ogerera gano galaganaki?”
- ²⁰Owuganga owua oreetre wuno wuyia ku ifwe, kutio tuagala okumanya ekia wulagana.”
- ²¹(Awantu wona awamenyere ku omugizi ogwa Atheene namba awageni, waawanga ni wagonziizie okugamba-gamba ku ewintu ewiikorre ewiyia, ni wakuba entaka.)
- ²²Paulo yaimerra emberu wa ekiina, awalaga otino, Awantu awa Atheene, mbawona kuwene mbwe muri awantu awamanyire amang’ana aga ediini.
- ²³Aeniki, olwa mbeerenga ni ngenda-genda kandi ni mbarra ewintu wiinyu ewia okusawa, mbwine isiga eria okukorra emisango erijojerwe mbwe ku katonda otamanyiike. Kutio, ekia mumiire okuwa ni musawa ki ekintu ekia mutamanyire, niki ekia nyagala okuwalaga.
- ²⁴“Katonda owaluka ekialo ne ewintu wiona ewirimo nio Omwami owa igulu ne ekialo. Iye ngamenyere mu ekaalu eombookwe na awantu.
- ²⁵Lwona ngakorrwa emirimo no omuntu namba omuntu ngamutunzia aeniki iye nio oesana owulamu ne ewintu wiona ku omuntu.
- ²⁶Awantu wona awamenyere mu ewialo ewigawuke-gawuuke waaema ku omuntu omulala. Ni kino kiaikola kugere mu okutanyika kwawu okwo, waizuzie ekialo kiona. Omulusi yawalaga amiire na asi aa wasugaane wamenye.
- ²⁷Katonda yakola kino kugere awantu wamuagale. Yaagalanga mbwe awantu wakole wukalu wamumanye. Ni kiomo kuri, ngaari ale ni ifwe,
- ²⁸mala kiomo omuntu yajoja na awoola mbwe, ‘Ku amaani gaa turio awalamu kandi tugenda-genda.’ Awembi wiinyu wona wawoola mbwe, ‘Turi awaana waae.’
- ²⁹“Kutio, ni turi awaana waae otio ngatusugaane tuingirizie mbwe Katonda afwanana ne ewintu ewiwanzrwe na amaganga aga omuntu okuema ku amawaale, emiti namba ewiuma.
- ³⁰Kale Katonda ngaka-aa owusiru owufwana wutio owuzito, ni mu amiire gano asikirra awantu asi-uasi aa wari mbwe wagaluke wareke amawi.
- ³¹Aeniki amiire okulowola owuire owua omulowole waae aaza okukengera ekialo ekiina owusugre ne enkola eya omuntu ki omuntu. Amiire okulagana kino mu okuziusia okwa yaziusia nakwo omulowole waae oyo okuema ku awafu.”
- ³²Olwa waawurra mbwe kurio okuziuka okuema ku awafu, awandi ku iwo waagwa ne enseko ni wamusekera. Na awandi waamulaga watino, “Tuuza okuwurra ekia owoola ku ing’ana rino, owuire wundi.”

³³Kutio, Paulo yafuma awareka.

³⁴Awantu wandi awaaganya ku amang'ana aga Paulo yagereranga waumulonda. Omulala ku awantu awaalonda Paulo yaetwanga mbwe Dioniisio owaawanga omulala ku awagaaka awa Areopaago. Omukazi wundi oetwa mbwe Damariisi alala na awandi wona waaganya ku amang'ana aga Paulo yagerera ago.

Awatumwa 18

Paulo ari mu ekialo ekia Awakorintho

¹Nikuemao Paulo yafuma Atheene agia Korintho.

²Ano yaagana no Omuyaudi wundi owaiwulwa mu ekialo ekia Pontuusi oetwa mbwe Akwila. Kuno kwatuukra Akwila ni mukaae Preskiila nikwo waaingira ampi ao ni waema Itaalia aa waasomosiwua nikulondokana ne ensikirra eya Omwami Klaudiasi yawanga na afumiizie mbwe Awayaudi wona wafume Rooma. Kutio Paulo yagia okuwawona.

³Paulo yamenya nawo ni wakola emirimo alala aeniki wona waawanga awanawi awa amaema kiomo iye.

⁴Owuire owua Sabato ki Sabato, Paulo yagamba-gamba ino na Awayaudi na awantu awatari Awayaudi mu esinagoogi na awiiyemba mbwe waganye ku Yesu Kristo.

⁵Olwa Siila ni Timotheo waaema Makedoonia, waatuukra Paulo Korintho. Paulo yatoola enyinga enyingi na alanzizia Awayaudi mbwe Yesu nio Kristo.

⁶No olwa waumulowa kandi watanika okumugamba-gambako uwiiwi, Paulo yakukumula egunduusi eya ku enguwo yaae na awalaga otino, "Inze miire emirimo giange! Ni mutanunuulwe, amasaai giinyu gawe ku emitwe giinyu! Inze okuemera reero ngia okulanzizia awatari Awayaudi amang'ana amalootu aga Katonda!"

⁷Nikuemao Paulo yafuma mu esinagoogi agia mu enyumba eya Tiito Yastaasi, eyawanga ampi ne esinagoogi ao. Tiito yawanga omuntu osawa Katonda.

⁸Krispaasi owawanga omukangasi owa esinagoogi eyo, na awa mu enyumba yaae wona alala na Awakorintho wandi awangi waaganya ku Omwami Yesu wabatiiswa.

⁹Owuire wulala Omwami Yesu yafumira Paulo mu owusasuko ni Paulo agona mala amulaga otino, "Otatia! Gia-ugia emberu okuwagamba-gambra kandi otasarigira

¹⁰aeniki ndi ni iwue, kutio awulao omuntu ooza okukukorra uwiiwi. Lwona ndi na awantu awangi ku omugizi guno."

¹¹Kutio Paulo yawa ku omugizi ogwo ku omwaka omulala ne emienzi mukaaga, na agerera amang’ana aga Katonda agati yaawu.

¹²Mu amiire aga Galio yawanga omukangasi owa ekialo ekia Akaaya, Awayaudi waaizoganra Paulo wamuamba wamaira ku oluwuga olwa ekiina wamuingirra watino,

¹³“Omuntu ono avuwa awantu kugere wasawe Katonda mu engira etalondokana ne endagirra ziifu.”

¹⁴No olwa Paulo yawanga na aagala okutanika okugamba-gamba otino, Galio yalaga Awayaudi awo otino, “Muwurre, kuweeko mbwe inywe Awayaudi muiriizienga omuntu ono ku okukola ekintu ekiwiiwi namba okuona ensikirra, kukaweere kulootu kandi nkawategerezie.

¹⁵Ni gano na amang’ana aga okutawurizania agati iinyu ku amang’ana, amiina ne endagirra ziinyu aweene. Kutio mugamale aweene, inze ng’anyiza okugaingiramo yawa.”

¹⁶Kutio yawasomosa mu oluwuga lwae.

¹⁷Awayaudi awo waagalukira Sositheneesi owawanga omukangasi owa esinagoogi watanika okumukuba emberu wa Galio. Ni kino ngakika-amba Galio.

Paulo airaane Antioki

¹⁸Paulo yawa Korintho na Awakristo ku amiire amangi nikwo awareka awunguka agia ni Preskiila na Akwila mu ekialo ekia Siiria. Olwa waatuuka Senkereeya, Paulo yawega emwiri ziae okutuusia okuifuuwa okwa yawanga na aifuuwre.

¹⁹Waatuuka Efeeso aa Paulo yareka Preskiila na Akwila, agia mu esinagoogi aa yalwanagana na Awayaudi ku amang’ana aga Yesu Kristo.

²⁰Olwa Awayaudi awo waamusawa mbwe akole okuwa nawo ku amiire gandi, Paulo yalowa.

²¹No olwa yafumanga, yawalaga otino, “Ni Katonda aganyire nyiza okuirana.” Nikuema, yawunguka aema Efeeso.

²²Olwa waagowa Kaisaria, yafuma agia Yerusaleemu akeezia Awakristo nikwo aika Antioki.

²³Ni yamala okumala amiire agasugre Antioki, Paulo yafuma agia mu ewitemo wiona ewia mu ewialo ewia Galatia ni Firiigia na a-ambia awalonzi amaani.

Apolo ari mu ekialo ekia Efeeso

²⁴Mu amiire ago, Omuyaudi wundi oetwa mbwe Apolo, omuiwulane owa Aleksanda, yaaza Efeeso. Yawanga omugambageza kandi omuntu omanyire amang’ana agari mu endagano eya Katonda geeza ino.

²⁵Yawanga na agereerwe engira eya Omwami geeza, kutio yalanzia owueru owuri ku Yesu no owusiani ino mu engira ewurikaane, kandi na ateereko omwoyo gwae gwona. Kukawa kutio, yawanga na amanyire mala owubatiiso owua Yowaana yagerera wueng'ene.

²⁶Olwa Preskiila na Akwila waawurra Apolo na agerera amang'ana aga Katonda no owusiani mu esinagoogi, waamutoola wagia nae omwawu wagia kandi wamusongerezia okumanya engira eya Katonda geeza okukira kiomo yawanga na amanyire.

²⁷Olwa Apolo yagalanga okugia Akaaya, Awakristo waamuambia amaani kandi waajojera Awakristo awiina waawu awa Akaaya ebaruwa, kugere waganye wamuingizie. Olwa yatuuka, yatunzia ino awantu awaaganya ku amang'ana aga Katonda ku owusiza wuae.

²⁸Yavuna Awayaudi mu amang'ana emberu wa awantu na akola ne endagano okulagana kuwene mbwe Yesu nio Meesia.

Awatumwa 19

Paulo ari mu ekialo ekia Efeeso

¹Na Apolo yawanga na akiari Korintho, Paulo yalonda ewitemo ewia engulu na agia Efeeso. Olwa yatuuka, yatuukra eyo awalonzi wandi.

²Paulo yawawuuzia otino, "Olwa mwaganya, mberu mwatuukra Omwoyo Omweru ogwa Katonda?" Waamuirania watino, "Ifwe tukiari namba okuwurra mbwe kirio ekintu ekietwa mbwe Omwoyo Omweru ogwa Katonda."

³Kutio Paulo yawawuuzia otino, "Kane mwatuukra owubatiisooki?" Waamulaga watino, "Ifwe twatuukra owubatiiso owua Yowaana yagerera."

⁴Paulo yawalaga otino, "Owubatiiso owua Yowaana yagerera wuawanga owua okugalusia emioyo okureka amawi. Yowaana yagalanga mbwe awantu waganye ku omuntu owaemanga enyima waae. Omuntu ono ni Yesu Kristo."

⁵Olwa waawurra otio, wona waabatiiswa ku eriina eria Yesu Kristo.

⁶Nikuemao Paulo yata amakono gae ku emitwe giawu kandi Omwoyo Omweru ogwa Katonda yawaazako mala watanika okugamba-gamba mu eminwa emigeni kandi waawoola amang'ana agaawaemera ku Katonda.

⁷Ku awantu awo, awasaaza waaesanga okutuuka ikumi ni wawiri.

⁸Paulo yaweera eyo ku emienzi isatu. Ni yawanga eyo yalanzizia awantu amang'ana no owusiani mu esinagoogi na aikululana nawo mu amang'ana na agala okuwareeta mu okuganya ku Owuami owua Katonda.

⁹No olwa yawona ne emioyo egia Awayaudi wandi giri emikalu okuganya, kandi na Awayaudi awo wagamba-gamba uwiiwi ku okuganya ku Omwami Yesu

emberi wa awantu, Paulo yafuma na awalonzi agia nawo Tairaano, mu enyumba eya owugerezi omwa yagereranga awantu owuire ki owuire.

¹⁰Paulo yawalanzizia otio ku emiaka iwiri nawuno Awayaudi na awatari Awayaudi wooka awari mu ekialo ekia Eesia waawurra amang’ana aga Katonda.

¹¹Katonda yakola amankono agaluguulwa okuwitra ku Paulo.

¹²Ewitambaaya namba ewiraka ewia Paulo yawanga na akorre nawio ni wiairrwanga awalwire, awalwire awo waalamanga kandi ewikeeno wiawafumangako.

Ekikeeno kimanyire Awakristo awa kuwene

¹³Wario Awayaudi awaagenda-gendanga mu ewitemo ni wafumia ewikeeno ku awantu. Wooka waageezaania okukola ne eriina eria Omwami Yesu okukola emirimo egio. Waalaganga ewikeeno otino, “Ku eriina eria Omwami Yesu owa Paulo alanzia, nkusikirra mbwe fuma.”

¹⁴Awazia musamvu awa Sekeewa, Omukangasi owa awoozia awa Awayaudi, waakolanga ekintu ekio.

¹⁵Ni nyanga ekikeeno kiawairania kitino, “Yesu tumumanyire, Paulo oona tumanyire. Ni inywe muri waawu anu?”

¹⁶Omuntu owawanga ne ekikeeno oyo yagia awakira na amaani awagwako ne ewikube, awakuba nawuno warumuka wafuma mu enyumba kikuna kikidi wareka enguwo ziauwu ewikube ni wiwakorreko erioga. Emiwiri giawu giawanga ni gikorre amasaai amasa.

Awantu awangi wagaluuke waganyire ku Yesu

¹⁷Olwa awantu wooka awamenyere Efeeso, Awayaudi na Awagiriiki, waawurra amang’ana ago, owuti wuawa-amba ino kandi eriina eria Omwami Yesu riaewua owuti ino.

¹⁸Awantu awangi waaganya ku Yesu, waaganya amawi gaawu emberu wa awantu kandi waawoola ne eminwa giawu aweene ewintu ewiwiiwi ewia waakolanga owuiwisi.

¹⁹Awantu awangi awaakolanga owulaguzi ni ilogo waareeta ebuuki ezia emirimo giawu alala, wasamba emberu wa awantu. Olwa waata alala iguzi eria ebuuki ezio ziona, ziasuga efeedha elufu amakumi ataanu.

²⁰Mu engira eno, amang’ana aga Katonda gaasonga okuilanzia na amaani ino.

²¹Ni wino wiona wiamala okuikola, Paulo yakenga mu omwoyo mbwe awitre Makedoonia na Akaaya na agia Yerusaleemu. Kandi mbwe na aema Yerusaleemu, paka agie Rooma.

²²Kutio yatuma Timotheo ne Erasto, awandi ku awantu awaamutunzianga emirimo mbwe wakangate wague Makedoonia, iye na akiasigaaleko wutono mu ekialo ekia Eesia.

Emidambo egia-amba awatumwa mu ekialo ekia Efeeso

²³Mu iwaga erio, erioga riafuma Efeeso inene ino ku amang'ana aga okulonda engira eya Omwami Yesu Kristo.

²⁴Omuntu wundi owaetwanga mbwe Demetriasi omutuzi owa efeedha, yaretranga awemirimo waae amasendi amangi ino mu emirimo egia okulonga emifwano egia ekaalu eya Ateemi, katonda ensaasa.

²⁵Kutio yaeta awemirimo waae alala na awandi awaakolanga nae emirimo emifwanani awalaga otino, "Awiiko wange, nyingirizia mbwe mumanyire mbwe owunyazi wuifu wuema ku emirimo giifu gino.

²⁶Ni mumiire okuwurra kandi mumiire okuwona na amiiso giinyu aweene kiomo omuntu oetwa mbwe Paulo ono amiire okugamba-gambra awantu awa mu ekitemo kiifu kino, mboole mbwe ampi ekialo kiona ekia Eesia, na awagalusia ni isema na awoola mbwe katonda ezilongerwe na amakono ziwula emirimo.

²⁷Kutio ekirio ng'ani mbwe emirimo giifu nigio egiiza okuwa ne eriina iwiiwi gieng'ene, ne eriina ilootu eria ekaalu eya Ateemi riona riiza okuoneka, kandi katonda enkazi Ateemi omwene, osawua mu ekialo ekia Eesia ni mu ekialo kiona, oona aaza okuwula eriina."

²⁸Olwa awantu awo waawurra amang'ana ago, enda ziwu ziyaya ino kandi waatanika okukuba erioga ni watondowola Ateemi watino, "Ateemi owa Awaefeeso ari omukaate!"

²⁹Erioga riafuma eriazula omugizi du. Ni kukiari, awantu awo waavwamira Gaayo na Aristakuusi Awamakedoonia awaagenda-gendanga ni Paulo, wawakulula ni wawaira mu enyumba eya okuikumia.

³⁰Paulo yagalanga okugia okugamba-gamba nawo, na Awakristo awaawanga ao waamugaania.

³¹Awandi ku awakangasi awa ekitemo awaawanga awiiko waae, wona wamutumra omutumwa ni wamuisasaama mbwe ataaza yagia mu okuikumia okwo.

³²Ni kukawa mbwe awantu awo waawanga awangi, no owungi wuawu ngawakawanga ni wamanyire ekiikola, aeniki awantu awo ngawakawanga no omunwa omulala. Na awandi ku iwo waawoolanga kino, awandi waawoolanga ekindi ekisaasa.

³³Awayaudi wandi waasindika omuntu oetwa mbwe Aleksanda emberu wa awantu kugere agambe-gambe nawo. Kutio Aleksanda yaoreezia awantu na amakono gaae mbwe wasarigire.

³⁴No olwa awantu waamanya mbwe Aleksanda no Omuyaudi, waaogerera ku enyinga iwiri ziona, ni watondowola Ateemi katonda waawu. Waaogerera ni wawoola watino, “Ateemi owa Awaefeeso ari omukaate!”

³⁵Owutuukre, omukangasi owa omugizi ogwo yaoreezia awantu na awalaga otino, “Awiifu mbawuuzia ntino, ekialo kiona ngakimanyire mbwe omugizi ogwa Efeeso nigwo ogurindre ekaalu enene eya omunene Ateemi? Nakuwa omufwano gwae ogwagwa ansi ni guema ku igulu ngaguri ano?”

³⁶Kutio, aeniki mumanyire mbwe kuri kutio kandi awulao olowa, musugaane musarigire kandi mutaazakana okukola ekintu ekiwiiwi.

³⁷Awantu awawiri awamureetere emberu ano wano, ngawakaiwa ekintu-ukintu mu ekaalu namba ngawakanyega katonda ziifu.

³⁸Kutio, ni Demetriasi na awiina waae wari ne eminyako-nyaako no omuntu-umuntu, awakengi awa ekiina wario, wagie wawaingirre eyo.

³⁹Ni ni kirio ekintu kindi ekia muagala, paka mukiire mu ekiina kiomo endagirra ziifu ziagala.

⁴⁰Ni kiomo turi nyingeeno tutino, tuita mu olugoe, aeniki tuuza twaingirra mbwe ni ifwe awareetere erioga ano, ni tuwula ne ekia tukawoola.”

⁴¹Ni yamala okuwoola otio, yalaga awantu wona mbwe watanyike wagie mu emigizi giawu.

Awatumwa 20

Paulo na awalonzi wagiire Makedoonia ne Ewugiriiki

¹Ne erioga riamala okuwua, Paulo yaeta awalonzi okuwakubra ekurinde. Yawa-ambia amaani nikwo afuma na agia Makedoonia.

²Yagenda-genda mu ekialo ekia Makedoonia kiona na a-ambia Awakristo awa eyo amaani nawuno yagia atuuka Ewugiriiki

³aa yamala emienzi isatu. Yaagalanga okuwunguka okugia Siiria, no olwa yawurra mbwe Awayaudi waawarra engira eya okumuitra ku engira, yawona mbwe airane agie awitre Makedoonia.

⁴Awantu awaagia ni Paulo ni Sopaata omuzia owa Pairuusi Omuberea, Aristakuusi ni Sekudiisi Awathesaloniika, Gaayo Omudeebe, Timotheo, Tichikaasi alala ni Trofimaasi, awaaemanga Eesia.

⁵Awantu wano waakangata wagia waturinda Troowa.

⁶Olwa omugomo ogwa Omukaati oguwulamo amamera gwawua, twa-ambukra Filiipi tugia Troowa. Kwatutoola amiire ataanu okutuuka Troowa aa twamalao amiire musamvu.

Paulo aziuusie Yutikaasi

⁷Igulo nyanga olwa omudiira ogwa okuwiri, ifwe twena twaikumia alala okuria omukaati. Nikulondokana no okuagala okwa Paulo okwa okufuma mu ekialo ekio owuire owualondangako, yagamba-gambra awantu na awa-ambia amaani nawuno kutuuka owuire agati.

⁸⁻⁹Yawangao omuzia wundi owaetwanga mbwe Yutikaasi. Omuzia ono yawanga na aikaale ku ediriisa kandi ewimuri wiaemanga ewingi mu enyumba omwo. Kiomo Paulo yagia emberu okugamba-gamba, nintio endoolo ziira omuzia ono. Owutuukre omuzia ono yaaguka ku ediriisa agwa ansi na aema ku goroofo aya okusatu aa twawanga, agia atuukrwa na afwire.

¹⁰Paulo yagia amugwako amukunaania mu amakono gaae nikwo alaga awantu otino, “Mutatia, ari omulamu.”

¹¹Nikuemao, Paulo yairana mu enyumba agia agenyula omukaati waria. Yagia emberu okugamba-gambra awantu nawuno owuire wuakia, nikwo afuma na agia.

¹²Awantu awo waatoola omuzia oyo waira engo na ari omulamu kandi emioyo giawu ni giri emisangaavu ino.

Paulo akubiire awagaaka awa ekaniisa aya Efeeso ekurinde

¹³Ifwe twakangatra Paulo, tuwalama no owuato tugia Asoosi aa twagianga okumutoorra, aeniki iye yawita engulu na amagulu.

¹⁴Kandi olwa yatutuukako, twawunguka nae tugia Mitileene.

¹⁵Enkio walwo twasiawala tutuuka mu owuziwa owua Mitileene tugia ku ekizinga ekia Kiosi. Owuire owualondako twa-ambuka tugia ku ekizinga ekia Samoosi. Nikuemao twarumuka owuire wulala tutuuka Miletaasi.

¹⁶Paulo yakenga okutagia ku omugizi ogwa Efeeso, aeniki ngakaagalanga okuona enyinga enyingi mu ekialo ekia Eesia. Yaagalanga mbwe ni kuesekana atuuke Yerusaleemu mu omugomo ogwa Pendekosti.

¹⁷Paulo yalagirra awagaaka awa Awakristo awa Efeeso mbwe waaze waagaane nae ku omwalo ogwa Miletaasi.

¹⁸Olwa waaza, yawalaga otino, “Inywe aweene mumanyire geeza kiomo miire okuwa ni menyere agati iinyu okuemera owuire owua nyaaza Eesia eno, kutuuka reero.

¹⁹Miire okukorra Katonda no omwoyo gwange gwona, na amaziga kandi ni nyiisiizie ansi, namba mu okugeezaniwua na Awayaudi awamiire okuweerako ni wanyiibong’a okunyita.

²⁰Ng’anyakareka okuwalaga ekintu-ukintu ekiaesanga okuwatunzia, ni miire okuwa ni mbagerera mu amayumba giinyu namba enze emberu wa awantu.

- ²¹Nyamiire okuwa ni ndaga Awayaudi na awatari Awayaudi mbwe paka wagaluke wareke amawi gaawu wairane ku Katonda kandi wawe no okuganya ku Omwami iifu Yesu Kristo.
- ²²Katio nyingeeno ku okuagala okwa Omwoyo Omweru ogwa Katonda, mfumre ngia Yerusaleemu. Ni ng'amanyire ekigia okunyiikorra eyo.
- ²³Ekia manyire ni mbwe Omwoyo Omweru amiire okuwa na ansiagizia ku omugizi ki omugizi ogwa miire okuwitamo mbwe eminyako-nyaako no okuteewua mu owusiwe nigio eginindirra eyo.
- ²⁴Ni kukawa kutio, inze owulamu wuange ngawuri ekintu ku inze. Ekineene ekia nyagala, no okutuusia owutumwa owua Omwami yampa, emirimo egia okulanzia amang'ana amalootu aga owusiza owua Katonda.
- ²⁵"Manyire mbwe awulao omuntu ku inywe awantu awammiire okulanzizia amang'ana aga Owuami owua Katonda, ooza okumbona kandi.
- ²⁶Kutio reero nyiisaawa, aa na ario omuntu oriteeka, amasaai gaae gambulako,
- ²⁷aeniki kiwulao ekintu ekia nyawawisa, ni nyawalaga okuagala okwa Katonda kwona.
- ²⁸Kutio muirinde inywe aweene alala na awantu wona awa Omwoyo Omweru ogwa Katonda amiire okuta mu amakono giinyu. Muwe awaayi awa ekaniisa eya Katonda yagula na amasaai aga omuzia waae omwene.
- ²⁹Manyire mbwe ni miire okugia, ensisi ziiza okuwaingiramo ezitaaza okureka amagondi.
- ³⁰Namba awandi ku inywe aweene waaza okugalusia amang'ana agari kuwuene aga mumiire okugererwa, ni wawoola owuweeyi kugere awandi wawalonde.
- ³¹Kutio muikage kandi mutalawira mbwe miire okuweerako ni mbasiagizia mwona omuntu ki omuntu ku emiaka isatu, owuire no omuwasu kandi na amaziga gange gayooka.
- ³²"Katio reero mbata mu amakono aga Katonda ni ku amang'ana aga owusiza wuae. Iye nio ori na amaani aga okuwakomia no okuwa-aa ensereki ziae ezia awiikiire awalowole waae wona.
- ³³Nkiari okunyaga omuntu-umuntu ku inywe efeedha namba edhaabu nakuwa enguwo yaae.
- ³⁴Ni inywe aweene mumanyire mbwe ewintu ewia nyaitunzia nawio alala na awantu wange wona wiaema ku oluuya lwange ni nkola na amakono gange gano.
- ³⁵Ewintu ewia nyakola wino wiona, nyawikola okuwalaga mbwe musugaane mukole emirimo na amakono giinyu aweene kugere mutunzie awawula amaani

ni muingirizia ekia Omwami Yesu omwene yawoola mbwe, ‘Kuri kulootu okufumia, okukira okutoola.’ ”

³⁶Olwa Paulo yamala okuwoola amang’ana ago, yakuba amasigamo ansi alala na awagaaka awo, wasawa.

³⁷Woono warra ni wamukunaanie ni wamunuuna ni wamukubra ekurinde,

³⁸aeniki owululu wuawa-amba ino ku okuwoola okwa yawoola mbwe ngawarimuwona kandi. Kutio waagia nae nawuno wamutuusia ku owuato.

Awatumwa 21

Olugendo olwa Paulo okugia Yerusaleemu

¹Olwa twamala okurekana nawo, twawunguka tugia ku ekizinga ekietwa mbwe Koosi. Enkio walwo, twawunguka tugia Rodeesi, nikuemao tugia Pataara.

²Ao twatuukrao owuato owugia Foeniisia owua twaniina tugia.

³Olwa twafumia ekizinga ekia Saipraasi emberi iifu, twawisia okukiwitra nyamulambo ni tuwariire Siiria. Twagowa Taaya aa emisigo giagianga okusiulwa.

⁴Twatuukra eyo Awakristo wandi, awa twawa nawo ku omudiira mulala. Awakristo awo waagania Paulo ku amaani aga Omwoyo Omweru ogwa Katonda mbwe atagia Yerusaleemu.

⁵Olwa amiire giifu aga okuweera eyo gaawua, twafuma tugia emberi no olugendo lwifu. Awakristo woono awasaaza ku awakazi na awaana waawu waatufumia enze eya omugizi gwawu. Ni tukiari okurekana, twona twakuba ansi amasigamo, ku ensanyaata eya omwalo, tusawa Katonda nikwo tukubana ekurinde.

⁶Nikuemao twaingira mu owuato, iwo wairana mu emigizi giawu.

⁷Okuemera Taaya twarumuka nawuno tugowa Tolemaasi aa twaongera ni tuwonana na Awakristo awiina wiifu awa eyo.

⁸Olwa wuakia, twa-ambuka tugia Kaisaria. Ano twagia mu enyumba eya Piliipo omuyaazi owawanga omulala ku awantu awaalloworrwa emirimo egia okugawa okuria.

⁹Yawanga na awaala wane awagima. Awaala wano Katonda yawanga na awaere amaani aga owugambi owua amang’ana gaae.

¹⁰Lunyima ni twawanga ni tumiire okumala amiire agasugre omwae omwo, omugambi wundi owa Katonda oetwa mbwe Agaabo yatuuzako na aema Yudeea.

¹¹Yatoola omukanda ogwa Paulo, aisiwa amagulu na amakono, mala awoola otino, “Omwoyo Omweru ogwa Katonda awoola otino, ‘Kiomo nyiisiwre otino, nintio Awayaudi awari Yerusaleemu wagia okusiwa omwene omukanda guno. Kandi waaza okumutoola wamute mu amakono aga awantu awatari Awayaudi.’ ”

¹²Olwa twawurra ekia omugambi oyo yawoola, ifwe alala na awantu awaawanga ao twaisasaama Paulo mbwe atagia Yerusaleemu.

¹³Ni Paulo yatuirania otino, “Ekia mukola ekio katio niki? Mberi mumanyire mbwe ni murra mutio munyita omwoyo? Aeniki ng’anyiikagre okusiwua kweng’ene, ni nyiikagre namba okufwa Yerusaleemu ku eriina eria Omwami Yesu Kristo. Kutio mureke okurra.”

¹⁴Olwa twawona no omwoyo gwae guri omukalu ku ewintu ewia twamulaganga, twarekana nae ni tuwoola mbwe okuagala okwa Katonda kuwe mbwe nikwo okuikola.

Paulo atuukre Yerusaleemu

¹⁵Ni twamala okuwa ao ku amiire agasugre, twafuma tutaa ni tugia Yerusaleemu.

¹⁶Twagia na Awakristo wandi woona awa ku omugizi ogwa Kaisaria, awaatuira mu enyumba eya Nasooni Omusaipraasi eya twagianga okumenyamo. Nasooni yawanga omulala ku Awakristo awakulu.

¹⁷Olwa twatuuka Yerusaleemu, Awakristo awiina wiifu, waatuingizia no owusangaavu ino.

¹⁸Enkio walwo, twagia ni Paulo okuwona Yakoobo. Awagaaka awa Awakristo awa Yerusaleemu woona waawanga omwa Yakoobo omwo.

¹⁹Paulo yawakeezia nikwo yawalaga ewintu wiona ewia Katonda yakorra awatari Awayaudi ni kuwitra ku iye.

²⁰Olwa waawurra amang’ana ago, watondowola Katonda ino. Nikuema waalaga Paulo watino, “Wurra! Kukawa mbwe Awayaudi awangi wamiire okuganya ku amang’ana amalootu aga Katonda, ni wakiangirizia mbwe paka wakole kiomo endagirra ezia Muusa ziangala.

²¹Awantu wandi waaza ano awaawalaga mbwe iwue ogerera Awayaudi awamenyere mu ewialo windi mbwe warekane ne endagirra ezia Muusa. Kandi mbwe owalaga mbwe wataira awaana waawu enyangu nakuwa okulondokana ne enkola ezia waaguukwa wiifu.

²²Katio tukole tutie aeniki waaza okuwurra mbwe omiire okuza ori ano?

²³Kutio kola ekia tuuza okukulaga. Turi ano na awantu wane awamiire okutaa endagano.

²⁴Gia nawo alala mugie mukole omusango ogwa okuieruyia kandi owaoloorre ewiagalwa kugere emitwe giawu giwegwe. Nikuema awantu waaza okumanya mbwe ewia wawoolwako wiawanga ewia owuweeyi aeniki olonda endagirra ziifu.

²⁵Ni ku Awakristo awatari Awayaudi, tumiire okuwa-aa ebaruwa ewalaga mbwe wataria okuria okukoriirwe katonda ensaasa emisango, lwona watanywa amasaai, wataria enyama eya emiandu egigogerwe kandi mbwe watasooda.”

²⁶Enkio walwo Paulo yagia na awantu wane awo agia aieruyia alala nawo nikwo aingira mu ekaalu alaga awantu owuire owua amiire aga okuiyeruzia kwawu kuriwuera, nyanga olwa omuntu ki omuntu arikorrwa omusango.

Paulo a-ambrwe mu ekaalu

²⁷Na amiire musamvu aga okuieruyia gaawanga ampi okuwua, wario Awayaudi wandi awa mu ekialo ekia Eesia awaawona Paulo mu ekaalu. Waasiiga awantu wa-amba Paulo

²⁸ni waogerera watino, “Awiifu mututunzie! Omuntu ono amiire okuwa na agamba-gamba uwiiwi ino ku Awayaudi, ni ku endagirra ezia Muusa, lwona ni ku ekaalu eno asi-uasi aa agiire. Ng’ane ekio kieng’ene, ni nyingeeno kandi areetre namba awantu wandi awatari Awayaudi mu olwanyi olwa ekaalu. Ao na mpao amwamiizie ekaalu enzeru eno?”

²⁹(Awayaudi awo waawoola otio ni waingirizia mbwe Paulo aingiire ni Trofimaasi Omuefeeso mu olwanyi olwa ekaalu aeniki waawanga ni wawuine Paulo na agenda-genda nae ku omugizi ogwo.)

³⁰Erioga riaizula omugizi ogwo du! Kandi awantu waasomoka ni waema eno ne eno wagia wa-amba Paulo. Waamukulula wamufumia enze eya ekaalu, ewikulo wiigalwao.

³¹Amang’ana gareke okugiira omukangasi omunene owa awa-iye awa Awaruumi wuangu mbwe erioga riri Yerusaleemu, wakaitre Paulo.

³²Aeniki waareka okukuba Paulo mala olwa waawona omukangasi owa awa-iye omunene na awakangasi wandi alala na awa-iye ni wawaazako.

³³Omukangasi omunene owa awa-iye yaaza a-amba Paulo, kandi alaga awa-iye waae mbwe wamusiwe ne eminyororo. Nikuema yawuuzia otino, “Ono naanu? Ne ekia akorre niki?”

³⁴Awantu awo waamuirania owugawuke-gawuuke. Awandi waaogereranga ni wawoola kino, na awandi wawoola ekindi ekisaasa. Erioga eriwanga ao rialowera omukangasi owa awa-iye okutuukra owuene owua amang’ana. Kutio yalaga awa-iye waae mbwe watoole Paulo waire mu ekambi yaawu.

³⁵Olwa Paulo yatuuka ku entambuko ezia ekiriango ekia ekambi eya awa-iye, kwanigirizia awa-iye awo okumuginga aeniki omurima ogwawanga ao gwareeta erioga ino.

³⁶Awantu awaalondanga waawu Paulo awo waakubanga erioga ni wawoola watino, “Ka-afwe ngatumuagala! Ka-afwe, ngatumuagala.”

Paulo agamba-gamba na awaagalanga okumuita

³⁷Olwa awa-iiye awo waawanga a-ampi okuingizia Paulo mu ekambi yaawu, Paulo yasawa omukangasi omunene owa awa-iiye iwaga eria okumulaga ekintu. Omukangasi oyo yamuirania otino, “Kane omanyire Olugiriiki?”

³⁸Iwue ng’ani iwue Omumisiri owa amiire gandi yavumbula iye no owukangasi owua Awaruumi mala atoola awalwani elufu wine agia nawo mu ekeewa?”

³⁹Paulo yamuirania otino, “Yaaya, inze ndi Omuyaudi owaiwulwa Taaso, omugizi omunene ogumanyiike mu ekialo ekia Siliisia. Nkuiyembere, ganya oreke ngambe-gambeko na awantu wano.”

⁴⁰Olwa omukangasi owa awa-iiye yamala okumuganyira, Paulo yaideng’a ku entambuko eziwariire mu ekambi asarigizia awantu na amakono. Ni waamala okusarigira wona, yagamba-gamba nawo mu omunwa gwawu ogwa Awayaudi na awalaga otino:

Awatumwa 22

¹“Awagaaka ni waamwifu, mbasawa mbwe musarigire mbalage ekintu ekia ndi.”

²Olwa waawurra na awagamba-gambra mu Oluibrania, waasarigira kiri. Kutio Paulo yagia emberu na awoola otino,

³Inze ndi Omuyaudi. Nyaiwulwa Taaso mu ekialo ekia Siliisia, ni nyakomera Yerusaleemu ano mu amakono aga Gamalieli na angerera mu endagirra ezia waaguukwa wiifu. Nyakola emirimo egia Katonda na amaani gange goona kiomo muwona reero mukola mutino.

⁴Nyanyaasia awantu awaawanga ni walonda engira eya Kristo eno, kandi nyagera wafwa. Nya-ambanga awasaaza alala na awakazi ni mbaira mu owusiwe.

⁵Kuwuene Omukangasi owa awoozia alala na awakengi awa ekiina waesa wawalaga, aeniki niwo awampanga ebaruwa okuirra awiina waawu awari Damaskaasi. Kutio nyagianga eyo ni nyamba awantu wano ni mbasiwa ne eminyororo kandi ni mbareeta Yerusaleemu okuswawukwa.

⁶Owuire wulala ni nyawanga ni ndi ampi okutuuka ku omugizi ogwa Damaskaasi, mu enyinga eya mukaaga omuwasu, nyaizukra idangaala erieru zerre ni riemera ku igulu ni rimmurika.

⁷Nyagwa ansi amafunikira, nikuemao nyawurra omwoyo ni gunyeta kandi ni gundaga otino, ‘Saulo! Saulo! Ekigera no ondambiizie wululu otio niki?’

⁸Nyamuwuzia ntino, ‘Ni iwue anu owa ndambiizie?’ Yanyirania otino, ‘Ni inze Yesu Omunazareeti owa odambiizie wululu.’

⁹Awantu awanyawanga nawo waawona owueru owuo ni ngawakawurra ekia omwoyo ogwo gwawoola.

- ¹⁰“Nyamuwuuzia ntino, ‘Omwami ekia nsugaane nkole niki?’ Omwami yanyirania otino, ‘Ema ogie Damaskaasi aa ogia okulagwa ewintu wiona ewia omiire okuteerwao okuuzza okukola.’
- ¹¹Awantu awa nyawanga nawo, waa-mpamba okukono waanyira Damaskaasi, aeniki owueru owuaema ku igulu owuo wuantangaazia amiiso wundeke omuwuunu.
- ¹²“Yawangao omuntu oetwa mbwe Ananiasi. Yawanga omuntu oeere Katonda owuti ino kandi oambre endagirra ziifu. Kutio Awayaudi awamenyere Damaskaasi woona waamugamba-gambangako geeza.
- ¹³Yaaza aimerra ampi ni inze nikuemao andaga otino, ‘Wamwifu Saulo, wona kandi!’ Amiiso gange gaiguka kalala kandi muwona.
- ¹⁴“Nikuemao yandaga otino, ‘Katonda owa waasoifu waasawanga amiire okukulowola kugere omanyere okuagala kwae kandi owone Omulowole waae Omweru otuukre kandi owurre amang’ana gaae na amatwi gaa.
- ¹⁵Ooza okuwa no olaga awantu amang’ana goona aga owuine na aga owuriire ku iye.
- ¹⁶Kutio kiwulao ekintu kindi kandi ekia okiarindirra, ni ema obatiiswe kugere oeruyiwue ku amawi gaa goona no oeta eriina eria Omwami Yesu.’
- ¹⁷“Lunyima ni miire okuirana Yerusaleemu ni nyasawanga mu ekaalu, nyawona owusasuko.
- ¹⁸Mu owusasuko owuo, nyawona Omwami na andaga otino, ‘Fuma Yerusaleemu wuangu-wuangu aeniki awantu wano ngawaaza okuganya ku ewintu ewia ooza okuwoola mbwe owuine kandi omanyire ku inze.’
- ¹⁹“Inze nyamuirania ntino, ‘Omwami, awantu wano woona wamanyire geeza mbwe inze nio omuntu owagianga mu amasinagoogi ni nyamba kandi ni nkuba awantu awaganyire ku amang’ana gaa.
- ²⁰Lwona olwa Stefaano, owemirimo waa yaitwanga, nyawangao kandi nyaganya no okuitwa kwae, aa ni inze owa enguwo ezia awaamuita ziateewua mu amagulu gange.’
- ²¹Omwami yandaga otino, ‘Iwue fuma ogie, aeniki nyiza okuira aliire mu ewialo ewia awantu awatari Awayaudi.’ ”
- ²²Awantu waawanga ni wamutegerezia ni wasarigiire kiri. No olwa yawoola amang’ana aga okugia ku awantu awatari Awayaudi, waatanika okukuba erioga wukalu ino ni wawoola watino, “Mumuite! Mumuite! Afwe aemeo! Ng’asugaane okuwa omulamu!”
- ²³Waagia emberu ni wakuba erioga lwona ni watandula enguwo ziwu ni wazirigiza kungulu kandi ni wagunduusia egunduusi yoona.

²⁴Olwa omukangasi owa awa-iye yawona otio, yalaga awa-iye waae mbwe watoole Paulo waire mu ekambi aa wamenyere kandi wamuswawuke enkowa kugere awalage ekigera na awantu wamukubra erioga otio.

²⁵No olwa waawanga ni wamiire okumusiwa geeza kugere amuswawuke, Paulo yawuuzia omukangasi owa awa-iye wundi owawanga na aimeriire ampi nae otino, “Endagirra iifu ngewoola mbwe kuwiiwi okuswawuka Omuruumi no owuoni wuae wukiari okutuukrwa?”

²⁶Olwa omukangasi owa awa-iye oyo yawurra otio, yagia ku omukangasi omunene owa awa-iye amuwuuzia otino “Oagala okukolaki kino? Omuntu oria no Omuruumi.”

²⁷Kutio omukangasi omunene owa awa-iye yagia ku Paulo amuwuuzia otino, “Mbwe ori Omuruumi?” Paulo yamuirania otino, “Ee nintio.”

²⁸Omukangasi omunene oyo yamulaga otino, “Inze nyaoloola amasendi amangi kugere mbe Omuruumi. Ni iwue?” Paulo yamulaga mbwe, “Inze ndi Omuruumi ku okuiwulwa.”

²⁹Awa-iye awaagianga okuwuuzia Paulo amang’ana waafuma waema ao. Olwa omukangasi omunene owa awa-iye yatuukra mbwe Paulo yawanga Omuruumi, owuti wuamumba ino aeniki yawanga na asiwre Omuruumi omwina waae.

Paulo airrwe ku oluwuga olwa awakengi awa ekiina

³⁰Enkio walwo omukangasi omunene owa awa-iye yasiwula Paulo mala alagirra Omukangasi owa awoozia alala na awagaaka awa ekiina waikumie kugere areete Paulo emberu waawu aeniki yagalanga okumanya ekiagera ni waaingirra Paulo. Ni waamala okuikumia, yareeta Paulo emberu waawu.

Awatumwa 23

¹Paulo yawarra awagaaka awa ekiina mu amiiso tiiri mala awoola otino, “Waamwifu, inze omwene ng’ambona no omwoyo gwange gunkengera ekiina ku ewintu wiona ewia miire okuwa ni nkola emberu wa Katonda nawuno reero.”

²Olwa Omukangasi owa awoozia oetwa mbwe Ananiasi yawurra otio, yalaga awantu awaawanga ni waimeriire ampi ni Paulo mbwe wamukube oluyu ku omunwa.

³Paulo yalaga Ananiasi otino, “Iwue omuntu ofwana ne enzizi ewakrwe ne erangi enzeru ono, Katonda aaza okukuswawuka ino; aeniki oikaale ao okunkengera ekiina nikulondokana ne endagirra, ni kandi iwue oona endagirra ku okulaga awantu wano mbwe wankube.”

⁴Awantu awaawanga ni waimeriire ampi nae waamuwuzia watino, “Owuo onyega Omukangasi owa awoozia, omukurumu owa Katonda?”

⁵Paulo yawairania otino, “Awiifu, ng’ankawanga ni manyire mbwe ono nio Omukangasi owa awoozia aeniki kwajojwa mu endagano mbwe, ‘Mutaaza mwagamba-gamba uwiiwi ku awakangasi awa awantu wiinyu.’”

⁶Olwa Paulo yawona mbwe ku awantu awaawanga ao awandi ku iwo waawanga Awasadukaayo na awandi waawanga Awafarisaayo, yawoola mu oluwuga no omwoyo ogwa kungulu otino, “Awiifu, inze ndi Omufarisaayo kandi omuzia owa Omufarisaayo. Inze ekigera ni ndeetrwe emberu wiinyu ano no okuganya okwa nganyire mbwe awafu waaza okuziuka.”

⁷Olwa yamala okuwoola otio, erioga riatanika agati eya Awafarisaayo na Awasadukaayo. Kutio awagaaka awa ekiina waagawukana.

⁸(Awasadukaayo iwo wawoola mbwe kuwulao okuziuka okwa awafu kandi mbwe ewikeeno nakuwa enyankoi ziwulao. Na Awafarisaayo iwo, waaganya mbwe ewintu wisatu ewio wiona wirio. Ekio nikio ekintu ekiareeta erioga.)

⁹Erioga agati ya Awafarisaayo na Awasadukaayo riawa inene ino. Awagerezi awa endagirra nyaluwega olwa Awafarisaayo waawoola watino, “Ifwe ngatuwona owuoni owua omuntu ono. Mukamanya mutie? Andi enyankoi nakuwa Omwoyo Omweru nio omiire okumulaga ewintu ewia awoola ewio.”

¹⁰Olwa omukangasi owa awa-iiye yawona amang’ana agati ya Awafarisaayo na Awasadukaayo ni gagia okuwa amawiiwi, yalaga awa-iiye waae mbwe wagie watoole Paulo agati yaawu wamuingizie mu enyumba eya awa-iiye aeniki yatianga mbwe awantu awo waaza waita Paulo.

¹¹Nyanga olwo owuire, Katonda yalaga Paulo otino, “Otatia aeniki kiomo omiire okulaga awantu amang’ana gange Yerusaleemu, nintio paka ogie okole Rooma oona.”

Awayaudi wagala okuita Paulo

¹²Olwa owuire wuakia, Awayaudi wandi waifuuwa ni wawoola mbwe ngawaaza okuria namba okunywa ekintu-ukintu ni wakiari okuita Paulo.

¹³Awantu wano waawanga awantu awakakira amakumi ane.

¹⁴Waagia ku awakangasi awa awoozia ni ku awagaaka awa Awayaudi wawalaga watino, “Tumiire okuifuuwa mbwe ngatuuza okuria ekintu-ukintu ni tukiari okuita Paulo.

¹⁵Kutio tuagala tutino: Mutumre omukangasi owa awa-iiye owutumwa mbwe awareetere Paulo mbwe muagala okutuukra owueru ku amang’ana aga awoola gano. Ni ifwe tuuza okumuibong’a tumuite na akiari okutuuka ano.”

¹⁶Olwa omwiwa owa Paulo owekizia yawurra amang’ana ago, yagia mu enyumba eya awa-iiye waawanga ni wamenyeremo alaga Paulo amang’ana aga yawurra ago.

¹⁷Paulo yaeta omukangasi wundi owa awa-iiye amulaga otino, “Toola omuwuuka ono oire ku omukangasi omunene owa awa-iiye. Kirio ekintu ekia agala okumulaga.”

¹⁸Kutio omukangasi oyo yatoola omuwuuka oyo amuira ku omukangasi omunene owa awa-iiye amulaga otino, “Omusiwe Paulo awerenga na anyetre. Olwa mugiiireko, ansawire mbwe ndeete omuwuuka ono ku iwue aeniki ari ne ekintu ekia agala okukulaga.”

¹⁹Omukangasi omunene owa awa-iiye oyo yatoola omuwuuka oyo agia nae antulo nikwo amuwuuzia otino, “Niki ekia oogala okundaga?”

²⁰Omuwuuka oyo yamuirania otino, “Mberenga ni mpuriire na Awayaudi wawoola mbwe enkio warikusawa mbwe oire Paulo emberi wa awakengi awa ekiina mbwe wagala okutuukra owueru ku amang’ana aga awoola.

²¹Ni nkugaania mbwe otawaganyira, aeniki wario awantu awakira amakumi ane, awamiire okuifuuwa okutaria kandi okutanywa ekintu-ukintu nawuno waite Paulo. Wamiire okuwurzania okuibong’era Paulo ku engira kugere wamuvwamre wamuite na akiari okutuuka ku oluwuga. Iwo nyingeeno warindirra okuwurra ekikuemako.”

²²Kutio yalaga omuwuuka oyo otino, “Gia, no otaaza walaga omuntu mbwe ondagre ekintu kino.”

Paulo atoorwe Yerusaleemu airwe Kaisaria

²³Nikuemao omukangasi omunene owa awa-iiye yaeta awakangasi wandi wawiri awa awa-iiye mala awalaga otino, “Mulowole awa-iiye mia wiwiri na awandi amakumi musamvu awalwanira ku efaraasi alala na awalwana na amafumo mia wiwiri nyagala okuwatuma Kaisaria reero enyinga isatu ezia owuire.

²⁴Nyagala mbwe mutuukirre Paulo oona efaraasi eya aaza okuniina, mumuire geeza ku Omwami Feliksi.”

²⁵Yajojera omwami ebaruwa ewoola mbwe:

²⁶“Ku omwami otiirwe Feliksi. Nkukeeziizie ino.

²⁷Awayaudi izuuzi wa-amba omuntu ono kandi waagalanga okumuita. No olwa nyawurra mbwe ari Omuruumi, nyagia na awa-iiye wange mutoola mu amakono gaawu.

²⁸Nikuemao nyawuine mbwe muire emberi wa awagaaka waawu kugere ntuukre owueru owua amang’ana.

²⁹No olwa nkorre otio, ntuukiire mbwe kiwulao-uwula ekintu ekia akorre ekisugre asiwirwe namba aitirwe. Ni ntuukiire mbwe olusoolo lwawu luambaane ne endagirra ziauwu aweene.

³⁰Kutio olwa ndagrwe mbwe wario Awayaudi wandi awawarra engira eya wakamuitramo, mbwine mbwe mutume ku iwue wuangu-wuangu. Lwona ndagre awantu awamuingiriire mbwe waaze emberi waao kugere wawoole owuwi wuae. Ni inze Klaudiasi Liisia, omukangasi omunene owa awa-iye.”

³¹Awa-iye waakola ekintu ekia waalagwa. Waatoola Paulo owuire owuo wamuirira nawuno waatuuka asi aetwa mbwe Antipatriisi.

³²Enkio walwo, awa-iye awa ku amagulu waairana wareka awa-iye awa ku efaraasi waagia emberi no olugendo.

³³Olwa waatuuka Kaisaria, waatoola ebaruwa wa-aa omwami kandi wata Paulo mu amakono gaae.

³⁴No omwami yamala okusoma ebaruwa eyo, yawuuzia Paulo ekialo ekia aemamo. Olwa Paulo yamulaga mbwe aema Siliisia,

³⁵yamulaga otino, “Nyiza okuwurra amang’ana gaa na awantu awakuingiriire wano wamiire okuuzi.” Nikuema, yasikirra awa-iye waae mbwe waire Paulo mu enyumba eyaombokrwa Eroode wamurinde geeza atateka.

Awatumwa 24

Awayaudi waingiriire Paulo ku Omwami Feliksi

¹Lunyima na amiire ataanu gaamala okuwita, Omukangasi omunene owa awoozia, alala na awagaaka wandi ku awagaaka awa Awayaudi no omuyaazi owa ewiina oetwa mbwe Tetulaasi, waagia Kaisaria waingirra Paulo ku Omwami Feliksi.

²Olwa Tetulaasi yaeewua iwaga, yatanika okuingirra Paulo otino, “Omwami, owukangasi wuao owulootu wumiire okureetra ekialo kiifu kino owuolu ino kandi ni kuwita ku entewe yao, ekialo kiifu kimiire okuwona okugawuka okulootu ku awiifu.

³Turi no owusangaavu ino ne enkomana eya omiire okureeta mu ekialo kiifu kino kandi tukuikaziizie ino.

⁴Ni ntatoorre enyinga ziao enyingi, nsawa mbwe kuwusiza wuao, oganye otegerezie amaziga giifu. Ngia okugawoola ku owuimpi.

⁵Tumiire okutuukra mbwe omuntu ono ari omuntu omuwiiwi omukianyaanya. Amiire okuweerako na atanika erioga agati ya Awayaudi asi-uasi aa wamenyere mu ekialo kiona. Kandi nio omukangasi owa awantu awa ediini eya owuweeyi eya Awanazareeti.

⁶Twamutuukra na akola ewintu ewitasugaane ewimwamia ekaalu, tumuamba. [Twagalanga okumukengera ekiina nikulondokana ne endagirra iifu,

⁷no omukangasi omunene owa awa-iiye Liisia, yaaza na awa-iiye waae atumunyagula.

⁸Nikuemao yasikirra awaamuingirra mbwe wakuuzeko.] Manyire mbwe no omueere embuuzia geeza, omwene ooza okutuukra mbwe ewintu ewia tumuingiriire nawio wino wiona wiri kuwuene.”

⁹Awayaudi wandi awaawanga ao woona waalonda omunwa ogwa Tetulaasi ogwo.

¹⁰Olwa Paulo yaeewua iwaga, yatanika otino, “Omwami, manyire mbwe omiire okuwa omukengi owa ekiina ku emiaka emingi mu ekialo kiifu kino. Kutio ndi no owusangaavu okuitatirra emberu waa.

¹¹No owuuziizie, ooza okutuukra mbwe okuemera ngie Yerusaleemu kugere ngie nsawe Katonda mu ekaalu, amiire ikumi ni iwiri gakiari okuwua.

¹²Awantu wano ngawakantuukra ni ngalusania amang’ana no omuntu-umuntu namba ni ntaniike erioga mu ekaalu nakuwa mu esinagoogi namba asi-uasi ku omugizi ogwa Yerusaleemu.

¹³Lwona wawula ekintu-ukintu ekia waesa okuta emberu waa ekiesa okulagana mbwe ewintu ewia wamboolako wino wiri kuwuene.

¹⁴Ekia ntaesa okulowa ne ekintu ekilala: Inze nsawa Katonda owa waaguukwa wiifu, ni ndonda engira eya Yesu eya iwo waeta mbwe ne ediini eya owuweeyi eya Awanazareeti eyo. Kandi mbula amang’ana ne ewintu wiona ewiri mu endagirra ezia Muusa alala ne ewintu wiona ewiajojwa na Awagambi awa Katonda.

¹⁵Noona ndi no okurindirra okwa woona wari nakwo mbwe awafu woona wariziuka, wawe awantu aweeru namba awooni.

¹⁶Kutio, enyinga ziona inze nkola wukalu kugere ekintu kitaaza kiawaa ekinkengera ekiina mu omwoyo gwange emberu wa Katonda nakuwa emberu wa awiina wange.

¹⁷“Nyagia Yerusaleemu ni miire okuwa enze ku emiaka emingi, okuirra awiifu amasendi kandi okufumizia Katonda omusango.

¹⁸Ni ni nyawanga ni nkiagia emberu ni nkola wino, awantu wano wantuukra mu ekaalu. Okwo kwatuukra ni miire okumala omugomo ogwa okuieruya. Ngawakantuukra no omurima ogwa awantu, lwona ng’anyakareeta erioga.

¹⁹Wario Awayaudi wandi awaema mu ekialo ekia Eesia awawanga ao, kandi woona wasugaane waaze emberu waa ano wanyingirre ni kirio ekintu ekiwiiwi ekia wakanyingirra nakio.

²⁰Ni kutari kutio, kane awantu wano kawawooleko owuwi owua waantuukrako olwa nyairwa emberu wa awagaaka awa ekiina,

²¹ekigawuuke ni ing'ana ilala eria nyawoola emberi wa awagaaka mbwe, 'Nkengerwa ekiina reero ku okuganya kwange mbwe awafu waaza okuziuka.' ”

²²Nikuemao Omwami Feliksi owawanga na amanyire amang'ana aga engira eya Yesu Kristo, yamala ekiina na awalaga otino, “Nyiza okuwalaga ekia miire okukenga ku amang'ana gano ni Liisia omukangasi omunene owa awa-iye amiire okuuza.”

²³Yalaga omukangasi owa awa-iye owa Paulo yateewua mu amakono gaae mbwe amurinde geeza atateeka. Ni lwona yamulaga mbwe awe na arekerako Paulo iwaga enyinga zindi kugere awiiko waae wamutunzie mu engira-ungira eya wagonziizie.

²⁴Lunyima na amiire gandi gaamala okuwita Feliksi ni mukaae oetwa mbwe Dosiila owawanga omwala owa Awayaudi yalagirra Paulo kandi waamutegerezia na agamba-gamba ku amang'ana aga okuwa no okuganya ku Yesu Kristo.

²⁵Ni kiomo Paulo yagia emberi na agamba-gamba ku okuwa omuntu omuigolovu, ni kiomo omuntu aesa yairinda omwene alala no okuikagra owuire owunene owua ekiina owuuzza, owuti wua-amba Feliksi mala amulaga otino, “Gia, nyanga ndiikweta kandi ni ntuukiire iwaga.”

²⁶Yaingirizianga mbwe Paulo aaza yamu-aako ekintu kugere amulekule. Kutio yalagirra Paulo agie emberi waae owuire ki owuire ni wakuba entaka nae.

²⁷Lunyima emiaka iwiri ni giamala okuwua, Pokiasi Feesto yatoola entewe eya Omwami Feliksi. Ni ku okuagala okuwa omulootu emberi wa Awayaudi, Feliksi yareka Paulo mu owusiwe.

Awatumwa 25

Paulo asawire mbwe airwe ku Kaisaari

¹Omwami Feesto yagia Kaisaria okutoola owuami owua ekitemo ekio. Ni yamala okumala eyo amiire asatu, yagia Yerusaleemu.

²Awakangasi awa awoozia alala na awagaaka awa Awayaudi waamugiako okuingirra Paulo,

³kandi ni wamusawa mbwe aganye awakorre geeza alagirre Paulo areetwe Yerusaleemu. Wagalanga otio aeniki waawanga ni wawisiizie okuibong'era Paulo ku engira kugere wamuite.

⁴No Omwami Feesto yawairania otino, “Paulo asiwirwe Kaisaria, kandi inze omwene nyiza okugia eyo wuangu ano.

⁵Kutio ni kuri mbwe yawakorra ekintu-ukintu ekiwiiwi awakangasi wiinyu kawaaze tugie nawo Kaisaria wagie wamuingirre eyo.”

⁶Omwami Feesto yamala omudiira omulala ne enusu Yerusaleemu, nikuemao airana Kaisaria. Olwa yatuuka Kaisaria, enkio walwo yalagirra Paulo areetwe emberu waae mu olwanyu olwa okukenga ewiina.

⁷Olwa Paulo yareetwa, Awayaudi awaema Yerusaleemu waamuisunguuzia wamuta agati nikwo watanika okumuwoolako amang'ana amangi amazito, aga namba iwo aweene ngawakaesanga okulagana owueru wuago.

⁸Ni Paulo yalowa amang'ana ago na awoola otino, "Awiifu, inze kiwulao namba ekintu ekilala ekiwiiwi ekia miire okukola nikulondokana ne endagirra ziifu, lwona nkiari okugamba-gambako uwiiwi ku ekaalu namba ku owuami owua Awaruumi nakatio."

⁹Ni ku okuagala okusangaazia Awayaudi, Omwami Feesto yawuuzia Paulo otino, "Mberi okagonzia okugia Yerusaleemu kugere ekiina kiao kigie kiwurrwe eyo?"

¹⁰Paulo yamuirania otino, "Ano nyiimeriire emberu wa entewe eya Kaisaari, kutio ano nio ekiina kiane kisugaane kiwurrwe. Kiomo iwue omwene owona, kuwue kiwulao ekintu ekiwiiwi ekia miire okukorra Awayaudi.

¹¹Ni kuri mbwe kirio ekintu ekia nyakola ekiwiiwi nikulondokana ne endagirra ekiesa kiagera nkengerwe ekiina ekia olumbe, ng'andowere. Ni ni kuri mbwe amang'ana aga wanyingiriire nago gano ng'agari kuwue, awulao omuntu oesa okunta mu amakono gaawu. Kutio inze nsawa mbwe nyirwe emberu wa Kaisaari."

¹²No Omwami Feesto yamala okugamba-gamba na awagaaka awamutunzia okukenga ekiina, yamulaga otino, "Omiire okusawa mbwe oirwe emberu wa Kaisaari, kutio ooza okuirwa eyo."

Feesto agamba-gambre no Omwami Agiriipa ku amang'ana aga Paulo

¹³Na amiire amatono gaamala okuwita, Omwami Agiriipa ni Bernia waaza Kaisaria mu owugeni owua okuingizia Feesto ku okulowolwa kwae okuwa Omwami.

¹⁴Ni waamala okuwa eyo ku amiire agasugre, Feesto yalaga Omwami Agiriipa otino, "Ario omuntu wundi ano owa Feliksi yareka mu owusiwe.

¹⁵No olwa nyagia Yerusaleemu awakangasi awa awoozia na awagaaka awa Awayaudi waamuingirra ni wawoola mbwe asugaane aitwe.

¹⁶Ni inze nyawagaania mbwe ng'ane enkola iifu ifwe Awaruumi okuita omuntu oingiriirwe na akiari okueewua iwaga oona airanie amang'ana aga aingiriirwe nago emberu wa ekiina, awamuingiriire woona ni wario.

¹⁷Olwa waaza ano nganyakakinda, no owuire owualondako nyalagirra Paulo areetwa mu olwanyu olwa ewiina, kandi nyaikazia ekiina.

¹⁸Olwa awantu awaamuingirra awo waaimerra, ngawaka-amba ku ewintu ewiwiwi ewia nyaingirizianga mbwe wakamuingiriire nawio.

¹⁹Iwo waagamba-gamba mala ku okutawurizania kwawu ni Paulo ku amang'ana aga ediini yaawu ni ku omuntu wundi oetwa mbwe Yesu. Omuntu ono yafwa kale, ni Paulo awoola mbwe ario omulamu.

²⁰Amang'ana gano gantang'aang'ia ndeka okuwa ne engira endootu eya okutuukra owueru owuri ku amang'ana gaawu gano. Kutio nyawuuzia Paulo na akagonzia okugia Yerusaleemu kugere ekiina kigie kiwurrwe eyo.

²¹Ni Paulo yasawa mbwe airwe ku Kaisaari kugere Kaisaari omwene agie amukengere ekiina. Kutio nyalaga awarinzi mbwe wamurinde nawuno kutuuke muire ku Kaisaari.”

²²Omwami Agiriipa yalaga Feesto otino, “Noona nyagala okuwurrako omuntu ono na amatwi gange.” Feesto yamuirania otino, “Nintio omwami. Enkio orimutegerezia.”

Paulo ari emberu wa Omwami Agiriipa

²³Enkio walwo, Omwami Agiriipa ni Bernia waaingira na awantu awangi mu enyumba eya awantu waagomerangamo. Awakangasi awa awa-iiye na awantu awanene-nene ku omugizi ogwo waawaingizia no owuti ino. Nikuema Feesto yalagirra mbwe Paulo areetwe.

²⁴Olwa Paulo yareetwa, Feesto yawoola otino, “Omwami Agiriipa alala na awantu wona awari ano. Omuntu owa muwona emberu iinyu ono, Awayaudi wona awamenyere Kaisaria ano alala na awamenyere Yerusaleemu wamiire okukuba erioga mbwe aitwe.

²⁵Ni ng'ankamutuukra no owuoni owukagera aitwe. Ni nikulondokana no okusawa kwae omwene mbwe airwe emberu wa Kaisaari, nyawuine mbwe muire eyo.

²⁶Ni mbula ne ekintu ekilamu ekia nyesa nyajojera Kaisaari ku omuntu ono, omwami. Kutio mureetre emberu wiinyu, kugere iwue Omwami Agiriipa ontunzie ku ekintu ekia nyesa nyajojera Kaisaari ku omuntu ono.

²⁷Aeniki ngakulootu okuira omusiwe emberu wa Kaisaari ni kiwulao ekintu ekilagana owuoni wuae.”

Awatumwa 26

¹Nikuema Omwami Agiriipa yalaga Paulo otino, “Iwaga ne eriao, gamba-gamba tukuwurre.” Paulo yagingirizia okukono atanika okuitatirra na awoola otino,

²“Omwami, ne enkawi endootu ino okuuzza emberu wao kugere mboole ekia manyire ku ewintu wiona ewia Awayaudi wanyingiriire nawio,

³aeniki manyire mbwe omanyire geeza enkola ezia Awayaudi alala no okutawurizania kwawu mu amang'ana. Kutio nkusawa mbwe oganye ontegerezie mpoola.

⁴“Awayaudi woona wamanyire kiomo enkola ziangе ziawanga ni kiomo nyawanga ni menyere mu ekialo kiifu ni ku omugizi ogwa Yerusaleemu okuemera mu owuwuuka wuange.

⁵Ngawaesa okulowa mbwe ku emiaka emingi wamiire okuwa ni wamanyire mbwe nyawanga mu owulala owua Awafarisaayo owurindre endagirra ziifu wukalu ino mu ediini iifu.

⁶Omwami nyingiriirwe emberi wao reero luno aeniki ndi no okuganya ku ewintu ewia Katonda yaifuwira waaguukwa wiifu.

⁷Ewio niwio ewintu ewigera na awantu awa ewiriango wiifu ikumi ni wiwiri, wasawa Katonda owuire ki owuire ni warindirra okuwituukra. Omwami, okuganya okwa ndi nakwo kuno, nikwo okugera Awayaudi wano ni wanyingirra.

⁸Ekigera ni kitawawurikanra inywe Awayaudi mbwe Katonda aziusia awafu niki?

⁹Noona nyawonanga mbwe kwawanga kulootu okulwania eriina eria Yesu Omunazareeti mu engira ziona.

¹⁰Kuwuene ekio niki ekintu ekia nyakolanga Yerusaleemu. Awakangasi awa awoozia waa-mpa amaani aga okuta Awakristo mu owusiwe. Kandi olwa waakengerwanga ewiina ewia olumbe, inze noona nyaganyanga ne ekiina ekia waakengerwanga.

¹¹Kangi ino nyawanyaasia mu amasinagoogi ni mbanigirizia okugamba-gamba uwiiwi ku eriina eria Yesu. Nyawarega kandi okusu kwampambanga nawo ino, okwageranga ni ngia mu emigizi emikate-kaate egia ewialo windi ni mbaingizia mu eminyako-nyaako.

¹²“Owuire wulala, nyafuma okugia Damaskaasi ne ebaruwa eya nyaeeewua na awakangasi awa awoozia eya okumpa amaani okugia okunyaasia awantu awa Katonda.

¹³Omwami, ku engira ni ngia, nyaizukra ni mbona idangaala erieru zerre okukira owueru ewua enyanga ni riema ku igulu rinsunguuzia rinta agati, alala na awantu awa nyawanga nawo. Ziawanga enyinga mukaaga omuwasu.

¹⁴Twona twagwa ansi, kandi nyawurra Omwoyo ni gundaga mu Oluibrania gutino, ‘Saulo! Saulo! Ondambiizie owululu otio kolaki? Oinyaasia wusa ne ewintu ewia okola wino, aeniki ofwana omuntu okuba iwaale ku erindi.’

¹⁵“Nyamuwuuzia ntino, ‘Ni iwue ano, Omwami?’ “Omwami yanyirania otino, ‘Ni inze Yesu, owa odambia.

¹⁶Ni ema, aeniki nkufumiire okukulowola ku emirimo egia okulaga awantu ewintu ewia owuine reero luno ne ewindi ewia nkiaza okukulaga emberi eyo.

¹⁷Ndiikutoola mu amakono aga Awaisraeli alala na awatari Awaisraeli, awa nkutumako,

¹⁸kugere ogie owaigule amiiso wagaluke waeme mu ekierema, waaze mu owueru. Ogie owatoole mu amakono aga Ekikeeno, waaze ku Katonda awarekere amawi gaawu, kugere woona watuukre iwaga agati ya awalowole awa Katonda ku okuganya ku inze.’ ”

¹⁹Paulo yagia emberu na awoola otino, “Kutio Omwami Agiriipa, inze ng’anyakatambuka ewia nyalagwa mu owusasuko okuema ku igulu.

²⁰No owusookere nyagia ngalanzia ku omugizi ogwa Damaskaasi, nikwo ngia Yerusaleemu ni mu ekialo kiona ekia Awayaudi ni mu ewialo ewia awatari Awayaudi. Asi-uasi aa nyagia, nyalanzizia awantu mbwe wagaluke wareke amawi, kandi walagane ne enkola ziwu mbwe kuwene wagaluuke.

²¹Kino nikio ekiagera na Awayaudi wampamba kandi ni wagala okunyita mu ekaalu.

²²Ni Katonda amiire okuwa na antunzia nawuno reero mpano ndi emberu waa. Ndaga awantu awakaate na awatono mala amang’ana aga awagambi awa Katonda alala ni Muusa waawoola

²³mbwe Meesia paka anyasiwue kandi awe oookere okuziuka okuema ku awafu, kugere alagane owueru owua owuinunuzi ku Awayaudi alala na awatari Awayaudi.”

²⁴Kutuuka ao, Omwami Feesto yamutawania mu amang’ana no omwoyo ogwa kungulu otino, “Paulo! Paulo Omutwe gwao guuzre uwiiwi? Na mpano isoma riao ringi rikulalusia!”

²⁵Paulo yamuirania otino, “Yaaya omwami, omutwe gwange ngamuwiiwi. Amang’ana aga mboola gari kuwene kandi ngawoola na amaingirizio amalootu.

²⁶Ngawoola no owusiani aeniki manyire mbwe Omwami Agiriipa oona agamanyire kandi kiwulao-uwula ekintu ekia atamanyire aeniki ngawikaikola owuiwisi.

²⁷Omwami Agiriipa, mberu oganyire ku awagambi awa Katonda? Manyire mbwe owaganyireko.”

²⁸Omwami Agiriipa yawuuzia Paulo otino, “Paulo, oingirizia mbwe oesa okungalusia nyawa Omukristo mu enyinga entono zino?”

²⁹Paulo yamuirania otino, “Zikawa enyinga entono nakuwa enyinga enyingi, no okusawa kwange kuri mbwe ng’ani iwue eng’ene, ni kugia inywe awantu awantegerezia mwona mukagaluuke muwe ki inze, ni turekere eminyororo giange gino gieng’ene.”

³⁰Nikuemao Omwami Agiriipa, ni Feesto ni Bernia alala na awantu woona awaawanga ni waikaale nawo ao waaema.

³¹Ni waagianga waawoola agati yaawu watino, “Omuntu ono awula no owuoni owua akaitrwa namba owua akasiwirwa.”

³²Omwami Agiriipa yalaga Feesto mbwe, “Kuweeko mbwe Paulo ngakasawa mbwe airwe ku Kaisaari, akasiwuulwe agie.”

Awatumwa 27

Paulo airrwe Rooma

¹Olwa amang’ana gaawisiwua mbwe tusugaane tugie Itaalia, awa-iiye waatoola Paulo alala na awasiwe wandi wawata mu amakono aga Juliasi, omulala ku awakangasi awa awa-iiye awa Kaisaari.

²Twaniina owuato owuaemanga Andramitiasi owuawanga ni wugia nyamialo egia mu ekialo ekia Eesia. Twawanga ni Aristakuusi Omumakedoonia, owaemanga Thesaloniika.

³Enkio walwo olwa twatuuka Sidooni, Juliasi, ku owusiza wuae, yaganyira Paulo agie awonane na awiiko waae wamutunzie ne ewintu.

⁴Olwa twasiawala ao, omuyaga omuzito gwatufumira emberi ogwagera tulonda oluwega lundi olwa ekizinga ekia Saipraasi aa omuyaga gwawanga ni gugwiriire.

⁵Twa-ambuka tuwitra mu enyanza eya Siliisia ni Pamfilia, tugia Miira mu ekialo ekia Liisia.

⁶Olwa twatuuka ano, omurinzi omunene owa awasiwe yatugalusia mu owuato owuaemanga Aleksandaria ni wugia Itaalia.

⁷Twarumuka mpola ino ku amiire amangi kandi okutuuka Nidaasi kwatuweera eminyako-nyaako ino. Nikulondokana no owungi owua omuyaga ogwatufumira, twalonda oluwega lundi olwa Kireete no omuyaga omutono, tugia tutuuka Salmooni.

⁸Twawa ne emirimo emikalu ino okuwalamia owuato nawuno tutuuka ku omwalo oguri mu ikondo erietwa mbwe Ikondo Ilootu, ampi no omugizi ogwa Liisia.

⁹Kwatuukra ni tumiire okuona enyinga enyingi ino aa katio okugia emberi no olugendo kwafwananga okuigoga. Aeniki namba amiire aga omugomo aga okuvwang’ana, aga enyanza etanika okuonekra, goona gawanga ni gamiire okuwita. Kutio Paulo yawagaania otino:

¹⁰“Awiifu, mbona olugendo lwifu luno, ni tukiagia emberi okutambuka ano ngalugia okuwa olulootu yawa. Andi owuato wuifu wuuzwa okuatika emisigo giteeke kandi owulamu wuifu wuwe mu eminyako-nyaako.”

¹¹Kukawa kutio, Omurinzi omunene owa awasiwe ngakategerezia amang’ana aga Paulo yawoola. Iye yalonda amang’ana aga omuwunguzi omunene ni ng’ina owuato.

¹²Owungi owua awantu waawona mbwe tuwalame tugie Foiniksi aeniki omwalo ogwa twawanga ni tugoweremo ngagukawanga omulootu okuwaamo mu amiire aga entwigo. Omwalo ogwa Foiniksi gwawanga ku ekizinga ekia Kireete ni guwariire embega iwiri, nyakukono okumosi okwa ewugwanyanga ni nyakukono okusaaza okwa ewugwanyanga.

Enyanza ewiire waawu Paulo ku owuziwa

¹³Olwa omuyaga omunyerere gwanika okuwuuta okuema nyaluwega olwa ansi, waingirizia mbwe watuukiire ekintu ekia waagalanga. Kutio waakulula enangaari watanika okuwalama ampi ne ensanyaata eya ekizinga ekia Kireete.

¹⁴Ni twawanga ni tukiari okugia ale, omuyaga omuzito agwa ‘Maagula’ gwatufumira nyamusenye.

¹⁵Gwaluuma owuato kandi okuwarizia iyanga eria owuato ku ekialo kwatukira. Kutio waareka owuato wugie no omuyaga ewuziwa.

¹⁶Twatuukra owuwuuwu olwa twatuuka nyaluwega olwa ansi eya Kauda aa omuyaga gwawanga omutono. Kukawa mbwe twawaako ne eminyako-nyaako ano, tuakola wukalu tusiwa geeza akaato akatono aka twawanga ni tukulula.

¹⁷Waakaniinia mu owuato wasiwa owuato ne engoe wukalu. Waakola otio aeniki waatianga mbwe andi owuato wuuzi wuagaza mu itosi ampi no omwalo ogwa Liibia. Nikuema waaisia etanga ansi, wareka owuato wuweye no omuyaga.

¹⁸Amasira gaaisonga ino aa olwa kwatuuka enkio walwo, waatanika okuzigiza emisigo egia waawanga ni wagingre mu amanzi.

¹⁹Owuire owua okusatu waarigiza ewigowero ewia owuato mu amanzi na amakono gaawu aweene.

²⁰Olwa twamala amiire amangi ni tukiari okuwona iwasu namba eng’eni-ng’eni, no omuyaga gwona ni guisonga okuwa omuzito ino, twatoolako emioyo mbwe tufwire.

²¹Lunyima na awantu waawanga ni wamiire okutoola amiire amangi ni wataria, Paulo yaimerra emberu waawu awalaga otino, “Awiifu kuweeko mbwe mwategerezia amang’ana gange, ngatukaingiire mu eminyako-nyaako gino.

²²Ni katio mbalaga mbwe mutafwa omwoyo aeniki awulao omuntu ooza okufwa. Owuato wueng’ene niwuo owuuzi okuoneka.

²³Enyankoi eya Katonda wange owa nsawa, izo yanyizreko owuire,

²⁴kandi andaga otino, ‘Paulo, otatia, paka oimerre emberi wa Kaisaari. Katonda ku owusiza wuae ateere awantu wooka awa owunguka nawo wano mu amakono gao.’

²⁵Kutio awiifu, mutatia! Manyire mbwe Katonda aaza okukola kiomo nyalagrwe.

²⁶Ni kukawa kutio, omuyaga guuza okutuweya nawuno tuariire ku izinga.”

²⁷Lunyima, emidiira iwiri ni gimiire okutuwuera ni tuweya-weya mu enyanza eya Mediterenia, owuire agati amaingirizio gaazra awaunguzi mbwe paka kuwe mbwe turi ampi ne ekialo.

²⁸Kutio olwa waazigiza olugoe olusiwirweko iwaale okumanya owuliire owua amanzi, waatuukra mbwe waawanga ewifuwa amakumi awiri okuema ansi. Waaikako wutono kandi wakola otio, luno waatuukra mbwe wari ewifuwa ikumi ni witaanu okuema ansi.

²⁹Waarigiza enangaari ine mu amanzi okuambirra owuato, aeniki waatianga mbwe owuato wuuzwa wuaariira ku ewiema. Nikuema wasawa Katonda mbwe awarinde owuire wukie.

³⁰Awawunguzi waagalanga okufuma owuiwisi wareke owuato, kutio waaisia akaato akatono karia mu amanzi ni waisemerezia mbwe wagia okurigiza enangaari zindi mu amanzi na akaato ako.

³¹Ni Paulo yalaga omukangasi owa awa-iiye alala na awa-iiye wuae otino, “Na awaunguzi wano wafumre mu owuato muno, ngamuuzwa okulama.”

³²Kutio awa-iiye waakewa engoe eziawanga ni zisiwire akaato ako wakareka kaweya no omuyaga kagia.

³³Owuire katio wuawanga a-ampi okukia. Kutio Paulo yalaga awantu awaawanga mu owuato omwo otino, “Awiifu emioyo giinyu gimiire okuwa ni giangiriire kandi nyingeeno mumiire okumala emidiira iwiri ni mutaria.

³⁴Nyagala mbwe murieko ekintu kugere mutuukre amaani. Mbalaga mbwe awulao omuntu-umuntu ooza okuteesia namba oluwiri lwae.”

³⁵Ni Paulo yamala okuwoola otio, yatoola emikaati agisereka, nikuema agenyula atanika okuria.

³⁶Ekio kiaoreezia awantu emioyo, kutio wooka waaria.

³⁷Twawanga awantu mia wiwiri na amakumi musamvu ni mukaaga mu owuato omwo.

³⁸Lunyima na awantu waamala okuiguta, waagia emberi okurigiza engaano mu amanzi kugere owuato wuwe owuwuwu.

Owuato wuatiike

³⁹Olwa owuire wuakia, ekialo kiatang'ang'ia awawunguzi wareka okumanya aa waawanga. Olwa waawona omwalo oguri mu ikondo, waawisia mu emioyo giawu mbwe ni kuesekana wagie wagowie owuato ao.

⁴⁰Kutio waakewa engoe eziawanga ni ziambiriire enangaari zisigala mu amanzi nikwo wagia wasiwula engoe eziawanga ni ziambiriire engoworo, mala wakulula etanga ndala eya emberu kugere omuyaga guwiisie ku ekialo.

⁴¹Ni ngawakatuuka. Owuato wuariira ku ewiema ewia mu amanzi. Wuagaza nyaiyanga aa ngawukaemao. Kandi amasiira amakate-kaate gaawukuba nyakilumba ni wuatika.

⁴²Olwa awa-iye waawona watio, waagalanga mbwe waite awasiwe woona, kugere watakuba abaali warumuke wagie.

⁴³No olwa omukangasi waawu yagia amanya ekia waagalanga okukola, yawagaania, aeniki ngakaagalanga mbwe Paulo aitwe. Omukangasi owa awa-iye oyo yalaga awantu woona otino, "Awaesa okukuba abaali wagwe mu amanzi wagie ku ensanyaata.

⁴⁴Awandi watoole ewimega nakuwa amawasi aga owuato agaatiike wanyogieko!" Nintio twona twatuuka ku ekialo ni turi awalamu.

Awatumwa 28

Paulo ari ku ekizinga ekia Malta

¹Ni twawanga ni tumiire okutuuka ku ekialo, ni turi awalamu twona, twatuukra mbwe ekizinga ekio kietwa mbwe Malta.

²Awa mu ekizinga ekio waatuingizia ne enyingizia ewula kuno, kandi waatukumra omurro tuota. Emvula yawanga ne ekuba kandi embeo yoona yawangako.

³Paulo yagia akunza enkwi areeta. No olwa yazita mu omurro, owuyu owua omurro wuafumia engulusi mu enkwi omwo emuluma okukono, egazako.

⁴Olwa awa mu ekizinga ekio waawona ne enzoka eyo egazre ku okukono okwa Paulo, waaisimania ni wawoola agati yaawu watino, "Ngamuwona? Paka kuwe mbwe omuntu ono, no omwisi. Kutio kukawa mbwe aemere ku igogo omulamu, eng'anga ekia mugwira-ugwira."

⁵Ni Paulo yatenzia okukono kwae ku omurro enzoka eyo egwa mu murro eyia. Ne enzoka eyo ngekamukola ekintu.

⁶Awantu waarinda okuwona omuwiri gwae ni guzimba namba na agwa ansi afwe, ni waarinda wadoowa. Olwa waareka okuwona ekintu ekiwiiwi ni kimuikorra, waagaluka wawoola mbwe, "Omuntu ono ng'ano omuntu-umuntu, ono ni katonda"

⁷Pabiliasi omwami owa ekizinga ekio yawanga na amalowa ampi na aa twagowera ao. Yatuingizia no owusangaavu tuwa awageni waae ku amiire asatu.

⁸Kuno kwatuukra ni swawu omwami oyo ari ku iseero iseeka no olunyalalo ni lumukubre. Kutio Paulo yamugiako amusawira na amutaako amakono, alama.

⁹Olwa kino kiamala okuikola, awalwire woona awa mu ekizinga ekio wareetwa kandi waalamiwua woona.

¹⁰Lunyima ni twafumanga, awantu awo waatu-aa ewintu ewingi ino kandi waatuteera ewintu wiona ewia twa-agalanga mu owuato.

Paulo aemere Malta agiire Rooma

¹¹Ne emienzi isatu giamala okuwua, twaniina owuato owua omugizi ogwa Aleksandaria owuaetwanga mbwe 'Awazia Awalongo' owuawanga ni wugowere ao kugere entwigo ewite, tuwunguka nawuno

¹²tutuuka Saikuuse aa twamala amiire asatu.

¹³Okuema ao twawunguka tugia ku omugizi ogwa Regiamu. Enkio walwo omuyaga gwatanika okuwuuta ni gugia aa twagianga. Kutio kwatutoola amiire awiri okutuuka ku omwalo ogwa omugizi ogwa Puteoli.

¹⁴Eyo twatuukra Awakristo wandi awaatusawa mbwe tuweeko nawo ku omudiira omulala. Ni tuema ao, twagia Rooma.

¹⁵Awiina wiifu awari ku omugizi ogwa Rooma, olwa waawurra mbwe turi ao, waaza okutuaganra mu Ekiiyia ekia Apiasi ni mu Amayumba Asatu aga Awageni. Olwa Paulo yawawona, yairanzia Katonda otioo. Kandi yatuukra amaani amayia. Kutio yaikazizia Katonda.

Paulo alanzia amang'ana aga Katonda ku omugizi ogwa Rooma

¹⁶Olwa twatuuka Rooma, Paulo yaganyirwa okumenya mu enyumba yaae omwene no omurinzi owamurindanga atateeka.

¹⁷Lunyima na amiire asatu gaamala okuwita, Paulo yalagirra awakangasi awa Awayaudi mu omugizi ogwo. Olwa waaza, yawalaga otino, "Awiina wange, ng'ankakorra awiifu uwiiwi lwona ng'ankaona enkola ezia twatuukra okuema ku waaguukwa wiifu. Ni kukawa kutio, nya-ambwa Yerusaleemu nyesaniwua ku Awaruumi ki omusiwe.

¹⁸Olwa waamala okumbuuzia ku ewintu ewia nyaingirra nawio, waagalanga okunsiwula aeniki ngawakantuukrako owuoni owusugre no olumbe.

¹⁹Na Awayaudi iwo waalowa mbwe ntasiwulwa. Kino kiannigirizia okusawa mbwe Kaisaari awe mbwe nio owurra ekiina kiange, kukawa mbwe ng'ankaagalanga okuingirra awiifu.

- ²⁰Ekio niki ekigerre ni mbalagiriire kugere muuze ngambe-gambe ni inywe, aeniki nsiwirwe ne eminyororo gino ku okuganya kwange ku Kristo no okuziuka okwa awafu, ekintu ekia Awaisraeli woona wamiire okuwa ni warindirra.”
- ²¹Awakangasi awa Awayaudi awo waamuirania watino, “Tukiari okutuukra ebaruwa nakuwa amang’ana agaemere Yudeea, lwona awulao omuntu ku awiifu awo omiire okuuzza ano atulaga ekintu-ukintu ekiwiiwi ku iwue.
- ²²Ni kukaweere kulootu no otulagre ekia oingirizia ku amang’ana gano aeniki tumanyire mbwe awiifu woona ngawaganyire ne ediini eya orimo eno.”
- ²³Waalowola owuire owua okuagaana. Olwa owuire owuo wuatuuka, awantu awangi waaza aa Paulo yawanga na amenyere. Kutio Paulo yawagerera amang’ana aga Katonda okuemera kunkio nawuno kutuuka owuire, kandi na awalaga owueru owuri mu Owuami owua Katonda. Yawalagirizia okuema ku endagirra ezia Muusa alala na amang’ana aga awagambi waajoja mbwe Yesu nio Kristo.
- ²⁴Awandi ku iwo waaganya ku amang’ana gaae, na awandi ngawakagaganyako.
- ²⁵Awantu awo waagawukana mu amang’ana kandi waatanyika olwa Paulo yawoola otino: “Kane Omwoyo Omweru ogwa Katonda yawoola kuwuene olwa yalaga waaguukwa wiinyu okuwitra ku Isaaya omugambi owa Katonda mbwe;
- ²⁶‘Gia olage awantu wano otino, muritegerezia ni ngamuriwurra, lwona okuwarra muriwarra, ni ngamuriwona.
- ²⁷Aeniki awantu wano emioyo giawu mikalu, lwona waziwire amatwi gaawu kandi waindirizie amiiso gaawu. Wataaza waawurra na amatwi kandi amiiso gaawu gataaza gaawona, lwona emioyo giawu gitaaza giaingizia amang’ana kugere wagaluke waaze ku Katonda, awanunule.’ ”
- ²⁸Paulo yamariizia na awalaga otino, “Nyagala mumanye mbwe owutumwa owua owuinunuzi wuno wuiriirwe awatari Awayaudi, kandi waaza okuwuingizia.”
- ²⁹[Ni Paulo yamala okuwalaga otio, Awayaudi awo waafuma wagia ni wasoolana agati yaawu aweene.]
- ³⁰Paulo yamala eyo emiaka iwiri na amenyere mu enyumba eya aoloola kandi yaingizia awaagia okumuwona woona.
- ³¹Yalanzia amang’ana aga Owuami owua Katonda kandi na awagerera ku amang’ana aga Yesu Kristo. Yakola otio no owusiani ino kandi awulao omuntu-umuntu owamuemerezia.

Awaruumi

Awaruumi 1

Amakeezio agasookere

- ¹Ni inze Paulo, omukurumu owa Kristo Yesu, owaeterwa emirimo egia okuwa omutumwa kandi owaloworrwa emirimo egia okulanzia injiili eya Katonda.
- ²Injiili eno Katonda yagigamba-gambako kale okuwitra ku awagambi waae mu endagano yaae enzeru.
- ³Injiili eene egamba-gamba ku omuzia waae owaazanga okuwa omuizukulu owa Daudi, ku owulamu waae owua ku ekialo kuno.
- ⁴Ni ku amaani aga Omwoyo Omweru, yalaganiwua ki Omuzia owa Katonda ori na amaani goona olwa yaziuka aema ku awafu. Ono nio Yesu Kristo Omwami iifu.
- ⁵Katonda yatu-aa owusiza owua okuwa awutumwa ni kuwitra ku Yesu omulala oyo kugere tueete awantu woona awaema mu enganda ziona wamuganyeko kandi wamulonde, kugere eriina riae rieewue owunene.
- ⁶Inywe Awaruumi mwona muri awalala ku awantu awaaetwa okuwa awantu awa Yesu Kristo.
- ⁷Kutio mbajojera inywe awantu awari Rooma, awa Katonda agonziizie kandi awayaeta mbwe wawe awantu waae omwene. Muwe no owusiza no owuolu owuema ku Soifu Katonda no Omwami iifu Yesu Kristo.

Paulo agala okugia Rooma

- ⁸Owusookere nyiranzia Katonda otioo ni kuwitra ku Yesu Kristo ku inywe mwona aeniki amang'ana aga okuganya kwinyu ku Kristo gaizuule ekialo du.
- ⁹Katonda owankorra emirimo egia okulanzizia awantu injiili egamba-gamba ku omuzia waae, na amaani gange goona eng'ene nio okawa omuwoni wange ku kiomo mbaingirizia
- ¹⁰enyinga ziona ni nsawa. Nsawa Katonda mbwe ni kuri okuagala kwae, aganye ampe iwaga eria okuza okuwawona nyingeeno, ni kuesekana.
- ¹¹Amiiga gandia ni inywe ino kugere nyize mbaeeko ensereki ezia mu omwoyo ezia Katonda amiire okuta mu owulamu wuange kugere muwe awakalangufu ku Katonda.
- ¹²Ekia mboola ni mbwe, ni tuuza okuagaana, nyiza okuwa-ambia amaani mu okuganya kwinyu, kandi mwona muuza okunyambia amaani mu okuganya kwange, kandi twona tuuza okutunzania owufwanani.
- ¹³Awiina wange, nyagala mumanye mbwe nawuno reero, kangi ino miire okukola wukalu kugere nyize mbawone ni nyaigarrwa. Nyagala ino mbwe kiomo miire okuwa ni nkola emirimo egia Katonda agati ya enganda zindi ezitari ezia awiifu

Awayaudi, nkole owufwanani agati iinyu kugere awantu wagaluke waganye kandi walonde Yesu Kristo.

¹⁴Mu omwoyo gwange, ndi no omusango ogwa okuira amang'ana amalootu aga Kristo ku awantu woona, awari mu ewialo ewikomere ne ewiri enyima, awaganga awasomere na awamaya awataasoma.

¹⁵Ekio nikio ekigera ni nyagala okuuza okulanzia amang'ana aga Katonda Rooma ino.

¹⁶Inze mbula ensuuko ni injiili aeniki injiili nie egingre amaani aga Katonda aga okununula awantu woona awari no okuganya, okutanikra ku Awayaudi kutuuka ku awatari Awayaudi.

¹⁷Injiili nie etulaga kiomo owuigolovu owuemera ku Katonda wutuukrwa kandi mbwe awawutuukra na awaganyire ku Yesu weng'ene, okuemera mu owutanikro paka mu owutuuko. Kuri mala kiomo kwajojwa mu endagano mbwe, "Omuntu ori mu empurizanio ni Katonda ku okuganya, nio orilama."

Katonda aswawuka awooni woona

¹⁸Okusu okungi ino kuamba Katonda no owuoni owua awantu woona awalowera owueru owua Katonda okuwonekana ne enkola ziawu embiiwi, kandi okusu okwo kuwaazra ni kuema ku igulu ku Katonda.

¹⁹Waswawukwa ni Katonda aeniki ewintu ewia awantu waesa okumanya ku Katonda wiona wiri enze wawimanyire geeza kandi Katonda omwene nio omiire okuwamanyisia ewintu ewio wiona.

²⁰Okuemera Katonda yaluka ekialo, awantu wamiire okuwa ni wamanyire amaani amangi agawula omurengo agatariwua aga Katonda ari nago, ne ewigera Katonda awa Katonda wiona. Ewintu wino ngawiwonwa na amiiso, ni wawimanyire aeniki wawona ewintu ewia Katonda yaluka. Kutio okawoola mbwe iye ngawimanyire aweeya.

²¹Ni kukawa mbwe awantu wamanyire Katonda otio, ngawamu-aa owuti owusugre nae yawa kandi ngawamuiranzia otioo. Ni aa okukola otio, amaingirizio gaawu gaoneeke kandi emioyo giawu gimwamre ti.

²²Wawoola mbwe wari awaganga ni wari awamaya.

²³Aa okusawa Katonda omulamu ori no owunene, wasawa katonda ensaasa eziwanzrwe mu omufwano ogwa omuntu ofwa ne ezindi ezifwana enyonyi ne entiang'i ezimoola alala ne ezitamoola.

²⁴Enkola embiiwi zino nizio ezigera ni Katonda awalowa kandi na awalekula wakole-ukola ewintu ewia ensuuko ewia emioyo giawu giagala, ewintu ewia waona nawio emiwiri giawu aweene.

²⁵Wagaluusie owuene owuri ku Katonda okuwa owuweeyi. Wasawa kandi wakorra ewintu ewilukrwe, aa wakasawire Katonda omulusi osugre okueewua owunene amiire goona.

²⁶Kutio Katonda amiire okuwalekula wawe-uwa no okuagala okukola ewintu ewimwamu ewia ensuuko. Namba awantu awekikazi wareka okugia ku owuriri na awasaaza, ni wakola watio na awakazi awiina waawu, ekintu ekiwiiwi ekitasugaane kiikole yawa.

²⁷Awantu awekisaaza wooka nintio wareka okugia ku owuriri na awakazi kiimo kusugaane kuwe, kandi emiwiri giawu giyia no okuagala okusooda awasaaza awiina waawu. Awasaaza waitala na awasaaza awiina waawu kandi Katonda awaswawuka owusugre ne enkola ziwu embiiwi ezio.

²⁸Aeniki walowere ewintu ewia wamanyire ku Katonda kandi ngawamu-aa iwaga mu emioyo giawu, Katonda oona awalekuule mu okuwa no okuingirizia okuoneeke okuwaira mu okukola ewintu ewia watasugaane wakole.

²⁹Emioyo giawu giizuule du ne ewintu ewiwiiwi ewigawukane-gawukaane, endandiire no okuagala okuwiiwi. Ee, emioyo giawu giizuule ni iyari, owuisi, okulwana, owuweeyi no owuzigu. Waona amiina aga awantu kandi

³⁰wata amang'ana amawiiwi ku awantu. Waregere Katonda lwona wari awantu awalulu pe. Emitwe giawu mikalu kandi wagonziizie okuitumbula. Watoola enyinga ziwu okugarizia engira empia ezia okukola owuoni. Wari awantu awatatiire awiiwuzi waawu.

³¹Walowa okuwurra amang'ana, kandi ni waifuuwire okukola ekintu, ngawakituusia. Wawula olugonzi kandi ngawa-ambra awiina waawu amasaasra.

³²Kukawa mbwe wamanyire geeza mbwe Katonda ari kuwene okuwoola mbwe omuntu-umuntu okola ewintu ewifwana wino asugaane afwe, iwo ngawawikola-ukola kweng'ene, ni waganya na awawikola kandi wawatondowola.

Awaruumi 2

Awulao oganyiirwe okukengera omwina waae ekiina

¹Kutio iwue okengera omwina waao ekiina, wa no okumanya mbwe okawa anu, oona ooza okukengerwa ekiina aeniki enyinga ezia okola otio, ofwana oikengera ekiina iwue omwene. Ni kutio aeniki ewintu ewia okengera awantu ekiina ni wakola, niwio ewia iwue oona okola.

²Tumanyire mbwe okuswawukwa okwa Katonda aswawuka nakwo awantu ni wakorre ewintu ewifwana wino, kusugaane kandi kuri kuwene.

³Iwue omuntu-umuntu ono, okakengera otie awandi ekiina ni oona okola ewia wakola? Oingirizia mbwe Katonda aaza okureka okukuswawuka kolaki?

⁴Kusi otoola wutono owusiza wuae owungi no okugia mpola kwae okwa kangi agia mpola okukuswawuka ku amawi gaao? Osugaane omanyane mbwe Katonda ari omusiza ni iwue kugere ogaluke oreke amawi.

⁵Ni iwue, ku okuwa kwao no omwoyo omukalu ogutagaluka, oiwiikiire ekiina ekiwiiwi no okusu okungi okwa Katonda. Ekiina kiazane kiriwa nyanga olwa owutuuko, olwa ekiina ekiri kuwuene ekia Omwami Katonda kirikengwa.

⁶Owuire owuo Katonda ari-aa omuntu ki omuntu omugawo gwae nikulondokana ne enkola ezia yakola.

⁷Awantu awakola olutuunyo mu enkola endootu aa watareka, iwo wagala okutuukra owukaate no owuti owuema ku Katonda alala no okuwa no owulamu. Iwo Katonda ariwa-aa owulamu owutariwua.

⁸Na awantu awagala ewiawu aweene wieng'ene, awakola owuoni kandi awalowa okulonda ewintu ewiri kuwuene, iwo Katonda ariwaswawuka owululu ino.

⁹Owululu ne emidambo giriamba omuntu ki omuntu ku ekialo okola owuoni: okutanikra ku Awayaudi nikwo awatari Awayaudi.

¹⁰Ni ku awa enkola endootu, iwo warieewua owukaate, owuti no owuolu ni Katonda: okutanikra ku Awayaudi nikwo awatari Awayaudi.

¹¹Kuri kutio aeniki Katonda ngatiire amiiso aga omuntu-umuntu.

¹²Kiomo awantu awakola owuoni ni watamanyire ensikirra ezia Muusa wariteeka, nintio awamanyire ensikirra ni wakorre owuoni wona warikengerwa ekiina nikulondokana ne ensikirra ezia Muusa.

¹³Kuri kutio aeniki okuwurra ensikirra kweng'ene ng'anikwo okugera awantu ni wawa aweeru emberu wa Katonda, ni no okurinda ensikirra nikwo okugera omuntu yawa omweru emberu wa Katonda.

¹⁴Kutio awatari Awayaudi, awawula ensikirra ezia Muusa, ni mu owulamu wuawu wakola ewia ensikirra ezio ziagala, aweene walagana mbwe wamanyire ewisugaane ne ewitasugaane wikolwe, kukawa mbwe wawula ensikirra ezia Muusa.

¹⁵Kuri kutio aeniki owulamu wuawu wulagana mbwe ewintu ewia ensikirra ezia Katonda ziganyire nazio wijojerwe mu emioyo giawu. Ee, aeniki enyinga ziona amaingirizio gaawu gawakengera ekiina ku ewintu ewiisre wiona ewia wakola mu owulamu wuawu.

¹⁶Nikulondokana ni injiili eya inze Paulo ndanzia, nintio kuuza okuwa owuire owua Katonda arikengra awantu wona ekiina ni kuwitra ku Kristo Yesu, ku ewintu wiona ewia waakola owuiwisi mu owulamu wuawu.

Okuwa ne ensikirra ezia Awayaudi ngakununula

- ¹⁷Katio iwue, oieta Omuyaudi kandi oteere okuganya kwao ku ensikirra ezia Muusa. Oitumbula mbwe ori ampi ni Katonda
- ¹⁸kandi mbwe omanyire okuagala okwa Katonda ne ewintu ewilootu ewisugaane wikolwe aeniki wagererwa ensikirra ezia Muusa.
- ¹⁹Mu omwoyo gwao oitoola mbwe ni iwue oambra awawuunu ensimbo kandi mbwe ni iwue owueru owua awantu awari mu ekierema.
- ²⁰Mbwe ni iwue ota awamaya ku engira kandi omugerezi owa awaana. Oiwona otio aeniki oingirizia mbwe ori no okumanya okutuukre no owuene owuema mu ensikirra ezia Katonda.
- ²¹Katio iwue ogerera awandi, niki ekikulowera okuigerera iwue omwene? Olanzizia awantu geeza mbwe wataiwa, ni iwue ekigera no oiwa niki?
- ²²Iwue olaga awantu mbwe watasooda, mberi osooda? Iwue owoola mbwe ozirre katonda ensaasa ezilongerwe, kuwa kutie mbwe okola ne ewintu ewitoorrwe mu ekaalu yazio?
- ²³Oitumbula mbwe omanyire ensikirra ezia Katonda ezio, ni kandi ni iwue oreetra eriina eria Katonda ensuuko no oona ensikirra ezia Katonda.
- ²⁴Kuri kiomo kwajojwa mu endagano eya Katonda mbwe, “Ni inywe awagera eriina eria Katonda ni rigamba-gambwako uwiiwi na awatari Awayaudi.”
- ²⁵Nyagala mumanye mbwe okuirwa enyangu kuri ne emirimo ku omuntu olondokana ne ensikirra eng’ene. Ku omuntu otambuka ensikirra ezia Katonda, okuirwa enyangu kuri wusa, kandi kuwulao okugawukana agati yaa no otairrwe enyangu.
- ²⁶Kutio otari Omuyaudi otairrwe enyangu na atuusiizie okuagala okwa ensikirra, kuwue ne Katonda aaza okumuingizia ki omulala ku awantu waae.
- ²⁷Ekio niki ekigera na awatari Awayaudi waaza okulagana mbwe Katonda ari kuwue ne okuwakengera ekiina aeniki kukawa mbwe iwo ngawairwa enyangu, ni wa-ambre ensikirra ezia Katonda. Ni inywe kukawa mbwe muri ne ensikirra lwona muirrwe enyangu, ni mukiaona-uona ensikirra ezia Katonda.
- ²⁸Aeniki ewintu ewia enze ng’aniwio ewigera omuntu yawa Omuyaudi kuwue ne, lwona okuirwa enyangu okukorrwa omuwiri ng’anikwo okuirwa enyangu okuri kuwue ne.
- ²⁹Yawa! Omuyaudi kuwue ne no ori Omuyaudi okuemera mu omwoyo gwae, lwona okuirwa enyangu okuri kuwue ne no okuirwa enyangu okwa mu omwoyo okukolwa no Omwoyo Omweru ogwa Katonda, okutari okujojerwe mu ensikirra ezia Muusa, yaaya. Omuntu oyo Katonda omwene, otari omuntu, nio omutondowola.

Awaruumi 3

- ¹Katio no owulootuuki okuwa Omuyaudi? Nakuwa okuirwa enyangu katio kuri ne emirimoki?
- ²Ee, wurio owulootu ino okuwa Omuyaudi kandi okuirwa enyangu kuri ne emirimo mu engira enyingi. Owusookere, Awayaudi niwo awa Katonda yasooka oku-aa amang'ana gaae.
- ³Katio omuntu akaingirizia mbwe okutalonda okwa Awayaudi waareka okulonda amang'ana aga Katonda kuesa okugera Katonda oona areke okutuusia ewia yawaifuuwira?
- ⁴Yawa! Awantu wona waweeye, ni Katonda awe kuwene. Kuno kuri mala kiomo kwajojwa mu endagano mbwe: "Oo Omwami Katonda. Iwue paka owulootu wua wuwonekane no ogamba-gamba, kandi owe omukire no okengera awantu ekiina."
- ⁵Awandi waesa okuwoola mbwe, nakatio ni kuri mbwe amawi giifu galagana geeza kiomo Katonda ari kuwene, mberi Katonda akola geeza okutuswawuka ni tukola amawi?
- ⁶Ni ngakuri kutio yaaya, aeniki Katonda na atari kuwene lwona na ataigoloole, akakengera ekialo ekiina otie?
- ⁷Omuntu akiaesa okuwoola otino, "Owuweeyi wuange niwuo owugera okuwa kuwene okwa Katonda ni kuwonekana geeza kandi ne eriina riae rieewua owunene. Katio niki ekigera ni nkiakengerwa ekiina mbwe ndi omwoni?"
- ⁸Okuwoola otio kufwanana no okuwoola mbwe, "Kane tukole-ukola owuoni kugere owulootu wuweeo." Kino niki ekintu ekia awantu awatuwoolako amang'ana aga owuweeyi wawoola mbwe tugerera awantu. Katonda ariswawuka awantu awo owusugre ne ewia wawoola ewio.

Awulao omuntu omweru owula no owuoni

- ⁹Katio tukawoola mbwe Awayaudi wari geeza okukira awantu wandi? Yaaya, ngakuri kutio yawa. Miire okulagana kiomo owuoni wukirre Awayaudi na awatari Awayaudi owuagani.
- ¹⁰Kuri-uri kiomo kwajojwa mu endagano eya Katonda mbwe, "Awulao omuntu namba omulala ori omweru owula no owuoni,
- ¹¹namba omuntu omulala owa amang'ana gaingirra kandi awulao oogala Katonda.
- ¹²Awantu wona wagaluuke warekere Katonda. Wona wawula emirimo kandi awulao namba omulala okola ewintu ewilootu.
- ¹³Amang'ana agaema mu eminwa giawu gawunya ki ekivundu ekia ekitundu mu ekiwaga ekikiari okuwugrwa. Okuwoola amang'ana aga owuweeyi nigio emirimo giawu. Endimi ziwu zifumia amang'ana agafumuta ki owusungu owua engulusi.

- ¹⁴Waizuule na amang'ana amalulu alala no okufuuwa awantu.
- ¹⁵Wa-anguya okusuluzia amasaai, lwona
- ¹⁶asi-uasi aa wagiire warekao eminyako-nyaako ne emidambo emingi.
- ¹⁷Ngawamanyire engira eya okumenya na awantu no owuolu,
- ¹⁸lwona ngawatiire Katonda yawa.”
- ¹⁹Katio tumanyire kuwuene mbwe ensikirra ezia Muusa ziambre awantu awari ansi yazio. Kutio ekiina kikira awantu woona aa awulao okawoola ekintu, kandi owuoni owua awantu woona awari ku ekialo wuwonekane kuwuene. Kino kiwanyaga ekia wakaiyambako emberu wa Katonda na awakengera ekiina.
- ²⁰Kuri kutio aeniki awulao namba omulala oriwa mu empurizanio ni Katonda ku okulonda ensikirra yawa, ne ensikirra ziateewua kugere awantu wamanye mbwe owuoni niki.

Engira eya okuwa mu empurizanio ni Katonda

- ²¹Ni nyingeeno erio engira ndala eya okureeta awantu mu empurizanio ni Katonda, eta-ambaane no okulonda ensikirra. Katonda amiire okulagana engira eyo geeza kandi eri enze kuwueru. Ensikirra ezia Muusa alala na awagambi woona waagamba-gamba ku engira eno.
- ²²Engira yazane eri mbwe Katonda areeta awantu woona mu empurizanio nae ku okuganya kwawu ku Yesu Kristo. Akorra awantu woona awaweere no okuganya otio aeniki kuwulao okugawukana agati ya Awayaudi na awatari Awayaudi
- ²³Ni kutio aeniki awantu woona wamiire okukola owuoni kandi ngawasugre emberu wa owueru owua Katonda.
- ²⁴Ni wareetwa mu empurizanio nae wusa, no owusiza owua Katonda ni kuwitra ku Yesu Kristo owawatoola mu amawi mala awata owuyanga.
- ²⁵Katonda yafumia Yesu okuwa omusango kugere, ni kuwitra ku amasaai gae aga yasuluzia, arekere awantu woona awaganyire ku Yesu amawi gaawu. Katonda yakola otio kugere alage awantu owuigolovu wuae, aeniki ku owuorezi wuae ngakaswawuka awantu awa kale ku amawi aga waakola.
- ²⁶Katonda yaagalanga mbwe awantu awa mu amiire gano wamanye mbwe ari omulongoole na awareeta mu empurizanio nae ni waganyire ku Yesu Kristo.
- ²⁷Katio lwona kirio ekia omuntu akaitumbula nakio mbwe atuukiire na amaani gae omwene? Yawa, aeniki okuwa kwifu mu empurizanio ni Katonda ngakuema mu okulonda ensikirra yaaya, ni kuema ku okuganya ku Yesu Kristo.
- ²⁸Kuri kutio, aeniki tumanyire kuwuene mbwe omuntu awa mu empurizanio ni Katonda ku okuganya, ni ngaku okulonda ensikirra yawa.

²⁹Kusi Katonda ni Katonda owa Awayaudi weng'ene? Ngari Katonda owa awatari Awayaudi woona? Ee, ari Katonda owa awatari Awayaudi woona.

³⁰Aeniki Katonda no omulala, kiomo areeta Awayaudi mu empurizanio nae ku okuganya ku Yesu Kristo, nintio lwona ku okuganya okulala okwo, areeta awatari Awayaudi mu empurizanio nae.

³¹Kusi omuntu akaingirizia mbwe ni tugerera okuganya ku Yesu kuno, mbwe katio tuwoola mbwe ensikirra ziwula ne emirimo? Yaaya, okuganya kuno nikwo okutuusia ensikirra.

Awaruumi 4

Abraamu yawa mu empurizanio ni Katonda ku okuganya

¹Tukawoolaki ku Abraamu guukwa owa Awayaudi, ino-ino ku eking'ana kino?

²Ni kuri mbwe Katonda yata Abraamu mu empurizanio nae ku enkola endootu ezia Abraamu yakola, kiomo Awayaudi waingirizia, kangato Abraamu yawanga ne ekia yaesanga okuitumbula nakio. Ni kiomo kuri, yawulanga ne ekia yaesanga okuitumbula nakio emberi wa Katonda.

³Ekio nikio ekigera ne endagano ewoola mbwe, "Abraamu yaganya ku Katonda, kandi ku okuganya kwae okwo Katonda yamuingizia ki omuigolovu."

⁴Kuri mala kiomo omuntu okorra owundi emirimo ngaewua egia owusa, na aoolwa omugawo ogusugre ne emirimo egia akorre. Ngatoola omusaara gwae ki ekintu ekia ng'ina emirimo amueere-uaa wusaasa, ni ki omugawo ogwa asugaane amuloole.

⁵Ni ku omuntu oganyire ku Katonda, otakola na amaani gaae kugere Katonda amuingizie, kurio okugawukana okukaate. Katonda ori na amaani aga okureeta, kugia omwoni mu empurizanio nae, aaza okumuganya ki omuntu omuigolovu ku okuganya kwae okwo.

⁶Daudi oona yawoola owufwanani olwa yagamba-gamba ku ensereki eya omuntu owa Katonda aingiizie ki omuigolovu ku okuganya kweng'ene okutari ku enkola ziae omwene otino:

⁷"Awantu awa Katonda arekeere amawi gaawu na awaserekwe; awantu awa Katonda asanikiire amawi gaawu.

⁸Kuwuene omuntu owa Katonda ngaingirizia amawi gaae, no oserekwe."

⁹Tukawoola mbwe ensereki eno eri mala eya Awayaudi weng'ene? Yaaya, eri eya awatari Awayaudi woona. Tuwuine mbwe ku okuganya kweng'ene Katonda yawala Abraamu ki omuntu omuigolovu.

¹⁰Ni kino kiaikola ri? Ni yawanga na amiire okuirwa enyangu kusi ni yawanga na akiari? Yaaya, ni yawanga na akiari.

¹¹Yairwa enyangu lunyima ki ekilagano ekia okuwa kwae mu empurizanio ni Katonda okwa yatuukra mu engira eya okuganya ni yawanga na akiari okuirwa enyangu. Katonda yakola otio kugere Abraamu awe swawu awantu woona awaganyire ku Yesu Kristo ni watairrwe enyangu. Ku okuganya, iwo woona waingiziwua mu empurizanio ni Katonda.

¹²Lwona ari swawu awantu awairrwe enyangu woona, awatairrwe-uirwa enyangu kweng'ene, na awalonda omufwano ogwa okuganya okwa Abraamu soifu yawanga nakwo namba ni yawanga na akiari okuirwa enyangu.

Okuganya kwagera Katonda atuusia ekia yaifuwira Abraamu

¹³Okuifuuwa okwa Katonda yaifuwira Abraamu na awiizukulu waae mbwe aaza okuwa-aa ekialo, ngakukaaza mu engira eya okulonda ensikirra yawa, ni kwaza mu engira eya owuigolovu owuema ku okuganya ku Katonda.

¹⁴Aeniki, kuweeko mbwe awatuukra ekia Katonda awifuuwiire wari mala awantu awalonda ensikirra weng'ene, ao kane okuganya ku Katonda kuwula emirimo, lwona okwifuuwa okwa Katonda kuri wusa.

¹⁵Kuri kutio aeniki ensikirra nie egera Katonda na aswawuka awantu no okusu, ni aa ensikirra ewula, okuona ensikirra kwona kuwulao.

¹⁶Kutio Katonda atuusia ekia yaifuwira Abraamu na awiizukulu waae. Akola otio wusaasa ku owusiza waae kugere woona wawe no owuyanga owua okutuukra ekia yaifuwira Abraamu. Ni ng'ani ku awari ne ensikirra weng'ene, ni namba ku awari no okuganya okufwanana no okwa Abraamu yawanga nakwo. Aeniki Abraamu nio swawu awantu woona awari no okuganya ku Katonda.

¹⁷Nintio kwajojwa mbwe: "Miire okukulowola owe swawu enganda enyingi."Emberi wa Katonda ao, Abraamu yaganya amang'ana aga Katonda yamuwoolako mbwe ari soifu gano, ki agamiire okuikola. Ee, kane Katonda ng'anio o-aa awafu owulamu kandi ogera ewintu ewiwulao ni wiwaaoo?

¹⁸Abraamu yaganya ku Katonda kandi yata omwoyo okuwona ekitaaesanga okuikola. Kuno kwagera awa swawu enganda enyingi mala kiomo yawanga na amiire okulagwa mbwe, "Nintio awiizukulu waaoo wariwa awangi."

¹⁹Kukawa mbwe yawanga ampi okutuusia emiigo mia kilala, Abraamu ngakareka okuganya okwa yawanga nakwo namba ni yawanga na amanyire geeza mbwe (iye omwene yamala okuema ku omugizi kale) omuwiri gwae gwafwanananga ogwamala okufwa kandi Saara mukaae oona olwiwulo lwae lwamala okugia kale. Kutio ku okuiwula awaana, yamanya mbwe iye ni mukaae Saara, waafwanananga awaamala okufwa.

²⁰Kukawa kutio, yaganya aa ngakataao kaozi ku ekintu ekia Katonda yamuifuwira, kandi yasonga okuwa omukalangufu mu okuganya. Ya-aa Katonda owunene namba ne ekintu kiazane kiawanga ni kikiari okuikola,

²¹aeniki yaganya ino mbwe Katonda ari na amaani aga okutuusia okuifuuwa kwae.

²²Kino niki ekigera ni “Katonda yamuingizia ki omuntu omuigolovu” ku okuganya kwae.

²³Amang’ana agawoola mbwe “Katonda yamuingizia” gano ngagakajojerwa Abraamu eng’ene,

²⁴ni twagajorerwa ifwe, awaganyire ku Katonda owaziusia Yesu Omwami iifu na amutoola ku awafu, twona. Ifwe awaazanga okuingiziwua mu empurizanio ni Katonda ku okuganya.

²⁵Yaezaniwua kugere aitwe ku amawi giifu, kandi yaziusiwua kugere tuwe mu empurizanio ni Katonda.

Awaruumi 5

Okuwa no owuolu ni Katonda

¹Kutio, aeniki tumiire okuingiziwua mu empurizanio ni Katonda ku okuganya, turi no owuolu ni Katonda ni kuwitra ku Omwami iifu Yesu Kristo.

²Yesu owa tuganyireko ono nio omiire okutuigurra engira eya okutuukra owusiza owua Katonda owua turimo nyingeeno wuno. Kandi turi no owusangaavu no omwoyo ogwa okurindirra okuwa ni Katonda mu owunene owuae.

³Ni ng’ano okwo kweng’ene, ni tuwa awasangaavu namba mu eminyako-nyaako egituuzra, aeniki tumanyire mbwe eminyako-nyaako gigerwa twawa no olutuunyo,

⁴no olutuunyo lugera omuntu yawa no omwoyo ogwa Katonda aganyire nagwo, no omwoyo ogufwanana no ogwo, gugerwa twawa no omwoyo ogwa okurindirra,

⁵no omwoyo ogwa okurindirra ngagutugwisia. Kuri kutio aeniki Katonda amiire okuizuzia emioyo giifu no olugonzi okuwitra ku Omwoyo Omweru owa Katonda atueere.

⁶Kutio tuwona mbwe mu enyinga ezia twawulanga amaani aga okuitunzizia aweene, Kristo omwene yatufwira ifwe awooni.

⁷Ne ekintu ekikalu ino okuingirizia mbwe omuntu akafwira omuntu omuigolovu otiire ensikirra ezia Katonda, andi omuntu omulootu, kaozi.

⁸Ni Katonda yalagana mbwe atugonziizie ino otino: Ni twawanga ni tukiari awooni, Kristo yatufwira.

⁹Kiomo nyingeeno tumiire okureetwa mu empurizanio ni Katonda okuwitra ku amasaai aga Kristo otino, ni kuwene mbwe ni kuwitra ku Yesu wazane, Katonda aaza okutununula kugere atatuswawuka no okusu kwae.

¹⁰Ee, ni kuri mbwe mu amiire aga twawanga awazigu awa Katonda, twairaniwua mu empurizanio nae ni kuwitra ku okufwa okwa Yesu omuzia waae, katio okuwa kwae omulamu kuuza okutureetra owuinunuzi owuagana wutie!

¹¹Ngakuri kutio kweng'ene, ni lwona tuwa no owusangaavu ino ni Katonda ni kuwitra ku Omwami iifu Yesu Kristo, owa nyingeeno atuiraanie ku Katonda.

Adaamu yareeta olumbe, ni Yesu areetere owulamu

¹²Kutio, mala kiomo omuntu omulala nio owagera owuoni ni wuingira ku ekialo, kandi owuoni niwuo owuareeta olumbe, olumbe lwona lwazra awantu woona aeniki awulao omuntu otaakola owuoni.

¹³Namba ni Katonda yawanga na akiari okuesana ensikirra ziae ni kuwita ku Muusa, awantu waakolanga owuoni. Kukawa kutio omuntu awalrwa owuoni mala ne ensikirra eteerweo.

¹⁴No olumbe lwawa na amaani ku awantu woona okuemera mu amiire aga Adaamu kutuuka mu amiire aga Muusa, kugia awantu awataaona ensikirra eya Katonda yataao kiomo Adaamu yakola. Adaamu ono, mu engira zindi, yawanga omufwano ogwa Kristo awaazanga okuuzza lunyima.

¹⁵Ni, empanwa eya Katonda atu-aa, no owuoni owua Adaamu yakola, ngawifwanana yaaya. Ni kuwuene mbwe owuoni owua Adaamu omuntu omulala yakola wuno, wuagera awantu woona wafwa. Ni kukawa kutio, owusiza owua Katonda ari nawuo na awantu awangi, alala ne empanwa eya a-aa awantu wusa ni kuwitra ku owusiza owua Yesu Kristo omuntu omulala, nene okukira.

¹⁶Empanwa eya Katonda aesana egawuuke ne ekia owuoni owua Adaamu wuareeta otino: Ni kuema ku owuwi owua Adaamu yakola, Katonda yamukengera ekiina ekia omwoni; ni, ni kuema ku amawi amangi aga awantu awangi waakola, Katonda yawa omusiza nawo mala awareeta mu empurizanio nae ki awawula no owuoni.

¹⁷Ni kuwuene mbwe owuoni owua omuntu omulala wuagera olumbe lutanika okuwa na amaani ku awantu woona. Katio awantu awa Katonda aweere omusiza nawo ino kandi awa aeere empanwa eya okuwa mu empurizanio nae, iwo warimenya owulamu owua owukire owuagana wutie, ni kuwitra ku omuntu omulala Yesu Kristo?

¹⁸Kutio mala kiomo enkola endala embiiwi eya omuntu omulala yakola, yagera Katonda akengera awantu woona ekiina ekia omwoni, nintio lwona enkola endootu eya omuntu omulala eng'ene yakola, yagera awantu woona ni wawa mu empurizanio ni Katonda kandi ni wawa no owulamu.

¹⁹Aeniki mala kiomo okutakola okuagala okwa Katonda okwa omuntu omulala kwagera awantu woona wawa awooni, nintio okukola okuagala okwa Katonda okwa omuntu omulala kuuza okugera awantu awangi wawe awigolovu emberu wa Katonda.

²⁰Ensikirra yareetwa kugere owuoni wuisonge. No owuoni ni wuisongere, owusiza owua Katonda awa nawuo na awantu wuona wuisonga wuawa owungi okukira.

²¹Kutio mala kiomo owuoni wuawa na amaani ku awantu kandi wuareetra awantu olumbe, nintio lwona amaani aga owusiza owua Katonda gareeta owuigolovu owuira awantu mu owulamu owutariwua, ni kuwitra ku Omwami iifu Yesu Kristo.

Awaruumi 6

Ku Kristo turi awalamu ni ku okukola owuoni turi awafu

¹Ekia tuesa okuwoola katio niki? Tugie emberu ni tukola-ukola owuoni kugere Katonda aongerezie owusiza wuae?

²Ng'anintio yawa! Ku okukola owuoni ifwe twafwa, katio kandi tukareeta otie okugia emberu okukola owuoni mu owulamu wuifu?

³Ngamumanyire mbwe ifwe twona olwa twabatiiswa, Katonda yatuta mu owulala ni Yesu Kristo kandi twaizogaana nae mu olumbe lwae, mu owubatiiso omwo?

⁴Twafwa nae kandi twa-awirwa nae mu engira eya owubatiiso kugere mala kiomo Soifu Katonda yalagana owunene wuae ku okuzisia Kristo okuema ku awafu amenya kandi, nintio twona tumenye owulamu owuyia.

⁵Kiomo Katonda amiire okututa alala ni Kristo mu okufwa kwae otio, kuwuene Katonda aaza okututa mu owulala nae mu okuziuka kwae lwona.

⁶Aeniki tumanyire mbwe olwa Yesu yawambwa ku omusalaaba, owulamu wuifu owukulu wuona wuawambwa nae ku omusalaaba. Kino kiaikola kugere omwoyo ogukola owuoni guonwe mu owulamu wuifu. Okwo kutusiwula mu okuwa awagule awa owuoni

⁷aeniki omuntu omufu iye aisiwuule kandi owuoni wuwula amaani ku iye.

⁸Kiomo kuri kuwuene mbwe twafwa ni Kristo alala, turi no okuganya mbwe tuuza okuwa awalamu nae lwona.

⁹Aeniki tumanyire mbwe Kristo yaziusiwua aema ku awafu, ngarifwa kandi, lwona olumbe luwula amaani ku iye.

¹⁰No olumbe olwa Yesu yafwa, yafwa kalala okukira amaani aga owuoni ilala kandi okuwa omulamu okwa ari omulamu nyingeeno, ari omulamu okulagana owunene owua Katonda.

¹¹Mu engira emfwanani, mwona musugaane muiwone ki awantu awaafwa kandi wakira amaani aga owuoni. Okuwa awalamu okwa muri awalamu ku Kristo Yesu, muri awalamu kugere mulagane owunene owua Katonda.

¹²Kutio mutaaza mwaganya owuoni wuawa na amaani mu emiwiri giinyu egifwa, mbwe mukole okuagala kwagio okuwiiwi, yaaya.

¹³Lwona mutaaza mwaezania ewiimo ewia emiwiri giinyu ku okukola owuoni, ti ngera ne ewintu ewia okukorra owuoni. Ni, aa okukola otio, mufumie owulamu wuinyu ku Katonda ki awantu awaatoowa mu olumbe ni wareetwa mu owulamu. Kandi mufumizie Katonda ewiimo ewia emiwiri giinyu wiwe ewintu ewia okukorra emirimo emilongoole.

¹⁴Nyingeeno owuoni ngawusugaane wuwakangatre, aeniki ngamukangatiirwe ne endagirra yaaya, ni mukangatiirwe no owusiza owua Katonda.

Omukurumu owa owuigolovu

¹⁵Muingirizia mbwe aeniki ifwe tukangatiirwe no owusiza owua Katonda, katio tusugaane tukole-ukola owuoni aeniki ngatukangatiirwe ne ensikirra? Mboola nti yaaya, mulawire!

¹⁶Kusi inywe ngamumanyire mbwe omuntu awa omukurumu owa ekintu namba omuntu owa aifumiizie okukola okuagala kwae? Oesa okuwa omukurumu owa owuoni owuira awantu mu olumbe, nakuwa omukurumu owa okukola okuagala okwa Katonda, okugera omuntu yawa omulongoole.

¹⁷Ni Katonda aikaziwue ino aeniki kukawa mbwe kuluweri mwawanga awasiwe awa owuoni, lunyima mwaganya kandi mulonda engerera eya awakurumu awa Katonda waawareetra ne emioyo giinyu giona.

¹⁸Inywe Katonda yawasiwula awatoola mu owuoni kandi nyingeeno muri awasiwe awa okukola ewintu ewilongoole.

¹⁹Nkola na amang'ana aga mukola nago mu owulamu wuinyu owua ku ekialo kino aeniki, ki awantu, muri awagata mu okuwurra kwinyu. Mala kiomo aa kale mwaesana ewiimo ewia emiwiri giinyu okuwa mu owusiwe owua okukola enkola emwamu ne enkola embiiwi etawua, katio nyingeeno muwifumie wiwe mu owusiwe owua okukola ewintu ewia Katonda aagala, ewigera no omuntu amenya owulamu owueru.

²⁰Ni mwawanga awakurumu awa okumenya mu owuoni, ewintu ewia Katonda aagala wiawulanga iwaga eria okukangatra owulamu wuinyu.

²¹Mundageko owulootu owua mwatuukra mu okumenya owulamu owua nyingeeno ni muingirizia, ensuuko ziwa-amba? Ewintu wino wiira awantu mu olumbe.

²²Ni kiomo nyingeeno Katonda amiire okuwasiwula awatoola mu owuoni kandi nyingeeno muri awakurumu waae, katio muesa okukola ewintu ewieru ewiira awantu mu owulamu owutariwua.

²³Aeniki omugawo ogwa omuntu atuukra ku okukola owuoni no olumbe, ne empanwa eya Katonda aesana wusa, no owulamu owutariwua ni kuwitra ku Yesu Kristo Omwami iifu.

Awaruumi 7

Owulamu owua Omukristo ngawukangatiirwe ne ensikirra

¹Waamwifu, inywe ki awantu awamanyire ensikirra, kuwuene mumanyire mbwe ensikirra ziwa na amaani ku omuntu mala na akiario omulamu.

²Tuwoole ku omufwano, endagirra eya okukwezana esiwire omukazi ku omusaaza waae mala no omusaaza akiari omulamu. Ni no omusaaza afwire, endagirra emusiwuule kandi awa iwaga okumenya no omusaaza wundi.

³Kutio omukazi oganyire okutoolwa no omusaaza wundi, iwuae na akiari omulamu aetwa omukazi omusondo. Ni, ni iwuae afwire, ari iwaga aa na akwerwe no omusaaza wundi ngaonere endagirra kandi ngaetwa omusondo.

⁴Nintio mwona muri, waamwifu. Ku ensikirra, mwona mwamala okufwa ni kuwitra ku omuwiri ogwa Kristo, kugere mutoolwe no omusaaza wundi, ori Yesu Kristo owaziusiwua okuema ku awafu. Yawatoola kugere mufumizie Katonda ensaafu endootu.

⁵Mu amiire aga twawanga ni tukiakangatiirwe no omuwiri, ensikirra zialamusia okuagala okuwiiwi mu emiwiri giifu, eziagera ni tukola enkola embiiwi eziira awantu mala mu olumbe.

⁶Nyingeeno katio kimo twamala okufwa tutio, ensikirra eziawanga ni zitusiwire ziwula na amaani ku ifwe. Turi owuyanga ku ensikirra kugere tukorre Katonda mu engira empia eya Omwoyo Omweru, egawuuke ne engira enkulu eya okurinda ensikirra eziajojwa.

Ensikirra eya Katonda ndootu kandi etulaga owuoni wuifu

⁷Ekia tuuza twawoola katio niki? Tukawoola mbwe ensikirra eya Muusa no owuoni? Ng'anintio yaaya! Ensikirra ewuleoko, ng'ankamanyire mbwe owuoni niki. Inze omwene ng'ankamanyire mbwe ne ekintu ekiwiiwi okuwa no omwoyo omusirisizia ku ekintu ekia omuntu kuweeko mbwe Katonda ngakataao ensikirra ewoola mbwe, "Otaagala ekia owundi kiwe ekiao."

⁸No olwa nyamanya ensikirra eyo, owuoni wuatoola iwaga eria ensikirra yareeta ku okundeetra okuagala okuwiiwi okugawuke-gawuuke mu omwoyo. Okwo kuikola aeniki ensikirra ne ewulao, owuoni wuwula na amaani.

⁹Aa kale, ni nyawanga ni nkiari okumanya ensikirra ezia Katonda, nyawanga omulamu. No olwa nyamanya-umanya ensikirra otino, owuoni wuatuuokra amaani

¹⁰mala mfwa mu owulamu wuange owua mu omwoyo. Kutio ensikirra eyasugananga endeetre owulamu, yandeebra olumbe.

¹¹Owuoni wuatoola iwaga eria ensikirra yareeta, okunsemerezia kandi wukola ne ensikirra okunyita.

¹²Kutio ensikirra ezia Muusa ne ewia ensikirra elaga awantu okulondokana nawio wiona wiaema ku Katonda, wiigoloole kandi wiri wilootu.

¹³Katio kuwa kutie mbwe ensikirra endootu yandeebra olumbe? Ngakuesekana yaaya! Owuoni niwuo owuakola ne ensikirra endootu okunyingizia mu olumbe. Okufuma okwa ekintu ekiwiiwi ku ekintu ekilootu kuno, kugera owuoni wuwonekana ki ekintu ekiwiiwi ino.

liye eriri mu omwoyo ogwa omuntu omanyire ensikirra

¹⁴Tumanyire mbwe ensikirra eemere ku Katonda, ni inze ndi omuwiri omugata kandi ndi omugule owa okukola owuoni.

¹⁵Inze ng'amanyire ekigera ni nkola ewintu ewia nkola. Kuri kutio aeniki ewintu ewia omwoyo gwange guagala mbwe nkole ng'ambikola yaaya, ni mala ewia nyoreere nawio niwio ewia nkola.

¹⁶Ni nkola ewia ntaagala okukola otio, nganya mbwe kane ensikirra ezia Katonda ndootu.

¹⁷Kutio ng'ani inze owikola, ni no owuoni owundimo niwuo owuwikola.

¹⁸Ee, nyingeeno manyire mbwe kiwulao ekilootu ekindimo, ino-ino mu omuwiri gwange ogukola owuoni, aeniki okuagala ni nyagala okukola owulootu, ni ngawunyinkorra yaaya.

¹⁹Ewia nkola ng'ano owulootu owua omwoyo gwange guagala, ni ne ewiwiiwi ewia ntaagala okukola niwio ewia nkola enyinga ziona.

²⁰Katio ni nkola ewintu ewia ntaagala okukola otio, kulagana mbwe ng'ani inze owikola yaaya, ni no owuoni owundimo niwuo owuwikola.

²¹Katio kimbeera ki enkola mbwe ni nyagala okukola owulootu, owuoni niwuo owuwa emberu wange.

²²Aeniki muni mu omwoyo, nsangaala ne ekia ensikirra eya Katonda ewoola mbwe nsugaane nkole,

²³ni kukawa kutio, ntuukra ensikirra indi mu omuwiri gwange, elwania ensikirra endamu eya ndi nayo mu okuingirizia kwange. Ensikirra yazane enta mu owusiwe owua enkola eya owuoni owuikola mu ewiimo ewia omuwiri gwange.

²⁴Ndi omuntu oinyaasia wululu ino. Katio naanu ooza okunnunula inze ku omuwiri ogumpira mu olumbe guno?

²⁵Katonda aikaziwue kandi atondowolwe ino aeniki iye nio ooza okunnunula ni kuwitra ku Omwami iifu Yesu Kristo. Katio manyire ekinyiikorra: Inze mu okuingirizia kwange nganyire okulonda ensikirra eya Katonda, ni mu omuwiri gwange ndonda mala ensikirra eira awantu mu owuoni.

Awaruumi 8

Owulamu owuema ku Omwoyo Omweru ogwa Katonda

¹Kutio nyingeeno, Katonda ngakengera awantu awamenyere mu owulala ni Yesu Kristo ekiina.

²Aeniki okukangatrwa okwa wakangatiirwe no Omwoyo Omweru ogwa Katonda oesana owulamu ku awari ku Kristo, kuwasiwula okuema mu okukangatrwa ne ensikirra eira awantu mu owuoni no olumbe.

³Kuri kutino aeniki ekia Katonda yakola, ensikirra eya Muusa ngekaesanga okukola aeniki omuwiri gugonziizie okukola owuoni. Kino kianyaga ensikirra amaani aga okukira owuoni. Katonda yakola otio ku okutuma omuzia wae omwene, owaaza mu omuwiri ogufwanana no ogwifu ifwe awantu awooni kugere aone amaani aga owuoni ku okutuweera omusango ogufumia amawi.

⁴Katonda yakola otio kugere atuusie owuigolovu owua ensikirra eya Muusa eagala mu owulamu wuifu. Akola otio mala ku ifwe awantu awamenyere mu okuagala okwa Omwoyo Omweru ogwa Katonda, okutari okuagala okwa omuwiri ogukola owuoni.

⁵Awantu awamenyere mu engira eya okuagala okwa emiwiri giawu egikola owuoni wata amaingirizio gaawu ku ewintu ewia emiwiri giawu giagala. Na awamenyere mu engira eya okuagala okwa Omwoyo Omweru ogwa Katonda, iwo wata amaingirizio gaawu ku ewia Omwoyo Omweru ogwa Katonda aagala.

⁶Okuwa na amaingirizio agakangatiirwe no okuagala okwa omuwiri kureeta olumbe, na amaingirizio agakangatiirwe no Omwoyo Omweru ogwa Katonda gareeta owulamu no owuolu.

⁷Omuntu ota amaingirizio gaae mala ku ewintu ewia omuwiri ogukola owuoni guagala, ari omuzigu owa Katonda. Awula no owuti ku ensikirra ezia Katonda, lwona ngaesa okukola otio.

⁸Awantu awakangatiirwe no okuagala okwa omuwiri ogukola owuoni, ngawaesa okusangaazia Katonda.

⁹Inywe awari no Omwoyo Omweru ogwa Katonda ngamukangatiirwe ne emiwiri egikola owuoni yaaya. Ni, ni mukangatiirwe no Omwoyo Omweru ogwa Katonda, kuri kuwuene mbwe Omwoyo Omweru awamenyeremo. No omuntu owula no Omwoyo Omweru oema ku Kristo, omuntu oyo ngari omuntu owa Kristo.

- ¹⁰Ni, ni Kristo awamenyeremo, Omwoyo Omweru ogwa Katonda aaza okugera muwe awalamu kukawa mbwe emiwiri giinyu giiza okufwa ku okukola okwa mwakola owuoni. Awakorra otio ku okuwa okwinyu mu empurizanio ni Katonda.
- ¹¹Omwoyo Omweru ogwa Katonda owaziusia Yesu okuema ku awafu na awamenyeremo, Katonda owatoola Yesu mu olumbe aaza oku-aa emiwiri giinyu egifwa owulamu ni kuwitra ku Omwoyo Omweru owamenyeremo.
- ¹²Kutio waamwifu, kutunigirizia mbwe paka tumenye owulamu owua Omwoyo Omweru ogwa Katonda aagala, ni ng'ani kiomo emiwiri giifu aweene giagala yaaya.
- ¹³Aeniki ni mumenyere kiomo emiwiri giinyu egikola owuoni giagala, muuza okufwa. Ni ni muitre enkola embiwi ezia omuwiri ku amaani aga Omwoyo Omweru ogwa Katonda, muuza okuwa awalamu.
- ¹⁴Kuri kutio aeniki awantu awakangatiirwe no Omwoyo Omweru ogwa Katonda, wari awaana awa Katonda.
- ¹⁵Kandi Omwoyo Omweru ogwa Katonda, owa Katonda amiire okuwa-aa oyo ngagera ni muirana mu okuwa awasiwe awa okumenya mu owuti kandi yaaya. Ni, mwatuukra Omwoyo Omweru ogwa Katonda ogera ni muwa awaana awa Katonda kandi nio otu-aa owuesani owua okueta Katonda ni tumurirra mbwe, “Baaba, Soifu.”
- ¹⁶Omwoyo Omweru ogwa Katonda omwene nio oganyana ne emioyo giifu egia muni mbwe turi awaana awa Katonda.
- ¹⁷Katio ni kuri mbwe turi awaana awa Katonda, kane turi alala ni Kristo mu okuwa no owuyanga owua okuza okutuukra ensereki eya Katonda awiikiire awantu waae. Ni tuagala okuwa ni Kristo mu owunene waae, paka tuwe nae alala mu eminyako-nyaako egia yawona.

Owunene owuza

- ¹⁸Inze mbona mbwe eminyako-nyaako egia tuwona nyingeeno gino, ngagisugre okugeraniwua no owunene owua Katonda atuwikiire, nakuwa wutono yawa.
- ¹⁹Ewintu wiona ewia Katonda yaluka wiri na amiiga amangi kandi wimaga-maga okuwona olwa Katonda arilagana awaana waae.
- ²⁰Nintio aeniki Katonda yataao mbwe ewintu wiona ewia yaluka wiwe ki ewiwula ne emirimo ku owuoni owuaingira ku ekialo. Kuno ngakukawanga okuagala okwa ewialukwa wino yaaya, ni kwawanga okuagala okwa Katonda owawitaa otio. Katonda yakola otio na arindirra
- ²¹okuta ewintu wiona ewia yaluka owuyanga, okuema mu owusiwe owua olumbe no okuwola, awireete mu owuyanga owunene owua awaana waae wariwa nawuo.

²²Twona tumanyire mbwe mala kiomo omukazi oagala okuigawula arra wululu ewisa ni wimuluma, nintio ewintu wiona ewialukwa wiona wirra wululu nawuno reero.

²³Ng'ane ewio wieng'ene, ni kugia ifwe aweene awa Katonda amiire oku-aa Omwoyo gwae Omweru ki empanwa eya kuluweri, nintio turi. Twona turi ne endiramwoyo mu emioyo giifu egia munsu ni turindirra ne emioyo giifu giangiriire ino, okuwona owuire owua Katonda aritutoola tuwe awaana waae, na ata emiwiri giifu owuyanga owutuukre.

²⁴Ifwe namba okuemera olwa twanunulwa, okurindirra kuno nikwo okwa tumiire okuwa nakwo. No okurindirra ku ekintu ekiwonwa, ng'ano okurindirra yaaya, aeniki awulao omuntu orindirra ekintu ekia ari nakio.

²⁵Ni ifwe awarindirra okutuukra ekia tukiari okutuukra, muturindirre ne emioyo egitafwa.

²⁶Alala na ago, Omwoyo Omweru ogwa Katonda atatunzia mu owugata wuifu. Ngatumanyire geeza ekia tusugaane tusawe Katonda atatunziemo, no Omwoyo Omweru ogwa Katonda atuisasamra Katonda na atuirizizia, na amang'ana agataesa okuwoolwa.

²⁷Ni Katonda omanyirizia emioyo giifu nio omanyire ekiri mu amaingirizio aga Omwoyo gwae Omweru, aeniki Omwoyo Omweru aisasaamra awantu awa Katonda mu engira eya Katonda omwene aagala.

²⁸Kandi tumanyire mbwe, Katonda agera ewintu wiona, wikawa ewintuki, ni wireeta owulootu ku awantu awamugonziizie kandi awa yaeta nikulondokana no okuagala kwae omwene.

²⁹Ni kutio aeniki awa Katonda yawanga na amanyire kale, yalowola kugere waaze wafwanane ni Yesu Omuzia waae mu owulamu wuawu, kandi Yesu awe omwana owa kuluweri ku awaana awiina waae.

³⁰Awantu awa Katonda yalowola kale niwo awa yaeta kandi niwo awa yata mu empurizanio nae, lwona niwo awa ya-aa owunene.

Olugonzi olwa Yesu Kristo

³¹Niki katio ekia tuesa okuwoola ku amang'ana goona aga ngamba-gambreko gano? Ni kuri mbwe Katonda nio ori nyaluwega lwifu, kandi ario okatulwanya yatukira?

³²Katonda ngakalowa okureka namba omuzia waae okuwambwa ku omusalaaba, ni yamufumizizia ifwe twona. Akalowa otie katio okutu-aa ewintu wiona, alala no omuzia waae?

³³Naanu katio oesa okuingirra awantu awa Katonda omwene nio olowoole? Ngakuikola yaaya aeniki Katonda omwene nio owoola mbwe wawula ne ekia wakaingirra nakio.

³⁴Lwona ario okawakengra ekiina mbwe wari awooni awasugre no okuswawukwa? Yaaya awulao, aeniki Kristo Yesu yafwa. No owukirre, Katonda yamuziusia mala aema ku awafu. Nyingeeno ari nyakukono okusaaza okwa Katonda kandi atuisasamra Katonda.

³⁵Naanu katio oesa okutugawula no olugonzi olwa Kristo atugonziizie nalwo? Kusi ne emidambo, nakuwa ewintu ewikalu-kalu ewia tuwitamo, kusi eminyakonyaako no owululu owua awantu watu-aa? Ekawa enzala, nakuwa owutaka, namba okutia owuwi owuesa wuatuikorra, kusi no olumbe?

³⁶Kuri mala kiomo kwajojwa mbwe, “Ku amang’ana gaa turi awantu awagala okuitwa enyinga ziona, awantu watutoola ki amagondi agagala okuitwa.”

³⁷Yaaya, kiwulao aeniki ku ewintu wino wiona, turi awakire awatakirwa, ni kuwitra ku Kristo owatugonzia.

³⁸Inze manyire kuwuene mbwe kiwulao-uwula ekintu ekiiza kiatugawula no olugonzi olwa Katonda. Lukawa olumbe namba owulamu; wakawa enyankoi namba awakangasi awa mu ekialo ekia mu ekierema; kukawa mbwe ne ewintu ewiikola nyingeeno namba ewiiza okuikola emberu eyo; gakawa amaani agafwana gatie, ngagaesa okutugawula no olugonzi lwae.

³⁹Wuwulao owuliire owuniina kungulu nakuwa owuika ansi, namba ekintu-ukintu ekia Katonda yaluka, ekiesa okutugawula no olugonzi olwa Katonda amiire okutulaga ni kuwitra ku Omwami iifu Yesu Kristo.

Awaruumi 9

Awaisraeli walowere Meesia waawu

¹Ewia mboola wiri kuwuene aa ntaweeya yaaya, aeniki ndi owa Kristo. Omwoyo gwange ogwa muni, omwa Omwoyo Omweru ogwa Katonda amenyeremo, gwona guganya gutio.

²Ni kuwuene mbwe nyiyumbre ino kandi ndi no owululu owungi owutawua, muni mu omwoyo gwange.

³Inze omwene nkaagaale mbwe mbe mbwe ni inze owa Katonda afuuwa kandi ata enze eya okuwa mu owulala ni Kristo, aa okukorra awiifu kandi waawamwifu

⁴Awaisraeli watio. Iwo niwo awa Katonda omwene yatoola ki awaana wae kandi niwo awa Katonda yalaga owunene wae. Katonda yakola nawo endagano kangi kandi niwo awaaewua ensikirra ezia Muusa. Iwo niwo awasawa Katonda mu ekaalu yae, lwona niwo awa Katonda yaifuuwa okukorra ewintu ewikate-kaate.

⁵Waaguukwa waawu waawanga awantu awakate-kaate kandi Kristo omwene yaazra mu owuiwulane wuawu wuno. Kristo ono nio Katonda, omukangasi owa ewintu wiona osugre no okutondowolwa amiire goona! Amin.

⁶Kusi tukawoola mbwe Katonda yareka okutuusia okuifuuwa okwa yaifuuwira Awaisraeli? Ngakuri kutio yaaya. Katonda iye yatuusia okuifuuwa kwae aeniki Awaisraeli awa yagamba-gambako ngawakawanga Awaisraeli ku okuiwulwa kweng'ene yaaya.

⁷Lwona awiizukulu awa Abraamu wona ngawari awaana awa Katonda kuwuene. Ekio niki ekigera ni kwajojwa mbwe, “Na awiizukulu awa Isaaka weng'ene niwo nditoola ki awiizukulu waa.”

⁸Kuno kutulaga mbwe ni Katonda agamba-gamba ku awaana wae, ngagamba-gamba ku awiizukulu awa Abraamu ku amasaai wona yaaya. Ni, na awaana awa Katonda omwene nio owaifuuwa oku-aa Abraamu weng'ene niwo awatoolwa ki awaana awa Abraamu kuwuene.

⁹Katonda yaifuuwira Abraamu otino, “Mu enyinga ezifwana zino omwaka omuyia, nyiza okuirana kandi mukaa Saara aaza okuiwula omuzia.”

¹⁰Ng'ana ago geng'ene, ni Rebeeka oona kwamuikorra owufwanani olwa yatuukra awaana wae awalongo no omusaaza omulala, guukwa iifu Isaaka.

¹¹⁻¹²Ni kukawa kutio namba na awalongo awo waawanga ni wakiari okuiwulwa nakuwa okukola ekintu ekilootu namba ekiwiiwi, Katonda iye yawanga na amiire okukola owulowozi wuae. Rebeeka yalagwa ni Katonda mbwe, “Omuzia waa omukulu, aaza okuwa owemirimo owa omuzia omutono.”Kino kiaikola kugere okuagala okwa Katonda mu owulowozi wusigale, ng'ani mu engira eya emirimo egia omuntu okakola na amaani gae, ni mu okuagala okwa Katonda kweng'ene.

¹³Kuri mala kimo kwajojwa mbwe, “Nyalowola Yakoobo, ne Esaa nyalowa.”

¹⁴Ekia tuesa okuwoola ku amang'ana gano katio niki? Tukawoola mbwe Katonda arimo engawuzi? Yaaya nganintio!

¹⁵Katonda yalaga Muusa otino, “Owa mbwine okusaasra, nio owa nyiza okusaasra. Lwona owa mbwine okuambra amagongi, nio owa nyiza okuambra amagongi.”

¹⁶Kutio owulowozi owua Katonda ngawuisigiike ku okuagala okwa omuntu nakuwa ewintu ewia akakola na amaani gae yaaya. Ne ekineene, na amasaasra aga Katonda a-ambra omuntu-umuntu owa awuine.

¹⁷Kuri kimo Katonda yalaga Faraao mu endagano mbwe, “Nyakuta ku entewe eya owuami ne ekigera. Nyagalanga okukola ni iwue okulaganra awantu amaani aga ndi nago kugere eriina riange rimanyike mu ekialo kiona.”

¹⁸Kutio Katonda a-ambra awa awuine amasaasra, kandi agera awa awuine okuwa ne emitwe emikalu.

Okusu okwa Katonda no olugonzi olwa ari nalwo

¹⁹Omuntu aaza yawoola otino, “Ni kuri mbwe nintio kuri, kane no omuntu akorre ekintu ekiwiiwi, ekigera ni Katonda amutoola ki omwoni niki? Lwona ario okakola owugawuuke no okuagala kwae?”

²⁰No omuntu iwue, iwue oriki? Ekia omanyire ku engira ezia Katonda niki ekia okamulaga? Kuwuene entamu ewumbrwe ekalaga omuwumbi wayo mbwe, “Ekiagera no ompumba otino niki?”

²¹No omuwumbi amiire okuwisia mbwe awumba entamu okuema ku ilowa eria aduwire, ari na amaani aga okugenyula ilowa riazane erio okuwumbra entamu eya afumbiramo okuria okwa awageni, ne erindi yawumba nario entamu eya okufumbamo okuria-ukuria.

²²Katio owuwi wuriai ni kuri mbwe Katonda yagalanga okulagana okusu okwa ari nakwo na amaani gaae ku awantu awa yawisia kale okuona? Ni, aa okuazakana okuwakorra otio, Katonda yalagana owuorevu wuae nawo.

²³Yagalanga ino-ino okulagane owunene wuae owungi ku awantu awa a-ambiire amasaasra. Awantu wano Katonda yataao kale mbwe wariwa nae mu owunene wuae.

²⁴Ifwe na awalala ku awantu awo, ifwe awa Katonda yaeta na atutoola, ng’ana agati ya Awayaudi weng’ene, ni kugia agati ya awatari Awayaudi.

²⁵Mala kiomo Katonda awoola mu ebuuki eya Oseea mbwe, “Nyiza okueta awantu awatari awantu wange mbwe wari awantu wange; kandi nyiza okumueta mbwe, ‘Omuntu owa ngonziizie’ otaawanga omugonzi wange.”

²⁶Lwona “Kuuza okuikola mbwe mala asi aa awantu waalagwa mbwe, ‘Ngamuri awantu wange,’ nio warieterwamo mbwe, ‘Muri awantu awa Katonda omulamu.’”

²⁷Isaaya omugambi wa Katonda yaogerera no omwoyo omululu na agambagamba ku Awaisraeli otino, “Kukawa mbwe Awaisraeli wari awangi ki omusenye ogwa kumwalo, awatoono niwo awarilama.

²⁸Aeniki, Katonda aaza okukengera awantu woona awa ku ekialo kino ekiina, wuangu-wuangu kandi ilala.”

²⁹Kuri mala kiomo Isaaya yawoola enyima mbwe, “Kuweeko mbwe Omwami Katonda oesa goona ngakarekao awandi ku awiizukulu wiifu, kangato twamalwa chwe ki awantu awa emigizi egia Sodooma ni Gomoora.”

Awaisraeli walowere engira eya okuingira mu empurizanio ni Katonda

³⁰Ekia tuuza twawoola katio niki? Awantu awatari Awaisraeli awataagarizianga engira eya wakaweeramoo awalongoole emberu wa Katonda, niwo awagitukiire? Ee, owuigolovu owuo wuituukrana mu engira eya okuganya.

³¹Kandi mbwe Awaisraeli awaagala okuwa awalongoole mu engira eya okurinda ensikirra, okutuusia ewia ensikirra eagala kwawakira.

³²Ekiagera no okutuusia ewia ensikirra eagala kwawakira niki? Waakirwa aeniki ngawakalonda engira eya okuwa no okuganya ku Katonda, ni iwo waalonda engira eya okukola emirimo na amaani gaawu aweene. Kutio waaiguunya ku iwaale eriguunya awantu.

³³Ekio kiaikola mala kiomo kwajojwa mbwe, “Muwone! Nyiza okuta iwaale Sayuuni eria awantu waaza okuiguunyako; olutare oluuzza okugwisia awantu ansi. No omuntu oweere no okuganya ku iye, ngariwona ensuuko yaaya.”

Awaruumi 10

¹Waamwifu, mu omwoyo gwange mumsi nyagala ino kandi nsawira Awaisraeli wiifu ino mbwe Katonda awanunule.

²Inze omwene nyesa okuwawoolako no owusiani mbwe kuwene wateere emioyo giawu egia mumsi okukorra Katonda. Ni kukawa kutio, okuta okwa wateere emioyo giawu okukorra Katonda kuno ngakuisigiike ku okumanya engira eya Katonda ateriire awantu wamukorremo, yaaya.

³Mu okutamanya engira eya Katonda areeta nayo awantu mu empurizanio nae, iwo waagarizia engira yaawu aweene eya okuwa awigolovu emberi wa Katonda. Iwo waageezania okulonda ensikirra kandi mu okukola otio, waalowa engira eya Katonda.

⁴Kristo nie entuuko eya ensikirra eya Muusa okukangatra owulamu owua awantu. Kutio nyingeeno Katonda aingizia awantu wona awari no okuganya ku Kristo ki awigolovu.

⁵Muusa omwene na ajoja ku owuigolovu owuuzza mu engira eya okulonda ensikirra, awoola mbwe, “Omuntu orindre ensikirra zino, ensikirra ziiza okugera atuukre owulamu.”

⁶Ni ku engira eya okuwa mu empurizanio ni Katonda mu engira eya okuwa no okuganya, endagano ewoola etino, “Otaaza waiwuuzia mu omwoyo gwao mbwe, ‘Ooza okuniina kungulu ku igulu naanu?’ ” (Ao otio mbwe, okutoola Kristo ku igulu okumureeta ku ekialo.)

⁷Namba mbwe, “Naanu ooza yaika ansi mu owuina aa awafu wari?” (Ao otio mbwe, okutoola Kristo mu ekialo ekia awafu, amufumie enze).

⁸Ni ekia endagano ewoola ku amang’ana aga okuwa no okuganya aga tulanzia ni mbwe, “Amang’ana aga Katonda gari ampi ni iwue; gari mala mu omunwa gwao kandi mu omwoyo gwao.”

- ⁹Aeniki no owoorre no omunwa gwao omwene otino, “Yesu no Omwami,” kandi owe no okuganya mu omwoyo gwao mbwe Katonda yamuziusia amutoola ku awafu, Katonda aaza okukununula.
- ¹⁰Kuri kutio aeniki omuntu aganya no omwoyo gwae ogwa munsu nikwo Katonda yamuta mu empurizanio nae. Lwona no omuntu awoorre no omunwa gwae emberu wa awantu mbwe Yesu no Omwami, Katonda amununula.
- ¹¹Mala kiomo endagano ewoola mbwe, “Omuntu-umuntu oweere no okuganya ku iye ngariwona ensuuko.”
- ¹²Ngegawula Awayaudi na awatari Awayaudi aeniki Omwami no omulala eng’ene, ori Omwami owa awantu woona kandi osereka ino awantu woona awamusawa owuitunzi.
- ¹³Kuri kiomo endagano ewoola mbwe, “Omuntu-umuntu osawire Omwami mbwe ‘Omwami nunule,’ aaza okununulwa.”
- ¹⁴Ni, wakareeta otie okusawa owa wakiari okuganyako? Lwona wakamuganyako otie ni wakiari okuwurra amang’ana gae? Nakuwa wakawurra amang’ana gae otie no omuntu atawalanziziie?
- ¹⁵Ni wakalanziie otie ni Katonda atawatumre? Mala kiomo kwajojwa mu endagano mbwe, “Okuuza okwa awantu awareeta amang’ana amalootu aga Katonda ne ensereki enene efwanana otie!”
- ¹⁶Ni ng’ani mbwe Awaisraeli woona waaingizia amang’ana amalootu ago. Isaaya omwene yawoola otino, “Omwami, wameka awaweere no okuganya ku amang’ana gao aga tuwalagre?”
- ¹⁷Kutio okuwa no okuganya kuema ku okuwurra amang’ana, na amang’ana ageene gagamba-gamba ku Yesu Kristo.
- ¹⁸Ni mbuuzia ntino: Ngawawurra amang’ana ago? Kuwuene waagawurra mala kiomo endagano ewoola mbwe, “Emioyo giawu gimiire okuwurrwa mu ekialo kiona, kandi amang’ana gaawu gamiire okutuuka mu embega ziona ezia ekialo.”
- ¹⁹Kandi mbuuzia ntino: Kusi amang’ana ago ngagakaingirra Awaisraeli? Owusookere Katonda nio owawoola ni kuwitra ku Muusa otino, “Nyiza okugera iyari riwa-ambe no oluganda olutasugre okuetwa oluganda ku okukorra oluganda olwo ewintu ewilootu; kandi nyiza okugera enda ziinyu ziyie no oluganda olwa awantu awamaya awawula no okumanya.”
- ²⁰Lunyima kandi, Isaaya yawa no owusiani okulonda omunwa ogwa Katonda owawoola mbwe, “Nyamanywa na awantu awataakola na amaani okunyagala wamanye; kandi nyaimanyikira awantu awataiwuuzia wamanye owa ndi.”
- ²¹Ni ku Awaisraeli, agia emberu na awoola otino, “Enyinga ziona okukono kwange miire okuwa ni ngoloriire awantu awa emitwe emikalu, awatawurra.”

Awaruumi 11

Owusiza owua Katonda ari nawuo na Awaisraeli

- ¹Mbawuuzia otino, kukawa kuwuene mbwe Katonda yalaga awantu waae omugongo? Yaaya ng'anintio. Inze omwene ono ndi Omuisraeli, omuizukulu owa Abraamu, owaema mu ekiriango ekia Benjamiini.
- ²Katonda ngakalaga awantu waae awa yalowola okuemera kale omugongo, yaaya. Kusi mulawiire ekia endagano ewoola mu omunayo ogugamba-gamba ku omugambi owa Katonda Eliija? Omugambi ono yairizizia Katonda ku ewintu ewiwiiwi ewia Awaisraeli waakolanga na awoola otino,
- ³"Katonda Omwami, Awaisraeli wamiire okuita awagambi wao woona kandi wamiire okuona amasiga aga okukukorramo emisango. Inze eng'ene ni inze osigaale kandi waagala okunyita noona!"
- ⁴Ni Katonda yamuirania otino, "Ngori omwene yaaya, wario awantu wange elufu musamvu awekisaaza wandi awa mbisre, awange omwene awakiari okuikirra wakubra Baali katonda ensaasa amasigamo ansi."
- ⁵Nintio lwona mu amiire aga reero, wario Awayaudi awatono awa Katonda yalowola no owusiza wuae, awa omwene awisre kugere watuukre owulamu.
- ⁶Ni kuri mbwe Katonda alowola awantu mala ku owusiza wuae, kane ewia omuntu akakola na amaani gaae omwene ngawigera Katonda yamulowola. Ni kuweeko mbwe ni ku ewintu ewia omuntu akola na amaani gaae, kane owusiza owua Katonda wuri wusa.
- ⁷Ni kuwuene mbwe Awaisraeli ngawakatuukra ekia waagarizianga. Kukawa kutio, awalowole awa Katonda niwo awaakituu kra! Katonda yagera awandi wakazia emioyo giwa emikalu ng'a, aa ngawakaesanga okumuwurra.
- ⁸Okwo kwaikola mala kiomo kwajojwa mbwe, "Katonda yawa-aa emioyo emizito na amaingirizio agateekere, aa na reero amiiso gaawu ngagawona kandi amatwi gaawu ngagawurra."
- ⁹Daudi yoona yawoola otino: "Katonda Omwami, reka emigomo giawu egia wariamo, giwaweere ki emiweto ne emitego egiwa-amba, kandi ewigazio ewiwanaga waagwa ansi. Wakorre owusugre ne enkola ziauw embiiwi.
- ¹⁰Gera amiiso gaawu gamwame ti watawona, kandi emigongo giawu giikumbe ne emidambo egitawua."
- ¹¹Ndowa mbwe Awayaudi ngawakagwa mu owuoni ilala, aa wataesa okuema ansi wairane ku Katonda kandi. Aeniki okulowa okwa waalowa engira eya Katonda anunulamo awantu, kwagera owuinunuzi wugiira awatari Awayaudi. Katonda yakola otio kugere Awayaudi wawe ni iyari eria okutuukra ekia awatari Awayaudi waatuukiire.

¹²Kuwuene okugwa kwawu mu owuoni kandi owudowerwa wuawu mu okukola okuagala okwa Katonda kwagera awatari Awayaudi mu ekialo kiona ni wawona owulootu kandi ni watuukra ensereki enyingi. Okwo kulagana mbwe ni iwala eria Awayaudi riona riiza okuingira mu okuagala okwa Katonda, awantu woona warituukra ensereki enyingi eziwula no omurengo.

Owuinunuzi owua awatari Awayaudi

¹³Katio nyagala okugamba-gambako na awatari Awayaudi. Kiomo omutumwa owa Kristo ku inywe awatari Awayaudi, inze ntoola emirimo giange egio ki emirimo eminene ino.

¹⁴Nyagala mbwe emirimo giange gigere awiifu wawe ni iyari no okuganya okwa awatari Awayaudi wari nakwo, kugere ni kuesekana waganye Katonda anunule awandi ku iwo.

¹⁵Tuwona mbwe okulowua kwawu ni Katonda kwagera awatari Awayaudi wairana mu empurizanio ni Katonda. Katio kuuza okuwa kulootu okufwanana kutie ni Katonda aaza okuwaingizia iwo? Kugia awafu wariziuka wawe awalamu!

¹⁶No oluwaala olwa omukaati olufumiziiwue Katonda ki omusango luri olweru, kulagana mbwe omukaati ogwo gwona guri omweru. Lwona emizi egia omuti ni giri emieru, kulagana mbwe ensagia ezia omuti ogwo ziona ziri enzeru.

¹⁷Iwue omuntu otari Omuyaudi ori kiomo ensagia eya omuzabiibu ogumerre ogwene mu isaka. Awayaudi iwo wari ki ensagia ezia omuzabiibu omulootu ogusimbrwe mu omusiri. Ni Katonda yavuna ensagia zindi okuema ku omuzabiibu omulootu, iwue akutoola akukoma ku iwaga riazio, kugere nyingeeno owe agati ya ensagia eziasigala. Okwo kugera oona no otuukra ewiokuria okuema ku omuzabiibu

¹⁸omulootu oguri mu omusiri. Kutio mutaaza mwaitoola mbwe muri awalootu okukira ensagia eziakengwa zitoowao, inywe mutoola iwaga riazio. Muwe no okumanya mbwe ne emizi, egitari ensagia, nigio egikuambiriire ku omuti kungulu.

¹⁹Omulala aaza yawoola mbwe, “Ee ensagia zindi ziatemwao kugere tutoole iwaga riazio.”

²⁰Nintio kuri, ni mumanye mbwe waatemwao ku okutaganya kwawu, kandi mbwe muimerre aa muri ao ku okuganya okwa muri nakwo ku Yesu Kristo. Mutaaza mwaitumbula, ni musugaane mutie Katonda ino.

²¹Aeniki, na ataasasra ensagia eziene-ziene eziakoma ku omuti, mwona ngaaza okuwasaasra.

²²Katio otalawira mbwe Katonda ni Katonda omusiza kandi ni Katonda owiiyirirwa. Awiiyirirwa na awantu awamuoneere, ni ku inywe awari no okuganya, ari omusiza ni inywe. Ni mugiiire emberu okuwa no okuganya ku Yesu,

oona aaza okugia emberi okuwa omusiza ni inywe. Ni, ni murekere mwona aaza okuwatemaŋo ki ensagia.

²³Lwona muwe no okumanya mbwe na Awayaudi warekere okugia emberi no okutawa no okuganya, Katonda aaza okuwairania ku omuti aa yawatoola aeniki ari na amaani aga okukola otio.

²⁴Inywe awatari Awayaudi, muri ensagia eziateŋwa okuema ku omuti ogwa omuzabiibu ogwakoma mu isaka. Nikuemaŋo, Katonda yawata ku omuzabiibu ogwa omwene yasimba, ekintu ekitaakolwanga. Katio ngakuuza okumuweera okunyoowu ino okuirania ensagia ezia omuti ogwene ku iwaga eria omwene yazitemaŋo?

Owusiza owua Katonda ku awantu woona

²⁵Wamwifu, nyagala mumanye owuene owua amang'ana owuiwisiire awandi kugere mutawa no okuitumbula. Okuwa ne emioyo emikalu egiwula no okuganya ne ekintu ekikiaza okugia emberi ku Awayaudi wangi nawuno awalowole awa Katonda okuema ku awatari Awayaudi woona waingre.

²⁶Nintio Katonda aaza okununula ekialo ekia Israeli kiona. Amang'ana aga awagambi awa Katonda goona gasigika eking'ana kino kiomo kwajojwa mbwe, "Omununuzi aaza okuema Sayuuni. Aaza okugera awiizukulu awa Yakoobo wareke okumenya owulamu owuoneeke.

²⁷Kandi endagano eya nyakola nawo mbwe nyiza okutoolaŋo amawi gaawu goona eno, eeza okutuuka kuwuene."

²⁸Ku okulowa okwa waalowa amang'ana amalootu aga waalanziziwua, waawa awazigu awa Katonda. Kuno kwagera inywe awatari Awayaudi mutuukra iwaga eria okuwurra amang'ana amalootu aga Katonda. Ni ku owulowozi, Katonda akiagonziizie Awayaudi ku endagano eya yakola ni waaguukwa waawu.

²⁹Ni kutio aeniki, Katonda na aeere awantu empanwa kandi na aetre awantu waaze wamukorre, ngagalusia amaingirizio gaae, yaaya.

³⁰Inywe awatari Awayaudi, kale mwona ngamukakolanga okuagala okwa Katonda. Ni Katonda yawasaasra aeniki Awayaudi waalowa okukola okuagala kwae.

³¹Mu engira efwanani eyo, owungi owua Awaisraeli nyingeeno ngawakola okuagala okwa Katonda, kugere woona Katonda awasasre aeniki mwona yawasaasra.

³²Katonda yagera awantu woona (Awaisraeli na awatari Awaisraeli) wawa ki awasiwe awa owuoni, awatakola okuagala kwae. Yakola otio kugere asasre awantu woona owufwanani.

³³Kuwuene Katonda ari omukaate. Awulao okarenga owunyazi owua aesana, nakuwa owungi owua amaganga gaae namba owuliire owua okumanya okwa ari

nakwo. Naanu omanyire kiomo awisia okukola ewintu? Kusi omanyire engira ziae ezitambuuke okumanyiriziwua, naanu?

³⁴Mala kiomo endagano ewoola mbwe, “Omanyire amaingirizio aga Omwami Katonda, naanu? Nakuwa omiire okumukengera amagezi ku ekintu ekia asugaane akole, naanu?”

³⁵Omiire okutoola ekintu ya-aa Katonda owa Katonda osugaane aoloole, naanu?”

³⁶Kuri kutio aeniki iye nio owalonga ewintu wiona kandi ewintu wiona wirio ku amaani gaae kandi ku okuagala kwae. Kutio tutondowole Katonda amiire goona. Amin.

Awaruumi 12

Omukristo asugaane akorre Katonda mu engira empia

¹Kutio waamwifu, nikulondokana na amasaasra amangi aga Katonda amiire okutuambra, mbaisasaama mbwe mufumizie Katonda emiwiri giinyu giwe ki omusango omulamu kandi omweru ogwa Katonda asangaala nagwo. Eyo nie engira endamu eya musugaane mukorre nayo Katonda.

²Mutagia emberu okulonda enkola ezia awantu awa ekialo, ni mureke Katonda agalusie owulamu wuinyu na awa-aa amaingirizio amayia. Ekio kiiza okugera mumanye engira eya okugeezaania kandi okugawula ewintu ewia Katonda aagala mbwe mukole, ewintu ewisugre emberu waae kandi ewia asangaarre nawio.

³Kutio ku emirimo egia owutumwa egia Katonda amiire okumpa ku owusiza waae, ndaga omuntu ki omuntu ku inywe mbwe omuntu ataaza yaingirizia mbwe ari kungulu okukira kiomo ari. Ni mu amaingirizio giinyu musugaane muiwone mu engira endootu, owuagani no okuganya okwa Katonda aeere omuntu ki omuntu.

⁴Kuri mala kiomo omuwiri ogwa omuntu guri ne ewiimo ewingi, kandi ekiimo ki ekiimo kiri no omurimo gwakio.

⁵Nintio lwona turi omuwiri omulala oguri ne ewiimo ewingi ewikola alala, ifwe awari ku Kristo kukawa mbwe turi awantu awangi.

⁶Turi ne empanwa ezigawuke-gawuuke, nikulondokana no owusiza owua Katonda aeere omuntu ki omuntu. No omuntu aerwe empanwa eya okugamba amang’ana agaemere ku Katonda, asugaane agambe owuagani no okuganya okwa ari nakwo.

⁷Ni kuri okukorra awandi emirimo, asugaane akole emirimo no omwoyo gwae gwona. Ni, ni kuri okugerera, ka-agerere geeza.

⁸Lwona ni kuri mbwe omuntu aerwe empanwa eya okuambia awiina waae amaani, reka a-ambie awantu amaani. Oerwe okuesania ewintu ku awataka,

reka akole otio no omwoyo gwae gwona. Oeerwe okukangatra awandi, ka-akole otio na amaani gaae goona. Lwona ni kuri mbwe omuntu aeerwe empanwa eya okulagana owusiza ku awandi, ka-akole otio no owusangaavu.

⁹Olugonzi lwinyu ku awantu paka luwe olugonzi oluri kuwuene. Murege ewintu ewiwiwi, ni muande ku ewintu ewilootu.

¹⁰Muwe no olugonzi agati iinyu ki awada ku Kristo, kandi omuntu ki omuntu awe mbwe ni iye osooka okutoola omwina waae ki osugre okueewua owuti okumukira iye omwene.

¹¹Muwe awantu awakalangufu mu emirimo, awatari awendeevu. Ni mukorre Omwami Yesu kandi no Omwoyo Omweru aema mu emioyo giinyu ki omurro.

¹²Muwe awusangaavu okurindirra ewia Katonda awateeriire emberu, awooreevu namba mu eminyako-nyaako kandi awasawa Katonda enyinga ziona.

¹³Mugawire awantu awa Katonda awawula nawio ewintu wiinyu, kandi muwe awantu awagonziizie okuingizia awageni mu emigizi giinyu.

¹⁴Musereke awawaingizia mu eminyako-nyaako ku okuganya okwa muri nakwo ku Kristo. Mutawafuuwa yaaya, ni muwasereke.

¹⁵Musangaale na awantu awasangaarre, ni murre na awarra.

¹⁶Mumenye no owuolu na awiina wiinyu. Mutaitumbula, ni muwe owuyanga okuwa mu owulala na awantu awari ansi. Mutaaza mwaitoola mbwe muri awaganga.

¹⁷Otaaza waoloola omuntu okukoriire uwiiwi no okumukorra uwiiwi oona. Wona mbwe okola ewintu ewia awantu wona waganyire nawio mbwe wilootu.

¹⁸Ku oluwega lwao, kola wukalu na amaani gaao goona kiomo kuesekana, owone mbwe omenyere na awantu wona no owuolu.

¹⁹Awiiko wange awa ngonziizie, no omuntu awakoriire uwiiwi, mutaaza mwamuoloola no okuwakorra uwiiwi mwona. Ni murekere Katonda iwaga awe mbwe nio omuoloola ku owuwi owua awakoriire. Aeniki kwajojwa mu endagano mbwe, "Omwami Katonda awoola otino, 'Inze ni inze ooba okuwaoloola ku ewintu ewiwiwi ewia wakola. Kandi kuwuene nyiza okuwaoloola.'"

²⁰Ni musugaane mukole kiomo endagano ewoola mbwe, "No omuzigu waao awurra enzala, mu-ee okuria arie. Lwona na awurra owulwo, mu-ee amanzi anywe. No omukoriire otio, aaza okufwa ne ensuuko."

²¹Mutaaza mwaganya owuoni wuawakira, ni mukire owuoni ne enkola endootu.

Awaruumi 13

Omukristo paka alondokane no okuagala okwa esirikaali

¹Omuntu ki omuntu paka awurre awakangasi awa ekialo, aeniki wuwulao owukangasi owuesa wuawaa ni Katonda ataganyire. Katonda nio oteereo owukangasi ki owukangasi owuri mu ekialo kiona.

²Kutio omuntu-umuntu olova nakuwa olwania owukangasi owuriko, alowa nakuwa alwania ekintu ekia Katonda omwene nio oteereo. Kandi awakola otio, waireetako ekiina aweene.

³Aeniki awakangasi ngawatiisia awantu awa enkola endootu, ni watiisia mala awantu awa enkola embiiwi. Mberi oagala okuwa owuyanga aa owula ekikagera otie awari mu owukangasi? Kane kolako ewintu ewilootu wieng'ene, no otaaza okuwona ni wakugamba-gambako geeza.

⁴Kuri kutio aeniki omukangasi ari omukurumu owa Katonda, owa ateereo okuwatunzia. No omuntu omwoni paka amutie, aeniki kuwuene omukangasi aerwe amaani aga okuswawuka awooni. Ari omukurumu owa Katonda omuimereere ku ekialo kino, owona mbwe awooni wakoriirwe wululu owusugre ne enkola ziawu.

⁵Kutio paka muwurre awakangasi wiinyu. Kandi mutakola otio mbwe aeniki mutiire okuswawukwa kweng'ene, ni aeniki mumanyire mu emioyo giinyu egia muni mbwe okwo nikwo okulootu.

⁶Kino kiona niko ekigera ni mufumia omusolo, aeniki awakangasi wari awemirimo awa Katonda awatoola enyinga ziawu ziona okukola emirimo egia owukangasi.

⁷Mutuusie ewia awakangasi wiinyu woona wawaagalako. No ori no omusango ogwa okufumia omusolo, oloola. Mu-ee owuti awantu awa musugaane mu-ee owuti, kandi awa musugaane mu-ee owunene, mu-ee owunene.

Olugonzi lutuusia okuagala okwa Katonda

⁸Mutaaza mwaikala no omusango ogwa omuntu omwina iinyu. No omusango ogwa musugaane muwe nagwo na awiina wiinyu enyinga ziona, no omusango ogwa okuwa no olugonzi nawo. Aeniki omuntu ogonziizie omuntu omwina waae, atuusia ensikirra eya Muusa.

⁹Ensikirra eziwoola zitino, "Otasooda, otaita, otaiwa ekintu ekia omwene, otaagala ekia owundi kiwe ekiao," ne ensikirra zindi ziona ezigawuuke ne ezio, zitunguuke ku ensikirra endala ewoola etino, "Gonzia omwina waa kiomo oigonziizie iwue omwene."

¹⁰No omuntu agonziizie omwina waae, ngamukorra uwiiwi. Kutio olugonzi nilwo olutuusia ensikirra ezia Katonda ziona.

¹¹Mukole mutio, ni mumanyire geeza amiire agaturimo gano. Enyinga zimiire okutuuka ezia musugaane mulamuke mueme mu endoolo, aeniki enyinga ezia

Katonda aaza okutununurramo nyingeeno zimiire okuwa ampi okukira kiomo kwawanga olwa twata okuganya kwifu ku Omwami Yesu.

¹²Eng'amba emiire okukewa kandi owuire wuri ampi okukia. Kutio turekane ne enkola embiiwi ezia awantu wakola mu ekierema, tuiwoye ne ewia-iiye ewia okulwanra mu owueru.

¹³Enkola ziifu zisugaane ziwe endootu ki awantu awamenyere mu owueru owua enyanga. Mutawa mu emigomo egia owuwuzro owumwamu lwona mutadung'a. Mutasooda, lwona muwe ale ne enkola embiiwi ezia embwa. Mutalwana kandi mutawa ni iyari na awantu.

¹⁴Ni muiwoye no Omwami Yesu Kristo, kandi mutata amaingirizio giinyu ku engira ezia okutuusia okuagala okuwiiwi okwa omuwiri.

Awaruumi 14

Otakengera wamwinyu ku Kristo ekiina

¹Muingizie awantu awari no okuganya okunyowu-nyoowu ni mutawakengeere ekiina ku ewintu ewia waingirizia mbwe wilootu nakuwa wiwiiwi okukola.

²Okuganya okwa omuntu omulala kumuganyira okuria ewiokuria wiona. No owundi ori no okuganya okunyowu-nyoowu, iye aria mala amavwa geng'ene, aa enyama nga-ambako.

³Omuntu oria ewiokuria wiona ngasugaane arege omwina waae otakola otio. Lwona omuntu ozirre ewiokuria windi, atakengra omuntu oria ewiokuria wiona ekiina ki okola uwiiwi emberu wa Katonda, aeniki Katonda aganyire nae.

⁴Iwue ori anu, okengera owemirimo owa omuntu wundi omusaasa ekiina? Omukangasi waae omwene nio ooza okukenga ekiina omwene mbwe agia geeza nakuwa agia uwiiwi. Ne ekia omanyere, ni mbwe aaza okugia geeza aeniki Omwami Yesu ari na amaani aga okugera agie geeza.

⁵Mu engira efwanani, omuntu omulala aesa yalowola owuire owulala mbwe niwuo owueru okukira amiire gandi, ni ku owundi, amiire goona gafwanana. Ku eking'ana kino omuntu ki omuntu asugaane aisimbiire ku ekintu ekia aingirizia mu omwoyo gwae mbwe kiri ekilootu okukola.

⁶Otoorre owuire wulala ki owueru okukira amiire gandi goona, akola otio oku-aa Omwami Katonda owuti. Omuntu oria ewiokuria wiona oona akola otio oku-aa Katonda owuti, kandi otaria ewiokuria windi oona akola otio oku-aa Omwami Katonda owuti, aeniki woona waikazia Katonda.

⁷Ni kutio aeniki awulao ku ifwe omuntu omenyere owulamu owumuambre mala iye omwene, nakuwa awulao omuntu ofwa olumbe olumuambre mala iye omwene.

⁸Okwo kuri kuwuene aeniki okuwa kwifu awalamu turi awalamu oku-aa Omwami Yesu owunene, lwona ni tufwire, tugia okuwa no Omwami Yesu. Kutio ni turi awalamu namba ni tufwire, turi awa Omwami Yesu.

⁹Kino niki ekiagera ni Kristo afwa, airana awa omulamu kandi, kugere awe Omwami owa awalamu alala na awafu.

¹⁰Katio ekigera ni iwue okengera wamwinyu ku Kristo ekiina niki? Kusi ekigera ni iwue orega omwina waa niki? Aeniki twona tuuza okuimerra emberu wa Katonda, ku entewe yaae eya aikalako na akengera awantu ekiina!

¹¹Mala kiomo kwajojwa mu endagano mbwe: “Inze Omwami Katonda, nyiifuuwa ntino, ‘Kuwuene, kuwuene, awantu woona warinkubra amasigamo gaawu ansi, kandi omuntu ki omuntu ariwoola owuyanga no omunwa gwae omwene mbwe inze ni inze Katonda.’ ”

¹²Kutio omuntu ki omuntu ku ifwe ari-irania Katonda ku ewintu wiona ewia yakola ne ekigera ni yawikola.

Otata ekigazio emberu wa wamwinyu ku Kristo

¹³Kutio paka tureke okukengerana ekiina aweene. Aa okukola otio, osugaane okenge mu omwoyo gwao mbwe ngoza okuteera wamwinyu ku Kristo ekigazio ku engira yaae, ekiiza kiamugwisia mu owuoni.

¹⁴Inze ki ori mu owulala no Omwami Yesu, manyire kandi ndi no owuene mbwe ewiokuria wiona wieru, aa wuwulao owuwi ni wiriirwe. Ni, no omuntu awona okuria kundi mbwe kumwamu emberu wa Katonda, ku omuntu oyo okuria okwo ngakweru.

¹⁵Kandi no okuria okwa oria kugera omwina waa na awurra uwiiwi, ao katio owula nae no olugonzi. Otaaza waona owulamu owua wamwinyu owa Yesu yafwira, ku ewiokuria ewia oria.

¹⁶Kutio otagera awantu wagambe-gambe ku ekintu ekia otoorre ki ekilootu kiao mbwe kiwiiwi.

¹⁷Aeniki okuwa mu Owuami owua Katonda ngawumbaane na amang’ana aga ewintu ewiriiwua nakuwa ewinywewua, yaaya. Ne ekineene no owuigolovu, owuolu no owusangaavu owuezaniwua no Omwoyo Omweru ogwa Katonda.

¹⁸Kuri kutio aeniki omuntu-umuntu okorra Kristo mu engira eno asangaazia Katonda ino, kandi awantu wandi woona waaza okuganyana nae.

¹⁹Kutio tusugaane tukole wukalu tuwone mbwe enyinga ziona tukola mala ewintu ewigera twawa no owuolu agati iifu kandi ewiomerezia omuntu no omwina waae.

²⁰Amang’ana aga ewiokuria gataaza gagera muone emirimo egia Katonda amiire okukola. Kuwuene ewiokuria wiona wieru, ni ne ekintu ekiwiiwi ino omuntu okuria okuria okugera no omwina waae aigunya.

²¹Kutio kulootu ino no otariire enyama nakuwa no otanywere amalwa namba no otakorre ekintu-ukintu ekiesa kiaguunya omwoyo ogwa omwina wao mala yagwa mu owuoni.

²²Reka okuganya okwa ori nakwo ku ewintu wino kuwe agati yao omwene ni Katonda. Ne ensereki ino ku omuntu okola ewintu ewia aganyana nawio kandi ewia ataikengra ekiina iye omwene.

²³No omuntu oria ewintu ewia omwoyo gwae ogwa muni guwona mbwe ngasugaane arie, omuntu oyo akorre uwiiwi emberu wa Katonda, aeniki ariire ekintu ekia omwoyo gwae ngagukaganya mbwe kulootu na ariire. Ni kutio aeniki no okorre ekintu-ukintu ekia otaganyire nakio mbwe kulootu, ao okorre owuoni.

Awaruuni 15

¹Ifwe awantu awakalangufu mu okuganya ku Kristo, tusugaane tu-ee awiina wiifu awakiari no okuganya okunyowu-nyoowu iwaga mu owudewenyu wuawu. Ngakusugaane kuwe mbwe tukola mala ewintu ewituomerezia ifwe aweene, yaaya.

²No omulala ki omulala ku ifwe asugaane asangaazie Awakristo awiina waae, ku okuwakorra ewintu ewiwatunzia okukoma mu okuganya kwawu ku Katonda.

³Aeniki Kristo oona ngakaisangaazia mala iye omwene, ni mala kiomo kwajojwa mu endagano otino, “Amanyego aga waakunyega nago goona gangwiriirako.”

⁴Ewintu wiona ewiajojwa mu endagano wiajojwa mbwe witugerere. Amang’ana gano gatuambia amaani kandi gagera ni tuwa no olutuunyo kugere tuwe no omwoyo ogwa okurindirra okutuukra ewintu ewia Katonda yatuifuwira.

⁵No okusawa kwange mbwe Katonda ng’ina olutuunyo kandi oambia awantu amaani, awa-ee emioyo egia owulala agati iinyu aweene, ni mulonda Yesu Kristo.

⁶Okwo kuuza okugera inywe mwona alala, mutondowole Katonda kandi Swawu Omwami iifu Yesu Kristo, ni muri no omwoyo omulala.

⁷Kutio muganye okuingizia awiina wiinyu mala kiomo Kristo oona yawaingizia mwona. Okwo ku-aa eriina eria Omwami Katonda owunene.

⁸Mbalaga mbwe Kristo yaikola owemirimo owa Awayaudi okulagana mbwe Katonda ngagaluka ku ekintu ekia amiire okuwoola kuwuene. Ao otio yatuusianga ekia Katonda yaifuuwira waaguukwa waawu.

⁹Lwona yakola otio kugere awatari Awayaudi watondowole Katonda ku amagongi gae ku iwo, mala kiomo kwajojwa mu endagano mbwe: “Kutio nyiza

okukutondowola agati ya awatari Awayaudi. Kandi nyiza okukuembra enyembo ezitondowola eriina riao.”

¹⁰Endagano ewoola kandi etino, “Inywe awatari Awayaudi, musangaale alala na Awayaudi, awantu awa Katonda yalowola okuwa awaae.”

¹¹Kandi ewoola etino: “Inywe mwona awatari Awayaudi, mutondowole Katonda; awantu awaema mu enganda ziona, mumutondowole.”

¹²Isaaya yona awoola otino: “Omuizukulu owa Yeese aaza okuza; omuntu ooza okufuma okukangatra awatari Awayaudi. Kandi awatari Awayaudi woona waaza okuta emioyo giawu giona ku iye.”

¹³No okusawa kwange mbwe Katonda oesana omwoyo ogwa okurindirra, awaizuzie ne ekisangaalo no owuolu ni kuwitra mu okuganya kwinyu ku iye. Okwo kuuza okugera okurindirra kwinyu kuisonge ino, ni kuwitra ku amaani aga Omwoyo Omweru ogwa Katonda.

Ekigera ni Paulo ajoja ebaruwa eno no owusiani

¹⁴Waamwifu, inze omwene manyire geeza mbwe muri awantu awaizuule du ne enkola endootu kandi muri na amagezi agasugre, lwona mbwe muesa mwaigerera inywe aweene geeza.

¹⁵Ni kukawa kutio, mbajojeere no owusiani ino mu ebaruwa eno ku ewintu windi kugere mbaizurizie, aeniki Katonda nio ompeere owusiza owua

¹⁶okuwa omukurumu owa Yesu Kristo otunzia awatari Awayaudi. Nkola emirimo egia owuoza ku okulanzia amang’ana amalootu aga Katonda, kugere awatari Awayaudi wawe ki omusango omulootu ogwa Katonda aganyire nagwo, ogwa Omwoyo Omweru atengekeere Katonda.

¹⁷Kutio ku Yesu Kristo nyesa nyaitumburra emirimo egia amiire okuwa na ampa amaani okorra Katonda.

¹⁸Ng’anyiza okugamba-gamba ku ekintu-ukintu yaaya, ni mala ku ewia Kristo amiire okukola ni inze. Amiire okureeta awatari Awayaudi okulonda Katonda ni kuwitra ku amang’ana gange ne ewia miire okuwa ni nkola agati yaawu.

¹⁹Yakola ni inze ewintu wino ni kuwitra ku amaani aga ewilagano na amankono amanene-nene aga Omwoyo Omweru ogwa Katonda yampa amaani okukola. Kutio okuemerra Yerusaleemu no ogia-ugia nawuno otuuke Ilirikaamu, miire okulanzizia awantu amang’ana amalootu aga Yesu.

²⁰Okuagala kwange amiire goona kumiire okuwa mbwe ndanzizie awantu awa nikwo wasooka okuwurra amang’ana amalootu aga Kristo. Ng’anyagala mbwe mbe ni nyomboka ku owulusa owuataewuao no omuntu wundi omusaasa.

²¹Aa okukola otio, inze nkola kiomo endagano ewoola etino, “Awaawanga ni wakiari okulagwa amang’ana ku iye, waaza okuwona kandi awaawanga ni wakiari okumuwurra waaza okutegerezia wamanye.”

Omupango ogwa Paulo okugia Rooma

²²Kino nikio ekintu ekimiire okuweerao ni kindowera okuwaazako.

²³Ni nyingeeno mpano katio miire okumala emirimo giange oluwega luno. Ni lwona, miire okuwaa ni nyagala ino okuwaazako mbawone eyo ku emiaka emingi.

²⁴Kutio nyingeeno ndi no omupango ogwa okukola otio ni ngia Speeni. Mpingirizia okuwa omugeni iinyu ni mbita kandi mbwe ni miire okuwawonako ku amiire agasugre, muuze muntunzie mu olugendo olwange olwa okugia eyo.

²⁵Ni ku enyinga zino, ndi ku engira ngia Yerusaleemu, nyirra awantu awa Katonda awari eyo ewintu ewia wafumiziiwue eno.

²⁶Awakristo awa Makedoonia na awiina waawu awari Akaaya waasoloozie ewintu ano kugere wigie witunzie awiina wiifu awataka Yerusaleemu, ku okuagala kwawu aweene.

²⁷Waawona owusangaavu okukola otio. Ni, ni tuwoola kuwue kwawanigirizia mbwe wakole otio. Mala kiomo ensereki ezia owulamu ziaemera awatari Awayaudi ku Awayaudi, nintio wona kuwaweera omusango okugawira Awayaudi oluwaala olwa owunyazi owua Katonda awasereeke nawuo.

²⁸Kutio ni nyiza okumala emirimo egia okuwatuusizia ewintu na amasendi agasoloziiwue gano, nyiza okufuma Yerusaleemu, mbite mbawone ni ngia Speeni.

²⁹Manyire mbwe nyiza okuwaazako ne ensereki enyingi ino eziana ku Kristo.

³⁰Kutio waamwifu, mbaisasaamre ku eriina eria Omwami iifu Yesu Kristo kandi ku olugonzi olwa Omwoyo Omweru atu-aa, mbwe muwe alala ni inze mu iiye riange rino ni munsawira Katonda ne emioyo giinyu giona.

³¹Munsawire mbwe Katonda agie aninde, ku awantu awalwania amang’ana amalootu aga Kristo awari Yudeea, watankorra uwiiwi, kandi mbwe awantu awa Katonda awari Yerusaleemu wagie waingizie ewintu ewia mbairra.

³²Nikuemao, ni kuri okuagala okwa Katonda, nyiza okuwaazako no omwoyo omusangaavu kandi tuuza okuomerezania omuntu no omwina waae.

³³Katonda ng’ina owuolu, ka-awe ni inywe mwona. Amin.

Awaruumi 16

Amakeezio aga Paulo ku awiiko waae

¹Nyagala mumanye mbwe Fiibi ari wamwifu ku Kristo kandi ari omulala ku awemirimo awa ekaniisa eri Senkereeya.

- ²Mbasawa mbwe na awaazreko, muganye mumuingizie geeza ku eriina eria Yesu mala kiomo kusugaane no Omukristo omwina iinyu. Lwona mbasawa mbwe mumutunzie mu engira-ungira eya aesa yaagala mbwe mumutunziemo. Iye oona amiire okuwa na atunzia awantu awangi, namba inze omwene amiire okutunzia ino.
- ³Munkeezizie wamwifu ku emirimo egia Kristo Yesu, Preskiila ni iwuae Akwila,
- ⁴awaawona okuteesia owulamu wuwu ku amang'ana gange. Ng'ani inze eng'ene nio owairanzia otioo, ni namba amakaniisa goona aga awatari Awayaudi.
- ⁵Munkeezizie namba awantu awa ekaniisa awaagaana mu enyumba yaawu. Munkeezizie omwiko wange owa ngonziizie Epenetuusi, omuntu owasooka okuwa Omukristo mu ekitemo ekia Eesia.
- ⁶Munkeezizie Maaria owakorra emirimo wukalu ino.
- ⁷Munkeezizie awaganda wange Anderekuusi ni Yuunia awaasiwua alala ni inze. Waa-nsokera okuwa Omukristo kandi wari awantu awa awatumwa awaerwe owuti ino.
- ⁸Munkeezizie Ampiliatuusi, omuntu owa ngonziizie ku Omwami iifu Yesu,
- ⁹alala ni Urbanuusi, omwina iifu ku emirimo egia Kristo, no omwiko wange owa ngonziizie Stakiisi.
- ¹⁰Munkeezizie Apeleesi, omuntu omiire okulagana kuwuene mu owulamu wuae mbwe atiire Kristo. Munkeezizie awa mu enyumba eya Aristubuusi.
- ¹¹Munkeezizie omuganda wange Erodioni na awa mu enyumba eya Narkiiso woona awaganyire ku Omwami Yesu.
- ¹²Munkeezizie Trufeena ni Trufoosa, awakazi awakola emirimo egia Omwami na amaani ino. Lwona munkeezizie omwiko wange owa ngonziizie Pesiisi, omukazi omiire okukorra Omwami iifu Yesu na amaani ino.
- ¹³Munkeezizie Rufuusi, omuntu owa Omwami yalowola mbwe awe omuntu waae omwene, ni ng'inwae omiire okuwa na antunzia ki omwana waae owa yaiwula.
- ¹⁴Munkeezizie Asinkretuusi ni Filegoona ni Ermeesi ni Patrobaasi ni Ermeesi alala na Awakristo woona awa wari nawo.
- ¹⁵Lwona munkeezizie Filologuusi ni Julia, alala ni Nereusi ni wamwawu owekiala, no Olimpaasi alala na awantu awa Katonda woona awa wari nawo.
- ¹⁶Owutuukre mukeezanie omuntu no omwina waae na amakeezio aga awada awagonzanie ku Kristo. Amakaniisa goona aga Kristo gawatumiire amakeezio.

¹⁷Waamwifu, mbasawa mbwe muirinde ku awantu awareeta engawuzi, kandi awaona okuganya okwa awantu ni igerera eritalondokana ni igerera eria mumiire okutuukra. Muwe ale na awantu awo.

¹⁸Aeniki awantu awakola ewintu ewifwana witio awo, ngawakorra Kristo Omwami iifu, ni wakola mala okuagala kwawu aweene. Wawuwa awantu awafwa okuganya-uganya ewia wawuriire, ni wakola na amang'ana gaawu amateremu agakulula awantu.

¹⁹Inywe, awantu wona wamiire okuwurra kiomo mukola okuagala okwa Katonda kandi kino kimpa owusangaavu ino ni inywe. Nyagala mbwe muwe awantu awaganga mu okukola ewintu ewilootu, ni mu okukola owuoni muwe aweeru awawula ne ekikawa-amba.

²⁰Katonda owa owuolu wuifu wuemako, aaza okunyatula-nyatula amaani aga Sataani kandi amute ansi eya amagulu giinyu kuwangu. Owusiza owua Omwami iifu Yesu wuwe ni inywe.

²¹Timotheo, owemirimo omwina wange, awatumiire amakeezio. Awayaudi awiina wange, waawu Lukiio ni Yasooni alala ni Sosipaata wona wawakeeziizie.

²²Inze Tertiasi, omujoji ojojerra Paulo ebaruwa eno, noona mbatumiire amakeezio ku eriina eria Omwami Yesu.

²³Gaayo, owa ndi omugeni mu enyumba yaae kandi owa engo waae nio Awakristo wona waagaanra, oona awakeeziizie. Erasto okangatiire owuomboki owua omugizi guno alala ni wamwifu Kwotaasi wona wawatumiire amakeezio.

²⁴[Owusiza owua Omwami iifu Yesu Kristo wuwe ni inywe mwona. Amin.]

²⁵Kutio, tu-ee Katonda owunene ino! Katonda ono nio ori na amaani aga okuwasimbiira mu okuganya ku iye. Akola otio ni kuwitra ku amang'ana amalootu agari ku Yesu Kristo, aga inze Paulo ndanzia. Owuene owua amang'ana gano, owuawanga ni wuiwisiire awantu ku emiigo emingi, ni nyingeeno wumiire okusasulwa.

²⁶Amang'ana gano gamanyika ni kuwitra ku ewintu ewia awagambi awakulu waajoja, kandi wigata kuwueru ino. Katonda orio amiire goona nio owasikirra mbwe awantu awaema mu enganda ziona wamanye owuene owuri ku okuganya ku Kristo kugere wamuwurre kandi wamulonde.

²⁷Katonda omulala, ori omuganga otuukre, aeewue owunene amiire goona ni kuwitra ku eriina eria Yesu Kristo. Amin.

1 Awakorintho

1 Awakorintho 1

Amakeezio agasookere

¹Ni inze Paulo, owaetwa okuwa omutumwa owa Yesu Kristo ku okuagala okwa Katonda, ni ndi alala ni wamwifu Sositheneesi.

²Mbajojera ebaruwa eno inywe awantu awa ekaniisa eya Katonda ekiri ku omugizi ogwa Korintho, awantu awamiire okueruyiwua ku Yesu Kristo kandi awaeterwe okumenya owulamu owutengeekwe emberu wa Katonda, alala na awantu wona asi-uasi aa wari, awaeta eriina aria Omwami Yesu Kristo ori Omwami waawu no Omwami iifu twona.

³Muwe no owusiza no owuolu owuema ku Soifu Katonda alala no Omwami iifu Yesu Kristo.

Paulo aikazia Katonda ku Awakorintho

⁴Nyiranizia Katonda otioo enyinga ziona ku inywe aeniki amiire okuwa-aa owusiza wuae ni kuwitra ku Yesu Kristo.

⁵Aeniki mu okuwa kwinyu mu owulala ni Yesu Kristo, Katonda amiire okuwa-aa ensereki mu engira ziona, mu okugamba-gamba kwinyu kugia mu okumanya okwa mumanyire nakwo ewintu ewia omwoyo.

⁶Ensereki zino ziri ekilago mbwe amang'ana aga twawalaga ku Yesu Kristo gari ne ensimbiro ku inywe.

⁷Kutio ewulao empanwa eya mu omwoyo namba endala eya mutakaaye ni murindirra okusasulwa okwa Omwami iifu Yesu Kristo.

⁸Kristo omwene aaza okuwarinda ni muri awakalangufu mu amiire goona aga owulamu wuinyu, kugere muwe aweeru awawulako embala, Owuire owua Omwami Yesu Kristo arikengra awantu ekiina.

⁹Katonda owawaeta muwe mu owulala no Omuzia wae Yesu Kristo Omwami iifu, arindre endagano yaae.

Okugawukana kuweere mu ekaniisa

¹⁰Waamwifu, mbisasaamre mwona ku eriina eria Omwami iifu Yesu Kristo mbwe omuntu ki omuntu awe ne empurizanio no omwina wae kugere engawuzi zitaaza ziawa agati iinyu, kandi mbwe muwe awantu awa-ambaane ti mu amaingirizio no okuagala kwinyu.

¹¹Waamwifu, wario awantu awa mu enyumba eya Kloe, awandetiire amang'ana mbwe zirio ensoolo agati iinyu.

¹²Ekia mboola kiri kitino: Wario awandi ku inywe awawoola mbwe, “Inze ndonda Paulo,” na awandi mbwe, “Inze ndonda Apolo,” na awandi mbwe, “Inze ndonda Keefa” na awandi wona wawoola mbwe, “Inze ndonda Kristo.”

¹³Mbawuuzia, Kristo ono mumugawuule kameka? Paulo yoona yawambwa ku omusalaaba ku amawi giinyu? Kusi mwabatiiswa ku eriina eria Paulo?

¹⁴Ndi no owusangaavu mbwe awulao-uwula omuntu ku inywe owanyabatiisa ogawuuke ni Krispaasi ni Gaayo.

¹⁵Kutio awulao omuntu oesa okuwoola mbwe mwabatiiswa ku eriina riange.

¹⁶(Ee, nganyire mbwe lwona ni inze owabatiisa awantu awa mu enyumba eya Stefaano. No owugawuuke nawo, nampingirizia mbwe ario omuntu wundi owanyabatiisa kandi.)

¹⁷Aeniki Kristo ngakantuma okugia okubatiisa awantu yaaya, ni yantuma okugia okulanzia injiili. Kandi ng’ankola otio na amaganga aga omuntu yaaya, aeniki okwo kukagera omusalaaba ogwa Kristo guwule na amaani.

Amaganga aga Katonda gagawuuke na aga ekialo

¹⁸Amang’ana aga okufwa okwa Yesu ku omusalaaba, no owumaya ku awantu awateeka, ni ku ifwe awanunulwa gari amaani aga Katonda.

¹⁹Kuri mala kimo kwajojwa mu endagano otino: “Nyiza okuona amagezi aga awantu awaingirizia mbwe wari wagezi, kandi amaganga aga awaganga nyiza okugera gawule ne emirimo.”

²⁰Katonda nio omiire okugera amagezi aga ku ekialo kuno goona gawa owumaya. Kutio awagezi wari? Nakuwa awagerezi awa endagirra wari? Kusi awagambageza wari?

²¹Aeniki Katonda, ku amaganga gaae omwene, yagera awantu awa ekialo okumumanya na amaganga gaawu aweene kiwa ekintu ekitaesekana. Ni kwamuomerezia okukola na amang’ana agatulanzia aga awantu waeta mbwe owumaya gano, okununula awantu awaganyire ku Yesu.

²²Awayaudi iwo waagalanga mbwe wawone amankono, na awantu awatari Awayaudi iwo waagalanga amaganga,

²³ni ifwe tulanzia Kristo owawambwa ku omusalaaba. Ku Awayaudi amang’ana agatulanzia gano gafwana iwaale eriwaguunya, ni ku awantu awatari Awayaudi gari owumaya.

²⁴Ni ku Awayaudi alala na awatari Awayaudi awa Katonda yaeta, Kristo ari amaani kandi amaganga aga Katonda.

²⁵Aeniki owumaya owua Katonda wukirre amaganga aga omuntu ale kandi owugata owua Katonda, wukirre owukalangufu owua omuntu ale.

²⁶Waamwifu, muingirizieko kiomo mwawanga olwa mwaetwa. Mberi mumanyire mbwe nikulondokana ni kiomo awantu wawona ewintu, owungi wuinyu ngamukawanga awantu awagezi yaaya, lwona ngamukawanga awantu awari na amaani namba awaaiwulwa mu emigizi eminyazi.

²⁷Ni Katonda yalowola ewintu ewia awantu waeta mbwe owumaya ewio, okusuusia awantu awaieta mbwe wari awaganga. Lwona yalowola ewintu ewia awantu waeta mbwe wigata kandi ewiwula amaani, okusuusia awantu awaieta mbwe wari awakalangufu kandi awari na amaani.

²⁸Katonda alowola okukola ne ewintu ewiri ansi kandi ewia awantu awa ekialo waregere ki ewintu ewiwula emirimo, okusuusia ewintu ewia awantu watoorre ki ewintu ewinene,

²⁹kugere omuntu-umuntu ataaza yaitumbula emberu wa Katonda.

³⁰Katonda nio owagera ni muwa ku Kristo, Kristo ori amagezi giifu agaemere ku Katonda kuwene. Ee, ni iye owuigolovu wuifu, okumenya kwifu owulamu owutengeekwe kandi nio awatuoorra omusango kugere tuwe awantu awa Katonda.

³¹Kutio kuri mala kiomo endagano ewoola mbwe, “No omuntu aagala okuitumbula, asugaane aitumbule ku Omwami Katonda.”

1 Awakorintho 2

¹Waamwifu ku Kristo, olwa nyawaazako okuwalanzizia amang’ana aga Katonda, ng’ankakola na amang’ana amakalu-kalu namba agalagana amaganga agari kungulu, yaaya.

²Aeniki nyawisia mu omwoyo gwange okuwagerera mala ku Yesu Kristo no okuwambwa kwae ku omusalaaba, kweng’ene.

³Ni nyawanga agati iinyu, nyawanga omunyowu-nyoowu, omuti kandi omuadadu.

⁴Okugerera no okulanzia kwange, kwawulangamo amang’ana agalagana amaganga aga ekialo kandi agakulula awantu yaaya, na amaani aga Omwoyo Omweru ogwa Katonda nigo agaalaganiwuamo.

⁵Nyakola otio kugere okuganya kwinyu kutaaza kwaisigika ku amaganga aga omuntu yaaya, ni kuisigike ku amaani aga Katonda.

⁶Kukawa kutio, ni tugamba-gamba na awantu awa okuganya kwawu ku Kristo kumiire okukoma, tukola na amang’ana agari na amaganga. Ni ng’ana amaganga aga ekialo kino namba aga awakangasi awa ekialo awaaza okuwita waemeo wano.

⁷Yaaya, ifwe tugamba-gamba ku amaganga aga Katonda agamiire okuwa ni gaiwisiire awantu kandi aga Katonda yatuteerao kale ne ekialo kikiari okulukwa kugere atu-ee owunene.

⁸Awulao namba omulala ku awaami awa ekialo kino owaamanya amaganga gano, aeniki wagamanyeko, kangato ngawakawamba Omwami iifu ori no owunene ku omusalaaba.

⁹Kukawa kutio, mala kiomo kwajojwa mu endagano mbwe: “Awulao omiire okuwona awulao omiire okuwurra omutwe gukiari okuingirizia ekintu ekia Katonda amiire okuikazizia awantu awamugonziizie.”

¹⁰Ni ifwe Katonda amiire okukitusanukurra ni kuwita ku Omwoyo gwae Omweru. Omwoyo Omweru iye aagarizia ekintu-ukintu nawuno yakimanya. Ee namba ewintu ewia Katonda ewiri munsu-munsu.

¹¹Okamanya ekia omuntu aingirizia ogawuuke no omwoyo gwae omwene ogumumenyeremo, naanu? Mu engira endala eyo, awulao omuntu omanyire amaingirizio aga Katonda ogawuuke no Omwoyo Omweru ogwa Katonda.

¹²Ngatukatuukra omwoyo oguema ku ekialo, ni twatuukra Omwoyo Omweru oguema ku Katonda, kugere tumanye ewintu ewia Katonda amiire okutu-aa wusa, ku okuagala kwae omwene.

¹³Kino nikiyo ekia tulaga awantu. Ng’atukola otio na amang’ana agaema ku amaganga aga omuntu yaaya, ni na amang’ana aga tugererwa no Omwoyo Omweru ogwa Katonda. Tulagana owuene owua amang’ana aga Katonda ku awantu awari no Omwoyo ogwa Katonda.

¹⁴Omuntu owula no Omwoyo Omweru ogwa Katonda, ngaingizia amang’ana agaema ku Omwoyo ogwa Katonda, aeniki agawona ki amang’ana aga owumaya kandi ngaesa okugawurra aeniki amang’ana ago Omwoyo ogwa Katonda eng’ene nio okagera omuntu amanye ekia galagana.

¹⁵Omuntu ori no Omwoyo Omweru ogwa Katonda iye aesa okukenga ekiina ku ewintu wiona, ni iye omwene awulao omuntu owula no Omwoyo Omweru oesa okumukengera ekiina, yaaya.

¹⁶Kuri mala kiomo endagano ewoola mbwe, “Omanyire amaingirizio aga Omwami Katonda okamulaga ekia asugaane akole, naanu?” Ni ifwe tuesa okuwurra amang’ana gano aeniki turi na amaingirizio aga Kristo.

1 Awakorintho 3

Engawuzi ngazisugaane ziwe mu ekaniisa

¹Waamwifu, inze ni nyawanga ni inywe, nganyakaesanga okuwagerera ki awantu awalondokana ne ekia Omwoyo ogwa Katonda aagala yaaya, ni ki awantu

awamenyere ki awantu awa ekialo, kandi ki awaana awakiari ewing'eng'e ku Kristo.

²Kutio ng'ankawa-aa okuria okukalu, ni nyawanywesia mala amaweere aeniki mwawanga ni mukiari okusuga. Ni namba nyingeeno mukiari okusuga yaaya,

³aeniki mukiamenyere ki awa ekialo. Ni kuri mbwe ensoolo ne endandulu zikiari agati iinyu, nampao mukiamenyere ki awa ekialo? Kusi nampao mukiari mala ne enkola ezia awantu-uwantu?

⁴No omulala ku inywe akiawoola mbwe, "Inze ndonda Paulo," No owundi mbwe, "Inze ndonda Apolo." Ao otio nampao mugamba-gamba mala ki awantu-uwantu?

⁵Kusi Apolo ni inze Paulo turiki? Ngaturi mala awemirimo awa Omwami Yesu yakola nawo kugere muwe no okuganya, nikulondokana ni kiomo omwene yagawira omuntu ki omuntu emirimo giae?

⁶Inze nyakomera emwo, Apolo afukirizia amanzi, ni Katonda nio owagera ne emwo emera kandi ne ekoma.

⁷Kutio omuntu okomeere no ofukiriizie amanzi, iwo ngawari ekintu yaaya. Ni, ni Katonda ogera ne omwo emera kandi yakoma nio ori omukaate.

⁸Omuntu okomera no omuntu ofukirizia amanzi woona wari ekintu ekilala kandi omulala ki omulala arioloolwa owuagani ne emirimo egia yakola.

⁹Inze ni Apolo tukorra Katonda alala, ni inywe muri ki omusiri ogwa Katonda. Lwona muri ki enyumba eya Katonda.

¹⁰No owusiza owua Katonda ampeere, nyataao owulusa ki omuomboki omanyire emirimo giae geeza ino, kandi awantu wandi wawuombokako. No omuomboki ki omuomboki paka awarre geeza kiomo awuombokako.

¹¹Aeniki awulao omuntu oesa okuomboka owulusa wundi owugawuuke no owumiire okuombokwa, owuri Yesu Kristo.

¹²No omuntu aombooke ku owulusa wuno ne edhaabu, efeedha, amawaale aga iguzi eria kungulu, namba ni ibaawu, owusuwi na amakwati,

¹³emirimo giae giiza okumanywa geeza. Ee, aeniki owuire owua owutuuko, ewintu wiona wiriteewua ku owueru kandi emirimo egia omuntu ki omuntu girigeezaniwua no omurro kugere gimanyike mbwe gifwanana gitie.

¹⁴Ekintu ekia omuntu aombooke ni kikirre omurro okusamba, arioloolwa omugawo gwae.

¹⁵Ni, ni kiyiire mu omurro, omuntu oyo ariemao wusa. Omwene arinunulwa, ni mala ki omuntu omizuke amakono amasa chee, okuema mu enyumba eyia.

¹⁶Mberi mumanyire mbwe inywe muri ekaalu eya Katonda kandi mbwe Omwoyo Omweru ogwa Katonda awamenyeremo?

¹⁷No omuntu aonere ekaalu eya Katonda, Katonda omwene aaza okumuona. Ni kutio aeniki ekaalu eya Katonda eri enzeru, kandi inywe ni inywe ekaalu eyo.

¹⁸Omuntu ataaza yaisemerezia! Na ario omuntu ku inywe oingirizia mbwe ari omuganga, mu engira eya awa ekialo wawona owuganga, asugaane ate amaganga ki ago entulo awe omumaya, nikwo awe omuganga kuwue.

¹⁹Kuri kutio aeniki amaganga aga ekialo kino no owumaya mu amiiso aga Katonda. Kuri mala kiomo kwajojwa mu endagano mbwe, “Katonda a-amba awaganga mu owuganga-ganga wuawu,”

²⁰kandi ewoola mbwe, “Omwami Katonda amanyire mbwe amaingirizio aga awaganga gawula ne emirimo.”

²¹Kutio okuitumbula mbwe iwue ori owa omuntu wundi kuwula ni iwaga kandi ngakusugaane yaaya, aeniki ewintu wiona wiri ewiinyu.

²²Ee, mumiire okutuukra owuitunzi okuema ku Paulo, Apolo alala ni Petro, kandi muri no owukire ku ekialo, ku owulamu namba olumbe, kandi ku amiire aga nyingeeno na amiire agaaza.

²³Inywe muri awa Kristo, kandi Kristo ari owa Katonda.

1 Awakorintho 4

Emirimo egia awatumwa

¹Kutio musugaane mutuwone ki awemirimo awa Kristo awaerwe emirimo egia okulaga awantu okuagala okwa Katonda okwawanga ni kuiwisiire awantu.

²Kwagalana mbwe awantu awaerwe emirimo paka waganywe na awantu awawakorra emirimo ki awarindre amang’ana gaawu.

³Inze ku emirimo egia mpeerwe, ngakumpambre ni nkengeerwe ekiina ni inywe namba no oluwuga olwa awantu, yaaya. Namba omwene ng’anyiikengra ekiina yaaya.

⁴Inze mbula ne ekintu namba ekilala mu omwoyo gwange ekinkira ne ekiina, no okwo ngakulagana mbwe ndi omuntu omweru yaaya. Omwami Yesu eng’ene nio onkengera ekiina.

⁵Kutio mutakengera omuntu ekiina, ni murinde nawuno amiire agaateewuao gatuuke, olwa Omwami omwene arikengra awantu ekiina. Iye nio orisanukula kuwueru ewintu ewiwisirwe mu ekierema kandi arita okuagala okwa omwoyo ogwa omuntu ki omuntu enze ku owueru. Owuire owuo omuntu ki omuntu arituukra okutondowolwa ni Katonda okusugre nae.

⁶Waamwifu, nkorre na amang’ana gano ku inze omwene alala na Apolo okuwatunzia, kugere muigerere ku ifwe ekia olugero oluwoola mbwe,

“Otatambuka amang’ana agajojrwe” lulagana. Ni mukorre mutio, ngamuuza okuitumbula no omuntu omulala no owundi mulowe yawa.

⁷Ogera ni muiwona ki awari kungulu okukira awandi naanu? Kusi ekia ori nakio iwue ekia otaaeewua ni Katonda niki? Ni kuri mbwe waeewua-ueewua, katio ekigera no oitumbula ki omuntu otaaeewua ekia ari nakio niki?

⁸Owuo inywe mumiire okutuukra ewintu ewia muagala wiona kandi mumiire okuwa awanyazi? Mureetre otie okuwa awaami, ni ifwe turi enyima? Kukaweere geeza ni muweere awaami kuwuene kugere twona tuwe awaami alala ni inywe.

⁹Inze mpingirizia mbwe ifwe awatumwa awa Yesu, ni ifwe Katonda aisiizie ansi owutuukre. Okwo kumiire okulaganwa ku igulu ni ku ekialo kiona, emberi wa enyankoi na awantu ku okufwananiwua na awantu awakengiirwe ekiina ekia okuitwa enze mu olwanyi.

¹⁰Tuwonwa ki awantu awamaya aeniki turi no okuganya ku Kristo, ni inywe okuwa kwinyu ku Kristo kugerre ni muiwona ki awari awaganga ino. Ifwe turi awantu awanyowu-nyoowu, ni inywe muiwona ki awari awakalangufu. Inywe mueerwe owuti, ni ifwe awantu waturegere.

¹¹Namba nyingeeno tuwula no okuria okwa tukaria namba amanzi aga tukanywa. Tuwula ne enguwo, ewikube wituita kandi tuwula na aa owumenyo.

¹²Tukola emirimo wukalu na amakono giifu aweene. No omuntu atufuwure, ifwe tumusereka. Ni tunyaasiwua, tukola olutuunyo kandi

¹³ni tugamba-gambwako uwiiwi, ifwe tuirania no owuolu. Nawuno nyingeeno tufwananira awantu awa ekialo enyoori eziwula ne emirimo ezirigiziwua enze.

¹⁴Nambajojera amang’ana gano okuwa-aa ensuuko yaaya, ni mbasiagizia ki awaana wange awa ngonziizie.

¹⁵Kukawa mbwe mu owulamu wuinyu owua Owukristo muesa mwawa na awaimerezi awangi ki omusenye, ni ngamuri ni waasoinyu wangi yaaya. Aeniki ku Kristo, inze ni inze owawa ki soinyu ni kuwitra ku injili.

¹⁶Kutio mbaisasaama mbwe mulonde omufwano gwange.

¹⁷Kandi ekio nikio ekigera ni ntuma Timotheo ori omuzia wange owa ngonziizie kandi omuntu oambre amang’ana aga Omwami Yesu wukalu, awaazeko eyo. Aaza okuwaizurizia kiomo owulamu wuange ku Kristo wufwanana. Ewintu ewia ngerera awantu asi-uasi mu amakaniisa goona, wiambaane ne ewia nkola mu owulamu wuange.

¹⁸Wario awandi ku inywe awaitumbula, ki awatamanyire mbwe nyiza okuwaazako eyo.

¹⁹Ni, no Omwami Yesu aganyire, nyiza okuwaazako eyo kuwuangu. Ni miire okuuzza, nganyiza okuagarizia nawuno manye mala ewia awantu awaitumbula wano wawoola wieng'ene, ni kugia amaani aga wari nago.

²⁰Aeniki Owuami owua Katonda ng'awuilagana mala na amang'ana amasa, ni wuilagana na amaani.

²¹Ekilootu ku inywe ne ekiriai? Okuwaazako no olukowa, kusi no olugonzi kandi no omwoyo omuteremu?

1 Awakorintho 5

Omusoodani asugaane asomosiwue mu owulala owua Awakristo

¹Nzinduuke amasaai ino okuwurra mbwe okuinyonkoonia kuikola agati iinyu, kandi mbwe no okuinyonkoonia okutaikola namba agati ya awantu awatamanyire Katonda. Mbwe, ario omuntu ooorre muka swae ari nae ki mukaae!

²Ni kandi mukiaitumbula-uitumbula, ni kangato owululu wukaweere ni wumiire okuwa-amba ne ekiikola ekio, mala musomosie omuntu okola ekintu ekifwana kitio enze eya owulala wuinyu.

³Kukawa mbwe ng'andi ni inywe alala mu omuwiri, mu omwoyo ndi ni inywe mu owulala. Kandi omwene miire okukengera omuntu okorre eking'ana ekifwana kitio ekiina, mala kiomo nkakorre ni nkaweere eyo ni inywe alala.

⁴Ni muikumiizie alala ku eriina eria Omwami Yesu, kandi mu omwoyo ni ndi ni inywe mu owulala, amaani aga Omwami iifu Yesu ni gawarimo,

⁵mutoole omuntu oyo, mumute mu amakono aga Sataani kugere omuwiri gwae guonwe, no omwoyo gwae gununulwe Owuire owua Omwami Yesu ari-irana.

⁶Okuitumbula okwa muitumbula okwo ngakulootu yaaya. Ngamumanyire mbwe omumera omutono guzimbua owusie owungi?

⁷Mutooleo omumera omukulu, muwe awantu aweeru mala kiomo owusie owua omukaati owuwulamo omumera. Kandi kuwene muri aweeru awawulamo omumera namba omutoono aeniki Kristo Ekimaatwa kiifu ekia Pasaaka amiire okufumiwua ki omusango ogutueruya.

⁸Kutio tutaaza twagomera omugomo ogwa Pasaaka no omukaati ogufumbrwe no omumera omukulu ogwa owuweeyi ne enkola embiiwi yaaya, ni mutugugomere ni turia omukaati oguwulamo omumera ogureeta owueru no okuwa ku owuene.

⁹Nyamala okuwajojera itu ni mbalaga mbwe mutaizogaana na awantu awa enkola embiiwi ezia owusoodani, yaaya.

¹⁰Kusi ni mboola otio, muingirizia mbwe mboola awantu awa ekialo awari awasondo, na awa enda endiire, na awasakuzi namba awasawa katonda ensaasa? Yaaya, ao otio nkafwanaane owagala mbwe mung'aanye mueme ku ekialo kuno.

¹¹Ekia nyawoolanga ni mbwe paka mureke okuizogaana no omuntu-umuntu oieta wamwinyu ku Kristo, ni kandi asooda namba ari ne enda endiire, osawa katonda ensaasa, omuwooli owa awantu, omunywi nakuwa omusakuzi oiwa na amagezi. Omuntu ki oyo namba okuria mutaria nae!

¹²Ng'ane emirimo giifu okukengera awantu awari enze eya ekaniisa ekiina! Awantu awari mu ekaniisa weng'ene niwo awa musugaane mukengere ekiina.

¹³Katonda omwene nio orikengera awantu awari enze eya ekaniisa ekiina. Endagano ewoola mbwe: "Musomosie mu owulala wuinyu awantu awakola enkola embiiwi agati iinyu."

1 Awakorintho 6

Okuingirra Omukristo omwina waa

¹No omulala ku inywe ari ne ekiina no Omukristo omwina waae, areeta otie okureka Awakristo mbwe agia okumuingirra ku awantu awatamanyire Katonda mbwe wawagawule?

²Mberi mumanyire mbwe Awakristo niwo awaaza okukengera ekialo ekiina? Ni, ni kuri mbwe inywe ni inywe awaaza okukengera ekialo ekiina, katio ekiwalowera okukenga ewiina ewitono-tono agati iinyu niki?

³Kusi ngamumanyire mbwe ifwe Awakristo ni ifwe awaaza okukengera kugia enyankoi ekiina? Ni kuri kutio, tuesa okukenga ewiina ewia owulamu wuno geeza owuagana wutie?

⁴Kutio ni muri ne ewiina ewifwana witio, muesa otie okulowola namba awantu awa ekaniisa etaganyre nawo, wawaweere awakengi awa ekiina?

⁵Mboola otio okuwasuusia. Kuesekana otie mbwe awulao-uwula chee omuntu omuganga ku inywe oesa okukenga ekiina ekiri agati ya awantu awaganyire ku Katonda?

⁶Ni aa okukola otio, omuntu aira Omukristo omwina waae mu ekiina, kandi akola otio emberu wa awantu awawula no okuganya ku Katonda!

⁷Ni muingirra awiina wiinyu otio, kulagana kuwuene mbwe mwona mumiire okukirwa chee! Kukaweere kulootu namba ni murekere-ureka awantu wawaonre kandi wawasemerezie, nakuwa wawasakule.

⁸Ni inywe aa okukola otio, kuituukrana mbwe ni inywe awaonera kandi awasemerezia awantu, kandi ni mala waamwinyu ku Kristo niwo awa mukorra mutio.

⁹Ngamumanyire mbwe awantu awa enkola embiiwi iwo wariwula-uwula no omugawo mu Owuami owua Katonda, chee? Omuntu atawasemerezia yaaya. Namba awasondo, awantu awagonziizie okugia ku owuriri na awakazi nakuwa awasaaza awa awandi, awasawa katonda ensaasa, awasaaza awasoodwa na awasaaza awiina waawu,

¹⁰namba awiwi, awantu awa enda endiire, awanywi, awanyegani namba awasakuzi woona ngawariwa no omugawo mu Owuami owua Katonda.

¹¹Kandi kuluwari, awandi ku inywe nintio mwafwananga. No owuoni wuinyu wuamala okuoziwua, mwateerwa Katonda antulo kandi mwareetwa mu empurizanio nae ku eriina eria Omwami Yesu Kristo alala no Omwoyo Omweru ogwa Katonda.

Omuwiri gwao guri ekaalu eya Katonda

¹²Awandi wawoola mbwe, “Endagirra ziifu zituganyiire okukola ekintu-ukintu.” Ee, ni ng’ani mbwe ekintu-ukintu kitunzia omuntu. Kutio omuntu ngasugaane aganye ekintu-ukintu kiwe na amaani ku iye.

¹³Lwona muwoola mbwe, “Enda ne eya okuria kandi okuria no okwa enda.” Ni Katonda aaza okuona ewintu wiwiri wino wiona. Omuwiri ngagukalukrwa owusoodani yaaya, ni guri ogwa Omwami Yesu kandi iye nio osugaane agukangatre.

¹⁴Katonda yaziusia Omwami Yesu okuema ku awafu, kandi twona aaza okutuziusia na amaani gaae.

¹⁵Mberi mumanyire mbwe emiwiri giinyu ne ewiimo ewia omuwiri ogwa Kristo omwene? Katio nkatoola otie ewiimo ewia omuwiri ogwa Kristo mbite alala no omusoodani? Nakuesekana yaaya!

¹⁶Mberi mumanyire mbwe omuntu-umuntu owa no omukazi omusondo owulala, wawa omuwiri omulala nae? Aeniki kwajojwa mbwe “Awantu wawiri awo wawa omuwiri omulala.”

¹⁷No omuntu oizogaana no Omwami Yesu, awa nae alala mu omwoyo.

¹⁸Murumuke muwe ale na amawi aga owusoodani. Amawi agasigaale goona aga omuntu akola, agakola enze eya omuwiri gwae. No omuntu okola amawi aga owusoodani, akola amawi agaona omuwiri gwae omwene.

¹⁹Mberi mumanyire mbwe emiwiri giinyu giri ekaalu eya Omwoyo Omweru ogwa Katonda owamenyeremo? Omwoyo Omweru awarimo kandi ari empanwa ewaemeere ku Katonda. Ngamuri awa inywe aweene yaaya,

²⁰ni mwagulwa ku omurengo omukaate. Kutio mu-ee Katonda owunene ne emiwiri giinyu.

1 Awakorintho 7

Amang'ana aga okukwezana

- ¹Katio nyagala mbwe mbairanie ku amang'ana aga mwanjojera ku okukwezana. Kuri kulootu no omuntu atakwere.
- ²Ni aeniki okugeezaniwua okwa owusondo kuri okungi ino, omusaaza ki omusaaza asugaane awe alala no omukazi waae kandi omukazi ki omukazi yoona awe alala no omusaaza waae.
- ³Omusaaza asugaane akorre omukazi waae ewintu wiona ewia awantu awakwezaane wasugaane wakole, kandi omukazi yoona nintio.
- ⁴Omuwiri ogwa omukazi naguri ogwae omwene yaaya, no owusookere guri ogwa omusaaza waae nikwo iye, kandi mu engira yazane eyo, omuwiri ogwa omusaaza naguri ogwae omwene, no owusookere guri ogwa omukazi waae nikwo iye.
- ⁵Mutaimana emiwiri giinyu yaaya, ni mukole mala otio ku amiire amatono, aweene ni muganyaane, mu amiire aga muri mu okusawa. Ni, ni mumiire, musugaane kandi muirane muwe alala kugere Sataani ataaza yawageezaania ku okutawa no okuirinda.
- ⁶Mbalaga amang'ana gano ng'ani ki ensikirra yaaya, ni ki amaingirizio gange inze omwene.
- ⁷Nkaagaale mbwe awantu awekisaaza woona wawe ki inze. No omuntu ki omuntu ari ne empanwa yaae eya Katonda yamu-aa, omulala eno no owundi eindi.
- ⁸Ni, ni ngamba-gamba ku awasaaza awafwire na awakazi awafwire, mboola ntino: Kukaweere geeza ni wakaweere kiomo inze ntino.
- ⁹Ni, no owula amaani aga okuirinda omwene, kwa nakuwa okwewue mbenanu aeniki kulootu no omuntu aingiire mu owukwe okukira okuyia no owutima enyinga ziona.
- ¹⁰Ku awantu awamiire okukwa iwo mba-aa ensikirra eno (yaaya ng'ani inze, ni no Omwami Yesu omwene): omukazi ataaza yareka omusaaza waae yaaya.
- ¹¹Ni, na amurekere, asugaane aikale-uikala omwene otio atagia amaria, ni kutari kutio airane ku omusaaza waae. Kandi omusaaza yoona ataaza yarumusia omukazi waae yawa.
- ¹²Ku awantu wandi awasigaale iwo mbalaga otino (ni inze owoola, ng'ani mbwe no Omwami Yesu nio owawoola): no omusaaza oganyire ku Kristo ari no omukazi owula no okuganya ku Kristo, no omukazi ono aganyire okugia emberi okumenya nae, asugaane agie emberi okumenya-umenya nae, atamurumusia yaaya.

¹³Kandi omukazi oganyire ku Kristo ori no omusaaza owula no okuganya ku Kristo yoona ataaza yarekana no omusaaza waae ni kuri mbwe omusaaza oyo aganyire okumenya nae.

¹⁴Kuri kutio aeniki omusaaza owula no okuganya ku Kristo aeruyiwua ku Katonda ni kuwitra ku omukazi waae ori no okuganya, kandi omukazi otari no okuganya ku Katonda yoona aeruyiwua ku Katonda ni kuwitra ku omusaaza waae ori no okuganya. Kuweeko mbwe ngakuri kutio, awaana awa waiwuule ngawakaweere awantu awa Katonda. Ni kiomo kuri, wari awantu awa Katonda.

¹⁵Ni, no omuntu owula no okuganya ku awantu wawiri awo nio owuine mbwe aagala okurekana no omwina waae ori no okuganya, amureke akole-ukola otio. Ao otio omusaaza namba omukazi ori no okuganya ku Kristo kiwulao ekintu ekimusiwre ku enserezi eyo. Ni mutalawira mbwe Katonda atuetera mbwe tumenye na awiina wiifu no owuolu.

¹⁶Okamanya otie mbwe andi iwue omukazi ori no okuganya, ni iwue ooza wagera omusaaza waao na atuukra owuinunuzi? Namba iwue omusaaza ori no okuganya, okamanya otie mbwe kaozi ni iwue ooza wagera omukazi waao na atuukra owuinunuzi?

Owulamu owua Katonda yatueta mbwe tumenye

¹⁷Kukawa kutio, omuntu ki omuntu asugaane aganye okuwa kiomo yawanga olwa Katonda yamueta kandi atoole omugawo ogwa yaeewua no Omwami Yesu. Eno nie endagirra eya nteriire amakaniisa goona.

¹⁸Na ario omuntu owa Katonda yaeta na amiire okuirwa enyangu, ataaza yaitoolako embala eya okuirwa enyangu. Kandi na ario omuntu owa Katonda yaeta na akiari okuirwa enyangu, ataaza yairwa enyangu.

¹⁹Aeniki okuirwa enyangu no okutairwa enyangu ngane ekintu yaaya. Ekintu ekineene, no okurinda ensikirra ezia Katonda.

²⁰Omuntu ki omuntu asugaane agie emberu okuwa mala kiomo yawanga olwa Katonda yamueta.

²¹Mberi Katonda yakueta no ori omukurumu? Ni kuri kutio, okwo kutakunyaasia omwoyo. Ni, no otuukiire iwaga eria okuwa owuyanga, ni wa owuyanga.

²²Mboola otio aeniki omuntu owawanga omukurumu olwa Katonda yamueta okuwa ku Kristo, awa omuntu ori owuyanga ku Omwami Yesu. Mu engira yazane eyo, omuntu owawanga owuyanga olwa Katonda yamueta okuwa ku Kristo, awa omukurumu owa Kristo.

²³Mwagulwa ku omurengo ogwa kungulu, kutio mutawa awakurumu awa awantu.

²⁴Kutio waamwifu, omuntu ki omuntu asugaane agie emberu okuwa mala kiomo yawanga olwa Katonda yamueta.

Awaala na awakazi awafwire

- ²⁵Ni katio ni ngamba-gamba ku awaala awakiari no owugima, mbula ne ensikirra eya Omwami Yesu ampeere, ni mba-aa mala okuingirizia okwange. Muesa okuganya ku amang'ana gange aeniki owusiza owua Omwami Yesu wundimo.
- ²⁶Nikulondokana ne eminyako-nyaako egirio nyingeeno, inze mpingirizia mbwe kukaweere geeza ni muweere-uwa kiomo muri mutio.
- ²⁷No ori mbwe omiire okukwa namba okukwewua, mutarekana. Ni no ori mbwe okiari okukwa namba okukwewua, otakwa namba otakwewua.
- ²⁸Ni no omuntu akwere, akiari okukola owuoni yaaya, kandi lwona no omwala omugima akwerwe yoona akiari okukola owuoni yaaya. Mumanye mbwe awakwa na awakwewua waaza okuwona eminyako-nyaako egia ku ekialo kuno, ni inywe nyagala mbwe mutawona eminyako-nyaako egio.
- ²⁹Waamwifu ekia mbalaga kiri kitino, owutuuko owua ekialo wuri ampi katio. Okuemera nyingeeno omuntu ori no omukazi asugaane amenye ki owula no omukazi.
- ³⁰Awantu awarra wamenye ki awatarra, awasangaarre wamenye ki awatasangaarre kandi awagula ewintu, ewintu ewio wiwafwananre ki ewitari ewiawu ewia okuwiika.
- ³¹Awakola ne ewintu ewia ku ekialo kuno watawiisiwako yaaya aeniki ekialo kino, ne ewintu ewiriko wiiza okuwua chwe.
- ³²Awantu awakiari okukwa nganyagala ekintu kiwa-ambe yaaya. Omuntu okiari okukwa iye ekimuambre no Omwami Yesu eng'ene, ino-ino kiomo aesa okumusangaazia.
- ³³No omuntu omiire okukwa, iye ewintu ewingi ewia ekialo wimuambre, ino-ino kiomo aesa okusangaazia omukazi waae
- ³⁴kandi okuagala kwae kuri aa kawiri. No omukazi okiari okukwewua namba omwala okiari omugima, iye ekimuambre na amang'ana aga Omwami Yesu. Ekineene ku iye no okuwa ku Kristo no omwoyo gwae alala no omuwiri gwae. No omukazi omiire okukwewua, iye amang'ana aga ekialo gamuambre, ino-ino kiomo aesa okusangaazia omusaaza waae.
- ³⁵Mboola ntino ku owulootu wuinyu ni ntaagala mbwe muwe ne ewikiawa-ambre, ni kugere mute emioyo giinyu giona ku okukorra Omwami Yesu ni mumenyere owulamu owusugre emberu waae.
- ³⁶No omuntu aingirizia mbwe akeeyire okuirinda, na ario omwala okiari omugima owa agala okukwa, kandi omwala wazane oyo yoona amiire okutuusia emiaka egia okukwewua, owuwi wuwulao ni wakwezaane.

³⁷No omuzia awisiizie mu omwoyo gwae omwene mbwe ngagala okukwa omwala owa ya-amba nae owuiko owua enserezi, kandi ni kuri mbwe omwene aesa okugawula ekia asugre okukola, aa awulao omunigirizia okugalusia amaingirizio gaae, atakwa omwala omugima oyo. Omuntu oyo owuwi owua akorre wuwulao.

³⁸Kutio omuntu okwere omwala omugima akorre geeza, no omuntu otakwere iye akorre geeza okukira.

³⁹Enserezi esiwa omukazi ku omusaaza, mala no omusaaza akiari omulamu. Ni no omusaaza amiire okufwa, omukazi oyo ari iwaga okukwewua no omusaaza wundi owa omwoyo gwae guagala. No omusaaza oyo paka awe Omukristo.

⁴⁰Ni ku amaingirizio gange inze, omukazi ofwana oyo na aweere-uwa na atakwerwe, akawa geeza okukira. Mboola otio ni manyire mbwe inze noona Omwoyo Omweru ogwa Katonda andimo mala kiomo inywe.

1 Awakorintho 8

Okuria ewiokuria ewifumiziiwue katonda ensaasa ki omusango

¹Katio ni ngamba-gamba ku amang'ana aga mwajoja ku okuria okukoriirwe katonda ensaasa omusango, mboola ntino: aweene muwoola mbwe, 'twona turi no okumanya okungi.' No okumanya okungi okwo kureeta okuitumbula. Olugonzi ni luomboka.

²Omuntu oingirizia mbwe amanyire ewintu wiona ku ing'ana rewe, akiari okumanya kiomo asugaane awe mbwe amanyire.

³No omuntu ogonziizie Katonda, nio owa Katonda amanyire.

⁴Kutio ku okuria okukoriirwe katonda ensaasa omusango, tumanyire geeza mbwe katonda ensaasa nge-emereere ekintu-ukintu ku ekialo kuno, kandi tumanyire mbwe ario Katonda omulala eng'ene.

⁵Kutio namba ni wirio ewintu ewietwa katonda ensaasa, kuwe ku ekialo nakuwa ku igulu (kiomo kuri kuwue mbwe 'katonda ensaasa' na 'awaami' wari wangi),

⁶ifwe tumanyire mbwe ario Katonda omulala eng'ene ori Katonda Ise. Ni iye owa ewintu wiona wiaemako kandi owa turi awalamu okukorra. Kandi Omwami ari omulala eng'ene ori Yesu Kristo owa ewintu wiona wiwitako kandi owa tutuukrako owulamu.

⁷Ng'ani wona awamanyire amang'ana gano, yaaya. Iwo, ku okunala okwa waanala no okusawa katonda ensaasa, enyinga ezia waria ewiokuria ewifumiziiwue katonda ensaasa omusango, kuwafwananra mbwe wasawa katonda ensaasa ezio, kandi emioyo giawu emigata gi-ingirizia mbwe wakola owuoni.

⁸No okuria ngakututa ampi ni Katonda, yaaya. Kiwulao ekia tutuukra ni turiire okuria namba ekia tutakaya ni tutakuriire.

⁹Kukawa kutio, paka muwone mbwe owuyanga owua muri nawuo wutaweera Omukristo omwina iinyu ori no okuganya okunyowu-nyoowu ekigazio.

¹⁰Aeniki no omuntu wundi ori no okuganya okunyowu-nyoowu akuwuine iwue ori no okumanya okugera no owa owuyanga okuikala mu ekaalu eya katonda ensaasa okuria okuria okukoriirwe katonda ensaasa omusango, ngaaza okusianiya mbwe yona arie ewifumiziiwue katonda ensaasa ki omusango?

¹¹Katio wamwifu ori no okuganya okunyowu-nyoowu, owa Kristo yafwira ono aoneka ku okumanya okungi okwa ori nakwo kuno.

¹²No okoriire waamwinyu owuoni ku okuwaingizia mu okukola ewintu ewia aweene waingirizia mbwe ngawisugaane, ao otio okola owuoni emberu wa Kristo.

¹³Kutio ni kuri mbwe ekia ndia kigera ni wamwifu ku Kristo agwa mu owuoni, nganyiza okuria enyama kandi, kugere ntaaza nyagera agwe mu owuoni.

1 Awakorintho 9

Paulo asigika okuwa kwae omutumwa owa Yesu

¹Kusi inze ng'andi owuyanga? Ng'andi omutumwa owa Kristo? Kusi ng'anyawona Yesu Omwami iifu na amiiso? Nakuwa, inywe ng'amuri ekia muri ku emirimo egia Omwami Yesu amiire okukola ni inze?

²Namba awandi ni watantoola ki omutumwa, kuwene ku inywe ndi omutumwa! Aeniki inywe ni inywe ekilago kiangе mbwe ndi omutumwa owa Omwami Yesu.

³Ku awantu awantoolako owuwi, nyisigiike na amang'ana agafwana gatino:

⁴kane ifwe tuwula ni iwaga eria okumenya kandi okuria mu amayumba giinyu ku emirimo egia tukola?

⁵Kusi ifwe twona ngaturi iwaga okukwa awakazi awari no okuganya ku Kristo kandi okugenda-genda alala nawo kiomo awatumwa wandi alala ni waamwawu Omwami Yesu ni Keefa wakola?

⁶Kusi inze ni Baranabaasi, ni ifwe awatumwa awa paka wakole emirimo na amakono nikwo twatuukra ewia tuitunzia nawio mu owulamu?

⁷Awa-iiye wakaiyoolola ku emirimo giawu aweene otie? Naanu okomera omusiri ogwa omuzabiibu ni kandi ngaria ensaafu ziagio? Naanu ofuga emiandu, ni kandi nganywa amaweere gagio?

⁸Kusi mboola ntino mala na amaingirizio gange ki omuntu? Ensikirra yona ngewoola otio?

⁹Aeniki mu ensikirra eya Muusa kwajojwa otino, “Otaaza wasiwa omunwa ogwa eng’ombe enyinga ezia okola nayo mu okuwuula emere.” No oingirizia mbwe ne eng’ombe eng’ene nio eya Katonda awonra owululu?

¹⁰Kuwuene yawoola amang’ana gano okututunzia ifwe twona. Ee, aeniki omurimi arima kandi omuwuuli owa emere awuula, wona ni warindirra okutuukra omugawo ogwa emere.

¹¹Ni kuri mbwe ifwe ni ifwe awamiire okusimba emwo eya amang’ana aga Katonda mu emioyo giinyu, owuwi wuriai ni tuwatuukiireko ewintu ewia tuitunzia nawio?

¹²Na awantu wandi wari na amaani aga okutuukra owuitunzi wuno ni wuwaemako, ifwe katio ngaturi na amaani ago amangi okukira? Ni ifwe tukiari okukola na amaani ago yaaya. Aa okukola otio, ifwe tuganyire okumenya mu engira enkalu efwana otio kugere tutaaza tuaigarra amang’ana amalootu aga Kristo.

¹³Inywe ngamumanyire mbwe awantu awakola emirimo mu ekaalu waria okuema ku ewintu ewifumiziiwue mu ekaalu, kandi mbwe awantu awakola emirimo mu isiga eria omusango wona watuukra emigawo giawu okuema ku emisango egifumiziiwua ku isiga eria omusango?

¹⁴Mu engira efwanani, Omwami Yesu yasikirra mbwe awantu awalanzia injiili wasugaane watuukre ewia waria okuema ku emirimo giawu egia okulanzia injiili.

¹⁵Ni inze nkiari okukola namba ne endala ku amaani aga ndi nago gano kandi lwona ng’ambajojera itu rino mbwe katio nyagala mbwe ntuukre ewintu ewio, yaaya. Aeniki nganyire namba olumbe lunyite okukira okuteesia ekintu ekigera ni nyitumbula kino.

¹⁶Kuwuene ndanzia injiili ni mbula ne ekigera ni nkaitumbula, aeniki kunnigirizia mbwe paka ndanzie injiili. Kurimbeera uwiiwi owufwana wutie ni ntalanziizie injiili!

¹⁷Kuweeko mbwe nkola emirimo egia okulanzia injiili gino ku okuwona kwange omwene, ao otio nkaagaale omugawo. Ni ku oluwaala lwange, ngakuri kutio yaaya. Inze ndaazia injiili ki omukurumu owa Katonda okola mala emirimo egia ateerirwe mu amakono okukola.

¹⁸Omugawo gwange guriki katio? Omugawo gwange guri mbwe ni ndanzia injiili, ndanzie wusa aa ntatuukramo ekintu yaaya, kandi kugera ntakola na amaani aga ndi nago ago ni ndanzia injiili.

¹⁹Kukawa mbwe ndi owuyanga otari omukurumu owa omuntu-umuntu, omwene nyita okuwa omukurumu owa awantu wona, kugere ngalusie awantu awangi kiomo kuesekana waganye ku Kristo.

²⁰Ni ndi agati ya Awayaudi mba ki Omuyaudi kugere mbagalusie waganye ku Kristo. Ku awantu awa ensikirra eya Muusa esiwire, noona mba ki owa ensikirra eya Muusa esiwire (kukawa mbwe inze omwene ensikirra ngensiwre yaaya), kugere mbagalusie waganye ku Kristo.

²¹Ku awantu awawula ne ensikirra eya Muusa, mba ki owula ne ensikirra (ng'ani mbwe omwene ng'andondokana ne ensikirra eya Katonda, ni nkangatiirwe ne ensikirra eya Kristo) kugere ngalusie awantu awawula ne ensikirra waganye ku Kristo.

²²Ni menyere na awantu awari no okuganya okunyowu-nyoowu, omwene mba ki omuntu ori no okuganya okunyowu-nyoowu. Ee, nganyire okuwa ewintu wiona ku awantu woona kugere awandi ku iwo watuukre owuinunuzi mu engira-ungira eesekana.

²³Nkola wino wiona ku amang'ana aga injiili kugere noona ntuukreko omugawo ku ensereki ezia injiili ereeta.

²⁴Mumanyire mbwe mu embiro kukawa mbwe awantu awangi wadiewana, omuntu omulala eng'ene nio otuukra omugawo. Kutio rumuka ki omuntu oagala mbwe atuukre omugawo.

²⁵Awantu awagia okudiewana wasooka wawa no okuigerera okukalu ino, owuire ni wukiari. Wakola watio kugere watuukre ekigudu ekia owuyaayi ekitaaza okuwaa amiire goona. Ni ifwe tukola tutio kugere tuuze tutuukre ekigudu ekia owuyaayi ekiiza okuwaa amiire goona.

²⁶Kutio ni ndumuka, ng'andumuka-urumuka ki otamanyire aa agia, yaaya. Lwona ni nkuba amakondi, ng'ankuba-ukuba ki olwana no omuyaga, yaaya.

²⁷Ni nkuba omuwiri gwange omwene kugere guwurre amang'ana ki omukurumu, kugere kutaaza kwawa mbwe omugawo gumbitra ni miire okulanzinzia awandi injiili.

1 Awakorintho 10

Okusawa katonda ensaasa kulowerwe

¹Waamwifu, nyagala muingirizie ewintu ewiaikorra waaguukwa wiifu mu ekeewa mu amiire aga kale. Woonna waagenda-genda ni Katonda awalaga engira eya wakalonda na akola ni ire kandi woona waawita mu Enyanza Enzakanyu na amagulu.

²Ni kuwitra mu ire ni mu amanzi ago, woona waabatiiswa wawa awalonzi awa Muusa.

³Woonna waaria okuria okulala okwawaemera ku igulu ku Katonda

⁴kandi wanywa amanzi amalala agawaemera ku iwaale erialondanga ku amaani aga Katonda. Iwaale riazane riawanga Kristo.

- ⁵Kukawa kutio, owungi wuawu ngawakasangaazia Katonda, ekintu ekiagera ni wafwa kandi ne emiwiri giawu gitanyika mu ekeewa.
- ⁶Ewintu ewiawiikorra wino wiona wiri ewilago ewitusiagizia kugere tutaaza twata emioyo giifu mu okukola ewintu ewiwiiwi kiomo waakola.
- ⁷Kutio mutaaza mwasawa katonda ensaasa kiomo awandi ku iwo waakola mala kiomo endagano ewoola mbwe, “Waaikala ansi okuria no okunywa. Nikuemao waaema watanika okuzinra katonda ensaasa ziawu ezio.”
- ⁸Natusugaane tukole enkola ezia owusondo kiomo awandi ku iwo waakola, okwagera ni Katonda awaswawuka mala awantu elufu amakumi awiri ni wasatu ku iwo wafwa owuire wulala.
- ⁹Natusugaane tugeezaanie Omwami kiomo awandi ku iwo waakola okwagera waitwa ne enzoka.
- ¹⁰Kandi mutaaza mwawa awantu awang’ong’oona kiomo awandi ku iwo waakola okwagera waitwa ne enyankoi.
- ¹¹Ewintu wino wiona wiaikorra Awaisraeli wano kandi wiajojwa kugere witusiagizie ifwe awamenyere mu amiire agari ampi ne entuuko gano.
- ¹²Kutio ni muingirizia mbwe muri no okuganya okukalangufu, muwe amankaga kugere mutaaza mwagwa.
- ¹³Kuwulao-uwula okugeezaniwua okumiire okuwaazra okugawuuke no okuuzra awantu wandi, yaaya. Katonda arindre endagano yaae aa ngaaza okuganya okugeezaniwua okuuzra kwawakira okuwitamo kuwaazre. Ni, ni mugeezaniwua, aaza okuwa-aa engira eya mukakira nayo.
- ¹⁴Kutio awiiko wange awa ngonziizie, murumuke muwe ale no okusawa katonda ensaasa.
- ¹⁵Ngamba-gamba ni inywe ki awantu awari na amaganga, kutio mukenge ekiina aweene ku amang’ana aga mbalaga gano.
- ¹⁶Ni tunywa mu ekikombe ekia tuikazizizia Katonda mu isawo eria Emeesa eya Omwami, tuzogaana twawa alala ku amasaai aga Kristo. Lwona ni tugenyula omukaati twaria mu isawo riazane, tuzogaana twawa ekintu ekilala mu omuwiri ogwa Kristo.
- ¹⁷Aeniki omukaati guri omulala, ifwe twona kukawa mbwe turi awangi, tuwa omuwiri omulala aeniki twona turia omukaati omulala ogwo.
- ¹⁸Mutooleko Awaisraeli ki omufwano. Awantu awaria ewiokuria ewikoriirwe nawio omusango ku isiga eria omusango, wawa mu owulala ni Katonda enyinga ezia wakola watio.

¹⁹Ni mboola otio, namboola mbwe katio omusango ogukoriirwe katonda ensaasa namba katonda ensaasa, wiri ewintu yaaya.

²⁰Yawa, emisango egio nagikorwa Katonda, ni gikorwa ewikeeno. Ni inze nanyagala mbwe muwe mu owulala ne ewikeeno.

²¹Namuesa okunywera mu ekikombe ekinywerwamo mu isawo eria ewikeeno kandi mwairana mwanywera mu ekikombe ekinywerwamo mu isawo eria Emeesa eya Omwami.

²²Ni mukorre mutio, muuza mwa-aa Omwami Yesu iyari. Ni aeniki ngaturi awakalangufu okumukira, ngatusugaane tukole ekintu ekifwana kitio.

Owuyanga owua Omukristo ari nawuo

²³Ee, muwoola mbwe, “Endagirra ziifu zituganyiire okukola ekintu-ukintu.” Ee, ni ng’ani mbwe ewintu wiona witunzia awantu yaaya. Ni muwoola mbwe, “Endagirra ziifu zituganyiire okukola ekintu-ukintu,” muwe no okumanya mbwe ewintu wiona ngawiomerezia.

²⁴Awulao omuntu osugaane aagale mala ekilootu kiae kieng’ene, na asugaane aagale ekilootu ekia awandi wona.

²⁵Ria enyama-unyama eguziwua mu amaduuka aga okuguzia enyama no otawuuziizie ekintu ekiesa kiaona omwoyo gwao.

²⁶Kola otio aeniki endagano ewoola otino, “Ekialo alala ne ewintu wiona ewirimo, wiri ewia Omwami.”

²⁷No omuntu owa ekialo akuetere okuria omwae, gia-ugia no owuine mbwe wagala okugia kandi orie ekintu-ukintu ekiteerwe emberu waa, no otawuuziizie ekintu ekiesa kiaona omwoyo gwao.

²⁸Ni, no omuntu aizukire yakulaga mbwe, “Okuria okwa oria kuno no okukoriirwenga katonda ensaasa omusango,” otakuria kugere otunzie omuntu okulagre oyo, omwoyo gwae gutaoneka no okuria okwa oria.

²⁹Namboola mbwe ni iwue omwoyo guuza gwaoneka yaaya, ni mboola omuntu okulagre oyo. Oesa waaiwuuzia mbwe: “Owuyanga owua ndi nawuo okuria ekia mbwine wuteerwa oluwuwi na awawoola mbwe nkola uwiiwi kolaki?”

³⁰Kusi, ni ndia okuria okwa nyiraniizie Katonda otioo, omuntu wundi areeta otie okunyingira mbwe nkorre uwiiwi?”

³¹Kutio ni munywa namba ni muria, nakuwa ni mukola ekintu-ukintu, muwone mbwe ewintu ewia mukola wiona wi-aa Katonda owunene.

³²Mutaaza mwagera omuntu yaiguunya, awe Omuyaudi, omuntu otari Omuyaudi namba ekaniisa eya Katonda

³³mala kiomo noona nankola ewinyomerezia inze omwene, ni mala ewiomerezia awantu wooka, kugere ni kuesekana watuukre owuinunuzi.

1 Awakorintho 11

¹Mundonde mala kiomo noona nonda Kristo.

Okusawa mu engira ewurikaane

²Nsangaale ino ni inywe aeniki munyingirizia enyinga ziona kandi ku okuanda okwa muandre nakwo ku engerera eya nyawa-aa.

³Ni kirio ekintu ekia nyagala mbwe mumanye. Nyagala mumanye mbwe Kristo nio omutwe ogwa awasaaza wooka, no omusaaza nio omutwe ogwa omukazi waae, no omutwe ogwa Kristo ni Katonda.

⁴Kutio omusaaza osawa namba ogamba amang'ana aga Katonda na asanikiire omutwe gwae, nalagana owuti ku Kristo, ori omutwe gwae.

⁵Kandi omukazi osawa namba ogamba amang'ana aga Katonda na atasanikiire omutwe gwae, nalagana owuti ku omusaaza waae, kandi afwanana no omukazi owa emvwiri ziae ziwegerwe chwe.

⁶Omukazi na atasanikiire omutwe gwae, kulootu na awegere emvwiri ziae. Ni aeniki ne ensuuko omukazi okuwa ne emvwiri enyipi namba okuwegwa chwe, asugaane asanikire omutwe gwae.

⁷Omusaaza iye nasugaane asanikire omutwe na asawa nakuwa na agamba amang'ana aga Katonda yaaya aeniki ni iye olagana owa Katonda ari no owunene owua ari nawuo.

⁸Aeniki Katonda ngakaluka omusaaza okuema ku omukazi, ni no omukazi nio owaema ku omusaaza,

⁹Iwona omusaaza ngakalukrwa omukazi, ni no omukazi nio owalukrwa omusaaza.

¹⁰Ku amang'ana gano, kandi ku amang'ana aga enyankoi, omukazi asugaane awe ne ekisanikizio ku omutwe ki ekilago mbwe ari ansi eya amaani aga omusaaza waae.

¹¹Ni ku awantu awa Katonda, omukazi ngawa kuwuae yawa, omusaaza yooka nintio.

¹²Ni kutio aeniki mala kiomo omukazi yaema ku omusaaza, nintio lwona omusaaza aiwulwa no omukazi. Ne ewintu wiona wiema ku Katonda.

¹³Mukenge ekiina inywe aweene: Muwona mbwe ne ekintu ekilootu no omukazi asawa Katonda no omutwe gwae gutasanikiirwe?

- ¹⁴Engira eya ewintu wiri ku ekialo yoona elagana geeza mbwe no omusaaza aweere ne emvwiri endiire zimu-aa ensuuko iye omwene,
- ¹⁵no omukazi iye okuwa ne emvwiri endiire kugera na aeewua owuti. Emvwiri endiire ezia yaewua ezio, ziri ezia okumusanikira.
- ¹⁶Ni na ario omuntu otaganya na amang'ana gano, mboola ti ifwe tuwula ne enkola indi namba amakaniisa aga Katonda, goona gawula ne enkola egawuuke ne eno.
- ¹⁷Mu okulagirizia okwa nyagala okuwa-aa kuno, nambatondowola yaaya, aeniki okuikumia kwinyu kuona okukira kiomo kutunzia awantu!
- ¹⁸Owusookere, mpurra mbwe ni muikumiiizie alala ki ekaniisa, muwa no okugawukana agati iinyu aweene, kandi ngia ni nganya mbwe nintio mufwanana.
- ¹⁹Okugawukana okwo paka kuweeo kugere kulagane geeza awantu awa Katonda aganyire nawo agati iinyu.
- ²⁰Mbwe ni muikumia alala, ekia muria ngakiri Isawo eria Omwami yaaya,
- ²¹aeniki enyinga ezia muria, omuntu ki omuntu aazakana okuria okuria kwae aa awulao orinda owundi. Okwo kugera na awandi waemao ne enzala, na awandi ni wadung're.
- ²²Ngamuri ne emigizi giinyu egia musugaane muriemo kandi munywemo? Kusi inywe mutoola ekaniisa eya Katonda wutono kandi musuusia awantu awawula no okuria okwa waria? Mbalageki katio? Muagala mbatondowole ku enkola eyo? Kuwuene nanyesa okukola otio!
- ²³Aeniki engerera eya nyatuukra ku Omwami Yesu, nio eya nyawa-aa: Omwami Yesu, owuire owua yaguziwua, yatoola omukaati
- ²⁴kandi olwa yamala okuikazia Katonda, yagugenyula na awoola otino, "Guno no omuwiri gwange ogeezaniiwue ku inywe. Mukole mutino ni munyingirizia nagwo."
- ²⁵Mu engira yazane eyo, olwa waamala okuria, yatoola ekikombe ekia edivaai na awoola otino, "Ekikombe kino ne ekia endagano empia eya amasaai gange. Mukole mutio, mu enyinga ziona ni muganywa, ni munyingirizia nakwo."
- ²⁶Kutio enyinga ziona ni muria omukaati guno kandi ni munywa okuema mu ekikombe kino, mulanzia okufwa okwa Omwami nawuno airane.
- ²⁷Omuntu-umuntu oriire omukaati guno namba onywere mu ekikombe kino mu engira etawurikaane, iye ekiina kimukirre ku okukorra omuwiri na amasaai aga Omwami uwiiwi.
- ²⁸Kutio omuntu paka aingirizie geeza iye omwene na akiari okuria omukaati ogwo namba na akiari okunywera mu ekikombe ekio.

²⁹Ee, aeniki omuntu oria-uria omukaati ogwo kandi onywa-unywa mu ekikombe ekio na ataere omuwiri ogwa Kristo owuti, iye aireetako ekiina, iye omwene.

³⁰Ekio nikio ekigera na awangi ku inywe wari awadewenyu kandi awatekere, na awandi wamiire no okufwa.

³¹Ni, ni tuikengeere ekiina ifwe aweene, ngatuuza okukengerwa ekiina.

³²No Omwami atukengera ekiina, kandi atuswawuka kugera nyanga olwa owutuuko Katonda atatukengra ekiina alala na awantu awa ekialo.

³³Kutio waamwifu, ni muikumiizie alala okuria Isawo eria Omwami, murinde awiina wiinyu.

³⁴Ni, no omuntu awurra enzala asugaane ariire engo waae, kugere ni muagaanre alala, okuagana kwinyu okwo kutagera mukengerwe ekiina. Amang'ana gandi agasigaale, nyiza okuwagamba-gambrako ni nyizre eyo.

1 Awakorintho 12

Empanwa eya Omwoyo Omweru

¹Waamwifu, nanyagala muwe ni mutamanyire amang'ana aga empanwa ezia Omwoyo Omweru ogwa Katonda aesana, yaaya.

²Mumanyire mbwe ni mwawanga ni mukiari awantu awa ekialo, mwasemereziwua mu engira enyingi nawuno muingira mu okusawa katonda ensaasa eziwula amatwi ne eminwa egia okugamba-gamba.

³Kutio nyingeeno nyagala mumanye mbwe awulao-uwula omuntu ori no Omwoyo Omweru ogwa Katonda oesa okuwoola mbwe, "Yesu afuwue," kandi awulao oesa yawoola mbwe, "Yesu ari Omwami," na awula no Omwoyo Omweru ogwa Katonda.

⁴Zirio empanwa ezigawuke-gawuuke, ni no Omwoyo Omweru ogwa Katonda omulala nio oziesana.

⁵Girio emirimo egigawuke-gawuuke, ni no Omwami omulala nio owa gikorrrwa.

⁶Gario amaani aga okukola emirimo okugawuke-gawuuke, ni ni Katonda omulala nio okola mu owulamu owua awantu waae wona.

⁷Ku omuntu ki omuntu, Omwoyo Omweru ailagana mu engira ezigawukane-gawukaane ezitunzia awandi.

⁸Omuntu omulala aerwe empanwa eya okuwoola amang'ana agari na amaganga, no owundi ni kuema ku Omwoyo Omweru wazane aerwe empanwa eya okuwa no okumanya okwa kungulu.

⁹Owundi ni kuema ku Omwoyo Omweru omulala oyo aerwe empanwa eya okuwa no okuganya, no owundi amaani aga okulamia awalwire.

¹⁰Omwoyo Omweru a-aa omuntu omulala amaani aga okukola amankono, no owundi okuwoola amang'ana aga owugambi, no owundi owuesani owua okugawula agati ya amang'ana agaema ku Omwoyo Omweru na agandi amasaasa agatamuemako. Omulala aerwe okugamba-gamba mu eminwa emigeni egigawuke-gawuuke, na awandi okugalusia ewiwoolwa mu eminwa emigeni egigawuke-gawuuke egio.

¹¹Gino giona ne emirimo egia Omwoyo Omweru omulala kandi agiesana ku omuntu ki omuntu kiomo omwene awuine.

Omuwiri omulala ne ewiimo ewingi

¹²Omuwiri guri ne ewiimo ewingi, kandi kukawa mbwe guri ne ewiimo ewingi otio, gukiari mala omuwiri omulala. Nintio twona tufwanana ifwe awari ku Kristo.

¹³Awandi ku ifwe na Awayaudi na awandi na awantu awatari Awayaudi, awandi wari awakurumu na awandi na awantu awari owuyanga. Ni twona twabatiiswa no Omwoyo Omweru ogwa Katonda omulala okuwa omuwiri omulala kandi twona twaewua Omwoyo Omweru omulala okunywa atuizuzie.

¹⁴Omuwiri ogwa omuntu naguri ekiimo ekilala yaaya, ni guri ne ewiimo ewingi.

¹⁵Katio no okugulu kuwoorre ti, "Aeniki inze ng'andi okukono, kutio ng'andi ekilala ku ewiimo ewia omuwiri," okwo kweng'ene kukagera okugulu kureke okuwa ekilala ku ewiimo ewia omuwiri?

¹⁶Nakuwa no okutwi kuwoorre ti, "Aeniki inze ng'andi eriiso, katio ng'andi ekilala ku ewiimo ewia omuwiri," katio okwo kweng'ene kukagera kureke okuwa ekilala ku ewiimo ewia omuwiri?

¹⁷Kusi kuweeko mbwe omuwiri gwona guri mala eriiso, tukawurra naki? Namba kuweeko mbwe omuwiri gwona guri mala okutwi, tukawunyirizia ewintu naki?

¹⁸Ni Katonda ateereo ekiimo ki ekiimo alala geeza mu engira endootu kiomo yaagalanga mbwe wiwe.

¹⁹Kuweeko mbwe ewiimo wiona ne ekiimo ekilala, katio omuwiri gukaweerei?

²⁰Ni kiomo kuri, ewiimo wiri ewingi ku omuwiri, no omuwiri guri omulala.

²¹Eriiso nariesa okulaga okukono ti, "Inze mbula ni iwue emirimo!" Lwona omutwe ngaguesa okulaga amagulu ti, "Inze mbula ni inywe emirimo!"

²²Aa kukaweere kutio, tutuukra mbwe ewiimo ewiwonekana ewigata ewio niwio ewia omuwiri ngaguesa okukola emirimo ni wiwulao

²³kandi ewiimo ewitoolwa wutono, niwio ewia tu-aa irinda ilootu ino. Ewiimo ewilagana owukuna wuifu tusanikizia geeza

²⁴kandi ewiimo windi ewisigaale ngatusanikizia tutio. Katonda amiire okuta ewiimo wiifu alala mu engira endootu eya namba ewiimo ewiwonekana mbwe wiwula no owunene awiere owunene.

²⁵Yakola otio kugere okugawukana kutaaza kwawaa mu omuwiri, ni mbwe ewiimo wiona wikorre alala ekiimo ekilala ni kutunzia ekindi.

²⁶Kutio ne ekiimo kilala kiwurra uwiiwi, ewiimo wiona wiwurra uwiiwi, kandi ne ekiimo kilala kieewua owuti, ewiimo wiona wieewua owuti kandi omuwiri gwona gwasangaala alala nakio.

²⁷Ni inywe omuwiri ogwa Kristo kandi omuntu ki omuntu ku inywe ari ekiimo ekia omuwiri ogwo.

²⁸Kandi mu ekaniisa, owusookere Katonda ateereo awatumwa, awa okuwiri wari awagambi, awa okusatu wari awagerezi, nikuemao tugia ku awantu awakola amankono, nikwo awari ne empanwa eya okulamia amalwire, awantu awatunzia awandi, awari ne empanwa eya okukangatra awandi, na awagamba-gamba mu eminwa emigeni egigawuke-gawuuke.

²⁹Woono wari awatumwa? Kusi awagambi? Kusi awagerezi? Kusi woono wakola amankono?

³⁰Woono wari ne empanwa eya okulamia awalwire? Kusi woono wagamba-gamba mu eminwa emigeni egigawuke-gawuuke? Kusi woono wagalusia eminwa emigeni egigawuke-gawuuke? Yaaya, ng'anintio.

³¹Ni mute emioyo giinyu mu okuagala empanwa enkate-kaate okukira. Nyingeeno nyagala okuwalaga engira endootu okukira ziona.

1 Awakorintho 13

Olugonzi

¹Ni ngamba-gamba mu eminwa emigeni egigawuke-gawuuke, giwe egiwoolwa na awantu namba ne enyankoi, ni mbula no olugonzi, mfwana mala ne endege ekuba erioga.

²Ni kuri mbwe ndi ne empanwa eya owugambi no okumanya ewintu ewia munsu ewiisre ewingi, kandi ni ndi no okuganya okuesa kwagemula ewigiri, ni mbula no olugonzi, ng'andi ekintu yaaya.

³Ni ntoorre ewintu wiange wiona nyesane ku awataka kandi ni mfumiizie omuwiri gwange gusambwe no omurro, ni mbula no olugonzi, okwo ngakuza okuntunzia yawa.

⁴Olugonzi lusikia omwoyo, luri olusiza, luwula ni iyari, ngaluitumbula kandi ngaluyama.

⁵Olugonzi luwula ne enkola ezisuusia awantu, ngaluagala olwae olwene, ngaluyia enda wuangu, lwona ngaluambirra awantu ewintu ewiwiiwi ewia wakorre.

⁶Olugonzi ngalusangaala no owuoni, ni lusangaala no owuene.

⁷Lurinda enyinga ziona, ngalufwa omwoyo enyinga ziona, luri no okirindirra enyinga ziona, kandi lukola olutuunyo enyinga ziona.

⁸Olugonzi luwaa amiire goona agawula ne entuuko. Owugambi ni wuuzakuwua, okugamba-gamba mu eminwa emigeni egigawuke-gawuuke kuuza okuwua kandi okumanya okwa kungulu kwona kuuza okuteeka chwe.

⁹Aeniki okumanya okwa turi nakwo kukeeyire kandi owugambi owua tukola wuona wukeeyire,

¹⁰ni no okusuga okutuukre kuuza okuuzwa, ewikeeyire wiona wiiza okuteeka wiwue chwe.

¹¹Ni nyawanga omwana omuto, nyagamba-gambanga ki omwana omuto, nyaingirizianga ki omwana omuto kandi nyawarranga ewintu ki omwana omuto. No olwa nyakoma mba omuntu omukulu, engira ezia owuana wuto ziona ziambwako ziteeka chwe.

¹²Nyingeeno tuwona, ni mala amarembeezi mala ki owarra mu ekiyoo. Ni mu amiire ago turiwona geeza ki awawonana amiiso na amiiso. Nyingeeno ndi no okumanya okukeeyire, ni mu amiire ago ndiriwa no okumanya okutuukre mala kiomo Katonda ammanyire inze.

¹³Ewintu ewisatu wino, ewiri okuwa no okuganya, okuwa no okurindirra alala no olugonzi ngawiiza okuwua. Ne ekineene okukira agati yawio no olugonzi.

1 Awakorintho 14

Empanwa eya owugambi no okugamba-gamba mu eminwa emigeni egigawuke-gawuuke

¹Kane olugonzi nilwo olwa musugaane muagale ino. Mute emioyo giinyu mu okuagala okuwa ne empanwa ezia Omwoyo Omweru aesana, ino-ino empanwa eya owugambi.

²Ni kutio aeniki awantu awagamba-gamba mu eminwa emigeni egigawuke-gawuuke iwo, ngawagamba-gamba na awantu, ni wagamba-gamba ni Katonda aeniki awulao omuntu owurra ekia wawoola. Kuwuene wanawula amang'ana agaiwisre na amaani aga Omwoyo Omweru.

³Na awantu awawoola amang'ana aga owugambi iwo wagamba-gamba na awantu ni wawalaga amang'ana agawakomia, agawa-ambia amaani kandi agawaoreezia emioyo.

- ⁴Na awantu awagamba-gamba mu eminwa emigeni egigawuke-gawuuke, iwo wawoola amang'ana agawakomia iwo aweene, na awantu awawoola amang'ana aga owugambi, iwo amang'ana gaawu gatunzia ekaniisa okukoma.
- ⁵Inze nkaagaale mbwe mwona mugambe-gambe mu eminwa emigeni egigawuke-gawuuke, ni ino-ino nyagala mbwe muwe ne empanwa eya okuwoola amang'ana aga owugambi. Owoola amang'ana aga owugambi ari omukaate okukira ogamba-gamba mu eminwa emigeni egigawuke-gawuuke. Mala omwene na aesa okugalusizia awandi ewia awoola mu eminwa emigeni egigawuke-gawuuke egio kugere ekaniisa ekome, nikwao.
- ⁶Waamwifu, ni mbaazreko kandi ntanike-utanika okuwagamba-gambra mu eminwa emigeni egigawuke-gawuuke, ao otio mbatunzia naki? Ng'ani mala ni mbareetiire amang'ana aga owusasuko, amang'ana agareeta okumanya, amang'ana aga owugambi namba amang'ana aga owugerezi?
- ⁷Namba ni tutoorre ewintu ewiwula no owulamu kiomo ewituutu nakuwa amakana agakubwa gaarra, omuntu akamanya otie omwoyo ogurra ne emioyo egio gitagawuulwe?
- ⁸Ni lwona, no olwiga lutarre ne endira ewurikanra awantu geeza mbwe no olwiga olueta awantu okugia mu iye, ao otio okaikagra iye naanu?
- ⁹Mu engira efwanani, ooza okuwurra ewia owoola naanu no ogamba-gamba mu eminwa emigeni egigawuke-gawuuke? Ao tio ooza okufwanana no omuntu ogamba-gambra mala omuyaga.
- ¹⁰Eminwa egiwoolwa giri emiera mu ekialo kiona, kandi guwulao namba omulala ogutawurikanra awaguwoola.
- ¹¹Ni, ni kuri mbwe ng'ampurra ewiwoolwa mu omunwa gundi, ao otio ndi omugeni ku awaguwoola kandi woona wari awageni ku inze.
- ¹²Mu engira efwanani, aeniki mwona muagala empanwa ezia Omwoyo Omweru ogwa Katonda, owukirre wiona, mukole wukalu mutuukre empanwa ezitunzia ekaniisa okukoma.
- ¹³Kutio omuntu ogamba-gamba mu eminwa emigeni egigawuke-gawuuke, asugaane asawe Katonda amu-ee amaani aga okugalusia ewia awoola ewio.
- ¹⁴Kuri kutio aeniki ni ngamba-gamba mu eminwa emigeni egigawuke-gawuuke enyinga ezia nsawa, Omwoyo Omweru ogwa Katonda ondimo nio osawa ni inze, kandi inze omwene ng'anyire ewia mboola.
- ¹⁵Katio ekia nsugaane nkole niki? Nyiza okusawa mu eminwa emigeni egigawuke-gawuuke, ni lwona nyiza okusawa mu omunwa ogwa manyire gwona. Nyiza okuembra Katonda mu eminwa egigawuke-gawuuke, ni lwona nyiza okuembra Katonda mu omunwa ogwa manyire gwona.

- ¹⁶Iwue no osawa okusawa okwa okuiranizia Katonda otioo mu omunwa omugeni ogwa awandi watawurra mu ekaniisa, omuntu otawurra ewia owoola ewio akaganya otie mbwe “Amin” ni iye ngamanyire ewia owoola?
- ¹⁷Ooza wawa mbwe oiranizia Katonda otioo geeza ino, ni otawurra oria iye ngaomererwa yaaya.
- ¹⁸Nyiranizia Katonda otioo aeniki inze ngamba-gamba mu eminwa emigeni egigawuke-gawuuke okuwakira mwona.
- ¹⁹Ni kukawa kutio, ni ni ndi mu ekaniisa kumbeera kulootu okuwoola amang’ana ataanu agawurikana geeza kugere ngerere awandi, okukira okuwoola amang’ana elufu ikumi mu eminwa emigeni egigawuke-gawuuke.
- ²⁰Waamwifu, ku amang’ana aga empanwa ezia mu omwoyo, mutawa na amaingirizio aga awaana wato, yaaya. Muwe awamaya ki awaana awakiari ewing’eng’e mu okukola owuoni, ni mu amang’ana gano muwe awantu wakulu mu amaingirizio giinyu.
- ²¹Kwajojwa mu endagano, Katonda na awoola otino: “Nyiza okukola na awantu awawoola eminwa emigeni kandi ni kuwitra ku eminwa egia awatange nyiza okugamba-gamba na awantu wano, ni kukawa kutio ngawarimpurra yaaya,”
- ²²Okugamba-gamba mu eminwa emigeni egigawuke-gawuuke kane ngakuri ekilago ku awantu awari no okuganya, ni ne ekilago mala ku awawula no okuganya weng’ene. Owugambi ni wuri ekilago ku awari no okuganya weng’ene, ni ngawuri ekilago ku awatari no okuganya, yaaya.
- ²³Katio na awantu waikumiizie mu ekaniisa kandi watanike okugamba-gamba mu eminwa emigeni egigawuke-gawuuke, mala awantu awa enze namba awantu awawula no okuganya waingire mu ekaniisa omwo, ngawaesa okuwoola mbwe ilalu riwa-ambre?
- ²⁴Ni, ni wawatuukiire mwona ni muwoola amang’ana aga owugambi, amang’ana ago ngagaaza okuwafumuta emioyo nawuno owuoni owua wakola wuwawonekanre? Ee amang’ana ago gaaza okuwateera ekiina mu emioyo giawu.
- ²⁵Ne ewintu ewiiwisre mu omwoyo ogwa omuntu owula no okuganya wimiire okusanukulwa, omuntu oyo aaza okuifunama emberi wa Katonda no omwoyo oguvuniike kandi aaza okusawa Katonda na awoola mbwe “Kuwuene Katonda ari agati iinyu!”
- ²⁶Waamwifu, ekia tusugaane tukole niki katio? Ni muikumiizie alala mu okusawa, omuntu ki omuntu asugaane awe ne ekintu, luwe olwembo, ing’ana eria okugerera, owusasuko, okugamba-gamba mu eminwa emigeni egigawuke-gawuuke namba okugalusia amang’ana gano. Ewintu wino wiona wisugaane wikolwe okutunzia ekaniisa okukoma.

- ²⁷Na ario omuntu omulala kugia awantu wawiri, namba wasatu ni wari wangi, awari ne ekia wagala okuwoola mu ekaniisa mu eminwa emigeni egigawuke-gawuuke, wasugaane wakole otio omulala-lala kandi omugalusi ogalusia ewia wawoola paka aweeo.
- ²⁸Ni, na awulao omugalusi, wasugaane wasarigire ni wari mu ekaniisa, ni wagamba-gambe ni iwo aweene kandi ni Katonda.
- ²⁹Awagambi wawiri kugia wasatu niwo awasugaane wafumie amang'ana aga owugambi, nikuemao awiina waawu awasigaale waseese amang'ana ago.
- ³⁰Ni, ni Katonda asasuriire omulala ku iwo oikaale ansi ing'ana, omwina waae ogamba-gambrenga asugaane asarigire amu-ee iwaga.
- ³¹Ee ni kutio aeniki mwona muesa okufumia owugambi kusangu-sangu kugere awantu wona watuukre okuigerera kandi wakalangusiwue.
- ³²Omuntu oyo aesa okusarigira aeniki ori ne empanwa eya owugambi ari na amaani aga okuwona kiomo aesa okukola ne empanwa eya aeerwe eyo
- ³³aeniki Katonda ngagala mbwe tufwe okukola-kola-ukola-kola ewintu yaaya. Ni mbwe ewintu wiona wikolwe no owuolu. Mala kiomo kuikola mu okuikumia okwa awalowole kwona,
- ³⁴awakazi wasugaane wasarigire ni wari mu ekaniisa. Ngawaganyiirwe okugamba-gamba, yaaya. Ni wasugaane wawe ansi ya owukangasi owua ekaniisa mala kiomo ensikirra eya Muusa ewoola.
- ³⁵Ni wagala okumanya ekintu, ni wagie wawuuzia awasaaza waawu ni wamiire okuirana engo, aeniki ne ensuuko omukazi okugamba-gamba mu ekaniisa.
- ³⁶Muagala okundaga mbwe inywe ni inywe amang'ana aga Katonda gaatanikirako? Kusi ni inywe weng'ene awa gamiire okutuukako?
- ³⁷Na ario omuntu oingirizia mbwe ari omugambi owa Katonda namba mbwe ari omuntu okomere mu amang'ana aga Katonda, asugaane aganye mbwe amang'ana aga mbajojeere gano gari ensikirra eziemere ku Omwami.
- ³⁸Ni, na ario omuntu olowa amang'ana gano, alowue iye oona.
- ³⁹Kutio waamwifu, mute emioyo giinyu ku okuagala okuwa awagambi, ni mutalowera awantu okugamba-gamba mu eminwa emigeni egigawuke-gawuuke.
- ⁴⁰Ne ewintu wiona paka wikolwe mu engira endootu kandi elondokaane geeza.

1 Awakorintho 15

Okuziuka okwa Kristo

- ¹Waamwifu, nyingeeno nyagala okuwaizurizia amang'ana amalootu aga Yesu Kristo aga nyawalanzizia, aga mwaingizia kandi aga okuganya kwinyu kuiyegeekeko.
- ²Mununulwa ni muandre ku amang'ana amalootu aga nyawalanzizia, wusa-wusa kane okuganya okwa muri nakwo kuno kuwula ne emirimo.
- ³Nyawalanzizia amang'ana amalootu aga noona nyatuukra. Ekintu ekineene okukira, ni mbwe Kristo yafwira owuoni wuifu mala kiomo gawoolwa mu endagano,
- ⁴mbwe ya-awirwa kandi owuire owua okusatu yaziusiwua mala kiomo endagano ewoola.
- ⁵Mbwe yasooka afumira Petro nikuemao afumira awalonzi waae ikumi ni wawiri.
- ⁶Lunyima yafumira awalonzi waae awakakira mia witaanu aa kalala. Owungi wuawu wakiari awalamu kukawa mbwe awandi wamiire okufwa.
- ⁷Nikuemao yafumira Yakoobo, nikwo yafumira awatumwa waae woona.
- ⁸Owutuukre yamfumira inze noona, ki omwana owusirwe,
- ⁹aeniki inze ni inze omutumwa owa ansi owutuukre ku awatumwa woona kandi ng'ansugre namba okuetwa omutumwa ku okunyaasia okwa nyanyaasia ekaniisa eya Katonda.
- ¹⁰Ni ku owusiza owua Katonda ndi ekia ndi, kandi owusiza owua yankorra owuo ngawukawa owua owusa yaaya, aeniki miire okukola emirimo wukalu okukira awatumwa wandi woona. Ni ng'ani inze omiire okukola, ni no owusiza owua Katonda owumiire okuwa ni inze.
- ¹¹Kuwe mbwe ni iwo nakuwa mbwe ni inze ngakuri ekintu yaaya, ekineene ni mbwe gano nigo amang'ana agatulanzia kandi nigo aga mwaganyako.

Okuziuka okwa awafu

- ¹²Ni kuri mbwe tulanzia mbwe Kristo yafwa kandi aziuka aema ku awafu, katio awandi ku inywe wareeta otie okuwoola mbwe okuziuka okuema ku awafu kuwulao?
- ¹³Okuziuka okuema ku awafu ni kuwulao, kane namba Kristo akiari okuziusiwua.
- ¹⁴Ni, ni kuri mbwe Kristo akiari okuziusiwua, kane amang'ana agatulanzia gawula ne emirimo kandi okuganya okwa mumiire okuwa nakwo kwona kuri okwa owusa.
- ¹⁵Owukirre ago, ao otio ifwe awamiire okuweerao ni tulaga awantu mbwe Katonda yaziusia Kristo ku awafu, tukaweere awawoni awa Katonda awa owuweeyi emberu wa awantu. Ni, ni kuri mbwe awafu ngawaziuka, kane Katonda ngakamuziusia, yaaya.

- ¹⁶Aeniki ni kuri mbwe awafu ngawazuika, kane kugia Kristo yoona ngakaziusiwua.
- ¹⁷Kandi ni Kristo ngakaziusiwua, kane okuganya okwa muri nakwo ku iye kuwula ne emirimo kandi mukiari mu owuoni.
- ¹⁸Ni kuri kutio, awantu awamiire okufwa ni wari ku Kristo watekere ilala kane.
- ¹⁹Ni, ni kuri mbwe tuteere emioyo giifu ku Kristo ku amang'ana aga owulamu owua turi nawuo nyingeeno wuno geng'ene, kane ni ifwe awari uwiiwi okukira awantu woona.
- ²⁰Ni ngakuri kutio yaaya, aeniki ni kuwuene mbwe Katonda yaziusia Kristo amutoola ku awafu, kugere awe ki ensaafu eya oluweri ku awantu awamiire okufwa.
- ²¹Kiomo olumbe lwaza ni kuwitra ku omuntu omulala, nintio lwona okuziuka ku awafu kuuza ni kuwitra ku omuntu omulala.
- ²²Ee, mala kiomo ku Adaamu awantu woona waafwa, nintio lwona ku Kristo awantu woona waewua owulamu.
- ²³No omuntu ki omuntu no owuire wuae, Kristo nio osooka okuziuka ki ensaafu esookere, nikwo awantu waae woona, olwa ariiza.
- ²⁴Nikuemao owutuuko wuriiza olwa Kristo ariona owukangasi wuona, no owukire wuona alala na amaani goona nikwo atoole owuami wuae ate mu amakono aga Katonda Ise.
- ²⁵Aeniki Kristo paka akangate nawuno Katonda akire awazigu waae woona kandi awate ansi awataze na amagulu gaae.
- ²⁶Kandi omuzigu ooza okumalwa owutuukre, no olumbe.
- ²⁷Ne endagano ewoola mbwe, "Amiire okuta ewintu wiona ansi eya amagulu gaae," ngakulagana mbwe Katonda, otere ewintu wiona ansi eya amagulu aga Kristo, mbwe oona ari omulala ku awari ansi eya amagulu aga Kristo, yaaya.
- ²⁸Katonda na amiire okukola otio, Omuzia waae, omwene aaza okuwa ansi yaae, iye owata ewintu wiona ansi eya amagulu gaae. Kuno kuuza okugera Katonda awe na amaani goona ku ewintu wiona.
- ²⁹Kutio ni kuri kiomo awandi ku inywe wawoola mbwe okuziuka okuema ku awafu kuwulao, ekigera na awiinyu awo wabatisirwa awantu awamiire okufwa niki kane?
- ³⁰Ifwe ekigera ni tuganyire owulamu wuifu okuwa ampi ne emidambo enyinga ziona niki katio?

³¹Waamwifu, mpumra ewintu ewiesa okumala owulamu wuange owuire ki owuire. Okuitumbula okwa ndi nakwo ku inywe mu owulala owua turi nawuo ku Kristo Yesu, niwuo owugera ni nganyire kugia olumbe.

³²Ni kuri mbwe nyalwania awantu awalulu ki ensisi mu ekialo ekia Efeeso, ku amang'ana aga owulamu owua ku ekialo geng'ene, ao otio omugawo gwange guwulao chee. Ni kuri mbwe awafu ngawaaza okuziuka, "Kane muturie kandi mutunywe, aeniki enkio tufwa."

³³Omuntu atawasemerezia: "Okugenda-genda na awantu awawiiwi kuona enkola endootu."

³⁴Muirane ku amaingirizio giinyu amalootu, kandi mureke okukola owuoni. Awandi ku inywe ngawamanyire Katonda kandi mboola otio okuwasuusia.

Omuwiri ogwa omuntu oziukre

³⁵Awandi ku inywe waaza wawuuzia mbwe, "Awafu waesa okuziusiwua otie? Kusi ni waziukre, waaza okuwa ne emiwiri egifwana gitie?"

³⁶Okuwuuzia okufwana okwo no okwa owumaya! Kane emwo ne ekomeerwe, ngesooka yafwa nikwo yamera?

³⁷Enyinga ezia okomera, okomera mala emwo ki eya engaano nakuwa eya emere indi, ni gokomera emere efuma enze eria, yaaya.

³⁸Ni Katonda nio ogi-aa omuwiri ogwa iye omwene aagala mbwe emere eyo ewe nagwo. Kandi emwo ki emwo eri no omuwiri gwayo egawuuke ne eindi.

³⁹Awantu, entiang'i, enyonyi ne emvwa ziona zialukwa ne emiwiri egitafwanana, yaaya.

⁴⁰Ewintu ewia ku igulu ne ewia ku ekialo wiri ne emiwiri. Ne ewintu ewiri ku igulu ne ewintu ewiri ku ekialo wiri ne embonekano ezigawukaane.

⁴¹Enyanga eri no owueru owugawukaane no owua omwenzi ne eng'eni-ng'eni, kandi eng'eni-ng'eni ziona zigawukana mu owueru owua zifumia.

⁴²Nintio okuziuka okwa awafu kwona kuuza okuwa. Omuwiri ogukomerwa mu ilowa guwola, ni guziuka omuwiri ogutawola.

⁴³Omuwiri ogwa omufu gukomerwa mu ilowa ne ensuuko, ni guziuka ni guri no owunene. Gukomerwa ni guri omugata, ni guziuka ni guri na amaani.

⁴⁴Gukomerwa mu ilowa ni guri ogwa ekialo, ni guziuka ni guri ogwa ku igulu. Mala kiomo gurio omuwiri ogwa ku ekialo kino, omuwiri ogwa ku igulu gwona paka guweeo.

⁴⁵Kuri mala kiomo endagano ewoola mbwe Adaamu omuntu owa oluweri yawa omuntu ori no owulamu owua ku ekialo, ni Kristo Adaamu otuukre iye yawa omuntu oesana owulamu owua ku igulu.

⁴⁶Ni ng’ani mbwe omuwiri ogwa ku igulu nigwo ogusooka, ni no omuwiri ogwa ekialo nigwo ogusooka nikwo lunyima omuwiri ogwa ku igulu gwalondako.

⁴⁷Omuntu owa oluweri yalukwa ni ilowa eria ekialo, no omuntu owa okuwiri yaema ku igulu.

⁴⁸Omuntu ki omuntu ori ku ekialo ari no omuwiri ogwa ekialo, ki ogwa Adaamu. Na awantu awa Kristo woona waaza okueewua emiwiri egia ku igulu, ki ogwa Kristo.

⁴⁹Kandi mala kiomo turi no omufwano ogwa omuntu owaema ku ekialo, nintio lwona tuuza okuwa no omufwano ogwa Kristo omuntu owaema ku igulu.

⁵⁰Waamwifu, mbalaga mbwe emiwiri giifu egiri enyama na amasaai gino ngagiesa okugia ku igulu ku Katonda, kandi omuwiri oguwola guno lwona ngaguesa gwawa omuwiri ogutawola.

⁵¹⁻⁵²Musarigire mbalageko eking’ana ekiiwisre: Ngatuuza okufwa twona yaaya, ni turigalusiwua kalala ki olumesi namba ki imedia eria eriiso, olwa olwiga lurirra owuire owua entuuko. Aeniki no olwiga lurirra, awafu wariziusiwua ne emiwiri egitawola kandi ifwe awarituukrwa ni turi awalamu turigalusiwua.

⁵³Ni kutio aeniki omuwiri oguwola guno paka guingizie omuwiri ogutawola, kandi omuwiri ogufwa guno guingizie omuwiri ogutafwa.

⁵⁴Kandi no omuwiri oguwola guno gumiire okuingizia omuwiri ogutawola, kandi omuwiri ogufwa guno guingiizie omuwiri ogutafwa, nikwo amang’ana agari mu endagano garituuka kuwuene mbwe, “Olumbe lumiire okuonwa, owukire turi nawuo.”

⁵⁵“Oo olumbe, owukire wuao wuriai? Oo olumbe, owululu owua oreeta wuriai?”

⁵⁶Owuoni niwuo owugera no olumbe luwa no owululu, kandi owuoni wutuukra amaani okuema ku ensikirra ezia Muusa.

⁵⁷Ni tuiranzia Katonda otioo aeniki ni iye otu-aa owukire ni kuwitra ku Yesu Kristo Omwami iifu.

⁵⁸Kutio waamwifu awa ngonziizie, muimerre wukalu kandi mutaiyunzia. Muifumie okukola emirimo egia Omwami Yesu enyinga ziona aeniki mumanyire mbwe emirimo egia mukoriire Omwami ngagiri emirimo egia owusa, yaaya.

1 Awakorintho 16

Okufumizia Awakristo awiina wiinyu

¹Ku amang’ana aga okufumizia Awakristo awiina wiinyu, mboola mbwe mukole owufwanani ni kiomo nyalaga Awakristo awari mu amakaniisa agari Ewugalatia mbwe wakole.

²Nyanga olwa omudiira ogwa okuwiri ki omudiira ogwa okuwiri, omuntu ki omuntu ku inywe asugaane atoole amasendi, owuagani ni kiomo okutuukra kwae kuri awiike, kugere mutawa mbwe ni nyiza okuuzza nikwo mutanika okukunza amasendi.

³Kutio ni nyizre, muuza okumpa awantu awa muganyire nawo noona mba-ee amatu aga okuwamanyisia kandi mbatume na amasendi aga mufumiizie goona, wairre Awakristo Yerusaleemu.

⁴Ni, ni muwuine mbwe kulootu noona ni ngiire, ni nyiza okugia nawo.

Omupango ogwa Paulo

⁵Nyiza okuwaazako ni miire okuwitra mu ekitemo ekia Makedoonia, aeniki ndi no omupango ogwa okuwona amakaniisa agari eyo ni ndi ku engira.

⁶Andi nyiza okuuzza akuwa ni inywe eyo ku amiire amaera. Andi nyiza nyatoola entwigo yona ni inywe, kugere muntunzie mu olugendo lwange ansi-uansi aa nyiza okugia.

⁷Nyingeeno nanyagala mbwe nyize mala ki omugeni owita, yaaya. Ni, ni Katonda aganyire, nyagala nyize mbe ni inywe ku amiire agasugre.

⁸Ku enyinga zino, nkiaza okuweera Efeeso eno nawuno omugomo ogwa Pendekosti gutuuke,

⁹aeniki ririo iwaga inene kandi ilungi eria okukorra Omwami Yesu, kandi awantu awangi wankuba iiye.

¹⁰Ni Timotheo aazre eyo, muwone mbwe aweere ni inywe geeza aa ekiesa kiamu-aa owuti kiwulao, aeniki yona akola emirimo egia Omwami Katonda mala kiomo inze.

¹¹Kutio omuntu ataaza yamutoola wutono, yaaya. Na amiire owugeni wuae, mumu-ee owuitunzi mu olugendo lwae kandi mumute ku engira no owuolu anyiraneko. Ndinda okumuwona iye alala ni waamwifu ku Kristo awari eyo.

¹²Ku amang'ana aga wamwifu Apolo, miire okumusawa wukalu ino mbwe aaze awawone na ari alala ni waamwifu ku Kristo wandi, no omwoyo gwae gumiire okuwa omukalu okuuzza nyingeeno. Ni aaza okuuzza na atuukiire iwaga.

Amang'ana agatuukre

¹³Muwe amiiso, muisimbiire wukalu mu okuganya okwa muri nakwo ku Kristo, muwe awantu awasiani kandi muwe awakalangufu.

¹⁴Mulagane olugonzi mu ekintu-ukintu ekia mukola.

¹⁵Mumanyire mbwe Stefaano na awantu awa mu enyumba yaae niwo awaasooka okuganya ku Omwami mu ekialo ekia Akaaya ao, kandi wamiire okuwa ni waifumiizie okutunzia awantu awa Katonda. Kutio waamwifu, mbasawa mbwe

¹⁶mu-ee awantu awafwana awo, alala no omuntu-umuntu okola emirimo egia injiili na amaani alala nawo, owuti wungi ino.

¹⁷Ndi no owusangaavu ino no okuuzza okwa Stefaano ni Fotunatuusi alala na Akaikuusi waazre eno. Wantuusizia ewia miire okuwa ni nkeeyire, ku okuwa kwinyu okwa muri ale ni inze.

¹⁸Waanyomerezia omwoyo ino mala kiomo waawaomerezia inywe. Awantu awafwana awo wasugre no okulaganiwua emberu wa awantu.

¹⁹Awakristo awari mu amakaniisa aga mu ekialo ekia Eesia wawatumiire amakeezio. Akwila ni Preskiila wona wawakeeziizie ino ku eriina eria Omwami, kandi awantu awa ekaniisa eikumia mu enyumba yaawu wona wawakeeziizie.

²⁰Waamwifu ku Kristo awari eno wona wawatumiire amakeezio. Mukeezanie omuntu no omwina waae na amakeezio aga awada awagonzanie.

²¹Inze Paulo, ni inze owatumiire amakeezio gano ni ngajoja no okukono kwange omwene.

²²No omuntu arekere okugonzia Omwami, amafuuwo aga Katonda gamulonde. Maranaatha.

²³Owusiza owua Omwami Yesu wuwe ni inywe.

²⁴Mbangonziizie inywe awantu wona awari ku Kristo Yesu. Amin.

2 Awakorintho

2 Awakorintho 1

Amakeezio agasookere

¹Ni inze Paulo omutumwa owa Yesu Kristo mu okuagala okwa Katonda, ni ndi alala ni wamwifu Timotheo. Mbajojera ebaruwa eno inywe awantu awa ekaniisa eya Katonda eri ku omugizi ogwa Korintho, alala na awantu awa Katonda awari mu ekialo ekia Akaaya kiona.

²Muwe no owusiza no owuolu owuema ku Soifu Katonda alala no Omwami iifu Yesu Kristo.

Paulo aikaziizie Katonda

³Katonda ori Swawu Omwami iifu Yesu Kristo atondowolwe. Ni iye Ise ori na amagongi kandi Katonda owa owuorezi owua omwoyo wuona wuemako.

⁴Atuorezia emioyo mu emidambo giifu giona, kugere twona tuese okuorezia emioyo egia awantu awari mu emidambo egigawukane-gawukaane, ni turi no owuorezi owua omwoyo owua ifwe aweene tutuukiire okuema ku Katonda.

⁵Aeniki kiomo emidambo emingi gituuzra ku okuwa kwifu mu owulala ni Kristo, nintio lwona tuuza okutuukra owuorezi owua omwoyo owungi owukirre ni kuwitra ku Kristo.

⁶Ifwe ni twona eminyako-nyaako, inywe mutuukra owuorezi owua omwoyo alala no owuinunuzi. Ni tuoreziwua omwoyo, kugera mwona ni muwa no owuoreevu owua omwoyo owugera ni musikia emioyo mu emidambo emifwanani ne egia ifwe twona tuwitamo.

⁷Tuteere omwoyo oguisimbiire aeniki tumanyire mbwe kiomo muwa ni ifwe alala mu eminyako-nyaako, nintio lwona muuza okuwa ni ifwe alala mu okutuukra owuoreevu owua omwoyo.

⁸Waamwifu, ngatuagala mbwe muwe ni mutamanyire eminyako-nyaako egia twawa nagio mu ekialo ekia Eesia, yaaya. Ee twawona emidambo eminene egitukirre ale-ale, egiagera ni tutoolao omwoyo mbwe ngatuuzza okuwaa awalamu.

⁹Kuwuene, mu emioyo giifu ifwe aweene twaikengera ekiina mbwe tufwire chee. Na ago gaaikola kugere tutaaza twata emioyo giifu ku ifwe aweene yaaya, ni tute emioyo giifu ku Katonda oziusia awafu.

¹⁰Katonda yatununula mu emidambo emiwiiwi egifwana ne egio kandi akiaza okutununula. Iye nio owa tuteereko emioyo giifu mbwe aaza okugia emberi okutununula,

¹¹mwona ni mututunzia mu okusawa, kugere awantu awangi wairanizie Katonda otioo ku owusiza owungi owua atulagre ku okuirania okusawa okwa awantu awangi.

Ekiagera Paulo na agalusia olugendo lwae

¹²Ekintu ekia tuesa okuitumbula nakio, ni mbwe emioyo giifu giganya ni ifwe mbwe owulamu wuifu ku ekialo kuno, ni ino-ino agati iinyu, wumiire okuwa no owuigolovu no owuene owuema ku Katonda. Tumiire okukola otio ng’ani na amaganga aga ekialo yaaya, ni no owusiza owuema ku Katonda.

¹³Aeniki ngatuwajojera amang’ana aga mutaesa okusoma namba okuwurra yaaya. Ndi no okuganya mbwe

¹⁴kiomo mumiire okutuwurra wutono otio, muuza okumanya geeza ino mbwe muri iwaga okuitumbula ni ifwe mala kiomo twona tuuza okuitumbula ni inywe olwa Owuire owua Omwami Yesu wurituuka.

¹⁵Aeniki nyawanga no owusiani ku okuwurizania okurio agati yange ni inywe, nyawanga no omupango ogwa okuuzza okuwa omugeni iinyu owusookere kandi nyize mbe omugeni iinyu olwa okuwiri.

¹⁶Nyagalanga okuuzza okuwagenia ni mbita ni ngia Makedoonia, kandi ni nyirana ni nyema Makedoonia. Nyagala muuze muntunzie mu olugendo lwange olwa okugia Yudeea.

¹⁷Ng’anyakakola omupango guno ni ntaingiriizie geeza yaaya. Lwona ng’ankola emipango giange kiomo awantu awa ekialo awaganya mbwe “Ee-ee” kandi wuangu wagaluka wawoola mbwe “Yaaya-yaaya” wakola.

¹⁸Ni mala kiomo Katonda arindre amang’ana gaae, amang’ana giifu aga tuwalaga gano ng’ana amang’ana aga okuzogaania eminwa iwiri, okuganya mbwe “Ee” kandi okulowa mbwe “Yaaya.”

¹⁹Aeniki Yesu Kristo Omuzia owa Katonda, owa inze ni Siila ni Timotheo twalanzia agati iinyu ngazogaania eminwa iwiri, mbwe “Ee” kandi “Yaaya,” ni ku iye amang’ana agaifuuwre goona gawa mala “Ee” eng’ene.

²⁰Kuri kutio aeniki ewintu ewia Katonda yaifuuwa okukola wiona, wikawa wimeka, wituuka kuwene ku Kristo kandi wiri “Ee.” Kutio ni kuwitra ku Yesu, tuwoola mbwe “Amin” oku-aa Katonda owunene.

²¹Katonda amiire okutuwaka na amavuta kugere ifwe alala ni inywe tuimerre owuisimbiriire ku Kristo.

²²Atuteereko ekilago ekia okuwa awantu waae kandi atueere Omwoyo gwae Omweru ki empanwa esookere etumanyisia mbwe kuwene Katonda atuwikiire ensereki emberi.

²³Katonda omwene ari omuwoni wange mbwe okuamba okwa nyawa-ambra amagongi nikwo okwagera ni ndeka okuuza Korintho kiomo nyaagalanga.

²⁴Ng'ani mbwe tuwanigirizia okuta okuganya kwinyu ku ewia tuwalaga, yaaya. Ifwe turi awemirimo alala ni inywe kugere muwe no owusangaavu, kandi tumanyire mbwe okuganya okwa muri nakwo nikwo okugera ni muisimbiriire wukalu.

2 Awakorintho 2

¹Kutio nyakenga mu omwoyo gwange mbwe ng'anyiza okuwagenia owugeni owuwareetra owululu kandi kawiri.

²Aeniki ni mbaeere owululu, oozza okumpa owusangaavu ogawuuke ni inywe, ni naanu katio?

³Ekiagera ni mbajojera kiomo nyawajojera otio, ni kugere ni nyiza okuirana okuwawona kandi, ntaaza nyatuukra owululu okuema ku inywe awantu awasugaane wampe owusangaavu. Nyawanga no owusiani ni inywe mwona, mbwe owusangaavu wuange wuri owuinyu.

⁴Nyawajojera ni ndi no omwoyo omuzito oguizuule du no owululu kandi amaziga ni gayooka. Ng'ani mbwe nyagalanga muwe no owululu, yaaya; ni, nyagalanga mbwe mumanye olugonzi olwa munsu olwa mbagonziizie nalwo.

Okurekera omuntu okorre uwiiwi

⁵Na ario omuntu ku inywe oreeta okuiguunya okwa omwoyo, ngakaguunya mala omwoyo gwange gweng'ene, na aguunyre emioyo egia owungi wuinyu. Ee, ni ng'anyagala okuwoola mbwe inywe mwona.

⁶Okuswawuka okwa owungi owua awantu awari mu owulala wuinyu wamiire okumu-aa okwo, kumusugre.

⁷Kutio nyingeeno katio musugaane mumurekere kandi mumuorezie omwoyo kugere owululu owungi owua ari nawuo wutagera omwoyo gwae gufwe.

⁸Kutio mbasawa mbwe muirane mulagane kandi olugonzi olwa muri nalwo nae.

⁹Ekiagera ni mbajojera, no okuwageezaania kugere mbone ni muuza oku-aa amang'ana gange goona owuti.

¹⁰Ni murekiire omuntu owuoni wuae, inze noona murekiire. Kandi ekia ndekere, ni kirio ekintu ekisugaane kirekwe, murekiire emberu wa Kristo kugere okwo kuwatunzie inywe,

¹¹kugere Sataani ataaza yatukira, aeniki tumanyire amaganga-ganga gaae.

Paulo aemere Troowa wuangu-wuangu

¹²Olwa nyagia Troowa okulanzia amang'ana amalootu aga Katonda ku Kristo, nyatuukra no Omwami amiire okunyigurrao iwaga inene.

¹³Ni nyawulanga owuolu mu omwoyo aeniki ng'anyakatuukra wamwifu Tiito eyo, kutio nyakubra awantu ekurinde, mfuma ntaao ni ngia Makedoonia.

Owukire wuema ku Kristo

¹⁴Katonda atondowolwe! Iye nio otukangatra ki omukangasi owa awa-iiye mu owukire enyinga ziona mu owulala wuifu ni Kristo, kandi ni kuwita ku ifwe, alanzia amang'ana agagera na awantu wamanya Kristo asi-uasi kiomo okuwunya okwa amavuta kuilanzia.

¹⁵Ku Katonda turi omusango oguwunya geeza kandi tulanzia Kristo. Tuwunyira awantu awanunulwa na awantu awateeka owugawuuke.

¹⁶Ku awantu awanunulwa, turi no okuwunya okulootu okureeta owulamu, ni ku awantu awateeka turi no okuwunya okuwiiwi okureeta olumbe. Kandi awulao omuntu osugre okakola emirimo egio na amaani gae omwene.

¹⁷Owugawuuke ni kiomo awantu awangi wakola, ifwe ngatukola na amang'ana aga Katonda okutuukra owunyazi yaaya. Ni ki awantu awari mu owulala ni Kristo, ifwe tuwoola amang'ana agari kuwene emberu wa Katonda ki awantu awa Katonda atumre.

2 Awakorintho 3

¹Kusi owuo tutanika okuiyama emberu wiinyu kandi? Nakuwa muagala mbwe ifwe twona tuwe ne ebaruwa, eziifu aweene namba eziema ku inywe, ezia okulagana awa turi kiomo awantu wandi wakola?

²Yaaya, inywe aweene ni inywe ebaruwa ziifu ezijerwe mu emioyo giinyu, emanyiike kandi esomwa na awantu woona.

³Mulagana kuwene mbwe muri ebaruwa eemere ku Kristo omwene, oluuya lwifu ku emirimo giifu emikalu. Ebaruwa eene, ngejojrwe ne einki yaaya, ne ejojerwe no Omwoyo Omweru ogwa Katonda omulamu kandi ejojerwe ku emioyo egia awantu, ni ng'ani ku esleeti ezia amawaale.

⁴Owuo niwuo owusiani owua turi nawuo ku Katonda ni kuwitra ku Kristo.

⁵Ng'ani mbwe tuwoola mbwe amaani aga tukola nago emirimo gino na amaani giifu aweene, ni gatuemera ku Katonda.

⁶Iye nio owagera ni tukalanguka mu okulanzia amang'ana aga endagano empia. Endagano eno ngeisigiike ku endagirra ejojerwe, ne eisigiike ku Omwoyo Omweru ogwa Katonda. Tumanyire otio aeniki endagirra ejojerwe ereeta olumbe, no Omwoyo Omweru ogwa Katonda areeta owulamu.

Owunene owua endagano empia

⁷Emirimo egireeta olumbe egiri mu ensikirra eziajojwa ku iwaale, ziaezaniwua no owunene owuagera ne ekieni ekia Muusa king'ena-ng'ena aa Awaisraeli

ngawakaesanga okumukubako amiiso wamuwarre, kukawa mbwe okung'ena-ng'ena okwo kwairananga enyima.

⁸No owunene owureetwa ne emirimo egia Omwoyo Omweru ogwa Katonda wuri owungi okukira owunene owuasooka owuo.

⁹Ni kuri mbwe emirimo egikengera omuntu ekiina ekia olumbe giri no owunene, kane emirimo egigera no omuntu awa mu empurizanio ni Katonda giri no owunene owungi owuagana wutie?

¹⁰Ni kutio aeniki owunene owua endagano enkulu, nyingeeno wuwula no owunene, ino-ino ni wugeeraniwua no owunene owutambuuke owua endagano empia.

¹¹Kandi ni kuri mbwe endagano enkulu eyawanga no owunene owuairananga enyima yona yaaza no owunene, katio endagano empia eri no owunene owutairana enyima, eri no owunene owungi owuagana wutie?

¹²Kutio okurindirra okwa turi nakwo kuno, kugera ni tuwa no owusiani ino.

¹³Ifwe ngaturi ki Muusa owasanikra ekieni kiae ne enguwo kugere Awaisraeli watawona owueru, ni wumuwuako ku ekieni.

¹⁴Ne emioyo giawu giawa emikalu bere aeniki nawuno nyingeeno ne endagano enkulu esomwa enguwo yazane eyo ekiasanikizia ewieni wiawu. Ni kutio aeniki ni Kristo eng'ene nio oesa okutoolao enguwo egera ni watawona eyo.

¹⁵Namba nyingeeno ne endagirra eya Muusa esomwa enguwo eyo esanikizia emioyo giawu.

¹⁶Ne enyinga ezia omuntu-umuntu agaluuke agie ku Omwami, enguwo esanikizia eyo etoolwao.

¹⁷Omwami ari Omwoyo kandi asi-uasi aa Omwoyo ogwa Omwami ari, awantu wawa owuyanga.

¹⁸Ni ifwe awa enguwo esanikizia ekieni yamala okutoolwao ku ewieni, tulagana owunene owua Omwami. Tugalusiwua mu embonekano yaa tuwe no owunene owuisonga amiire goona, owunene owuema ku Omwami ori Omwoyo.

2 Awakorintho 4

Ewintu ewia iguzi eria kungulu ewiikwa mu entamu eya ilowa

¹Kutio aeniki Katonda amiire okutu-aa emirimo gino ku amasaasra gaa, ifwe ngatufwa omwoyo, yaaya.

²Tulowa enkola ezia ensuuko ezikolwa owuiwisi. Ngatusemerezia awantu lwona ngatuzoga amang'ana aga Katonda na amang'ana aga owuweeyi. Ni, tulagana owuene owuyanga emberu wa Katonda kandi awantu awagonziizie owuene waesa okuwona geeza mbwe ewia tukola wiri kuwene.

- ³Ni namba na amang'ana amalootu aga tulanzia gaiwisiire awantu, gaiwisiire mala awantu awateeka.
- ⁴Katonda eya owuweeyi owa ku ekialo kino aziwiizie amaingirizio aga awantu awawula no okuganya kugere wataaza waawona owueru owua amang'ana amalootu aga Katonda agagamba-gamba ku owunene owua Kristo, ori embonekano eya Katonda.
- ⁵Ngatuilanzia ifwe aweene yaaya, ni tulanzia mbwe Yesu Kristo ari Omwami, ni ifwe turi awakurumu wiinyu ku Yesu owa tukorra.
- ⁶Aeniki Katonda owawoola mbwe, "Owueru ka-wuwale mu ekierema," nio owagera owueru wuae ni wumurika mu emioyo giifu kugere tumanye owunene wuae owuwonekana mu owueni owua Yesu Kristo.
- ⁷Ifwe tufwana ne entamu eziwumbirwe ni ilowa eziwikiirwemo amang'ana aga tulanzia agari ni iguzi eria kungulu. Kuri kutio kugere kumanyike geeza mbwe amaani amangi agaluguulwa gano ngagaema ku ifwe, aweene ni gaema ku Katonda.
- ⁸Tunyigiiwue ne eminyako-nyaako embega ziona, ni ngatuatika. Ekialo kitutang'ang'ia, ni ngatufwa omwoyo.
- ⁹Tudambiziwua, ni Katonda akiari okutureka. Tukubwa ansi ni tuema-uema kandi.
- ¹⁰Tugenda-genda no olumbe mu emiwiri owuire ki owuire ku amang'ana aga Yesu, kugere owulamu owua Yesu wulaganiwue mu emiwiri giifu.
- ¹¹Aeniki, enyinga ziona ifwe awari awalamu, turi ampi no olumbe ku amang'ana aga Yesu, kugere owulamu wuae wuwonekane mu emiwiri giifu egifwa gino.
- ¹²Kutio ifwe turi ampi no olumbe enyinga ziona, ni inywe mutuukra owulamu owutariwua.
- ¹³Kwajojwa otino, "Nyawa no okuganya, kutio miire okuwoola." No omwoyo ogwa okuganya omulala ogwo, twona turi no okuganya kandi kutio tuwoola
- ¹⁴aeniki tumanyire mbwe Katonda owaziusia Omwami Yesu amutoola ku awafu arituziusia twona kiomo yaziusia Yesu, mala atuire ifwe alala ni inywe emberu waae.
- ¹⁵Gano goona gaikola kugere gawatunzie kandi owusiza owua Katonda wutuuke ku awantu awangi ino. Kutio, awantu awangi waaza okuikazia Katonda kuwungi kandi Katonda aaza okutuukra owunene.
- ¹⁶Kutio ifwe ngatufwa omwoyo yaaya. Kukawa mbwe enze emiwiri giifu giwonekana egioneka, ni munsu tugalusiwua okuwa awayia owuire ki owuire.

¹⁷Ni kutio aeniki eminyako-nyaako egia tuwona ku amiire amatono gino, gituiru mu owunene owutariwua owukirre eminyako-nyaako egio ale.

¹⁸Kutio ifwe tuta emioyo giifu ku ewintu ewitawonwa, ni ng'ani ku ewintu ewiwonwa yaaya. Ee, aeniki ewintu ewiwonwa na amiiso wiwua, ne ewitawonwa na amiiso wiwaa amiire goona.

2 Awakorintho 5

Owumenyo owua ku igulu

¹Tumanyire mbwe ne emiwiri giifu egiri ewigiti ewia tumenyere mu ekialo kuno gitemuulwe, Katonda aritu-aa owumenyo ku igulu owua turimenyamo amiire goona, enyumba etaombookwe na amakono aga omuntu.

²Ni nyingeeno tuirizia mu emioyo kandi turi no okuagala okuiwoya no owumenyo owua ku igulu

³aeniki ni tuiwoyre nawuo, ngatuuza okuwa kikuna.

⁴Ee, ni tukiamenyere mu emiwiri gino, tuirizia mu emioyo giifu kandi turi no owuzito ino aeniki ngakuri okuagala kwifu okuwa ni tutaiwoyre yaaya, ni tuagala okuiwoya no owumenyo owua ku igulu kugere emiwiri egifwa gimirwe no owulamu owuyia owuo.

⁵Katonda omwene nio omiire okututeerao okugalusiwua kuno mu omupango gwae kandi amiire okutu-aa Omwoyo gwae Omweru atuweere ki empanwa esookere ki ekilago ekitumanyisia ewia aaza okutukorra emberu.

⁶Kutio turi no owusiani enyinga ziona kandi tumanyire mbwe ni tukiamenyere mu emiwiri gino, tukiari okutuuka engo okuwa no Omwami.

⁷Ni kutio aeniki tumenyere ku okuganya, ni ng'ani ku ewintu ewiwonwa na amiiso yaaya.

⁸Ee, turi no owusiani kandi ku ifwe kuri okulootu okukira ni turekere emiwiri gino, tugie tumenye no Omwami.

⁹Kutio, tukola wukalu okusangaazia Omwami, kuwe mbwe tukiari mu emiwiri gino, nakuwa ni tumiire okugiemamo.

¹⁰Aeniki twona turi-imerra emberu wa Kristo ku entewe yaa eya okukenga ekiina, kugere omuntu ki omuntu atuukre omugawo gwae owuagani ne ewintu ewia yakola na amenyere mu omuwiri, wiwe ewiwiiwi nakuwa ewilootu.

Okuiraniziwua mu empurizanio ni Katonda

¹¹Aeniki tumanyire ekia oku-aa Omwami owuti kuri, tua-ambia awantu woona amaani mbwe wagaluke wamugieko. Katonda amanyire geeza ekia turi kandi ndi no okuganya mbwe mwona mutumanyire geeza mu emioyo giinyu.

¹²Ifwe ngatugeezaania okuwiiyamira kandi yaaya, ni tuwa-aa iwaga eria okuitumbula ku amang’ana giifu kugere muese okuirania awantu awaitumburra ewintu ewiwonwa na amiiso ewitari ewintu ewiri mu omwoyo.

¹³Ni tuwonekana ki awa emitwe emiwiiwi, kuri kutio kugere Katonda atuukre owukaate. Ni, ni tuwonekana ki awa emitwe emilootu, kuri kutio kugere kuwatunzie inywe.

¹⁴Ee, olugonzi olwa Kristo lutunigirizia aeniki turi no owuene mbwe Kristo omuntu omulala yafwira awantu woona, kandi kutio woona waafwa nae.

¹⁵Kandi yafwira awantu woona kugere awantu awalamu wataaza waimenyira iwo aweene, ni wamenyere Kristo owawafwira kandi aziusiwua awa omulamu kandi.

¹⁶Kutio okuemera nyingeeno ngatutoola omuntu-umuntu mu engira eya embonekano eya enze. Kukawa mbwe nintio twatoola Kristo omwene, ngatukola otio kandi yaaya.

¹⁷Kutio, no omuntu ari ku Kristo, awa omuntu omuyia. Owulamu owukulu wuwita kandi owulamu owuyia wutanika.

¹⁸Katonda nio okola gano goona, iye owatuirania mu empurizanio nae ni kuwitra ku Kristo, kandi atu-aa emirimo egia okureeta empurizanio agati yaae na awantu.

¹⁹Tuwoola mbwe Katonda yairanianga awantu awari ku ekialo kiona mu empurizanio nae ni kuwitra ku Kristo, na ata-ambiire awantu owuoni wuawu. Kandi yatu-aa emirimo egia okulanzizia awantu amang’ana aga okureeta empurizanio.

²⁰Kutio ifwe turi awantu awa Kristo atumre ki awaimerezi waae, kandi Katonda omwene nio ogamba-gamba ni kuwitra ku eminwa giifu. Tuisasaama awantu ku eriina eria Kristo mbwe waganye wairane mu empurizanio ni Katonda.

²¹Kristo ngakakola owuoni, ni Katonda yatoola owuoni wuifu ata ku iye kugere ni kuwitra ku iye Katonda atuingizie ki awantu awigolovu.

2 Awakorintho 6

¹Ki awantu awakola emirimo alala ni Katonda, tuwaisasaama mbwe mutaaza mwatoola owusiza owua Katonda ari nawuo ni inywe wutono.

²Aeniki Katonda awoola mu endagano otino, “Na amiire agawurikaane gaatuuka, nyakuwurra, kandi mu owuire owua owuinunuzi, nyakutunzia.” Nkulaga mbwe zino nizio enyinga ezia Katonda eziwurikaane. Ee, wuno niwuo owuire owua owuinunuzi.

Emidambo ogia Paulo yawona mu emirimo giae

- ³Ngatuagala okuteera omuntu-umuntu ekigazio ku engira, kugere emirimo giifu gitagambwa-gambwako uwiiwi.
- ⁴Aa okukola otio, tukola wukalu ino kugere awantu wamanye mbwe turi awakurumu awa Katonda kuwene ku okukola olutuunyo mu emidambo, okuwona eminyako-nyaako kandi okuwita mu amang'ana amakalu.
- ⁵Lwona tumiire okuwa ni tukubwa, ni tuingiziwua mu owusiwe kandi kangi no omurima gukola ni ifwe erioga. Tukola emirimo emikalu, tuwona owuire owulamba endoolo ni zitatugiako mu amiiso kandi tuwa ne enzala.
- ⁶Tumenyere owulamu owueru, tuwurra amang'ana, tusikia omwoyo kandi turi awa-aani. Tukangatiirwe no Omwoyo Omweru ogwa Katonda kandi turi no olugonzi olwa kuwene.
- ⁷Tuwoola amang'ana agari kuwene kandi amaani aga Katonda gaturimo. Tugingre ewia-iye ewia owuigolovu nyakukono okumosi ni nyakukono okusaaza.
- ⁸Awandi watu-aa owunene, na awandi watutoola wutono. Awandi watugamba-gambako geeza, na awandi watugamba-gambako uwiiwi. Turi kuwene, na awandi watutoola ki awasemerezia awantu.
- ⁹Tumanyikaane geeza ni tutoolwa ki awatamanyiike. Tuwonekana awafwa ni tukiari awalamu, kandi tukubwa ni tukiari okufwa yaaya.
- ¹⁰Tuwona uwiiwi ni turi awasangaavu enyinga ziona. Turi awataka ni tugera awantu awangi ni wawa awanyazi. Turi amakono amasa kukawa mbwe ewintu wiona wiri ewiifu.
- ¹¹Tumiire okugamba-gamba ni inywe owuyanga kandi ni tuwaiguriireo emioyo giifu, inywe Awakorintho.
- ¹²Ifwe tuwalaga olugonzi olwa turi nalwo ku inywe, ni inywe mutuima olugonzi lwinyu.
- ¹³Waana wange, kuagalana mbwe mwona mukole owufwanani ku okutuigurrao emioyo giinyu owuyanga.

Paulo agaaniizie okuwa mu owulala na awakiari okuganya

- ¹⁴Mutawa owulala na awantu awawula no okuganya ku Katonda. Kane ekia owuigolovu wuri nawuo owufwanani no owuoni niki? Kusi no owulalaaki owua owueru wuri nawuo ne ekierema?
- ¹⁵Empurizanioki eya Kristo ari nayo ni Sataani? Omuntu ori no okuganya ku Katonda akareeta otie okukola alala no omuntu owula no okuganya ku Katonda?
- ¹⁶Empurizanio agati ya ekaalu eya Katonda ne ekaalu eya katonda ensaasa eriai? Aeniki ifwe ni ifwe ekaalu eya Katonda omulamu. Kuri mala kiomo Katonda omwene yawoola mbwe, "Nyiza okumenya nawo kandi nyiza okugenda-genda

agati yaawu. Lwona nyiza okuwa Katonda waawu kandi woona wawe awantu wange.”

¹⁷Omwami awoola otino, “Kutio muwaememo, kandi mugawukane nawo. Muta-amba ekintu ekitari ekieru kandi nyiza okuwaingizia.”

¹⁸Omwami oesa wiona awoola otino, “Nyiza okuwa Soinyu ni inywe muuza okuwa awazia na awaala wange”

2 Awakorintho 7

¹Awiiko wange awa ngonziizie, aeniki Katonda amiire okutuifuuwira ewintu wino wiona, mutuieruyie ku ewintu wiona ewimwamia omuwiri no omwoyo, kugere tulage Katonda owuti ku okuwa awantu aweeru awatuukre.

Paulo asangaarre na Awakorintho

²Mutuingizie mu emioyo giinyu. Ifwe tukiari okukorra omuntu uwiiwi, tukiari okuona omuntu, lwona tukiari okusemerezia omuntu-umuntu, yaaya.

³Kusi mboola otio okuwakengera ekiina? Yaaya, miire okuwoola kuluweri mbwe muri ni iwaga mu emioyo giifu aa tuganyire okumenya namba okufwa ni inywe.

⁴Ndi no owusiani ino mu omwoyo gwange kandi nyiiyamia kuwungi ni inywe. Nyomereerwe ino kandi mu eminyako-nyaako giifu giona, ndi no owusangaavu owungi owutambuuke omurengo.

⁵Olwa twatuuka Makedoonia, emiwiri giifu gino ngagikawuluuka, yaaya. Eminyako-nyaako giatuemera embega ziona, amae gatuemera enze no owuti wungi wuatuemera muni.

⁶Ni Katonda o-ooreezia awantu awari ne emioyo egiri ampi okufwa, yaoreezia emioyo giifu no okuuzza okwa Tiito.

⁷Kuwuene nga’ni ku okuuzza kwae kweng’ene, ni no okuoreezia okwa mwamuoreezia nakwo omwoyo kwona. Yatulaga kiomo amiiga gawaria ni inze, owululu owungi owua muwurra, ni kiomo mba-ambre wukalu. Kuno kwagera owusangaavu owua nyawanga nawuo wuwa owungi okukira.

⁸Namba ni kuri mbwe itu eria nyawajojera riawa-aa owululu mu emioyo otio, nambona mbwe kwawanga okuwiiwi okurijoja. Kukawa mbwe nyawona uwiiwi, mbona mbwe itu riange riawa-aa owululu, ni mala ku amiire amatono geng’ene.

⁹Nyingeeno katio ndi omusangaavu, ng’ani mbwe mwawurra owululu yaaya, ni aeniki owululu owuo wuawaira mu okugaluka okureka amawi. Mwawurra owululu kiomo Katonda yaagalanga kandi kutio ngatukawanyaala emioyo mu engira-ungira.

¹⁰Owululu owua Katonda aganyire nawuo wureeta okugaluka okureka amawi, okuira awantu mu okutuukra owuinunuzi. Owululu ki owuo wuwulamo okurra lunyima, no owululu owua ekialo wureeta olumbe.

¹¹Muwoneko kiomo owululu owua Katonda aganyire nawuo wureetre omwoyo ogwa okuifumizia Katonda mu owulamu wuinyu, no okuagala ino mbwe muwe awantu awawula owuwi ku eking'ana-uking'ana, okulowa owuoni, okuwa no owuti, okuwa na amiiga ni inze, no okuikaga okuswawuka awooni. Mu engira ziona mumiire okulagana geeza mbwe muri aweeru mu eking'ana kino.

¹²Kutio kukawa mbwe nyawajojera otio, okuagala kwange okuneene ngakukawanga okuingirra omuntu owakola owuwiiwi namba owakorrwa owuwiiwi yaaya, ni kugere aweene mulagane kiomo mututoorre owuzito emberu wa Katonda.

¹³Gano goona gagera ni tuwa awasangaavu. Owugawuuke no owusangaavu wuifu owuo, twasangaala ino okuwona kiomo Tiito yawanga na asangaarre, aeniki yaomererwa ino ni inywe mwona.

¹⁴Nyaitumbula ni inywe emberu waae, kandi ngamukansuusua nae yaaya. Ni mala kiomo amang'ana aga twawalaga gaawanga kuwuene, nintio lwona okuitumbula okwa twaitumbula ni inywe ku Tiito kuwonekaane geeza mbwe kwawanga kuwuene.

¹⁵Kandi olugonzi olwa Tiito ari nalwo ni inywe luri olungi ino, ino-ino na aingiriizie owuti owua muri nawuo kandi kiomo mwamungizia no owuti kandi ni muadada.

¹⁶Ndi no owusangaavu mbwe nyesa okuwa no owusiani owutuukre ni inywe.

2 Awakorintho 8

Awantu wasugaane wawe awa-aani

¹Waamwifu, nyingeeno tuagala mumanyeko kiomo Katonda amiire okulagana owusiza wuae ku awantu awa Katonda awari mu ekialo ekia Makedoonia.

²Kukawa mbwe waawonanga eminyako-nyaako emizito kandi waawanga awataka ino, ngawakareka okuwa awasangaavu yaaya, ni waawa no omwoyo ogwa okufumia no owusiza owungi owuluguulwa.

³Ndi omuwoni mbwe waafumia kuwungi kiomo waaesanga, ni namba owukirre kiomo waesanga, kandi waakola otio mu okuagala kwawu iwo aweene.

⁴Waatuisasaama ni watuiyemba mbwe tuwaganyireko waezanie amasendi gaawu ku awantu awa Katonda awari Yerusaleemu.

⁵Waakola owukirre namba kiomo twaingirizianga. Owusookere waaifumizizia Omwami, nikwo watuifumizizia mala kiomo Katonda yagalanga mbwe wakole.

⁶Kutio aeniki Tiito nio owatanika ni inywe okukola ewintu ewilootu wino, twamusawa mbwe agie emberi okukola ni inywe nawuno mutuusie emirimo egia owusiza egia mwatanika nae egio.

⁷Ni mala kiomo mukola ewintu wiona geeza ino, kiomo okuganya ku Katonda, okugamba-gamba geeza, okuwa no okumanya, okuifumizia Katonda alala no olugonzi olwa muri nalwo ni ifwe, nintio lwona musugaane muwe no owu-aani owungi owuema mu emioyo emisiza.

⁸Ng'ambasikirra mbwe paka mukole otio, yaaya. Ni nyagala mbwe muigerere ku owu-aani owua awandi awo, kugere mumanye ni kuri mbwe olugonzi olwa muri nalwo luri olwa kuwene.

⁹Inywe mumanyire owusiza owua Omwami Yesu Kristo yawanga nawuo. Mumanyire mbwe kukawa mbwe yawanga omunyazi, ni ku amang'ana giinyu yawa omutaka kugere inywe muwe awanyazi ni kuwitra ku owutaka wuae.

¹⁰Ekia mpingirizia ku ing'ana rino ni mbwe kuri kulootu ni mutuusiizie ekia mwatanika okukola omwaka ogwawuere. Ee, aeniki ni inywe awaasooka okufumia ewintu kandi ng'ano okufumia kweng'ene, ni lwona ni inywe awaasooka okuwa no okuagala okwa okukola otio.

¹¹Nyingeeno katio mumale emirimo egia mwatanika egio, kugere okuagala okwa okufumia kwinyu okwo kuambaane no okumala okukola otio, nikulondokana ni kiomo okutuukra kwinyu kufwanana.

¹²Aeniki no omuntu afumia ku okuagala kwae omwene, empanwa eya afumiizie eingiziwua. Ekineene ng'ano owungi owua ekia omuntu afumia, ni no okufumia ekia omuntu ari nakio ku okuagala kwae iye omwene.

¹³Okuagala kwifu ng'ani mbwe awandi wawe no owuwuwu, ni inywe muwe no owuzito yaaya. Ekia tuagala ni mbwe awantu wawe owuagani.

¹⁴Ku enyinga zino ewintu ewia muri nawio ewingi wiiza okuizuzia okukeeya okwa wari nakwo, kugere woona nyanga waizuzie okukeeya okwa muriwa nakwo. Kutio mwona muriwa owuagani

¹⁵mala kiomo kwajojwa mu endagano mbwe, "Owakunza amangi ngakawa na amangi okukira, kandi owakunza amatono ngakawa na amatono agakeeya, yaaya."

Tiito na awiiko waae

¹⁶Nyikazia Katonda owata omusigo ogwa owulamu wuinyu mu omwoyo ogwa Tiito, owufwanani ni kiomo yanteera mu omwoyo.

¹⁷Aeniki olwa twasawa Tiito mbwe aaze awawone, ng'ani mbwe yaganya mala okusawa kwifu kweng'ene, ni yaganya okuza na atereko omwoyo gwae gwona kandi mu okuingirizia kwae iye omwene.

¹⁸Nyingeeno tumutuma na ari alala ni wamwifu omanyikaane geeza ku awantu awa Katonda wona ku emirimo giae emilootu egia okulanzia injili.

¹⁹Owugawuuke na ago, yalwoolwe na amakaniisa mbwe agende-gende ni ifwe ni taira ewintu ewifumiziiwue Katonda Yerusaleemu. Gino ne emirimo egi-aa Omwami iifu owunene kandi egilagana kiomo emioyo giifu giagala okutunzia awiina wiifu.

²⁰Ngatuagala kiweeo ekintu ekiesa okugamba-gambwako uwiiwi ku engira eya turindra nayo amasendi amangi aga awantu wafumia gano.

²¹Aeniki okuagala kwifu okuneene no okukola ewilootu ewisugaane, ng'ane emberu wa Katonda eng'ene, ni namba mu amiiso aga awantu wona.

²²Alala ni wawiri awo, tuwatumra wamwifu wundi omiire okulagana geeza emberu iifu mu engira enyingi mbwe ari omuntu oifumiizie no omwoyo gwae gwona, kandi nyingeeno owusiani owungi owua ari nawuo ni inywe wutulaga otio geeza owukirre.

²³Tiito, iye ndi nae mu owulala kandi ari omukozi omwina wange. Ni waamwifu awandi awo, iwo wari awantu awaimeriire amakaniisa kandi wagera ni Kristo atuukra owunene ino.

²⁴Kutio mukorre awantu wano enkola ezilagana olugonzi olwa muri nalwo, kugere amakaniisa ago gawone kandi gaganye mbwe okuitumbula kwifu ni inywe kuri kuwene.

2 Awakorintho 9

¹Kutio nambona ekigera ni nsugaane mbajojere ku amang'ana aga ewintu ewia muagala okufumizia awantu awa Katonda.

²Aeniki manyire kiomo emioyo giinyu giagala okufumia kandi miire okuwa ni nyitumburra Awakristo awa Makedoonia ni mbalaga mbwe okuemera omwaka ogwawuere, inywe Awakristo awa Akaaya mwamiire okuwa ni muikagre okufumia. Omwoyo ogwa okufumia ogwa muri nagwo guno, gumiire okugera owungi wuawu nyingeeno wona wagala okukola owufwanani.

³Ni ntuma waamwifu awo kugere okuitumbula okwa tumiire okuwa ni tuitumbula ni inywe, ku eking'ana kino, kutaaza kwawa okwa owusa, ni muwe ni muikagre mala kiomo nyawoola mbwe muuza okuwa.

⁴Aeniki, omulala ku Awakristo awa Makedoonia na aizukiire aaze ni inze eyo mala atuukre ni mukiari okufumia amasendi giinyu mute alala, tukawa ne ensuuko ku okuwa kwifu awasiani ino ni inywe, kandi mwona mukawa ne ensuuko.

⁵Kutio, nyawuine mbwe kulootu ni ntumre waamwifu ku okuganya wano okuuza okuwawona emberu kugere mumale emipango giinyu egia okukunza amasendi

giinyu no owusiza, kiomo mwaifuuwa okukola. Ni mukorre mutio, okufumia kwinyu kuuza okuwa okuri ku okugonzia kwinyu, okutari ku okunigiriziwua.

Owu-aani owuema ku omwoyo omusangaavu

⁶Mutalawira amang’ana aga awakulu waawoola mbwe: “No omuntu akomeere kuwungi, nintio agesa kuwungi, kandi no omuntu akomeere wutono nintio agesa wutono.”

⁷Omuntu ki omuntu asugaane afumie ekia awisiizie mu omwoyo gwae omwene mbwe agala okufumia. Ataaza yafumia na airania okukono kwae enyima, lwona ataaza yafumia ku okunigiriziwua aeniki Katonda agonziizie ino omuntu ofumia no omwoyo omusangaavu.

⁸Katonda ari na amaani aga okuwasereka ne ewintu wiona ewia emioyo giinyu giagala. Nikuemao muuza okuwa ne ewingi ewikirre kiomo mukaagale, mugawire awandi awari no okuagala.

⁹Mala kiomo kwajojwa mu endagano otino: “Omuntu omuigolovu afumia ewintu wiae ku awataka; owu-aani no owusiza wuae wuwula ne entuuko.”

¹⁰Katonda o-aa omurimi emwo eya okukomera kandi o-aa awantu okuria, aaza okusonga ewintu wiao kuwungi kugere osonge okuwa omu-aani oesana no owusiza.

¹¹Katonda aaza okugera muwe awanyazi mu engira ziona kugere muwe awa-aani awasiza enyinga ziona kandi awantu waaza okuiranzia Katonda otioo ku owusiza wuinyu.

¹²Nyagala mumanye mbwe emirimo egia mukola gino ngagitunzia mala awantu awa Katonda ku ewintu ewia wakeeyire wieng’ene, ni lwona giiza okugera awantu wairanzie Katonda otioo kuwungi owukirre.

¹³Owu-aani no owusiza wuinyu wulagana geeza mbwe mutiire amang’ana amalootu aga Katonda agari ku Yesu Kristo kandi okwo kuuza okugera awantu watondowole Katonda ni wamu-aa owunene.

¹⁴Nyingeeno waaza okuwasawira ni wateereko omwoyo ino, ku owusiza owungi owukirre owua Katonda amiire okuwa-aa.

¹⁵Katonda aikaziwue ino ku empanwa yaae eluguulwa!

2 Awakorintho 10

Paulo asigika emirimo egia yaeterwa

¹Inze Paulo mbaisasaama ni nyiisiizie ansi kandi no owuoreevu owua Kristo. Ee, inze owa muwoola mbwe ndi omuti mu okugamba-gamba ni ndi ni inywe, ni mbwe ni ndi ale nikwo mba no owusiani owua okugamba-gamba ino!

²Nsawa mbwe ni nyiza okuuzza, kutaaza kwannigirizia okuwa omululu mu okugamba-gamba kiomo mbona mbwe nyiza nyaawa na awandi ku awantu awaingirizia mbwe ifwe tumenyere mu engira efwanani na awa ekialo.

³Ee, kukawa mbwe tumenyere ku ekialo, ngatulwana iiye kiomo awa ekialo walwana, yawa.

⁴Ewintu ewia tulwana nawio iiye ngawiri ewia ku ekialo yaaya. Ni wiri na amaani aga Katonda aga okugemula ewiwanga ewia awazigu ewiewerwe wukalu. Tuona okuikululana mu amang’ana amakalu bere

⁵alala no okuitumbula okulowera awantu okumanya Katonda. Lwona, tuamba amaingirizio aga awantu goona twata mu owusiwe kugere gawe ansi eya Kristo.

⁶Kandi ni mumiire okuwa awantu awari no okuwurra okutuukre, tuuza okuikaga okuswawuka awantu awasigaale wona awatawurra amang’ana aga Kristo.

⁷Inywe mukenga ekiina nikulondokana ne ewintu ewia enze ewiwonwa na amiiso. Ni, na ario omuntu omanyire mu omwoyo gwae mbwe kuwene ari omuntu owa Kristo, asugaane aingirizie kawiri kandi amanye mbwe twona turi awantu awa Kristo mala kiomo ari.

⁸Ee, namba ni ntaniike okuitumbulako wutono ku amaani aga Omwami yatu-aa okuwaomboka, ni ng’ano okuwatagula, ensuuko ngaziiza okumpamba yaaya.

⁹Ng’anyagala kuwonekane mbwe mbatiisia na amatu aga mbajojera, yawa.

¹⁰Mboola otio aeniki awandi ku inywe wawoola watino, “Amatu aga Paulo gagingre amang’ana agari na amaani kandi amazito-zito ino, ni na ario iye omwene, ari omuntu omunyowu-nyoowu, kutio ewia awoola ewio wiri wusa.”

¹¹Awantu ki awo wasugaane wamanye mbwe ekia turi mu amatu giifu, nikio tuuza okuwa mu enkola olwa tuuza okuuzza eyo.

¹²Ifwe tuwula no owusiani owua okuifwanania na awantu awaiyamia iwo aweene awo. Okuiaganania okwa waiaganania iwo aweene kandi okuifwanania okwa waifwanania iwo aweene kulagana mbwe ngawari awaganga yaaya.

¹³Kukawa kutio, ifwe ngatuuza okuitumbula ku ekintu ekiri enze eya emirimo egia tukola. Tuuza mala okuitumbula ku ewintu ewiri munsu mu emirimo egia Katonda atueere, kandi namba inywe muri munsu eya oluwuwi olwo.

¹⁴Kuweeko mbwe ngatukaaza tuwatuukako, ao otio tukatambuuke oluwuwi mu okuitumbula kwifu. Ni tukiari, aeniki ifwe ni ifwe awaasooka okuuzza tutuuka aa muri, ni tusingre amang’ana amalootu agagamba-gamba ku Kristo.

¹⁵Lwona ngatutambuka oluwuwi ku okuitumbula ku emirimo egia awandi niwo awakorre, yaaya. Ni, turi no okuganya mbwe kiomo okuganya kwinyu kuuza okugia emberu okukoma, nintio lwona iwaga eria emirimo giifu agati iinyu riiza okuwa eriiyaagu,

¹⁶kugere tulanzie amang’ana amalootu aga Katonda mu ewitemo ewiri ale okutambuka ewiinyu. Ee, aeniki ifwe ngatuagala okuitumbula ku emirimo egimiire okukulwa mu ekitemo ekia owundi.

¹⁷Ne endagano ewoola mbwe, “No omuntu aagala okuitumbula, ka-aitumbule ku ewintu ewia Omwami akorre.”

¹⁸Aeniki ng’ani mbwe awantu awaiyama aweene niwo awaganyirwe nawo yaaya, ni na awantu awa Omwami omwene nio ogamba-gambako geeza.

2 Awakorintho 11

Paulo na awatumwa awa owuweeyi

¹Mbasawa mbwe muganye mumpe iwaga namba mu owumayaanu owua okugamba-gamba kwange okwo. Ni, kuri kuwene mbwe mumiire okuwa ni muganyire ne enkola yange eyo.

²Iyari erimpamba ni inywe, ni iyari eria Katonda ari nario ni inywe. Ni kutio aeniki nyawaifuuwira omusaaza omulala ori Kristo ooza okuwa-amba amakono ki awaala awari no owugima awakiari okuambwa amakono.

³Ni nyingeeno ndi no owuti mbwe kiomo enzoka yasemerezia Aawa no owuganga-ganga wuayo, mbwe mwona muuza mwasemereziwua mu amaingirizio nawuno mureke engira endamu kandi enzeru eya okukorra Kristo no omwoyo omulala.

⁴Aeniki, inywe no omuntu awaazreko awalanzizie Yesu wundi ogawuuke no owa twawalanzizia, namba ni muingizia omwoyo gundi ogugawuuke no Omwoyo Omweru owa mwatuukra namba amang’ana amalootu gandi agagawuuke na aga mwaganyako, muganya-uganya mu engira enyoowu.

⁵Ni ng’ampingirizia mbwe ndi enyima ino ku awatumwa awaieta awakaate awo.

⁶Andi ng’andi omulootu mu okugamba-gamba kiomo iwo, no okumanya okulootu ni ndi nakwo, kandi kino mumiire okutuwonako mu engira ziona.

⁷Kusi okuiisia ansi okwa nyaiisia ansi kugere mbaginge kungulu ku okuwalanzizia amang’ana amalootu aga Katonda wusa kwawanga okuwiiwi?

⁸Nyafwana ki osakula amakaniisa gandi ku okuwatoolako ewintu ewia waamfumizia kugere nyize eyo okuwatunzia.

⁹Kandi namba ni nyaagalanga ekintu olwa nyawanga ni inywe, ng’ankawanyaasia mbwe muntunzie yaaya, aeniki waamwifu mu okuganya awari Makedoonia niwo awantuzianga ne ewia nyagalanga. Nyakola wukalu okuwona mbwe ng’andi omusigo ku inywe mu engira-ungira kandi nkiaza okuwa-uwa otio.

¹⁰Ku owuene owua Kristo owundimo, mboola mbwe awulao-uwula omuntu, mu ekitemo ekia Akaaya ano, ooza okundowera okuwa no okuitumbula okwa ndi nakwo kuno.

¹¹Kusi nyareka okuwa omusigo ku inywe otio aeniki ng'ambagonziizie? Yaaya, namba Katonda omwene amanyire mbwe mbagonziizie.

¹²Kandi nyiza okugia emberu ni nkola ekia nkola kino kugere awantu awagala iwaga eria okumanywa mbwe waagana ni ifwe ku ewintu ewia waitumbula nawio ewio watatuukra iwaga erio.

¹³Awantu ki awo wari awatumwa awa owuweeyi, awaita mbwe wari awatumwa awa Kristo, ni wari awemirimo awasemerezia awantu.

¹⁴Ne ekio ng'ane ekintu ekigeni, aeniki namba Sataani omwene aita mbwe ari enyankoi ori no owueru.

¹⁵Kutio ng'ane ekintu ekiluguuzia mbwe awemirimo awa Sataani woona waita ki awemirimo awakola ewintu ewiigolovu. Owutuuko wuawu wuriwa owusugre ne enkola ziawu ezio.

Paulo atuukiire eminyako-nyaako ki omutumwa

¹⁶Reka nyiinuule okuwoola mbwe omuntu ataaza yantoola ki omumaya. Ni, ni kuri mbwe nintio muntoola, kane muntoole-utoola kiomo mukatoola omuntu omumaya, kugere noona nyitumbuleko wutono.

¹⁷Mu amang'ana aga okuitumbula gano, ng'angamba-gamba kiomo Omwami omwene akagamba-gambre yaaya, ni mala ki omuntu omumaya.

¹⁸Aeniki awantu awangi waitumbula mu engira eya awa ekialo wakola, inze noona nyiza okuitumbula.

¹⁹Aweene muri awaganga ino, kutio muganya okuwurra amang'ana aga owumaya!

²⁰Kuwuene muganya namba awantu awawata okuwa awakurumu waawu, awawanyunyuta wawareka amasakala, awakola ni inywe uwiiwi, awagala okuwa emberu namba awawasuusia.

²¹Nkuba mpola mbwe ifwe twawanga awagata ino, okuwakorra ewintu ewia awantu wandi awo waawakorra. Ni, ni ngamba-gamba ki omumaya, mboola mbwe ekintu-ukintu ekia omuntu ari omusiani okuitumbula nakio, noona nyesa okuwa omusiani okuitumbula nakio.

²²Ni wawoola mbwe wari Awaibrania, noona ndi Omuibrania. Ni wari Awaisraeli, noona ndi Omuisraeli. Ni wari awiizukulu awa Abraamu, noona ndi omuizukulu owa Abraamu.

²³Ni wari awakozi awa emirimo awa Kristo, inze nkorra Kristo geeza okuwakira. (Ni mboola otio ngamba-gamba ki omulalu.) Miire okukola emirimo wukalu

okuwakira, miire okuwa mu owusiwe kangi okuwakira, miire okuswawukwa enkowa wuwiiwi okuwakira, kandi kangi ino miire okuwona okufwa chee.

²⁴Awayaudi waa-nkuba enkowa amakumi asatu ni kienda, kataanu.

²⁵Entunda isatu nyakubwa ne enkowa, nyakubwa na amawaale kalala, owuato wumiire okunyatikra mu enyanza kasatu kandi miire okuwa mu enyanza owuire no omuwasu ni ndi mala ku igogo.

²⁶Miire okuwa mu engendo ezitawua. Miire okuwona okufwa mu enzuzi, mu amakono aga awasakuzi na awiifu Awayaudi alala na awantu awatari Awayaudi. Miire okuwona okufwa mu emigizi, ne enze eya emigizi, mu enyanza kandi mu amakono aga waamwifu ku Kristo awa owuweeyi.

²⁷Miire okukola emirimo wukalu na amakono no oluuya kandi kangi miire okuwa ni mbona owuire owulamba, endoolo ni zitangiako mu amiiso. Miire okuwa ne enzala no owulwo kandi kangi miire okuwa ni nsiwa okuria aa ntaria. Lwona embeo emiire okundia ni mbula enguwo endootu ezia okuiwoya.

²⁸Owugawuuke ne emidambo eginyizra, owuire ki owuire mba no omusigo ogwa okuwona mbwe amakaniisa goona gagia geeza.

²⁹No omuntu ari omugata, noona mpurra ni ndi omugata, kandi no omuntu agerre omwina waae na agwa mu owuina, enda yange eyia nae ino.

³⁰Ni kunnigirizia mbwe paka nyiitumbule, ni nyiza okuitumbula ne ewintu ewilagana owugata wuange.

³¹Katonda ori Swawu Omwami iifu Yesu, osugre no okutondowolwa amiire goona, amanyire mbwe ng'ambeeya yaaya.

³²Omukangasi owa omugizi ogwa Damaskaasi, ansi eya owuami owua Omwami Aretaasi, yasikirra mbwe omugizi ogwo gurindwe wukalu kugere nyambwe ni mbita.

³³Ni nyateewua mu entayi nikwo nyisiwua ansi mu iwanga eriwanga ku enzizi eya omugizi, mala mizuka mu amakono gaae.

2 Awakorintho 12

Amaani aga Katonda gawonekana geeza mu owugata

¹Paka ngie emberu no okuitumbula kwange. Kukawa mbwe kiwulao ekintu ekia okuitumbula ku-aa omuntu, nyagala katio okugamba-gamba ku owusasuko ne ewintu ewia Omwami yansanukurra.

²⁻³Ario omuntu oganyire ku Kristo owa manyire owatoolwa airwa ku igulu eria okusatu emiaka ikumi ni ine egimiire okuwita. Katonda eng'ene nio omanyire mbwe yagia mu omuwiri nakuwa enze eya omuwiri, inze ng'amanyire yaaya.

⁴Yairwa Paradiiso aa yawurra ewintu ewikaate ewiluguulwa ewitaganyiirwe omuntu okuwoola.

⁵Ekintu ekiaikola kino, omuntu aesa okuitumbula nakio. Ni inze ni kuri okuitumbula, ni nyiza okuitumbula no owugata wuange.

⁶Namba ni mbwine okuitumbula, ng'anyiza okuwa omumaya aeniki ewia mboola wiri kuwuene. Ni ndowa okukola otio kugere awantu wataaza wantoola ki ori kungulu okukira kiomo kusugre ne ewintu ewia nkola ne ewia mboola,

⁷ino-ino ku ewintu ewikaate ewia nyawona mu owusasuko. Kutio kugere ntaaza nyaaza nyagingwa kungulu, omulala ku enyankoi awa Sataani yatumwa mu omuwiri gwange okumfumuta owululu ki iwua.

⁸Nyaisasaama Omwami kasatu mbwe arintoorro.

⁹Ni iye yaanyirania na awoola mbwe, "Yaaya, owusiza wuange wukusugre, aeniki amaani gange gawonekana geeza ino mu owugata." Kutio, nyiza okugia emberu okuitumbula ku owugata wuange ni ndi omusangaavu, kugere amaani aga Kristo gawe mu owulamu wuange.

¹⁰Ekio nikio ekigera ni ntoola okuwa omugata, okunyegwa, okuwita mu amakalu, okuwona emidambo ne eminyako-nyaako, wiona ki ewintu ewilootu ku amang'ana aga Kristo. Aeniki enyinga ezia ndi omugata, nizio ezia ndi omukalangufu.

Awakorintho wa-ambre Paulo omwoyo

¹¹Ni inywe awagera ni ngamba-gamba ki omumaya otino. Inze nsugaane okugingwa kungulu ni inywe, aeniki kukawa mbwe ng'andi ekintu otio, ni kiwulao ekintu ekia awaieta 'awatumwa awanene' awo wakola ekia ntakola yaaya.

¹²Kuwuene nyakola agati iinyu ewintu ewilagana kuwuene mbwe omuntu ari omutumwa, kiomo ewilago, amankono ne ewintu ewiluguulwa, ni nkola olutuunyo olungi.

¹³Kusi ng'anyamiire okuwakorra geeza owuagani na amakaniisa gandi, owugawuuke no okuwa mbwe ng'anyakawa omusigo ku inywe kweng'ene? Mundekere, ni kuri mbwe nyawakorra uwiiwi ku okutawaweera omusigo!

¹⁴Nyingeeno katio nyiikagre okuuza okuwagenia olwa okusatu, kandi mwakuuno lwona ng'anyagala okuuza okuwaweera omusigo, yaaya. Ni kutio aeniki ni inywe nyagala, ni ng'ane ewintu wiinyu yaaya. Kane awiiwuzi ng'aniwo awawiikra awaana waawu omwandu? Awaana iwo ekia wawiikra awiiwuzi waawu niki?

¹⁵Kutio nyiza okuwa omusangaavu okuwafumizia ewintu wiange wiona kandi noona nyiifumie inze omwene ku inywe. Katio kiomo mbagonziizie owutambukaane otio, inze muuza okungonzia wutono?

¹⁶Muesa okuganya ni inze mbwe ngatukawa-aa owuzito namba wutono. Na awandi iwo wakiawoola mbwe nyakola na amaganga-ganga okuwanyaga ewintu!

¹⁷Mundageko, na ario namba omulala ku awantu awa nyatuma ku inywe, owawatoolako ekintu mu engira embiiwi?

¹⁸Nyasawa Tiito awaazeko eyo kandi nyamutuma aaza ni wamwifu wundi. Kusi kirio ekintu ekia Tiito yawatoolako mu engira embiiwi? Yawa, mumanyire geeza mbwe Tiito yakola mala no omwoyo omulala ogwa twona tumiire okuwa ni tukola nagwo kandi yalonda mala engira endala eya twalonda.

¹⁹Kusi muingirizia mbwe wuno tuilagana ki awalootu emberu iinyu? Tumiire okuwa ni tugamba-gamba ki awantu awari ku Kristo emberu wa Katonda, kandi nyagala muwe no okumanya awiiko wange, mbwe ewintu ewia tukola wiona tukola kugere mukalanguke mu okuganya ku Katonda.

²⁰Ntia mbwe ni nyiza okuwaazako, andi ng'anyiza okuwatuukra ni muri kiomo nkaagaale muwe, kandi inywe mwona andi mureke okuntuukra ni ndi kiomo mukaagaale mbe. Owuti wumpamba mbwe andi nyiza okutuukra ensoolo, ni iyari, no okusu, ne engawuzi, no okuwoola awantu uwiiwi, no okufumia owukuna owua awantu, no okuitumbula alala ne erioga, ni wiizuule agati iinyu.

²¹Ndi no owuti mbwe ni nyiza okuuzza eyo, Katonda wange aaza okunyisia ansi emberu iinyu, kandi mbwe omwoyo gwange guuza okuwa omululu na awantu awangi awaakola owuoni ni wakiari okugaluka wareka enkola emwamu, no owusondo alala no okugonzia enkola ezia ensuuko ezia wamiire okukola.

2 Awakorintho 13

Okusiagizia okwa Paulo okutuukre

¹Okuuzza okwa nyiza okuwaazako mwakuuno kuno, kuuza okuwa okwa okusatu. Kuri mala kiomo endagano ewoola mbwe, “Riwulao ing'ana eriiza okuganywa ni ritasigiikwe na awawoni wawiri namba wasatu.”

²Nyamala okuwasiagizia olwa nyaaza eyo mu okuuzza kwange okwa okuwiri, kandi nyingeeno nyiinuula ekia nyawalaga, ni ndi ale ni inywe. Mboola mbwe, ng'anyiza okureka-ureka awantu awaakola owuoni kale namba wuangu ano ni ntawakoriire ekisugaane nawo,

³aeniki muagala ekilago ekilagana mbwe Kristo agamba-gamba ni kuwitra ku inze. Kristo oyo ngari omugata okulagana amaani gaae ku inywe yaaya, na ari na amaani ino ku inywe.

⁴Aeniki ni kuwuene mbwe yawambwa ku omusalaaba mu owugata, ni nyingeeno ari omulamu ku amaani aga Katonda. Mu engira efwanani, ifwe twona turi awagata, ni muuza okuwona ni tumenyere na amaani aga Katonda mala kiomo Kristo.

⁵Muiwarreko geeza, muwone ni kuri mbwe kuwone mukiari mu okuganya. Ee, muigeraanie mumanye. Ngamumanyire mbwe Yesu Kristo awamenyeremo? Ni kutari kutio, musugaane mumanye mbwe ao otio mugwire embuuzio eyo!

⁶Ndi no okuganya mbwe muuza okutuukra mbwe ifwe tukiari okugwa embuuzio eyo yaaya, ni tugiwitre.

⁷Tuwasawira Katonda kugere mutaaza mwakola ekintu ekiwiiwi. Ng'ani mbwe awantu waaze wawone mbwe tuwitre embuuzio, ni kugere mukole ewintu ewisugaane kukawa mbwe awandi watuwona ki awagwire embuuzio.

⁸Aeniki ifwe ngatuesa okukola ekintu-ukintu ekilwania owuene yaaya, ni tukola mala ewintu ewisigika owuene.

⁹Ifwe turi awasangaavu okuwa awagata, inywe ni muri awakalangufu. Kandi okusawa kwifu kuri mbwe mukome muwe awantu awalongoole awawulako embala.

¹⁰Kino niki ekigera ni mbajojera itu rino ni nkiari ale ni inywe, kugere ni nyiza okuza ntaaza nyawa omululu ni inywe ni nkola na amaani aga Omwami ampeere okuwaomboka nago, ni ng'ano okuwatagula.

Amakeezio agatuukre

¹¹Waamwifu owutuukre, muwe no owusangaavu. Muirane mu owulamu owua Katonda aagala. Mukalangusanie omuntu no omwina waae, muwe na amaingirizio amalala kandi mumenye no owuolu omuntu no omwina waae. Kandi Katonda owa olugonzi no owuolu aaza okuwa ni inywe.

¹²Mukeezanie omuntu no omwina waae na amakeezio aga awada awagonzaanie.

¹³Awantu awa Katonda woona wawatumiire amakeezio.

¹⁴Owusiza owua Omwami iifu Yesu Kristo, olugonzi olwa Katonda, no owulala owua turi nawuo no Omwoyo Omweru ogwa Katonda, wuwe ni inywe mwona.

Awagalatia

Awagalatia 1

Amakeezio agasookere

- ¹Ni inze Paulo, omutumwa otaatumwa no omuntu nakuwa na awantu yaaya, no owatumwa ni Yesu Kristo ni Katonda Soifu owaziusia Yesu okuema ku awafu.
- ²Mbajojera ebaruwa eno inywe awantu awaganyire ku Kristo awari Galatia, ni turi alala ni waamwifu woona awari ni inze eno.
- ³Owusiza no owuolu owuema ku Katonda Soifu no Omwami iifu Yesu Kristo wuwe ni inywe.
- ⁴Yesu ono yaifumia okufwira owuoni wuifu kugere atutoole mu amawi aga ekialo ekiwi kino, mu okuagala okwa Katonda ori Soifu.
- ⁵Katonda atuukre owunene wuona ku amiire goona. Amin.

Ewulao injiili indi egawuuke

- ⁶Ndi no okuluguula ino mbwe mureka Katonda owawaeta ku owusiza owua Kristo wuangu ino, ni muganya ku injiili indi ensaasa.
- ⁷Ng'amboola otio mbwe erio injiili indi, ni mala mbwe wario awandi awawatawania ni wagarikira owuene owuri ku Kristo (wureke okumanyika).
- ⁸No omuntu-umuntu namba ifwe nakuwa enyankoi oemere ku igulu, aizukiire awalanzizie injiili indi egawuuke ne eya ifwe twawalanzizia, Katonda amufuuwe!
- ⁹Kiomo twamiire okuwoola, nintio mboola kandi mbwe omuntu wundi na awalanziizie injiili indi ensaasa egawuuke ne eya mwaganyako, Katonda amufuuwe!
- ¹⁰Owuo nyagala okuwa omulootu emberu wa awantu, nakuwa emberu wa Katonda? Kusi ngeezaania okusangaazia awantu? Kuweeko mbwe nkiageezaania okusangaazia mala awantu, kangato ng'andi omukurumu owa Kristo.

Paulo yaetwa okukorra Katonda

- ¹¹Waamwifu, nyagala mumanye mbwe injiili eya nyawalanzizia, ng'ana amang'ana aga omuntu nio owavumbuka nago, yaaya.
- ¹²Inze injiili eno ng'ankagituukra ku omuntu yaaya, lwona owulao owangerera injiili. Ni nyagituukra ni kuema ku Yesu Kristo mu owusasuko.
- ¹³Inywe mwamiire okuwurra kiomo owulamu wuange wuawanga ni nyawanga mu ediini eya Awayaudi. Mumanyire kiomo nyanyaasianga ekaniisa eya Katonda wululu kandi kiomo nyageezaania okukiona.
- ¹⁴Nyawanga emberu eya amakula gange goona mu amang'ana aga ediini iifu eya Awayaudi kandi nyalwanranga endagirra ezia waasoifu no owuvuya owungi.

- ¹⁵No olwa Katonda, owantengeka ni nkiari mu enda eya ng'inaifu kandi anyeta ku owusiza wuae, yaomereziwua
- ¹⁶okunsaasurra Omuzia waae, kugere ndanzie injiili yaae ku awantu awatari Awayaudi, nganyakawuuzia omuntu ekintu yaaya.
- ¹⁷Lwona nganyakagia Yerusaleemu okuwona awaa-nsookra okuwa awatumwa inze ni nkiari, ni ao-ao nyafuma ngia mu ekialo ekia Araabu nikwo nyairana Damaskaasi kandi lunyima.
- ¹⁸Kandi emiaka isatu ni giamala okuwita, nyagia paka Yerusaleemu okumanyana geeza ni Petro kandi nyawa nae ku amiire ikumi ni itaanu.
- ¹⁹Ni ng'anyakawonana na awatumwa wandi yaaya, ni mala Yakoobo wamwawu Omwami Yesu.
- ²⁰(Mbalaga emberu wa Katonda mbwe amang'ana aga mbajojera, ngagari aga owuweeyi yaaya.)
- ²¹Nikuemao lunyima nyagia mu ewitemo ewia Siiria ni Siliisia.
- ²²Awantu awa amakaniisa aga Yudeea awari ku Kristo, waawanga ni watammanyire.
- ²³Waawurra-uwurra mbwe: "Omuntu owatunyaasianga oria, nyingeeno alanzia okuganya okwa yageezaanianga okuona."
- ²⁴Kandi waatondowola Katonda ku ekiaikola mu owulamu wuange.

Awagalatia 2

Awatumwa wandi waingiizie engerera eya Paulo

- ¹Lunyima ni gigia emiaka ikumi ni ine, nyairana Yerusaleemu ni ndi ni Baranabaasi alala ni Tiito oona.
- ²Owusasuko owua nyawona wuangeraga ngia, kandi olwa nyatuuka nyata injiili, eya ndanzia agati ya awantu awatari Awayaudi, emberu wa awantu awaawonekananga ki awakangasi awa ekaniisa agati yaawu. Nyakola otio ni turi aweene, ni nyagala mbwe amang'ana gange ga-ambaane na agaawu. Aeniki nyawanga no owuti mbwe wagaloweko, emirimo giange gikaweere egia owusa.
- ³Kandi Tiito owa nyawanga nae, owawanga na atairrwe enyangu aeniki ngakawanga Omuyaudi, ngakanigiriziwua okuirwa enyangu, kiomo Awayaudi wandi wagalanga.
- ⁴Ekiatuirira eyo na amang'ana aga awantu awatari waamwifu awa kuwene awatuingiramo owuiwisi. Iwo emirimo giawu emineene giawanga mala okuagala ewintu ewia wakatuingirra nawio mbwe tuona ensikirra, kugere watunyage owuyanga owua turi nawuo ku Kristo Yesu, watuingizie mu owusiwe owua okulonda ensikirra.

⁵Ni ngatukawa-aa iwaga namba itoono, kugere owuene owua injiili wuwasigalemo.

⁶Awantu awatoorrwe ki awanene, inze ekia wari ngakumpambre namba wutoono. Iwo kiwulao ekia waasonga ku amang'ana gange. Ku Katonda embonekano eya omuntu eya enze ng'ane ekintu, yaaya.

⁷Ni aa wakakorre watio, aweene waagia wamanya mbwe Katonda yampa emirimo egia okulanzizia awantu awatari Awayaudi injiili, mala kiomo Petro oona yatumwa okulanzizia Awayaudi.

⁸Aeniki Katonda omulala owakolanga ni Petro mu emirimo giae egia owutumwa ku Awayaudi, nio owakolanga ni inze noona mu emirimo giange egia owutumwa ku awantu awatari Awayaudi.

⁹Olwa Yakoobo, Petro ni Yowaana, awa awantu waatoola ki ensimbirro ezia ekaniisa, waawona owusiza owua Katonda yampa, waakola ni inze ni Baranabaasi endagano mbwe wari ni ifwe alala, ku okutu-aa okukono. Woono waaganya mbwe ifwe tugie ku awantu awatari Awayaudi, ni iwo wagie ku Awayaudi.

¹⁰Ekia waatusawa kiawanga mala mbwe tuwe ni tuingirizia awantu awataka, ekintu ekia omwoyo gwange gwawangako ino.

Paulo agania Petro ku okuisemerezia

¹¹Gario amiire aga Petro yawanga na aazre Antioki. Nyamugaania mu amiiso ni mulaga mbwe yakolanga wuwiiwi.

¹²Kuluweri yawanga na aria alala na Awakristo awatari Awayaudi, no olwa Awayaudi wandi awawanga ni waganyire ku Kristo waaza ni waema ku Yakoobo, yatanika okukenga amagulu ku okuizoga na awantu awatari Awayaudi aeniki yatia awantu awa omuganda ogwa Awayaudi.

¹³Awayaudi wandi awasigaale woono waaingira nae mu enkola eya okuisemerezia eno, aa namba Baranabaasi yoono yareka engira endamu.

¹⁴Olwa nyawona mbwe ngawakalondokananga no owuene owua injiili, nyagaania Petro emberu wa awantu woono ntino, "Iwue ori Omuyaudi, no omenyere ki omuntu otari Omuyaudi. Oreeta otie katio, okunigirizia awantu awatari Awayaudi okulonda enkola ezia Awayaudi?"

¹⁵"Ifwe awari Awayaudi ku okuiwulwa, awatari awantu awooni kiomo tueta awantu awatari Awayaudi awatamanyire ensikirra,

¹⁶tumanyire mbwe omuntu ngaingiziwua mu empurizanio ni Katonda ku okulonda ensikirra, ni mala ku okuganya ku Yesu Kristo. Kutio ifwe twona tuteere okuganya kwifu ku Kristo Yesu, kugere tuingiziwue mu empurizanio ni Katonda ku okuganya ku Kristo, ni ng'ani ku okulonda ensikirra yaaya, aeniki

awulao-uwula omuntu ori-ingiziwua mu empurizanio ni Katonda ku okulonda ensikirra.

¹⁷“Ni kuri mbwe enyinga ezia tukalawana okuwa mu empurizanio ni Katonda ku okuganya ku Kristo, awandi wawoola mbwe ifwe aweene turi awooni, okwo kukalagana mbwe Kristo nio ogera ni tukola owuoni. Ni, ngakuri kutio yaaya!

¹⁸Aeniki ni kuri mbwe ntaniike okuomboka kandi ewintu ewia omwene nyatagula, okwo kukalagana geeza mbwe nkola owuoni.

¹⁹Mu amiire aga nyakalawana okulonda ensikirra, nyasiwulwa ku ensikirra mala ki omuntu ofwire, kugere menye owulamu owua Katonda aagala.

²⁰Inze miire okuwambwa ni Kristo ku omusalaaba kandi omwene ng’amenyere owulamu owukulu owua nyawanga nawuo yaaya. Ni, ni Kristo nio ommenyere. Owulamu owua menyere mu omuwiri guno, menyere ku okuganya ku Omuzia owa Katonda, owangonzia mala amfumizia owulamu wuae.

²¹Ng’anyesa okulaga owusiza owua Katonda omugongo yawa, aeniki kuweeko mbwe omuntu aesa okuingiziwua mu empurizanio ni Katonda ku okulonda ensikirra, kane okufwa okwa Kristo yafwa kwawanga okwa wusa chee!”

Awagalatia 3

Tununulwa ku okuganya, ni ng’ani ku okurinda ensikirra

¹Inywe Awagalatia awasiru wano, owalogre naanu? Nyawalaga amang’ana ku okufwa okwa Yesu Kristo ku omusalaaba nawuno gawaingirra geeza ino mala ki awaakuwona na amiiso.

²Mundageko ekintu ekilala kino kugera nkimanye: Inywe mwatuukra Omwoyo Omweru ku okulonda ensikirra, kusi ku okuganya amang’ana aga mwawurra?

³Muri awasiru mutie? Mwatanika olugendo olwa okuganya geeza no Omwoyo Omweru, ni nyingeeno mugeezaania okuwutuusia na amaani giinyu aweene!

⁴Mwamiire okuwona emidambo emingi otio ku amang’ana aga injiili wusaasa, kusi? Yaaya, kuwuene ngamukainyaasia wusa.

⁵Katonda awa-aa Omwoyo Omweru kandi akola amankono agati iinyu ku okulonda okwa mulondre nakwo ensikirra, kusi ku okuganya okwa mwaganya amang’ana aga mwawurra?

⁶Reka tutooleko Abraamu. Endagano ewoola otino, “Abraamu yaganya amang’ana aga Katonda yamulaga, kandi okwo kwagera Katonda amuwala ki omuntu omuigolovu.”

⁷Kutio muwe no okumanya mbwe awantu awari no okuganya ku Katonda niwo awari awaana awa Abraamu.

⁸Endagano yawoola kale mbwe Katonda yaazanga okuingizia awantu woona mu empurizanio nae ku okuganya. Katonda yaifuuwira Abraamu amang'ana amalootu gano olwa yamulaga otino, "Ewialo wiona wiriserekwa ni kukuwitirako."

⁹Kutio awantu awari no okuganya waserekwa alala ni Abraamu, omuntu owa okuganya.

¹⁰Awantu woona awaiteere ku okulonda ensikirra wari awafuuwrwe, aeniki kwajojwa otino, "Awantu awatagia emberu okukola amang'ana goona agajojrwe mu Ebuuki eya Ensikirra, wafuuwirwe."

¹¹Kuri kuwueru mbwe awulao-uwula omuntu oesa okuingiziwua mu empurizanio ni Katonda ku okulonda ensikirra. Ni kutio aeniki endagano ewoola mbwe, "Omuntu omulongoole ariwa omulamu ku okuganya kwae."

¹²Ensikirra ne eisigiike ku okuwa no okuganya, yawa. Owugawuuke na ago, kwajojwa mbwe, "Omuntu okola amang'ana goona aga ensikirra ewoola, iye aaza okulama ku ensikirra ezio."

¹³Kristo yatuoorra omusango atuta owuyanga ku omufuuwo ogwa ensikirra, ku okuganya kwae okufuuwua ku iwaga riifu. Kuri mala kiomo kwajojwa mbwe, "Omuntu-umuntu awambrwe ku omuti, ari omuntu ofuuwirwe."

¹⁴Yatuoorra omusango kugere ni kuwitra ku iye, ensereki eya Katonda ya-aa Abraamu eese okutuuka ku awantu woona ni kuwitra ku Kristo Yesu, kugere ku okuganya tutuukre Omwoyo Omweru owa Katonda yaifuuwa okuesana.

Ensikirra ngekagalusia ekia Katonda yaifuuwa

¹⁵Waamwifu, mureke nkoleko ne ekiikola mu owulamu wuifu owuire ki owuire, ki ekilago. Mala kiomo ngakuesekana omuntu okugalusia namba okulowa endagano emiire okuteewuao, nintio okuifuuwa okwa Katonda kuona kufwanana.

¹⁶Katonda yaifuuwira Abraamu alala no olwiwulo lwae. Endagano ngewoola mbwe "ne enziwulo ziao" okulagana awantu awangi yaaya, ne ewoola mbwe "no olwiwulo lwao," okulagana mbwe yagamba-gambanga ku omuntu omulala, ori Kristo.

¹⁷Ekia mboola ni ntino. Ensikirra eyareetwa emiigo 430 lunyima, neona endagano eyateewuao ni Katonda alala no okwifuuwa okwa omwene yaifuuwa, yaaya.

¹⁸Aeniki ni kuri mbwe tukatuukra ekia Katonda yaifuuwa mala ku okurinda ensikirra, kane ekia Katonda yaifuuwa ngakuituukrana ku okuganya. Ni Katonda, ku owusiza wuae, ya-aa Abraamu ekia yamuifuuwira.

¹⁹Kane katio, ekigera ne ensikirra yareetwa niki? Yareetwa kugere wuwonekanre awantu mbwe ewintu ewia wakola wiri owuoni. Ne ensikirra yawanga ne

emirimo nawuno Olwiwulo olwa Katonda yagamba-gambako mu okuifuuwa kwae oria aaze. Katonda ya-aa enyankoi ensikirra a-ee Muusa, omuntu owaimerra agati ya Katonda na awantu.

²⁰Awantu wawiri ni wakola empurizanio omuntu asugaane aweeo oimerre agati yaawu. Ni Katonda iye yakola omwene olwa yaifuuwira Abraamu.

²¹Kusi tukawoola mbwe ao otio ensikirra elwania okuifuuwa okwa Katonda yaifuuwa kuno? Yaaya, ng'akuri kutio, yawa! Aeniki kuweeko mbwe ensikirra eyaesana yaesanga okureeta owulamu, kane kangato owuigolovu emberu wa Katonda wukaituukraane mala ku okurinda ensikirra.

²²Ne endagano ewoola geeza mbwe awantu wona awari ku ekialo wari mu owusiwe owua owuoni, kugere engira endala esigala eya wakatuukramo ekia Katonda yaifuuwa, eri okuganya ku Yesu Kristo eng'ene.

²³Amang'ana aga okuganya ku Kristo gano ni gaawanga ni gakiari okuuza, twona ensikirra yatuta ifwe Awayaudi mu owusiwe kandi twaigarrwa muni nawuno amang'ana aga okuganya gano gaaza.

²⁴Kutio ensikirra yateewuao okutuweera omurinzi iifu nawuno Kristo aaze, kugere tuingiziwue mu empurizanio ni Katonda ku okuganya.

²⁵Nyingeeno katio, ngaturi ansi eya owukangasi owua ensikirra kandi yaaya, aeniki okuganya kumiire okuuza.

Okuwa omwana owa Katonda

²⁶Mwona muri awaana awa Katonda ni kuwitra ku okuganya okwa muri nakwo ku Yesu Kristo,

²⁷aeniki inywe awaawa mu owulala ni Kristo mu owubatiiso mwona mumiire okuiwoya ni Kristo.

²⁸Okugawukana kuwulao mbwe omuntu ari Omuyaudi nakuwa yaaya, omugule nakuwa ori owuyanga, owekisaaza nakuwa owekikazi, aeniki mwona muri ekintu ekilala ku Kristo.

²⁹Aeniki muri awantu awa Kristo, muri olwiwulo olwa Abraamu, awari iwaga okuuza okuria ewia Katonda yaifuuwira awiizukulu awa Abraamu.

Awagalatia 4

¹Ekia mboola ni mbwe, omwana osugaane arie omwandu ogwa omwiwuzi, na akiari omutono, ngagawukaane no omugule, kukawa mbwe ari omwene omwandu omungi ino.

²Ni kutio aeniki akiari mu amakono aga awamufugre, na awa omwandu guteerwe mu amakono gaawu nawuno enyinga ezia swae yataao zituuke.

³Nintio twawanga ifwe twona Kristo ni yawanga na akiari okuuzza. Kiomo awaana awato, twawanga mu owusiwe owua endagirra ezia ku ekialo kuno.

⁴No olwa enyinga ezisugre ziatuuka, Katonda yatuma Omuzia waae omwene. Yaiwulwa no omukazi, ansi eya ensikirra eya Awayaudi,

⁵okutuoorra omusango kandi okututa owuyanga ifwe awaawanga mu owusiwe owua ensikirra, na atukola awaana waae kuwuene.

⁶Ni, aeniki muri awaana, Katonda amiire okutuma Omwoyo Omweru owa Omuzia waae mu emioyo giinyu. Iye nio orra mu emioyo giifu na awoola mbwe, “Abba, Soifu.”

⁷Kutio, inywe kato ngamuri awagule yaaya, ni muri awaana awa ku omugizi, kandi ku okuwa okwa muri awaana awa ku omugizi, Katonda amiire okuwa-aa iwaga eria okuria omwandu gwae.

Paulo aluguula ekiikola ku Awagalatia

⁸Enyima ao, ni mwawanga ni mukiari okumanya Katonda, mwawanga awagule awa katonda ensaasa eziwulao no okuwulao.

⁹Ni katio nyingeeno mumiire okumanya Katonda, reka mboole mbwe Katonda awamanyire. Mureeta mutie okugaluka ni muirana mu okulonda endagirra ezia ekialo ezia owusaasa eziwula na amaani ezio? Kusi, muagala okuirana mu owusiwe kandi aa kawiri?

¹⁰Inywe muandre ku emigomo egia Awayaudi egikolwa mu amiire gandi, emienzi, ne emiigo egitengeekwe.

¹¹Okwo kugera owuti ni wumpamba mbwe andi emirimo egia nyakola ku inywe giiza giawa egia owusa.

¹²Waamwifu, mbaisasaama mbwe muwe ki inze ori owuyanga ku amang’ana gano, aeniki noona nyamenya kiomo mwawanga ni mumenyere inywe awantu awatari Awayaudi awawula ne ensikirra ezia Awayaudi. Kiwulao ekiwi ekia mwamiire okunkorra inze, yaaya.

¹³Mala kiomo mumanyire, okuwa okwa nyawanga no omuwiri omululu nikwo okwagera ni mbalanzizia injiili oluweri.

¹⁴Kukawa mbwe okuwa okwa nyawanga no omuwiri omululu okwo kwawanyaasia emioyo, ni ngamukandega namba okuntoola wutono ku ing’ana erio, yaaya. Aa okukola otio, mwanyingizia ne enyingizia esugre ne enyankoi owa Katonda, namba Kristo Yesu omwene!

¹⁵Nduguula ekiikorre ne ekisangaalo ekia mwawanga nakio. Manyire kuwuene mbwe kuweeko mbwe ne ekintu ekiesekana, mukakumbuulemo amiiso giinyu mugampe.

¹⁶Kutio, owuo miire okuwa omuzigu iinyu aeniki mbalaga mala ewintu ewiri kuwuene?

¹⁷Awantu awagala mbwe mulonde ensikirra ezia Awayaudi awo watoola enyinga ziwu ku amang'ana giinyu, ni ngawakola otio mbwe wawaagarra owulootu yaaya. Iwo ekineene ekia waagala, no okuwagawula ni ifwe kugere muwe oluwega lwawu kandi mutoole enyinga ziinyu ku amang'ana gaawu.

¹⁸Owuwi wuwulao no omuntu atoola enyinga okukola ekintu, ni kuri mbwe ne ekintu ekilootu kandi musugaane mukole mutio enyinga ziona, ni ng'ani mala ni ndi ni inywe eng'ene.

¹⁹Waana wange, mumpa owululu kandi mala ki omukazi owa ewisa wiluma, nawuno Kristo akome mu owulamu wuinyu.

²⁰Nkaagaale mbwe mbe ni inywe nyingeeno kugere kutaanigirizia okugambagamba ni inywe mu itu rino otino. Ni kunnigirizia okukola otino aeniki muntang'aang'ie ino.

Awaana wawiri awa Abraamu

²¹Mbawuuzia inywe awagala okumenya ansi ya ensikirra, mberi kuwuene mumanyire ekia ensikirra ewoola?

²²Kwajojwa mu endagano mbwe Abraamu yawanga na awazia wawiri. Omulala yawanga owa omukazi omugule, no owundi yawanga owa omukazi owawanga owuyanga.

²³Omuzia owa omukazi omugule oyo yaiwulwa okuema ku okugeezaania okwa omuntu okutuusia okuifuuwa okwa Katonda, no omuzia owa omukazi otari omugule iye yaiwulwa okuema ku okutuusia okwa Katonda yatuusianga okuifuuwa okwae.

²⁴Awakazi wawiri wano mu engira eya olugero, waimeriire endagano iwiri. Agaar aimeriire endagano eyakolwa ku ekigiri ekia Sinaai kandi awaana wae waaiwulwa okuwa awagule.

²⁵Tutuukra mbwe Agaar aimeriire ekigiri ekia Sinaai ekiri Araabu kandi eri omufwano ogwa omugizi ogwa Yerusaleemu ogwa nyingeeno, aeniki omugizi ogwo na awaana wagwo wari awagule.

²⁶Ni Yerusaleemu eri ku igulu eri owuyanga, kandi nio ng'inoifu.

²⁷Aeniki kwajojwa mbwe: "Wa ne ekisangaalo iwue omukazi omugumba, ee iwue otaiwula awaana. Kuba erioga no oemba no omwoyo ogwa kungulu, kukawa mbwe iwue ewisa ngawikakuluma. Aeniki iwue omukazi owawanga na azirrwe, nyingeeno ori na awaana wangi okukira omukazi ori no omusaaza."

²⁸Inywe waamwifu, muri ki Isaaka aeniki mwona mwaiwulwa owuyia nikulondokana no okuifuuwa okwa Katonda.

²⁹Mala kiomo omwana owaiwulwa okuema ku okugeezaania okwa omuntu okutuusia okuifuuwa okwa Katonda oria yadambia omwana owaiwulwa na amaani aga Omwoyo Omweru, nintio kuri reero luno lwona.

³⁰Ne endagano ewoolaki ku ing'ana rino? Ewoola mbwe, "Somosia omukazi omugule alala no omuzia waae, wagie! Aeniki kigwe kiole, ewulao-uwula engira eya omuzia owa omukazi omugule oyo aesa okutuukramo omugawo alala no omuzia owa omukazi ori owuyanga."

³¹Kutio waamwifu, ifwe ngaturi awaana awa omukazi omugule yaaya, ni turi awaana awa omukazi ori owuyanga.

Awagalatia 5

Owuyanga owua turi nawuo ku Kristo

¹Kristo amiire okututa owuyanga kandi turi owuyanga kuwuene. Kutio muimerre wukalu kandi mutaaza mwaganya okuirana mu owusiwe kandi kawiri.

²Muwurre ekia mbalaga! Inze Paulo mbasema mbwe ni muizukre muganye okuirwa enyangu kiomo engira eya okuwa mu empurizanio ni Katonda, Kristo aaza okuwula emirimo ku inywe chee.

³Kandi nyagala omuntu ki omuntu amanye mbwe no omuntu aganyire okuirwa enyangu, kumunigirizia mbwe paka olondokane ne ensikirra ziona, aa atarekere namba endala.

⁴Inywe awantu awageezaania okuwa mu empurizanio ni Katonda ku okulonda ensikirra, mumiire okugawukana ale ni Kristo kandi mulagre owusiza owua Katonda omugongo.

⁵Ni ifwe Omwoyo Omweru atu-aa amaani aga okurinda ni turi no owusiani mbwe Katonda aaza okutungizia ki awalongoole emberu waae ku okuganya.

⁶Aeniki ku Kristo Yesu, okuirwa enyangu namba okutairwa enyangu ng'ane ekintu yaaya. Ekineene no okuwa no okuganya okulaganiwua mu engira eya olugonzi.

⁷Inywe mwamiire okuwa ni mugia emberu geeza. Omiire okuwaguunya emioyo kandi awalowera okulonda owuene, naanu?

⁸Ni kuwuene mbwe ekintu ekifwana kitio ngakiesa kiaema ku Katonda owawaeta, yaaya.

⁹Omumera omutono guzimbua owusie owua guteerwemo wuona.

¹⁰Ndi no owusiani owuema ku Omwami mbwe muuza okuganya ni inze mu amang'ana gano aa mutaingiire mu agandi amasaasa. No omuntu owatawania oyo aaza okuswawukwa, akawa anu.

¹¹Waamwifu, ni kuri mbwe nkialanzia mbwe awantu paka wairwe enyangu, kane katio ekigera Awayaudi ni waanyaasia niki? Ao otio kane owuwiiwi owua Awayaudi wawona na amang'ana aga omusalaaba wuwulao.

¹²Na awantu awawanyaasia awo, iwo nkaagaale mbwe watawa mbwe wairrwe-uirwa enyangu kweng'ene, ni wakasowoolwe no okusowolwa!

¹³Waamwifu, inywe Katonda yawaetera okuwa owuyanga, ni kukawa kutio mutaaza mwakola no owuyanga owua muri nawuo ki engira eya okukola okuagala okuwiiwi okwa omuwiri, yaaya. Aa okukola otio, omuntu ki omuntu akorre omwina waae no olugonzi.

¹⁴Aeniki ensikirra endala ewoola mbwe, "Gonzia omwina waa kiomo oigonziizie iwue omwene" no owuimpi owua ewintu wiona ewia ensikirra ziona ziwoola.

¹⁵Ni inywe ni mulumana kandi ni mutandulana aweene, muwe no okumanya mbwe ni mutawariire geeza, muuza okuitana mumalane chwe.

Owulamu owukangatiirwe no Omwoyo Omweru

¹⁶Mbalaga mbwe mumenye owulamu owukangatiirwe no Omwoyo Omweru, ni ngamuuza okukola ewintu ewiwiiwi ewia omuwiri guagala, yaaya.

¹⁷Aeniki okuagala okuwiiwi okwa omuwiri no okuagala okwa Omwoyo Omweru ngaziwurzania, yaaya. Ewintu wiwiri wino wilwana ewiene, okugera no otakola ewia iwue omwene waagala.

¹⁸Ni, no okangatiirwe no Omwoyo Omweru, ngori ansi eya ensikirra, yaaya.

¹⁹Enkola eziema ku okuagala okuwiiwi okwa omuwiri zimanyiike geeza, ku omufwano owusondo, okuwa na amaingirizio aga enkola ezia ensuuko, okuinyonkoonia;

²⁰okusawa katonda ensaasa alala ni ilogo; ekirega, okulwana, iyari, okuwa no okusu okungi, okuagala mala ekiao omwene, okugawukana mu ewifuwo, engawuzi mu owulala,

²¹alala ne endandulu; okudung'a, emigomo egia amazina amawiiwi, ne ewindi ewifwana ne ewio. Mbasiagizia kiomo nyawasiagizia oluweri mbwe awantu awamenyere owulamu owufwana wutio wawula no omugawo mu Owuami owua Katonda.

²²Ne ensaafu ezia tuamia ni tukangatiirwe no Omwoyo Omweru ziri olugonzi, ekisangaalo, owuolu, okusikia omwoyo, owu-aani, owulootu, okurinda endagano,

²³okugia mpola, alala no okuirinda mu enkola. Ewulao ensikirra egaania ewintu wino.

²⁴Awantu awa Kristo Yesu, iwo wamiire okuwamba okuagala okuwiiwi okwa emiwiri giawu alala no olusa no ogurei-rei gwagwo.

²⁵Aeniki tumenyere ku amaani aga Omwoyo Omweru, tusugaane tulondokane no okuagala kwae mu ewintu wiona ewia tukola.

²⁶Tutaaza twawa awantu awaitumbula, ni tutindrana kandi ni tudiewana aweene uwiiwi.

Awagalatia 6

Awakristo wasugaane watunzie awiina waawu

¹Waamwifu, no omulala ku inywe aituukraane mu owuoni, inywe awakangatiirwe no Omwoyo Omweru musugaane mumuiranie mu okuganya no omwoyo omuolu no okugia mpola. Ni paka oirinde kugere otaaza wagwa mu okugeezaniwua okulala okwo, iwue oona.

²Muitunzanie ni muringa emisigo egia awiina wiinyu, kandi mu engira eyo muuza okutuusia ensikirra eya Kristo.

³No omuntu aingirizia mbwe ari ekintu ni ngari ekintu yaaya, aisemerezia iye omwene.

⁴Omuntu ki omuntu asugaane ageezaanie enkola ziae omwene. Ao nikwo aesa okuitumbula mu omwoyo gwae omwene, na ataigeraanie no omuntu wundi.

⁵Aeniki omuntu ki omuntu asugaane aginge omusigo gwae omwene.

⁶Omuntu ogererwa amang'ana aga Katonda asugaane agawire omugerezi wae ewintu ewilootu ewia ari nawio wiona.

⁷Omuntu ataaza yakusemerezia: Katonda ngaesa okusemerezizwua, yawa! Ekia omuntu akomeere niki ekia arigesha.

⁸Okomera okuomerezia okuagala okuwiiwi okwa omuwiri, iye aaza okugesa olumbe no okuoneka ni kuema ku omuwiri. No omuntu okomera okuomerezia okuagala okulootu okwa Omwoyo Omweru, iye aaza okugesa owulamu owutariwua ni kuema ku Omwoyo Omweru.

⁹Totaluya okukola ewintu ewilootu, aeniki mu enyinga ezisugre tuuza okugesa ensereki, ni tugiire emberu okukola otio aa tutarekere.

¹⁰Kutio enyinga ziona ni iwaga ririo, reka tukorre awantu wona geeza, ni ino-ino awantu awari waamwifu ku okuganya ku Kristo.

Ekineene agati ya okuirwa enyangu no owulamu owuyia

¹¹Muwarreko kiomo mbajojera ne enyukuta enene-nene, ni nkola no okukono kwange omwene!

¹²Awantu awagala okuwonekana awalootu mu engira eya enze niwo awagala okuwanigirizia mbwe paka muirwe enyangu. Wakola watio aeniki wamanyire mbwe ni wagereere awantu mbwe okufwa okwa Yesu ku omusalaaba kweng'ene nikwo okununula, aweene waaza okudambiwua.

13Kuri kuwuene mbwe namba awantu awairrwe enyangu ngawalonda ensikirra, ni wakiagala-uagala mbwe muirwe enyangu kugere waitumbule no okuirwa enyangu okwa emiwiri giinyu.

14Inze, ntaaza nyaitumbula ne ekintu-ukintu ekigawuuke no omusalaaba ogwa Kristo Yesu. Aeniki ni kuwitira ku omusalaaba, ku inze, mbula emirimo ne ewintu ewia ekialo, kandi awantu awa ekialo woona wawula ni inze emirimo.

15Okuirwa enyangu namba okutairwa enyangu ng'ane ekintu yaaya. Ekineene, no okuwa no owulamu owuyia.

16Owuolu na amagongi wiwe na awantu awalondokana ni igerera rino. Wano niwo awari Awaisraeli awa Katonda kuwuene.

17Okuemera nyingeeno okugia emberu, omuntu ataanyaasia, aeniki inze ndi ne embala ezia Yesu ku omuwiri gwange.

18Waamwifu, owusiza owua Omwami iifu Yesu Kristo ka-wuwe ne emioyo giinyu. Amin.

Awaefeeso

Awaefeeso 1

Amakeezio agasookere

¹Ni inze Paulo, omutumwa owa Kristo Yesu ku okuagala okwa Katonda. Ebaruwa eno mbajojera inywe awalowole awa Katonda awari Efeeso, awari no okuganya okuisimbiire ku Kristo Yesu.

²Muwe no owusiza no owuolu owuema ku Soifu Katonda no Omwami Yesu Kristo.

Paulo atondowola Katonda ku omupango ogwa owuinunuzi

³Atondowolwe ino Katonda ori Swawu Omwami iifu Yesu Kristo, omiire okutusereka ne ensereki enyingi ezieama ku igulu, ni kuwitra ku Kristo.

⁴Aeniki yatulowola namba ne ekialo kiawanga ni kikiari okulukwa, kugere tuwe awantu aweeru awawula no owuoni emberi waae ni kuwitra ku Kristo. Mu olugonzi lwae,

⁵Katonda yawanga na amiire okuwisia kale mbwe tuwe awaana waae ni kuwitra ku Yesu Kristo. Kino niki ekiawanga ekilootu ku iye kandi okuagala kwae.

⁶Kutio tutondowola Katonda ku owusiza wuae owuluguulwa owua yatukorra ni kuwitra ku Omuzia waae owa agonziizie ino.

⁷Ni kuwitra ku amasaai aga Kristo, tumiire okuteewua owuyanga kandi turekerwa amawi giifu, nikulondokana no owusiza owungi owua Katonda

⁸amiire okulagana ku ifwe, na amaganga no okumanya kwona.

⁹Kandi Katonda amiire okugera tumanya omupango gwae ogwawanga ni guiwisre, ogwa yaagalanga okutuusia ni kuwitra ku ekia Kristo yaazanga okukola.

¹⁰Ne enyinga ziae ezisugre zimiire okutuuka, Katonda arituusia omupango ogwo olwa arita ewintu wiona ewiri ku igulu ne ewiri ku ekialo ansi eya owukangasi owua Kristo.

¹¹Lwona ni kuwitra ku Kristo, Katonda yatulowola okuwa awantu waae omwene aeniki nintio omwene yawisia okukola kale kandi ewintu wiona wiikola mala kiomo iye omwene yawitaa okuikola.

¹²Okuagala okwa Katonda kwawanga mbwe, ifwe Awayaudi awaasooka okuta emioyo giifu ku Kristo, tutondowole Katonda ori no owunene.

¹³Kandi ku Kristo, inywe mwona olwa mwamala okuwurra amang'ana aga Katonda agari kuwene, eri injili eyawareetra owuinunuzi, kandi okuta okuganya kwinyu ku Kristo, mwateewuako ekilago ekiri Omwoyo Omweru owa yaifuuwa okutuma, okulagana mbwe muri awantu waae omwene.

¹⁴Omwoyo Omweru ogwa Katonda nio empanwa esookere elagana mbwe Katonda aaza okutu-aa ewintu wiona ewia yaifuuwa okutu-aa kandi mbwe arituta okuwa owuyanga owutuukre. Kuno kugera ni tumutondowola ku owunene wuae.

Kristo nio otuusia ewintu wiona

¹⁵Okuemera olwa nyawurra amang'ana aga okuganya kwinyu ku Omwami Yesu no olugonzi olwa mugonziizie nalwo awalowole awa Katonda wona,

¹⁶nkiari okureka okuiranizia Katonda otioo ku amang'ana giinyu ni mbaingirizia mu okusawa kwange.

¹⁷Nsawa mbwe Soifu omunene ori Katonda owa Omwami iifu Yesu Kristo, aganye awa-ee amaganga no okumanya okwa muni okuema ku Omwoyo gwa Omweru, kugere mumanye geeza owuene owumuemako.

¹⁸Lwona nsawa mbwe amiiso aga mu emioyo giinyu egia muni gaiguke gawone, kugere mumanye okurindirra okwa mwaeterwa, owuri owunyazi owua ewintu ewiluguulwa ewia Katonda awiikiire awantu wae.

¹⁹Kandi nsawa mbwe mumanye amaani gae amangi agaluguulwa agakola emirimo ku ifwe awari no okuganya ku Kristo. Amaani gano gafwana na aga

²⁰Katonda yakola nago okuziusia Yesu okuema ku awafu, agia amuta nyakukono kwae okusaaza, asi aerwe owuti mu owuami wuae owuri ku igulu.

²¹Nyingeeno ari kungulu okukira owukangasi, owukire, amaani, no owuami, alala na amiina goona ku ekialo ekia nyingeeno, ne ekialo ekiiza emberi.

²²Kandi Katonda amiire okuta ewintu wiona ansi eya amagulu gae kandi amuezania okuwa omukangasi owa ekaniisa ku ewintu wiona.

²³Ekaniisa eri omuwiri ogwa Kristo kandi nie etuusia owunene owua ari nawuo, no omwene nio otuusia ewintu wiona mu engira ziona.

Awaefeso 2

Twaeewua owulamu ni kuwitra ku Kristo

¹Ni inywe mwawanga awafu ku enkola ziinyu embiwi no owuoni wuinyu,

²owua mwawanga ni mumenyeremo olwa mwalondanga engira ezia ekialo kino ne ezia omukangasi awa owuami owua mu omuyaga, omwoyo ogukola emirimo nyingeeno mu owulamu owua awantu awataere Katonda owuti.

³Amiire gandi, ifwe twona twawanga awalala ku awantu ki awo. Twa-aa okuagala okwa emiwiri giifu owuzito kandi twalondanga okuagala na amaingirizio aga omuwiri. Mala kiomo awandi, owulamu wuifu wuawanga owusugre no okuswawukwa ni Katonda no okusu okungi.

⁴Ni Katonda ori na amagongi amangi, ni kuema ku olugonzi olwa yawanga na atugonziizie nalwo,

⁵yatuirania tuwa awalamu alala ni Kristo, kukawa mbwe twawanga awafu ku enkola ezia owuoni ezia twakolanga. Mwanunulwa mala ku owusiza owua Katonda wueng'ene.

⁶Ng'ano owulamu wueng'ene niwuo owua twatuukra, ni ku Kristo Yesu, Katonda yatuziusia nae kandi atuta tuikala alala nae ku igulu.

⁷Yakola otio kugere aaze alagane owusiza wuae owungi owuluguulwa owulaganiwua mu olugonzi lwae ku ifwe ni kuwitra ku Kristo Yesu, mu amiire goona agawula ne entuuko.

⁸Aeniki ku owusiza owua Katonda mumiire okununulwa ni kuwitra ku okuwa no okuganya, kandi kino ng'ane ekintu ekia omuntu akakola iye omwene, ni ne empanwa eya Katonda.

⁹Ng'ano okuema ku emirimo egia omuntu yaaya, kutio awulao omuntu oesa okuitumbula.

¹⁰Aeniki turi emirimo egia amakono aga Katonda, awaalukwa owuyia mu owulala ni Kristo Yesu okukola emirimo emilootu egia yamala okututeerao kale okukola.

Awantu wona awari ku Kristo wari ekintu ekilala

¹¹Kutio muingirizie mbwe owusookere, inywe awantu awatari Awayaudi mu owuiwulane, kandi awa awantu awaieta mbwe "awairwa enyangu" (okuirwa enyangu okwa ku omuwiri okukolwa na amakono) waeta mbwe "awatairrwe enyangu"

¹²mbwe mu amiire ago, ngamukawanga ni mumanyire owa Kristo ari. Ngamukawanga awantu awalowoolwe ni Katonda. Kutio mwawanga awageni awawula no omugawo ku endagano eya Katonda yaifuwira awantu waae. Mwawulanga ne ekintu ekia mwakarindirra okutuukra ku Katonda kandi mwawulanga Katonda ku ekialo kino chee.

¹³Ni nyingeeno, ni kuwitra ku amasaai aga Kristo, inywe awantu awa amiire gandi waawanga ale, mumiire okureetwa a-ampi ni Katonda.

¹⁴Aeniki Kristo omwene oyo, nio omiire okugera ni tuwa no owuolu. Amiire okureeta Awayaudi na awatari Awayaudi alala kandi iye nio omiire okuona engawuzi ne embuwi eziareetanga owuzigu.

¹⁵Mu okuesana omuwiri gwae, yagera ensikirra ne endagirra ezia Awayaudi ziwula ne emirimo. Yakola otio kugere ate enganda iwiri zino ziwe ekintu ekilala, okwawareetra owuolu

¹⁶kandi mu omuwiri omulala guno, yareeta empurizanio agati ya Katonda ne enganda iwiri zino ni kuwitra ku omusalaaba, amala owuzigu owuawangangao.

¹⁷Yareeta amang'ana amalootu agareeta owuolu ku inywe awaawanga ale-ale ni Katonda, alala na awantu awaawanga a-ampi nae.

¹⁸Aeniki ni kuwitra ku iye, ifwe Awayaudi ni inywe awatari Awayaudi twatuukra engira eya okutuuka ku Katonda Ise ni kuwita ku Omwoyo Omweru omulala.

¹⁹Kutio nyingeeno, ngamuri awageni awari mu ekialo ekitari ekiawu yaaya, ni muri awiina wiifu awa ekialo kilala na awantu awa Katonda kandi awa mu enyumba eya Katonda,

²⁰eombookwe ku owulusa owuateewuao na awatumwa na awagambi awa Katonda. Kandi Kristo Yesu omwene nio ori iwaale ikalangufu eriambiriire enyumba.

²¹Mu okuwa kwinyu mu owulala ni Kristo, inywe mwona Kristo awaomboka alala na awandi wona, okuwa ekaalu enzeru eya Omwami.

²²Kandi mwona mumiire okuzoganiwua alala na awandi, okuwa owumenyo, aa Katonda amenyere ni kuwitra ku Omwoyo gwa Omweru.

Awaefeso 3

Paulo atumrwe okulanzizia awatari Awayaudi

¹Inze Paulo, ndi mu omusiwe ku emirimo egia Kristo Yesu yampa okuwalanzizia inywe awantu awatari Awayaudi.

²Kuwuene mwamiire okuwurra mbwe Katonda yampa emirimo egia okuwalanzizia owusiza wuae,

³ni kiomo yamiire okunsaasurra amang'ana agaawanga ni gaiwisre gano, mala kiomo miire okujoja ku owuimpi mu owutanikro owua ebaruwa eno.

⁴Ni musomere ekia njojere ano, nikwo muuza okumanya okumanya okwa muni okwa ndi nakwo ku owuene owuiwisre ku Kristo.

⁵Katonda ngakamanyisizia amakula agaawita owuene wuno kiomo nyingeeno wumiire okusaulwa no Omwoyo Omweru ku awatumwa na awagambi awa Katonda.

⁶Owuene owuawanga ni wuiwisre wuno wuawanga mbwe, ni kuwitra ku injiili, awantu awatari Awayaudi watuukre ensereki ezia Katonda alala na Awayaudi. Lwona wa-ambaniwue alala mu omuwiri omulala kandi wasangirizie nawo ensereki ezia Katonda yaifuuwa oku-aa awantu waae, ni kuwitra ku Yesu Kristo.

⁷Katonda yampa empanwa eya okuwa omukurumu owa okulanzia injiili, ku owusiza na amaani gae amanene.

⁸Kukawa mbwe ni inze omutono okukira omuntu omutono ino ku awantu awa Katonda wona, ni Katonda nio owampa owusiza wuno wusa kugere ndanzizie awantu awatari Awayaudi owunyazi owungi owuluguulwa owua Kristo.

⁹Kandi nyaloworrwa emirimo egia okuta ku owueru omupango ogwa Katonda omulusi owa ewintu wiona, ogwa owuinunuzi ogwawanga ni guiwisre okuemera mu owutanikro, ni nyingeeno gumiire okusanukulwa.

¹⁰Okuagala okwa Katonda kwawanga mbwe nyingeeno, ni kuwitra ku ekaniisa, amaganga amangi aga Katonda gaaze galaganiwue gamanyike ku awakangasi na awari no owukire awari ku igulu.

¹¹Kino yakola nikulondokana no okuagala okwa yawanga na amiire okutaa okuemera mu owutanikro ni kuwitra ku Yesu Kristo Omwami iifu.

¹²Ku okuwa mu owulala nae kandi mu okuwa no okuganya ku iye, tuuza okugia ku Katonda no owusiani kandi tugambe-gambe nae ni turi owuyanga.

¹³Kutio mbasawa mbwe emioyo giinyu gitafwa ku okunyaka-nyaaka okwa mbanyaka-nyaakra, aeniki okunyaka-nyaaka kuno kuuza okuwareetra okueewua owuti.

Paulo asawira Awaefeeso

¹⁴Ni nyingiriizie amang'ana gano, nkuba ansi amasigamo gange okusawa Katonda Ise

¹⁵owa awa amayumba goona agari ku igulu ni ku ekialo wona watuukrako amiina.

¹⁶Nsawa Katonda mbwe ni kuema ku ensereki enyingi ezia ari nazio, aganye awakalangusie mu emioyo giinyu egia muni, na amaani gae ni kuwitra ku Omwoyo gwae Omweru,

¹⁷kugere Kristo amenye mu emioyo giinyu ni kuwitra ku okuwa kwinyu no okuganya. Kandi nsawa mbwe muisimbiire kandi muiyomboke mu olugonzi.

¹⁸Lwona nsawa mbwe inywe alala na awantu awa Katonda wona muwe na amaani aga okuwurra ekia owuliire, owuiyaagu, owuliire owuika ansi no owuniina kungulu owua olugonzi olwa Kristo wuri.

¹⁹Kandi mumanye olugonzi olutambuuke owuongo owua omuntu okumanya luno, kugere muizuziwue no owunene owua Katonda wuona kiomo wuagana.

²⁰Katonda oesa okukola ewintu ewingi ewitaiwala okukira ewia tuesa okumusawa namba okuingirizia, nikulondokana na amaani amangi aga ari nago, agakola mu owulamu wuifu,

²¹aeewue owunene ku amakula goona mu ekaniisa, ni kuwitra ku Kristo Yesu, amiire goona agawula ne entuuko. Amin.

Awaefeeso 4

Okuwa no owulala mu omuwiri ogwa Kristo

- ¹Ki omusiwe owa Omwami, mbasawa katio mbwe muganye mumenye owulamu owusugre no okueta okwa Katonda yawaeta.
- ²Muwe awantu awaolu kandi awaisiizie ansi. Musiwe emioyo kandi murekerane amawi goona no olugonzi.
- ³Mukole wukalu mu engira ziona kugere murinde owulala owua Omwoyo Omweru ogwa Katonda awaere ni kuwitra ku owuolu owuwasiwraanie alala.
- ⁴Gurio mala omuwiri omulala no Omwoyo Omweru omulala, mala kiomo kirio ekintu ekilala ekia tuteereko emioyo giifu, ekia Katonda yatueta olwa yatueta.
- ⁵Ario Omwami omulala, okuganya okulala no owubatiiso owulala
- ⁶kandi lwona ario Katonda omulala ori Swawu awantu wona, ori kungulu okukira wiona, okola ni kuwitra ku awantu wona kandi omenyere mu awantu wona.
- ⁷No omuntu ki omuntu aerwe empanwa eya owusiza nikulondokana ni kiomo Kristo omwene awuine.
- ⁸Mala kiomo endagano ewoola etino: “Olwa yaniina kungulu, yakangatra awasiwe awasiwulwa kandi ya-aa awantu waae empanwa.”
- ⁹(Ne ewoola mbwe “Yaniina kungulu” ekia kilagana niki? Okwo kulagana lwona mbwe yasooka aika muni mu ekialo ekia awafu.
- ¹⁰Omuntu owaika oyo nio wazane owaniina kungulu okukira ewintu wiona kugere aizuzie ewintu wiona.)
- ¹¹Kristo oyo nio owaesana emirimo egia okuwa awatumwa, awagambi awa Katonda, awainjilisti, awaayi na awagerezi.
- ¹²Emirimo giawu no okuikagia awalowole awa Katonda ku emirimo egia Katonda, kugere omuwiri ogwa Kristo guombokwe
- ¹³nawuno twona tutuuke mu okuambaniwua alala mu okuganya no okuwa no okumanya okutuukre ku Omuzia owa Katonda, kandi tuwe awantu awakomere waawa awatuufu, awatuukre mu owunene owua Kristo wuona kiomo wuagana.
- ¹⁴Okwo kuuza okugera tureke okuwa ki awaana awato, awairwa eno ne eno na amasiira, kandi awasindikwa ni wairwa eno ne eno no omuyaga ogwa engerera ezia owuweeyi ezia awantu awakola na amaganga-ganga okusemeresia awantu.
- ¹⁵Aa okuwa otio, ifwe tulagana owuene, ni turi ne emioyo egiri no olugonzi, okuza okugera tukome mu engira ziona tufwanane ni Kristo, ori Omutwe ogwa ekaniisa.

¹⁶Ni kuemera ku iye, omuwiri gwona oguzoganiiwue alala ne emisi egiguambiriire, gukoma kandi guiomboka ogwene mu olugonzi, ekiimo ki ekiimo ni kikola emirimo giakio.

Okumenya ki awaana awa owueru

¹⁷Kutio mbalaga eking'ana kino ni nkisimbiizia na amaani aga Omwami mbwe mutairana kandi mumenye mu amaingirizio agawula ne emirimo kiomo awantu awa ekialo wamenyere.

¹⁸Amaingirizio gaawu gamwamre ti kandi wari ale no owulamu owua awantu awa Katonda aeniki ngawamanyire Katonda kandi wateere emioyo giawu giwa emikalu ng'a.

¹⁹Aeniki wawula ne ensuuko mu owulamu wuawu, waiteere mu owulamu owua owusoodani no okukola owuoni-uwuoni, kandi wari no olusa olwa okugia emberi mu enkola embiwi ezio owutambuuke.

²⁰Ni inywe ngamukagererwa okumenya ku Kristo mu engira efwana otio, yaaya.

²¹Aeniki kuwuene mwawurra amang'ana aga Yesu kandi mwagererwa ku iye nikulondokana no owuene owumurimo.

²²Mwagererwa ku owulamu wuinyu owukulu, mbwe muvuule enkola ezia owulamu wuinyu owukulu owuaonwanga no okuagala okuwiiwi okwa ensemerezanio.

²³Mureke amaingirizio giinyu gagalusiwue gawe amayia

²⁴kandi muiwoye owulamu owuyia, owulukirwe okufwanana ni Katonda mu owuigolovu no owueru owua kuwuene.

²⁵Kutio omuntu ki omuntu ku inywe paka arekane no owuweeyi kandi muwoole amang'ana agari kuwuene ni mugamba-gamba na awiina wiinyu aeniki twona turi ewiimo ewia omuwiri omulala.

²⁶Kuri mala kiomo endagano ewoola mbwe "No okusu kukuambre, otakola owuoni mu okusu." Mutaganya enyanga egwemo ni mukiari no okusu,

²⁷kandi muta-aa Ekikeeno iwaga mu owulamu wuinyu.

²⁸Omuntu omiire okuwa na aiwa, paka areke owuiwi, na akole emirimo wukalu na amakono gaae omwene kugere awe ne ekia aesa okuitunzia nakio kandi agawire awandi woona awari no okuagala.

²⁹Mutaganya amang'ana amawiiwi agataomerezia awantu gafume mu eminwa giinyu, ni muwoole mala amang'ana agatunzia mu okuomboka awandi nikulondokana no okuagala kwawu, kugere amang'ana giinyu gatunzie awagategerezia.

³⁰Kandi mutagera Omwoyo Omweru ogwa Katonda, owa Katonda yawa-aa ki ekilago mbwe muri awantu waae nawuno kutuuke owuire owua owuinunuzi, awe no omwoyo omululu.

³¹Mutawa awayia enda, awaluunya kandi awa okusu. Lwona mutawa awasoolani, awawooli awa awantu na awakola ewintu ewiwiiwi wiona.

³²Aa okukola otio, muwe awasiza kandi awa amasaasra na awiina wiinyu kandi omuntu ki omuntu arekere omwina waae amawi gaae mala kiomo ku Kristo Katonda yawarekera amawi giinyu.

Awaefeso 5

¹Kutio mulonde olunyaafwa olwa Katonda kiomo awaana waae awa agonziizie

²kandi mumenye mu olugonzi mala kiomo Kristo yatugonzia mala atufumizizia owulamu waae ki omusango kandi empanwa ewunyira Katonda geeza.

³Lwona mutakola owuoni owua owusondo agati iinyu, wukawa mbwe no owufwana wutie, nakuwa enkola-unkola eya ensuuko namba okuwa awantu awaagala ewiawu aweene yaaya, aeniki wino ne ewintu ewitasugaane ku awantu aweeru awa Katonda.

⁴Lwona amang'ana aga ensuuko, amang'ana aga owumaya namba emiwaayo emiwiiwi ngagisugaane gi-ituukrane ku inywe yaaya. Ni aa mukakorre mutio, muwe awairania otioo.

⁵Ku amang'ana gano, muwe no okumanya otino: Omuntu omusoodani, otari omweru ku Katonda namba oagala mala ekiae omwene ngarituukra omugawo mu Owuami owua Katonda. Ni kutio aeniki oagala mala ekiae omwene, iye asawa katonda ensaasa.

⁶Omuntu ataaza yawasemerezia na amang'ana aga owusa aeniki ku amang'ana agafwana gatio okusu okwa Katonda kuwera ku awantu awawula nae no owuti.

⁷Kutio mutaaza mwaizogaana nawo.

⁸Aeniki amiire gandi kale mwawanga ni muri mu ekierema, ni nyingeeno muri mu owueru ku okuwa kwinyu owulala no Omwami. Mumenye ki awaana awa mu owueru,

⁹aeniki owueru wuamia ensaafu kiomo owulootu, owuigolovu no owuene.

¹⁰Mukole ewintu ewiomerezia Omwami.

¹¹Murekane ne enkola ezia owusa ezia ekierema, ni aa okukola otio, muzifumie ku owueru.

¹²Aeniki ne ensuuko okugamba-gamba ku ewintu ewia awantu awawula no owuti wakola owuiwisi.

- ¹³No owueru wumuriike ewintu wiona, wiwonekana ku owueru.
- ¹⁴Aeniki owueru niwuo owugera ne ekintu-ukintu kiwoneka. Ekio niki ekigera no owundi yawoola otino: “Lamuka, iwue nyandoolo, ziuka oeme ku awafu, kandi owueru owua Kristo wuuzza okukumurikako.”
- ¹⁵Muwarre geeza engira ezia mumenyeremo kane, mutamenya kiomo awantu awawula na amaganga, ni mumenye ki awantu awaganga.
- ¹⁶Mukole geeza ino ni iwaga-uiwaga eria mutuukiire, aeniki gano na amiire aga owuoni.
- ¹⁷Kutio mutawa awantu awamaya, ni mumanye ekia okuagala okwa Omwami kuri.
- ¹⁸Mutadung’a, aeniki okwo kuiira awantu mu okukola owuoni. Aa okukola otio, muizuziwue no Omwoyo Omweru ogwa Katonda,
- ¹⁹kugere enyinga ezia muagaane alala, muembe enyembo ezia zabuuri, ezia okutondowola Katonda ne eziema ku Omwoyo Omweru ogwa Katonda. Muembe kandi mukubre Omwami owukana mu emioyo giinyu.
- ²⁰Kandi ku enyinga ziona, muiranizie Katonda Ise otioo ku ewintu wiona ku eriina eria Omwami Yesu Kristo.

Awakazi na awasaaza waawu

(Kolo 3:18, 19)

- ²¹Omuntu ki omuntu asugaane aiisie ansi emberu wa omwina waae, ku owuti owua aeere Kristo.
- ²²Awakazi, muiisie ansi emberu wa awasaaza wiinyu mala kiomo muiisiizie ansi emberu wa Omwami.
- ²³Aeniki omusaaza nio omutwe ogwa omukazi waae, mala kiomo Kristo ari omutwe ogwa ekaniisa, ekiri omuwiri gwae kandi iye nio Omununuzi wayo.
- ²⁴Kutio kiomo ekaniisa kieere Kristo owuti, nintio lwona awakazi wasugaane waae awasaaza waawu owuti mu ewintu wiona.
- ²⁵Inywe awasaaza, mugonzie awakazi wiinyu, mala kiomo Kristo yagonzia ekaniisa nawuno agifumizia owulamu waae.
- ²⁶Yakola otio kugere agieruyie ewe enzeru na akola na amang’ana amalootu aga Katonda ki amanzi
- ²⁷kandi aezanie ekaniisa ku iye omwene, ne eri no owunene, ewula ne embala namba ekisonga namba ekintu-ukintu ekiwiiwi, ni ne eri enzeru kandi etakeeyire mu engira-ungira.

²⁸Mu engira yazane, awasaaza wasugaane wagonzie awakazi waawu kiomo emiwiri giawu aweene. Omuntu-umuntu ogonziizie omukazi waae aigonziizie iye omwene.

²⁹Awulao omuntu oregere omuwiri gwae omwene, na aguriisia kandi agurinda geeza mala kiomo Kristo akorra ekaniisa

³⁰aeniki twona turi ewiimo ewia omuwiri omulala.

³¹Mala kiomo endagano ewoola mbwe, “Kino nio ekigera no omuzia areka swae ni ng’inwae, yaizogaana no omukazi waae kandi awantu wawiri wano wawa omuwiri omulala.”

³²Kino ne ekintu ekiiwisre, ne ekia ngamba-gambako, ni Kristo ne ekaniisa.

³³Kutio omusaaza ki omusaaza paka agonzie omukazi waae kiomo aigonziizie iye omwene, kandi omukazi yoona paka atie omusaaza waae.

Awaefeso 6

Awaana na awiiwuzi waawu

(Kolo 3:20–22)

¹Inywe awaana, mutie awiiwuzi wiinyu aeniki muri awantu awa Omwami, kandi kino kiri ekintu ekilootu okukola.

²Mala kiomo endagano ewoola mbwe, “Tia swao ni ng’inwao.” Eno nie ensikirra esookere esigiikwe no kuifuuwa mbwe no otiire swao ni ng’inwao,

³“kuuza okugia geeza ni iwue kandi ooza okumenya amiire amangi ku ekialo.”

⁴Inywe waaswawu awaana, muta-ambia awaana wiinyu okusu ne ewintu ewia muwakorra. Ni muwakomie ni muwagolola mu engira ewurikaane emberu wa Omwami.

Awagule na awakangasi waawu

(Kolo 3:23—4:1)

⁵Inywe awagule, muwurre awakangasi wiinyu awa ku ekialo kuno no owuti kandi no okuadada. Lwona muwakorre emirimo no omwoyo omulala mala kiomo awakorra Kristo.

⁶Mutawatia mala okuwaomerezia enyinga ezia wawariko a-ampi yaaya, ni muwatie ki awagule awa Kristo awakola okuagala okwa Katonda ni kuemera mu emioyo giinyu muni.

⁷Muwakorre ne emioyo giinyu giona ki awakorra Omwami, ni ng’ano omuntu yaaya,

⁸aeniki mumanyire geeza mbwe Omwami aaza okugawira omuntu ki omuntu omugawo ku ekintu-ukintu ekia akorre, awe omugule namba ori owuyanga.

⁹Ni inywe awakangasi mukole na awagule wiinyu mu engira efwanani. Mutawatiisia aeniki mumanyire geeza mbwe omukangasi ozogaanie inywe alala nawo ari ku igulu, kandi iye ngatiire amiiso aga omuntu, yaaya.

Ewintu ewia-iiye ewia Katonda

¹⁰Owutuukre, mutuukre owukalangufu wuinyu ni kuema ku Omwami na amaani gaae amangi.

¹¹Muirinde ne ewintu ewia-iiye wiona ewia Katonda kugere muemerezie owuganga-ganga owua Ekikeeno.

¹²Aeniki iye eria tulwana ngatulwana na awari ne emiwiri na amasaai yawa. Ni tulwana na awakangasi, awari no owukire, na awari na amaani mu ekialo ekimwamu ti kino. Kandi tulwana ne ewikeeno ewiri na amaani ewiri mu emiyaga kungulu.

¹³Kutio muirinde ne ewia-iiye wiona ewia Katonda, kugere muemerezie omuzigu na amiire aga amawi gatuukre, kandi ni iye riwuere, muwe ni mukiaimerre wukalu.

¹⁴Kutio muimerre wukalu, ni musiwre owuene ki omukanda mu ensinzi. Muingizie owuigolovu ki ekia-iiye ekirinda ekifuwa,

¹⁵kandi muingizie okuikaga okugia okulanzia injiili ereeta owuolu ki ewiraato mu amagulu.

¹⁶Alala ne wino wiona, muingie okuganya ki engawo eya okuzimia nayo owuta owua Ekikeeno owuakaka ki endimi ezia omurro.

¹⁷Muingizie owuinunuzi ki ekigudu ku omutwe, kandi mutoole amang'ana aga Katonda ki omwambe ogwa olugangala ogwa Omwoyo Omweru ogwa Katonda.

¹⁸Musawe Katonda enyinga ziona na amaani aga Omwoyo Omweru ogwa Katonda, ni mumuisasaama mu engira ziona. Ni mukola mutio, muwe amankaga kandi mugie emberu okusawira awantu awa Katonda wona.

¹⁹Noona munsawire mbwe enyinga-uninga ezia ngamba-gamba, Katonda ampe amang'ana aga okuwoola kugere nsanukurre awantu wamanye amang'ana aga injiili agaawanga ni gaiwisre, ni mbula no owuti.

²⁰Egio nigio emirimo egia Katonda yantuma okukola ki omuimerezi owa Yesu kandi nigo aganteere mu owusiwe. Munsawire, ngalanzie no owusiani aa mbula ne ekintu ekia ntia mala kiomo kusugaane kuwe.

Amakeezio agatuukre

²¹Wamwifu Tichikaasi, owa tugonziizie ino kandi oigoloole mu emirimo egia akorra Omwami, aaza okuwalaga ewintu wiona ewinyiikolako kugere mwona muwe no okumanya kiomo ngia ne ekia nkola.

²²Mutuma ku inywe kugere awalage kiomo tugia kandi aaze awakalangusie.

²³Owuolu, olugonzi alala no okuganya okuema ku Katonda Ise no Omwami Yesu Kristo wuwe ni waamwifu wona.

²⁴Owusiza wuwe na awantu wona awagonziizie Omwami iifu Yesu Kristo, no olugonzi olutawua.

Awafilipi

Awafilipi 1

Amakeezio agasookere

¹Ni inze Paulo alala ni Timotheo, awakurumu awa Yesu Kristo. Ebaruwa eno mbajojera inywe awantu awa Katonda okuwitra ku Yesu Kristo woona awamenyere Filiipi, na awakangasi awawarra owulala owua Awakristo alala na awatunzia awakangasi awo.

²Muwe no owusiza no owuolu owuema ku Soifu Katonda no Omwami Yesu Kristo.

Okwikazia no okusawa okwa Paulo

³Nyiranizia Katonda wange otioo ino enyinga ziona ezia mbaingiriizie,

⁴kandi lwona enyinga ziona ni nsawa, mbasawira ni ndi no owusangaavu ino

⁵ku emirimo egia okulanzia injiili egia mumiire okuwa ni mukola alala ni inze okuamera owuire owua mwatuukra amang'ana gano kutuuka nyingeeno.

⁶Kandi ndi no owusiani owua okuwoola mbwe Katonda owatanika emirimo emilootu gino ni inywe, aaza okugia nagio emberu nawuno agitusie owuire owua Yesu Kristo ari-irana.

⁷Omwene mbona mbwe kuri kulootu ni mbawurra otio, aeniki mutoorre iwaga inene ino mu omwoyo gwange. Inywe alala ni ifwe Katonda amiire okutu-aa owusiza owua okulwanra owuene no okulanzia amang'ana amalootu ni nyawanga mu owusiwe kandi ni nyawanga owuyanga.

⁸Katonda omwene amanyire kiomo amiiga gandia ni inywe kandi kiomo mbagonziizie no olugonzi olwa Kristo Yesu.

⁹Okusawa kwange kuri mbwe olugonzi lwinyu luisonge lutairana enyima kandi mbwe okumanya no okuwurra okwa muri nakwo wisonge okuniina kungulu,

¹⁰kugere muwe awantu awaesa okugawula ewintu ewilootu kandi awantu aweeru awawulako embala, nawuno Yesu airane.

¹¹Ee, awantu awa-amia ensaafu ezia owuigolovu ezigera ni Katonda atondowolwa kandi aeewua owunene, ni kuwitra ku Yesu Kristo.

Owusiwe owua Paulo wusongere okulanzia Injiili

¹²Waamwifu, nyagala mumanye mbwe ewintu ewianyikoriire wino wiatunziizie ino mu okulanzia kwange amang'ana amalootu aga Katonda.

¹³Aeniki awantu woona alala na awarinzi awa owumenyo owua omwami woona wamanyire mbwe ndi mu owusiwe muno ku amang'ana aga Yesu.

¹⁴Kandi okusiwua okwa nyasiwirwe okwo, kwa-ambiizie owungi owua waamwifu ku Kristo amaani ino kandi wari no owusiani owua okulanzia amang'ana aga Katonda owungi okukira okwa waawanga nakwo oluweri, aa watatia.

¹⁵Kuwuene wario awalanzia amang'ana aga Kristo ne endandulu kandi ni iyari, na awandi iwo wagalanzia ne emioyo emieru egiagala owulootu.

¹⁶Awantu awalanzia ne emioyo emieru wano wakola otio aeniki wangonziizie kandi wamanyire mbwe nyateerwe mu owusiwe muno ku amang'ana amalootu aga Katonda aga ndwanra wukalu.

¹⁷Na awandi awalanzia amang'ana aga Kristo ne emioyo emiwiiwi wano, okuagala kwawu ngakulootu yaaya aeniki iwo wakola otio kugere nyingiziwue mu emidambo emingi mu owusiwe muno.

¹⁸Ni kukawa mbwe wari ne emioyo emiwiiwi nakuwa emieru, ekineene ni mbwe mu engira ezio ziona amang'ana aga Yesu Kristo galanziwua kandi ekio nikio ekisangaalo kiange. Kuwuene nyiza okugia emberi okuwa omusangaavu ino

¹⁹aeniki manyire mbwe ni kuwitra ku okusawa okwa munsawira no owuitunzi owua ntuukra okuema ku Omwoyo Omweru ogwa Yesu Kristo, ewintu ewimiire okunyiikorra wino wiiza okugaluka wiwe owuinunuzi wuange.

²⁰Ekintu ekineene ekia nteereko omwoyo gwange ni mbwe nyanga ntaaza nyawona ensuuko ku ekintu-ukintu. Ni kuwe mbwe enyinga ziona mbe no owusiani kiomo ndi nyingeeno otino, kugere mbe mbwe ndio omulamu nakuwa mbwe mfwire, omulamu wuange wugingirizie Yesu Kristo kungulu.

²¹Aeniki inze okuwa kwange omulamu, ni iwaga eria okugia emberi okukorra Kristo, no okufwa katio kulootu kwange okukira.

²²Ni kuri mbwe okugia emberi okuwa omulamu mu omuwiri guno, kuri mala iwaga eria okukola ewintu ewingi ewilootu, kane katio ekia nsugaane ndowole agati ya ewintu wiwiri ewio namanyire.

²³Nkululwa eno ne eno aeniki okuagala mbwe nyeme mu owulamu wuno ngie mpuluuke ni Kristo ne ekintu ekilootu ekimpomerezia ino;

²⁴ni ku inywe kuri kulootu okukira ni mbeere omulamu mu omuwiri guno.

²⁵Ee, noona nganyire otio kandi manyire mbwe nyiza okusonga okuwa ni inywe mwona kugere musonge okukoma mu okuwa ne ekisangaalo mu okuganya kwinyu ku Yesu Kristo.

²⁶Kutio okuirana kwange okuwa ni inywe kuuza okugera ekisangaalo kiinyu ku Kristo Yesu kiizule du, ku amang'ana gange.

²⁷Owukirre wiona, paka muwone mbwe owulamu wuinyu owua owuire ki owuire wu-aa injiili eya Kristo eriina ilootu. Ni mukorre mutio, namba ni nyizre

mbawone nakuwa ni mpuriire-uwurra amang'ana giinyu ni ndi ale, nyiza okumanya mbwe kuwuene muaimeriire no omwoyo omulala kandi mwona mulwanra okuganya okuiyegeeke ku amang'ana amalootu, ni muri ekintu ekilala

²⁸aa mutatiire awazigu wiinyu awawalwania namba wutono. Kino kiiza okuwa ekilago ku iwo mbwe Katonda omwene aaza okuwanunula, ni iwo waaza okuonwa wawue chwe.

²⁹Aeniki mumiire okueewua iwaga ilootu ng'ane eria okuta okuganya kwinyu ku Yesu rieng'ene yaaya, ni kugia eria okumunyaka-nyaakra riona.

³⁰Turi ni inywe mu okulwana iye rino. Aweene mwamiire okuwona emidambo giange kandi na reero nkiawona emidambo.

Awafilipi 2

Owunene no okuiisia ansi okwa Kristo

¹Mureke mbawuuzieko, mberi mwaomereziwua ni Kristo? Mberi mwaoreeziwua ku okumanya mbwe awagonziizie? Mberi mwawa mu owulala no Omwoyo Omweru ogwa Katonda kandi muwa no olugonzi na amagongi omuntu no omwina waae?

²Ee, aeniki nintio muri, muizuzie omwoyo gwange du ne ekisangaalo ku okuwa na amaingirizio amafwananani, okuwa no olugonzi agati iinyu, okuwa no omwoyo omulala no okuagala okulala.

³Mutaaza mwakola ekintu-ukintu okutuusia mala okuagala kwinyu inywe aweene namba okuwa no okuitumbula okuwula ne emirimo. Aa okukola otio, muiisie ansi kandi mutoole awiina wiinyu ki awalootu okuwakira.

⁴Mutawa awantu awaagarra mala mu enkanga ziwu aweene yaaya, ni muwe awantu awaagarra awiina waawu wona.

⁵Amaingirizio no okuagala okwa mu emioyo giinyu kusugaane kuwe kiomo okwa Yesu Kristo:

⁶Iye kukawa mbwe yawanga mu embonekano eya Katonda, ni ngakatoola owuagani ni Katonda owuo ki ekintu ekia asugaane a-andeko na amakono awiri yaaya.

⁷Ni yaitoola ki owusa, aiisia ansi awa kiomo owemirimo, na atoola omuwiri ogwa omuntu.

⁸Kandi mu okuwa kwae mu embonekano eya omuntu otio, yaiisia ansi kandi alaga Katonda owuti nawuno mu okufwa. Ee, okufwa olumbe olwa omusalaaba!

⁹Kutio Katonda yamugingirizia kungulu okukira kandi amu-aa eriina erikirre amiina goona.

¹⁰Kugere ku oku-aa Yesu owuti, amasigamo goona ku igulu, ku ekialo ni ansi eya ekialo gakubwe ansi,

¹¹kandi endimi ziona ziwoole mbwe Yesu Kristo no Omwami kugere Katonda Ise atuukre owukaate.

¹²Kutio awiiko wange awa ngonziizie, kiomo mumiire okuwa ni mutiire amang'ana gange ni ndi ni inywe ampi, nyingeeno kiomo mbula ampi ni inywe otino, musugaane mukole otio okukira. Muambe wukalu muwone mbwe mumenyere owulamu owusugre no owuinunuzi, ni mueere Katonda owuti owungi kandi ni muadada emberi waae.

¹³Aeniki Katonda nio ota mu emioyo giinyu okuagala okwa okumu-aa owuti na amaani aga okukola okuagala kwae.

¹⁴Mu ekintu-ukintu ekia mukola, mutawa ne emioyo egia okuirizia, no okukululana mu amang'ana,

¹⁵nikwo mukawa awaana awa Katonda aweeru awawula ne ekintu ekiwiiwi ekia omuntu akawawoolako mu ekialo ekiwiiwi ekiizuule na awantu awooni kandi awaoneeke kino. Owulamu wuinyu wusugaane wuwale ki eng'eni-ng'eni ni muwarimo.

¹⁶Muambe amang'ana agareeta owulamu wukalu, kugere ni Yesu ari-irana, mbe omusangaavu aeniki emirimo egia nyakola ne embiro ezia nyarumuka ngawikawanga ewia owusa, yaaya.

¹⁷Namba ni kuri mbwe owulamu wuange wufugika ansi ki omusango, ni ndekere omusango ogwa emirimo egia nyakola kugere muwe no okuganya okwa muri nakwo ku Kristo kuno, mbona geeza kandi ndi omusangaavu alala ni inywe mwona.

¹⁸Kutio inywe mwona musugaane musangaale alala ni inze ku ekintu ekilala kino.

Emirimo egia Timotheo ni Epafraasi

¹⁹Ni Katonda aganyire, nyingirizia okutuma Timotheo ku inywe wuangu ano, aaze andage kiomo mugia kugere noona mbe no owusangaavu.

²⁰Mbula no omuntu wundi owa owulamu wuinyu wuambre ino ki iye.

²¹Awandi awasigaale, iwo amang'ana gaawu aweene nigo agawa-ambre emioyo, na amang'ana aga Yesu Kristo igo ngagawa-ambre ino.

²²Ni inywe aweene mumanyire kiomo Timotheo amiire okulagana geeza ekia ari, ku okukola ni inze emirimo egia okulanzia injiili, ki omuzia ni swae.

²³Nyingirizia okumutuma ku inywe eyo wuangu ino, ni miire okumanya kiomo amang'ana gange gaaza okuwa.

- ²⁴Ndi no okuganya mbwe Katonda aaza okumpa iwaga, kugere noona nyize mbawoneko eyo, wuangu ano.
- ²⁵Ni nyingirizia mbwe kuri kulootu ni ntumre Epafraasi, ori wamwifu ku Kristo, owemirimo kandi owa-iiye alala ni inze, awairaneko wuangu. No omutumwa wiinyu owa mwatuma okuuzza okuntunzia mu eminyako-nyaako giange.
- ²⁶Nyagala mbwe awairaneko aeniki amiiga gamuria ni inywe kandi omwoyo gwae guinyaasia aeniki mwawurra mbwe yalwala.
- ²⁷Kuwuene yalwala awona namba okufwa. Ni Katonda yamusaasra, kandi ng'ani iye eng'ene, ni kugia inze noona, kugere ntaaza nyawona owululu kawiri.
- ²⁸Kutio nyagala okumutuma eyo ino, kandi manyire mbwe ni muuza okumuwona, muuza okusangaala kandi okuinyaasia kwange okwa mu omwoyo kuuza okuirana enyima.
- ²⁹Mumuingizie no olugonzi olwa Katonda kandi no owusangaavu owungi. Ee, mu-ee awantu awafwana ni iye owuti ino,
- ³⁰aeniki yawona okufwa atoono ku emirimo egia Kristo. Yaganya okuwona emidambo kugere ampe owuitunzi owua ni inywe awakampeere, ni muri ale.

Awafilipi 3

Owuigolovu owua kuwuene wutuukrwa ku okuganya

- ¹Waamwifu, owutuukre, musangaale mu owulala owua muri nawuo no Omwami Yesu. Okuinuula okuwajojera amang'ana amalala, ng'ane eminyako-nyaako ku inze yaaya, aeniki okukola otio kuuza okuwatunzia inywe.
- ²Muirinde ku awantu awooni awafwana ne embwa awo. Awantu awawanigirizia mbwe ni muirwe enyangu nikwo mununuulwe.
- ³Aeniki, ifwe awasawa Katonda ni tukangatiirwe no Omwoyo Omweru, ni ifwe awairrwe enyangu kuwuene weng'ene. Owusiani owua turi nawuo ngawuiyegeeke ku enkola ezia ediini namba wutono, ni tuitumburra mala ewintu ewia Yesu Kristo yatukorra,
- ⁴kukawa mbwe omwene ndi ne ewintu ewingi okukira, ewikagera nte owusiani wuange ku enkola ezifwana ezio, kiomo awandi waingirizia.
- ⁵Inze nyairwa enyangu ni ndi omwana awa amiire munaane, ndi Omuisraeli oema ku oluganda olwa Benjamiini, Omuibrania iwaale, kandi ku okurinda ensikirra, inze nyazirinda wukalu ki Omufarisaayo.
- ⁶Nyata omwoyo gwange okunyaasia awantu awa amakaniisa owululu, ni ku owuigolovu mu engira eya okurinda ensikirra, inze nyawulanga owuoni.
- ⁷Ne ewintu wiona ewia nyatoolanga ki emfuno, nyingeeno mbiwona ki owusa ni mbigeraania ne ewintu ewia Yesu Kristo yankorra.

⁸Owukirre ago, mbona ewintu ewia nyakola mu owulamu wuange owukulu wiona ki owusa, ni mbigeraania no owulootu owuluguulwa mu okumanya Yesu Kristo Omwami wange. Mbiwona ki enyoori, kugere ntuukre Kristo,

⁹kandi mbe mu owulala nae, ni mbula no owuigolovu owuange omwene owuema ku okurinda ensikirra. Ni mbe no owuigolovu owutuukrwa ku okuganya ku Kristo. Owuigolovu owuema ku Katonda kandi owutuukrwa ku okuganya kweng'ene.

¹⁰Nyagala okumanya Kristo, na amaani agaamuziusia aema ku awafu, okuwona eminyako-nyaako egia omwene yawona kandi okufwa olumbe olwa yafwa,

¹¹kugere ni kuesekana, noona ntuuke ku okuziuka okuema ku awafu.

Okulawira ewiri enyima no okuta omwoyo ku ewiri emberu

¹²Ng'ani mbwe omwene miire okusuga mu ewintu wino wiona, namba mbwe miire okueruyiwua mba omweru owulako embala, yaaya. No omwene ndwanagana wukalu ni ngia emberu kugere ntuukre ekiagera ni Kristo Yesu yandowola.

¹³Waamwifu, ng'antoola mbwe inze omwene miire okutuusia wiona ewiagalana, yaaya. Ne ekintu kilala ekia nkola inze, no okulawira ewimiire okuwita, no okulwanaganra ewiri emberu.

¹⁴Ndwanagana wukalu ni mbariire entuuko kugere nkire kandi ntuukre omugawo ogwa Katonda yanyetera ni kuema ku igulu, okuwitra ku Yesu Kristo.

¹⁵Awantu wona awamiire okukoma mu amang'ana aga Katonda, wasugaane waingizie amang'ana gano. Ni, ni gario aga mutaganyaane nago, ni ndi no okuganya mbwe Katonda aaza okugawasasuurra.

¹⁶Ekineene ni mbwe tusugaane tulondokane no okumanya kwona okwa tumiire okutuukra.

¹⁷Waamwifu, muizoge na awandi okulonda omufwano omulootu ogwa owulamu wuange kandi muigerere ku awantu awamenyere owulamu owufwana no owua twawalaga.

¹⁸Aeniki mala kiomo miire okuwa ni mbalaga kasaazo, kandi nyingeeno nkiawalaga na amaziga gayooka, wario awantu awangi awa enkola ziawu zilagana geeza mbwe wari awazigu awalwania ekiagera ni Kristo afwa ku omusalaaba.

¹⁹Owutuuko owua awantu wano wuri mbwe waaza okuteeka wawue chwe. Iwo enda ziawu nio katonda waawu, kandi ewintu ewia ensuuko niwio ewia waere owunene. Iwo wateere amaingirizio gaawu mala ku ewintu ewia ku ekialo kuno.

²⁰Ni ifwe owumenyo wuifu wuri ku igulu, aa turinda ne emioyo egiangiriire, Omununuzi iifu Omwami Yesu Kristo okuema.

²¹Aaza okugalusia emiwiri giifu emigata giwe ki ogwae omwene oguri no owunene, na amaani aga akola nago okureeta ewintu wiona mu amakono gaae.

Awafilipi 4

¹Kutio waamwifu awa ngonziizie kandi awa amiiga gandia nawo ino okuuzwa okuwona, nintio nyagala muimerre wukalu ku Kristo, awiiko wange awa ngonziizie. Inywe ni inywe ekisangaalo kiangwe kandi ni inywe awaaza okugera ntuukre omugawo ku emirimo giange.

Kiomo Paulo agala Awakristo wawe

²Nyisasaama Yudia ni Sintiike mbwe wawe ne empurizanio endootu agati yaawu ki awantu awa Katonda.

³Ee, nkusawa iwue owemirimo omwina wange owa kuwuene, mbwe ganya otunzie awakazi wano aeniki wamiire okuimerra ni inze wukalu mu emirimo egia okulanzia injili. Awandi awamiire okuimerra ni inze ni kugia Kilementi, na awemirimo awiina wange wandi awa amiina gaawu gari mu ebuuki eya owulamu.

⁴Musangaale mu owulala owua muri nawuo no Omwami Yesu enyinga ziona, kandi nyiinuula ni mboola mbwe musangaale!

⁵Mureke owuolu wuinyu wuwonekanre awantu wona, ni mumanyire mbwe Omwami Yesu ari ampi okuirana.

⁶Emioyo giinyu gitainyaasizia ekintu-ukintu, ni ku ewintu wiona ewiwaazra, mute okuagala okwa muri nakwo emberu wa Katonda ni musawa kandi ni mumuikazia ku wiona ewia amiire okuwakorra.

⁷Ni mukorre mutio, owuolu owua Katonda owukirre amaganga aga omuntu okumanya, wuuzwa okusimbiizia emioyo giinyu na amaingirizio giinyu ku Yesu Kristo.

⁸Owutuukre waamwifu, nyagala mute amaingirizio giinyu ku ewintu ewiri kuwuene, ewintu ewilootu, ewintu ewisugaane, ewintu ewieru, ewintu ewigonziizwue, ewintu ewiria awantu amiiga, ewintu ewilongoole alala ne ewintu ewireeta eriina ilootu.

⁹Muwone mbwe muteere ewintu ewia mumiire okuigerera namba okutuukra ku inze wiona mu enkola. Ni mukorre mutio, Katonda owa owuolu wuemako, aaza okuwa ni inywe.

Paulo aikaziizie Katonda ku empanwa ezia yatuukra

¹⁰Nsangaala ino ku Omwami Yesu aeniki mbona nyingeeno no omwoyo ogwa mwawanga nagwo no owulamu wuange guiraane. Ni kuwuene mbwe owulamu wuange wumiire okuwa ni wuwa-ambre, ni iwaga eria okulagana ekia muri ni inze mu enkola nirio erimiire okuwakeeya.

- ¹¹Ng'amboola otio mbwe katio ndi amakono amasa yaaya, aeniki omwene miire okuigerera okusuga mu engira ziona.
- ¹²Manyire kiomo menya ni ndi nawio ewitono nakuwa ni ndi nawio ewingi. Miire okumanya kiomo nkamenya mu owulamu owufwana wutie. Kukawa mu amiire aga enzala namba mu amiire aga enziguta, mu okuwa ne ewintu ewitono nakuwa ni ndi nawio ewingi.
- ¹³Aeniki nyesa okukola ewintu wiona na amaani aga Yesu Kristo ampa.
- ¹⁴Ni kukawa kutio mwakola geeza ino okuwa ni inze ampi mu eminyako-nyaako giange gino.
- ¹⁵Owukirre ago, kiomo mumanyire inywe Awafiliipi, mu amiire aga nyawalanzizia injili oluweri nikuemao nyema mu ekitemo kiinyu ekia Makedoonia, ewulao ekaniisa indi egawuuke ni inywe eyantunzia mu okumfumizia amasendi.
- ¹⁶Namba ni nyawanga no okuagala ni ndi Thesaloniika, mwantumra amasendi owukirre kalala.
- ¹⁷Ng'amboola otio kugere mumpe ewintu yaaya, ni nyagala muwe mbwe ni inywe awatuukra ensereki enyingi eziema ku owu-aani.
- ¹⁸Inze omwene ndi ne ewintu wiona kandi ewingi okukira kiomo nyagala. Ni kutio aeniki ntuukiire ewintu ewia mwantumiire ni kuwitra ku Epafraasi. Wifwana ne emisango emilootu kandi egiwunya esaami, emisango egia Katonda aganyire kandi asangaarre nagio.
- ¹⁹Kandi Katonda owa nsawa aaza okutuusia okuagala kwinyu kwona ni kuema ku owunyazi owua ewintu wiae, ni kuwitra ku Yesu Kristo.
- ²⁰Katonda ori Soifu aeewue owukaate amiire goona agatariwua. Amin.

Amakeezio aga Paulo agatuukre

- ²¹Munkeezizie awantu woona awa Katonda ni kuwitra ku Yesu Kristo. Waamwifu awari ni inze eno wawakeeziizie.
- ²²Awantu awa Katonda ni kuwitra ku Yesu Kristo, awari eno woona wawakeeziizie, ino-ino awa mu enyumba eya Kaisaari.
- ²³Owusiza owua Omwami Yesu Kristo wuwe ni inywe mu emioyo. Amin.

Awacolosai

Awacolosai 1

Amakeezio agasookere

¹Ebaruwa eno eema ku inze Paulo, omutumwa owa Yesu Kristo ku okuagala okwa Katonda, ni ndi alala ni wamwifu Timotheo.

²Mbajojera inywe awantu awa Katonda kandi waamwifu awari Kolosaai awa okuganya kwawu kuisimbiire wukalu ku Kristo. Owusiza no owuolu owua Katonda Soifu wuwe ni inywe.

Paulo aikazia Katonda na asawira Awakolosai

³Enyinga ziona ni tuwasawira, tuiranzia Katonda swawu Omwami iifu Yesu Kristo otioo ino,

⁴aeniki tumiire okuwurra okuganya okwa muri nakwo ku Yesu Kristo no olugonzi olwa muri nalwo na awantu awa Katonda.

⁵Mukola otio aeniki muteere emioyo giinyu ku ekintu ekilootu ekia Katonda awawikiire ku igulu mala kiomo mwamiire okuganya okuemera olwa mwawurra owuene owua amang'ana amalootu aga Katonda aga twawalanzizia.

⁶Amang'ana amalootu agaawaazra gano, gagia emberu okuilanzia mu ekialo kiona. Gagalusia emioyo egia awantu wandi kiomo mwona gaawagalusia okuemera olwa mwasooka okuwurra kandi mumanya ekia owusiza owua Katonda ku awooni wuri.

⁷Mwagawurra okuema ku Epafraasi owemirimo omwina iifu owa tugonziizie kandi ori omukurumu owa Yesu Kristo orindre endagano owaaza eyo ku iwaga riifu.

⁸Iye nio owatulaga olugonzi lwinyu ku Awakristo, olwa Omwoyo Omweru ogwa Katonda yawa-aa.

⁹Amang'ana agatwawurra ku inywe gano gamiire okugera ni tuwasawira amiire goona okuemera tugawurre. Ni tusawa Katonda mbwe awaizuzie na amagezi no okuwurra okwa Omwoyo Omweru aesana mu engira ziona kugere mumanye okuagala kwae.

¹⁰Kuno kuuza okugera mumenye owulamu owusugre emberu wa Katonda kandi owumusangaazia. Ee, no owulamu wuinyu wuuza okuwa ne enkola endootu mu engira ziona kandi muuza okusonga okumanya Katonda geeza owukirre.

¹¹Tusawa mbwe Katonda awe na awakalangusia na amaani goona nikulondokana na amaani aga owunene wuae kugere musikie emioyo giinyu mu eminyako-nyaako giona kandi muwe ne emioyo egirindirra no owusangaavu.

¹²Amiire goona muwe ni muikazia ino Katonda Ise omiire okugera ni muwa awantu awasugre okutuukra omugawo ogwa awantu waae awamenyere mu owueru.

¹³Yatusiwula atutoola mu amaani aga owukire owua ekikeeno, mala atureeta mu owuami owua Omuzia waae owa agonziizie,

¹⁴owa ni kuwitrako, Katonda yatuta owuyanga na aturekera amawi giifu.

Kristo munene okukira wiona

¹⁵Yesu afwanana ni Katonda otawonwa na amiiso ndiki-ndiki, kandi ari omukulu ku ewintu wiona ewialukwa.

¹⁶Ni kuwitra ku iye, Katonda yaluka ewintu wiona ewiri ku igulu ne ewiri ku ekialo, ewiwonekana ne ewitawonekana, wakaawa awantu awari na amaani aga owukangasi na aga owuami, gikaawa emioyo emiwi egiri na amaani aga owukangasi na aga owukire. Ewintu wiona wialukwa ni kuwitra ku iye kandi wialukrwa iye.

¹⁷Kristo yasookera ewintu wiona okuwaaao kandi iye nio ogera ewintu wiona ni wiwa alala.

¹⁸Iye nio omutwe ogwa owulala owua awantu awamuganyireko kandi owulala owua awamuganyireko nigwo omuwiri gwae. Iye nio omuzia owa kuluweri owasooka okuziuka okuema ku awafu. Kutio ari na amaani ku ewintu wiona.

¹⁹Kwaomerezia Katonda okulagana owa ari ni kuwitra ku owulamu owua Kristo

²⁰kandi okureeta empurizanio agati yaae ne ewintu wiona ewiri ku igulu ne ewiri ku ekialo kuno ni kuwitra ku omuzia waae. Katonda yareeta owuolu agati yaae ne ewintu wiona ni kuwitra ku amasaai aga Kristo agaasulula na afwa ku omusalaaba.

²¹Kale mwawanga ale ni Katonda kandi enkola na amaingirizio giinyu amawi wiagera ni muwa awazigu waae.

²²Ni nyingeeno, ni kuwitra ku omuwiri ogwa Yesu Kristo ogwawambwa ku omusalaaba, Katonda amiire okuwairania mu empurizanio nae. Kutio muesa okuwa emberu waae ni muri awantu aweeru kandi awawula owuwiiwi —

²³ni mugiiire emberu okuwa no okuganya ku owuene wuno kandi ni muisimbiire wukalu mu okuganya, aa mutaiyunzia ni muema ku okurindirra okwa mwatuukra mu amang'ana amalootu aga mwawurra, kandi agamiire okulanziwua ku awantu wona mu ekialo kiona. Okulanzia amang'ana amalootu gano nigio emirimo egia inze Paulo, nyaetwa okukola.

Emirimo emikalu egia Paulo yakorra Awakristo

²⁴Ndi no owusangaavu namba ni mbanyaka-nyaakra otino. Lwona ntoola iwaga ilootu eria okumariizia no omuwiri gwange ekiasigala ku emidambo ne

eminyako-nyaako egia Yesu Kristo yatuukra. Nkola otio ni manyire mbwe nyaka-nyaakra awantu awa Katonda awari omuwiri ogwa Yesu Kristo.

²⁵Katonda yandowola kandi antuma okukorra awantu waae emirimo egia okulanzia amang'ana amalootu, ni ntuusia okuagala kwae kwona ku inywe awatari Awayaudi.

²⁶Okuagala okwa Katonda kuno kwaiwisira awantu awa amakula goona agaawita ku emiaka ne emiaka, ni nyingeeno akusasuriire awantu waae.

²⁷Katonda yaagalanga okusasurra awantu waae okuagala kwae okuluguulwa okuri okwa awantu wona namba awatari Awayaudi. Wuno niwuo owutumwa owunene mbwe Kristo awamenyeremo kandi okwo kugera ni muwa no okurindirra okwa mu emioyo mbwe muuza okutuukra owunene owua Katonda.

²⁸Kristo ono nio ifwe tulanzia amang'ana gaae ku awantu wona ni tuwasiagizia kandi ni tuwagerera na amagezi goona kugere tuwaire emberu wa Katonda ni wari awakomere mu owulamu wuawu ku Kristo.

²⁹Kino niko ekigera ni nkalawana wukalu na amaani amangi aga Kristo ondimo, a-ampa.

Awacolosai 2

¹Awiifu nyagala mumanye kiomo miire okuwa ni mbalwanaganra inywe Awakristo awa Kolosai, na awa Laodeesia na awandi wona awakiari okumbona na amiiso.

²Okuagala kwange ni mbwe mukalanguke mu emioyo kandi muwe no owulala owuema mu okuwa no olugonzi. Nyagala muwe no owunyazi owua okuwa no owusiani owutuukrwa mu okuwa no okumanya okutuukre. Kuno kuuza okugera wamanye embisre eya Katonda eri Kristo omwene.

³Ni ku iye nimwo omwa awantu wamanya amaganga no okumanya okwa Katonda agari owunyazi owuiwisre.

⁴Mbalaga amang'ana gano kugere omuntu ataaza yawasemerezia na amang'ana aga owuganga agaomerezia kandi agawurikana ki amalootu.

⁵Ni kukawa mbwe ng'andi ni inywe eyo mu omuwiri, omwoyo gwange guri ni inywe alala kandi ndi no owusangaavu ku okumenya kwinyu mu engira eagalana, no okuwona kiomo muisimbiriire mu okuganya kwinyu ku Kristo.

Reka engerera ezia owuweyi olonde Kristo

⁶Kutio mala kiomo mwaingizia Yesu Kristo ki Omwami iinyu, mumenye mu owulala nae.

⁷Mumuisieko emizi giinyu wukalu kandi mumuiyombokeko ni mukalanguka mu okuganya kiomo mwagererwa ni muizuule no omwoyo ogwa okuirania otioo.

⁸Muwe amankaga kugere omuntu-umuntu atata amaingirizio giinyu mu owusiwe ne engerera embiwi ezia owuweeyi eziwula ne emirimo. Ziiza ziwurikana endootu, ni ziri mala engerera eziambaane ne enkola ezia awantu awa ku ekialo na amaani aga emioyo emiwiiwi egia ku ekialo, ni ngaziambaane ne engerera ezia Kristo, yaaya.

⁹Aeniki, owufwanani wuona owua Katonda wuri ku Kristo.

¹⁰Kutio, Katonda awaere ewintu wiona ewisugaane no owulamu owua kuwene owua awari ku Kristo, ori kungulu okukira awakangasi na awari no owukire woona.

¹¹Mu owulala wuinyu ni Kristo, mwairwa enyangu, ni ng'ane enyangu ekorrwa omuwiri okukolwa no omuntu, ni ne enyangu eya mu omwoyo okukolwa ni Kristo okusiwula awantu okuema ku amaani aga omuwiri ogukola owuoni.

¹²Kandi olwa mwabatiiswa kwafwananga mbwe mwa-awirwa ni Kristo kandi muziusiwua nae mu okuganya ku amaani aga Katonda agaamuziusia gamutoola ku awafu.

¹³Mu owulamu wuinyu owua owuoni owuawita, mwawanga awafwire mu omwoyo, ni nyingeeno Katonda yawaziusie mala mutuukra owulamu owuyia kiomo Kristo yatuukra. Katonda yaturekera owuoni wuifu wuona

¹⁴olwa yatoolao amawi goona aga endagirra yatingirira nago, agatoola emberu iifu agamala chwe olwa yawambwa ku omusalaaba.

¹⁵Olwa Katonda yamala okunyaga awakangasi na awakire awa ekialo ekia omwoyo ewia-iye wiawu, yawasuusia emberu wa awantu woona na awakangaasie emberu ki awasiwe awa-ambrwe mu iye, na awakira ni kuwitra ku okufwa okwa Kristo ku omusalaaba.

¹⁶Kutio mutatega amatwi giinyu ku awantu awawateera ekiina ku ewintu ewia muria ne ewia munywa, okutakola emigomo egia emienzi emiyia namba okutarinda amiire aga Sabato.

¹⁷Endagirra zino ziwanga mala ekiiruuzia ekia ewintu ewiazanga, no owuene wuituukrana ku Kristo.

¹⁸Mutaganya musemereziwue muteesie omugawo gwinyu oguema ku Katonda ku okuganya na awantu awagonziizie okuiisia ansi okwa owuweeyi okutasugaane, alala no okusawa enyankoi. Awantu ki awo, ekiwasindika no okuiyama ne ewintu ewia owusa ewia wawuine mu amalooto agawaazra mala mu amaingirizio no okuagala okwa omuwiri.

¹⁹Awantu wano warekere engira eya Kristo ori omutwe, ni ifwe turi ewiimo ewia omuwiri ogwo ewiambaniiwue alala ne emisi. Kutio, ni turi ku iye nikwo tukakoma kandi tutuukre amaani okuema ku Katonda.

²⁰Ni inywe mwafwa ni Kristo kandi amiire okuwagawula no okuagala ne enkola ezia awantu awa ku ekialo. Katio niki ekigera ni mukiagia emberu ni mulonda endagirra zino ki awantu awakiari mu owulamu owua ekialo? Endagirra ezifwana,

²¹“Ota-amba kino! Otaria kino! Otawa ampi ni kino!”

²²Zino ziri mala endagirra eziwula emirimo ezigererwa na awantu kandi ziambaane ne ewintu ewikolwa nawio kandi emirimo giawio wiwuera ao.

²³Endagirra zino ziwonekana ki amaganga amalootu aeniki zinigirizia omuntu okuta omwoyo okukola okuagala okwa ediini, okuiisia ansi okwa owuweeyi, alala no okunyaasia omuwiri wululu. Ni ngazitunzia omuntu okukira okuingirizia okuwiiwi no okuagala okuwi okwa omuwiri.

Awacolosai 3

Owulamu owuyia owuema ku Kristo

¹Kutio aeniki mwaziusiwua alala ni Kristo muwa no owulamu owuyia, mute emioyo giinyu mu okuagala ewintu ewiri ku igulu, aa Kristo ari nyakukono okusaaza okwa Katonda.

²Mute amaingirizio giinyu ku ewintu ewiri ku igulu, ni ng’ani ku ewintu ewiri ku ekialo kuno,

³aeniki mwafwa mu owulamu wuinyu owua ku ekialo kuno, mutuukra owulamu owuyia owutuukrwa ku Kristo, aa ari ni Katonda.

⁴Kandi olwa Kristo, ori omwene owulamu wuinyu owua kuwuene, ari-irana ku ekialo kuno, mwona muriwa nae mu owunene wuae.

⁵Kutio, paka muite ilala okuagala okuwiiwi okwa ku ekialo, kiomo owusondo, enkola emwamu, okuagala okwa omuwiri, okuagala ewintu ewisuusia, alala ne endandulu, eri okusawa katonda ensaasa.

⁶Enkola zino ziiza okugera okusu okwa Katonda kuwure ku awantu awatakola okuagala kwae.

⁷Inywe mwona mwakolanga ewintu wino alala nawo ni mwawanga ni mukiagenda-genda mu owulamu owua owuoni owua ku ekialo kuno.

⁸Ni katio nyingeeno, murekane ne enkola ziona ezifwana zino: okusu, ekuyia enda, owuwi, okuwoola awandi uwiiwi, no okuwoola amang’ana aga ensuuko.

⁹Mutalaga awiina wiinyu amang’ana aga owuweeyi, aeniki mwamala okureka owulamu owukulu ne enkola yawuo,

¹⁰mugaluka muingizia owulamu owuyia, owukolwa owuyia mu omufwano ogwa Katonda omulusi wiinyu, kiomo mugia emberu okumanya Kristo.

- ¹¹Mu owulamu owuyia wuno, kuwulao okugawukana mbwe koozi ono no Omugiriiki namba Omuyaudi, oirrwe enyangu namba otairrwe enyangu, omumaya oema mu oluganda olukiari enyima, omugule namba ori owuyanga. Ni, okuwa ku Kristo kweng'ene nikwo okunene kandi Kristo nio oturimo twona.
- ¹²Kutio, aeniki Katonda amiire okuwalowola okuwa awantu waae aweeru kandi awagonziwue, musugaane mukole wukalu okuwa awantu awasasra awandi, awa emioyo emilootu, awaisiizie ansi, awagonziizie owuolu kandi awaoreevu.
- ¹³Muwe awantu awaisikia emioyo kandi murekerane amang'ana goona kukawa mbwe omwina waao akukoriireki. Murekerane kiomo Omwami yawarekera amawi giinyu.
- ¹⁴Ne ekineene ku ewintu wino wiona, no olugonzi. Olugonzi olwo nilwo olutuambaania alala geeza ki ekintu ekilala.
- ¹⁵Mureke owuolu owuema ku Kristo wuwakangatre mu emioyo giinyu, aeniki ki ewiimo ewia omuwiri omulala, Katonda yawaeta okumenya mu owuolu. Kandi muwe ne emioyo egia okuirania otioo enyinga ziona.
- ¹⁶Mureke amang'ana aga Katonda gaingire mu owulamu wuinyu ku owungi, ni muigerera kandi muigaanania na amaganga. Kandi muembere Katonda ni mumutondowola ne enyembo ezia zabuuri alala ne enyembo zindi, ni mumuiranzia otioo mu emioyo giinyu.
- ¹⁷Ku ewintu wiona ewia mukola kandi ewia muwoola, muwikole kandi muwiwoole ni murinda eriina eria Omwami Yesu kandi muwe ni muiranzia Katonda Ise otioo ni kuwitra ku Kristo.

Kiomo Awakristo wasugaane wamenye

(Efee 5:22—6:9)

- ¹⁸Inywe awakazi, muwe no owuti ku awasaaza wiinyu aeniki nintio Omwami Katonda aagala mbwe mumenye.
- ¹⁹Ni inywe awasaaza mugonzie awakazi wiinyu kandi mutawa awalulu nawo.
- ²⁰Inywe awawuuka, mu-ee awiiwuzi wiinyu owuti mu engira ziona, aeniki ekio niko ekintu ekiomerezia Omwami Katonda.
- ²¹Ni inywe waaswawu awaana mutagera awaana wiinyu wawe no omwoyo omululu, aeniki ekio kiesa kiawafwisia emioyo.
- ²²Ni inywe awagule, mutie awawagurre ku ekialo kuno mu engira ziona. Mutakola emirimo giinyu mala okuwonekana awalootu mu amiiso gaawu yaaya, ni mugikole no omwoyo mulala ni mutiire Omwami Katonda.
- ²³Mu emirimo-umirimo egia okola, gikole no omwoyo gwao gwona ki omuntu okorra Katonda, ni ng'ani ki okorra omuntu.

²⁴Mukole mutio ni mumanyire mbwe muuza okutuukra emigawo okuema ku Omwami Katonda ku emirimo giinyu. Kristo Omwami nio owa mukorra emirimo.

²⁵Omuntu-umuntu okorre uwiiwi, oona aaza okutuukra okuswawuka okusugre na amawi aga akorre aeniki Katonda ngatiire amiiso aga omuntu.

Awacolosai 4

¹Ni inywe awari na awagule, mu-ee awagule wiinyu ewintu ewisugaane kandi muwe awalootu nawo, aeniki mwona muri no omukangasi iinyu owagurre owa mukorra ori ku igulu.

Okuamba amaani mu okusawa no okulanzia Kristo

²Mute emioyo giinyu mu okusawa kandi muwe amankaga ni muiranizia Katonda otioo.

³Awiifu, mutusawire twona kugere Katonda aigule engira kugere amang'ana agaiwisre aga tulanzia ku Kristo, agagera ni ndi mu owusiwe nyingeeno, gatuukre iwaga.

⁴Munsawire kugere ngalanzie mu engira ewurikana kiomo kusugaane.

⁵Ni muri na awantu awatari Awakristo, muwalage olugendo olulootu na amaganga kandi muwone mbwe mukorre ni iwaga riona geeza okuwalaga engira eya Kristo.

⁶Enyinga ziona ni mugamba-gambra awantu, okugamba-gamba kwinyu kusugaane kuwe okulootu, kandi okuomerezia awantu, lwona musugaane mumanye kiomo mukairania embuuzio ezia mueerwe ziona, geeza.

Amang'ana na amakeezio agatuukre

⁷Mpao ntumre Tichikaasi ne ebaruwa kandi aaza lwona okuwalaga amang'ana goona kiomo ngia eluwega eno. Iye ni wamwifu ku Kristo omuigolovu kandi owa ngonziizie, owa tukola nae emirimo egia Omwami.

⁸Mutuma ku inywe kugere awalage kiomo tugia entulo eno, kandi okuwa-ambia amaani.

⁹Mutuma alala no omwina iinyu Onesimaasi ori wamwifu ku Kristo omuigolovu kandi owa ngonziizie. Waaza okuwalaga ewintu wiona ewiikola eluwega eno.

¹⁰Aristakuusi, owa turi nae mu owusiwe, alala ni Mariiko, omuzia owa senge owa Baranabaasi, wawatumiire amakeezio. Ni kiomo mumiire okulagwa mbwe Mariiko aaza eyo, na awaazreko mumuingizie geeza.

¹¹Yesu, oetwa ne eriina rindi mbwe Yusto, oona awatumiire amakeezio. Awantu awasatu awo niwo Awayaudi weng'ene awari no okuganya ku Kristo awakola ni inze alala mu emirimo egia Owuami owua Katonda, kandi wamiire okunkalagusia ino.

¹²Epafraasi omwina iinyu kandi omukurumu owa Yesu Kristo, oona awatumiire amakeezio. Awasawira Katonda na amaani ino enyinga ziona kandi omwoyo gwae guwarirra mbwe mukome muwe awakalangufu kandi awaisimbiire mu okuagala okwa Katonda.

¹³Kuwuene, mbalaga mbwe amiire okuwa na awasawira wukalu ino, inywe na Awakristo awa Laodeesia na awa Yierapooli.

¹⁴Omulaktaari Luuka owa ngonziizie ino, ni Deema, wona wawakeeziizie.

¹⁵Mwona mutukeeziizieko Awakristo awiina wiifu awari Laodeesia ni wamwifu owekiala Niifa alala na Awakristo awaagaana okusawa omwae.

¹⁶Ni mumiire okusomerwa ebaruwa eno, mugitumre Awakristo awari Laodeesia wona wakisome, kandi inywe mwona muwone mbwe musomere ebaruwa eya nyajojera awa Laodeesia.

¹⁷Mulage Arkiipo mbwe agie emberu okukola emirimo egia Katonda yamu-aa, nawuno awone mbwe agigowiizie.

¹⁸Owutuukre, mbajojera amakeezio gano no okukono kwange omwene ni mboola otino: Mutaaza mwalawira mbwe ndi mu owusiwe. Owusiza owua Katonda wuwe ni inywe!

1 Awathesaloniika

1 Awathesaloniika 1

Amakeezio agasookere

¹Inze Paulo, ni ndi alala ni Siila ni Timotheeo, mbajojera ebaruwa eno inywe awantu awa ekaniisa eya Katonda Ise no Omwami Yesu Kristo, eri Thesaloniika. Owusiza no owuolu owua Katonda wuwe ni inywe.

Paulo airania otioo ku okuganya okwa Awathesaloniika

²Tuiranizia Katonda otioo enyinga ziona ni tuwasawira inywe mwona aa tataluya, ni tuwaeta na amiina giinyu.

³Amiire goona ni tusawa emberu wa Soifu Katonda, tukiari okulawira emirimo giinyu egiemera mu okuganya kwinyu ku Kristo, no okuinyaasia kwinyu ne emirimo emikalu okuema ku olugonzi olwa muri nalwo, alala no okusikia emioyo okureetwa no okuwa no okurindirra ku Omwami iifu Yesu Kristo.

⁴Waamwifu awa Katonda agonziizie, tumanyire mbwe Katonda amiire okuwalowola,

⁵aeniki amang'ana amalootu aga Katonda aga twawalanzizia ngagakawanga mala amang'ana masa, ni gaawanga na amaani aga Omwoyo Omweru owagera ni muwa no owuene ku amang'ana ago. Mumanyire geeza kiomo twawanga ni tumenyere ni inywe kandi kiomo twawatunzianga.

⁶Kandi mwalonda olunyaafwa lwifu no olwa Omwami Yesu aeniki mwaganya muingizia amang'ana ago no owusangaavu owua Omwoyo Omweru yawa-aa, kukawa mbwe mwalwaniwuanga wukalu.

⁷Kutio, mwawa ekilago ekilootu ku awantu wona awari no okuganya ku Kristo awari mu ewialo ewia Makedoonia na Akaaya.

⁸Aeniki ni kuemera ku inywe, amang'ana aga Omwami Yesu gamiire okuilanzia kandi gawurikana, ng'ani mala mu ekialo ekia Makedoonia na Akaaya eng'ene, na amang'ana aga okuganya kwinyu ku Katonda ago gamiire okuilanzia asi-uasi, aa kiwulao ekintu kindi ekia tusugaane tusongeko kandi.

⁹Aeniki iwo aweene walaga awantu kiomo mwatuingizia geeza ni kiomo mwagaluka mulaga katonda ensaasa omugongo, ni muganya okukorra Katonda omulamu kandi owa kuwene.

¹⁰Lwona wawoola kiomo murindirra okuuzza okwa omuzia waa okuema ku igulu. Yesu nio Omuzia waa owa yaziusia okuema ku awafu kandi owatununula atutoola mu okusu okwa Katonda okuuzza.

1 Awathesaloniika 2

Emirimo egia Paulo yakola Thesaloniika

- ¹Waamwifu, inywe aweene mumanyire geeza mbwe okuuzwa okwa twaza okuwawona eyo ngakukawa okwa owusa, yaaya.
- ²Kukawa mbwe anyuma ao twawanga ni tumiire okuwona eminyako-nyaako kandi twakorrwa enkola embiiwi ku omugizi ogwa Filiipi, kiomo mumanyire. Ni twasianiya okuwalanzizia injiili na amaani aga Katonda iifu, kukawa mbwe awantu awangi waatulwanianga.
- ³Mumanyire geeza mbwe amang'ana aga tuwoola ngagaema mu engerera ezia owuweeyi, okuagala okuwiiwi nakuwa engira eya okuwasemerezia, yaaya.
- ⁴Ni owugawuuke, ifwe tugamba-gamba ki awantu awa Katonda aganyire nawo okuteerwa injiili mu amakono. Ifwe okuagala kwifu ng'ano okuomerezia awantu yaaya, ni no okuomerezia Katonda, owa nio omanyirizia ewintu ewiri mu emioyo giifu.
- ⁵Mumanyire mbwe ifwe ngatukawaazako na amang'ana amanyunkuulu okuwawuwa kugere muganye ni ifwe, lwona Katonda ari omuwoni wiifu mbwe ngatukawaisemereziako okutuukra ekintu-ukintu ku inywe.
- ⁶Ngatukaagala okutondowolwa na awantu yawa, wawe inywe namba awandi awasaasa.
- ⁷Ki awatumwa awa Kristo, twawanga na amaani aga okuwaagalako ewintu. Ni twawa awasiza ni inywe mala kiomo ng'ina omwana orinda omwana waae omwene.
- ⁸Twawagonzia ino, kutio ngatukawa-aa mala amang'ana amalootu aga Katonda geng'ene, ni twawafumizizia kugia owulamu wuifu wuona, aeniki mwawanga ni mumiire okuwa awiiko wiifu ekiweye ne engege.
- ⁹Waamwifu, kuwene inywe muesa okuingirizia emirimo emikalu egia tuakola no owuzito owua twawona ni twawanga agati iinyu. Twakolanga emirimo owuire no omuwasu kugere tutaweera omuntu ku inywe omusigo, ni twawalanzizianga amang'ana amalootu aga Katonda.
- ¹⁰Aweene muri awawoni kandi Katonda oona ari omuwoni mbwe ifwe twawanga aweeru, awigolovu kandi awawula ne ekiwi ekia wakawoolwako, ni twawanga agati iinyu inywe awantu awaganyire ku Kristo.
- ¹¹Aeniki mwona mumanyire geeza mbwe twakorra omuntu ki omuntu mala ekia swawu awaana akakorra awaana waae,
- ¹²ni tuwakalangusia, ni tuwa-ambia amaani kandi ni tuwaisasaama mbwe mumenye owulamu owusugaane emberu wa Katonda owawaeta mu owuami wuae kandi mu owunene wuae.
- ¹³Kandi tuikazia Katonda enyinga ziona aeniki olwa mwawurra amang'ana aga Katonda aga twaza okuwalanzizia, ngamukagatoola mala ki amang'ana aga

awantu yaaya, ni mwagatoola ki amang'ana aga Katonda kiomo gari, kuwuene. Amang'ana ago nigo agakola mu owulamu wuinyu inywe awari no okuganya ku Kristo.

¹⁴Waamwifu, mwafwana mala na awantu awa amakaniisa aga Katonda agari ku Kristo agari mu ekialo ekia Yudeea, aeniki mwatuukra eminyako-nyaako okuema ku awiinyu aweene mala kiomo woona waatuukra eminyako-nyaako okuema ku Awayaudi awiina waawu.

¹⁵Awayaudi niwo awaaita Omwami Yesu na awagambi awa Katonda kandi niwo awaaturumusia ale. Ngawaomerezia Katonda kandi wari awazigu awa awantu woona

¹⁶aeniki watuigarra okulaga awantu awatari Awayaudi amang'ana agareeta owuinunuzi. Mu engira eno, waongerezia amawi gaawu okutambuka omurengo. Owutuukre, okusu okwa Katonda kwona aa kuagana kuwatuukreko.

Paulo ari na amiiga aga okuirana Thesaloniika

¹⁷Ni waamwifu, olwa twagawulwa ni inywe ku enyinga entono, mu omuwiri ni ng'ani mu amaingirizio, tuakola wukalu okuza okuwonana ni inywe amiiso na amiiso aeniki twawanga na amiiga amangi ni inywe.

¹⁸Kutio, tuagalanga okuwaazako okuwawona, ino-ino inze Paulo nyakola wukalu okuza eyo kangi, ni Sataani yatuigarra.

¹⁹Kane katio awatusangaarre nawo kandi awatuteereko emioyo giifu awagawuuke ni inywe ni waawu anu? Ng'ani inywe awari ki ekigudu kiifu ekia owuyaayi ekia turi-itumbula nakio emberu wa Omwami Yesu olwa ari-irana?

²⁰Kuwuene, ni inywe awagera ni tutuukra owunene kandi ni tuwa awasangaavu.

1 Awathesaloniika 3

Paulo atumre Timotheo Thesaloniika

¹Kutio, olwa okugia emberu okuwa ale ni inywe kwatukira, twakenga mu emioyo giifu mbwe inze ni Siila tusigale Atheene

²ni tuwatumre Timotheo, ori wamwifu kandi omukozi owa Katonda omwina iifu ku okulanzia amang'ana amalootu aga Kristo. Twamutuma okuza okuwakalangusia kandi okuwa-ambia amaani mu okuganya kwinyu,

³kugere mutayunziwua ne eminyako-nyaako egia muwona gino. Kuwuene inywe aweene mumanyire geeza mbwe kwawanga mbwe paka tuwone eminyako-nyaako gino.

⁴Aeniki ni twawanga ni inywe, twaweerako ni tuwalaga mbwe tuuza okuwona emidambo. Kandi kuwuene ekio niki ekimiire okuikola, kiomo mwona mumanyire.

⁵Kino nikingera ni nyatuma Timotheo mbwe awaazeko eyo okuwona kiomo mugia emberu mu okuganya kwinyu, olwa okugia emberu okuwa ale ni inywe kwatukira. Nyawanga no owuti mbwe andi omugeezaani amiire okuwageezaania kandi emirimo egia tuakola eyo giweere egia owusa.

⁶Ni, nyingeeno katio olwa Timotheo atuiraaneko na awaemako eyo, atureetiire amang'ana amalootu ku okuganya okwa muri nakwo alala no olugonzi lwinyu. Lwona atulagre mbwe mukiaru na amaingirizio amalootu, kandi mbwe kiomo turi na amiiga aga okuwawona, nintio mwona muri na amiiga aga okutuwona.

⁷Kutio waamwifu, ku eminyako-nyaako ne emidambo giona egia turi nagio, amang'ana aga okuganya kwinyu okwo gatuambiizie amaani ino.

⁸Aeniki okuimerra okwa muimerre wukalu ku Omwami okwo kutuwuluusie emioyo.

⁹Ne engiraaki eya tuesa okuiranizia Katonda otioo owusugre, ku owusangaavu owua turi nawuo emberu waae, ku amang'ana giinyu?

¹⁰Owuire no omwasu tusawa Katonda ne emioyo giifu egia munsu mbwe tutuukre iwaga tuuze eyo tuwonane ni inywe amiiso na amiiso kandi tuwatunzie okuizuzia ekikiakeeyire mu okuganya kwinyu.

¹¹Katonda kandi Soifu omwene alala no Omwami iifu Yesu, waganye watuigurreo engira eya okuza okuwawona.

¹²Omwami aganye aongerezie olugonzi olwa muri nalwo agati iinyu aweene ni ku awantu wandi wona luwe olungi ino, mala kiomo twona turi no olugonzi olungi ino ni inywe.

¹³Nsawa mbwe Omwami akalangusie emioyo giinyu kugere muwe awantu aweeru awawula ne ekiwi ekia wakawoolwako emberu wa Katonda kandi Soifu, olwa Omwami iifu Yesu ariiza na awantu waae aweeru wona.

1 Awathesaloniika 4

Owulamu owuomerezia Katonda

¹Kutio waamwifu, owutuukre, tuwaisasaama kandi tuwa-ambia amaani ku eriina eria Omwami Yesu mbwe kiomo twawagerera engira eya okumenya owulamu owuomerezia Katonda, mala kiomo kuwene mumiire okuwa ni mumenyere, musonge okukola otio ku owungi ino.

²Aeniki mumanyire geeza amang'ana aga twawalagirizia ku amaani aga Omwami Yesu mbwe mulonde.

³No okuagala okwa Katonda mbwe muwe awantu awatengeekwe kandi awari ale no owuoni owua owusondo.

- ⁴Omuntu ki omuntu ku inywe asugaane amanye kiomo akairinda mu omuwiri gwae omwene mu engira enzeru kandi eya owuti.
- ⁵Ni ng'ani mu engira eya okukangatrwa no okuagala okwa omuwiri kiomo awatamanyire Katonda wakola.
- ⁶Kutio, omuntu-umuntu ku inywe ataaza yawitra omwina waae ku ing'ana rino nakuwa okumusemerezia, aeniki Omwami aaza okuswawuka awantu ku amawi goona agafwana gatio mala kiomo twawalaga kandi tuwasiagizia.
- ⁷Aeniki Katonda ngakatueta okumenya owulamu owumwamu yaaya, ni yatueta okumenya owulamu owueru.
- ⁸Kutio, omuntu olowa amang'ana gano, ngalowa mala amang'ana aga omuntu yaaya, na alowa amang'ana aga Katonda owawa-aa Omwoyo gwae Omweru.
- ⁹Ku amang'ana aga olugonzi agati eya awada ku Kristo, ng'ambona ekia tukawalaga aeniki inywe aweene mwamala okugererwa ni Katonda okugonzania omuntu no omwina waae.
- ¹⁰Kandi kuwene mugonziizie waamwinyu ku Kristo woona awari mu ekialo ekia Makedoonia kiona. Kukawa kutio, waamwifu tuwakalangusia mbwe mugie emberu okukola otio ku owungi.
- ¹¹Mukole wukalu muwone mbwe mumenyere owulamu owuwulamo erioga. Omuntu ki omuntu awarre emirimo giae omwene kandi murie oluuya lwinyu aweene mala kiomo twawalaga,
- ¹²kugere awantu awa enze wawa-ee owuti ku owulamu wuinyu owua owuire ki owuire kandi kugere omuntu ki omuntu ku inywe atuusie okuagala kwae iye omwene.

Okuziuka okwa awantu awaafwa ku Kristo

- ¹³Waamwifu, ngatuagala muwe awawula no okumanya ku amang'ana aga awantu awamiire okufwa kugere mutarra ki awantu awawula no okurindirra okwa mu omwoyo.
- ¹⁴Turi no okuganya mbwe Yesu yafwa kandi aziuka, kutio turi no okuganya lwona mbwe Katonda ari-irania waamwifu ku Kristo awaagona woona, alala ni Yesu.
- ¹⁵Nikulondokana na amang'ana aga Omwami omwene yawoola, ifwe awariwa awalamu olwa Omwami ari-irana, ngaturikangatra waamwifu awaagona okugia okumuaganra.
- ¹⁶Aeniki olwa awantu wariwurra ensikirra ne efumiiwue wukalu, omwoyo ogwa omukangasi owa enyankoi ni guduma kandi ekombi eya Katonda ne erra, Omwami omwene ariema ku igulu aike ansi. Nikuema awantu awaagona ni wari ku Kristo warisooka okuziuka.

¹⁷Nikuemao, ifwe awasigaale awarituukrwa ni tukiari awalamu, turitoolwa kalala ki olumesi alala nawo tuirwe kungulu mu amare okuagaana no Omwami mu omuyaga kandi, turiwa no Omwami amiire goona.

¹⁸Kutio muiorezanie emioyo na amang'ana ago.

1 Awathesaloniika 5

Okuuza okwa Omwami Yesu okwa okuwiri

¹Waamwifu, kiwulao ekia tusugaane tuwajojere ku owuire ne enyinga ezia okuirana okwa Omwami Yesu.

²Aeniki, mumanyire geeza ino mbwe owuire owua okuirana okwa Omwami Yesu wuri-izukirra mala kiomo omwiwi ooza owuire.

³Mu enyinga ezia awantu waaza okuwoola mbwe, "Turi no owuolu kandi turindirwe geeza," nizio ezia waaza okuonwa kalala mala kiomo ewisa wi-izukirra omukazi oluire ni isaai, kandi ngawarimizuka, yaaya.

⁴Ni waamwifu, inywe ngamuri mu ekierema yaaya, kutio owuire owua okuirana okwa Omwami Yesu ngawusugaane wuwaizukirre kiomo okuuza okwa omwiwi.

⁵Aeniki, inywe mwona muri awaana awa owueru kandi awa omuwasu. Ngaturi awantu awa owuire nakuwa awa ekierema, yaaya.

⁶Kutio kane, tutawa kiomo awantu wandi awagona, ni mutuazamuke kandi tuwe amiiso ameeru.

⁷Aeniki awantu awagona, wagona owuire, kandi awadung'a, wadung'a owuire.

⁸Ni aeniki ifwe turi awantu awa omuwasu, mutuwe amiiso ameeru. Mutuingizie okuganya no olugonzi ki ekia-iye ekirinda ekifuwa, kandi tuingizie ku omutwe okurindirra okutuukra owuinunuzi ki ekigudu ekia-iye.

⁹Ifwe Katonda ngakatulowola okuuza okutuswawuka no okusu kwae yawa, ni yatulowola kugere tutuukre owuinunuzi ni kuwitra ku Omwami iifu Yesu Kristo,

¹⁰owatufwira kugere kuwe mbwe turi awalamu namba ni tufwire, tumenye nae alala.

¹¹Kutio, muiambanie amaani kandi muikalangusanie omuntu no omwina waae, mala kiomo mukola mutio.

Ewilagirizio na amakeezio agatuukre

¹²Waamwifu, nyingeeno katio tuwaisasaama mbwe mutie awakangasi wiinyu awakola emirimo wukalu agati iinyu kandi awawalagirizia engira eya Omwami.

¹³Muwa-ee owuti owungi owutambuuke, no olugonzi olwa muni ku emirimo giawu egia wakola. Mumenye no owuolu omuntu no omwina waae.

- ¹⁴Waamwifu, tuwasawa mbwe musiagizie awantu awaikala-uikala awatakola emirimo, ni muambie amaani awantu awa emioyo giawu gifwa. Mutunzie awagata kandi musikie emioyo na awantu woona.
- ¹⁵Muwone mbwe awulao omuntu o-oloola owuwi ku amawi aga akoriirwe. Ne enyinga ziona, muwone mbwe mukorra awiina wiinyu alala na awantu woona geeza.
- ¹⁶Muwe no owusangaavu enyinga ziona
- ¹⁷kandi musawe Katonda aa mutareka.
- ¹⁸Mukubre Katonda otioo ku ewintu wiona aeniki ekio nikio ekia Katonda aagala ku inywe awantu awaganyire ku Kristo Yesu.
- ¹⁹Mutazimia omurro ogwa Omwoyo Omweru ogwa Katonda.
- ²⁰Mutatoola amang'ana aga owugambi wutono,
- ²¹ni mugeezaanie ewintu wiona. Muambirre wukalu ewintu ewilootu wiona,
- ²²ni muwe ale ne ewintu ewiwiiwi wiona.
- ²³Nsawa mbwe Katonda omwene, ori ng'ina owuolu, aganye muwe aweeru awatengeekwe mu engira ziona. Nawa kandi mbwe aganye arinde emioyo giinyu, enkolo ziinyu alala ne emiwiri giinyu giwe emieru egiwula ne ekiwi ekia gikawoolwako owuire owua okuirana okwa Omwami.
- ²⁴Katonda owawaeta arindre endagano yaae kandi aaza okukola otio.
- ²⁵Waamwifu, mutusawire Katonda.
- ²⁶Mutukeezizie waamwifu woona awari entulo eyo na amakeezio aga awada awagonzaanie.
- ²⁷Mbasikirra, ku eriina eria Omwami, mbwe ebaruwa eno esomerwe awantu woona awaganyire ku Katonda.
- ²⁸Owusiza owua Omwami iifu Yesu Kristo wuwe ni inywe.

2 Awathesaloniika

2 Awathesoloniika 1

Amakeezio agasookere

¹Ku awantu awari no kuganya ku Katonda Soifu no Omwami Yesu Kristo awari Thesaloniika, mbajojera ebaruwa eno inze Paulo ni ndi alala ni Siila ni Timotheo.

²Tusawa mbwe muwe no owusiza no owuolu owuema ku Katonda Soifu no Omwami Yesu Kristo.

Paulo asangaala na Awathesaloniika kandi awa-ambia amaani

³Waamwifu, kuri kulootu ni tuiranzia Katonda otioo enyinga ziona ku inywe; kuwene tusugaane tukole tutio aeniki okuganya kwinyu ku Katonda kukoma ni kugia emberi kandi olugonzi lwinyu mwona ku awiina wiinyu lwona lugia emberi okuiongerezia.

⁴Olutuunyo olwa mumiire okuwa nalwo no okuganya kwinyu okutadenga-denga ku eminyako-nyaako ne emidambo egia muwitamo no owusiani, kugera ni tuitumbula na amiina giinyu ku amakaniisa aga Katonda gandi.

⁵Kuwuene wino ne ewilago ewilagana mbwe Katonda akenga ekiina owuigoloole kandi wiiza okugera muwalwe ki awantu awasugaane okuwa mu Owuami owua Katonda, owua mwona mumiire okuwa ni munyaka-nyaakra.

⁶Kuwuene, Katonda ari omuigolovu kandi okwo kulagana mbwe awantu wona awatureetra emidambo ku okuganya kwifu, aaza akuwaoloola na awa-aa emidambo.

⁷Ni ifwe alala ni inywe awawona eminyako-nyaako aaza okutu wuluusia olwa Omwami Yesu arisasulwa na aema ku igulu na ari alala ne enyankoi wae awari na amaani.

⁸Awantu awataeere Katonda owuti alala na awataeere amang'ana amalootu aga Katonda ku Omwami Yesu owuti, wariswawuka mu omurro uguakaka.

⁹Awantu wano wariwona eminyako-nyaako egiriwamala egitariwua kandi wariteewua ale na asi aa Omwami ari, kandi na aa owunene owua amaani gae gari.

¹⁰Gano gari-ikola Owuire owua Omwami ari-irana okueewua owunene na awalowole wae kandi na agingiriziiwue kungulu agati ya awantu awamuganyireko alala ni inywe aeniki mwona mwaganya ku amang'ana aga twawalaga.

¹¹Gano nigo amang'ana agagera ni tuwasawira enyinga ziona mbwe Katonda awate muwe awantu awasugre no okuetwa okwa awantu wae kandi mbwe

atuusie okuagala kwinyu okulootu ne ewintu ewilootu ewia okuganya kwinyu kuagala mbwe mukole.

¹²Ni kuweere kutio eriina eria Omwami iifu Yesu rirituukra owunene okuwaemako kandi mwona murituukra owunene okumuemako nikulondokana no owusiza owua Katonda no Omwami Yesu Kristo.

2 Awathesoloniika 2

Okuirana okwa Omwami Yesu

¹Waamwifu, ku amang'ana aga okuuzza okwa Omwami iifu Yesu Kristo no okuikumia kwifu okuwa nae, ifwe tuwasawa mbwe

²mutafwa okuadada-uadada namba okuluguuziwua na amang'ana agawoolwa mbwe gaemere ku Omwoyo Omweru ogwa Katonda namba mbwe gaemere ku omunwa ogwa omuntu namba mbwe gasomerwe mu ebaruwa ziifu, agawoola mbwe owuire owua okuirana okwa Omwami Yesu wumiire okutuuka.

³Mutaganya omuntu wundi awasemerezie ne engira zindi yaaya, aeniki owuire owuo ngawurituuka ne erioga rikiari okuwaaao owukangaate, kandi no omuntu omwoni, owa Katonda aaza okuona amale, akiari okusasulwa awonekane kuwueru.

⁴Omuntu omwoni oyo aaza okulowa kandi aaza okuitumbula no okuigingirizia omwene kungulu okukira ekintu-ukintu ekietwa mbwe katonda namba ekisawua. Kutio aaza okuikala ku entewe eya mu ekaalu eya Katonda kandi aaza okuieta omwene mbwe ni iye Katonda.

⁵Mberi muesa okuingirizia mbwe ni nyawanga ni nkiari ni inywe, nyawalaganga amang'ana gano?

⁶Kandi mumanyire ekikiamuambiriire, kugere اساسulwe awoneke ne enyinga ziae zituukre.

⁷Amaani gae ago gario kandi gakola emirimo owuiwisi nyingeeno; ni mala no omuntu okiamuambiriire nyingeeno aaza okumurekera engira nikwo aaza okusasulwa awoneke.

⁸Nikuemao, omwoni aaza okusasulwa, no Omwami Yesu aaza okumutoola ku entewe amumale mala no omuuka uguema mu omunwa gwae. Lwona aaza okumuona awue chwe no owunene owua aaza okuirana nawuo.

⁹Okuuzza okwa omwoni oyo kuuza okuambaana ne emirimo egia Sataani egiiza okuilagana na amaani goona alala ne ewilago na amankono aga owuweeyi,

¹⁰kandi ne engira ziona ezia Ekikeeno ezia okusemerezia awantu awateeka, aeniki waalowa okugonzia owuene kugere wanunulwe.

- ¹¹Kutio, Katonda aaza okuganya amaingirizio gaawu gateeke chwe kugere wawe no okuganya ku ewintu ewia owuweeyi.
- ¹²Kugere awantu woona awawula no okuganya ku owuene, ni waaomereziwua mala ne ewintu ewitari ewiigolovu wakengerwe ekiina.
- ¹³No okuwa kwinyu mbwe muri awantu awa Katonda yalowola okuemera mu owutanikro kugere mununulwe ni kuwitra mu okueruyiwua no Omwoyo Omweru ogwa Katonda no okuganya ku owuene, kutunigirizia mbwe paka tuiranizie Katonda otioo enyinga ziona.
- ¹⁴Yawaeta okuwa otio ni kuwitra mu injiili eya twalanzianga kugere mwona mutuukre omugawo mu owunene owua Omwami iifu Yesu Kristo.
- ¹⁵Kutio waamwifu, muambe wukalu engerera eya twawagerera, ewe eya twawagerera ne eminwa giifu nakuwa eya twawagerera ne ebaruwa ezia twawajojera.
- ¹⁶Omwami iifu Yesu Kristo omwene alala ni Katonda Soifu owatugonzia kandi owa ku owusiza wuae yatu-aa okuoreziwua okwa omwoyo okutawua no okuwa no okurindirra okulootu,
- ¹⁷aoreezie emioyo giinyu, kandi awakalangusie mu enkola ziona na amang'ana goona amalootu.

2 Awathesoloniika 3

Paulo asawire mbwe wasawirwe Katonda

- ¹Owutuukre, waamwifu, mbasawa mbwe mutusawire Katonda kugere amang'ana aga injiili gailanzie wuangu kandi mbwe awantu waga-ee owuti mala kiomo inywe mwona mwaga-aa owuti.
- ²Kandi mbwe Katonda aturinde ni turi agati ya awantu awooni kandi awa ekikeeno aeniki ng'ani mbwe awantu woona wari no okuganya ku Katonda yaaya.
- ³Ni Katonda iye ngari omuweeyi yaaya. Aaza okuwakalangusia kandi awarinde okuema ku omwoni.
- ⁴Ni ifwe turi no owusiani ku inywe owuemera ku Omwami mbwe mukola kandi mukiaza okugia emberi okukola ewintu ewia twawasikirra mbwe mukole.
- ⁵Katonda na aganyire alagirizie, emioyo giinyu giwe egia olugonzi kiomo olwa Katonda, kandi muwe no olutuunyo kiomo olwa Kristo.
- ⁶Kutio, waamwifu, ku eriina eria Omwami iifu Yesu Kristo, tuwasikirra mbwe muwe ale na awantu awaikaale-uikala awatakola emirimo kandi awa owulamu wuawu wutalondokana ne engerera ezia mwatutuukrako.

- ⁷Aeniki inywe aweene mwona mumanyire kiomo kiri ekintu ekisugaane mbwe mulonde olunyaafwa olwa owulamu wuifu: ifwe ni twawanga ni inywe ngatukawanga ni tuikaale-uikala yaaya.
- ⁸Lwona, kuwulao okuria okwa omuntu okwa twaria tureka okuoloola; ni aa okukola otio, ifwe tuakolanga emirimo emikalu owuire no omuwasu kugere tutaaza twawaweera ki emisigo egiwa-aa owuzito.
- ⁹Ngatukakolanga emirimo otio mbwe twawulanga amaani aga okureka okukola yaaya, ni tuakola otio kugere tuwaweere ekilago ekilootu ekia okulonda.
- ¹⁰Ni twawanga ni inywe twawa-aa namba ensikirra ewoola mbwe “Omuntu oikaale-uikala otakola emirimo, ataganyirwa okuria.”
- ¹¹Ni, tuwurra mbwe awantu wandi ku inywe wamenyere owulamu owua okuikala-uikala ngawakola emirimo. Iwo ngawanyigire ne emirimo-umirimo ni wakola ewintu ewiwula ne emirimo.
- ¹²Ku eriina eria Omwami Yesu Kristo tuwasikirra kandi tuambia awantu awafwana watio amaani mbwe wamenye owulamu owulootu kandi warie oluuya lwawu.
- ¹³Ni inywe waamwifu, mutaaza mwaluya no okukorra awantu wandi geeza.
- ¹⁴Na ario omuntu olowa okulonda amang’ana aga tuwalagiriizie mu ebaruwa eno, ni mumumanyirizie geeza kandi mureke okuizogana nae kugere ensuuko zimurie.
- ¹⁵No omuntu ofwana otio otaaza waamutoola ki omuzigu waao, ni mumusiagizie ki wamwinyu.
- ¹⁶Mbasawira mbwe Omwami owa owuolu omwene awa-ee owuolu enyinga ziona mu engira ziona. Omwami awe ni inywe mwona.
- ¹⁷Inze Paulo, ni inze owajojera amakeezio gano na amakono gange omwene. Kino nikio ekilago mu ebaruwa ziange ziona, ni ntino inze njoja.
- ¹⁸Owusiza owuema ku Omwami iifu, Yesu Kristo, wuwe ni inywe mwona.

1 Awatimtheeo

1 Awatimtheeo 1

Amakeezio agasookere

¹⁻²Ku Timotheeo omwana wange mu okuganya okwa turi nakwo ku Kristo. Nkujojera ebaruwa eno, inze Paulo, omutumwa owa Yesu Kristo nikulondokana no okuagala okwa Omwami Katonda omununuzi iifu alala no okwa Yesu Kristo, omuntu owa tuteereko emioyo giifu giona. Nyagala mbwe Soifu Katonda no Omwami iifu Yesu wawe awasiza ni iwue, wakuambre amagongi kandi wakulage owuolu wuawu.

Okusiagizia awagerezi awa owuweeyi

(1Timo 4:1–7; Tiit 1:10–11; 3:8–11)

³Kiomo nyakulagirizia olwa nyawanga ni ngia Makedoonia mbwe oweere Efeeso, nyagala mbwe okole okuweera eyo, kugere osikirre awantu wandi eyo wareke okugerera engerera indi egawuuke ne eiifu.

⁴Lwona wagaanie wataaza wata amaingirizio gaawu ku eminayo, no okuwala waaguukwa okutawua. Wino wireeta mala okuikululana mu amang'ana okutatunzia omuntu-umuntu kandi okutatuusia okuagala okwa Katonda, okwa awari no okuganya ku Kristo eng'ene niwo awaesha okutuusia.

⁵Ekineene ekia owulagirizio wuifu wuno wureeta, no okuwa no olugonzi oluema mu omwoyo omulootu, omwoyo ogumanyire okugawula ewilootu ne ewiwiiwi, alala no okuwa no okuganya okuri kuwene.

⁶Awantu wandi wamiire okureka engerera zino, wagaluka waingira mu entaka eziwula ne emirimo.

⁷Wagala okuwa awagerezi awa ensikirra ezia Katonda, kukawa mbwe ngawamanyire ewintu ewia wagamba-gambako nakuwa amang'ana aga wawoola no owusiani.

⁸Ni tumanyire mbwe ensikirra ndootu ne ekorrwe nayo mu engira endootu.

⁹Lwona tumanye mbwe ensikirra ngazikateerwao awantu awigolovu, ni ziateerwao awantu awatatiire ensikirra na awa ekimage, awatatiire Katonda na awooni. Kandi ziateerwao awataganyire ku Katonda na awagamba-gamba uwiiwi ku Katonda, awaita waaswawu ni waang'inwawu, awiisi na

¹⁰awasondo. Lwona ziateerwao awantu awaitala na awakazi nakuwa na awasaaza awiina waawu, awaguzi awa awantu na awaweeyi, awaifuuwa wusaasa alala na awakola ewindi wiona ewitalondokana ne engerera endootu eya Kristo.

¹¹Engerera eituukrana mu amang'ana amalootu agalagana owunene owua Katonda osugre no okutondowolwa. Katonda yata amang'ana amalootu gano mu amakono gange kugere ngalage awantu.

Paulo aikaziizie Katonda ku owusiza wuae

¹²Nyiranizia Omwami iifu Yesu Kristo, omiire okumpa amaani, otioo ino aeniki yantoola ki omuntu osugre, okwagera anta mu emirimo giae.

¹³Yankorra otio kukawa mbwe kale nyawanga ni mugamba-gambako uwiiwi, ni nyaasia awaawanga ni wamuganyireko kandi nyawanga omululu pe. Kukawa kutio, nya-ambrwa amagongi aeniki nyakolanga ewio mu okutamanya ni mbula okuganya ku Yesu.

¹⁴Omwami Katonda yandaga owusiza wuae owungi owuluguulwa kandi yampa omwoyo ogwa okugonzia awantu alala no okuwa no okuganya ku iye. Wino wituzra ni turi mu owulala ni Kristo Yesu.

¹⁵Olugambo oluwoola mbwe, “Yesu Kristo yaaza ku ekialo kugere anunule awooni” luri kuwuene kandi awantu woona wasugaane waganye nalwo. Inze omwene ni inze omwoni omunene okukira awooni wandi woona.

¹⁶Ni Katonda yampambra amagongi kugere ni kuwitra ku inze, omuntu omwoni omunene okukira awooni wandi woona, Yesu Kristo alagane owuorevu wuae na awooni, awaazanga okumuganyako kugere woona watuukre owulamu owutariwua ku iye.

¹⁷Katio Katonda Omwami owa amiire goona, Katonda omulala eng’ene otafwa kandi otawonwa aeewue owunene no owuti amiire goona. Amin.

¹⁸Timotheo mwana wange, nku-aa ensikirra eno, ewurzania na amang’ana aga awagambi waakugamba-gambako mbwe gaaza okukuikorra. Gaingizie kandi londokana nayo kugere olwanagane geeza na awagerezi awa owuweyi.

¹⁹No okola otio, otareka okuwa no okuganya alala no omwoyo ogutakukengera ekiina. Wario awantu awamiire okulowa amang’ana gano kandi waona okuganya okulootu okwa waawanga nakwo.

²⁰Walala ku awantu awo ni Imanuusi ni Aleksanda, awantu awa miire okureka mu amakono aga Sataani kugere waigerere owuwi owua okugamba-gamba uwiiwi ku Katonda.

1 Awatimtheo 2

Kiomo Awakristo wasugaane wasawe Katonda

¹⁻²Kutio, owusookere, nyagala mbwe muwe ni muingirizia awantu woona, ni ino-ino awaami alala na awakangasi woona. Muwaisasaamre ni muwasawira, lwona muwaiembere ni muwaikazizia Katonda. Okwo kuuza okugera tumenye mu owulamu owuolu owuwulamo erioga mu owulongoole no owuti.

³Kuno kulootu kandi kusangaazia Katonda omununuzi iifu,

⁴oagala mbwe awantu woona wanunulwe kandi wamanye igerera eria kuwuene ku Yesu Kristo.

⁵Katonda ari omulala eng'ene kandi omuntu oreeta empurizanio agati ya Katonda na awantu ari omuntu omulala eng'ene.

⁶Omuntu ono ni Kristo Yesu, owaifumia iye omwene okufwira ekialo kugere awantu woona wasiwulwe mu amawi. Kino ne ekilagano mbwe Katonda yagalanga okununula awantu woona, ekiaikola olwa enyinga ezia Katonda yataao ziatuuka kuwuene.

⁷Kandi nikio ekiagera ni ndowolwa ki omutumwa owa Yesu Kristo kandi omulanzi, kugere mbe omugerezi owa awatari Awayaudi, ogerera amang'ana agari kuwuene aga okuwa no okuganya ku Kristo. (Ni mboola otio ng'ambeeya, ni mboola ekiri kuwuene.)

⁸Kutio asi-uasi aa muikumiizie okusawa Katonda, nyagala mbwe awekisaaza wasawe Katonda ni wagingre kungulu amakono ameeru agatakola owuoni ni wawula no okusu namba olusoolo no omuntu.

⁹Nintio lwona nyagala mbwe awekikazi waiwoye mu engira endootu elagana owuti. Watawa-uwa awantu awasuka emwiri nakuwa awaiwooye enguwo ezia iguzi eria kungulu namba awaiwoya ewintu ewia edhaabu ne ewindi ewing'ena ng'ena ewia amasendi amangi.

¹⁰Ni, wasugaane waingizie enkola endootu ezisugre na awakazi awaieta mbwe wari awalongoole.

¹¹Omukazi asugaane ategerezie kandi asarigire enyinga ezia amang'ana aga Katonda gagererwa, na aiisiizie ansi.

¹²Inze omwene ng'anganyire omuntu owekikazi okugerera nakuwa okuwa na amaani ku awasaaza ni paka wasarigire.

¹³Kane Adaamu ng'anio owasooka okulukwa, Aawa na akiari?

¹⁴Lwona ng'ano omukazi, otari Adaamu, nio owasemereziwua nawuno agwa mu owuoni?

¹⁵Ni kukawa kutio, omukazi aaza okununulwa na arindre omugawo ogwa omwiwuzi owa awaana, na akorre olutuunyo mu okuwa no okuganya, okuwa no olugonzi na awantu no owulamu owuitengeeke, alala no okumenya owulamu owulagana owuti.

1 Awatimtheo 3

Awakangasi awawarra owulala owua Awakristo

(Tiit 1:5–9)

¹Ni kuwuene mbwe omuntu oogala okuwa omukangasi owarra owulala owua Awakristo, aagala emirimo emilootu ino.

²Kutio, owarra owulala owua Awakristo paka awe omuntu owula ne ekintu-ukintu ekiwiiwi ekia akawoolwako. Asugaane awe omusaaza owa omukazi

omulala kandi omanyire okugawula amang'ana geeza. Lwona asugaane awe omuntu oirindre mu enkola ziae, ogonziizie okuingizia awageni kandi oeerwe owuti. Paka awe omuntu omanyire okugerera geeza.

³Ataaza yawa omuntu omunywi nakuwa omuntu ogonziizie iiye, na asugaane awe omuntu omuolu, otagonziizie okusoolana na awantu kandi otagonziizie amasendi.

⁴Lwona paka awe omuntu orindre omugizi gwae geeza, owona mbwe awaana waae wamuwurra mu engira ziona kandi mbwe wari no owuti ino.

⁵Aeniki omuntu otarindre omugizi gwae geeza akarinda otie owulala owua awantu awa Katonda?

⁶Ataaza yawa omuntu onunuulwe ampi, aeniki omuntu ki oyo aesa yawa no okuitumbula mu omwoyo gwae, mala yakengerwa ekiina ekia Sataani yakengerwa.

⁷Asugaane awe omuntu ori ne eriina ilootu namba ku awantu awatari Awakristo kugere watumurega. Okwo kuuza okugera areke okuingra mu emiweto egia Sataani.

Awatunzia awakangasi awa owulala owua Awakristo

⁸Awantu awatunzia awakangasi awawarra owulala owua Awakristo wona wasugaane wawe awantu awaerwe owuti, awatari awa endimi iwiri, nakuwa awanywi. Watawa awantu awagonziizie okutuukra ewintu nakuwa amasendi mu engira embiiwi.

⁹Lwona wasugaane wawe awantu awa-ambiriire owuene owua okuganya ku Kristo ne emioyo emiigolovu.

¹⁰Ni wakiari okueewua emirimo, wasugaane wawarrwe geeza, aa ni wawula ekintu-ukintu ekiwiiwi, nikwo waeewue emirimo egio.

¹¹Awakazi waawu wona nintio wasugaane wawe awakazi awa enkola endootu awatawoola-woola awantu, ni wawe awamanyire okugawula amang'ana geeza kandi awa awantu waganyire nawo.

¹²Awantu awatunzia awakangasi awawarra owulala owua Awakristo wasugaane wawe awasaaza awa awakazi walala-lala, kandi awarindre awaana ne emigizi giawu geeza.

¹³Awatunzi awakola emirimo giawu geeza wawa na amiina amalootu kandi wawa no owusiani mu okuganya okwa wari nakwo ku Yesu Kristo.

Ekintu ekinene mu okuganya kwifu

¹⁴Kukawa mbwe nyingirizia okukuuzako eyo wuangu ano,

¹⁵ni nkujojera ebaruwa eno kugere namba ni nkindre okutuuka, awa mu enyumba eya Katonda wawe ni wamanyire kiomo wasugaane wamenye. Awa mu enyumba eya Katonda niwo ekaniisa eya Katonda omulamu, eri ensimbirro kandi empango eya amang’ana aga Katonda agari kuwuene.

¹⁶Kuwuene, amang’ana aga Katonda amiire okutusasurra gari amakaate kandi gari kuwuene aa awulao omuntu oesa okulowa mbwe: Kristo yaaza no omuwiri ogufwanana no ogwa omuntu, Yalaganiwua no Omwoyo Omweru ki owula no owuoni. Enyankoi ziamuwona kandi eriina riae rialanziwua asi-uasi mu ekialo, kugera awantu wamuganyako mu ekialo. Owutuukre, yatoolwa airwa ku igulu no owunene.

1 Awatimtheeo 4

Engerera ezia owuweeyi

¹Omwoyo Omweru awoola geeza mbwe mu owutuuko, wario awantu wandi awaaza okugaluka wareke okuganya okwa wari nakwo ku Kristo, ni walonda engerera ezia owuweeyi eziema ku ewikeeno.

²Engerera zino zilanziwua na awaweeyi awasemerezia awantu, awa emioyo giawu egia okugawula ewiwiiwi ne ewilootu giaoneka ki egizinrwe ne ewiuma ewiyu le.

³Wagaania awantu mbwe watakwezana lwona wataria ewiokuria windi ewia Katonda omwene yalukra awantu awari no okuganya kandi awamanyire owuene owuri mu amang’ana gaae okuria, ni wamuiranzia otioo.

⁴Ewintu wiona ewia Katonda yaluka wilootu, kutio kiwulao ekia omuntu asugaane azire na aikaziizie Katonda na akiari okuwiria,

⁵aeniki amang’ana aga Katonda alala no okusawa kuwieruyia kugere witazirwa.

Owemirimo omulootu owa Yesu Kristo

⁶No ogereere awari no okuganya ku Yesu ewintu wino, ooza okuwa owemirimo owa Yesu Kristo omulootu ino. Ooza okukalanguka mu okuganya okuri kuwuene ne engerera endootu eya omiire okuwa no olonda.

⁷Wa ale ne entaka ensaasa ne eminayo egia awakungu egiwula ne emirimo, ni kola wukalu owe no owulamu owusugre emberu wa Katonda.

⁸Kukawa mbwe okudaanyuula omuwiri kulootu mu engira zindi, owulamu owuigolovu wulootu mu engira ziona aeniki wuri no omugawo mu owulamu owua reero kandi mu owulamu owuuzwa wuona.

⁹Amang’ana gano gari kuwuene kandi awantu woona wasugaane waganye nago.

¹⁰Kutio twona tukola wukalu okugalonda, aeniki tuteere emioyo giifu ku Katonda omulamu ori Omununuzi owa awantu woona, ni ino-ino awantu awamuganyireko.

- ¹¹Sikirra kandi gerera awantu amang'ana gano.
- ¹²Otaganya omuntu akurege mbwe aeniki okiari omuwuuka. Ni kola wukalu owe omufwano omulootu ku awaganyire ku Yesu mu okugamba-gamba kwao, enkola yaa, olugonzi, okuganya kwao, ni mu owulamu owueru.
- ¹³Toola enyinga ziao okusomera awantu amang'ana aga Katonda owuyanga, okulanzia alala no okugerera amang'ana amalootu aga Katonda. Kola otio nawuno nyize.
- ¹⁴Otaaza waareka okukola ne empanwa eya waeewua olwa wagambwako olwa owulala owua awagaaka awa Awakristo waakutaako amakono.
- ¹⁵Kola ewintu wino no owiteereko omwoyo kugere awantu wona wawone no ogia emberi geeza.
- ¹⁶Iwarra kandi owarre ewintu ewia ogerera geeza, aeniki no okorre otio ooza okuinunula iwue omwene na awantu wona awategerezia ewintu ewia ogerera.

1 Awatimtheeo 5

Igerera ku awakazi awafwire, awagaaka na awagule

- ¹Otaaza wasiagizia omuntu mukulu no okusu, ni mugamba-gambre mpoola kiomo okagamba-gambra swao. Toola awazia na awaala ki waamwinyu,
- ²na awakazi awakulu ki waang'inwao, no olagana owueru owuwulamo okuikonya-konya.
- ³Awakazi awafwire, awari awafwire kuwene aeniki wawula no okawatunzia, wa-ee owuti ino.
- ⁴No omukazi omufwire ori na awaana nakuwa awiizukulu, awaana awo wasugaane waigerere okukola emirimo egia okutunzia awakazi awafwire awari mu emigizi giawu, kiomo awaganyire ku Katonda wasugaane wakole. Ku okukola otio waoloola awiiwuzi waawu namba waaguukwa waawu ku okuwakomia, kandi ekio kisangaazia Katonda ino.
- ⁵Omukazi omufwire kuwene, no osigaale omwene owula okamutunzia. Iye atoola amaingirizio gaa goona yata ku Katonda, kutio owuire no omuwasu awa na asawa na aisasaama Katonda, aa atareka.
- ⁶No omukazi omufwire ogonziizie mala ewintu ewimu-aa owusangaavu iye omwene enyinga ziona, iye kukawa mbwe akiari omulamu agenda-genda, ni yamala okufwa kale.
- ⁷Laga awantu amang'ana gano kugere nyanga watatuukrwa no owuwi.
- ⁸No omuntu olowere okutunzia awaganda waae, ino-ino awa mu enyumba yaae omwene, amiire okulowa okuganya okwa turi nakwo kandi ari omuwiiwi okukira namba omuntu otaganyire ku Katonda.

- ⁹Otaaza wata omukazi-umukazi okiari okutuusia emiaka amakumi mukaaga mu embala eya awakazi awafwire. Lwona paka awe omukazi owa olugendo olulootu kandi owakwewua no omusaaza omulala eng'ene kandi owa enkola endootu.
- ¹⁰Omukazi oyo paka awe owa awantu wamanyire mbwe yanala mu enkola endootu kiomo okukomia awaana waae geeza, okugonzia okuingizia awageni, okukorra Awakristo emirimo egia ansi kiomo egia okuoza amagulu kandi okutunzia awiina waae awari ne emidambo. Paka awe ori owuyanga okukola ewintu ewilootu mu engira ziona.
- ¹¹Otaganya waingizia amiina aga awakazi awafwire awakiari awatono mu ebuuki egingre amiina aga awakazi awafwire, aeniki wano, no okuagala okwa omuwiri kuwakirre, wareka engira ezia Kristo waagwa okuagala awasaaza kandi.
- ¹²Okwo kugera Katonda awaswawuka aeniki waona endagano eya waamala okuingiramo.
- ¹³Owugawuuke na ago, waigerera okukola-ukola wusaasa ni waluga-luga mu amayumba. Ng'ane ekio kieng'ene, ni waweerako ni wawoola-woola awantu kandi waingira mu amang'ana agatari agaawu. Lwona wafwa okuwoola amang'ana agawatasugre okuwoola.
- ¹⁴Kutio inze omwene mbona mbwe awakazi awafwire awakiari awatono, kulootu ni wakwerwe, waiwule awaana kandi waikale wawarre emigizi giawu geeza. Okwo kuuza okuima omuzigu iwaga eria okutuingirra ifwe awaganyire ku Kristo.
- ¹⁵Ee, awandi wamiire okureka engira, walonda Sataani.
- ¹⁶Na ario omukazi Omukristo ori no omukazi omufwire engo waae, asugaane amwarre kugere owulala owua awantu awa Katonda wutawona owuzito, ni wuwarre awakazi awari awafwire kuwuene, awawula na awantu awaesa okuwatunzia.
- ¹⁷Awagaaka awa owulala owua Awakristo awakangatra awantu geeza, ino-ino awakola emirimo egia okulanzia no okugerera amang'ana amalootu aga Katonda, wasugre no okuoloolwa kawiri.
- ¹⁸Kuri kutio aeniki namba endagano ewoola etino, "Enyinga ezia okola ne eng'ombe mu okuwuula emere, otagisiwa omunwa." Lwona ewoola mbwe, "Owemirimo asugaane okuoloolwa ku emirimo giae."
- ¹⁹Otaaza watoola ekintu-ukintu ekiwiiwi ekiwoorrwe ku omukangasi owa awantu awa Katonda mbwe kiri kuwuene, no okiari okukiwurra ku awantu awatakeeyire wawiri nakuwa wasatu.
- ²⁰Ni na ario omukangasi ogia-ugia emberu okukola owuoni, musiagizie emberu wa awantu kugere awandi watie.

²¹Nkusikirra emberi wa Katonda ni Yesu Kristo alala ne emberi wa enyankoi waae awalowole mbwe orinde amang'ana gano kandi okorre awantu owuagani, aa otatiire amiiso aga omuntu.

²²Ota-azakana okuta amakono gaao ku omuntu kugere otaingira mu owuoni owua omuntu wundi wusaasa. Irinda owe omweru mu ekintu-ukintu ekia okola.

²³Otaweerako no onywa-unywa amanzi geng'ene, ni toolangako edivaai esugre waanywa kugere ekutunzie ku enda ekunyaasia alala na amalwire aga kusa-kusa.

²⁴Amawi aga awantu wandi gamanyika wuangu kandi awantu wamanyire mbwe gasugre ne ekiina, na amawi aga awandi gatoola amiire okumanyika.

²⁵Nintio lwona enkola endootu zimanyika, ni namba ni zitamanyiike, ngaziesa okuiwisa ku amiire amangi.

1 Awatimtheo 6

¹Awagule Awakristo wona wasugaane wa-ee awantu awawakorra emirimo owuti ino kugere awantu watagamba-gamba uwiiwi ku eriina eria Katonda alala ni igerera riifu.

²Awakorra Awakristo wataaza waareka okuwalaga owuti aeniki awawakorra wari Awakristo, ni wasugaane wawakorre emirimo namba geeza okukira, aeniki emirimo giawu egio gitunzia awada waawu ku Katonda awa wagonziizie. Gano nigo amang'ana aga iwue osugaane ogerere kandi olagirizie awantu.

Igerera eria owuweeyi no owunyazi owuri kuwue

³Na ario omuntu ogerera amang'ana agagawuuke kandi otaganyana na amang'ana aga Omwami iifu Yesu Kristo agari kuwue, igerera eri-ira awantu mu okumenya owulamu owulootu

⁴emberi wa Katonda, omuntu oyo aizuule no okuitumbula kandi ngamanyire ekintu-ukintu. Ari no okuagala okuwiiwi okwa okuingra mu ensoolo ne entaka enkalu bere. Ni wino wireeta mala, iyari, na amae, na amanyego, no okuingirizia okuwiiwi ku omuntu,

⁵no okutawurizania okutawua agati ya awantu, no okuingirizia okuoneeke, alala no okutamanya ekiri kuwue. Iwo waingirizia mbwe okumanya Katonda ne engira eya okutuukra owunyazi.

⁶No okumenya owulamu owulootu emberi wa Katonda, no owunyazi ino, ku omuntu owa omwoyo gwae gusugre ne ewia ari nawio.

⁷Kane ekia twaza nakio ku ekialo kuno, nakuwa ekia turigia nakio niki?

⁸Kutio ifwe ni turi no okuria ne enguwo ezia okuiwoya, ewio witusugre.

⁹Awantu awagala owunyazi owungi, iwo wakirwa ni waingiire mu okugezaaniwua, kandi wagwa mu omuweto. Wakola ewintu ewia owumaya

lwona wawa no okuagala okuwiiwi ino. Wino wiona ne ewintu ewireeta mala okuoneka ilala.

¹⁰Aeniki okugonzia amasendi niwuo owutanikro owua amawi goona. Wario awantu awangi awa ku okuagala amasendi, wamiire okureka namba okuganya kwawu ku Katonda kandi waireetra emidambo egiluguulwa.

Paulo akengeere Timotheo amagezi

¹¹Ni iwue Timotheo omuntu owa Katonda, rumuka oeme mu ewintu wino wiona. Ta omwoyo gwao ku okuagala okuwa omuigolovu, kandi ku okuwa omuntu omenyere owulamu owulootu emberu wa Katonda. Lwona aagala okuwa no okuganya no olugonzi, okuwa omuntu owa olutuunyo kandi omuolu.

¹²Lwanagana geeza mu okuganya, okire amaye agaazra awantu awari no okuganya ku Kristo kugere otuukre owulamu owutariwua. Owulamu owuo niwuo owua waeterwa olwa wawoola emberu wa awantu awangi mbwe ori no okuganya ku Yesu.

¹³Kutio nkusikirra emberu owa Katonda oesania ewintu wiona mu owulamu, kandi emberu wa Yesu Kristo owawoola geeza ekiyawanga emberu wa Pontias Pilaato,

¹⁴mbwe paka orinde ensikirra zino geeza, zitawa ne embala namba ekintu-ukintu ekiwiiwi ekia omuntu akaziwoolako. Gia emberu okukola otio nawuno okuirana okwa Omwami iifu Yesu Kristo kutuuke.

¹⁵Katonda osugre no okutondowolwa, omunene otuukre, Omwami owa awaami kandi omukangasi okirre woona, aaza okugera kino kiikole mu enyinga ezia yamala okutaa.

¹⁶Katonda, owa eng'ene nio ori no owulamu owutariwua, omenyere mu owueru owudangaazia kandi owa awulao omiire okumuwona namba orimuwona, aewue owuti no owunene. Amin.

¹⁷Laga awanyazi mu ekialo ekia nyingeeno kino mbwe wataitumbula, lwona watata emioyo giawu ku owunyazi owuwua wuno. Aa okukola otio, wasugaane wate emioyo giawu ku Katonda otu-aa ewintu ewigera ni tuwa awantu awasangaavu mu owulamu wuifu.

¹⁸Walagirizie wakole ewintu ewilootu kandi wawe awanyazi mu enkola endootu. Wawe awaani kandi awari owuyanga okusangirizia ewintu na awiina waawu.

¹⁹Ni wakorre watio, waiwiikra ewilootu ewiriwaweera ki ensimbirro mu amiire agaaza. Ekio kirigera watuukre owulamu, owuri owulamu kuwue.

²⁰Ee, Timotheo, rinda ewintu wiona ewimiire okuteewua mu amakono gaa. Rekana ilala na amang'ana amasaasa aga ekialo alala no okuikululana mu amang'ana amakalu bere okwa awandi watoola mbwe no owuganga, ni ngakuri kutio yaaya.

²¹Awantu wandi wamiire okuteesia okuganya kwawu okulootu ni walonda engerera embiiwi eno. Owusiza owua Katonda wuwe ni inywe.

2 Awatimtheeo

2 Awatimotheeo 1

Amakeezio agasookere

¹⁻²Ku Timotheeo omwana wange owa ngonziizie. Nkujojera kandi ebaruwa eno inze Paulo, omutumwa owa Yesu Kristo nikulondokana no okuagala okwa Katonda. Katonda yantuma, kugere ndanzizie awantu amang'ana aga owulamu owua yamala okuifuuwa okutu-aa ni kuwitra ku okuwa kwifu mu owulala ni Yesu Kristo. Katonda alala ni Kristo Yesu wawe awasiza ni iwue, wakuambre amagongi kandi waku-ee owuolu wuawu.

Paulo aikazia Katonda

³Ni nkuingirizia enyinga ziona ni nsawa, nyirania otioo ino ku Katonda owa nsawa no omwoyo gwange gutankengera ekiina. Katonda ono nio owa waaguukwa wiifu waakorranga.

⁴Nyagala okukuwona ino kugere omwoyo gwange guizule ne ekisangaalo, aeniki amiiga gandia ni iwue ino ni nyingiriizie amaziga gaao.

⁵Lwona nyingirizia okuganya okuri kuwue ne okwa ori nakwo ku Kristo, okwa guukwa waa Loisi ni ng'inwao Yunia waawanga nakwo kandi manyire kuwue ne mbwe ori nakwo na reero.

Paulo a-ambia Timotheeo amaani

⁶Kutio nkuizurizia mbwe ogie emberu okukola ne empanwa eya Katonda yaku-aa olwa nyakutaako okukono, e-eeme ki omurro oguwutirra.

⁷Aeniki Katonda ngakatu-aa omwoyo ogugera ni twawa awantu awati yaaya, ni yatu-aa omwoyo ogugera ni twawa na amaani, no olugonzi alala no okumenya owulamu owuirindre.

⁸Kutio otasuuka okuwoola ewia omanyire ku Omwami iifu, lwona otasuuka okulagana mbwe ori mu owulala ni inze ori mu owusiwe ku okukola okuagala kwae. Ni toola oluwaala lwao mu okunyaka-nyaakra amang'ana gaae amalootu, no okola na amaani aga Katonda omwene aesana.

⁹Katonda nio owatununula kandi atueta no owuesani owuitengeeke ku okuagala kwae omwene kandi ku owusiza wuae owua yatu-aa ni kuwitra ku Kristo Yesu, namba ne ekialo kikiari okuwaa, ni ng'ani ku enkola ziifu endootu, yaaya.

¹⁰Owusiza wuno katio nyingeeno wutufumiire ni kuwitra ku okuuzwa okwa Omununuzi iifu Kristo Yesu, owakira olumbe. Yesu nio owatulaga ekia owulamu owutariwua wuri kuwue, ni kuwitra ku amang'ana gaae amalootu.

¹¹Katonda yandowola okuwa omuyaazi, omutumwa kandi omugerezi owa amang'ana gaae amalootu gano,

¹²kandi ekio niki ekigera ni nyaka-nyaaka otino. Ni mbula ensuuko, aeniki manyire owa nganyreko kandi manyire kuwuene mbwe ari na amaani aga okurinda ewia muteriire mu amakono nawuno owuire owua owutuuko.

¹³Londokana na amang'ana agari kuwuene aga wawurra ni ngerera kandi isimbiizia mu okuganya no olugonzi, agari agiifu ku okuwa mu owulala ni Kristo Yesu.

¹⁴Rinda geeza engerera eri kuwuene eya Omwoyo Omweru otumenyeremo yakuteera mu amakono eno.

¹⁵Omanyire mbwe Awakristo wona awa mu ekitemo ekia Eesia, ekigingre waawu Fijeeli ni Amojeeni wansomooke.

¹⁶Nsawa Katonda mbwe alage enyumba eya Onesporaasi owusiza wuae aeniki yaweerangako na anyambia amaani kusa kandi ngakasuuka mbwe ndi mu owusiwe,

¹⁷no olwa yatuuka-utuuka Rooma otino, yaanyagala nawuno antuukra.

¹⁸Nsawa mbwe Omwami amulage owusiza wuae owuire owua owutuuko. Kuwuene omanyire geeza mbwe yantunzia kuwungi ni nyawanga Efeeso.

2 Awatimotheo 2

Owa-iiye omulootu owa Kristo Yesu

¹Ni iwue mwana wange, wa omukalangufu mu owusiza owua tutuukra ku Katonda mu okuwa kwifu mu owulala ni Kristo Yesu,

²kandi ta ewintu wiona ewia wamiire okuwurra ni ngerera emberu wa awantu mu amakono aga awantu awamanyiike mbwe warinda endagano, kugere iwo wona wagerere awandi.

³Wa ni ifwe alala mu okuwona eminyako-nyaako gino ki owa-iiye omulootu owa Kristo Yesu.

⁴Awulao owa-iiye omiire okufumira iiye, owa kandi ainyonkoonia na amang'ana aga omugizi, aeniki okuagala kwae okuneene kuri okusangaazia omukangasi owamu-aa emirimo.

⁵Lwona, omuntu ogiire okudiewana embiro ngaesa yaewua owukire na atalondokaane ne endagirra ezia embiro.

⁶Omurimi orimire wukalu nio osugaane atuukre omugawo gwae ku emere esooka okugeswa.

⁷Ingirizia ino ku ewintu ewia nkulaga wino aeniki Omwami Katonda aaza okuku-aa amaganga aga okumanya ewia wilagana wiona.

⁸Lwona ingirizia amang’ana amalootu aga ndanzia ku Yesu Kristo omuizukulu owa Daudi owa Katonda yaziusia aema ku awafu.

⁹Okulanzia amang’ana amalootu gano kugera ni nyaasiwua kandi ni nsiwua ne eminyororo ki omuntu okorre owuoni owunene owuluguulwa. Ni kukawa kutio amang’ana aga Katonda ngagaesa okusiwua.

¹⁰Kutio ekio kigera nsikiizie omwoyo ku ewintu ewiwiiwi wiona ewinyiikorra, okutunzia awalowole awa Katonda kugere woona watuukre owuinunuzi owuituukrana ku Kristo Yesu alala no owunene wuawuo owutawua.

¹¹Amang’ana gano gari kuwuene: “Ni tufwire ni Kristo, tuuza okuwa awalamu nae.

¹²Ni tukorre olutuunyo, tuuza okurinda nae ekialo. Ni tumulowere mbwe ngatumumanyire, oona aaza okutulowa mbwe ngatumanyire.

¹³Ni, ni tutarindre endagano, iye akiarindre-urinda endagano, aeniki ngaesa okuilowa omwene yawa.”

Owemirimo owa Katonda aganyire nae

¹⁴Izurizia Awakristo amang’ana gano kandi wasikirre emberu owa Omwami mbwe warekane no okulwanra amang’ana aeniki okwo ngakutunzia ekintu-ukintu ni kuona-uona mala emioyo egia awantu awawategerezia.

¹⁵Kola wukalu kugere owe omuntu owa Katonda aganyire nae ki owemirimo osugre, owula ne ensuuko ku emirimo egia akola kandi ogerera owuene owuri mu amang’ana gaa mu engira eri kuwuene.

¹⁶Wa ale ne entaka ezitasugre emberu wa Katonda, aeniki zigera awantu ni wasonga okuwa ale no owulamu owua Katonda aagala.

¹⁷Amang’ana aga wawoola ago gafwanana ne ewisonga ewitaona ewinyaatuuke ku omuwiri. Awandi ku awantu awamiire okuwa ni walanzia amang’ana ago ni Umanuusi ni Filetuusi,

¹⁸awagerera awantu mbwe Katonda yamala okuziusia awantu okuema ku awafu. Kuno kugera emioyo egia Awakristo wandi gioneka kandi wareka okuganya ku Kristo, ni no owuweeyi wusa.

¹⁹Ni kukawa kutio, owulusa owua Katonda amiire okutaa ngawutenga-tenga kandi wujojerweko wutino, “Omwami amanyire awari awaae” kandi mbwe, “Omuntu-umuntu osawa Omwami, paka agaluke areke owuoni ilala.”

²⁰Omwa omunyazi, otuukramo ewintu ewiriirwako ewilongrwe ne ewintu ewigawuke-gawuuke kimo edhaabu, ne efeedha, ewiwanzrwe ku emiti alala ne ewiumbrwe ni ilowa. Ku ewintu wino, ewindi wiwiikiirwe emirimo emilowole ne ewindi wikolwa nawio na awa ku omugizi.

²¹Nintio kwona kuweera omuntu oieeruuyie okuema ku ewintu ewiwiiwi. Oyo Katonda aaza okumu-aa emirimo giae emilowole. Aaza okufwanana ne ekiemirimo ekitengeekwe ekirinda-urinda omwene enyumba okukorra emirimo emilootu egigawukane-gawukaane.

²²Kutio, lowa wukalu enkola embiiwi ezia owuana wuto. Ta omwoyo gwao okuagala okuwa omuigolovu, okuwa no okuganya, okuwa no olugonzi alala no okuwa no owuolu na awantu, kiomo awantu awasawa Omwami Katonda ne emioyo emieru wakola.

²³Wa ale ne entaka ezia owusiru ezitasugre okuwurrwa, aeniki omanyire geeza mbwe entaka ki ezio zireeta mala ensoolo.

²⁴Kiomo omanyire mbwe owemirimo owa Katonda ngasugaane awe omusoolani, ni paka awe omusiza na awantu wooka, kandi omanyire okugerera geeza kandi owa omwoyo gwae gutafwa wuangu.

²⁵Kandi na airania awantu awamulwanya ku engira, akola otio no owuolu na ari no okumanya mbwe andi Katonda aaza yawa-aa iwaga eria okugaluka kandi wamanye owuene owuri mu amang'ana gaae.

²⁶Ni wakorre watio, wakamizuka ku omuweto ogwa Ekikeeno, ogwa Ekikeeno kiawa-amba nagwo kandi kiwata mu okukola okuagala kwakio.

2 Awatimotheo 3

Enkola embiiwi ezia amiire aga owutuuko

¹Ni nyagala omanyere mbwe mu amiire aga owutuuko, eminyako-nyaako eminene giriwaao.

²Awantu wari-igonzia aweene, wariwa awa oguriira ogwa amasendi, awaitumbula kandi awa ekitigi. Wariwa awanyegi awa awantu, awatategerezia awiiwuzi, awatawona ekilootu ekia wakoriirwe kandi awataeere Katonda owuti.

³Wariwa awantu awawula no olugonzi, awatareka amang'ana, awawooli awa awantu, awawula no okuirinda mu enkola ziawu, awalulu owukaka kandi awataagala ekintu-ukintu ekilootu.

⁴Wariguzia awiina waawu ku awazigu kandi wariwa awaazakana okukola ewintu ni wataingiriizie. Wariwa awantu awaizuule no okuitumbula, awagonziizie ewisangaalo ewia ekialo okukira kiomo wagonziizie Katonda.

⁵Waagala ino mbwe awantu wawawone ki awantu awamanyire Katonda ni walowa amaani agareetwa no okumanya Katonda, kutio wawula nago. Nyagala owe ale ino na awantu ki awo.

⁶Awandi ku iwo niwo awagia mu emigizi egia awandi ni wasemerezia kandi ni wata awakazi awasiru awa emioyo egidoowere ne emisigo egia owuoni kandi awakangatiirwe no okuagala okugawuke-gawuuke okuwalonda.

⁷Kukawa mbwe awakazi wano wawurra engerera enyingi ino, ni ngawaesa okumanya owuene owuri mu amang'ana aga Katonda.

⁸Mala kiomo Janeesi ni Jabreesi waalwania Muusa, nintio awantu wano woona walwania owuene owuri mu amang'ana aga Katonda. Wari awantu awa amongo gaawu gaaoneka kandi awari no okuganya okutatuuka ku Yesu Kristo.

⁹Ni, ngawaaza okugia emberi ne enkola yaawu eyo, aeniki awantu waaza okumanya okuisemerezia kwawu okwo mala kiomo okwawu Janeesi ni Jabreesi kwamanyika.

Ewia Timotheo asugaane alondokane nawio

¹⁰Ni iwue Timotheo, omiire okuwurra engerera yange, omanyire olugendo lwange, ne ekineene ekia nteere emberi mu owulamu wuange. Lwona omanyire okuganya okwa ndi nakwo ku Katonda, ni kiomo miire okuwa ni nsikiizie omwoyo, no olugonzi lwange alala no olutuunyo olwa miire okuwa ni nkola.

¹¹Omanyire kiomo miire okuwa ne emidambo ne eminyako-nyaako egimiire okumpamba. Lwona omanyire kiomo nyasikia omwoyo mu emidambo eminene egiluguulwa egia nyawona mu emigizi egia Antioki ni Ikoonia alala ni Lustra. No Omwami yannunula mu emidambo gino giona.

¹²Kuwuene omuntu-umuntu ori ku Yesu Kristo, oagala okumenya owulamu owusugre emberi wa Katonda, paka awone eminyako-nyaako.

¹³Na awooni na awantu awaiteere mbwe wari ekia watari, iwo waaza okugia emberi okuoneka ino ni wateesia awantu, kandi woona ni wateesiwua.

¹⁴Ni iwue Timotheo, gia mala emberi okuambirra wukalu ewintu ewia omiire okuigerera kandi ewia oganyireko no omwoyo gwao gwona, aeniki omanyire geeza awantu awaakugerera ewintu ewio.

¹⁵Iwue okuamera mu owuana wuto wuao, omiire okuwaa no omanyire amang'ana aga Katonda agari na amaani aga okukulagirizia engira eya owuinunuzi owuituukrana mu okuwa no okuganya ku Kristo Yesu.

¹⁶Amang'ana goona agari mu endagano gaajojwa ku amaani aga Katonda, kandi gari amalootu ku okugerera awantu, okugaania owuoni, okugolola awantu kandi okulagirizia awantu engira eya okumenya owulamu owuigoloole.

¹⁷Gatunzia omuntu owa Katonda okuwa omutuufu kandi ori na amaani aga okukola emirimo emilootu giona.

2 Awatimotheo 4

¹Nkusikirra emberi wa Katonda ni Kristo Yesu, ooza okukengera awalamu na awafu ekiina olwa ari-irana no owuami wuae, mbwe

²lanzia amang'ana aga Katonda kandi gia emberi okukola otio amiire goona, kuwe mbwe ekialo kilootu nakuwa kiwiiwi. Lagirizia awantu wawone owuoni wuawu kandi owagaanie wareke owuoni. Otalawira okuambia awantu amaani, ni gia emberi okuwagerera kandi wa no omwoyo oguisikiizie.

³Kola otio aeniki amiire gaaza aga awantu ngawari-ingizia igerera eriri kuwuene, ni wariagarizia awagerezi omuganda okutegera amatwi, kugere wawurreko ewintu ewia aweene waagala okuwurra.

⁴Warilowa wareke okutegerezia igerera eriri kuwuene, walonde eminayo egiwula emirimo.

⁵Ni iwue Timotheo, simbiira kandi wa omuoreevu mu engira ziona. Kola olutuunyo mu eminyako-nyaako egia owona kandi kola emirimo egia okulanzia amang'ana amalootu aga Katonda egia waeterwa.

⁶Ni inze owulamu wuange wutuukre aa katio wufumiziwua ki omusango kandi enyinga ziang'e zia okuwa ku ekialo ziri ampi okuwua.

⁷Miire okulwana iye riange geeza, miire olugendo lwange kandi miire okurinda geeza ewintu ewia okuganya kwifu kuagala.

⁸Kutio nyingeeno katio ekinindirra ne ekigudu ekia owuyaayi ekia awantu awigolovu waeewua, ekia Omwami omukengi owa ekiina omulongoole aaza okumpa Owuire owua owutuuko. Ni ng'ani inze eng'ene nio ari-aa, ni namba awantu woona awarindirra okuirana kwae ne emioyo giawu giona.

Amang'ana agatuukre

⁹Kola wukalu onyizeko wuangu-wuangu,

¹⁰aeniki Deema, ku okugonzia ewintu ewia ekialo, amiire okundeka asomooke agiire Thesalonika. Kreseeni yagiire Galatia, ni Tiito iye agiire Dalmaatia.

¹¹Luuka eng'ene nio ori ano ni inze. Ni no ooza, toola Mariiko muuze nae aeniki aaza okuntunzia ano kuwungi.

¹²Nyatumre Tichikaasi Efeeso.

¹³No ooza owitre Troowa, ondetere ekanzu yange eya nyareka omwa Karpo ne ebuuki ziang'e, ni ino-ino ebuuki ezia amaseero.

¹⁴Nikulondokana ne ewintu ewiwiiwi ewia Aleksanda omutuzi owa ewiuma yankorra, Katonda nyanga amuwone.

¹⁵Muwarre geeza aeniki yalwania amang'ana amalootu aga tulanzia wukalu ino.

¹⁶Olwa nyasooka okuimerra mu ekiina okulagana ekia ndi, awantu woona waansomoka nsigala omwene. Nsawa Katonda mbwe awarekere ku okukola otio.

¹⁷Ni Katonda yawa ni inze kandi yampa amaani aga okulanzia nago amang'ana gae amalootu kiomo kuagalana, kugera awantu awatari Awayaudi woona wagawurre. Kutio, yaannunula antoola mu olumbe.

¹⁸Ndi no owusiani mbwe Omwami aaza okuntoola mu ewintu ewiwiiwi wiona kandi aaza okunnunula kugere nyingre mu owuami wuae ku igulu. Katonda aeewue owunene amiire goona, Amin.

Amakeezio agatuukre

¹⁹Nkeezizie Preskiila na Akwila alala na awa mu enyumba eya Onesporaasi.

²⁰Erasto yasigala Korintho, ni Trofimaasi nyamureka Miletaasi na alwala.

²¹Kola wukalu otuuke eno ne entwigo ekiari okutanika. Ebuulo ni Pundeeni ni Linuusi ni Klaudia alala na Awakristo wandi woona wakukeeziizie.

²²Omwami awe ni iwue, kandi owusiza wuae wuwe ni inywe.

Awatiito

Awatiito 1

Amakeezio agasookere

¹Ebaruwa eno eema ku inze Paulo, omukurumu owa Katonda kandi omutumwa owa Yesu Kristo. Emirimo egia Katonda andoworiire no okutunzia awalowole waae okugia emberi mu okuganya kandi mu okumanya owuene owuri ku Yesu Kristo. Engerera eno eira awantu mu okumenya owulamu owusugre emberi wa Katonda,

²ni turindirra okumenya nae owulamu owutariwua, owua Katonda otaweeya yaifuuwa kale mbwe awantu waae warimenya.

³Kandi yamanyisia awantu waae owulamu owuo mu amang'ana gaae mu amiire aga iye omwene yamala okutaa. Yakola otio ni okuwitra ku emirimo giange egia okulanzia amang'ana amalootu ku Yesu Kristo, nikulondokana ne ensikirra eya Katonda Omununuzi iifu yampa.

⁴Ebaruwa eno nkujojera iwue Tiito, ori omwana wange kuwene mu okuganya okwa turi nakwo. Nsawa mbwe Katonda Soifu alala ni Yesu Kristo Omununuzi iifu waku-ee owuolu kandi wawe awasiza ni iwue.

Owulowozi owua awakangasi awa ekaniisa

(1Timo 3:1–7)

⁵Nyakusawa mbwe osigale Kireete kugere omariizie emirimo egiasigala kandi olowole awagaaka awakangatra amakaniisa mu emigizi giona kiomo nyakulagirizia.

⁶Omukangasi owa ekaniisa paka awe omuntu omuigolovu, owulamo owuwiiwi. Asugaane awe omuntu ori no omukazi omulala, owa awaana waae wari no okuganya ku Yesu Kristo kandi awa omuntu-umuntu ngaesa yatuukrako enkola embiiwi ezia ensuuko namba aga amiiso amakalu emberi wa awakangasi nakuwa awantu wakulu.

⁷Aeniki omukangasi owarra owulala owua Awakristo akola emirimo egia okurinda awantu awa Katonda. Omukangasi oyo paka amenye mu owulamu owuigoloole owuwulamo owuwiiwi. Ataaza yawa omuntu ori no omutwe omukalu, namba omuntu owa enda yaae eyia wuangu. Atawa omuntu omunywi, namba omuntu omulwani, lwona atawa omuntu oogala okutuukra mala ekiae omwene enyinga ziona mu engira etawurikaane.

⁸Na asugaane awe omuntu oingizia awageni kandi ogonziizie owulootu. Lwona oirindre mu enkola ziae kandi oigoloole. Paka awe omuntu oifumiizie okukola ewintu ewisangaazia Katonda enyinga ziona kandi omanyire okugawula amang'ana geeza.

⁹Paka awe omuntu oambre wukalu engerera endootu emiire okugererwa kugere oona a-ambie awandi amaani ku okugerera engerera eri kuwuene, kandi ate awantu awalwanya engerera eya kuwuene mu owueru.

Engerera eya owuweeyi

(1Timo 1:3–11; 4:1–7)

¹⁰Mboola otio aeniki wario awantu awangi Kireete ao awawula no owuti, awafwa okuwoola-uwoola amang’ana kandi awasemerezia awandi. Owungi wuawu na awantu awagerera mbwe omuntu paka airwe enyangu nikwo atuukre owuinunuzi.

¹¹Otaaza wawaganyira okugerera Awakristo aeniki waona emigizi emingi no okugerera ewintu ewia watasugaane wagerere, mala mbwe watuukre amasendi ku awantu.

¹²Namba omulala ku awagambi waawu aweene oona yawawoolako otino, “Awa Kireete na awantu awaweeyi enyinga ziona, awadoowerwa, awa oguriira awataiguta kandi awawi ki entiang’i ezia mu isaka.”

¹³Ekia omugambi ono yawoola kiri kuwuene. Kutio paka owasiagizie wukalu kugere wawe no okuganya okulamu,

¹⁴aa watatega amatwi ku eminayo egia Awayaudi walukre. Lwona wasiagizie watawurra ensikirra eziteerweo na awantu awalowa okulonda engerera endootu eri kuwuene.

¹⁵Ku awantu awigolovu emberu wa Katonda, kuwulao okuria okusugaane kuzirwe mbwe ngakuri okweru, ni ku awaoneeke kandi awawula no okuganya ku Katonda, kiwulao ekintu ekieru. Kuwuene, waingirizia mala engira ezia owuoni kandi emioyo giawu egia okugawula amawi na amalootu gioneeke.

¹⁶Walaga awantu mbwe kuwuene wamanyire Katonda, ne engira eya owulamu wuawu elagana geeza mbwe ngawamumanyire. Lwona ngawalonda engira ziae yaaya. Wari awantu awooni awawiiwi, awatalonda endagirra ezia Katonda kandi awataesa okukola ekintu ekilootu.

Awatiito 2

Engerera eya awantu wasugaane wagererwe

¹Ni iwue no ogerera Awakristo, paka engerera yao eganyane ne engerera endamu eri ku Yesu Kristo.

²Gerera awagaaka mbwe paka wawe na amongo amoogi, kandi wawe no owulamu owuuzza wuagera awantu wawa-ee owuti. Paka wawe awantu awairindre, awatazakana okukola-ukola ewintu, ni wawe no okuganya okulamu, olugonzi oluri kuwuene no olutuunyo mu amang’ana aga Katonda.

- ³Mu engira yazane eyo, gerera awakazi awakulu mbwe wamenye mu owulamu owulagana owuti owungi ku Katonda mu enkola ziwu. Ni watawa awawoola-woola awantu, nakuwa awantu awa owunywi wutoorre. Iwo wasugaane wagerere awandi ewintu ewilootu.
- ⁴Ao otio nikwo waaza okulagirizia awakazi awakiari watono kiomo wasugaane wagonzie awasaaza waawu, alala na awaana waawu.
- ⁵Lwona, ni kiomo wakawa awakazi awairindre, awataazakana okukola-ukola ewintu; awa engendo eziigoloole; awakola emirimo egia mu amayumba gaawu geeza; awa-aani kandi awaiisiizie ansi emberu wa awasaaza waawu. Kuno kuuza okugera amang'ana aga Katonda gatatoolwa owutono.
- ⁶Mu engira efwanani eyo, paka olagirizie awazia awaraaga wukalu mbwe wairinde.
- ⁷Iwue omwene paka owaweere ekilago ekilootu ekia wakalonda mu engira ziona, kandi mu okugerera kwao lagana owutuufu
- ⁸no owuntu wukulu. Wona mbwe no ogamba-gamba, ewia owoola paka wiwe ewintu ewilamu kugere otulwani asuuke kandi awule ne ekia akatuwoolako.
- ⁹Laga awagule waiisie ansi emberu wa awakangasi waawu enyinga ziona kandi watuusie okuagala okwa awakangasi waawu mu engira ziona. Wataaza waagalusania amang'ana nawo,
- ¹⁰lwona watawaiwako ewintu, ni walagane mbwe wari awantu awaesa waateewuako omwoyo. Enkola ziwu endootu zino ziiza okugera awantu wa-ee igerera riifu ku Katonda Omununuzi iifu owuti.
- ¹¹Ni kutio aeniki Katonda amiire okusaurra awantu woona owusiza wuae, owua niwuo engira eya awantu woona wakatuukramo owuinunuzi.
- ¹²Owusiza owuo wutulagirizia okulowa ewintu ewitasugre emberu wa Katonda alala no okuagala okuwiiwi okwa ewintu ewia ekialo. Wutulagirizia okumenya mu owulamu owulootu, owuigoloole kandi owusugre emberu wa Katonda, ni tukiari ku ekialo kuno.
- ¹³Nintio kuagalana tuwe ni turindirra ensereki eya tuteereko emioyo okutuukra, owuire owua okuirana okwa Katonda omunene kandi Omununuzi iifu Yesu Kristo, ku ekialo kuno no owunene wuae.
- ¹⁴Omwene yaifumia okutufwira kugere atutoole mu amawi kandi okutuieruyia tuwe awantu wuae iye omwene, kugere wawe ne emioyo egia okukola ewintu ewilootu enyinga ziona.
- ¹⁵Wino niwio ewintu ewia nyagala mbwe olage awantu entulo eyo. Wa-ambie amaani kandi siagizia awantu na amaani goona aga entewe yaa kandi otaaza waganya omuntu yatoola amang'ana gaao wutono.

Awatiito 3

Kiomo Omukristo asugaane amenye

¹Izurizia Awakristo mbwe waiisie ansi emberu wa awaami alala na awakangasi awawarindre. Wawe awantu awawurra kandi awalondokana ne endagirra enzeru, awaikagre okukola emirimo emilootu egiwulamo owuwi

²kandi awatagamba-gamba uwiiwi ku omuntu-umuntu. Watawa awantu awagonziizie ensoolo, ni wawe awantu awalongoole kandi awaere awantu wona owuti mu engira ziona.

³Ifwe twona kale twawanga awamaya awatamanyire Katonda kandi awatatiire amang'ana gaae. Twasemereziwua tureka engira kandi twawanga mu owusiwe owua okuagala okuwiiwi alala ne ewisangaalo ewia ku ekialo. Twata enyinga ziifu mu okumenya mu okuagarra awandi owuwi ne enda ndulu. Awantu awangi waaturega kandi twona twawarega.

⁴No olwa Katonda omununuzi iifu yatumanyisia owulootu wuae alala no olugonzi no owusiza wuae,

⁵yatununula mu owuoni wuifu. Ngakatununula ku okukola kwifu ewintu ewiigolovu, yaaya, ni mala ku amasaasra gaae ni kuwitra ku emirimo egia Omwoyo Omweru ogwa Katonda, owatu-aa okuiwulwa okuyia no owulamu owuyia ku okutuoza kandi okutu-aa owulamu owueru owua mu omwoyo.

⁶Katonda yatu-aa Omwoyo gaae Omweru kuwungi ni kuwitra ku Yesu Kristo Omununuzi iifu

⁷kugere twona tureetwe mu empurizanio nae ku owusiza wuae kandi tuwe ni iwaga eria okurindra okutuukra owulamu owutariwua owua Katonda yaifuuwira awantu waae.

⁸Amang'ana gano gari kuwene kandi nyagala mbwe ogasimbiizie kugere awantu awamiire okuwa no okuganya ku Katonda wawone mbwe wakola enkola endootu. Amang'ana gano malamumu ino kandi gari no owuitunzi ku awantu wona.

⁹Ni iwue, wa ale no okutawurizania mu amang'ana okwa owusiru, ne entaka ezia okuwala waaguukwa, no okugawukana mu owulala alala no ensoolo eziwula ne emirimo, ezia awantu watoola ku ensikirra ezia Muusa.

¹⁰Na ario omuntu ogonziizie okugawula awantu, no omiire okumugaania kalala namba kawiri, rekana nae ilala.

¹¹Wa no okumanya mbwe omuntu ki oyo, amiire okureka engira kandi muwi ino. Iye amiire okuikengera ekiina.

Amang'ana agatuukre no okusawa okwa Paulo

¹²Nyiza okutuma omulala agati ya Atenaasi ni Tichikaasi kandi na aingiire otino, kola wukalu onyizeko Nikapooli, aeniki mbwine mbwe ao nio nyiza okuweera mu amiire aga entwigo.

¹³Kola wukalu owone mbwe otunziizie Zenaasi, omuntu owasomera ensikirra ezirindre ekialo, na Apolo mu olugendo lwawu, kandi owone mbwe wari ne ewintu wiona ewia waaza waagala ni wari mu olugendo.

¹⁴Awakristo awiina wiifu wasugaane waigerere okukorra awandi ewintu ewilootu. Ni wakorre watio, waaza okutuusia okuagala okwa awa mu owulala wuinyu wari nawio kandi ngawaaza okumenya owulamu owuwula ne emirimo.

¹⁵Awakristo awari ni inze eno wona wakukeeziizie. Ganya otukeeziizie Awakristo awari eyo, awatugonziizie kandi awari no okuganya okufwanana no okwifu. Owusiza owua Katonda wuwe ni inywe mwona.

Awafilemooni

Awafilemooni 1

- ¹Inze Paulo, omusiwe ku amang'ana aga Yesu Kristo, nkujojera iwue omwiko iifu owa tugonziizie kandi owemirimo alala ni ifwe Filemooni, ni ndi alala ni Timotheo wamwifu ku Kristo.
- ²Lwona nyagala ebaruwa eno egiire wamwifu owekiala Afiiya ni Arkiipo, owa-iye alala ni ifwe, alala ne ekaniisa eikumia mu enyumba yaa.
- ³Muwe no owusiza no owuolu owuema ku Soifu Katonda, alala no Omwami Yesu Kristo.
- ⁴Nyiranizia Katonda wange otioo ino enyinga ziona ni nkuingirizia mu okusawa kwange,
- ⁵aeniki mpurra kiomo ori no okuganya ku Omwami Yesu, kandi kiomo ogonziizie awantu awa Katonda wona.
- ⁶Nsawa Katonda mbwe owe omukalangufu mu okulaga awantu okuganya okwa ori nakwo, kugere omanye amangi ku ewintu ewilungi wiona ewia turi nawio ku Kristo.
- ⁷Olugonzi olwa ori nalwo lumiire okumpa ekisangaalo ekinene kandi lumiire okunyambia amaani ino, aeniki iwue omuda, omiire okuomerezia emioyo egia awantu awa Katonda wona.

Paulo aisasaamra Onesimaasi ku Filemooni

- ⁸Kutio, kukawa mbwe ku Kristo ndi iwaga okukusikirra okukola ekia osugaane okole,
- ⁹ng'anyiza okukola otio yaaya. Aa okukola otio, nkuiyemba ekintu ekilala, ku olugonzi olwa turi nalwo ku Kristo, inze Paulo — omugaaka kandi nyingeeno omusiwe ku amang'ana aga Kristo Yesu.
- ¹⁰Ee, nkuisasaama ku omuzia wange Onesimaasi, owawa omuzia wange ni nyawanga mu owusiwe.
- ¹¹Emberi yawulanga emirimo ku iwue, ni nyingeeno amiire okuwa ne emirimo ku iwue ni inze noona.
- ¹²Mutuma mbwe akuiraneko, iye ori omwoyo gwange ogwa muni.
- ¹³Nkaagaale mbwe nsonge okuwa nae mu owusiwe ano, kugere atoole iwaga eria iwue omwene okatoorre no ontunzia, ni nsiwirwe ne eminyororo gino ku okulanzia injiili.

- ¹⁴Ni ng'anyakagala okukola ekintu ekifwana kitio, iwue omwene no otaganyire, yaaya; kugere no owuine omwene mbwe owa omusiza nae, okole otio ku okuagala kwao omwene, ni ng'ani mbwe onigiriziiwue.
- ¹⁵Andi yakureka ku amiire amatono ago kugere akuiraneko awe ni iwue amiire goona.
- ¹⁶Nyingeeno ngari mala omugule eng'ene, na ari omulootu okukira omugule ale. Ari wamwifu ku Kristo omugonzi ino, ino-ino ku inze. Ni ku iwue ari ne emirimo namba okukira — ki omugule waaokandi ki wamwifu ku Kristo.
- ¹⁷Kutio ni kuri mbwe ontoorre ki owemirimo owa Katonda alala ni iwue, nkusawa mbwe omuingizie kiomo okanyingiizie inze.
- ¹⁸Ni, ni kirio ekintu-ukintu ekiwiiwi ekia yakukorra, namba ni gurio omusango gwao ogwa ari nagwo, ta ewintu ewio ku inze.
- ¹⁹Inze Paulo ni inze ojoja itu rino no okukono kwange omwene. Ee, mboola mbwe nyiza okukuoloola, namba ni ndekere okuwoola mbwe iwue owulamu owuyia owua ori nawuo wuri omusango gwange ogwa ori nagwo.
- ²⁰Wamwifu, noona nyagala mbwe onkorreko ekintu ekilootu, mu okuganya okwa turi nakwo ku Omwami Yesu. Kutio nkorreko ekiiza okuomerezia omwoyo gwange.
- ²¹Omwene manyire owuti owua ompeere, kutio nkujojera, ni manyire mbwe ooza okukola geeza namba okukira kiomo nsawire.
- ²²Ekintu kindi ekilala ekisigaale ni nkino: Nyagala onyikazizie enyumba eya omugeni, aeniki ndi no okuganya mbwe wuangu ano Katonda aaza okutuusia okusawa okwa mumiire okuwa ni mumusawa mbwe nyirane mbawone.
- ²³Epafraasi, omusiwe ku amang'ana aga Yesu Kristo omwina wange, akutumiire amakeezio.
- ²⁴Mariiko na Aristakuusi ni Deema alala ni Luuka, awemirimo alala ni inze, woona wakukeeziizie.
- ²⁵Owusiza owua Omwami Yesu Kristo wuwe ni inywe mwona.

Awaibrania

Awaibrania 1

Kristo ari omukaate okukira enyankoi

- ¹Mu amiire amakulu agaawita, Katonda yagamba-gamba ni waaguukwa wiifu kangi kandi mu engira enyingi ni kuwitira ku awagambi waae.
- ²Ni mu amiire aga entuuko gano, Katonda amiire okugamba-gamba ni ifwe ni kuwitira ku Omuzia waae, owa yalowola okuteera ewintu wiona mu amakono kandi owa ni kuwitako, yaluka igulu ne ekialo alala ni wiona ewirimo.
- ³Omuzia owa Katonda ono, nio owunene owua Katonda wumurika ni wumako kandi nie ekilago ekia Katonda ndiki-ndiki. Kandi ni iye oambiriire alala ewintu wiona ewiri ku igulu ni ku ekialo, na amang'ana gaae agari na amaani. No Omuzia yamala okuesana engira eya awantu wakaoziziwua amawi, yaikala nyakukono okusaaza okwa Katonda Omukaate ku igulu.
- ⁴Kutio yawa omukaate okukira enyankoi woona mala kiomo eriina eria yaeewua riona riri ikaate okukira amiina aga enyankoi woona.
- ⁵Kusi ne enyankoi ki eya Katonda yalagako mbwe, “Ori Omuzia wange, reero mbeere Swao”? Namba mbwe, “Nyiza okuwa Swae, kandi oona aaza okuwa Omuzia wange”?
- ⁶Kandi ni Katonda areeta Omuzia waae owa oluweri ku ekialo, yawoola otino, “Reka enyankoi awa Katonda woona wamuikirre wamusawe.”
- ⁷Omwene na agamba-gamba ku enyankoi waae, awoola otino, “Agera enyankoi waae wawa ki omuyaga kandi awatumwa waae wawa ki endimi ezia omurro.”
- ⁸Ni na agamba-gamba ku Omuzia waae awoola otino, “Entewe eya owuami wuao, iwue Katonda, eeza okuweerao amiire goona, kandi ooza okangatra awantu awa mu owuami wuao no owuigolovu.
- ⁹Iwue omiire okugonzia owuigolovu, na amawi oregere, kutio, inze Katonda waa miire okukuta angulu okukira awiina waa ku okukuwaka amavuta aga ekisangaalo.”
- ¹⁰Lwona alaga Omuzia waae otino, “Oo Omwami, mu owutanikro, ni iwue owaomboka owulusa owua ekialo, kandi igulu riri emirimo egia amakono gaa.
- ¹¹Igulu ne ekialo wiiza okuteeka, kandi wiiza okukiriya ki enguwo, ni iwue orio amiire goona.
- ¹²Ooza okuwizinga alala ki ekanzu, kandi wiiza okugaluka ki enguwo. Ni iwue orio-wuri otio, ngorigaluka, kandi emiigo gao giwula ne entuuko.”
- ¹³Ne enyankoi ki owa Katonda yalagako mbwe, “Ikala nyakukono kwange okusaaza nawuno ntoole awazigu waa nte ansi ku amagulu gaa otaze?”

¹⁴Kane enyankoi niki? Ngawari mala emioyo egitumrwe okukorra awantu awaaza okutuukra owuinunuzi?

Awaibrania 2

Engira eya owuinunuzi

¹Kutio paka tutege amatwi ino kandi tuambe amang'ana aga tumiire okuwurra, kugere tutaema mu engira endamu.

²Aeniki, ni kuri mbwe amang'ana aga enyankoi yawoola gawanga na amaani kandi awantu wona awaalowa okugalonda nakuwa awaagatambuka waaswawukwa enswawuka esugre nawo.

³Katio ifwe tukamizuka tutie ni tutoorre owuinunuzi owukaate wuno wutono? Omwami Yesu nio owasooka okulanzia ku owuinunuzi wuazane, kandi awantu awaamuwurra wona waatusigikra amang'ana ago mbwe gawanga kuwuene.

⁴Katonda oona yalagana mbwe amang'ana gano gari kuwuene mu okukola ewilago ne ewintu ewiluguulwa, na amankono agagawukane-gawukaane alala ne empanwa ezia Omwoyo Omweru ezia yaesana nikulondokana no okuagala kwae omwene.

Yesu nio owa tutuukrako owuinunuzi

⁵Katonda ngakata ekialo ekia tugamba-gambako mbwe turinda okuuza, mu owukangasi owua enyankoi yawa.

⁶Na ario mu endagano ansi aa omuntu wundi agamba-gambre na awoola otino, "Kane omuntu ofwa ariki, owa okainyaasia okuingirizia amang'ana gaae, omuzia owa omuntu aiwuule ariki, owa amang'ana gaae gakakuamba?"

⁷Waamuisia ansi awa omutono okukira enyankoi nikuemao wamu-aa owunene no owuti

⁸kandi otoola owukangasi owua ewintu wiona o-aa omuntu ofwa." Ku oku-aa omuntu ofwa owukangasi owua ewintu wiona, okwo kulagana mbwe kiwulao-uwula ekia Katonda yareka na atateere ansi eya owukangasi owua omuntu ofwa. Ni kukawa kutio, nyingeeno ngatuwona ne ewintu wiona wiri ansi eya owukangasi owua omuntu, yaaya.

⁹Ni tuwona ni Yesu, owaisiwua ansi awa omutono okukira enyankoi, na aerwe owunene no owuti aeniki yafwa olumbe oluwiiwi kugere, ku owusiza owua Katonda, afwire awantu wona.

¹⁰Kwaweera Katonda, omwene ewintu wiona kandi ogera ewintu wiona ni wiwaa wulootu, mbwe Yesu awone eminyako-nyaako. Yakola otio na agala mbwe Yesu awe omukangasi omutuufu owulako embala, ooza okureeta awaana waae awangi mu owuinunuzi kugere wawe mu owunene owuae.

¹¹Kutio tutuukra mbwe awantu awaeruyiwua alala no omuntu owaeruyia, woona wari awantu awa omuntu omulala. Ekio nikio ekigera ni Yesu awula ne ensuuko okuwaeta waamwawu waae.

¹²Omwene yalaga Katonda otino, “Nyiza okulaga waamwifu eriina riao, kandi nyiza okuemba enyembo ezia okukutondowola mu okuikumia okwa awakusawa.”

¹³Kandi lwona mbwe, “Nyiza okuta okuganya kwange ku Katonda.” Kandi awoola mbwe, “Mpano ndi ano, na awaana awa Katonda yampa.”

¹⁴Kutio aeniki awaana awa Katonda wari awantu awayaluka ne emiwiri na amasaai, Yesu omwene oona yatoola embonekano eya omuwiri ogwa omuntu, kugere ni kuwitra ku olumbe lwae aone amaani aga Ekikeeno ekiawanga ni kiambiriire amaani aga olumbe

¹⁵kandi asiwule awantu, awa mu owulamu wuawu wuona, waawanga mu owusiwe owua okutia olumbe, wawe owuyanga.

¹⁶Ni kuwuene mbwe Yesu ngakaaza okutunzia enyankoi, ni na awiizukulu awa Abraamu niwo yaaza okutunzia.

¹⁷Kino nikio ekiagera ni kuagalana mbwe paka awe ki waamwawu waae mu engira ziona, kugere awaweere Omuozia omunene ori na amasaasra kandi orindre endagano. Nikuema aifumie ki omusango ogutoolao amawi aga awantu.

¹⁸Aeniki Yesu omwene yainyaasia olwa yageezaniwua, aesa okutunzia awantu awageezaniwua.

Awaibrania 3

Yesu ari omunene okukira Muusa

¹Kutio waamwifu ku Kristo awaetiirwe owulamu owua ku igulu, mute amaingirizio giinyu goona ku Yesu, owa ifwe tulaga awantu mbwe ari omutumwa kandi Omuozia iifu omunene.

²Yarinda amang’ana aga Katonda owamulowola amukorre, mala kiomo Muusa oona yakola mu enyumba eya Katonda.

³Kiomo omuntu o-ombooke enyumba aeewua owuti okukira enyumba eya aombooke, nintio lwona Yesu asugre okueewua owuti okukira Muusa.

⁴Aeniki enyumba ki enyumba eombookwe no omuntu, ni Katonda nio omuomboki owa ewintu wiona.

⁵Muusa yarinda amang’ana aga Katonda ki omukurumu mu enyumba eya Katonda yoona, kandi okwo kwalaga awantu ekia Katonda yaazanga okuwoola mu amiire aga emberu.

⁶Ni Kristo iye arindre amang'ana aga Katonda ki Omuzia okangatiire enyumba eya Katonda. Kandi ifwe ni ifwe enyumba yaae, ni tuandre ku owusiani wuifu no okurindirra okwa tuitumburra nawuno mu owutuuko.

Okuingira mu okuwuluuka okwa Katonda aaza oku-aa awantu waae

⁷Kuri mala kiomo Katonda awoola mu endagano ni kuwita ku Omwoyo Omweru mbwe, "Reero, ni muwuriire omwoyo ogwange,

⁸mutagera emioyo giinyu giwe emikalu kiomo Awaisraeli waakola mu amiire aga okugeezaniwua ni waawanga mu ekeewa,

⁹aa waaguukwa wiinyu wangeezaania kandi ku emiaka amakumi ane waawona ewintu ewia nyakola.

¹⁰Ekio nikio ekiagera no okusu kwampamba ni ikula erio kandi nyawoola mbwe, 'Emioyo egia awantu wano gireka engira enyinga ziona kandi wakiari okumanya engira ziange.'

¹¹Kutio nyaifuuwa ni ndi no okusu otino, 'Ngawari-ingira mu okuwuluuka kwange, yaaya!' "

¹²Inywe waamwifu, muwone mbwe awulao-uwula omulala ku inywe ori no omwoyo ogurimo owuoni, ogutari no okuganya kandi ogugaluka ni gureka Katonda.

¹³No omuntu ki omuntu a-ambie omwina waae amaani owuire ki owuire, iwaga erietwa mbwe "Reero" ni rikiario, kugere awuleo omuntu owa ensemerezanio eya owuoni eere omwoyo omukalu ng'a.

¹⁴Aeniki ni turindre endagano paka mu owutuuko kandi ni tuteere emioyo giifu ku Katonda wukalu kiomo twakola olwa twawa no okuganya kuluweri, ni tuuza okutuukra omugawo gwifu ku ewintu ewia Kristo wiona.

¹⁵Kuri mala kiomo endagano ewoola mbwe, "Reero, ni muwuriire omwoyo gwae, mutagera emioyo giinyu giwe emikalu kiomo giawanga mu amiire aga awantu waalowa Katonda."

¹⁶Awaalowa Katonda ni waawu anu? Ngawawanga awantu awa Muusa yakangatra na awafumia Misiri?

¹⁷Awa-ambia Katonda okusu ku emiaka amakumi ane ni waawu anu? Ngawawanga awantu awaakola owuoni, awaafwa mala emiwiri giawu gisigala mu ekeewa?

¹⁸Na awa Katonda yaifuuwa mbwe ngawari-ingira mu okuwuluuka kwae ni waawu anu? Ngawawanga awantu awaatambuka amang'ana gaae?

¹⁹Kutio tuwona mbwe awantu awo ngawakaesanga okuingira mu okuwuluuka okwae ku okutaganya kwawu.

Awaibrania 4

Okuwuluuka okwa awantu owa Katonda

- ¹Kutio, aeniki okuifuuwa okwa Katonda mbwe iwaga eria okuingira mu okuwuluuka kwae rikiario, mutukole wukalu tuwone mbwe awulao omuntu ku inywe orituukrwa na akeeyire okuingira.
- ²Aeniki mala kiomo ifwe twona twamiire okuwurra amang'ana amalootu ku okuwuluuka okwa Katonda aga tumiire okulanziziwua kuno, nintio woona waagawurra owufwanani. Kukawa kutio, amang'ana gano ngagakawatunzia aeniki waalowa okuganya nago.
- ³Ni ifwe awamiire okuwa no okuganya no omwoyo omulala, tuingira mu okuwuluuka kwae, mala kiomo Katonda amiire okuwoola otino, "Nyaifuuwa ni ndi no okusu otino, 'Ngawari-ingira mu okuwuluuka kwange!' " Yalowa otio kukawa mbwe yamala okulongra awantu waae ansi aa okuwuluuka kale olwa yaluka ekialo.
- ⁴Aeniki ario ansi andi mu endagano aa agamba-gamba ku owuire owua musamvu na awoola otino "Katonda yamala emirimo, kutio owuire owua musamvu yawuluuka ku emirimo giae giona."
- ⁵Kandi anyuma ao lwona tuwona ni Katonda awoola mbwe, "Ngawari-ingira ansi ange aa okuwuluuka."
- ⁶Amang'ana ago gakiari mala otio mbwe awantu wandi wari-ingira ansi aa okuwuluuka kandi awantu awaasooka okuwurra amang'ana aga Katonda ngawakaingira ansi aa okuwuluuka ao aeniki waalowa oku-aa Katonda owuti.
- ⁷Kutio Katonda kandi yataao owuire wundi owuetwa mbwe, "Reero," lunyima na amiire amangi gamiire okuwita yagamba-gamba ni kuwitra ku Daudi mala kiomo yawanga na amiire okuwoola mbwe, "Reero ni muwuriire omwoyo ogwae, mutagera emioyo giinyu giwe emikalul!"
- ⁸Aeniki kuweeko mbwe Yoswa yawa-aa okuwuluuka, kangato Katonda ngakagamba-gambre kandi lunyima ku owuire wundi owua okuwuluuka.
- ⁹Kutio Sabato eya okuwuluuka, ekiario-wuri ku awantu awa Katonda,
- ¹⁰aeniki omuntu-umuntu oingira mu okuwuluuka okwa Katonda, awuluuka ku emirimo giae mala kiomo Katonda oona yawuluuka ku emirimo giae.
- ¹¹Kutio mutukole wukalu kiomo kuesekana, tuwone mbwe tuingiire mu okuwuluuka kwae, kugere omuntu ataaza yalonda omufwano ogwa awantu awaareka okukola okuagala okwa Katonda, mala agwe na ataingiiire.
- ¹²Aeniki amang'ana aga Katonda malamumu kandi gakola emirimo. Gari amoogi okukira omwambe ogwa olugangala oluri ne eminwa iwiri. Gaowola gaingira munsu nawuno gaagawula owulamu no omwoyo, amasesemo no owunyunguuri

kandi gateera omuntu ekiina ku ewintu ewia aingirizia alala no okuagala okwa mu omwoyo.

¹³Kiwulao-uwula ekintu ku ewintu ewia Katonda yaluka ekiwisre mu amiiso aga Katonda. Ee ewintu wiona wiisanukuule owuyanga ku owueru mu amiiso aga Katonda owa paka tulage geeza owuene owua ewintu ewia tumiire okukola wiona.

Yesu nio Omukangasi omunene owa awoozia

¹⁴Kutio, aeniki turi no Omukangasi omunene owa awoozia omiire okugia ku igulu ori Yesu Omuzia owa Katonda, mutuambe wukalu okuganya okwa tuwoola mbwe turi nakwo ku iye.

¹⁵Aeniki ifwe ng'ani mbwe Omukangasi omunene owa awoozia owa turi nae ngaesa okutuambra amasaasra mu owunyowu-nyoowu wuifu, ni turi no omuoza omiire okugeezaniwua mu engira ziona mala kimo ifwe, ni kukawa kutio ngakakola owuoni.

¹⁶Kutio mutugie no owusiani ampi ne entewe eya Katonda ori no owusiza, kugere atuambre amasaasra kandi tueewue owusiza owuza okututunzia enyinga ezia turi no okuagala ino.

Awaibrania 5

¹Omukangasi omunene owa awoozia ki Omukangasi omunene owa awoozia alowolwa agati ya awantu. Emirimo giae giri okuwaimerra ku amang'ana aga-ambaane ni Katonda, okufumizia Katonda ewintu ewia awantu wafumiizie, alala no okukola emisango, ku owuoni owua awantu wakorre.

²Awa na amasaasra na awantu awawula no okumanya na awarekere engira endamu, aeniki iye oona ari no owugata mala kimo awantu awa aindeng'era awo.

³Ekio nio ekigera ni kumunigirizia mbwe paka afumie omusango ku owuoni wuae omwene, alala no owuoni owua awantu.

⁴Awulao omuntu ooza yawa Omukangasi omunene owa awoozia mala ku okuagala mbwe atuukre owunene owuo, yaaya. Ni paka aetwe ni Katonda okukola emirimo egia owuoza mala kimo Aruuni yaetwa.

⁵Kristo oona ngakaitwika owunene owua okuwa Omukangasi omunene owa awoozia. Ni, ni Katonda nio owamulaga mbwe, "Ori Omuzia wange; reero mbeere Swao."

⁶Kandi ansi andi yona Katonda yawoola otino, "Iwue ori omuoza amiire goona, mala kimo Melkizedeeki."

⁷Mu amiire aga Yesu yawanga ku ekialo kuno, yasawanga kandi yaisaama Katonda, owaesanga okumununula mu olumbe, no omwoyo ogwa kungulu

amaziga ni gamuyooka. Kandi okusawa kwae kwatuuka aeniki yasawanga Katonda no owuti owungi.

⁸Kukawa mbwe Yesu yawanga Omuzia owa Katonda otio, ni yaigerera okuwa omuntu ori no owuti ni kuwitra ku eminyako-nyaako egia yawitamo

⁹kandi olwa yamala okuteewua awa omuntu osugre owulako embala, yairana awa omuntu owa awantu awamuere owuti woona watuukrako owuinunuzi owuira awantu mu owulamu owutariwua.

¹⁰Kandi Katonda yawoola mbwe Yesu nio Omukangasi omunene owa awoozia mu engira efwana ne eya Melkizedeeki.

Okusiagiziwua ku okureka okuwa no okuganya ku Kristo

¹¹Turi na amang'ana amangi aga tuesa okuwalaga ku amang'ana gano, ni ngakuri kunyoowu okugawoola goona gawaingirre aeniki okuigerera kwinyu kugia mpola.

¹²Kuwuene, kukawa mbwe nyingeeno mwona kusugaane kuwe mbwe muri awagerezi, ni mukia-agala okugererwa owuyia, engerera enyoowu ezitanikwa nazio mu okumanya amang'ana aga Katonda. Mukia-agala okunywa mala amaweere ki awaana awakiari awang'eng'e, ni ng'ano okuria okukalu yaaya!

¹³Omuntu-umuntu okiamenyere ku okunywa mala amaweere, iye akiari omwana muto kandi kiwulao ekia amanyire ku igerera eriri ku owuigolovu.

¹⁴No okuria okukalu, no okwa awantu awamiire okuwa awantu wakulu, awa ku okunala no okuria okuria okwo, wamiire okuigerera aweene okugawula ewintu ewilootu ne ewiwiiwi.

Awaibrania 6

¹Kutio muturekane ne engerera enyoowu ezia awantu awa nikwo watanika okumanya amang'ana aga Kristo, tugie emberu nawuno tutuuke mu okuwa awantu awakomere mu amang'ana aga Katonda. Ngatusugaane tutanike no okuinuula kandi engererakimo okugaluka okureka enkola eziira awantu mu olumbe, okuwa no okuganya ku Katonda,

²ewilagirizio ku owubatiiso, okuta amakono ku awantu, okuziuka okwa awafu alala ne ekiina ekituukre ekia awantu waaza okukengerwa.

³Ni, ni Katonda aezaanie iwaga, tuuza okukola otio.

⁴Awantu awamiire okuwona owueru kandi awamiire okugusa owulootu owuema ku igulu, namba awamiire okutuukra Omwoyo Omweru ogwa Katonda

⁵kandi awamiire okugusa owulootu owua amang'ana aga Katonda na amaani aga Katonda aaza okulagana mu amiire aga owutuuko

⁶ngakuesekana okuwairania mu okugaluka okuema mu amawi, ni waizukre wairane enyima. Ni kutio aeniki okulaga okwa walagre Kristo omugongo okwo, kufwanana no okuirania Omuzia owa Katonda ku omusalaaba kawiri, kandi okumususia emberu wa awantu.

⁷Ilowa erinywa amanzi ne emvula ekuba nawuno rialawia emere etunzia awarimi awagirimire, nirio erituukra ensereki eema ku Katonda.

⁸Ni ilowa eriamia amawua geng'ene riwula ne emirimo kandi riri ampi okufuwua. Owutuukre riiza okusambwa no omurro.

⁹Awiiko wange, kukawa mbwe tugamba-gamba otino, ni turi no owusiani mbwe inywe muri no owukire ku ewintu wino kandi mbwe mukola ewintu ewilootu ewia owuinunuzi wureeta.

¹⁰Kuwuene Katonda mulootu, ngarilawira emirimo giinyu egia mumiire okuwa ni mukola alala no olugonzi olwa mumiire okulagana ku iye ni mutunzia awantu waae kandi aweene mukiagia-wugia emberu ni muwatunzia.

¹¹Tuagala mbwe omuntu ki omuntu ku inywe akole olutuunyo mu okulagana olugonzi otio nawuno mu owutuuko, nikwo mumanye kuwuene mbwe muuza okutuukra ekia muteereko emioyo giinyu.

¹²Ngatuagala mbwe muwe awantu awagata yaaya, ni tuagala muwe awantu awalonda olunyaafwa olwa awantu awatuukra ekia Katonda yawaifuuwa kuwaa, ku okuganya no okuiyorezia kwawu.

Katonda atuusia okuifuuwa kwae

¹³Olwa Katonda yaifuuwira Abraamu, yaifuuwa ne eriina riae iye omwene, aeniki awulao-uwula owundi chee ori omunene okumukira owa yaesanga okuifuuwa ne eriina riae. Yamuifuuwira

¹⁴na awoola otino, "Kuwuene nyiza okukusereka kandi nyiza okuku-aa awiizukulu awangi ki omusenye!"

¹⁵Kandi kutio olwa Abraamu yamala okurindirra no owuoreevu, Katonda yamu-aa ewia yamuifuuwira.

¹⁶Awantu ni waifuuwa, awaifuuwa ne eriina eria omuntu omunene okuwakira. Okuifuuwa ne ekintu kusimbiizia okuganyana okurio agati ya awantu kandi kumalao entaka ziona agati yaawu.

¹⁷Kino nikio ekiagera ni Katonda aisimbiizia okutagaluka okwa omupango gwae, ku awantu awaazanga okutuukra ewintu ewia yaifuuwa okuwa-aa, no okuifuuwa ne eriina riae.

¹⁸Katonda amiire okuifuuwa okutu-aa ewintu ewilootu kandi amiire okuifuuwa ne eriina riae omwene. Ewintu wiwiri wino ngawigaluka aeniki Katonda ngawoola owuweeyi yaaya. Kutio ifwe awamiire okumurumukako kugere

tutuukre owuiwiso, turi no owusiani ino kandi tuandre ku okukurindrra okutuukra ewintu ewilootu emberi, ni tuteereko emioyo wukalu.

¹⁹Okurindirra okwa turi nakwo kuno okufwana ne ekikongo ekiambiriire omwoyo geeza wukalu. Kuingira munsu kwawita epasia eya mu eema eya okusawa Katonda nawuno kwatuuka Asi Aeeru Owutuukre,

²⁰omwa Yesu yatusookra ki omuimerezi iifu. Yamiire okuwa Omukangasi omunene owa awoozia owa amiire goona agawula ne entuuko mala kiomo Melkizedeeki.

Awaibrania 7

Yesu akirre omuozi Melkizedeeki

¹Melkizedeeki ono yawanga omwami owa ekialo ekia Saleemu, lwona yawanga omuozi owa Katonda ori kungulu okukira. Ya-agaana ni Abraamu na yairananga na aema mu okulwana na awaami awayakira mu iye mala amusereka.

²Nikuemao Abraamu yamu-aa endala ku ikumi ku ewintu wiona ewia yawanga nawio. Eriina Melkizedeeki rilagana “omwami owa owuigolovu” ne eriina Saleemu rilagana “owuolu” kutio okuetwa “omwami owa Saleemu” kulagana “omwami owa owuolu.”

³Yawulanga ni swae, ng’ina, namba owuiwulane wuae. Yawulanga owutaniko namba owutuuko, kandi ari omuozi amiire goona mala ki Omuzia owa Katonda.

⁴Ni kuri mbwe Abraamu nio owamu-aa endala ku ikumi ku ewintu ewia yanyaga awazigu mu iye, oingirizia mbwe yawanga omuntu omunene ofwana otie?

⁵Ensikirra ezia Muusa zigerera mbwe awiizukulu awa Abraamu wasugaane wafumie endala ku ikumi okuema ku ewintu wiawu wiona. Ewintu wino wisugaane wieewue awada waawu awari awoozia kandi awiizukulu awa Laawi.

⁶Melkizedeeki ono iye ngakaemanga mu owuiwulane owua Awalaawi, ni kukawa kutio yatoola endala ku ikumi ku Abraamu, kandi asereka omuntu owa Katonda yaifuuwa oku-aa ewintu ewilootu emberi.

⁷Kandi ne ekintu ekia awantu wona wamanyire mbwe omuntu omunene nio osereka omuntu owa akirre.

⁸Awoozia awatoola endala ku ikumi wari mala awantu awafwa, kutio Melkizedeeki ari omukaate okuwakira aeniki iye ario omulamu mala kiomo endagano ewoola.

⁹Omuntu aaza yawoola mbwe Laawi, otoola endala ku ikumi ku awantu ono, oona yafumizia Melkizedeeki endala ku ikumi ni kuwitra ku Abraamu,

¹⁰aeniki olwa Melkizedeeki yaagana na Abraamu, Laawi yawanga na akiari mu amasaai aga guukwa wae Abraamu.

11Ni kuri mbwe owuozia owua Laawi, owua ensikirra eya Muusa yaiombokako, wuaesanga okugera omuntu na awa omutuufu owulako embala, ao otio ekiageranga ni Katonda ataa omuozia wundi kandi oema mu owuiwulane owua Melkizedeeki owutari owua Aruuni niki katio?

12Ni kutio aeniki kunigirizia mbwe no omuozia agalusiiwue, ensikirra yoona paka egaluke.

13Omuozia ori Omwami iifu ogamba-gambwako ano, iye aema mu oluganda lundi olusaasa olutari olwa awoozia yaaya, kandi owulao namba omulala mu oluganda olwo omiire okuwaako omuozia oimerra ku isiga eria okukola omusango.

14Ne ekintu ekimanyikaane geeza mbwe Omwami iifu yaemera mu oluganda olwa Yuuda, kandi kiwulaooko ekintu ekia Muusa yawoola ku oluganda olwo ekigia ku emirimo egia owuozia, yaaya.

15Kandi amang'ana agatuwoorre gano gawurikana geeza no omuozia wundi ofwanana ni Melkizedeeki alowoolwe okuwa omuozia.

16Ee, omuntu olowoolwe okuwa omuozia ni nikulondokana no okuwa kwae na amaani aga okuwa no owulamu owutariwua, ni ng'ani ku oluganda olwa aemamo, yaaya.

17Endagano emugamba-gambako ne ewoola etino, "Ori omuozia amiire goona, mala kiomo Melkizedeeki."

18Tuwona mbwe ekia ensikirra enkulu eya Muusa ewoola ku owuozia kiteerwe antulo, aeniki yawulanga amaani kandi yawulanga ne emirimo.

19Ni kutio aeniki ensikirra ngeesa okugera omuntu yawa omutuufu owulako embala. Ni nyingeeno turi ne engira endootu okukira, etuiira a-ampi ni Katonda, eya tuteereko omwoyo.

20.21Katonda omwene yaifuuwa olwa omuozia ono yalowolwanga. Ni ngakaifuuwa na awoozia wandi waalowolwanga, yaaya. Yaifuuwa na amulaga otino, "Omwami amiire okuifuuwa kandi ngaaza okugalusia amaingirizio gaae, ori omuozia amiire goona!"

22Ku okuifuuwa okwa Katonda yamuifuwira kuno, Yesu nio owusiani wuifu mu okukola endagano endootu okukira ziona ni Katonda.

23Awoozia awamiire okuwaaao wari awangi, aeniki olumbe lumiire okugera ni wareka emirimo giawu.

24Ni Yesu iye ario omulamu amiire goona, kutio owuozia wuae wuwula ne entuuko.

25Kutio ari na amaani aga okununula awantu awaaza ku Katonda ni wamuwitako, reero kandi amiire goona, aeniki ari omulamu amiire goona okuwaisaamra Katonda.

²⁶Yesu nio Omukangasi omunene owa awoozia oesa okutuusia okuagala kwifu aeniki ari omweru owulako embala kandi aigoloole tiiri. Amenyere owulamu owuitengeeke kandi agingiriziiwue kungulu okukira igulu.

²⁷Agawukaane na Awakangasi awanene awa awoozia wandi woona, aeniki iye ngakumunigirizia mbwe akole emisango owuire ki owuire yaaya. Ee emisango egia awoozia wandi wasooka waikorra ku amawi gaawu aweene, nikwo waafumia egia okutoolao amawi aga awantu wandi. Iye yafumia omusango ogutoolao amawi aga awantu woona olwa yafumia owulamu wuae lulala olutasongwako olundi.

²⁸Ni kutio aeniki ensikirra eya Muusa etulagirizia ku awoozia awari no owunyowu-nyoowu. No okuifuuwa okwa Katonda okwaza lunyiya ne ensikirra emiire okuuzza, kutulagirizia ku Omuzia owa Katonda ori omutuufu owulako embala amiire goona.

Awaibrania 8

Omukangasi omunene owa awoozia owa endagano empia

¹Ekineene ekikirre ku ewia tuwoola, ni mbwe nyingeeno katio, turi no Omukangasi omunene owa awoozia owaikala ansi nyakukono okusaaza okwa entewe eya owuami eya Katonda Omukaate ku igulu.

²Ao nio akorra emirimo egia owuozia mu eema eya okusawa eri kuwuene, etaombookwe no okukono okwa omuntu yaaya, ni no Omwami Katonda omwene.

³Omukangasi omunene ki Omukangasi omunene owa awoozia aloworrwa emirimo egia okufumia empanwa alala ne emisango, kutio kwanigirizia mbwe ono oona awe ne ekintu ekia akafumia.

⁴Kuweeko mbwe ari ku ekialo kuno, ngakaweere omuoza aeniki awantu awafumia empanwa ezigamba-gambwako mu endagano, wario.

⁵Iwo wakola emirimo mu eema eri omufwano kandi ekiiruuzia ekia eema eri kuwuene eri ku igulu. Ekio nio ekigera ni Muusa yasiagiziwua ni yaagalanga okuomboka eema eyo mbwe, "Paka owone mbwe o-ombooke ewintu wiona ewiwa mu eeme eyo, mu engira eya walagwa mu ekigiri!"

⁶Ne emirimo egia Yesu aazre okukola giri na amaani okukira egiawu, mala kiomo empurizanio eya aazre okureeta agati ya Katonda na awantu eri na amaani okukira enkulu, kandi eisimbiire ku okuifuuwa okulootu okukira.

⁷Kuweeko mbwe endagano eyasooka yasuga mu engira ziona aa nekakeeya mu engira-ungira, lwona kirio ekikagerre ne eindi empia ewaao kandi?

⁸Ni Katonda yatuukra awantu awayakola nawo endagano eyo ni wakeeyire: ekintu ekiagera na awoola otino, “Mbalaga mbwe enyinga ziiza, ezia nyiza okukola endagano empia na awantu Awaisraeli kandi ne ekiriango ekia Yuuda.

⁹Endagano eene neeza okufwanana ne eya nyakola ni waaswawu olwa nyawa-amba okukono okuwakangatra ni mbafumia mu ekialo ekia Misiri. Ngawakarinda endagano eya nyakola nawo, kutio nyawalaga omugongo.

¹⁰Ndaga ekiriango ekia Israeli mbwe endagano eya nyiza okukola nawo ngino: Nyiza okuta ensikirra ziange mu amaingirizio gaawu kandi nyiza okuzijoja mu emioyo giawu. Nyiza okuwa Katonda waawu kandi waaza okuwa awantu wange.

¹¹Awulao omulala ku iwo ooza okugerera omwina waae, namba awulao omuntu ooza okugerera wamwawu waae, na amulaga mbwe ‘manyaka Katonda’ aeniki waaza onkuumanya woona, okuemera ku ori ansi kutuuka ku omunene otuukre.

¹²Aeniki nyiza okuwarekera amawi gaawu, lwona nganyiza okuingirizia owuoni wuawu kandi.”

¹³Omwami na aeta endagano eno mbwe eri ‘empia,’ agera endagano eyasooka ne ewa ewula ne emirimo, kandi ekintu ekikulu-kulu ekia amiire gago gaawita, kiiza okuwua nawuno kiteeke no okuteeka.

Awaibrania 9

Okusawa mu eema eya ku ekialo

¹Katio tutuukra mbwe endagano eyasooka yaaza ne endagirra ezialaganga awantu engira ezia okusawa Katonda, alala ne eema omwa awantu wasawira Katonda ku ekialo kuno.

²Eema eyo yawanga ne ewiyumba wiwiri. Mu akayumba akasookere akaetwanga mbwe Asi Aeeru, nimwo omwa ekintu ekia ekimuri kiateewuangako, ne emeesa alala ne emikaati emieru ziwanga ni ziteewua.

³No otambuka epasia eya okuwiri no oingira munsu, otuuka mu akayumba aka okuwiri akaetwanga mbwe Asi Aeeru Owutuukre.

⁴Munsu omwo, ziwangamo emeesa eya okusamba owubaani eombookwe ne edhaabu, alala ne esanduuki eya endagano esanikiirwe ne edhaabu kungulu yayo yona. Ewintu ewiawanga mu esanduuki eya endagano eyo, wiawanga ekimuga ekilongerwe ne edhaabu ekiateewuamo maana, ensimbo eya Aruuni eyasewuka, alala na amawaale aga ensikirra ikumi ezia endagano ziajojwako.

⁵Kungulu ku esanduuki eyo, nio aetwa mbwe entewe eya amagongi, aa ziwangao endukwa iwiri ezietwa mbwe kiruubi eziri no owunene eziyanzuule embaya yazio zigisanikira. Ni nyingeeno ngatuesa okunawula ewintu wino kilalalala twawimala, yaaya.

⁶Ewintu wiona ni wiawanga ni wimiire okuteewua mu engira eno, awoozia waingiranga mu akayumba akatono aka enze kano owuire ki owuire, okukola emirimo giawu.

⁷No Omukangasi omunene owa awoozia eng'ene nio owawanga na aganyiirwe okuingira munsu mu akayumba aka munsu, kandi mala kalala keng'ene ku omwaka. Ngakaesanga okuingira omwo na awula na amasaai aga okufumizizia Katonda ku owuoni wuae omwene, no owuoni owua awantu awaawanga ni wakorre ni watamanyire.

⁸Ni gano goona, Omwoyo Omweru ogwa Katonda yalagananga mbwe engira eya okugia Asi Aeru Owutuukre yawanga ne ekiari okuigurrwao awantu, eema eyasooka eyo ni yawanga ne ekiario.

⁹Kino ne ekilago ku amiire agaturimo nyingeeno gano mbwe empanwa ne emisango egia awoozia wafumizizia Katonda, ngawiesa okueruyia emioyo egia awantu awasawa Katonda, yaaya.

¹⁰Ezio ziri mala endagirra eziambaane na amang'ana aga ewiokuria ne ewintu ewinywewua, alala ne emigomo egia okuieruyia na amanzi. Endagirra ezigambagamba ku ewintu ewiwonwa wino, ziri mala ne emirimo nawuno engira empia eri endootu okukira, eeze.

Amasaai aga Kristo

¹¹Olwa Kristo yaaza ki Omukangasi omunene owa awoozia owa ewintu ewilootu ewiri ano nyingeeno, yaingira mu eema enene kandi endongoole okukira ziona, ku igulu. Eema eno nekaombokwa no omuntu yaaya, kandi nekawanga endala ku ewintu ewialukwa ku ekialo kuno.

¹²Yagia munsu aingira Asi Aeru Owutuukre ao kalala, aa ataaza okuiranao olwa okuwiri kandi yaaya. Ngakaingira na amasaai aga embuzi na aga ewimoori, ni na amasaai gaae iye omwene, mala areeta owuinunuzi owutariwua.

¹³Ensikirra eya Muusa ewoola mbwe, amasaai aga embuzi na aga amaiiri alala ni igoke eriemere ku emoori embuuka esambrwe, ni wiminzrwe ku awantu awatari aweeru, wiwaeruyia ku owumwamu wuawu.

¹⁴Katio oingirizia mbwe amasaai aga Kristo, owa ni kuwitra ku Omwoyo Omweru orio amiire goona, yaifumizizia Katonda ki omusango omweru oguwulako embala, gaaza okueruyia amaingirizio giifu owungi owuagana wutie mu enkola eziira awantu mu olumbe, kugere tusawe Katonda omulamu?

¹⁵Okufwa okwa Kristo okwo nikwo okugera na awa omuntu oreeta endagano empia agati ya awantu ni Katonda, kugere awantu awa Katonda yaeta watuukre ensereki etariwua eya Katonda yaifuuwa okuwa-aa. Ni kutio aeniki Kristo yafwa kugere asiwule awantu mu okuswawukwa ku amawi aga waakola ansi ya endagano enkulu.

¹⁶No omuntu ajojere itu erilagana awantu awa omwene aagala mbwe waaze warie omwandu gwae, kunigirizia mbwe ni wakiari okugutoola wagurie, paka kulaganiwue geeza mbwe omuntu wazane amiire okufwa, awulao.

¹⁷Ni kutio aeniki amang'ana agajojrwe mu itu ki erio, gaesa okutuusiwua mala no omuntu owagajoja afwire.

¹⁸Kino nikio ekigera ne endagano enkulu ngekaesanga okukola emirimo na amasaai gatafukrwe ansi.

¹⁹Olwa Muusa yamala okulaga awantu woona ensikirra ezia Katonda ziona, yatoola amasaai aga ewimoori na aga embuzi, alala na amanzi. Nikuemao, yakola na amatu aga omuti oguetwa mbwe aisoopu no owuvwiri owuakanyu owua amagondi, okugaminza ku itu eria endagano eya Katonda erizingrwe, alala ni ku awantu awaawangao woona.

²⁰Muusa yawalaga otino, "Gano na amasaai agasiwrania endagano eya Katonda akorre ni inywe, kandi eya awasikiriire mbwe murinde."

²¹Mu engira efwanani, Muusa yaminza amasaai ku eema alala ne ewintu wiona ewia Awaisraeli waakolanga nawio mu okusawa Katonda.

²²Kuwuene ensikirra eagala mbwe ampi ewintu wiona wieruyiwue na amasaai, kandi amasaai ni gatafukrwe ki omusango, awantu ngawaesa okurekerwa amawi gaawu, yaaya.

Kristo yafumia omusango omulootu okukira

²³Ekio nikio ekigera ni kwanigirizia mbwe eema eya awantu waasawangamo ku ekialo kuno alala ne ewintu wiona ewiawangamo, ewiawanga emifwano egia ewintu ewiri ku igulu, wieruziwue na amasaai aga emiandu. Ne ewintu ewiri ku igulu ewiene, iwio wiagalanga okueruziwua ne emisango emilootu okukira amasaai aga emiandu.

²⁴Kristo ngakaingira mu eema eombookwe na amakono aga omuntu, eyawanga mala omufwano ogwa eema eya kuwuene eri ku igulu. Ni iye yaingira ku igulu mala aideng'a emberu wa Katonda ku iwaga riifu.

²⁵Lwona ngakaingira ku igulu okugia okuifumia ki omusango kangi kiomo awakangasi awa awoozia waaingiranga Asi Aeeru Owutuukre omwaka ki omwaka na amasaai agatari agaawu iwo aweene, yaaya.

²⁶Aweeko ki wandi awo, Kristo akainyasiizie kangi ino okuemera mu okulukwa okwa ekialo. Ni aa okukola otio, mu amiire aga entuuko gano, yaifumia kalala keng'ene okutateewuako okundi, okutuweera omusango ogutoolao amawi giifu goona, ku okufwa okwa yatufwira.

²⁷Mala kiomo kwateewua mbwe omuntu afwa olulala, nikuemao agia mu ekiina.

²⁸Nintio lwona Kristo yafwa olulala lweng'ene ki omusango ogutoolao amawi aga awantu awangi. Aaza okuirana kandi, ni ng'ano okuuza okutoola amawi giifu kandi kawiri, yaaya. Ni aaza okureetra awantu awamurinda owuinunuzi.

Awaibrania 10

Omusango ogwa Yesu yafumia kalala kandi owutuukre

¹Ensikirra eya Muusa yawanga mala ekiiruuzia ekia ewintu ewilootu ewiazanga emberi, ni ng'ane ewintu ewiene yaaya. Kino niki ekigera ni ngekaesanga okueruyia awantu awasawa nawuno wawe awatuufu awawulako embala, ni kuwita ku emisango egiakolwanga omwaka ki omwaka egiwula ne entuuko gino.

²Kuweeko mbwe emisango egio giaesanga okueruyia awantu, kangato okugifumia kukaemereziwue. Ni kutio aeniki awantu awasawa Katonda wakaeruuye kalala kandi owutuukre; kandi wuwulao owuoni owukawanyaasiizie mu emioyo giawu kandi, yaaya.

³Ne emisango egiakolwanga omwaka ki omwaka gino, giaizurizianga mala awantu mbwe wari awooni

⁴aeniki okutoolao amawi na amasaai aga amaiiri na aga embuzi, ne ekintu ekikalu ekitaesekana.

⁵Kino niki ekiagera Kristo olwa yaaza ku ekialo, na alaga Katonda otino, "Emisango egia emiandu ne egia emere ngokagonzia yaaya, no ompeere omuwiri gwange kugere nkole okuagala kwao.

⁶Iwue ngokaomererwa yawa ne emisango egia emiandu egiasambwanga emiwiri giona ne ewintu ewia awantu wafumia ku amawi aga wakorre."

⁷Nikuemao nyawoola otino, "Mpano ndi ano, miire okuuza okukola okuagala kwao, Oo Omwami Katonda Ee, mala kiomo endagano ewoola ku inze."

⁸Owusookere yawoola mbwe, "Ngokagala emisango egia amasaai aga emiandu, emere, emiandu egisambwa emiwiri giona ku isiga eria okufumia omusango, ne egindi egia awantu wafumia ku amawi gaawu, kandi ngokasangaala nagio yaaya" (kukawa mbwe ensikirra yagalanga mbwe emisango gino gikolwe).

⁹Yagia emberi na awoola otino, "Mpano ndi ano, miire okuuza okukola okuagala kwao." Kuno kulagana mbwe yaonanga endagano enkulu kugere ateeo eindi empia.

¹⁰Ekia Katonda aagala ni mbwe, ku omusango ogwa Yesu Kristo yatufumizia kalala kandi owutuukre, tukulwe awantu aweeru awatengeekrwe Katonda.

¹¹Endagano enkulu yagalanga mbwe omuozia awe na aideng'a emberi wa isiga eria okufumia omusango owuire ki owuire, na afumia emisango egitaesa okutoolao amawi.

¹²No Omuozia iifu omunene, iye yaifumia ku Katonda ki omusango omulala omulootu ogutoolao amawi aga awantu, amiire goona. Ni yamala okukola otio, yaikala ansi nyakukono okusaaza okwa Katonda Omukaate ku igulu.

¹³Ao nio arindirra nawuno awazigu waae woona wateewue ansi ya amagulu gaae awataze,

¹⁴aeniki no omusango omulala ogwa yakola guno, amiire okugera awantu awaeruyiwua ku amawi, okuwa awatuufu awawulako embala amiire goona.

¹⁵Omwoyo Omweru ogwa Katonda yoona asigika amang'ana gano ku ifwe mbwe gari kuwene. Owusookere awoola ekia Omwami yawoola mbwe,

¹⁶“Eno nio endagano eya nyiza okuta agati yange nawo, amiire ago ni gamiire okutuuka nyiza okuta ensikirra ziangе mu emioyo giawu kandi nyiza okuzijoja mu amaingirizio gaawu.”

¹⁷Agia emberi na awoola otino, “Ng’anyiza kandi okuingirizia owuoni wuawu ne enkola ziwu embiwi.”

¹⁸Na awantu wamiire okurekerwa owuoni wuawu, omusango ogwa okutoolao amawi katio ngaguagalana kandi.

Okuambiwua amaani no okusiagiziwua

¹⁹Kutio waamwifu, ku amasaai aga Yesu, nyingeeno tuesa okuingira Asi Aeru Owutuukre ni turi no owusiani.

²⁰Eno nie engira empia ereeta owulamu eya tuiguriirweo ewita ku epasia eri omuwiri ogwa Yesu omwene.

²¹Kandi aeniki turi no Omuozia omunene okangatiire enyumba eya Katonda,

²²mutugie ampi ni Katonda no omwoyo oguwulamo okuisemerezia, ni turi no owusiani owuema mu okuwa no okuganya. Aeniki emioyo giifu egia muni egiawanga ni gimwamre, gimiire okuminzwako amasaai aga Kristo okutueruyia kandi emiwiri giifu giona gioziwua na amanzi ameeru.

²³Kutio mutuambe okurindirra okwa tuwoola mbwe turi nakwo wukalu, aeniki Katonda aesa okuteewuako omwoyo okutuusia okuifuuwa kwae.

²⁴Mutuwone kimo tuesa okuikalangusiana omuntu no omwina waae mu okuwa no olugonzi ne enkola endootu.

²⁵Tutaaza twareka okugia mu okuikumia na awiina wiifu kimo awandi wamiire okureka. Ni mutukalangusanie omuntu no omwina waae, ino-ino nyingeeno kimo muwona owuire owua okuirana okwa Omwami ni wuri ampi.

²⁶Ni tugiire emberi ni tukola-ukola owuoni, eno ni tumiire okumanya owuene, guwulao-uwula omusango gundi kandi ogukiasigaale oguesa okusanikira amawi giifu ago.

²⁷Ekisigaale katio ni mala okuambwa no owuti owungi ni turinda okukengerwa ekiina ekiwiiwi ekia okusambwa no omurro omuyu le, oгуuza okusamba awazigu awa Katonda.

²⁸Omuntu-umuntu owatambuka ensikirra eya Muusa, yaesanga okukengerwa ekiina ekia olumbe na ata-ambirwe amasaasra namba wutono, ku amang'ana aga awawoni wawiri namba wasatu weng'ene.

²⁹Ni katio oingirizia mbwe awantu awataza-taza eriina eria Omuzia owa Katonda na amagulu kandi awatoorre wutono amasaai gae aga endagano ki agatari ameeru, iwo Katonda ariwaswawuka no okusu owululu owufwana wutie? Awantu ki awo wanyega Omwoyo Omweru ogwa Katonda, oreetra awantu awa Katonda amasaasra.

³⁰Aeniki tumanyire Katonda owawoola mbwe, "Okuswawuka awantu giri emirimo giange. Nyiza okuoloola omuntu ki omuntu owuagani ne enkola ezia yakola," kandi lwona mbwe, "Omwami aaza okukengera awantu wae ekiina."

³¹Ne ekintu ekitiisia, omuntu okugwa mu amakono aga Katonda omulamu!

³²Mutaaza mwalawira amiire aga mwasooka okutuukramo owueru, kiomo mwaimerra wukalu mu okuganya namba ni mwawitanga mu eminyako-nyaako eminene.

³³Amiire gandi mwanegwa kandi mwakorrwa uwiiwi emberu wa awantu, na amiire gandi mwatunzia awantu wandi awa eminyako-nyaako egifwana gitio gia-amba.

³⁴Mwa-ambra awantu awaawanga mu owusiwe amagongi kandi mwaganya okunyagulwa ewintu wiinyu ni muri ne emioyo emisangaavu, aeniki mwawanga ni mumanyire mbwe inywe aweene muri ne ewintu ewilootu okukira, ewitariwua.

³⁵Kutio mutaaza mwarigiza owusiani owua muri nawuo, aeniki Katonda aaza okuwa-aa omugawo omunene ku okuwa nawuo.

³⁶Musugaane mukole olutuunyo kugere ni mumiire okukola okuagala okwa Katonda, muuze mutuukre ekia Katonda yaifuuwa okuwa-aa.

³⁷Endagano ewoola otino: "Wuangu-wuangu ino, ooza aaza okuuzza kandi ngaaza okukinda, yaaya.

³⁸Na awigolovu wange, iwo waaza okumenya ku okuwa kwawu no okuganya. Ni, ni wairaane enyima, nganyiza okusangaala nawo, yaaya."

³⁹Ni ifwe ngaturi awalala ku awantu awairana enyima kandi waaonwa, yaaya. Ni turi awantu awawa no okuganya kandi waanunulwa.

Awaibrania 11

Emifwano emilootu egia okuwa no okuganya

- ¹Okuganya kuri okuwa no owuene ku ekintu ekia turindirra okutuukra, kandi okuwula ni kaozi ku ekintu ekia tutawona na amiiso.
- ²Okuganya nikwo okwagera ni Katonda aganya waaguukwa wiifu mu amiire aga kale.
- ³Ku okuganya, tuwurra mbwe igulu ne ekialo wialukwa ku amang'ana aga Katonda yasikirra. Kutio ewintu ewiwonwa wialukwa ni kuema ku ewintu ewitawonwa.
- ⁴Ku okuganya okwa Abeeli yawanga nakwo, yafumia omusango omulootu ogwa Katonda yaganya nagwo okukira ogwa Kaini yafumia. Katonda yaganya no omusango ogwa yafumia, okulagana mbwe Abeeli yawanga omuntu omuigolovu. Kandi kukawa mbwe Abeeli yafwa kale-kale ino, ku okuganya okwa yawanga nakwo okwo, akiagamba-gamba ni ifwe na reero.
- ⁵Ku okuganya okwa Enooka yawanga nakwo, Katonda yamutoola mu owulamu wuno agia ku igulu na atawitre mu olumbe. Ni kutio aeniki, ni yawanga na akiari okutoolwa, Katonda yamuganya ki omuntu owa yasangaala nae.
- ⁶Kandi no omuntu awula no okuganya, ngaesa okusangaazia Katonda, yaaya. Aeniki omuntu-umuntu ogia ku Katonda, owusookere paka awe no okuganya mbwe Katonda ario, kandi mbwe ari ne empanwa eya a-aa omuntu-umuntu omuagala no omwoyo gwae gwona.
- ⁷Okuganya okwa Noowa yawanga nakwo, nikwo okwagera na akonza owuato okununula nawuo awa mu enyumba yaae. Ku okuwurra amang'ana aga Katonda yamusiagizia nago ku ewintu ewiawanga ni wikiari okuikola okuemera ri, Katonda yamuingizia ki omuntu omuigolovu emberi waae. Na awantu awasigaale ku ekialo woona, iwo Katonda yawakengera ekiina ekia okufwa olumbe olwa amanzi.
- ⁸Okuganya okwa Abraamu yawanga nakwo kwagera, olwa Katonda yamueta mbwe afume owaawu, agie mu ekialo kindi ekisaasa ekia Katonda omwene yagianga okumu-aa kiwe omugawo gwae, yaganya mala afuma okugia na atamanyire mbwe aa yagianga na ai.
- ⁹Ku okuganya kwazane okwo, Abraamu yamenya ki omugeni mu ekialo ekia Katonda yamuifuwira. Yamenya mu amaema mala kiomo Isaaka ni Yakoobo, awa Katonda yaifuwira owufwanani woona waamenya.
- ¹⁰Yakola otio aeniki yarindirra okuwona omugizi ogwa Katonda omwene nio owawanga omukwaguzi owa iyomboka kandi omuomboki wagwo. Omugizi oguri no owulusa owurio amiire goona.
- ¹¹Ku okuganya okwa yawanga nakwo, Abraamu yawa swawu omwana, kukawa mbwe Saara yawanga omukazi otaiwula kandi iye omwene yoona yawanga

omuntu omukiire ino. Kino kiaikola aeniki omwene yaganya mbwe Katonda owamuifuuwira, arindre amang'ana gaae.

¹²Kutio ni kuemera ku omuntu omulala ono, owawanga ki omiire okufwa, awiizukulu awangi ki eng'eni-ng'eni ezia ku igulu kandi awataiwala ki omusenye ogwa ku esanyaata eya enyanza, waaiwulwa.

¹³Awantu wano wona, waawa no okuganya nawuno mu okufwa kwawu. Ngawakatuukra ewintu ewia Katonda yawaifuuwira yaaya, ni waawiwona kandi wawi-ingizia ni wiawanga ni wikiari ale ino. Iwo waaganya mbwe wari awageni kandi awalugendwa ku ekialo kuno.

¹⁴Awantu awagamba-gamba watio walagana mbwe iwo wagala ekialo kiawu aweene.

¹⁵Kuweeko mbwe waawanga ni wakiangirizia ekialo ekia waang'aanyamo, ao otio wakaweere ni iwaga eria okuirana eyo.

¹⁶Ni aa okukola otio, iwo waawa na amiiga aga okugia mu ekialo ekilootu okukira, ekialo ekia ku igulu. Kutio Katonda ngawa ne ensuuko na aetwa Katonda waawu, aeniki amiire okuwaombokera omugizi.

¹⁷Ku okuganya okwa Abraamu yawanga nakwo, olwa Katonda yamugeezaania, yaganya afumia Isaaka ki omusango. Iye owa Katonda yaifuuwira, yawanga na aikagre okufumia omuzia waae omulala eng'ene ki omusango.

¹⁸Kukawa mbwe Katonda yawanga na amiire okumuifuuwira na amulaga mbwe, "Ni ku Isaaka nio awiizukulu waa waaza okuemako."

¹⁹Abraamu yawoola mu omwoyo gwae mbwe namba ni Isaaka afwire, Katonda ari na amaani aga okumuziusia awe omulamu kandi. Kandi mu engira indi, Katonda yairanzia Abraamu Isaaka omuzia waae na amutoola mu olumbe.

²⁰Ku okuganya, Isaaka yasereka Yakoobo ni Esao mu owulamu wuawu owua emberu.

²¹Ku okuganya Yakoobo olwa yawanga ampi okufwa, yasereka awazia awa Yoseefu wawiri, kandi yasawa Katonda na aisigiike ku ensimbo yaae.

²²Ku okuganya Yoseefu, olwa amiire aga owulamu wuae gawanga ni gari ampi okuwua, yagamba-gamba ku okufuma okwa Awaisraeli mu ekialo ekia Misiri kandi yawasikirra mbwe waginge ewigumba wiae wague nawio, ni wang'aanya eyo.

²³Ku okuganya, awiiwuzi awa Muusa waamuwisa ku emienzi isatu aeniki waawona mbwe ngakawanga omwana-umwana, kandi ngawakatia ensikirra eya Faraao, omwami owa Misiri, yafumia.

²⁴Ku okuganya, Muusa ni yawanga na amiire okuwa omuntu mukulu, yalowa okumanyikana kiomo omuzia owa omwala owa Faraao.

- ²⁵Yakenga mu omwoyo gwae mbwe kwawanga okulootu okugia okunyaasiwua wululu alala na awantu awa Katonda, okukira okumenya owulamu owuizuule ne ekisangaalo ekia owuoni wureeta, ku amiire amatono.
- ²⁶Yatoola okutuukra ensuuko ku amang'ana aga Kristo ki ekintu ekinene okukira okuwa no owunyazi owua mu ekialo ekia Misiri, aeniki yarindiranga okutuukra omugawo gwae mu amiire agaawanga ni gakiari emberi.
- ²⁷Ku okuganya, Muusa yafuma mu ekialo ekia Misiri, ni ng'ani mbwe yatianga okusu okwa omwami yaaya, ni yagia-ugia aeniki yafwana owawonanga Katonda otawonwa na amiiso.
- ²⁸Ku okuganya, Muusa yakola omugomo ogwa Pasaaka kandi yasikirra Awaisraeli okuminza amasaai ku ewiriango, kugere enyankoi owa olumbe ataaza yaita awaana awa Awaisraeli awa oluweri.
- ²⁹Ku okuganya, Awaisraeli waawita ku Enyanza Enyakanyu ki awantu awagenda-genda ku ilowa ikalu. No olwa awantu awa Misiri waageezaania okukola owufwanani, enyanza yawamira wona!
- ³⁰Ku okuganya, enzizi eya omugizi ogwa Yeriiko yaolomoka ewuera ansi boo, olwa awantu awa Katonda waaguisunguuziako ku amiire musamvu.
- ³¹Ku okuganya, Raabu omukazi omusoodani yaingizia awantu awa Muusa yatuma okugia okuwuwarra ekialo owuiwisi, kandi ku okukola otio ngakaitwa alala na awantu awaalowa okuwurra Katonda.
- ³²Iwaga riiza riankeeya okuwoola amangi ku awantu kiomo Gidioni, Baraaki, Samsoni, Yefutha, Daudi, Samweli, alala na awagambi.
- ³³Wano na awantu awa ni kuwitra ku okuganya okwa waawanga nakwo ku Katonda, waakira ewialo ewia owuami ewingi mu amaye, waakangatra ewialo no owuigolovu kandi waatuukra ewintu ewia Katonda yawaifuwira. Awandi awaaigalao eminwa egia endwe,
- ³⁴wazimia endimi ezia omurro uguakaka kandi wamizuka ku okuitwa ne emiambe. Owunyowu-nyoowu wuawu wuagalusiwua wuwa amaani kandi waairana wawa awakalangufu mu iye mala wavuna awazigu waawu awaema mu ewialo ewigeni.
- ³⁵Ku okuganya, awakazi wandi waaziusiziwua awantu waawu awaawanga ni wamiire okufwa, wawatoola wagia nawo. Awandi okuganya kwawu ku Katonda kwagera waitwa owululu, ni walowere okureka okuganya kwawu kugere walekulwe wawe owuyanga, ni wari no okuagala mbwe waaze waziusiwue watuukre owulamu owulootu okukira.
- ³⁶Awandi waang'ong'oonrwa kandi waswawukwa enkowa uwiiwi. Awandi waasiwua ne eminyororo kandi warigizwa mu owusiwe.

³⁷Waakubwa na amawaale nawuno wafwa, awandi waakengwa wawaluulwa embaala wiwiri, na awandi waaitwa ne emiambe. Awandi waagenda-genda ni wiiwooye amaseero aga amagondi na aga embuzi. Waataka kugia okuria, waanyasiwua wululu kandi wakorrwa uwiiwi owuluguulwa.

³⁸Awantu wano waatoolwa ki awatasugre no okumenya ku ekialo kuno. Waagenda-genda ni wakuba eno ne eno mu ekeewa ni waiwisa mu ewigiri, kandi mu embagatana ezia amawuuta ni mu amiina aga mu ilowa munsu.

³⁹Awantu wano wooka Katonda yasangaala nawo ku okuganya kwawu okwa waawanga nakwo ku iye. Kukawa kutio, awulao namba omulala ku iwo owatuukra ewintu ewia Katonda yaifuuwa okuwa-aa.

⁴⁰Ni kutio aeniki Katonda yawanga no omupango omulootu ni ifwe okukira, kugere mala ni wari alala ni ifwe, nikwo wakolwe awantu awatuufu awawula ne embala.

Awaibrania 12

Katonda agolola awaana waae no olugonzi

¹Kutio aeniki tusunguziwe no omurima omunene ogwa awawoni ku owulamu owulagana okuganya okunene tutio, mutuvuule ekintu-ukintu ekiiza kiatuweera ekigazio tute ansi, ino-ino owuoni owuuzza wuatunaga. Kandi muturumuke embiro ezia Katonda atuteriire emberu no olutuunyo.

²Mutute amiiso giifu ku Yesu tiiri, iye owa okuganya kwifu kuisigiikeko okuamera mu owutanikro kutuuka mu owutuuko. Omwene yaganya okufwa olumbe olwa ensuuko ku omusalaaba aeniki yawanga na amanyire owusangaavu owua yaazanga okutuukra emberu. Nyingeeno aikaale nyakukono okusaaza okwa entewe eya owuami eya Katonda.

³Mute amaingirizio giinyu ku iye owasikia omwoyo gwae ni yawitanga mu ewintu ewiwiiwi wiona ewia awantu awooni waamukorra, kugere mutaaza mwaluya kandi mwafwa emioyo.

⁴Mu okulwania owuoni, inywe mukiari okutuuka aa amasaai giinyu gasulula.

⁵Kusi mumiire okulawira amang'ana aga Katonda awakalangusia nago na awaeta awaana waae? Yawoola otino: "Mwana wange, otatoola okugololwa okwa Omwami Katonda wutono kandi otafwa omwoyo na akugaania ekintu.

⁶Aeniki Katonda agolola awaana waae awa agonziizie kandi aswawuka awantu wooka awa aingizia ki awaana waae."

⁷Musikie emioyo giinyu ni Katonda awagolola, aeniki nintio akorra awaana waae. Kusi arioko omwana otagololwa ni swae?

⁸Iwue no otagololwa kiomo awaana wooka wakorrwa, kane ngori omwana owa mu enyumba ndiki-ndiki, no ori mala enzagukirwa.

⁹Ni tu-aa waasoifu awa ku ekialo kuno awatugolola ni tukorre uwiiwi owuti, katio tusugaane tuiisie ansi owufwana wutie emberu wa Soifu owa ku igulu kugere tumenye owulamu owutariwua?

¹⁰Waasoifu watugolola ku emiaka emitono, kandi wakola watio kiomo iwo aweene wawuine. No okugololwa okwa Katonda okwo, kulootu ku ifwe aeniki okuagala kwae ni mbwe tuwe awantu aweeru kiomo iye.

¹¹Enyinga ezia omuntu agololwa, awona uwiiwi kandi ngawona geeza, yaaya. Kukawa kutio, lunyima, okugololwa okwo kureetra awantu awaigereere nakwo, owulongoole no owuolu mu owulamu wuawu.

¹²Kutio mukalungusie amakono giinyu agadembuuke, na amasigamo giinyu amadewenyu.

¹³“Mugolole engira eya amagulu giinyu galonda ewe enyigolovu,” kugere awantu awawalonda, wakawa mbwe wari wanyowu-nyoowu namba awarema, ngawaaza okuwa uwiiwi okukira kiomo wari, ni waaza okulama.

Okulaga Katonda omugongo kulowerwe

¹⁴Mukole wukalu muwone mbwe mumenyere no owuolu na awantu woona kandi mumenye owulamu owueru aeniki awantu awatari aweeru ngawariwona Omwami.

¹⁵Muwone mbwe awulao omuntu ku inywe okeeyire okutuukra owusiza owua Katonda kandi mbwe emizi emilulu, egitawania kandi egimwamia awantu, gitaaza giawakomamo.

¹⁶Muwone mbwe awulao omuntu ku inywe ori omusondo namba otaiwariire ni Katonda ki Esao, owaguzia omugawo gwae ogwa omuzia owa oluweri, no okuria okulala kweng'ene.

¹⁷Mumanyire mbwe lunyima ni yaagalanga mbwe atoole ensereki eya omugawo ogwo, yalowua kandi kukawa mbwe yaguagala na amaziga amangi gamuyooka, okwo ngakukagalusia ekiamala okuwisiwua namba wutono.

¹⁸Inywe mukiari okuuzza mu ekigiri ekiesa okuambwa na amakono, ekigiri ekiyia no omurro. Mukiari okuuzza mu ekierema, ansi ayumbre kandi aa omuyaga ogwa ekiwunzu-wunzu guwuuta kiomo Awaisraeli waakola ku ekigiri ekia Sinaai.

¹⁹Eyo waawurra olwiga ni lurra wukaalu, no omwoyo ogwawoolanga amang'ana agaagera awantu waisasaama Katonda mbwe areke okugamba-gamba nawo.

²⁰Waakola watio aeniki amang'ana aga Katonda yasikirra na awoola mbwe, “Namba ni kuri mbwe omwandu nigwo ogutazre ekigiri ekio, paka gukubwe na amawaale gufwe,” gaawa-ambia owuti ino.

²¹Ewia waawona ao wiatiisianga, okwagera ni Muusa awoola mbwe, “Nyadada no owuti.”

²²Ni inywe muuzre mu ekigiri ekia Sayuuni, Yerusaleemu omugizi ogwa Katonda omulamu oguri ku igulu. Muuzre ku okuikumia okwa enyankoi amaelufu na amaelufu awaizuule ne ekisangaalo du.

²³Muuzre mu okuikumia okwa awaana awa oluweri awa amiina gaawu gaajojwa ku igulu. Muuzre ku Katonda omwene, omukengi owa ekiina ekia awantu woona kandi ku emioyo egia awantu awigolovu awa Katonda amiire okuta wawa awatuufu awawulako embala.

²⁴Muuzre ku Yesu otaao endagano empia agati ya Katonda na awantu kandi ku amasaai agaminzwa agawoola amang'ana amalootu okukira amasaai aga Abeeli.

²⁵Muwone mbwe ngamulowere Katonda ogamba-gamba ni inywe. Aeniki ni kuri mbwe Awaisraeli awaalowa okuwurra aga Muusa owawasiagizia ku ekialo ngawakamizuka, katio ifwe kuuza okutuweera uwiiwi owufwana wutie ni tulowere okusiagiziwua okwa omuntu oemere ku igulu?

²⁶Anyuma aria omwoyo gwae gwazegezia ekialo, ni nyingeeno amiire okuifuuwa na awoola mbwe, "Olwa okuwiri kandi nyiza okuzegezia, ng'ane ekialo kieng'ene, ni kugia igulu riona."

²⁷Ing'ana eriwoola mbwe "Olwa okuwiri kandi" rilagana mbwe ewintu ewialukwa wiona wiiza okuzegeziwua, kugere ewintu ewitaesa okuzegera wieng'ene wiwe mbwe niwio ewisigalao.

²⁸Kutio mutuiranzie Katonda otioo, aeniki ifwe tutuukra owuami owutaesa okuzegera. Mutusawe Katonda mu engira enzeru eya aganyire nayo, ni tulagana owuti kandi ni tumutiire ino,

²⁹aeniki Katonda iifu afwana omurro ogusamba gwamala chwe.

Awaibrania 13

Emirimo egiomerezia Katonda

¹Mugie emberu no okuwa no olugonzi agati iinyu kiomo awada ku Kristo.

²Mutaaza mwalawira okuingizia awageni yaaya, aeniki ku okukola otio awandi wamiire okuingizia kugia enyankoi ni watamanyire.

³Muingirizie Awakristo awiina wiinyu awari mu owusiwe, mala kiomo kukaweere mbwe mwona muri nawo mu owusiwe; kandi muingirizie awari mu eminyako-nyaako mala kiomo kukaweere mbwe mwona muri nawo mu eminyako-nyaako egio.

⁴Okukwezana ne ekintu ekisugaane okueewua owuti na awantu woona, kandi owuriri owua awantu awakwezaane paka wurindwe no owueru wuona, aeniki Katonda aaza okukengera awantu woona awari awasoodani alala na awagia ku iseero na awakazi namba awasaaza awa awandi, ekiina.

- ⁵Muwe ale no okugonzia amasendi mu owulamu wuinyu kandi muigute ne ewintu ewia muri nawio aeniki Katonda amiire okuwoola otino, “Ng’anyiza okuwareka, lwona ng’anyiza okuwalaga omugongo, yaaya.”
- ⁶Kutio tuwoola no owusiani mbwe, “Katonda nio ontunzia, kutio ng’anyiza okutia ekintu. Katio niki ekia omuntu aesa okunkorra?”
- ⁷Mutalawira awakangasi wiinyu awamiire okuwagerera amang’ana aga Katonda. Muingirizie owulamu owua wamiire okuwa ni wamenyere kandi mwona mukole wukalu muwone mbwe mumenyere no okuganya okufwanana no okwawu.
- ⁸Yesu Kristo no omulala otagaluka izo, reero kandi amiire goona.
- ⁹Mutaaza mwasemereziwua ne engerera engeni ezigawukane-gawukaane, yaaya. Kuri kulootu ne emioyo giifu gikalangusiwua no owusiza owua Katonda, ni ng’ani ne endagirra ezigamba-gamba ku ewiokuria ewisugaane wizirwe ne ewitasugaane wizirwe, aeniki wuwulao owuitunzi owua endagirra ezio zireetra awantu awazilonda.
- ¹⁰Turi ni isiga eria okukola omusango eria awantu awakola emirimo mu eema eya okusawa Katonda ngawaganyiirwe okuriirako.
- ¹¹Omuozia omunene aingira Asi Aeeru Owutuukre na agingre amasaai aga emiandu ki omusango ogwa okufumia owuoni. Ne enyama eya emiandu egio esambrwa enze eya omugizi.
- ¹²Kutio Yesu yona yanyaasiziwua enze eya ekiriwua ekia omugizi kugere aeruyie awantu na amasaai gaae omwene, wawe aweeru.
- ¹³Kutio mutumugieko enze eya ekambi, tugie tuwone ensuuko ezia omwene yawona.
- ¹⁴Aeniki ku ekialo kuno, ifwe tuwula no omugizi oguuza okuwaa amiire goona. Ni turindirra okugia ku omugizi ogukiari emberu, oguuza.
- ¹⁵Kutio, ni kuwitra ku Yesu, mutufumizie Katonda omusango ogwa okumutondowola enyinga ziona ni tugamba-gamba ku owunene owua eriina riae.
- ¹⁶Kandi mutalawira okukorra awandi geeza, no okugawira awandi ewintu wiinyu aeniki Katonda asangaala ne emisango ki egio.
- ¹⁷Mu-ee awakangasi awawakangatiire owuti kandi mukole ewia wawalagre. Wakola emirimo egia okurinda emioyo giinyu ni wamanyire mbwe waaza okuirania amang’ana emberu wa Katonda. Muwawurre kugere wakole emirimo giawu no owusangaavu, ni ng’ani ki omusigo yaaya, aeniki okukola otio ngakuuza okuwatunzia, yaaya.

¹⁸Muganye mutusawire Katonda. Tuwula ne ekitukengera ekiina mu emioyo kandi tuagala mbwe tumenye owulamu owueerwe owuti mu ewintu wiona ewia tukola.

¹⁹Ino-ino, mbasawa mbwe munyiyembere Katonda kugere ampe iwaga eria okuwairanako eyo wuangu ano.

Okusawa na amakeezio agatuukre

²⁰Nsawa Katonda oesana owuolu, owa ni kuwitra ku amasaai aga endagano etaoneka amiire goona, kandi owaziusia Yesu Omwami iifu ori Omwai owa amagondi omunene,

²¹mbwe aganye awa-ee ewintu ewilootu wiona ewiagalana kugere mukole okuagala kwae. Kandi musawa mbwe awa-ee amaani aga okukola ewintu ewimusangaazia, ni kuwitra ku Yesu Kristo osugre no okueewua owunene amiire goona agawula ne entuuko! Amin.

²²Waamwifu, mbaisasaama mbwe muganye muwurre amang'ana aga mbajojeere mu itu erimpi rino, okuwakalangusia nago.

²³Nyagala muwe no okumanya mbwe wamwifu Timotheo yamiire okusiwulwa aemere mu owusiwe. Na atuukre ano wuangu, nyiza okuuza nae ni nyiza okuwawona.

²⁴Awiifu munkeezizieko awakangasi wiinyu na awantu awa Katonda wona. Awakristo awaema Itaalia wawatumiire amakeezio.

²⁵Owusiza owua Katonda wuwe ni inywe mwona!

Awayakoobo

Awayakoobo 1

- ¹Ni inze Yakoobo omutumwa owa Katonda no Omwami Yesu Kristo. Mbajojera inywe ewiriango ikumi ni wiwiri ewia Israeli, ewitanyiike mu ewialo. Mutuukre amakeezio gange.
- ²Waamwifu, mutoole okugeezaniwua okwa mugeezaniwua mu engira enyingi no owusangaavu,
- ³aeniki mumanyire mbwe okuganya kwinyu ni kugeezaniwua muwa no olutuunyo.
- ⁴Mureke olutuunyo lumale emirimo, nikwo muuza okuwa awantu awakomere kandi awatuufu awatakeeyirwe ne ekintu-ukintu.
- ⁵Omuntu na akeeyire amaganga asugaane asawe Katonda, oesania ku awantu wona no owusiza na atagawuule omuntu, kandi Katonda aaza okumu-aa.
- ⁶Ni na asawa, paka awe no okuganya okuwulamo kaozi, aeniki omuntu ori ni kaozi afwana amasiira aga enyanza agawuutwa ni gairwa eno ne eno no omuyaga.
- ⁷Omuntu oyo ngasugaane aingirizie mbwe aesa yatuukra ekintu-ukintu ku Omwami Katonda.
- ⁸Agawuuke kawiri mu amaingirizio kandi aluga-luga mu ewintu wiona ewia akola.
- ⁹Omukristo ori ansi mu amiiso aga wa awa ekialo, asugaane awe omusangaavu aeniki emberi wa Katonda ari kungulu ino.
- ¹⁰No omunyazi asugaane awe omusangaavu ku okuisiwua kwae ansi ni Katonda, aeniki aaza okuteeka ki amauwa aga isuwi eria mu isaka.
- ¹¹Aeniki enyanga ne efumre no owuyu wuayo, wusamba owusuwi nawuno amauwa gaagwa ansi kandi owulootu wuawuo wuaoneka. Mu engira endala eyo, omunyazi aaza okuteeka namba na akiakola emirimo giae.
- ¹²Kuwuene omuntu okola olutuunyo mu eminyako-nyaako asereekwe, aeniki na amiire okukira okugeezaniwua, aaza okutuukra ekigudu ekia owulamu ekia Katonda amiire okuifuwira awantu awamugonziizie.
- ¹³No omuntu ageezaniwua, ngasugaane awoole mbwe, “Katonda angeezaania” yaaya aeniki Katonda ngaesa okugeezaniwua okukola owuoni yaaya, lwona ngageezaania omuntu.
- ¹⁴No omuntu ki omuntu ageezaniwua no, okuagala okuwiiwi okwa ari nakwo iye omwene kumukulula kandi yasemereziwua.

¹⁵Okuagala okuwiiwi ni kumiire okuamba isaai, kuiwula owuoni. No owuoni ni wumiire okukoma, wuiwula olumbe.

¹⁶Mutaaza mwasemereziwua waamwifu awa ngonziizie.

¹⁷Okufumia okulootu ne empanwa ewulako embala wiona wiema ku igulu ni wiika ansi okuema ku Soifu owaluka ewimuri ewimurika ku igulu wiona, otagaluka-galuka ki ekiiruuzia.

¹⁸Ku okuagala kwae, yatuiwula ni kuwitra ku amang'ana gae agari kuwuene, kugere ifwe tuwe ki ensaafu ezisookere ku ewintu ewia yaluka wiona.

Okutegerezia no okukola

¹⁹Wamwifu awa ngonziizie, muwe no okumanya mbwe omuntu ki omuntu asugaane awe omwangu okutegerezia amang'ana, ogia mpola okugamba-gamba kandi ogia mpola okuyia enda.

²⁰Ee, aeniki okuyia okwa enda ngakureeta owulamu owuigoloole owua Katonda aagala mbwe awantu wamenye, yaaya.

²¹Kutio murekane ilala ne ewintu ewimwamu ewitasugaane wiona alala na amawi agaizuule ekialo kandi mutoole amang'ana amalootu agamiire okusimbwa mu owulamu wuinyu, ni muisiizie ansi.

²²Mutaaza mwawa mala awantu awawurra-uwurra amang'ana aga Katonda, aeniki okukola otio no okuisemerezia wusaasa. Mukole ekia amang'ana ago gawoola.

²³Omuntu-umuntu owurra amang'ana aga Katonda ni yareka okukola ekia amang'ana ago gawoola afwana omuntu owarra ekieni kiae mu ekiyoo

²⁴ni, na amiire okuiwona, afuma kandi yalawira che kiomo omwene afwanana.

²⁵No omuntu owarra amang'ana agari mu ensikirra endamu ezia Katonda enyinga ziona, ensikirra ezisiwula awantu waawa owuyanga, kandi na akola ekia amang'ana ago gawoola aa atalawiire ewia awuriire, Katonda aaza okumusereka iye, mu ewintu ewia akola wiona.

²⁶No omuntu aiwona mbwe asawa Katonda mu engira eri kuwuene, ni kandi ngarindre olurimi lwae wukalu, aisemerezia wusaasa kandi okusawa okwa asawa Katonda kuwula emirimo.

²⁷Okusawa Katonda okwa Soifu Katonda aganyire nakwo ki okweru kandi okuwulamo embala kuri kutino: okurinda awaana awawisa na awakazi awafwire mu eminyako-nyaako giawu kandi omuntu okuirinda ekialo kitamumwamia.

Awayakoobo 2

Engawuzi elowerwe

- ¹Waamwifu, ki awantu awaganyire ku Omwami Yesu Kristo ori no owunene, mutaaza mwalagana engawuzi, yaaya.
- ²Tutoole mbwe omuntu oiwooye enguwo endootu ne eteeru eya edhaabu ku ekiala aazre mu okuikumia kwinyu, nikwo omuntu omutaka oiwooye enguwo etanduku yoon aaze aingire.
- ³Ni kuri mbwe muingizia omuntu owa enguwo endootu geeza ni mumulaga mbwe, “Iwue, entewe endootu ngino eri ano, ikalako,” no omutaka mumulage mbwe, “Iwue, gia oimerre aaria” namba mbwe, “Iwue, ikala ansi ku amagulu gange ano”
- ⁴ao otio ng’amumiirre okulagana engawuzi agati iinyu kandi muwa ki awakengi awa ekiina awari na amaingirizio amawiiwi?
- ⁵Awiiko wange awa ngonziizie, mutege amatwi muwurre. Katonda alowoole awataka emberu wa ekialo kino, okuwa awanyazi mu okuganya kandi okuwa mu owuami owua yaifuuwira awantu awamugonziizie.
- ⁶Ni inywe mumiire okurega awataka. Kane, awanyazi ng’aniwo awawasakula? Iwo ng’ani iwo awawakulula ni wawaira mu ewiina?
- ⁷Ng’ani iwo awagamba-gamba uwiiwi ku eriina inene eria Yesu owa muri awantu waae?
- ⁸Ni kuri mbwe kuwuene murindre ensikirra enkaate ino eri mu endagano ewoola mbwe, “Gonzia omwina waa kiomo oigonziizie iwue omwene,” ao mukola geeza.
- ⁹Ni, ni kuri mbwe muri ne engawuzi, ao otio mukola owuoni kandi ekiina kiwakirre ki awantu awaona ensikirra.
- ¹⁰Aeniki omuntu na arindre ensikirra ziona, na aone mala endala eng’ene, ekiina kimukirre mbwe aonere ensikirra ziona.
- ¹¹Kuri kutio aeniki Katonda omulala owawoola mbwe, “Otaaza wawita no omukazi nakuwa omusaaza owa owundi,” nio owawoola yoon mbwe, “Otaita.” No oitre omuntu, oonre ensikirra ziona kukawa mbwe iwue nowita no omukazi nakuwa omusaaza owa owundi.
- ¹²Mu okugamba-gamba kandi mu enkola ziinyu muwe no okumanya mbwe muuza okukengerwa ekiina ne ensikirra egera awantu ni wawa owuyanga.
- ¹³Ee, aeniki awantu awata-ambra awandi amasaasra, iwo Katonda ngariwa-ambra amasaasra olwa ariwakengra ekiina. Omuntu oambra awandi amasaasra, iye ngasugaane atie okukengerwa ekiina.

Okuganya okuwula ne enkola kufwire kuwula emirimo

- ¹⁴Wamwifu, no owulootuuki omuntu okuwoola mbwe iye ari no okuganya ku Katonda, na awula ne enkola chee? Oingirizia mbwe okuganya ki okwo kuesa okumununula?

- ¹⁵Reka tutoole ku omufwano mbwe ario wamwifu ku Kristo owekizia nakuwa owekikazi owula ne enguwo no okuria okwa owuire ki owuire chee.
- ¹⁶Omulala ku inywe na amulagre otino, “Fuma ogende! Inze nkuagarra owulootu. Iguta kandi embeo etakuria,” ni eno kiwulao-uwula ekintu ekia amukoriire okumutuusizia okuagala okwa omuwiri okwa ari nakwo okwo. Ao otio owulootu wuri?
- ¹⁷Mu engira endala eyo, okuganya kweng’ene okuwulamo enkola kufwire kuwula emirimo.
- ¹⁸Omuntu aesa yalowa na awoola otino, “Wario awantu awari no okuganya, na awandi awari ne enkola.” Ni inze mboola ntino, “Nanyesa okuwona okuganya kwao no owula ne enkola endootu, yaaya. Ni inze nyiza okukulaga okuganya okwa ndi nakwo ni kuwita ku enkola ziangе endootu.”
- ¹⁹Mberi ori no okuganya mbwe Katonda ari omulala weng’ene? Ao otio kulootu! Ni namba ewikeeno wiona wiri no okuganya otio kandi okwo kugera ni wiadada.
- ²⁰Iwue omuntu omumaya ono, okia-agala okumanya mbwe okuganya okuwula ne enkola kuwula emirimo?
- ²¹Katonda ngayatoola guukwa iifu Abraamu ki omuntu omuigolovu, ku enkola eya yakola olwa yafumia omuzia waae Isaaka ki omusango, ku isiga eria okufumia omusango?
- ²²Ngowona mbwe okuganya kwae ne enkola ziae, ziakolanga alala, kandi mbwe enkola ezia yakola ziagera okuganya kwae kutuuka kuwuene?
- ²³Kandi amang’ana agari mu endagano agawoola mbwe, “Abraamu yaganya ku Katonda, kandi Katonda yamuwalra okuganya okwo ki owuigolovu,” gaatuuka kuwuene, kandi Abraamu yaetwa omwiko owa Katonda.
- ²⁴Katio oesa okuwona geeza mbwe omuntu aingiziwua mu empurizanio ni Katonda ku ewintu ewia akola, ni ng’ani ku okuganya kweng’ene, yaaya.
- ²⁵Mu engira endala eyo, Raabu omukazi omusoodani, ngayatoolwa ki omuigolovu ku ekintu ekia yakola olwa yaingizia awantu awaatumwa okugia okuwarra ekialo owuiwisi kandi aaza awata ku engira indi ni wairana aa waaema?
- ²⁶Mala kiomo omuwiri oguwulamo omwoyo gufwire, nintio lwona okuganya okuwula ne enkola kwona kufwire kuwula emirimo.

Awayakoobo 3

Okurinda olurimi

- ¹Waamwifu, owungi wuinyu ngawasugaane waite mu emirimo egia okugerera awantu, yaaya. Aeniki mumanyire mbwe ifwe awagerezi, ekiina kiifu kiiza okuwa ekikalu ino.

- ²Twona tuiguunya mu engira enyingi. No omuntu aigoloole mu amang'ana aga awoola, ari omuntu omulongoole owulamo embala kandi aesa okurinda omuwiri gwae gwona.
- ³Ni tuta ewigowero ewitono mu eminwa egia efaraasi kugera zituwurre, tuesa twalaga entiang'i enkaate ezio engira ezia tuagala mbwe zilonde.
- ⁴Namba ni tutoorre emeeli ki omufwano, kukawa mbwe emeeli nkaate kandi eirwa ne emiyaga emizito ino, elagwa engira mala ne ekigowero ekitono mala yagia asi-uasi aa omugowa agala mbwe egie.
- ⁵Mu engira efwanani, olurimi luri ekiimo ekitono ku omuwiri, ni luwoola amang'ana amakate-kaate aga okuitumbula. Ingiriziako kiomo isaka inene rikubwako omurro mala ni endasi endala.
- ⁶Olurimi, agati eya ewiimo windi ewia omuwiri, luri omurro ogusamba, kandi ne ekialo ekiizuule no owuoni du. Luona omuwiri ogwa omuntu gwona kandi lukuba omurro ku owulamu owua omuntu wuona kandi olwene lukubwako omurro oguema Gaena eene.
- ⁷Entiang'i enyingi ezigawukane-gawukaane kiomo enyonyi, entiang'i ezimoola, alala ne ezimenyere mu enyanza ziona, zifugwa no omuntu mala eyawanga endalu, yairana yawa empolu.
- ⁸Na awulao omuntu oesa yarinza olurimi lwae. Olurimi luwoola ewintu ewiwiiwi ewingi ino aa lutaezera kandi luizuule no owusungu owuita.
- ⁹Tukola no olurimi okutondowola Omwami kandi Soifu Katonda, kandi no olurimi olulala olwo, tufuuwa awantu awa Katonda yaluka mu embonekano yaae omwene.
- ¹⁰Omunwa omulala gufumia amang'ana agatondowola alala na agafuuwa. Waamwifu, ngakusugaane kuwe kutio yaaya.
- ¹¹Amanzi amalootu na amalulu gaesa otie okufuma mu ekisulo ekilala?
- ¹²Waamwifu, omuti ogwa omukuyu lwona gukalawia zaituuni, nakuwa omuzabiibu gulawie omukuyu? Ekisulo ekia amanzi agarimo omuunyu kiona ngakiesa okufumia amanzi amalootu.

Amaganga agaema ku Katonda na agaema ku ekialo

- ¹³Naanu ku inywe ori omuganga kandi ori no okuwurra? Asugaane awilagane ku okumenya owulamu owulootu, ne ewintu ewia akola no okuiisia kwae ansi okuema mu okuwa na amaganga.
- ¹⁴Ni, no owiikre iyari ilulu alala no okuagala ewiao omwene mu omwoyo gwao, otaaza waitumbula mbwe ori omuganga. Okukola otio no owuweeyi kandi no okulowa owuene.

¹⁵Amaganga agafwana gano ngagaika ansi ni gaema ku igulu yaaya, ni gaema ku ekialo, gari aga enkola ezia ku ekialo kandi gaema ku ekikeeno.

¹⁶Asi aa awantu waizuule ni iyari no okuagala ewintu wiawu aweene, ao ooza okutuukrao okuoneka ne enkola embiiwi ziona.

¹⁷Na amaganga agaema ku igulu, owusookere gari ameeru kandi gareeta okugonzia okuwa no owuolu na awandi, okuwa na amaingirizio amalootu na awantu, okuiisia ansi, okuizula na amasaasra ne enkola endootu, okuwona awantu owuagani alala no okugonzia owuene.

¹⁸Awantu awareeta owuolu agati ya awantu, awasimba owuolu, iwo wagesa owuigolovu.

Awayakoobo 4

Iisia ansi emberu wa Katonda

¹Ekireeta amaye ne ensoolo agati iinyu niki? Ngagaema ku okuagala okungi okwa muri nakwo, nikwo okulwana mu emioyo giinyu?

²Oagala ekintu, ni ngokituukra. Oita kandi oagala ekia owundi, ni ngoesa watuukra ekia wagala. Osoolana kandi olwana. Ngotuukra aeniki ngosawa Katonda.

³Ni no osawa, ngotuukra aeniki osawa na amaingirizio amawiiwi, mbwe no otuukiire, ogie okole nakio mala ewintu ewikusangaazia iwue omwene.

⁴Inywe awantu awatarinda endagano ki awantu awagonziizie okugenda-genda enze eya enserezi wano! Ng'amumanyire mbwe okuamba owuiko ne ekialo kureeta owuzigu ni Katonda? Omuntu-umuntu olowoole okuamba owuiko ne ekialo, awa omuzigu owa Katonda.

⁵Kusi muingirizia mbwe endagano ewoola wusaasa mbwe Omwoyo Omweru ogwa Katonda agera na atumenyamo ari ni iyari ino mbwe tugonzie Katonda eng'ene?

⁶Ni, Katonda atu-aa owusiza owungi. Ekio nikio ekigera ne endagano ewoola otino: "Katonda alowa awantu awaitumbula na aesana owusiza ku awantu awaiisia ansi."

⁷Kutio muiisie ansi emberu wa Katonda. Mulowe Ekikeeno, kandi kiiza okuwarumuka.

⁸Muuzie ampi ni Katonda, ni oona aaza okuuzza ampi ni inywe. Muozie amakono giinyu, inywe awooni, kandi mueruyie emioyo giinyu inywe awantu awagawuuke kawiri mu amaingirizio gaawu wano.

⁹Muiyumba kandi murre ni mukuba enkweri. Mureke okuseka, mutanike okurra kandi mureke okuwa awasangaavu, mutanike okuiyumba.

¹⁰Muisie inywe aweene emberi wa Katonda, nikwo aaza okuwaginga kungulu.

¹¹Waamwifu, mutata amang'ana aga owuweeyi ku awiina wiinyu. Omuntu-umuntu ogamba-gamba uwiiwi ku omwina waae namba okengera omwina waae ekiina, agamba-gamba uwiiwi ku ensikirra, kandi ensikirra eene nie eya akengera ekiina. No okengera ensikirra ekiina, ngogirinda yaaya, no ogiikazizia ekiina.

¹²Ario omulala eng'ene oesana ensikirra kandi omulala ori omukengi owa ekiina. Ee omulala eng'ene oesa okununula awantu no okuona awantu. Ni iwue oriki okakengera omwina waa ekiina?

Okuitumbula ku ekia enkio orikola

¹³Katio sarigira owurre, iwue owoola mbwe, “Reero namba enkio tuuza okugia ku omugizi guno nakuwa guria, tugie tutoole omwaka eyo, ni tuniwa kandi ni tutuukra amasendi.”

¹⁴Oreeta otie okuwoola otio, ni ngomanyire namba ekiiza okuikola enkio? Kusi owulamu wuao wuriki? Ofwana ifu eriwaao mala ku enyinga entwini, kandi riateeka no okuteeka.

¹⁵Aa okuwoola otio, osugaane owoole mbwe, “Katonda na aganyire, tuuza okuwa awalamu kandi tukole kino namba kiria.”

¹⁶Ne ekirio, oitumbula kandi oitoola. Okuitumbula okwo kwona, kuri owuoni.

¹⁷Kutio omuntu omanyire ekilootu ekia asugaane akole, na areka-ureka okukikola, akola owuoni.

Awayakoobo 5

Awanyazi wasiagiziwua

¹Nyagala mutege amatwi mumpurre inywe awanyazi! Murre kandi mukube enkweri aeniki emidambo giwaazra.

²Owunyazi wuinyu wuworre kandi enguwo ziinyu zimiire okuriiwua na amage.

³Edhaabu ne efeedha ziinyu ziriirwe ne ekuuti kandi ekuuti yazane eeza okuwa ekilago mbwe muri awooni, olwa eeza okuria kugia emiwiri giinyu ki omurro ogusamba ewintu, owuire owua ekiina. Kukawa kutio, inywe mukiaiwiikra emiandu emingi mu amiire aga owutuuko gano!

⁴Muwurre kiomo emisaara egia awantu awaawakorra emirimo mu emisiri giinyu, egia mwalowa okuoloola giwarirra. Okurra okwa awagesi kumiire okutuuka mu amatwi aga Omwami Katonda Nyakianga.

⁵Mumiire okumenya ku ekialo kino ni muisangaazia kandi ni mukola mala okuagala okwa emiwiri giinyu aweene. Mumiire okuingizia amanula amangi ki emiandu egirinda okugia okuwaagwa.

⁶Mumiire okukengera awantu awawula no owuoni ekiina ekia olumbe kandi muwaita wusaasa, ni wawula ni inywe amang'ana.

Okusikia omwoyo mu emidambo

⁷Waamwifu, musikie emioyo giinyu kane, nawuno Omwami Yesu airane. Mumanyire kiomo omurimi arinda omusiri okulawia emere endootu, kandi kiomo asikia omwoyo na arinda emvula eya omwenzi ogwa Katawalaari no omwenzi ogwa Nyauru.

⁸Mwona musikie emioyo giinyu kandi muimerre aa mutaiyunzia yaaya, aeniki okuirana okwa Omwami kuri ampi.

⁹Waamwifu, okuirizia kutaaza kwawaa agati iinyu kugere Katonda atawakengra ekiina mbwe muri awooni. Omukengi owa ekiina nyingeeno ari ampi, aimeriire enze eya ekiriango!

¹⁰Waamwifu, nyagala mulonde omufwano ogwa awagambi awaagamba-gamba ku eriina eria Omwami Katonda. Iwo waasikia emioyo giawu namba mu emidambo eminene egia waawona.

¹¹Kiomo mumanyire, awantu awamiire okukola olutuunyo mu eminyako-nyaako, niwo awa tutoola ki awasereekwe. Mwamiire okuwurra kiomo Ayubu yakola olutuunyo kandi ekia Omwami Katonda yamukorra lunyima. Omwami Katonda aizuule na amasaasra na amagongi du!

¹²Waamwifu, owukirre wiona, mutaaza mwaifuuwa namba ni igulu, ekialo nakuwa ekintu-ukintu. Inywe ni muwoorre mbwe "Ee" kuwe mala kutio, kandi ni muwoorre mbwe "Yaaya" kuwe mala kutio. Ni kutari kutio, muuza okukengerwa ekiina mbwe muri awooni.

Okusawa okwa omuntu ori no okuganya

¹³Ario omulala ku inywe ori ne emidambo? Asugaane asawe Katonda. Ario omuntu ori omusangaavu? Asugaane aembe enyembo ezia okutondowola Katonda.

¹⁴Ario omuntu ori omulwire? Asugaane aete awagaaka awa ekaniisa waaze wamusawire Katonda kandi wamuwake na amavuta ku eriina eria Omwami Katonda.

¹⁵Kandi okusawa okwa awantu awari no okuganya ku Katonda, kuuza okugera omulwire alame. Ee, Katonda aaza okumuemia ku iseero awe omulamu. Ni ni kuri mbwe yakola owuoni, Katonda aaza okumurekera.

¹⁶Kutio mulage awiina wiinyu amawi giinyu kandi musawire ewiina wiinyu kugere Katonda awalamie. Okusawa okwa omuntu omuigolovu kuri na amaani kandi kukola emirimo.

¹⁷Eliija oona yawanga mala omuntu ki ifwe. Yasawa na ateereo omwoyo mbwe emvula etakuba, kandi emvula nekakuba ku ekialo ku emiaka isatu ne enusu.

¹⁸Yairana kandi asawa mbwe emvula ekube, kandi amare gaafumia emvula kandi ekialo kilawa.

¹⁹Waamwifu, no omulala ku inywe atereere yareka engira eri kuwuene, kandi owundi amuiranie ku engira endamu,

²⁰muwe no okumanya otino: Otoorre omwoni ku engira yaae eya owuweeyi, aaza okumununula mu olumbe kandi amawi amangi aga omwina waae oyo yakola, gaaza okulawirwa.

1 Petro

1 Petro 1

Amakeezio

¹Ebaruwa eno eema ku inze Petro, omutumwa owa Yesu Kristo. Ku inywe awalowole awa Katonda awari awageni ku ekialo kuno, awatanyiike mu ewialo ewia Pontuusi, ni Galatia, Kapadookia, Eesia ni Bitiinia.

²Katonda Soifu yawalowola kiomo yamala okutaa kale, kandi awatengeka okuwa aweeru ni kuwitra ku Omwoyo Omweru, kugere muwurre Yesu Kristo kandi mueruyiwue na amasaai gae agaasulula. Owusiza no owuolu wuwe ni inywe kuwungi.

Okurindirra okuwa no owulamu owutawua

³Katonda kandi Swawu Omwami iifu Yesu Kristo atondowolwe! Ku owusiza wuae owunene, amiire okutu-aa owulamu owuyia ni kuwitra ku okuziuka okwa Yesu Kristo okuema ku awafu. Kuno kugera ni tuwa no okurindirra okulamu

⁴kandi kutio turindira okutuukra ensereki enyingi ezia Katonda awiikiire awantu waae ku igulu, aa ngawiiza okuwola, okuoneka namba okukiiriya.

⁵Ku okuganya okwa muri nakwo, Katonda aaza okuwarinda na amaani gae amangi nawuno mutuukre owuinunuzi owuri ampi okusasulwa mu enyinga ezia owutuuko.

⁶Musugaane muwe awasangaavu ku ing'ana rino, kukawa mbwe ku enyinga zino kuuza okuwanigirizia okuwona eminyako-nyaako egigawuke-gawuuke.

⁷Muuzza okuwona eminyako-nyaako gino, kugere okuganya kwinyu okuri okukaate okukira edhaabu eoneka kukawa mbwe e-eruyiwua no omurro, kumanyike mbwe kuri kuwue kandi kuwareetre okutondowolwa, okueewua owunene no okueewua owuti owuire owua Yesu Kristo ari-irana

⁸Kukawa mbwe mukiari okumuwona, mumugonziizie; lwona kukawa mbwe ngamumuwona ku enyinga zino, mumuganyireko kandi muizuziiwue no owusangaavu owunene owutawoolwa,

⁹aeniki mutuukra owuinunuzi owua owulamu wuinyu, owuri ensimbiiro eya okuganya kwinyu.

¹⁰Awagambi awagamba-gamba ku owusiza owuazanga okuwaazra, waagarizia na amaani gaawu goona okumanya amangi ku owuinunuzi wuno.

¹¹Waagalanga okumanya enyinga ne ewintu ewiazanga okuikola, ewia Omwoyo ogwa Kristo owawawangamo yalagananga olwa yagamba mbwe Kristo yaazanga okuinyaasia kandi mbwe wurio owunene owuazanga okulondako.

¹²Katonda yagera wamanya mbwe ngawakawanga ni wakola emirimo egia okuwatunzia iwo aweene yaaya, ni ni inywe awa waakorra emirimo egio. Ni nyingeeno mumiire okulagwa ewintu wino na awantu awamiire okuwalanzizia injiili na amaani aga Omwoyo Omweru otumirwe okuema ku igulu. Namba enyankoi woona warindirra okuwona ewintu wino ni wiikola!

Owulamu owueru

¹³Kutio, mugangamuke kandi muirinde mu enkola ziinyu. Mute okuganya kwinyu kuona ku owusiza owua muuza okueewua olwa Yesu Kristo ari-inana.

¹⁴Kiomo muri awaana awari no owuti, mutalondokana no okuagala okuwiiwi okwa mwawanga nakwo olwa mwawanga ni mumenyere mu okutamanya.

¹⁵Ni kiomo Katonda owawaeta ari omweru, inywe mwona muwe aweeru ku ewintu wiona ewia mukola.

¹⁶Aeniki kujojerwe otino, “Muwe aweeru mala kiomo noona ndi omweru.”

¹⁷Aeniki mueta Katonda mbwe Soinyu, iye otatiire amiiso aga omuntu enyinga ezia awarra emirimo egia omuntu ki omuntu, mumu-ee owuti owungi ni mukiari mu owulamu owuimpi owua ku ekialo kuno.

¹⁸Mumanyire mbwe omurengo ogwa Katonda yawaolorra okuwata owuyanga okuema ku enkola ezia owusa ezia mwatuukra ku waaguukwa wiinyu, ngagukawanga ogwa ewintu ewiwua wiateeka kiomo efeedha nakuwa edhaabu.

¹⁹Ni yakola otio na amasaai ameeru aga Kristo, Ekimaatwa ekiwula ne embala nakuwa itone.

²⁰Kristo yaloworrwa emirimo gino namba ekialo ni kiawanga ni kikiari okulukwa, ni kugere muwone owulootu, ngakaaza nawuno mu amiire aga owutuuko gano.

²¹Ni kuwitra ku Kristo, muganya ku Katonda owamuziusia okuema ku awafu kandi amuta mu owunene, kandi kutio muri no okuganya no owuene mbwe muriwa no owulamu owutariwua ku Katonda.

²²Nyingeeno kiomo mumiire okuieruyia ku okulonda owuene, muri no olugonzi oluri kuwene ku waamwinyu. Mugonzanie omuntu no omwina waae no olugonzi olwa munsu.

²³Mumiire okuiwulwa okuiwulwa okuyia, ng’ani kuema ku emwo efwa yaaya, ni ni kuema ku emwo etaesa okufwa, ni kuwitra ku amang’ana amalamu agatariwua aga Katonda.

²⁴Kiomo endagano ewoola mbwe, “Awantu woona wari ki owusuwi, kandi owulootu wuwu wufwanana no owua amauwa. Owusuwi wukala kandi amauwa gagondeera gaadodoka ansi,

²⁵na Amang’ana aga Omwami gario amiire goona agawula ne entuuko.” Kandi amang’ana amalootu aga mwalanziziwua, nigo amang’ana ago.

1 Petro 2

¹Kutio, muwe ale ne enkola embiiwi ziona kiomo owuweeyi, okuisemerezia, iyari no okuwoola awantu uwiiwi.

²Kiomo awaana awato, muagale amaweere aga omwoyo agari amang’ana aga Katonda, kugere gawakomie mu owuinunuzi wuinyu,

³aeniki, ku enyinga zino, mumiire okumanya mbwe Omwami ari omulootu.

Amawaale amalamu na awalowole awa Katonda

⁴Muuzi ku Kristo, ori iwaale ilamu erialowua na awantu, ni rilowolwa ni Katonda ki iwaale ilootu erikirre amawaale goona.

⁵Inywe mwona muri amawaale amalamu agakolwa nago okuomboka ekaalu eya Omwoyo Omweru ki awoozia awatengeke awafumizia Katonda emisango egia Omwoyo Omweru aagala ni kuwitra ku Yesu Kristo.

⁶Aeniki Katonda awoola mu amang’ana gaae otino: “Muwarre muwone! Miire okuikazia iwaale Sayuuni, iwaale eria mu ekoona ilowole kandi erikirre goona. Omuntu-umuntu omuganyireko ngariwona ensuuko, yaaya.”

⁷Ku inywe awaganyire, iwaale rino riri ilootu okukira goona, ni ku awataganyire, “Iwaale eria awaomboki waalowa nirio eriaza riwa iwaale eria ekoona ilootu eriambiriire enzizi geeza okukira goona,”

⁸kandi, “Ni iwaale eria awantu waiguunyako kandi waagwa ansi.” Wagwa aeniki ngawakawurra amang’ana, kandi ekio niki ekia waateerwa kale mbwe kiwaikorre.

⁹Ni, inywe muri awalowole awa Katonda, awoozia awakorra Omwami, oluganda olwa awantu awatengeke kandi awa Katonda omwene, kugere mulanzie ewintu ewikate-kaate ewia iye owawaeta na awatoola mu ekierema na awaingizia mu owueru wuae, amiire okukola.

¹⁰Kale ngamukawanga oluganda, ni nyingeeno muri awantu awa Katonda; kale ngamukawanga ni mutuukiire owusiza ni nyingeeno mumiire okutuukra owusiza.

Owulamu owusugaane na awakurumu awa Katonda

¹¹Awiiko wange awa ngonziizie, kiomo muri awageni kandi awalugendwa ku ekialo kuno, mbasiagizia mbwe muwe ale no okuagala okuwiiwi okulwania emioyo giinyu.

- ¹²Kukawa mbwe awatamanyire Katonda wawawoolako ewintu ewiwiiwi, inywe mumenye owulamu owulootu agati yaawu kugere wawone enkola ziinyu endootu kandi watondowole Katonda owuire owua ariwaazako.
- ¹³Muwurre awantu woona awari mu owukangasi, awe omwami okangatiire ekialo kiona
- ¹⁴nakuwa awakangasi awari ansi yaae awa atumre okuswawuka awantu awakola amawi no okutondowola awantu awakola geeza.
- ¹⁵Aeniki, kuri okuagala okwa Katonda mbwe enkola ziinyu endootu zigere awantu awamaya awawawoola uwiiwi mu okutamanya, wawule ne ekia wakawoola.
- ¹⁶Mumenye kiomo awantu awari owuyanga, ni mutakola no owuyanga owuo okusanikira amawi. Mumenye kiomo awemirimo awa Katonda.
- ¹⁷Mulagane owuti owusugaane ku awantu woona kandi mugonzie awiina wiinyu awaganyire ku Katonda. Mu-ee Katonda owuti kandi mutie omwami owa ekialo.
- ¹⁸Inywe awakurumu, muwurre awamukorra emirimo kandi muwalage owuti ino. Ni ng'ana awalootu na awaolu weng'ene, ni kugia awawanyaasia.
- ¹⁹Ne ekintu ekiomerezia Katonda no omuntu asikia omwoyo namba na akorrwa uwiiwi na awula owuoni, aeniki amanyire okuagala okwa Katonda.
- ²⁰Ni no owulootuuki owua okatuukra no osikiizie omwoyo no okubrwe emfunzi ku amawi aga okorre? Ni, no osikiizie omwoyo namba no okorrwa amawi, okwo kuomerezia Katonda.
- ²¹Mwaetwa okukola otio, aeniki Kristo yawanyaka-nyaakra inywe, kandi yawarekera omufwano kugere mulonde olunyaafwa lwae.
- ²²Ngakakola owuoni, kandi ngakawoola owuweeyi, yaaya.
- ²³Olwa waamurigizra amang'ana aga amanyego, ngakairania na amawi; kandi olwa yanyaasiwua ngakairania na amang'ana agatiisia. Ni, iye yata amaingirizio gaaye ku Katonda omukengi owa ekiina mu engira eri kuwuene.
- ²⁴Iye omwene yatoola amawi giifu ku omuwiri gwae ogwawambwa ku omusalaaba kugere tatalonda okuagala okwa owuoni, ni tumenye owulamu owueru. Ku ewisonga wiae mumiire okulamiwua ku amalwire.
- ²⁵Inywe mwafwananga amagondi agaateeka, ne enyinga zino mumiire okuirana ku Omwayi kandi Omurinzi owa emioyo giinyu.

1 Petro 3

Awakazi na awasaaza waawu

¹⁻²Inywe awakazi mwona muwe awaiisiizie ansi ku awasaaza wiinyu, kugere na awandi ku iwo wataganyire ku amang'ana amalootu aga Katonda, wagaluke wagaingizie mala ku okuwona enkola ziinyu endootu, kandi ni wawona kiomo owulamu wiinyu wuri owueru alala no owuti owungi owua muri nawuo. Kuno kuuza okugera wawe awalala ku awaganyire, namba ni watalagrwe.

³Owulootu wiinyu ngawusugaane wuwonwe mala ku okuiwoya okwa enze, kiomo okusuuka emvwiri, okuingizia ewikomo ewia edhaabu, no okuiwoya enguwo eziomerezia.

⁴No owulootu wiinyu wusugaane wueme mu emioyo giinyu muni. Wuno niwuo owulootu owutaoneka owuema mu omwoyo omusiza kandi omuolu. Owulootu wuno wuri owunene ino mu amiiso aga Katonda.

⁵Aeniki, nintio awakazi aweeru awaawanga no okuganya ku Katonda mu amiire amakulu waalagananga owulootu wawu. Waaisia ansi ni wawurra awasaaza wawu

⁶mala kiomo Saara, owa-aa Abraamu owuti kandi yamuetanga mbwe omwami waae. Mwona muri awaala waae, ni mukola ewintu ewisugaane kandi ni mutatiire ekintu-ukintu.

⁷Inywe awasaaza, mumenye na awakazi wiinyu na amaganga ni mumanyire mbwe wari endukwa endewenyu okuwakira. Muwe nawo no owuti ki awaaza okutuukra empanwa eya owulamu ku owusiza alala kandi owuagani ni inywe, kugere Katonda airanie okusawa kwinyu ni mumusawa.

Awaganyire wanyaasiziwua enkola endootu

⁸Owutuukre, inywe mwona mumenye ne empurizanio endootu na awiina wiinyu. Muwe awa-ambra awandi amasaasra kandi mugonzanie no olugonzi olwa kuwuene. Muwe awasiza kandi muiisie ansi.

⁹Mutaaza mwairania amawi ku amawi nakuwa inyego ku inyego. Aa okukola otio, inywe muiranie ne ensereki aeniki mwaetwa okukola otio kugere mutuukre ensereki.

¹⁰Kutio, kiomo endagano ewoola, "Omuntu-umuntu oogala okumenya owulamu owulootu no okuwona amiire amalootu ember, paka arinde olurimi lwae atawoola amawi kandi omunwa gwae gutawoola owuweeyi.

¹¹Paka areke amawi kandi akole owulootu, paka aagale okuwa no owuolu mu engira ziona.

¹²Aeniki Omwami awona awantu awalongoole kandi ategerezia okusawa kwawu, na alowa awantu awakola amawi."

¹³Naanu okaagala okukukorra uwiiwi, iwue no oogala mala okukola geeza?

- ¹⁴Ni namba no owuine eminyako-nyaako ku okukola owulootu, osereekwe. Mutatia ewia watiire kandi mutainyaasia mu emioyo yawa.
- ¹⁵Ni mu emioyo giinyu, mute Kristo awe Omwami. Muwe amankaga enyinga ziona okuirania awantu wona awawawuuzia ekigera ni muandre ku okurindirra okwa muri nakwo.
- ¹⁶Ni mukole mutio no owuolu kandi no owuti, emioyo giinyu ni gitawakengera ekiina, kugere awantu awagamba-gamba owuwiiwi ku enkola ziinyu endootu ku Kristo wasuke no owuweeyi owua wawawoolako.
- ¹⁷Kuri kulootu okuinyaasia ku okukola owulootu, ku okuagala okwa Katonda, okukira okuinyaasia ku okukola owuwiiwi.
- ¹⁸Kristo yona yafwira owuoni kalala kandi owutuukre. Iye omuntu omulongoole yafwira awooni, kugere awareete ku Katonda. Yaitwa afwa ku omuwiri, ni yawa omulamu kandi ku amaani aga Omwoyo Omweru
- ¹⁹owagera agia okulanzizia emioyo egia awantu awaawanga mu owusiwe.
- ²⁰Awantu awaalowa okuwurra olwa Katonda yarinda no owuoreevu mu amiire aga Noowa yaombokanga owuato. Awantu munaane weng'ene niwo awaanunulwa mu owuato owuo wamizula olumbe olwa omugera.
- ²¹Amanzi gano gari omufwano ogwa owubatiiso owua enyinga zino namba inywe muwitamo okununulwa. Owubatiiso wuno ngawuri mala okuoza ikwe ku omuwiri yaaya, ni wuri okuifumizizia Katonda no omwoyo ogutakukengra ekiina. Wuwanunula ni kuwitra ku okuziuka okwa Yesu Kristo
- ²²omiire okugia ku igulu kandi aikaale nyakukono okusaaza okwa Katonda, aa enyankoi ziona, owukangasi wuona alala na amaani goona wiri ansi eya owukangasi wuae.

1 Petro 4

Okumenyira Katonda

- ¹Kutio ni Kristo yainyaasia mu omuwiri gwae, mwena muwe na amaingirizio agafwa gatio, aeniki omuntu omiire okuinyaasia mu omuwiri, arekana no owuoni ilala.
- ²Ngawamenya kandi mu okuagala okwa omuwiri, ni wamenya mu okuagala okwa Katonda mu owulamu wuawu wuona owua emberu.
- ³Aeniki mwamala okutoola enyinga ezisugre enyima, ni mukola ewintu ewia awatamanyire Katonda walowola okukola. Mwamenya owulamu owua okuinyonkoonia, owusariimu owua omuwiri, okudung'a, emigomo emiwiiwi alala no okusawa Katonda ensaasa.

- ⁴Ni nyingeeno waluguula ino ni watawawona ni muizogaana nawo alala mu owulamu owuwi owua owuteesani, ekintu ekigera ni wawarigizra amanyego.
- ⁵Ni paka wari-irania amang'ana emberi wa Katonda ooza okukengera awalamu na awafu ekiina.
- ⁶Kino nikio ekiagera ni injiili elanziziwua namba awantu waamala okufwa. Kukawa mbwe emiwiri giawu giakengerwa ekiina mala kiomo awantu wandi, waalanziziwua injiili eno kugere emioyo giawu gimenye owulamu owutariwua kiomo Katonda ari.
- ⁷Entuuko eya ewintu wiona eri ampi. Kutio muwe na amaingirizio ameeru kandi muirinde geeza mu enkola kugere muwe mu okusawa.
- ⁸Owukirre goona, omuntu ki omuntu agonzie omwina waae no olugonzi olwa munsu aeniki olugonzi lusanikra amawi amangi.
- ⁹Muwe awaingizia awageni geeza no owusiza mu amayumba giinyu aa mutairiizia.
- ¹⁰Omuntu ki omuntu asugaane akole ne empanwa eya Katonda yamu-aa okutunzia awandi, kugere atuusie owusiza owua Katonda mu engira ezigawuke-gawuuke.
- ¹¹Na ario omuntu ogamba-gamba, asugaane agamba-gambe na amanyire mbwe awoola amang'ana aga Katonda. Ni no omuntu akola emirimo egia okutunzia awandi, asugaane akole na amaani aga Katonda aesana, kugere Katonda atondowolwe mu ewintu wiona ni kuwitra ku Yesu Kristo. Owunene na amaani wiwe ewiae amiire goona agawula ne entuuko. Amin.

Okuinyaasia ku okuwa Omukristo

- ¹²Awiiko wange awa ngonziizie, mutaluguula ni mudambiiwue no okugeezaniwua okululu, ti ngera ekintu ekiwaikorra kigeni.
- ¹³Ni muwe awasangaavu mbwe muri alala ni Kristo mu okunyaka-nyaaka kwae, kugere muuze muwe ne ekisangaalo nyanga olwa owunene wuae wurisasulwa.
- ¹⁴No onyegwa aeniki oganyire ku eriina eria Kristo, osereekwe aeniki Omwoyo ogwa Katonda owa owunene akuriko.
- ¹⁵No otuukra eminyako-nyaako, kutaaza kwawa ki okwa omuntu owaita omuntu namba omwiwi, nakuwa omuntu oona ensikirra erindre ekialo, nakuwa omuntu ofwa okuingira mu amang'ana aga awandi.
- ¹⁶Ni, ni muinyaasia aeniki muri Awakristo, mutaaza mwawona ensuuko. Ni mutondowole Katonda aeniki muetwa ne eriina riae.
- ¹⁷Enyinga ezia Katonda ezia okukengera awantu waae ekiina zimiire okutuuka. Ni kuri mbwe na awantu waae niwo aaza okutanika nawo, muingirizia mbwe kuuza okuweera awantu awalowa okuingizia injiili owululu owufwana wutie?

¹⁸Kuri mala kiomo endagano ewoola mbwe, “Ni kuri kukalu ku awantu awalongoole okununulwa, niki ekiiza okuikorra awooni na awantu awatatiire Katonda?”

¹⁹Kutio, awainyaasia ku okuagala okwa Katonda wasugaane wate okuganya kwawu ku Omulusi waawu otagaluka kandi wasugaane wagie emberu okukola geeza.

1 Petro 5

Ku awagaaka na awawuuka awaraaga

¹Ndi omulala ku awagaaka awa ekaniisa owawona eminyako-nyaako egia Kristo yawona, kandi omulala ku awaaza okutuukra omugawo mu owukaate owuza okusasulwa. Mbaisasaama inywe awagaaka awa ekaniisa

²mbwe muwe awaayi awalootu awa amagondi aga Katonda ateere mu amakono giinyu mbwe murinde. Mukole mutio ku okuagala kwinyu aweene kiomo Katonda aagala, ni ng’ani ku okunigiriziwua yaaya. Mutakola otio no okuagala mbwe mutuukremo ekintu, ni ki awari no okuagala okwa okukorra awandi.

³Muta-aa awantu awa murindre owuzito, ni muwaweere ekilago ekilootu.

⁴Kandi olwa Omwayi Omunene aaza okuuza, ariwa-aa omugawo ogwa owukire ogutaaza okukiiriya yaaya.

⁵Inywe awawuuka mwona musugaane muwurre awakulu wiinyu. Omuntu ki omuntu ku inywe asugaane akorre omwina wae na aiisie ansi aeniki, “Katonda alowa awantu awaitumbula, na awa omusiza na awantu awaiisizie ansi.”

⁶Kutio muiisie ansi inywe aweene emberu wa Katonda, kugere awaginge kungulu mu enyinga ezisugre.

⁷Mute eminyako-nyaako giinyu giona mu amakono gae aeniki owulamu wuinyu wumuambre.

⁸Muwe amiiso kandi muikage, aeniki omuzigu wiinyu ori Ekikeeno ekuba eno ne eno ki endwe eduma ne eagala omuntu owa ekatandula wutono-tono.

⁹Mumulowe ni muimerre wukalu mu okuganya, aeniki mumanyire mbwe waamwinyu ku Kristo awari ku ekialo kiona wawita mu eminyako-nyaako emifwanani gino.

¹⁰Ni Katonda owa owusiza wuona, owawaeta mu owunene wuae owutawua ni kuwitra ku Kristo Yesu, ni mumiire okuwona eminyako-nyaako ku amiire amatono, omwene aaza okugera muwe awatuufu kandi awakalangufu, awaisimbiriire kandi awataiyunzia.

¹¹Amaani goona gari agaae amiire goona agawula ne entuuko. Amin.

Amakeezio agatuukre

¹²Mbajojeere ebaruwa enyipi eno ni ntunziwua ni Siila ori wamwifu owa manyire mbwe arindre endagano. Njojere itu rino okuwa-ambia amaani, ni mfumia owuwoni wuange mbwe wuno niwuo owusiza owua Katonda owua kuwuene owua musugaane muimerreko wukalu.

¹³Awari Babulooni, awaalowolwa ni Katonda alala ni inywe, wawatumiire amakeezio alala ni Mariiko, omuzia wange ku Katonda.

¹⁴Mukeezanie omuntu no omwina waae na amakeezio aga olugonzi. Owuolu wuwe ni inywe awari ku Kristo mwona.

2 Petro

2 Petro 1

¹Inze ni Simioni Petro, omukurumu kandi omutumwa owa Yesu Kristo. Ebaruwa eno mbajojera inywe awantu awari no okuganya ku Kristo okuomerezia ino. Okuganya kwinyu kuri okwa ebeei enkalu mala kiomo okwa turi nakwo. Mwakutuukra aeniki Yesu Kristo ori Katonda kandi Omununuzi iifu ari omuigolovu.

²Mutuukre owusiza no owuolu owungi owutuukre, okuwitra mu okumanya okwa mumanyire nakwo Katonda alala ni Yesu Omwami iifu.

Okulowolwa no okuetwa ni Katonda

³Katonda, ku amaani gaae amangi, amiire okutu-aa ewintu wiona ewia tuagala kugere tumenye owulamu owulootu owusugre emberu waae. Owulamu wuno tuwutuukiire ni kuwitra mu okumanya okwa tumanyire nakwo iye owatueeta tuwe nae mu owunene no owulungi waae.

⁴Kandi kuno kulagana mbwe amiire okutu-aa empanwa enene kandi endootu eluguulwa eya yaifuuwa mbwe aaza oku-aa awantu awamuganyireko. Yakola otio kugere awantu awamuganyireko wamizule owuoni owuwiiwi owumiire okureetwa no okuagala okwa omuwiri, owua awantu awa ekialo wakola, kandi wawe mu owulala ni Katonda mu enkola ziaa.

⁵Kutio ku ewintu ewilootu ewia Katonda amiire okutukorra wino, mukole wukalu kiomo muesa, muwone mbwe ku okuganya okwa muri nakwo ku Katonda muongereziiko enkola endootu; ku enkola endootu muongereziiko okumanya engira ezia Katonda;

⁶ku okumanya engira ezia Katonda muongereziiko okuirinda mu enkola; ku okuirinda mu enkola muongereziiko okuwa no olutuunyo mu eminyako-nyaako; ku okuwa no olutuunyo mu eminyako-nyaako muongereziiko okumenya mu owueru owua Katonda;

⁷ku okumenya mu owueru owua Katonda muongereziiko omwoyo ogwa owu-aani owua awada; ku omwoyo ogwa owu-aani owua awada muongereziiko okugonzia awantu wona no olugonzi oluri kuwuene.

⁸Aeniki okukoma mu okuwa ne ewintu wino kuwungi, kuuza okuwalowera okuwa awagata kandi awawula ne ensaafu mu okumanya okwa mumanyire nakwo Yesu Kristo.

⁹No omuntu-umuntu owula ne ewintu wino, afwanana no omuntu owona a-ampi owa amiiso gaae nagawona geeza. Oyo amiire okulawira mbwe amawi gaae goona aga yakola kale Katonda yamala okumurekera.

¹⁰Kutio Awakristo awiina wange, mukole wukalu muwone mbwe owulamu wuinyu wulagana mbwe kuwuene Katonda yawalowola kandi yawaeta. Ni mukorre mutio, ngamuri-irana enyima

¹¹ni muri-ingiziwua mu owuami owua Omwami kandi Omununuzi iifu Yesu Kristo, owutariwua.

¹²Kutio nyiza okuwaweerako ni mbaizurizia ewintu wino, kukawa mbwe muwimanyire geeza kandi mukalanguuke mu amang'ana aga Katonda agari kuwuene aga mwatuukra.

¹³Mpingirizia mbwe kuri kulootu ni mbinuriire amang'ana gano ni nkiari omulamu kugere mutagalawira.

¹⁴Aeniki manyire mbwe ndi ampi okureka ekialo kino kiomo Omwami Yesu Kristo amiire okundaga.

¹⁵Kutio kugere mutalawira ewintu wino namba ni miire okuwareka, nyiza okukola wukalu kiomo nyesa okugawaizurizia ni nkiario omulamu.

Awantu awaawona owunene owua Yesu Kristo

¹⁶Ifwe awatumwa awa Yesu, ngatukawalaga eminayo egia owuweeyi olwa twawalaga amang'ana aga okuirana okwa Yesu Kristo na amaani aga ariiza nago yaaya. Aeniki ifwe aweene twawona na amiiso giifu ni Katonda amu-aa owunene.

¹⁷Yaewua owunene no owuti wungi ni Katonda Ise olwa twawurra omwoyo gwae ni guwoola mbwe, "Ono nio Omuzia wange owa ngonziizie kandi owa nsangaarre nae."

¹⁸Omwoyo guno twaguwurra ni guema ku igulu olwa twawanga ni Yesu mu ekigiri, asi aeeru aa owunene owua Katonda wuaikira.

Okuirana okwa Yesu na amang'ana aga awagambi

¹⁹Ku ifwe awaawona ewintu wino ni wiikola, amang'ana aga awagambi awa Katonda gatuweera amalamu ino. Kutio kukaweere kulootu ni muingiizie amang'ana aga awagambi awa Katonda waawoola gano. Ee, mugaingizie ino aeniki amang'ana ago gafwanana ne ekimuri ekimurika mu ekierema nawuno wutuuke owuire wukie, olwa Yesu Eng'eni-ng'eni eya Kunkio ari-irana, aizuzie emioyo giinyu no owueru wuae.

²⁰Kutio owukirre ewintu wiona, musugaane mumanye mbwe awulao omuntu oesa okunawula amang'ana aga awagambi awa Katonda waajoja, na amaganga gae omwene.

²¹Aeniki awulao omugambi owa Katonda owawoola ing'ana na amaganga gae omwene yaaya. Ni no Omwoyo Omweru ogwa Katonda nio owawalaganga amang'ana agawaemera ku Katonda, aga waawoola.

2 Petro 2

Awagerezi awa owuweeyi

- ¹Kiomo awagambi awa owuweeyi waawangao agati ya Awayaudi mu amiire aga kale, nintio awagerezi awa owuweeyi waaza okuwaaao agati iinyu. Awantu wano waaza okuwaingiramo owuiwisi ne engerera embiiwi eziona awantu, namba okulowa Omwami Kristo owawaolorra omusango ogwa amawi. Kino kiiza okugera Katonda awamale wuangu-wuangu.
- ²Ni kukawa kutio, awantu awangi ku inywe waaza okulonda enkola ziawu embiiwi ezia ensuuko kandi kino kiiza okugera awa ekialo watanike okugambagamba uwiiwi ku amang'ana amalootu agari kuwuene ku Kristo.
- ³Endandiire eya awagerezi awa owuweeyi wano eeza okugera wawasakule ewintu wiinyu ni wawalaga amang'ana agatari kuwuene aga walukre iwo aweene. Ni Katonda yamala okukenga ekiina kiawu kale kandi okumalwa kwawu kuri ampi kuwarindirra.
- ⁴Katonda ngaaza okureka okuwakorra otio mala kiomo ngakareka okurigiza enyankoi eziakola owuoni mu owuina aa ziasiwua mu ekierema ni zirinda owuire owua arikengra awantu woona ekiina.
- ⁵Kandi Katonda ngakareka okuswawuka awantu awa kale awaakola enkola embiiwi, ni yareeta emvula enyingi nawuno amanzi gasanikizia ekialo na awantu woona awawangamo. Yanunula Noowa, omuntu owalaganga awantu okuwa ne enkola endootu, na awantu waae musamvu weng'ene.
- ⁶Lwona Katonda yakengera emigizi egia Sodooma ni Gomoora ekiina ku okugisamba no omurro nawuno gilala chwe. Yagikorra otio kugere giwe ekilagano ku ekia yaazanga okukorra awantu awatamutiire.
- ⁷Ni yanunula omuntu omuigolovu oetwa mbwe Luuti, owasinika ne enkola embiiwi ezia owusoodani ezia awantu awataatia ensikirra wano waakolanga mu emigizi egio.
- ⁸Omuntu omulootu ono ni yawanga na amenyere agati ya awantu awaoneeke wano, yawiiyirirwa mu omwoyo gwae ino na amang'ana amawiiwi aga waafumianga mu eminwa giawu alala ne enkola emwamu ezitaingira, ezia waakolanga owuire ki owuire.
- ⁹Wino wiona witulaga mbwe Omwami Katonda ari ne engira ezia okununula awantu awalootu mu eminyako-nyaako egiwaazra. Awooni iwo awaswawuka nawuno kutuuke owuire owua aaza okukengera awantu ekiina:
- ¹⁰ino-ino awantu awalonda okuagala okuwiiwi okwa emiwiri giawu kandi awatatiire ensikirra ezia Katonda. Awagerezi awa owuweeyi wano, na awantu awa ekimage kandi awa amiiso amakalu awataganya ewia awandi. Na awantu awawula owuti kandi awagamba-gamba uwiiwi ku ewintu ewia owunene ewiri ku igulu.

- ¹¹Ni namba enyankoi awari na amaani amangi ngawawigamba-gambako owuwiiwi otio enyinga ezia wawi-ingirra emberu wa Katonda.
- ¹²Iwo wagamba-gamba uwiiwi ku ewintu ewia watamanyire namba wutono. Waazakana okukola ewintu ni wataingiriizie mala kiomo entiang'i ezia mu isaka ezialukurwa okuimiwua no okuitwa. Kiomo entiang'i ezia mu isaka ziiitwa, nintio woota waaza okumalwa chwe.
- ¹³Waaza okuoloolwa emidambo ku emidambo agia wamiire okureeta. Wakola ewintu ewia ensuuko ewinogerezia okuagala okwa emiwiri giawu, omuwasu dula! Kutio ne ensuuko awantu awamwamu wano okuizoga ni inywe mu emigomo giinyu ni muria. Wasangaala ino ni wawaseremezia otio.
- ¹⁴Amiiso gaawu gaizuule du no owuchege owua owusondo kandi ngawareka okukola owuoni. Wawuwa awantu awari no okuganya okunyowu-nyoowu ni wawaingizia mu enkola ziauwu embiiwi. Na awantu awari no oguriira ogwa emiandu, awa Katonda yamala okufuuwa.
- ¹⁵Awantu wano wamiire okureka engira endootu watoola engira eya Balaamu omuzia owa Beori, omuntu owagonzia okukola owuoni kugere atuukre amasendi.
- ¹⁶Ni Katonda yagera entikiri yaae, entiang'i etagamba-gamba, egamba-gamba nae no omwoyo ogwa omuntu, ne egaania omugambi owa Katonda ono mbwe atakola enkola eya owulalu eya yagalanga okukola eyo.
- ¹⁷Awantu wano wafwanana ne enzuzi ezikamiire namba ifu eri-irwa ne emiyaga. Katonda amiire okuwateerao asi aa akorre ekierema ekimwamu ti.
- ¹⁸Waitumbula ni wawoola amang'ana amazito-zito aga owumaya agawula ne emirimo. Lwona wakola no okuagala okuwiiwi okwa omuwiri okuvuwa nakwo awantu awa nikwo warekana na awantu awalonda engira eya owuweeyi.
- ¹⁹Waifuuwa mbwe waaza okugera awantu wawe owuyanga, ni iwo aweene wakiari awasiwe awa okukola enkola embiiwi ziona. Ee aeniki omuntu ki omuntu awa omusiwe owa ekintu-ukintu ekimukirre okureka.
- ²⁰Omuntu na amiire okuema mu owuoni owuwiiwi owua ku ekialo ni kuwitra ku okumanya Omwami kandi Omununuzi iifu Yesu Kristo, na airaanemo kandi, awa uwiiwi okukira kiomo yawanga kuluweri.
- ²¹Kukaweere kulootu no omuntu ono yareka okumanya engira endootu eri kuwene eira awantu mu empurizanio ni Katonda, okukira okugimanya kandi yagireka yalaga ensikirra endootu eya yaewua, omugongo.
- ²²Awantu wano watuusia olugero oluwoola mbwe, "Embwa eiraane okumeena amasesemi gayo" no olundi oluwoola mbwe, "Enguruwe emiire okuoziwua eiraane mu okuikonya mu itosi."

2 Petro 3

Owuire owua okuirana okwa Yesu Kristo

¹Awiiko wange awa ngonziizie, eno ne ebaruwa yange eya okuwiri. Mu ebaruwa ziang'e iwiri zino, miire okugeezania wukalu okuwaizurizia amang'ana gano kugere mugaingirizie geeza.

²Mbajojeere aeniki nyagala mbwe muingirizie ino amang'ana aga awagambi aweeru awa Katonda waawoola kale. Lwona nyagala mbwe muingirizie ensikirra eya Omwami kandi Omununuzi iifu Yesu Kristo yawa-aa ni kuwitra ku awatumwa waae.

³Owusookere nyagala mumanye mbwe mu amiire aga entuuko, awantu wariwaa awarilonda okuagala okuwiiwi okwa emiwiri giawu. Awantu wano wariwasekera

⁴ni wawalaga watino, "Kane Omwami iinyu ngayawoola mbwe agia okuirana? Ariai? Waasoifu waafwa kale, ni nakatio kiwulao ekimiire okuikola. Ewintu wikiari wuri mala kiomo wimiire okuwa okueamerra ekialo kialukwa."

⁵Walowa ni kandi wamanyire geeza mbwe mu owutanikro Katonda yaluka ekialo ni igulu ni kuema ku amang'ana aga yawoola. Ekialo kialukwa na amanzi kandi kiaema mu amanzi

⁶kandi amanzi aga omugera nigo aga Katonda yakola nago okuona ekialo ekikulu.

⁷Ku amang'ana amalala aga Katonda yawoola ago, ekialo ni igulu ewia nyingeeno wino wiwikiirwe okuuz'a okumalwa no omurro. Nyanga olwo nilwo awantu awatatiire Katonda warikengerwa ekiina kandi wamalwe chwe.

⁸Ni inywe awiiko wange, nyagala mumanye mbwe Katonda agawuuke ni ifwe ale ku okuwala amiire. Ku Katonda owuire wulala wuagana ne emiaka elufu kilala, kandi emiaka elufu kilala giagana no owuire wulala.

⁹Kutio Omwami Katonda akiari okukinzia okuirana okwa Yesu yaifuuwa mbwe aaza okuirana, kiomo awandi wakutoola. Ni aiira mpola kugere awantu wona wagaluuke waeme mu amawi, watamalwa.

¹⁰No owuire owua okuirana okwa Yesu wurituuka owuiwisi mala kiomo omwiwi aaza yaiwa na awantu watamanyire. Nyanga olwo, igulu alala ne ewintu wiona ewiri ku igulu wiriteeka mu amiiso ne erioga eringi ino kandi wirionwa no omurro nawuno wiwue chwe. Ekialo ne ewintu wiona ewirimo wiona wiriteeka.

¹¹Ni kuri mbwe ewintu wino wiona wiiza okuonwa otio, katio ifwe tusugaane tumenye owulamu owufwana wutie? Tusugaane tuwe awantu aweeru kandi awa-ambre amang'ana aga Katonda wukalu,

¹²ni turindirra ni turi no okuagala mu emioyo giifu mbwe owuire owua okuirana okwa Yesu wuanguye. Nyanga olwo, igulu ririsambwa rionwe kandi ewintu ewiri ku igulu wiona wirisalaziwua no owuyu ki amavuta.

¹³Ni ifwe turindirra okuuzza okwa ekialo ekiyia ni igulu iyia, ewia Katonda yaifuuwa mbwe wiiza okuwaaao, aa awantu awigolovu emberi waae warimenya.

¹⁴Kutio awiiko wange awa ngonziizie, aeniki wino wiiza okuikola, mukole wukalu muwone mbwe na aaza okuirana, aaze awatuukre ni muri awantu aweeru awawula no owuoni namba embala kandi awari no owuolu wuae mu emioyo giinyu.

¹⁵Muwe no okumanya mbwe okui-ira mpola okwa Omwami, ni iwaga eria awaere kugere mutuukre owuinunuzi mala kiomo wamwifu Paulo yawajojera na akola na amaganga aga Katonda yamu-aa.

¹⁶Kino niki ekintu ekia yawoola mu ebaruwa ziae ziona ni yajojanga ku amang'ana gano. Wirio ewintu windi ewikalu okuwurra mu ebaruwa ezia Paulo ewia awantu awari no okumanya okutono kandi awa emioyo eminyowu-nyoowu walagirizia amagarikira mala kiomo wagarikira amang'ana gandi goona agari mu endagano. Kandi ekintu ekia wakola ekio kiiza okugera Katonda awamale.

¹⁷Ni inywe awiiko wange mumiire okumanya amang'ana gano kale. Kutio muwe amankaga kugere awantu awatatiire ensikirra wano, watawasemerezia na amang'ana aga wagarikira gano, ni wawalaga mbwe muirane enyima mureke okuganya okulamu okwa muri nakwo kuno.

¹⁸Ni mugie emberi okukoma mu owusiza no okumanya engira ezia Omwami kandi Omununuzi iifu Yesu Kristo. Aewue owunene nyingeeno ni mumiire goona. Amin.

1 Yowaana

1 Yowaana 1

Ing'ana erireeta owulamu

¹Tuwajojera ku ing'ana erireeta owulamu erimiire okuweerao okuamera mu owutanikro. Ifwe tumiire okuriwurra, kandi okuriwona na amiiso giifu aweene. Ee, tumiire okuriwarra geeza kandi turiamba no okuriamba na amakono.

²Owulamu wuno wualaganiwua. Twawuwona kandi tuwugamba-gambako ni tuwalaga amang'ana ku owulamu owutariwua, owuawanga ni Katonda kandi owumiire okulaganiwua ku ifwe.

³Tuwalanzizia ekia tumiire okuwurra kandi tuwona, kugere mwona muwe ni ifwe mu owulala. Kandi turi mu owulala ni Katonda alala no omuzia waae Yesu Kristo.

⁴Tuwajojera amang'ana gano kugere emioyo giifu giizule du no owusangaavu.

Okuwa mu owueru

⁵Owutumwa owua Katonda amiire okutu-aa mbwe tuwalanzizie ni mbwe, Katonda no owueru kandi ekierema kimuwulamo namba wutono.

⁶Kutio ni tuwoola mbwe turi mu owulala nae, ni kandi tukiagenda-genda mu ekierema, ao otio tuweeya kandi owuene wuwula mu owulamu wuifu.

⁷Ni, ni tugenda-genda mu owueru, mala kiomo iye omwene ari mu owueru, ifwe awari no okuganya ku Katonda, tuwa no owulala omuntu no omwina waae, kandi amasaai aga Yesu omuzia waae gatueryia ku owuoni wuifu.

⁸Ni tuwoola mbwe tuwula no owuoni, ao tuisemerezia aweene kandi owuene wutuwulamo, yaaya.

⁹Ni, ni tuwoorre owuoni wuifu, Katonda aaza okuterekera owuoni wuifu wuona kandi aaza okutueruyia mu owuoni owua tumiire okukola wuona, aeniki ari omulongoole kandi arindre okuifuuwa kwae.

¹⁰Ni tuwoola mbwe tukiari okukola owuoni, tugera Katonda yawa omuweeyi kandi amang'ana gaae gawula ni iwaga mu owulamu wuifu.

1 Yowaana 2

¹Waana wange, mbajojera amang'ana gano kugere mutakola owuoni. Ni, no omuntu okorre owuoni, turi no Omulongoole Yesu Kristo, otuiyembra Katonda aturekere.

²Iye nio omusango ogututorrao okuswawukwa ni Katonda ku owuoni wuifu. Ni ngari omusango ku ifwe tweng'ene yaaya, ni ku awantu awa ku ekialo kiona.

³Tuesa okumanya geeza mbwe kuwuene tumanyire Katonda, mala ni kuri mbwe turindre ensikirra ziae.

⁴Omuntu owoola mbwe amanyire Katonda, ni ngakola ewia Katonda asikiire, iye ari omuweeyi kandi owuene owua Katonda wumuwlamo.

⁵Ni, no omuntu arindre amang'ana gaae, olugonzi olwa tugonziizie nalwo Katonda luuza okutuuka kuwuene mu owulamu wuae. Engira eya tumanyiramo mbwe turi ku Katonda eri ntino:

⁶Omuntu-umuntu owoola mbwe amenyere ku Katonda, paka amenye owulamu owufwanana no owua Yesu yamenya.

Ensikirra empia eya okugonzania omuntu no omwina waae

⁷Awiiko wange awa ngonziizie, ng'ambajojera ensikirra empia yaaya. Ni mbajojera mala ensikirra enkulu, eya mumiire okuwa nayo okuemera mu okutanika kwinyu okuwa no okuganya ku Kristo eria. Ensikirra enkulu yazane na amang'ana amalootu aga mumiire okuwa ni muwurra.

⁸Ni mu engira indi, mbajojera ensikirra empia. Owuene owua ensikirra eno wuwonekana ku Yesu Kristo ni ku inywe mwona, aeniki ekierema ekimiire okuwa ni kiambre ekialo kiwua kandi nyingeeno owueru owua kuwuene wumiire okutanika okuwala.

⁹Omuntu owoola mbwe ari mu owueru, na akiaregere omwina waae, omuntu oyo akiari mu ekierema.

¹⁰No omuntu ogonziizie omwina waae, iye ari mu owueru kandi kiwulao ekintu ekiiza kiamuguunya mala yagwa mu owuoni.

¹¹No omuntu oregere omwina waae, iye ari mu ekierema kandi akiagenda-genda mu ekierema. Afwana omuwuunu otamanyire aa agia aeniki ekierema kimumwamiizie amiiso ti!

¹²Mbajojera inywe awaana wange awa ngonziizie, aeniki mumiire okurekerwa amawi giinyu goona ku eriina eria Yesu Kristo.

¹³Mbajojera inywe waise, aeniki mumanyire Kristo, owawangao okuemera mu owutanikro. Mbajojera inywe awawuuka, aeniki mumiire okukira Ekikeeno. Mbajojera inywe awaana wange awa ngonziizie, aeniki mumiire okumanya Katonda Ise.

¹⁴Mbajojera inywe waise, aeniki mumanyire Kristo, iye owawangao okuemera mu owutanikro. Mbajojera inywe awawuuka, aeniki muri awakalangufu, Ing'ana eria Katonda riwamenyeremo kandi mumiire okukira Ekikeeno.

Mutaaza mwagonzia ekialo

¹⁵Mutaaza mwagonzia ekialo namba ewintu ewiri ku ekialo. No omuntu agonziizie ekialo, ngagonziizie Katonda Ise, yaaya.

¹⁶Ni kutio aeniki ewintu wiona ewiri ku ekialo, kiomo okuizula no okuagala okwa omuwiri ne ewintu ewisangaazia mala amiiso, alala no okuitumbula okwa awantu waitumbula ne ewintu ewia wari nawio nakuwa ewia wakola, wiona wiema mala ku ekialo, ni ng'ani ku Katonda, yaaya.

¹⁷Ekialo ne ewintu ewiriko wiona wiiza okuwua. No omuntu okola okuagala okwa Katonda, iye ari no owulamu owutariwua.

Awazigu awa Kristo

¹⁸Waana wange, zino nizio enyinga ezia owutuuko. Mala kiomo mumiire okuwurra mbwe omuntu olwania Kristo aaza okuuzza. Namba nyingeeno awamulwania awangi wamiire okuuzza. Kandi kino nikio ekigera ni tumanya mbwe turi mu amiire aga owutuuko.

¹⁹Awantu wano waatusomoka watureka. Ni ngawakawanga awalala ku ifwe kuwuene, aeniki waweeko awalala ku ifwe, kangato wakiari ni ifwe. No okureka okwa waatureka kulagana geeza mbwe awulao namba omulala ku iwo owawanga omulala ku ifwe.

²⁰Ni inywe, Kristo Omweru amiire okuwafukako Omwoyo Omweru ogwa Katonda, kutio mumanyire owuene.

²¹Ng'ambajojera amang'ana gano mbwe ng'amumanyire owuene yaaya, ni mbajojera aeniki mumanyire owuene owuo kandi mumanyire mbwe wuwulao owuweeyi owuesa wuawa mu owuene.

²²Katio omuweeyi naanu? Ari omuntu olowa mbwe Yesu ngaari Omulowole owa Katonda. Omuntu ofwana oyo nio olwania Kristo kandi alowa Katonda Ise alala ni Katonda Omuzia oona.

²³Awulao-uwula omuntu okawa ni Katonda, ni kandi alowa Omuzia waae. Oganyire Omuzia owa Katonda, ari ni Katonda Ise oona.

²⁴Mukole wukalu muwone mbwe muandre ku amang'ana aga mwamiire okuwa ni muwurra okuemera kuluweri. Ni mukorre mutio, nikwo muuza okugia emberi okuanda ku Katonda ni ku Omuzia waae yoona.

²⁵Kandi Kristo omwene yaifuuwa mbwe aaza okutu-aa owulamu owutariwua.

²⁶Mbajojera amang'ana gano ku amang'ana aga awantu awaagala okuwatoola ku engira endootu.

²⁷Ni inywe Omwoyo Omweru ogwa Katonda owa Yesu Kristo yawafukako awarimo kandi kiwulao ekia muagarra omuntu wundi awagerere. Omwoyo Omweru ogwa Katonda owarimo oyo, awagerera ewintu wiona. Ari owa kuwuene kandi ng'ano owa owuweeyi, yaaya. Mala kiomo amiire okuwagerera mbwe mukole, muande ku Yesu Kristo.

Awaana awa Katonda

²⁸Kutio waana wange, mugie emberi mu okuganya ku Kristo kugere nyanga na ari-irana ensuuko zitatuamba. Ni tugie emberi waae no owusiani mu okuirana kwae.

²⁹Aeniki mumanyire mbwe Kristo ari omulongoole, mumanyire lwona mbwe awantu woona awakola ewintu ewisugre emberi wa Katonda wari awaana awa Katonda.

1 Yowaana 3

¹Muwoneko kiomo olugonzi olwa Katonda ari nalwo ni ifwe, luri olukaate! Olugonzi olwo nilwo olugera ni tuetwa awaana awa Katonda. Kandi ni kuwuene mbwe turi awaana waae. Ne ekigera na awantu awa ekialo ngawatumanyire, kiri mbwe yoona ngawakamumanya, yaaya.

²Awiiko wange awa ngonziizie, ifwe twona nyingeeno turi awaana awa Katonda. Kukawa kutio, tukiari okumanyisiwua kiomo tuuza okufwanana, yaaya. Ne ekia tumanyire ni mbwe Kristo na aaza okuirana, turifwanana nae aeniki tuuza okumuwona kiomo ariwa.

³Omuntu-umuntu ori no okurindirra kuno, aieruyia iye omwene, awe omweru mala kiomo Kristo ari omweru.

⁴Omuntu-umuntu okola owuoni aona ensikirra eya Katonda, aeniki okukola owuoni no okuona ensikirra.

⁵Mumanyire mbwe Kristo yaaza kugere atutooleko amawi giifu kandi mbwe iye awulamo owuoni, namba wutono.

⁶Awulao omuntu omenyere ku Kristo ogia emberi na akola owuoni. Omuntu-umuntu ogia emberi na akola owuoni, iye akiari okumuwona lwona ngamumanyire.

⁷Waana wange, mutaaza mwaganya omuntu yawasemerezia. Omuntu-umuntu okola ewintu ewisugre emberi wa Katonda, ari omuigolovu mala kiomo Kristo ari omuigolovu.

⁸Omuntu-umuntu okola owuoni ari owa Sataani, aeniki Sataani amiire okuweerako na akola owuoni okuemera mu owutanikro. Kandi Omuzia owa Katonda yaaza kugere aone emirimo egia Sataani.

⁹Awulao omuntu ori omwana owa Katonda, ogia emberi okumenya mu owuoni, aeniki emwo endootu eya Katonda emurimo. Ngaesa okugia emberi okumenya mu owuoni aeniki ari omwana owa Katonda.

¹⁰Eno nie engira eya tugawula nayo awaana awa Katonda na awaana awa Sataani: Omuntu-umuntu otakola ewintu ewisugre emberi wa Katonda ngari omwana owa Katonda. Lwona owula no olugonzi no omwina waae ngari omwana owa Katonda.

Mugonzanie omuntu no omwina waae

- ¹¹Owutumwa owua mumiire okuwurra okuemera mu owutanikro wuri mbwe tusugaane tugonzanie omuntu no omwina waae.
- ¹²Mutafwana ni Kaini owawanga owa Sataani, kandi owaita wamwawu waae. Ne ekiagera na amuita niki? Yamuita aeniki enkola ziae ziwanga embiiwi, ne ezia wamwawu waae ziwanga endootu.
- ¹³Waamwifu, mutaaza mwawa no okuluguula ni muwona awantu awa ekialo ni wawaregere.
- ¹⁴Ifwe tumanyire mbwe tumiire okuambuka tuema mu olumbe tuingira mu owulamu. Ekitulaga tutio, no okugonzia okwa tugonziizie awiina wiifu. No omuntu-umuntu owula no olugonzi no omwina waae, iye akiari mu olumbe.
- ¹⁵Omuntu-umuntu oregere omwina waae ari omwisi. Ni mumanyire mbwe awulao omwisi ori no owulamu owutariwua.
- ¹⁶Okufumia okwa Yesu Kristo yatufumizia owulamu waae kugera ni tumanya geeza ekia olugonzi luri. Kutio twona tusugaane tufumizie awiina wiifu owulamu wuifu.
- ¹⁷No omuntu ari ne ekintu mu amakono ekia aesa okutunzia nakio omwina waae ori amakono amasa, ni iye amuima chee, ao otio akawa no olugonzi olwa Katonda otie?
- ¹⁸Waana wange, mutureke okugonzia awiina wiifu mala ne eminwa nakuwa na amang'ana amasa, ni mutuwe nawo no olugonzi olwa kuwuene, oluri ne enkola.
- ¹⁹Mu engira eno, tuesa twamanya mbwe tumenyere mu owuene kandi tuuza okuwa no owusiani okuimerra emberu wa Katonda.
- ²⁰Aeniki namba ne emioyo giifu gitukengera ekiina mbwe turi awooni, Katonda ari omunene okukira emioyo giifu kandi amanyire ewintu wiona.
- ²¹Awiiko wange awa ngonziizie, ne emioyo giifu gitatukengera ekiina mbwe turi awooni, tuwa no owusiani emberu wa Katonda kandi
- ²²atu-aa ekintu-ukintu ekia tumusawire aeniki turindre ensikirra ziae kandi tukola ekintu ekimusangaazia.
- ²³Ensikirra yazane eri mbwe tuganye ku eriina eria Omuzia waae Yesu Kristo, kandi mbwe tugonzanie omuntu no omwina waae kiomo yatusikirra.
- ²⁴Awantu awarindre ensikirra ziae, wamumenyeremo kandi yoona awamenyeremo. Kandi Omwoyo Omweru ogwa Katonda owa yatu-aa, nio ogera ni tumanya mbwe atumenyeremo.

1 Yowaana 4

Omwoyo ogwa kuwuene no ogwa owuweeyi

¹Awiiko wange awa ngonziizie, mutaaza mwaganya awantu wona awawoola-uwoola ne eminwa mbwe wari no Omwoyo Omweru ogwa Katonda. Ni mugeezaanie emioyo egia wari nagio egio kugere mumanye ni kuri kuwene mbwe giema ku Katonda nakuwa yaaya. Paka tukole tutio aeniki awagambi awa owuweeyi awangi wamiire okuza ku ekialo.

²Engira eya oesa okumanyirimo mbwe omuntu ari no Omwoyo Omweru oemere ku Katonda ngino: Omuntu ori no omwoyo oguganya mbwe Yesu Kristo yaaza ku ekialo kuno mu omuwiri ogwa omuntu, ari no Omwoyo Omweru ogwa Katonda.

³No omuntu-umuntu ori no omwoyo ogulowa Yesu Kristo, iye awula no Omwoyo Omweru ogwa Katonda. Omuntu ki oyo ari no omwoyo uguema ku omuzigu olwania Kristo, owa mwamiire okuwurra mbwe aaza ku ekialo. Kandi muwe no okumanya mbwe waamiire okuza namba nyingeeno wari ku ekialo.

⁴Awaana wange awa ngonziizie, inywe muri awa Katonda kandi mumiire okukira awagambi awa owuweeyi wano wona. Muwakirre aeniki Kristo owarimo, ari omunene okukira Sataani ori mu awantu awa ekialo.

⁵Wari awantu awa ekialo, kutio wagamba-gamba ki awantu awa ekialo, kandi awantu awa ekialo wawategerezia.

⁶Ni ifwe turi awantu awa Katonda kandi awamanyire Katonda niwo awategerezia amang'ana giifu. Omuntu-umuntu otamanyire Katonda ngatategerezia, yaaya. Nintio tumanya okugawula Omwoyo owa kuwene no omwoyo owa owuweeyi.

Olugonzi olwa Katonda no olugonzi lwifu

⁷Awiiko wange, mutugonzanie omuntu no omwina waae, aeniki olugonzi luema ku Katonda. Omuntu-umuntu ogonziizie omwina waae, ari omwana owa Katonda kandi amanyire Katonda.

⁸No omuntu otagonziizie omwina waae, iye ngamanyire Katonda yaaya aeniki Katonda no olugonzi.

⁹Katonda yagera olugonzi olwa ari nalwo ni ifwe luwonekana geeza agati iifu, ku okutuma okwa yatuma Omuzia waae omulala eng'ene ku ekialo, kugere ni kuwitra ku iye, tutuukre owulamu.

¹⁰Olugonzi olwene, ng'ani mbwe ni ifwe awaagonzia Katonda, yaaya. Ni luri mbwe Katonda nio owatugonzia mala atuma Omuzia waae okuza okutuweera omusango ogwa okufumia amawi giifu.

¹¹Awiiko wange awa ngonziizie, aeniki Katonda yatugonzia tutio, kane twona tusugaane tugonzanie omuntu no omwina waae.

¹²Awulao omuntu omiire okuwona Katonda. Kukawa kutio, ni tugonzanie na awiina wiifu, Katonda atumenyamo kandi olugonzi lwae lutuuka kuwene mu owulamu wiifu.

- ¹³Tumanyire mbwe tumumenyeremo kandi yoona atumenyeremo, aeniki amiire okutu-aa Omwoyo gwae Omweru.
- ¹⁴Ifwe twawona na amiiso kandi tulaga awantu woona mbwe Katonda Ise yatuma Omuzia waae okuuzza okuwa Omununuzi owa awantu woona awari ku ekialo.
- ¹⁵No omuntu aganyire mbwe Yesu ari Omuzia owa Katonda, Katonda amumenyamo kandi iye yoona amumenyeremo.
- ¹⁶Kutio tumanyire kandi tuteere emioyo giifu ku olugonzi olwa Katonda ari nalwo ni ifwe. Katonda no olugonzi, kandi omuntu-umuntu omenyere na awandi no olugonzi, omuntu oyo amenyere ku Katonda kandi Katonda oona amumenyeremo.
- ¹⁷Eno nio engira eya olugonzi olwa Katonda lutuuka kuwueene agati iifu. Kuno kuuza okugera tuwe awasiani owuire owua Kristo arikengra awantu ekiina. Ni kutio aeniki, mu owulamu wuifu ku ekialo kino, tufwanana ni Kristo.
- ¹⁸Wuwulao-uwula owuti aa olugonzi luri. Olugonzi oluri kuwueene lutoolao owuti aeniki okuswawukwa nikwo okureeta owuti. No omuntu ari no owuti, ao otio olugonzi olwa Katonda lukiari okutuuka kuwueene mu owulamu waae.
- ¹⁹Katonda nio owasooka okutugonzia kandi okwo nikwo okugera ni tumugonziizie kandi tugonziizie awiina wiifu.
- ²⁰No omuntu awoola mala no omunwa mbwe, “Ngonziizie Katonda,” ne eno aregere omwina waae, omuntu oyo ari omuweeyi. Omuntu owula no olugonzi no omwina waae owa awona, iye akagonzia otie Katonda awa akiari okuwona?
- ²¹Kristo omwene yasikirra mbwe omuntu-umuntu ogonziizie Katonda paka agonzie omwina waae yoona.

1 Yowaana 5

Okuwa no okuganya ku Yesu kureeta owulamu

- ¹Omuntu-umuntu ori no okuganya mbwe Yesu nio Omulowole owa Katonda, ari omwana owa Katonda. Lwona omuntu-umuntu ogonziizie Katonda Ise, agonziizie Omuzia waae yoona.
- ²Tuesa okumanya mbwe tugonziizie awaana awa Katonda ni tugonziizie Katonda kandi ni turindre ensikirra ziae.
- ³Aeniki, okugonzia Katonda no okurinda ensikirra ziae kandi ensikirra ziae ngaziri enkalu ziifu okurinda.
- ⁴Ni kutio aeniki awaana awa Katonda woona wakira ekialo. Kandi owukire wuno wureetwa no okuganya okwa turi nakwo ku Kristo.

⁵Oesa okukira ekialo naanu katio? Ni mala ori no okuganya mbwe Yesu ari Omuzia owa Katonda eng'ene.

Awasiigiki awa Yesu Kristo

⁶Yesu Kristo ono, nio owaaza ni kuwitira mu amasaai na amanzi. Mu okuuzza kwae, ngakawitira mu amanzi geng'ene, ni yawitira mu amanzi na amasaai. Kandi Omwoyo Omweru nio osigika amang'ana gano, aeniki Omwoyo Omweru ari kuwuene.

⁷Ni kutio aeniki awagasigika wari wasatu:

⁸Omwoyo Omweru ogwa Katonda, amanzi na amasaai, kandi woona waganyana ku eking'ana kino.

⁹Tutoola amang'ana aga awantu wawoola ki agari kuwuene. Kutio tusugaane tu-ee amang'ana aga Katonda omwene awoola ku Omuzia wae owuzito okukira.

¹⁰Omuntu ki omuntu ori no okuganya ku Omuzia owa Katonda asigika eking'ana kino mu omwoyo gwae. No omuntu owula no okuganya ku Omuzia owa Katonda, atoola Katonda ki omuweeyi aeniki alowere okuwa no okuganya ku amang'ana aga Katonda omwene nio owoorre ku Omuzia wae.

¹¹Amang'ana agasigikwa gano gari mbwe Katonda amiire okutu-aa owulamu owutariwua kandi owulamu owuo wutuukrwa ku Omuzia wae.

¹²Omuntu-umuntu ori no Omuzia owa Katonda mu omwoyo gwae ari no owulamu. No omuntu owula no Omuzia owa Katonda mu omwoyo awula no owulamu owuo chee.

Owulamu owutariwua

¹³Mbajojera amang'ana gano, inywe awantu awari no okuganya ku eriina eria Omuzia owa Katonda, kugere muwe no okumanya mbwe muri no owulamu owutariwua.

¹⁴Turi no owusiani emberu wa Katonda mbwe ni tumusawire ekintu-ukintu, kikawa ki, nikulondokana no okuagala kwae, atuwurra.

¹⁵Kandi kiomo tumanyire mbwe awurra okusawa kwifu otio, tuwa no okumanya mbwe ewintu ewia tumusawire wiona, tumiire okutuukra.

¹⁶No omuntu awuine waamwawu wae ku Kristo na akola owuoni owutaira omuntu mu olumbe, omuntu oyo asugaane amusawire Katonda kandi Katonda aaza oku-aa omuntu okorre owuoni oyo owulamu. Ngamba-gamba ku awantu awari no owuoni owutaira omuntu mu olumbe. Ni wurio owuoni owuira omuntu mu olumbe. Ng'amboola mbwe omuntu asawire omuntu okorre owuoni owufwana wutio.

¹⁷Ewintu ewiwiiwi wiona ewia awantu wakola wiri owuoni. Ni wurio owuoni owutaira omuntu mu olumbe.

¹⁸Tumanyire mbwe awulao omwana owa Katonda, ogia emberu na akola-ukola owuoni. Kuri kutio aeniki Kristo owaiwulwa na amaani aga Katonda, amurinda kandi okwo kulowera Ekikeeno okumuambako.

¹⁹Tumanyire mbwe ifwe turi awaana awa Katonda, ne ekialo kiona kikangatiirwe ne Ekikeeno.

²⁰Lwona tumanyire mbwe Omuzia owa Katonda yamiire okuuzza kandi amiire okutu-aa owuesani owua okuwurra, kugere tumanye Katonda omulala owa kuwuene. Kandi owulamu wuifu wuri ku Omuzia waae Yesu Kristo, ori kuwuene. Kristo ono nio Katonda owa kuwuene kandi nio owulamu owutariwua.

²¹Kutio waana wange, muirinde geeza kugere muwe ale ni katonda ensaasa.

2 Yowaana

2 Yowaana 1

¹Inze omugaaka Yowaana, nkujojera ebaruwa eno, iwue omukazi omulowole kandi otiirwe, alala na awaana waao. Mbagonziizie mwona no olugonzi oluri kuwuene, kandi ng'ani inze owagonziizie otio nyeng'ene, ni namba awantu woona awamanyire owuene, woona wawagonziizie.

²Ni kutio aeniki owuene owua tumenyeremo kandi owuuzza okuwa ni ifwe amiire goona, niwuo owutu-aa owuesani owua okugonzia otio:

³Owusiza, amasaasra alala no owuolu wiiza okuwa ni ifwe ku owuene no olugonzi, ni wituemera ku Katonda Ise ni Yesu Kristo, Omuzia owa Soifu Katonda.

⁴Kimiire okuwa ekisangaalo kiange ino, okutuukra awandi ku awaana waao ni wamenyere mu engira eri kuwuene, mala kiomo Soifu Katonda yatusikirra mbwe tumenye.

⁵Nyingeeno, iwue omukazi otiirwe kandi owa ngonziizie, inze ng'ankujojera ensikirra indi empia yaaya, ni mala enkulu eya tumiire okuwa nayo okuemera mu owutanikro. Nsawa mbwe, ifwe awari no okuganya ku Kristo, tugonzanie omuntu no omwina waae.

⁶Kandi olugonzi olwene olwa ngamba-gambako luno, luri okulondokana ne ensikirra yaae. Ne ensikirra eene, ne eya mumiire okuwurra okuemera mu owutanikro, ewoola mbwe mumenye no olugonzi.

⁷Awantu awangi awasemerezia awantu kandi awalowa mbwe Yesu Kristo nakaaza ku ekialo mu omuwiri ogwa omuntu, wamiire okufuma enze waingira mu ekialo kiona. Omuntu ki oyo asemerezia awantu kandi ari omuzigu owa Kristo.

⁸Wa amankaga kugere otateesia omugawo ogwa Katonda aaza okuesana, ogwa omiire okukorra emirimo na amaani, no ogutuukre gwona.

⁹Omuntu otambuka engerera endamu kandi ota-ambre engerera eya Kristo, iye ngari ni Katonda. No omuntu-umuntu oambre engerera ezio, ari ni Katonda Ise alala no Omuzia waae oona.

¹⁰No omuntu akuuzreko ne engerera indi ensaasa egawuuke ne eno, otamuingizia mu enyumba yaa namba okumukeezia otamukeezia.

¹¹Okuingizia omuntu ki oyo, no okuizoga nae mu enkola embiwi ezia akola.

¹²Ndi na amangi aga okukujojera, ni nanyagala okukola ni itu ne einki, yaaya. Aa okukola otio, nindra okuuza okuwagenia, ngamba-gambe ni inywe omunwa no omunwa, kugere owusangaavu owua turi nawuo wuwe owuizuule du!

¹³Awaana awa waamwinyu owekiala omulowole, wakutumiire amakeezio.

3 Yowaana

3 Yowaana 1

Amakeezio agasookere

- ¹Inze omugaaka Yowaana, ebaruwa eno nkujojera iwue Gaayo omwiko wange owa ngonziizie no olugonzi olwa kuwene.
- ²Omwiko wange owa ngonziizie, nkusawira Katonda mbwe owulamu wua owa omuwiri wuwe owulootu kandi mbwe ewintu wiona wigie ni iwue geeza, mala kiomo osonga okugia geeza mu owulamu wua owa mu omwoyo.
- ³Nyawa ne ekisangaalo ino olwa waamwifu wandi ku Kristo waaza eno, wawoola kiomo muandre ku owuene kandi mbwe mugia emberi no okumenya owulamu owuisigiike ku owuene owuo.
- ⁴Mbula ne ekimpa owusangaavu okukira okuwurra mbwe awaana wange wamenyere owulamu owuisigiike ku owuene.

Yowaana atondowola Gausi

- ⁵Omwiko wange owa ngonziizie, oandre ku okukorra waamwifu ku Kristo owulootu, kukawa mbwe wari awageni ku iwue, ngowamanyire.
- ⁶Wamiire okulaga ekaniisa ku olugonzi olwa ogonziizie nalwo awantu. Okola geeza ino no owasewula mu engira esugre emberi wa Katonda, ni wawaemako.
- ⁷Ne eriina eria Yesu Kristo nirio eriagera ni wafumira emirimo egia Katonda kandi wuwulao-uwula owuitunzi owa waatuukra okuema ku awantu awawula no okuganya ku Katonda.
- ⁸Kutio ifwe Awakristo tusugaane tuwaingizie geeza mu amayumba giifu, kiomo engira ndala eya tuesa okukorramo alala kugere owuene wuwonekane.

Diotreefa omukangasi omuwiiwi

- ⁹Kukawa mbwe miire okujojera ekaniisa ku amang'ana gano, Diotreefa omuntu ogonziizie oku-ita emberi, yalowa asiriisia okuwa ni ifwe alala ku eking'ana kino.
- ¹⁰Kutio ni nyiza okuuzza, nyiza okuta emberi iinyu ewintu wiona ewia amiire okuwa na akola. Ee, amiire okuwa na atuwoolako amang'ana amawiiwi aga owuweeyi. Ago geng'ene ngagamusuga, na alowa namba okuingizia awiina wiifu ku Kristo kandi alowera awantu awagala okukola otio kandi awasomosa mu ekaniisa!
- ¹¹Omwiko wange owa ngonziizie, otaaza waganya okulonda enkola embiiwi, ni gia emberi okulonda enkola endootu. Omuntu-umuntu owa enkola endootu ari omuntu owa Katonda. No omuntu-umuntu owa enkola embiiwi, ari omuntu okiari okuwona Katonda.

¹²Demetriasi, iye awantu woona wamugamba-gambako geeza kandi owuene wuazane wuona wumugamba-gambako geeza. Ifwe twona tumugamba-gambako geeza kandi omanyire mbwe ewia tuwoola wiona wiri kuwuene.

Amakeezio agatuukre

¹³Ndi na amangi aga okukujojera, ni nanyagala okukola otio ni itu ne einki, yaaya.

¹⁴Nindra okuuza okuwawona wuangu ano, nyize ngamba-gambe ni inywe omunwa no omunwa.

¹⁵Wa no owuolu. Awiiko awari eno wawakeeziizie mwona. Iwue oona keezia awiiko awari eyo, no owaeta na amiina gaawu.

Yuuda

Yuuda 1

¹Ni inze Yuuda owemirimo owa Yesu Kristo kandi wamwawu Yakoobo. Mbajojera inywe awantu awaeterwe ni Katonda Ise, awa agonziizie kandi awarindrwe ni Yesu Kristo.

²Mutuukre amagongi, owuolu no olugonzi okuema ku Katonda kuwungi.

Awagerezi awa owuweeyi

³Awiiko wange awa ngonziizie, nyaweerenga no okuagala okwa okuwajojera amang'ana ku owuinunuzi owua turimo twona alala wuno. Ni katio kunnigirizia mbwe nyingeeno mbajojere ni mba-ambia amaani mbwe muambe wukalu okulwanra okuganya okutasongwako okundi okwa Katonda ya-aa awantu waae.

⁴Mboola otio aeniki wario awantu, awaamala okujojerwa ekiina ekia olumbe kale, awamiire okuwaingiramo owuiwisi ni mutamanyire. Wari awantu awatatiire Katonda, awawoola mbwe aeniki Katonda ari omusiza, awantu wari iwaga okukola-ukola owusondo kiomo wawuine. Okulowa kwona walowa Yesu Kristo, owa eng'ene nio Omukangasi kandi Omwami iifu.

⁵Kukawa mbwe mumanyire wino wiona, ni nyagala okuwaizurizia kiomo Omwami Katonda yanunula awantu waae — awaana awa Israeli, mala awatoola mu ekialo ekia Misiri. Ni kukawa kutio, lunyima yaita awantu wona ku iwo, awataamuganyako.

⁶Lwona, muingirizieko kiomo enyankoi awataarinda emigawo eminene egia Katonda yawa-aa, ni aa okukola otio waafuma wareka omugizi gwawu aweene. Okwo okwagera Katonda awasiwa ne eminyororo egitakiriya amiire goona mu ekierema ekinwamu ti-ti-ti, aa warindirramo Owuire owunene owua ekiina.

⁷Nintio kwaweera awantu awa emigizi egia Sodooma ni Gomoora, alala ne emigizi egiawanga ampi nagio, awaaita mu owusoodani no okuitala. Katonda yawaswawuka, kiwe ekilago ku awantu awarigizwa mu omurro ogutafwa amiire goona.

⁸Mu engira emfwanani eyo, awantu awafwa okuloota-loota wano waona emiwiri giawu. Ngawatiire amang'ana aga awakangasi waawu, lwona wagamba-gamba uwiiwi ku ewintu ewiri ku igulu.

⁹Ni namba omukangasi owa enyankoi oetwa mbwe Mikaeli, ni yalwananga ne Ekikeeno ku omuwiri ogwa Muusa, ngakaitulumula mbwe aki-ingirra na akirigizra amang'ana aga amanyego yaaya. Ni yakilaga mala mbwe, “Omwami Katonda omwene akugaanie!”

¹⁰Na awantu wano, iwo wafwa okunyega-nyega unyega-nyega kugia ewintu ewia watamanyire alala ne ewia watoola mbwe wamanyire namba ni wakiari

okuingirizia geeza. Wafwana ne entiang’i ezitaingirizia amang’ana — kandi ewia wakola wino niwio ewigera Katonda na awamala.

¹¹Katonda ariswawuka awantu awalondere olunyaafwa olwa Kaini awo ino. Waazakana okuagala okufuna amasendi mu engira etasugaane eya Balaamu. Kandi Katonda awamala kiomo yaita awantu awaaizoga ni Koora mu okulwania owukangasi.

¹²Awantu wano ni awaizogaane ni inywe enyinga ezia muria isawo eria okuingirizia olugonzi olwa Omwami, wawafwanako egaasi emuamia enguwo. Wari awantu awawula-uwula ensuuko namba wutono — awaayi awairiisia mala iwo aweene. Wawula emirimo ki amare aga emiyaga giira eno ne eno, ni ngagareeta emvula. Lwona wafwana emiti egita-ama ensaafu namba mu entwigo. Emiti egisugre no okuiywa na amasina, gifwe toko-toko.

¹³Ee, wafumia enze ewintu ewia ensuuko ewia wakola, mala kiomo amasiira amakate-kaate gafumia ifulo, enyanza ne ewiire. Wari mala kiomo eng’eni-ng’eni ezirumuka, Katonda awawikiire ekierema ekimwamu ti-ti-ti, amiire goona.

¹⁴Enooka ekiichimbiriiri owa Adaamu owa musamvu, yagamba-gamba ku awantu wano kale otino, “Awiifu muwoneko, Omwami na aaza no omurima omukaate ogwa enyankoi waae aweeru.

¹⁵Aaza okukengera awantu wona ekiina, kandi okugera awantu awatatiire Katonda waganye ne enkola ziwu embiwi ezia wamiire okumukorra alala na amang’ana amawiiwi goona aga wamiire okumuwoolako!”

¹⁶Awantu wano na awang’ong’ooni kandi enyinga ziona waagala mala engira ezia waka-ambramo awandi owuoni. Walonda okuagala okuwiiwi okwa wari nakwo kandi waitumbula. Wawoorra awantu mala ewintu ewiwasangaazia, kugere watuusie okuagala kwawu iwo aweene.

Ekia Awakristo wasugaane wakole

¹⁷Ni inywe awiiko wange awa ngonziizie, mutaaza mwalawira ewintu ewia awatumwa awa Yesu Kristo waawoola mbwe wiazanga okuikola.

¹⁸Waawalaga watino, “Mu amiire aga owutuuko, wariwaa awantu awariwatoola wutono ku okuganya okwa muri nakwo ku Katonda, iwo aweene ni walonda okuagala kwawu okutasugaane emberu wa Katonda.”

¹⁹Wano niwo awantu awareeta engawuzi agati iinyu. Wakola mala ewintu ewia emiwiri giawu giwaira okukola kandi wawula no Omwoyo Omweru ogwa Katonda.

²⁰Ni inywe awiiko wange awa ngonziizie, muiyomboke mu okuganya okweru kandi okulamu okwa muri nakwo, kandi musawe na amaani aga Omwoyo Omweru ogwa Katonda aesana.

²¹Muwe mu olugonzi olwa Katonda awagonziizie nalwo, ni murindirra Omwami iifu Yesu Kristo owa amasaasra, aaze awa-ee owulamu owutariwua.

²²Muwe na amasaasra na awantu awakiari no okui-ingirizia mu emioyo giawu.

²³Mutunzie awandi ni muwamizula mu omurro; na awandi muambre amasaasra kandi muwatie. Murege kugia enguwo ziwu ezimwamiziiwue ne enkola emwamu ezia wakola ne emiwiri giawu.

Okusawa okutuukre

²⁴Katonda eng'ene, nio oesa okuwarinda kugere mutairana enyima kandi awareete emberu waae aa owunene wuae wuri, ni muri awasangaavu kandi awawula ni itone.

²⁵Iye, Katonda Omununuzi iifu omulala eng'ene, aewue owunene, owukangasi, owuesani, na amaani ni kuwitira ku Omwami iifu Yesu Kristo, emiigo giona egiawita ne egiiza, reero kandi amiire goona agawula ne entuuko. Amin.

Owusasuko

Owusasuko 1

Amang'ana ku owuimpi

¹Wuno no owusasuko owua Katonda ya-aa Yesu Kristo okulaga awakurumu waae ku ewintu ewia paka wiikole ku wuangu. Yesu Kristo yalagana ewintu wino ku owueru olwa yatuma enyankoi waae okundeetra owutumwa wuno, inze Yowaana omukurumu waae.

²Wuno katio njoja amang'ana goona ku ewintu wiona ewia nyawona ku amang'ana aga Katonda, kandi ku ewintu wiona ewia Yesu Kristo yawoola kandi akola.

³Awantu awasoma owugambi wuno, na awawuwurra kandi waingizia amang'ana aga owugambi agajojrwe gano mu emioyo giawu wasereekwe, aeniki enyinga ezia ewintu wino wiiza okuikola ziri ampi okutuuka.

Amakeezio aga Yowaana

⁴Inze Yowaana, mbajojera ebaruwa eno inywe Awakristo awari mu amakaniisa musamvu agari mu ekitemo ekia Eesia. Muwe no owuolu no owusiza owua Katonda orio, omiire okuwaaoo kandi ooza okuwaaoo, kandi owua emioyo musamvu awari emberu wa entewe eya Owuami owua Katonda.

⁵Kandi muwe no owuolu no owusiza owuemere ku Yesu Kristo owoola owuene ku amang'ana aga Katonda, owasooka okuziuka okuema ku awafu, kandi ori omukangasi owa awaami woona awari ku ekialo. Kristo otugonziizie kandi owatununula mala atugawula no owuoni wuifu na amasaai gaae,

⁶nio owatuta mu owuami wuae kandi agera tuwa awoozia awa Katonda Swae. Ka-aeewue owunene na amaani amiire goona! Amin.

⁷Muwurre! Aaza okuuza mu amare kandi awantu woona, namba awaamufumuta na amafumo woona, warimuwona. Kandi enganda ziona ezia awantu awa ku ekialo zirirra wululu olwa ariiza. Ee, nintio kuuza okuikola! Amin.

⁸Omwami Katonda owa amaani goona orio, omiire okuwaaoo kandi ooza okuwaaoo awoola otino, "Inze ni inze Alfa kandi Omeega, Owutaniko kandi Owutuuko."

Owusasuko owua Yesu ori Omwami oziukre

⁹Inze Yowaana, wamwinyu ku Kristo, ori ni inywe alala mu Owuami owua Katonda, kandi mu okusikia omwoyo, ni mu eminyako-nyaako ku amang'ana aga Yesu, nyairwa mu ekizinga ekietwa mbwe Patiimo aeniki nyalanzianga amang'ana aga Katonda, kandi ku okuwa okwa nyawanga omuwoni owa amang'ana amalootu aga Yesu.

¹⁰Omwoyo Omweru ogwa Katonda yambangako, nyanga olwa omudiira ogwa okuwiri kandi nyawurra omwoyo ni gurra wukalu ki olwiga, enyima wange.

- ¹¹Omwoyo ogwo gwandaga gutino, “Joja ewintu ewia owona wino mu ebuuki nikwo otume ebuuki eyo ku Awakristo mu amakaniisa musamvu aga Efeeso, Simirna, Pagamuumi, Thiatira, Sadiisi, Filadelfia ne eya Laodeesia.”
- ¹²Nikuemao, nyagaluka okuwona omwene omwoyo ogwagamba-gambanga ni inze oyo. Olwa nyagaluka otino, nyawona ewintu musamvu ewilongrwe ne edhaabu ewia ewimuri witeewuako.
- ¹³Nyawona ofwanana no omuzia owa omuntu na aiwooye enguwo endiire etuuka ku amagulu ansi, ne ekitambaaya ekia edhaabu ku ekifuwa kiae, na aimeriire agati ya ewintu musamvu ewio.
- ¹⁴Emvwiri ezia ku omutwe gwae ziwanga enzeru zerre kandi amiiso gae gaemanga ki omurro.
- ¹⁵Amagulu gae gaafwananga ne efeedha elongerwe geeza eakaka no owuakanyu owua ekiuma ekiteerwe mu omurro omuyu le, kandi omwoyo gwae gwafwananga na amanzi agaolomoka.
- ¹⁶Nyakukono kwae okusaaza, yawanga na agingre eng’eni-ng’eni musamvu. No omwambe omwogi oguri ne eminwa iwiri gwafumanga mu omunwa gwae, kandi ekieni kiae kiawalanga wukalu ki owueru owua enyanga owudangaazia.
- ¹⁷Olwa nyamuwona-uwona otino, nyagwa ansi ku amagulu gae ki omuntu ofwire. Ni iye yagolola okukono kwae okusaaza antaako na andaga otino, “Otawa no owuti! Inze ni inze Owutaniko kandi Owutuuko,
- ¹⁸Iwona ni inze orio omulamu. Nyawanga ni mfwire, ni wona, nyingeeno ndi omulamu amiire goona agawula ne entuuko, kandi ni inze ori ne ekifunguo ekia olumbe ne ekia asi aa awantu awafwire mu owuoni wari.
- ¹⁹Kutio nyingeeno joja ansi mu ebuuki eyo ewintu ewia owuine, ewintu ewiikola ne ewiiza okuikola emberu.
- ²⁰Amang’ana agaiwisre agari ku eng’eni-ng’eni musamvu ezia wawuine mu okukono kwange okusaaza, ne ewintu musamvu ewia edhaabu ewia ewimuri witeewuako gari gatino: eng’eni-ng’eni musamvu, ziimeriire enyankoi musamvu awa amakaniisa musamvu. Ne ewintu musamvu ewia edhaabu ewia ewimuri witeewuako, wiimeriire amakaniisa musamvu ago.”

Owusasuko 2

Ebaruwa egiira ekaniisa eri Efeeso

- ¹Nikuemao yandaga otino, “Jojera enyankoi owa ekaniisa eya Efeeso otino: Gano nigo amang’ana aga iye ogingre eng’eni-ng’eni musamvu mu okukono kwae okusaaza kandi oghenda-genda agati ya ewintu musamvu ewia edhaabu, ewiteewuako ewimuri.

²Manyire emirimo gïao, kiomo omiire okulwanagana wukalu kandi kiomo omiire okusikia omwoyo. Lwona, manyire mbwe ngoesa okuvuga alala na awantu awawi. Omiire okugeezaania awantu awaieta mbwe wari awatumwa, ni kane ngawari yaaya, kandi otuukra mbwe waweeya.

³Manyire mbwe osikiizie omwoyo gwao, kukawa mbwe owona eminyako-nyaako ku eriina riange, kandi okiari okuluya yaaya.

⁴Ne ekiwi ekia nkuwonako nkino: Omiire okureka olugonzi olwa wawanga nalwo kuluweri.

⁵Kutio, ingirizia kiomo omiire okugwa ansi no oema aa wawanga. Galuka oreke owuoni kandi oirane ku enkola endootu ezia wakolanga kuluweri. Ni, no olowere okugaluka oreke owuoni, nyiza okuuza ntoole ekintu kïao ekia edhaabu, ekiteewuako ekimuri, aa kiri.

⁶Ni nganya ni iwue ku ekintu ekilala kino: mbwe oregere enkola embiwi ezia Awanikolaao mala kiomo neena nziregere.

⁷Omuntu ori na amatwi, ka-awurre ekia Omwoyo Omweru ogwa Katonda alaga amakaniisa. Awantu woona awakirre amaani aga Ekikeeno nyiza okuwaganyira okuria ensaafu ezia omuti ogureeta owulamu oguri mu omusiri ogwa Katonda Paradiiso.

Ebaruwa egiira ekaniisa eri Simirna

⁸“Ni ku enyankoi owa ekaniisa eya Simirna joja mbwe: Gano nigo amang’ana aga omuntu ori Owutaniko kandi Owutuuko, owafwa kandi aziuka awa omulamu.

⁹Manyire eminyako-nyaako egia ori nagio, no owutaka wuao — ni kuwuene ori omunyazi mu emioyo. Lwona manyire amang’ana aga owuweeyi aga owoolwako na awantu awaieta Awayaudi awantu awa Katonda, ni ngawari yaaya. Iwo wari mala awantu awa mu esinagoogi eya Sataani.

¹⁰Otawa no owuti namba wutono ku eminyako-nyaako egia ori ampi okutuukra. Manya mbwe Ekikeeno kiri ampi okuira awandi agati iinyu mu owusiwe kugere mugeezaniwue, kandi muuza okuwona owululu ku amiire ikumi. Ni, rinda amang’ana gange namba ni kuri mbwe muitwa, ni nyiza okuku-aa ekigudu ekia owulamu owutariwua.

¹¹Omuntu ori na amatwi, ka-awurre ekia Omwoyo Omweru ogwa Katonda alaga amakaniisa. Awantu woona awakirre amaani aga Ekikeeno, ngawaaza okufwa olumbe olwa okuwiri.

Ebaruwa egiira ekaniisa eri Pagamuumi

¹²“Nyagala ojojere enyankoi owa ekaniisa eri Pagamuumi otino: Gano nigo amang’ana aga omuntu ori no omwambe omwogi ogukubiiwue eno ne eno.

¹³Manyire mbwe omenyere asi aa entewe eya owuami owua Sataani eri, ni kukawa kutio, okia-ambre wukalu okuganya kwao ku inze kandi okiari okundeka yawa. Wakola otio namba mu amiire aga Antipaasi, owalagana mu amang'ana ne enkola mbwe ari omulonzi wange kuwuene, owaitwa agati iinyu asi aa Sataani ari ao.

¹⁴Ni kukawa kutio, ndi ne ewintu ewitoono ewigera ni ntaganya ni iwue, aeniki wario awandi agati iinyu awakialonda engerera ezia Balaamu, owalaga Balaaki engira eya okuta ekigazio emberu wa Awaisraeli, kugere awasemerezie warie okuria okukoriirwe katonda ensaasa omusango, kandi kugere waingire mu owusoodani.

¹⁵Mu engira yazane eyo, mukitari na awantu wandi agati iinyu ao awalonda engerera ezia Awanikolaa.

¹⁶Kutio, galuka oreke enkola embiiwi. Ni, no otakorre otio, nyiza okuuzwa wuangu okulwania awantu awo no omwambe ogufuma mu omunwa gwange.

¹⁷Omuntu ori na amatwi, ka-awurre ekia Omwoyo Omweru ogwa Katonda alaga amakaniisa. Omuntu okirre amaani aga Ekikeeno, nyiza okumu-aa okuria kundi okuiwisre okuetwa mbwe maana, kandi lwona nyiza okumu-aa iwaale erieru erijojerweko eriina iyia eriwulao omuntu wundi omanyire, ni mala omuntu orituukiire oyo eng'ene.

Ebaruwa egiira ekaniisa eri Thiatiira

¹⁸“Ku enyankoi owa ekaniisa eri Thiatiira, joja otino: Gano nigo amang'ana aga Omuzia owa Katonda ori na amiiso agaema ki omurro, kandi owa amagulu gae gawala ki efeedha.

¹⁹Manyire ewintu wiona ewia omiire okuwa no okola. Manyire olugonzi lwao, okuganya okwa ori nakwo ku inze, ne emirimo egia okorra awiina waa, ni kiomo osikiizie omwoyo, kandi mbwe emirimo egia okola nyingeeno gikira egia wakolanga kuluweri.

²⁰Ni kukawa kutio, okiakeeyire ekintu ekilala emberu wange: Oganyire ni Jezebeeli, omukazi oieta omugambi owa Katonda. Omukazi ono ateesia awantu wange na awatoola ku engira endamu, ne engerera eziwaingizia mu owusondo no okuria ewiokuria ewikoriirwe nawio katonda ensaasa emisango.

²¹Miire okumu-aa iwaga mbwe agaluke areke owuoni, na alowere okureka owusondo wuae owuo.

²²Ni muwurre! Nyiza okumulekula ku iseero eria amatekere kandi awantu awasoodana nae, ni watagalooke wareke enkola ziwu ezio, nyiza akuwareka mu eminyako-nyaako emilulu egiluguulwa.

²³Nyiza okuita awantu awamulonda mbamale chwe. Nikuemao amakaniisa goona gaaza okumanya mbwe ni inze oagarizia nyamanya amaingirizio ne ewia omwoyo ogwa omuntu guagala okukola. Nyiza okuoloola omuntu ki omuntu owusugre ne enkola ziae.

²⁴Ni inywe awa Thiatiira awasigaale, awatalonda engerera ezia Jezebeeli zino, kandi awatamanyire engerera eziema ku Sataani, ezia awandi waeta mbwe 'engerera ezia muni,' inywe mbalaga mbwe ng'anyiza okuwa-aa omusigo gundi kandi.

²⁵Ni mbalaga mala mbwe muambe igerera ilamu eria mwamiire okuwa nario, nawuno nyirane.

²⁶Omuntu okirre amaani aga Ekikeeno, kandi ogiire emberu okukola ewintu ewia nyawoola mbwe mukole nawuno owutuuko owua ekialo, nyiza okumu-aa amaani aga okukangatra awantu awa ewialo windi.

²⁷Nyiza okuwa-aa amaani aga Soifu yampa kandi waaza okurinda ewialo ewio no owutinzi kandi waaza okuwikenya-kenya ewimega-mega kiomo amagio agaatiike ku entamu.

²⁸Kandi nyiza okuwa-aa eng'eni-ng'eni eya kunkio.

²⁹Omuntu ori na amatwi, ka-awurre ekia Omwoyo Omweru ogwa Katonda alaga amakaniisa.

Owusasuko 3

Ebaruwa egiira ekaniisa eya Sadiisi

¹"Nyagala ojojere enyankoi owa ekaniisa eya Sadiisi otino: Gano nigo amang'ana agaema ku oambiriire emioyo musamvu egia Katonda, kandi ogingre eng'eni-ng'eni musamvu. Nkumanyire kandi manyire ewintu ewia okola wiona. Owonekana ki ori no okuganya okulamu, ni kuwene okuganya kwao kwadondomera nawuno kufwa.

²Azamuka, okalangusie ekitono ekia okiasigaale nakio, ekiri a-ampi okufwa kiona. Nyatuukiire mbwe enkola ziao zikeeyire emberu wa Katonda.

³Ingirizia engerera eya waewua kandi eya wawurra. Londokana nayo kandi galuka oreke owuoni. Ni, no ota-azamuuke, nyiza okuuzra owuiwisi ki omwiwi kandi ngorimanya enyinga ezio.

⁴Kukawa kutio, wario awatono Sadiisi ao, awakiari okuimwamia no owuoni. Iwo waaza okugenda-genda ni inze alala, ni waingiizie enguwo enzeru aeniki wari awantu aweeru.

⁵Awantu wona awakirre amaani aga Ekikeeno waaza okuingiziwua ne enguwo enzeru mala kiomo awantu wano, kandi ng'andiritoolao amiina

gaawu mu ebuuki eya owulamu. Ee, ndirilagana amiina gaawu emberi wa Soifu ne emberi wa enyankoi waae.

⁶Omuntu ori na amatwi, ka-awurre amang'ana aga Omwoyo Omweru ogwa Katonda alaga amakaniisa.

Ebaruwa egiira ekaniisa eri Filadelfia

⁷Nyagala ojojere enyankoi owa ekaniisa eri Filadelfia otino: Gano nigo amang'ana aga omuntu omweru, oimeriire owuene, kandi ogingre ekifunguo ekia Daudi. Omuntu owa na aiguuleo, awulao okaigalao, kandi na aigaaleo, awulao okaigulao.

⁸Nkumanyire kandi manyire ewintu ewia okola wiona. Wurra! Miire okukwigurra ekiriango emberi waa, ekia awulao omuntu oesa okuigalao. Manyire mbwe ori na amaani amatono, ni kukawa kutio oere amang'ana gange owuti kandi okiari okulowa amang'ana gange.

⁹Wurra! Nyiza okugera awandi ku Awayaudi awari awantu awa mu esinagoogi eya Sataani, awaieta awantu awa Katonda ni ngawari yaaya, wakuuzeko kandi wakukubre amasigamo ansi emberi waa. Kandi waaza okumanya mbwe nkugonziizie.

¹⁰Aeniki omiire okusikia omwoyo kiomo nyakulaga, kutio neena nyiza okukurinda otaingira mu amiire aga emidambo egiiza okuuzo ku ekialo kiona, olwa awantu woona awamenyere ku ekialo waaza okugeezaniwua.

¹¹Nyiza wuangu, kutio amba okuganya okwa ori nakwo ku inze wukalu kugere omuntu ataaza yakunyaga ekigudu ekia ooza okueewua ku emirimo gao.

¹²Omuntu-umuntu okirre amaani aga Ekikeeno, nyiza okumuta awe empango eya mu ekaalu eya Katonda wange, kandi ariweera omwo amiire goona. Ndirimujoko eriina eria Katonda wange ne eriina eria Yerusaleemu omugizi omuyia ogwa Katonda, oguuzo okuika ansi ni guema ku Katonda wange ku igulu. Lwona nyiza okumujoko eriina riange iyia.

¹³Omuntu ori na amatwi, ka-awurre amang'ana aga Omwoyo Omweru ogwa Katonda alaga amakaniisa.

Ebaruwa egiira ekaniisa eri Laodeesia

¹⁴Nyagala ojojere enyankoi owa ekaniisa eri Laodeesia otino: Gano nigo amang'ana agaema ku omuntu otagaluka oetwa mbwe Amin, kandi owoola amang'ana agari kuwuene, ori omukangasi owa owulusi owua Katonda wuona.

¹⁵Nkumanyire kandi manyire ewintu ewia okola wiona. Mbwe ngori omuyu namba omuolu yawa. Kukaweere geeza no oweere omuyu nakuwa omuolu!

¹⁶Ni aeniki ori ki amanzi amaziiimu, agatari amayu nakuwa amaolu, nyiza okukufuuzza enze.

¹⁷Iwue oitumbula no owoola mbwe ori omunyazi, mbwe ogia geeza kandi kiwulao ekintu ekia otakaaye. Ni ngomanyire mbwe ori uwiiwi owuluguulwa. Osugre no okuambrwa amasaasra, omutaka, omuwuunu, kandi ori kikuna kikidi.

¹⁸Nkukengera amaganga mbwe onguleko edhaabu emiire okueruyiwua no omurro kugere owe omunyazi. Onguleko enguwo enzeru zerre oiwoye, ekutoorroo ensuuko ezia owukuna wuao kandi onguleko omuti ote mu amiiso, kugere owone.

¹⁹Inze ngolola kandi nswawuka awantu awa ngonziizie. Kutio murekane ne emiwaayo kandi mugaluke mureke owuoni.

²⁰Wurra, mpano nyimeriire ku ekiriango kandi nkong’oota ekiriango. No omuntu awuriire omwoyo gwange, mala yanyiigurrao ekiriango, nyiza okuingira omwae ndie nae, kandi oona arie alala ni inze.

²¹Omuntu-umuntu okirre amaani aga Ekikeeno, nyiza okumuikazia ku entewe eya owuami alala ni inze, mala kiomo inze nyakira amaani aga Ekikeeno mala ngia nyikala ku entewe eya owuami alala ni Soifu.

²²Omuntu ori na amatwi, ka-awurre amang’ana aga Omwoyo Omweru alaga amakaniisa.”

Owusasuko 4

Okusawa okuikola ku igulu

¹Ne ewintu wino wiamala okuikola, nyawona mu owusasuko ekiriango ekiiguuke ku igulu. Kandi omwoyo ogufwana ogwa ekombi, ogwa nyawurra kuluweri guria, gwandaga gutino, “Niina engulu eno, nkulage ewintu ewiiza okuikola wuangu ano.”

²Ao-ao, nyaizuziwua na amaani aga Omwoyo Omweru ogwa Katonda, kandi nyaizukirra ni mbona entewe eya owuami ku igulu, no omuntu ogiikaaleko.

³Omuntu owawanga na aikaale oyo, yawanga na ang’ena-ng’ena ki iwaale eria yaspa kandi entewe eya owuami eyo yawanga ne esunguziwwue no olufudu oluri ni igondo eria itu iwisi.

⁴Entewe eya owuami eyo yawanga ne esunguziwwue ne entewe ezia owuami zindi amakumi awiri ni ine, kandi awagaaka amakumi awiri ni wane waawanga ni waikaale ku entewe ezio. Awagaaka wano waawanga ni waiwooye enguwo enzeru zerre kandi ni waingiizie ewigudu ewia owuyaayi ewia edhaabu ku emitwe giawu.

⁵Emesi ezia olumesi na amadu-dumo aga enkuwa ziaemeranga ku entewe eya owuami eyo, kandi ewimuri musamvu ewia omurro ewiawanga emioyo musamvu egia Katonda wiaemanga emberu wa entewe eya owuami.

⁶Kandi lwona nyawona omufwano ogwa enyanza erimo amanzi ameeru zerre ki egilaasi, ne eri emberu wa entewe eya owuami eyo. Agati ne embega ziona ezia entewe eya owuami eyo, ziawangao endukwa ine endamu ezia amiiso gamiire pe-pe-pe, emberu ne enyima.

⁷Endukwa endamu eya kuluweri yafwananga endwe, eya okuwiri yafwananga eng'ombe eiiri, eya okusatu yawanga ne ekieni ekifwana ekia omuntu, ne eya okune yafwananga iwundaazi eribuluka ku omuyaga.

⁸Ku endukwa ine endamu zino, endala ki endala yawanga ne embaya mukaaga kandi ziawanga na amiiso ku emiwiri giagio giona. Ziaembanga owuire no omuwasu aa zitasarigira otino, "Omweru! Omweru! Omweru no Omwami Katonda ori na amaani ku ewintu wiona, Katonda owawangao, orio kandi ooza okuwaa amiire goona!"

⁹Enyinga ezia endukwa ine endamu zino ziawanga ni zi-aa, omuntu owawanga na aikaale ku entewe eya owuami orio amiire goona oyo, owunene no owuti kandi ni zimuiranzia otioo,

¹⁰awagaaka amakumi awiri ni wane awo, waakubanga ansi amasigamo emberu wa omuntu oyo, ni wamusawa, iye orio omulamu amiire goona. Enyinga ezia waamusawanga, waavuulanga ewigudu wiawu ewia owuyaayi, wawiazia ansi emberu wa Omwami ni wawoola watino,

¹¹"Oo Katonda kandi Omwami iifu, ni iwue osugre okueewua owunene, owuti na amaani, aeniki ni iwue owaluka ewintu wiona, ewialukwa kandi wiwaa mala ku okuagala kwao."

Owusasuko 5

Ekimaatwa kivunre enimbo eziigaale itu erizingrwe

¹Nikuemao kandi nyawona mu owusasuko, omuntu owawanga na aikaale ku entewe eya owuami oyo, na agingre itu erizingrwe mu okukono kwae okusaaza. Itu erio riawanga ni rijojerwemo embega ziona, kandi riawanga ni riambaniiwue wukalu ne enimbo etunda musamvu.

²Kandi nyawona enyankoi ori na amaani amangi na akuula na awuuzia otino, "Osugre okuvuna kandi okuigulao itu erizingrwe rino naanu?"

³Ni, yawulangao omuntu ku igulu namba ku ekialo namba ansi eya ekialo owaesanga okuigulao itu erio, mala yawona ekiawanga ni kijojerwe muni.

⁴Nyarra wululu aeniki yawulangao omuntu owatuukrwa owawanga na asugre okuigulao itu erizingrwe erio kandi okuwona ekiawanga muni.

⁵Nikuemao, omulala ku awagaaka amakumi awiri ni wane waria yandaga otino, “Wurra! Reka okurra aeniki Endwe eya mu ekiriango ekia Yuuda, omuizukulu omunene owa Omwami Daudi, amiire okukira. Ni iye osugre okuvuna enimbo musamvu ezio mala aiguleo itu erizingrwe erio.”

⁶Nikuemao, nyawona Ekimaatwa ni kiimeriire agati ya entewe eya owuami kandi endukwa ine endamu na awagaaka amakumi awiri ni wane, ni wakisunguuzie. Ekimaatwa ekio kiawonekananga ki ekiamala okuitwa. Kiawanga ne enziga musamvu na amiiso goona musamvu, agaawanga ni gari emioyo musamvu egia Katonda yawanga na atumre ku ekialo kiona.

⁷Nikuemao kiaza kitoola itu erizingrwe ku okukono okusaaza okwa omuntu owawanga na aikaale ku entewe eya owuami.

⁸Olwa kiamala okuritoola otino, endukwa ine endamu na awagaaka amakumi awiri ni wane woona waakuba amasigamo gaawu ansi emberu wa Ekimaatwa ekio. Mulala ki omulala yawanga na agingre owukana no oludaawo olulongerwe ne edhaabu oluizuule du ni owubaani. Owubaani owuo, wuri okusawa okwa awantu awa Katonda.

⁹Waaembanga olwembo oluyia otino, “Iwue ni iwue osugre okutoola itu erizingrwe kandi okuvuna enimbo yario, aeniki ni iwue owaitwa kandi osuluzia amasaai gaao. Ekio kiagera ni Katonda anunula awantu awaema mu enganda ziona, ne ewiriango wiona ewiri ku ekialo kiona, ni wamuiranako.

¹⁰Ni iwue omiire okuwakola omurima ogwa awoozia awa Katonda iifu, kandi waaza okuwa awaami awaaza okurinda ekialo.”

¹¹Nikuemao, nyawona enyankoi awangi owuluku, ni wasunguuzie entewe eya owuami ne endukwa ine endamu ziria, alala na awagaaka amakumi awiri ni wane waria. Nyawurra enyankoi awangi awo ni

¹²waemba ne emioyo egia kungulu ni wawoola watino, “Ekimaatwa ekiaitwa kisugre. Kisugre okutondowolwa aeniki kiri na amaani, no owunyazi, na amaganga kandi kiri ekikalangufu. Kisugaane kieewue owuti no owunene!”

¹³Nikuemao, nyawurra endukwa endamu ziona eziri ku igulu, ne eziri ku ekialo, ne eziri ansi eya ekialo, ne eziri mu enyanza munsu, alala ne ekintu-ukintu ekiri munsu yawio ni ziamba zitino, “Omuntu oikaale ku entewe eya owuami, alala ne Ekimaatwa watondowolwe kandi waewue owunene, owuti na amaani amiire goona.”

¹⁴Kandi endukwa endamu ine zivugirra ni ziwoola mbwe, “Amin.” Nikuemao, awagaaka amakumi awiri ni wane waria woona waakuba amasigamo gaawu ansi kandi watanika okusawa Katonda ne Ekimaatwa.

Owusasuko 6

Enimbo zivunirwe

- ¹Nikuemao nyawona ne Ekimaatwa kivuna enimbo esookere ku enimbo musamvu ziria, kandi olwa kiakivuna-uvuna otino, nyawurra endala ku endukwa ine endamu ne ewoola no omwoyo oguwaluka ki olukuwa mbwe, "Iza!"
- ²Olwa nyaginga amiiso kungulu, nyawona efaraasi enzeru zere. Omuntu owawanga na aginiinre yawanga na agingre eriigu kandi yaeewua ekigudu ekia owukire. Yafuma okugia emberu ne emirimo egia okukira awazigu waae.
- ³Olwa Ekimaatwa kiavuna enimbo eya okuwiri otino, nyawurra endukwa eya okuwiri ku endukwa ine endamu ne ewoola etino, "Iza!"
- ⁴Nikuemao efaraasi indi eyawanga enzakanyu ka yafuma, kandi omuntu owawanga na aginiinre yaeewua iwaga eria okutoolao owuolu owuawanga ni wuri ku ekialo kugere awantu waitane aweene ku aweene. Iye yaeewua omwambe omunene ogwa olugangala.
- ⁵Olwa Ekimaatwa kiavuna enimbo eya okusatu otino, nyawurra endukwa eya okusatu ku endukwa ine endamu ne ewoola etino, "Iza!" Nyaizukra ni mbona efaraasi emwamu ti ne efuma, kandi omuntu owawanga na aginiinre yawanga na agingre ekintu ekirengerwa nakio, ku okukono kwae.
- ⁶Nikuemao, nyawurra omwoyo ni gufuma agati ya endukwa ine endamu ni guwoola gutino, "Omusaara ogwa omuntu atuukra na akorre emirimo egia owuire owulala, gusuga omurengo omulala gweng'ene ogwa engaano, namba emirengo isatu gieng'ene egia emere eya esairi, ni mutaona emiti egia zaituuni ne egia emizabiibu!"
- ⁷Olwa Ekimaatwa kiavuna enimbo eya okune otino, nyawurra omwoyo ogwa endukwa endamu eya okune ne ewoola etino, "Iza!"
- ⁸Olwa nyaginga amiiso kungulu, nyawona efaraasi eya igondo igoke-goke ki omufu. Omuntu owawanga na aginiinre yaetwanga mbwe olumbe, kandi ekialo ekia awafu kiamulondanga enyima. Olumbe ne ekialo ekia awafu wiaeewua amaani mu oluwaala olusuga enusu eya ekialo, kugere wi-ite awantu awamenyeremo mu amae, ne enzala, amalwire alala ne entiang'i ezia mu isaka eziri ku ekialo.
- ⁹Olwa Ekimaatwa kiavuna-uvuna enimbo eya okutaanu otino, nyawona emioyo egia awantu awaaitwa ku amang'ana aga Katonda kandi ku okuwa kwawu awawoni awa Kristo awatairana enyima, ni giri ansi eya isiga eria omusango.
- ¹⁰Emioyo gino giarranga ne emioyo egia kungulu ni giwoola gitino, "Ni iwue Omwami Katonda, omweru kandi otagaluka. Ooza okureka okukengera awantu awaatuita ekiina, kutuuka ri?"
- ¹¹Nikuemao, wona waaewua enguwo endiire enzeru zerre kandi walagwa mbwe wagie wawuluuke wutono, warinde nawuno embala yona eya

awakurumu awa Katonda kandi waamwawu, awaazanga okuitwa kiomo iwo, esuge nikwao.

¹²Olwa Ekimaatwa kiavuna enimbo eya mukaaga otino, ekialo kiazegera wukalu. Enyanga yagaluka ewa emwamu ti, ki enguwo eya amakurugunya kandi omwenzi gwagaluka guwa omwakanyu ka, ki amasaai.

¹³Eng'eni-ng'eni ziadodoka ansi ku ekialo kiomo amatu aga omukuyu gadodosiwua no omuyaga omuzito.

¹⁴Igulu riazingwa kiomo oluwambo, riteeka kandi ewigiri ne ewizinga wiona wiagemulwa witoowa aa wiawanga.

¹⁵Nikuemao awaami awa ku ekialo, na awakangasi awakate-kaate awa mu owuami, awakangasi awa iiye, awanyazi, awantu awanene-nene, na awantu wandi wona, awagingre awakurumu na awari owuyanga, waaiwisa mu amawuuta ni mu embagatana ezia amawaale aga mu ewigiri.

¹⁶Warranga munsu omwo ni walaga ewigiri na amawaale ago watino, "Mutugweko mutuwise kugere tueme mu amiiso aga omuntu oikaale ku entewe eya owuami, no okusu okwa Ekimaatwa.

¹⁷Aeniki, ne enyinga ezia okuswawukwa kwawu zimiire okutuuka, naanu ori omusiani okaimerra emberu wa Owuire owuo?"

Owusasuko 7

Awayaudi 144,000 awaaza okununulwa

¹Ne ewio wiamala okuikola, nyawona enyankoi wane ni waimeriire ku embega ine ezia ekialo. Waawanga ni wa-ambiriire emiyaga egifuma embega ine ezia ekialo ezio kugere gitaaza giawuuta ku ekialo, ni ku enyanza kugia ku omuti-umuti.

²Nikuemao, nyawona enyankoi wundi na aemerra ewufumanyanga na aniina kungulu ku igulu na aterweko ekilago ekia Katonda Omulamu. Yaeterezia enyankoi wane waria, awaawanga ni waerwe amaani aga okuona ekialo ne enyanza, no omwoyo ogwa kungulu na awalaga otino,

³"Mutaaza mwaona ekialo namba enyanza namba emiti nawuno kutuuke tute ewilago ku ewieni ewia awakurumu awa Katonda iifu."

⁴Nikuemao nyalagwa embala eya awantu wona awaateewuako ewilago. Waawanga awantu elufu mia ekilala na amakumi ane ni ine, awaamanga mu enganda ikumi ni iwiri ziona ezia Awaisraeli.

⁵Ni kuema mu oluganda olwa Yuuda awantu elufu ikumi ni iwiri, mu oluganda olwa Rubeeni awantu elufu ikumi ni iwiri, mu oluganda olwa Gaadi awantu elufu ikumi ni iwiri,

⁶mu oluganda olwa Aasa awantu elufu ikumi ni iwiri, mu oluganda olwa Naftaali awantu elufu ikumi ni iwiri, mu oluganda olwa Manaase awantu elufu ikumi ni iwiri,

⁷mu oluganda olwa Simoni awantu elufu ikumi ni iwiri, mu oluganda olwa Laawi awantu elufu ikumi ni iwiri, mu oluganda olwa Isakaari awantu elufu ikumi ni iwiri,

⁸mu oluganda olwa Zebuluuni awantu elufu ikumi ni iwiri, mu oluganda olwa Yoseefu awantu elufu ikumi ni iwiri, ni mu oluganda olwa Benjamiini awantu elufu ikumi ni iwiri.

Awantu awangi awaaza okununulwa ni kuema mu enganda ziona

⁹Nikuemao, nyawona omurima omunene ogwa awantu awangi owuluku awataiwala, awaema mu ewialo wiona, enganda ziona, mu awantu woona ni mu eminwa giona, ni waimeriire emberu wa entewe eya owuami kandi emberu wa Ekimaatwa. Waawanga ni waiwooye enguwo endiire enzeru zerre, kandi ni wagingre ensagia ezia amatu agafwana aga omuti ogwa enaasi mu amakono gaawu.

¹⁰Awantu wano waoogerera ne emioyo egia kungulu ni wawoola watino, “Katonda iifu oikaale ku entewe eya owuami, alala ne Ekimaatwa, niwo awari na amaani aga okununula awantu.”

¹¹Kandi enyankoi woona waasunguuzia entewe eya owuami alala ne endukwa ine endamu, kandi waakuba amasigamo gaawu ansi emberu wa entewe eya owuami, ni wagwire ansi amafunikira ni wasawa Katonda.

¹²Waasawanga ni wawoola watino, “Amin! Katonda iifu eng’ene nio osugre no okueewua owunene, owuti na amaani, alala no okuikaziwua, no okutondowolwa, kandi nio ng’ina amaganga no owuesani amiire goona, Amin!”

¹³Nikuemao, omulala ku awagaaka awo yagamba-gamba ni inze na andaga otino, “Wano ni waawu anu, awaingiizie enguwo endiire enzeru wano? Ni waemerai?”

¹⁴Nyamulaga ntino, “Omugaaka, iwue ni iwue omanyire aa waemere.” Yandaga kandi otino, “Wano na awantu awawitre mu eminyako-nyaako eminene. Wari awantu awamiire okuoza enguwo ziwu na amasaai aga Ekimaatwa, ziwa enzeru.

¹⁵Ekio nikio ekigera ni wari emberu wa entewe eya Owuami owua Katonda, ni wamukorra owuire no omuwasu mu ekaalu yaae. Kandi Katonda oikaale ku entewe eya owuami aaza okumenya nawo na awarinda.

¹⁶Enzala ngeri-irana ewarie kandi, lwona ngawari-irana wawurre owulwo kandi. Iwasu ngariri-irana riwasambe kandi, lwona ngawari-irana wawurre owuyu kandi.

¹⁷Aeniki, Ekimaatwa, ekiri ku entewe eya owuami, ariwa omwayi waawu, kandi ariwalagirizia engira egia mu ekisulo ekia amanzi agaesana owulamu, kandi Katonda aaza okuwaeeya amaziga goona.”

Owusasuko 8

Ekimaatwa kivunre enimbo eya musamvu

¹Olwa Ekimaatwa kiavuna-uvuna enimbo eya musamvu otino, ewintu ewiri ku igulu wiona wiasarigira kiri ku enyinga ezikasuga edakika amakumi asatu.

²Nikuemao, nyawona enyankoi musamvu ni waimeriire emberu wa Katonda kandi waaewua ekombi musamvu.

³Enyankoi wundi yaaza aimerra a-ampi ni isiga eria omusango. Yaeewua owubaani owungi okuzoga alala no okusawa okwa awantu awa Katonda woona kugere wifumiwue ku isiga eria omusango eria edhaabu eri emberu ya entewe eya owuami.

⁴Eriosi eria owubaani owusambwa, alala no okusawa okwa awantu awa Katonda wianiina kungulu ni wiema mu amakono aga enyankoi owawanga na aimerre emberu wa Katonda.

⁵Nikuemao, enyankoi oyo yatoola ekintu ekisambwako owubaani, akiizuzia no omurro ogulawuulwe ku isiga eria omusango akirigiza ansi ku ekialo. Nikuemao, enkuwa ziawaluka, emesi zimesa kandi ekialo kiona kiazegera.

⁶Nikuemao katio, enyankoi musamvu awaawanga ne ekombi musamvu waatoola ekombi ziwu wazita amankaga okuzikuba.

Ekombi ezisookere ine zirra

⁷Enyankoi owa kuluweri yakuba ekombi yaae, nikuemao emvula eya ekitare no omurro eizogaane na amasaai yaolomoka ku ekialo. Kino kiagera oluwaala olulala ku isatu olwa ekialo luyia. Emiti gindi giayia kandi owusuwi owuolu wuona wuayia wuwua chwe!

⁸Olwa enyankoi owa okuwiri yakuba ekombi yaae otino, ekintu ekifwana ne ekigiri ekinene, ekia omurro gwawangako kiona, kiarigizwa kigia kigwa mu enyanza.

⁹Olwa kiagwamo-ugwa otino, oluwaala olulala ku isatu olwa enyanza yagaluka amasaai masa. Ewintu ewimenyere mu enyanza wiafwa kandi endala ku isatu ezia emeeli ezia mu enyanza zia-atika.

¹⁰Nikuemao, olwa enyankoi owa okusatu yakuba ekombi yaae, eng'eni-ng'eni enene ewala kiomo etoochi yaema ku igulu egwa ansi ku enzuzi ne ensulo zindi ezia amanzi.

¹¹Eng’eni-ng’eni eyo yaetwanga mbwe owululu. Kutio, endala ku isatu eya amanzi gaagaluka gawa amalulu kandi amanzi ago gaagera awantu awangi wafwa aeniki gaawanga amalulu pe.

¹²Olwa enyankoi owa okune yakuba ekombi yaae otino, endala ku isatu eya enyanga, eya omwenzi ne eya eng’eni-ng’eni ziamwama ti! Kutio endala ku isatu eya omuwasu yawanga ekierema kandi endala ku isatu eya owuire yawulanga no owueru.

¹³Nikuemao, nyaginga amiiso kungulu mala mbona iwundaazi ilala ni riri ku omuyaga. Riaogerera no omwoyo ogwa kungulu ritino, “Kuriwaweera owuwiiwi owufwana wutie! Kuriwaweera owuwiiwi owufwana wutie! Kuriwaweera owuwiiwi owufwana wutie, inywe awantu awamenyere ku ekialo ekombi ezia enyankoi wasatu awasigaale ni ziiza okurra!”

Owusasuko 9

Emidambo egireetrwe ne ekombi eya okutaanu

¹Olwa enyankoi owa okutaanu yakuba-ukuba ekombi yaae, nyawona eng’eni-ng’eni ne eemerra ku igulu mala egwa ansi ku ekialo. Eng’eni-ng’eni eyo yaeewua ekifunguo ekia owuina owua endiwo ewula no owutuuko.

²Yaigulao omunwa ogwa owuina owua endiwo owuo kandi nyawona eriosi erifwana eria amakawa ni riema mu owuina omwo. Eriosi erio riamwamia enyanga no omuyaga ogwa mu amare kungulu.

³Nikuemao amadeede gaafuma mu eriosi omwo, gatanika okugwa ku ekialo. Amadeede gano gaawanga ni gaeerwe amaani agafwana na aga ewitoomoni ewia ku ekialo.

⁴Gaalagwa mbwe gataona owusuwi, iswawi nakuwa emiti-umiti egiri ku ekialo, ni mbwe gilume mala omuntu-umuntu owula ne ekilago ekia Katonda ku ekieni kiae.

⁵Amadeede ago gaaganyirwa okukorra awantu awaawulanga ne ewilago awo owululu ku emienzi itaanu, ni kukawa kutio ngagikaganyirwa okuwaita. Owululu wuago, wuafwananga owua ekitoomoni.

⁶Mu amiire ago awantu wariagala mbwe olumbe luwaite, no olumbe ngaluriwaita, yaaya. Wariagala mbwe wafwe, no olumbe lurizazira.

⁷Amadeede ago gaafwananga efaraasi eziri amankaga okugia mu iye, kandi gaawanga ne ewintu ku emitwe giawu ewifwana ne ewigudu ewilongerwe ne edhaabu. Ewieni wiago wiafwananga ne ewieni ewia awantu,

⁸emvwiri ziago ziawanga endiire ki ezia awakazi, na amiino gago gaawanga amoogi ki aga endwe.

⁹Gaawanga ni gaingiizie ewintu ewilongrwe ne ewiuma ku ewifuwa. Erioga eria embaya ziago riawurikananga ki amasindo aga efaraasi enyingi ezikulula egaare ni zigia mu iye.

¹⁰Lwona gaawanga ne emikinga egiluma egifwana ne egia ewitoomoni kandi ni ku emikinga egio nio aa amaani gago aga okunyaasia awantu ku emienzi itaanu gaawanga.

¹¹Omwami waawu yawanga enyankoi oimeriire owuina owua endiwo wuria kandi eriina riae mu Oluibrania rietwa mbwe Abadooni, ni mu Olugiriiki rietwa mbwe Apolioni.

¹²Emidambo egia kuluweri gimiire okuwita, kandi egindi gikiaza giri ampi okuikola.

Emidambo egireetrwe ne ekombi eya mukaaga

¹³Nikuemao, enyankoi owa mukaaga yakuba ekombi yaae. Nikuemao nyawurra omwoyo ni guema ku ewintu wine ogufwana ogwa enziga eziawanga ni ziteerwe ku embega ine ezia isiga eria omusango erisanikiirwe ne edhaabu kungulu yayo yoona, eriaawanga emberu wa Katonda.

¹⁴Omwoyo ogwo gwalaga enyankoi owa mukaaga oyo gutino, “Siwula enyankoi wane awasiwirwe mu oluuzi olwa Yufreeti waria.”

¹⁵Kutio, enyankoi wane awo waasiwulwa. Waawanga ni wamiire okuteewua ao amankaga okugia okuita awantu awakasuga endala ku isatu omwaka ogwo, omwenzi ogwo, nyanga olwo kandi mu enyinga ezio.

¹⁶Nyawurra embala eya awa-iiye awaawanga ni waniinre efaraasi mbwe waasuganga awantu milioni mia wiwiri.

¹⁷Nintino nyawona efaraasi ezio mu owusasuko wuno: Awa-iiye awaaziniina waawanga ni waiwooye, ewintu ewia okuirinda nawio mu iye ku ewifuwa wiawu. Wiawanga ni igondo eriakanyu ki omurro, ni igondo ebuluu erimo owumwamu-mwamu alala ni igondo eria owugi-wugi. Emitwe egia efaraasi ezio giafwanananga ne emitwe egia endwe kandi eminwa giawu giafumianga omurro, eriosi alala na amanda agaema ki omurro ogwa ekibiriiti.

¹⁸Awantu awangi awakasuga endala ku isatu eya awantu woona waafwa mu eminyako-nyaako emilulu isatu egia omurro, eriosi na amanda agaema ki ekibiriiti agaafumanga mu eminwa giawu.

¹⁹Amaani aga efaraasi zino gaawanga mu eminwa giawu ni mu emikinga giawu egiawanga ne emitwe ki egia enzoka egia zialumanga nazio awantu wululu.

²⁰Awantu awaasigala ni watafwire mu eminyako-nyaako gino ngawakagaluka wareka owuoni owua waakolanga. Ngawakareka okusawa ewikeeno ne emifwano egia katonda ensaasa ezia waalonga ne edhaabu, efeedha, esaaba,

amawaale ne emiti, ewintu ewitaesa okuwona, okuwurra namba okugenda-genda.

²¹Lwona ngawakagaluka wareka owuoni owua okuita awantu, okulagula awantu, owusondo kugia okuiwa ewintu ewia awandi.

Owusasuko 10

Yowaana ariire amang'ana aga Katonda

¹Nikuemao, nyawona kandi mu owusasuko enyankoi ori na amaani amangi na aema kungulu ku igulu aika ansi. Amare gaamusanikra ki enguwo kandi olufudu lwakuba engata ku omutwe gwae. Ekieni kiae kiawanga ekieru ki enyanga, na amagulu gaae gaafwananga no omurro.

²Enyankoi ono yawanga na agingre itu erizingrwe itono mu amakono gaae. Yawanga na ateere okugulu kwae okusaaza ku enyanza no okugulu kwae okumosi ku ekialo,

³kandi yaeterezia wukalu no omwoyo oguduma ki ogwa endwe. Olwa yakola otio otino, enkuwa musamvu ziawaluka ni zimuirania.

⁴Olwa enkuwa musamvu ziamala okukola otio, nyaagalanga okujoja, ni nyawurra omwoyo ogwaema ku igulu ni guwoola gutino, "Otaaza wasanukula ote kuwueru ekia enkuwa musamvu ezio ziwoorre lwona otakijoja ansi."

⁵Nikuemao nyawona enyankoi owawanga na aimeriire ku enyanza ni ku ekialo na agingiriizie okukono kwae okusaaza kungulu ku igulu.

⁶Yaifuuwa ne eriina eria Katonda ori omulamu amiire goona, owaluka igulu ne ekialo ne enyanza ne ewintu wiona ewizirimo, na awoola otino, "Ngakuza okukinda okutambuka ao!"

⁷Ni, ne enyankoi owa musamvu aaza okukuba ekombi yaae, omupango ogwa Katonda oguiwisre guuza okuikola mala kiomo yalaga awakurumu waae awari awagambi waae."

⁸Nikuemao omwoyo ogwa nyawurra ni guema ku igulu gwagamba-gamba kandi ni inze ni guwoola gutino, "Gia otoole itu erizingrwe erisanukuulwe riiria mu okukono okwa enyankoi oimeriire ku enyanza ni ku ekialo ooria."

⁹Kutio nyamugiako musawa mbwe arimpe mala andaga mbwe, "Gitoole oririe. Mu omunwa gwao no oriria, ooza okuriwurra ne eri inyukuulu ki owuuki, ni mu enda yaa ooza okuriwurra ni riri ilulu pe."

¹⁰Nyatoola itu erizingrwe itono erio mu okukono okwa enyankoi mala ndiria. Riawanga inyukuulu mu omunwa gwange ki owuuki, ni mu enda yange riawanga ilulu pe!

¹¹Nikuemao nyalagwa otino, “Paka ogie emberi okugamba amang’ana ku ewintu ewiiza okuikorra ewialo, enganda, eminwa, na awaami.”

Owusasuko 11

Awagambi awa Katonda wawiri

¹Nyaeewua ensimbo eya okugeraania owuliire kandi nyalagwa otino, “Gia ogeraanie ekaalu eya Katonda ni isiga eria omusango, kandi owale awantu awasawa omwo.

²No oageraania enze mu olwanyi olwa ekaalu aeniki ao na ansi aa atengekrwe awantu awatari Awayaudi. Kandi waaza okutaza-taza omugizi omweru ogwa Yerusaleemu na amagulu gaawu ku emienzi amakumi ane ni iwiri.

³Nyiza oku-aa awagambi wange wawiri wano amaani aga okuwalaga amang’ana gange ku amiire elufu kilala mia wiwiri na amakumi mukaaga kandi waaza okukola otio ni waiwooye enguwo ezikorre amakurugunya.”

⁴Awagambi wano waimeriire emiti iwiri egia zaituuni ne ewintu wiwiri ewiateewuangako ewimuri emberi owa Katonda ori Omwami owa ekialo.

⁵Ni no omuntu-umuntu ageezaanie okuwakorra uwiiwi, aaza okuitwa. Omurro guuza okufuma mu eminwa egia awagambi awo, gusambe awazigu waawu.

⁶Awagambi awo wari na amaani aga okuigalao igulu kugere emvula etakuba mu amiire goona aga walaga awantu amang’ana gange ewintu ewiiza okuikola. Lwona wari na amaani aga okugalusia amanzi goona okuwa amasaai, kandi okugera eminyako-nyaako gigwe ku ekialo, kiomo aweene wawuine.

⁷Na awagambi wawiri awo wamiire okulanzia amang’ana gange, ensisi eeza okufuma mu endiwo eya owuina, etanike okulwana nawo. Eeza okuwakira na amaani mala ewaite.

⁸Kandi emiwiri giawu giiza okuigolomola ku engira enene eya omugizi ogwa Yerusaleemu, aa Omwami waawu oona yawambwa ku omusalaaba. Awantu awa omugizi ogwo wamanyiike ku enkola ziwu embiiwi mala kiomo Sodooma ni Misiri.

⁹Ku amiire asatu ne enusu, awantu awaema mu enganda, ewiriango wiona ne ewialo wiona wariiza okuwarra ewitundu ewia awantu wano, kandi warilowa mbwe ngawa-awirwa.

¹⁰Okufwa okwa awagambi awa Katonda wawiri wano, kurisangaazia awantu woona awari ku ekialo kandi warikola emigomo no omuntu ki omuntu atumra omwina waae empanwa ni wasangaarre ne ekiikoriire awagambi waawareetra emidambo emilulu awo.

¹¹Na amiire asatu ne enusu ni gamiire okuwita, omuuka oguesana owulamu uguema ku Katonda guriwaingramo kandi waimerre ku amagulu gaawu. Awantu awariwawona wariwa no owuti ino!

¹²Nikuemao, awagambi wawiri awa Katonda awo waawurra omwoyo ogwa kungulu ni guema ku igulu ni guwalaga gutino, “Muuze kungulu ano!” Kutio, waafuma wagia kungulu ku igulu mu amare, na awazigu waawu wawawona.

¹³Mu enyinga yazane eyo, ekialo kiazegera wukalu kandi amayumba agasuga endala ku ikumi agari ku omugizi ogwo, gaaolomoka ansi. Okuzegera okwa ekialo okwo kwaita awantu elufu musamvu. Owuti wua-amba awantu awaasigala kandi wa-aa Katonda owa ku igulu owunene.

¹⁴Emidambo egia okuwiri gimiire okuwita. Ni wurra, egia okusatu giri ampi gimiire okutuuka.

Ekombi eya musamvu

¹⁵Nikuemao, enyankoi owa musamvu yakuba ekombi yaae kandi emioyo egia ku igulu giawurikana ni giogerera ni giwoola gitino, “Owuami owua ku ekialo wuona nyingeeno wuri owua Omwami Katonda iifu alala no Omulowole waae, kandi aaza okuwawakangatra amiire goona.”

¹⁶Nikuemao, awagaaka amakumi awiri ni wane awaawanga ni waikaale ku entewe ziawu ezia owuami emberu wa Katonda, waagwa ansi amafunikira okusawa Katonda.

¹⁷Waasawa ni wawoola watino, “Omwami Katonda ori na amaani goona. Ni iwue orio kandi owawangao. Tukuiranzia otioo aeniki omiire okulagana amaani gaao kandi omiire okutanika okukangatra ekialo.

¹⁸Ewialo wiawa no okusu, kandi iwue oona okusu kwakuamba nawo! Enyinga ezia okukengera awafu ekiina zimiire okutuuka. Lwona zino nizio enyinga ezia okuoloola owemirimo waa awagambi waa, alala na awantu waa awaere eriina riao owuti wona, awatono na awanene, kandi zino nizio enyinga ezia okumala awantu awaona ekialo.”

¹⁹Nikuemao, ekaalu eya Katonda eri ku igulu yaigulwao kandi esanduuki egingre ensikirra yawonwa mu ekaalu omwo. Nikuemao olumesi lwamesa, enkuwa ziaduma, ekialo kiazegera kandi emvula eya ekitare yakuba enyingi ino.

Owusasuko 12

Omukazi ne enzoka enene

¹Ekilago ekiluguulwa kiauuma ku igulu. Yawanga omukazi owa enyanga yasanikra ki enguwo, omwenzi ansi eya amagulu gaae, kandi na aingiizie ekigudu ekia owuyaayi ekiriko eng’eni-ng’eni ikumi ni iwiri ku omutwe gwae.

- ²Omukazi oyo yawanga omuzito ori ampi okuiwula kandi yarranga wululu aeniki ewisa wiamulumanga.
- ³Nikuemao, ekilago kindi kiafuma ku igulu. Guno gwawanga oguzoka oguakanyu oguri ne emitwe musamvu, ne enziga ikumi, kandi gwawanga ni guingiizie ewigudu ewia owuyaayi musamvu ku emitwe giagwo.
- ⁴Omukinga gwagwo gwakulula endala ku ikumi ezia eng'eni-ng'eni okuema ku igulu, guzirigiza ansi ku ekialo. Nikuemao, oguzoka ogwo gwaza guimerra emberu wa omukazi owaagalanga okwigawula oyo. Guagalanga mbwe no omwana aiwulwa-uiwulwa otino, gumuite.
- ⁵Omukazi oyo yaiwula omwana owekizia. Omuzia ono nio owaazanga okurinda awantu awa ku ekialo kiona na amaani amangi. Omwana owa omukazi ono, yatoolwa ao airwa ku Katonda agia atewua ku entewe eya owuami wuae.
- ⁶Omukazi oyo yarumuka agia mu ekeewa ansi aa Katonda yawanga na amuikaziziizie. Ao nio yagendanga okurindwa ne ewiokuria ewilootu ku amiire elufu kilala mia wiwiri na amakumi mukaaga.
- ⁷Enyankoi oetwa mbwe Mikaeli alala ne enyankoi awa akangatiire waavumbula iye ku igulu no oguzoka ogwo kandi oguzoka gwona gwawalwania ni guri alala ne ewikeeno ewia gukangatiire.
- ⁸Ni, iiye rino riakira oguzoka kandi iye alala ne enyankoi waae ngawakaganyirwa okuwa ku igulu.
- ⁹Kandi oguzoka ogwo gwarigizwa ansi ku ekialo. Ee, enzoka enkulu eetwa mbwe Ekikeeno namba Sataani. Yarigizwa ku ekialo alala ne ewikeeno ewia ekangatiire woona, okuema ku igulu. Enzoka eno nie esemerezia awantu awa ku ekialo woona.
- ¹⁰Nikuemao, nyawurra omwoyo ni guema ku igulu ni guogerera wukalu gutino, "Nyingeeno katio owuinunuzi, amaani, Owuami owua Katonda iifu no owukire owua Omulowole waae wumiire okuuzza. Aeniki omuntu oingirra waamwifu emberu wa Katonda iifu owuire no omuwasu amiire okurumusiwua ku igulu arigizwa ansi ku ekialo.
- ¹¹Kandi waamukira na amasaai aga Ekimaatwa, na owuwoni owua waafumia kandi ngawakagonzia okuwa awalamu ni waaganya okufwira okuganya kwawu.
- ¹²Inywe awamenyere ku igulu muwe awasangaavu. Ni inywe awamenyere ku ilowa ikalu na awari mu enyanza, kuuza okuwaweera owululu ino aeniki Ekikeeno kimiire okuwaazako ansi ku ekialo. Kandi kiri no okusu okungi aeniki kimanyire mbwe amiire gakio gari ampi okuwua."
- ¹³Olwa oguzoka gwamanya mbwe gumiire okurigizwa ansi ku ekialo, gwawarra ku omukazi owawanga na aiwuule omuzia oria kugere gumunyaasie.

¹⁴No omukazi oyo yaeewua embaya ezifwana ezia iwundaazi inene kugere abuluke aeme aa enzoka yawanga, agie mu ekeewa aa yagianga okurindwa ne ewiokuria ewilootu ku emiaka isatu ne enusu.

¹⁵Kutio, enzoka eyo yafuuzza amanzi agafwana no oluuzi ni gaema mu omunwa gwayo ni galonda omukazi oyo kugere gamuire.

¹⁶Ne ekialo kiatunzia omukazi oyo, ku okuowola owuina owuanywa amanzi agaaema mu omunwa ogwa oguzoka ogwo.

¹⁷Nikuemao, okusu kwa-amba oguzoka no omukazi oyo. Kutio, gwafuma gugia guvumbula iye na awaana waae awasigaale awaawanga ni waere ensikirra ezia Katonda owuti kandi awaawanga ni wa-andre ku okuwa awawoni awa Yesu.

¹⁸Kandi enzoka enene eyo yagia eimerra ku ensanyaata eya enyanza.

Owusasuko 13

Ensisu iwiri

¹Nikuemao, nyawona ensisi ne efuma mu enyanza. Yawanga ne enziga ikumi, ne emitwe musamvu kandi ku olwiga ki olwiga lwawangako ekigudu ekia owuyaayi. Kandi ku emitwe giayo gino giona, giawanga ni gijojerweko amiina agari amanyego ku Katonda.

²Ensisu eya nyawona eno, yawanga no omuwiri ogufwana ogwa engwe, amagulu amakate-kaate agakorre owuwiri ki aga eduubu, ne eminwa musamvu egifwana egia endwe. Ensisu eno nio eya oguzoka guria ya-aa amaani gaae omwene, entewe eya owuami wuae, no owukire owungi ino.

³Omutwe omulala ogwa ensisi eyo gwawangako embala eya ekisonga ekiagiria kiwona okugiita. Ekisonga ekiene kiawanga ni kimiire okuona. Kandi ensisi eno yaluguuzia awantu awa ku ekialo kiona ino nawuno watanika okugilonda.

⁴Awantu wona waasawa oguzoka ogunene ogwa-aa ensisi eyo amaani gayo goona. Lwona waasawa ensisi ni wawoola watino, "Naanu okafwana ne ensisi, kandi naanu okalwana nayo?"

⁵Ensisu yaeewua amaani aga okuitumbula kandi aga okuwoola mbwe eri Katonda kandi ku emienzi amakumi ane ni iwiri, yakangatra ekialo kiona.

⁶Ensisu eno yatanika okuwoola amang'ana amawiiwi ku Katonda. Yanyega eriina eria Katonda, aa Katonda amenyere, alala na awantu awamenyere ku igulu.

⁷Lwona, yaganyirwa okulwania awantu awa Katonda kandi okuwakira. Yaeewua amaani aga okukangatra enganda ziona, awantu wona, ewiriango wiona alala ne ewialo wiona.

⁸Awantu woona awa amiina gaawu ngagakajojwa mu ebuuki eya owulamu eya Ekimaatwa, ekiaitwa ne ekialo kiawanga ni kikiari okulukwa, waaza okusawa ensisi eyo.

⁹No omuntu ari na amatwi, ka-awurre!

¹⁰No omuntu yateerwao mbwe aaza okugia mu owusiwe, aaza okugia mu owusiwe. Kandi no omuntu yateerwao mbwe aaza okuitwa no omwambe, aaza okuitwa no omwambe. Okwo kulagana mbwe awantu awa Katonda paka wasikie emioyo kandi warinde okuganya okwa wari nakwo.

¹¹Nikuemao, nyawona ensisi indi. Ensisi eno yafuma ku ekialo ekikalu. Yawanga ne enziga ezifwana ne ezia iguruki kandi yagamba-gambanganga ki oguzoka guria.

¹²Yawanga na amaani goona aga ensisi eya kuluweri, kandi yakolanga ku iwaga riae. Yagera awantu woona awamenyere ku ekialo okusawa ensisi eya kuluweri, owa ekisonga ekiawanga ku omutwe gwae, nyingeeno katio kiawanga ni kimiire okuona.

¹³Ensisi eya okuwiri eno yakola ewintu ewikate-kaate ewiluguulwa. Yaeta namba omurro guema ku igulu guika ansi ku ekialo na awantu wawona.

¹⁴Yasemerezia awantu woona awa ku ekialo na amankono aga yakola ku iwaga eria ensisi eya kuluweri. Yawalaga mbwe walonge omufwano ogwa katonda ensaasa mu embonekano eya ensisi eyatemwa no omwambe ogwa olugangala mala ewona okufwa, ni yalama ereka okufwa.

¹⁵Ensisi eya okuwiri eno yaeewua amaani aga okukumra omufwano ogwa ensisi eya kuluweri eyo, omuuka kugere gugamba-gambe, kandi okuita awantu woona awalowere okusawa omufwano ogwa ensisi ogwo.

¹⁶Yanigirizia mbwe paka ekilago kiteewue mu okukono okusaaza nakuwa mu ekieni ekia awantu woona, awe omukangasi nakuwa otari omukangasi, omunyazi nakuwa omutaka, omugule namba ori owuyanga.

¹⁷Yakola otio kugere na ario omuntu-umuntu owula ne ekilago ekio, atagula kandi ataguzia ekintu-ukintu. Ekilago ekio kiawanga eriina eria ensisi eya kuluweri namba enamba eya eriina riayo.

¹⁸Paka owe na amaganga nikwo okamanya enamba eya ensisi eyo. Enamba yaae eri mia mukaaga na amakumi mukaaga ni mukaaga (666).

Owusasuko 14

Ekimaatwa na awantu 144,000

¹Nikuemao, nyaginga amiiso kungulu mbona Ekimaatwa na aimeriire ku ekigiri ekia Sayuuni. Yawanga na awantu elufu mia kilala na amakumi ane ni wane, awa ewieni wiawu wiawanga ni wijojerweko eriina aria Ekimaatwa ne eriina eria Swae.

²Kandi nyawurra omwoyo ni guemera ku igulu ni guduma wukalu ki amanzi agaolomoka ansi, kandi ki olukuwa oluwaluka. Omwoyo ogwo gwarranga ki ogwa amakana amangi agakubwa goona kalala.

³Kandi olwembo oluyia lwaembwanga emberu wa entewe eya owuami ne emberu wa endukwa ine endamu ne emberu wa awagaaka amakumi awiri ni wane.

⁴Wano waawanga awantu aweeru awakiari okuinyonkoonia mu okusawa katonda ensaasa, kutio wari aweeru ki awaala awagima. Waalonda Ekimaatwa ni wagia nae asi-uasi aa yagianga. Awantu wano waawanga awantu awanunuulwe kandi awaezaniwue ki ensaafu ezisookere okunogwa ezitengekerwa Katonda ne Ekimaatwa.

⁵Owuweeyi wuawanga ni wukiari okufuma mu eminwa giawu, kandi kiwulao ekiwiiwi ekiaesanga okutuukrwa ku iwo.

Enyankoi wasatu

⁶Nikuemao, nyawona enyankoi wundi na abuluka kungulu ku omuyaga na agingre amang'ana amalootu agario amiire goona, na agia okugalanzizia enganda ziona, ewiriango wiona, na awantu wona awamenyere ku ekialo.

⁷Yaogerera wukalu na awoola otino, "Mu-ee Katonda owuti kandi mumu-ee owunene aeniki amiire aga okukengera awantu ekiina gamiire okutuuka. Kandi musawe Katonda owaluka ekialo, ni igulu, ne enyanza alala ne enzuzi ne ewisulo ewia amanzi wiona."

⁸Nikuemao, enyankoi owa okuwiri yalondako. Iye yawoola otino, "Omugizi omunene ogwa Babulooni gumiire okugwa gusambuuke! Nigwo omugizi ogwaingizia awantu awaaemanga mu ewialo wiona mu okudung'a ne enkola ziae embiiwi."

⁹Nikuemao, enyankoi owa okusatu yalondako. Yawoola no omwoyo ogwa kungulu otino, "Na ario omuntu osawa ensisi no omufwano gwayo, kandi ori ne ekilago mu ekieni kiae ni mu okukono kwae,

¹⁰omuntu oyo aaza okutuukra okuswawukwa okululu okwa Katonda aswawuka nakwo awantu awamuwiyiriire. Okusu okwa Katonda kuuza okumuwerako kandi arinyaasiwua mu omurro ogwa ekibiriiti emberu wa enyankoi aweeru ne emberu wa Ekimaatwa.

¹¹Awaawanga ni wasawa ensisi no omufwano gwayo, kandi awaaganya okuteewuako ekilago ekia eriina riae, waaza okunyaasiwua owuire no omuwasu. Eriosi eriema mu omurro oguwasamba riiza okuniina kungulu amiire goona, kandi ngawariwuluuka namba wutono."

¹²Kutio, kuagalana mbwe awantu awa Katonda, awaere ensikirra ziae owuti, wasikie emioyo ni wari awaoreevu, kandi wawe no okuganya ku Yesu.

¹³Nikuemao, nyawurra omwoyo ni guemerra ku igulu ni guwoola gutino, “Joja ansi ewintu wino: Okuemerra reero okugia emberi, awantu awafwa ni wari no okuganya ku Omwami, wasereekwe.” Omwoyo Omweru ogwa Katonda yairania otino, “Ee, kuwuene waaza okuwuluuka ku emirimo emikalu kandi warituukra omugawo ku emirimo giawu egia wakola.”

Igesa rikolwa ku ekialo

¹⁴Nikuemao, nyawona amare ameeru zerre, kandi ekintu ekifwanana no omuntu yawanga na aikaale ku amare, na aiwooye ekigudu ekia owuyaayi ekia edhaabu ku omutwe. Lwona, yawanga na agingre engeso eya okugesu mu okukono kwae.

¹⁵Nikuemao, enyankoi wundi yafuma mu ekaalu aeeta omuntu owawanga na aikaale ku amare oyo no omwoyo ogwa kungulu wukalu na amulaga otino, “Toola engeso yaa otanike okugesu aeniki amiire aga igesa gamiire okutuuka kandi emere eya ku ekialo emiire okulawa.”

¹⁶Kutio, omuntu owawanga na aikaale mu amare ono yatoola engeso atanika okugesu.

¹⁷Enyankoi wundi yafuma mu ekaalu eri ku igulu, kandi yoona yawanga na ari ne engeso enzogi pia.

¹⁸Nikuemao, enyankoi owawanga na amaani ku omurro, yafuma mu isiga eria omusango, kandi yaeta enyankoi owawanga na ari ne engeso enzogi oyo no omwoyo ogwa kungulu na amulaga otino, “Toola engeso yaa enzogi eyo ogesi nayo emizabiibu giona egiri ku ekialo, aeniki gimiire okulawa.”

¹⁹Kutio, enyankoi yatoola engeso yaa egesa nayo ensaafu eya emizabiibu ku ekialo. Nikuemao yagikunza alala kandi agiluma mu owuina owua okumiga edivaai eya okusu okwa Katonda.

²⁰Owuina owua okumiga edivaai owuo wuawanga ni wuri enze eya omugizi kandi olwa ensaafu yamigwa, amasaai gaayooka amangi nawuno gakola oluuzi olwa owuliire wuayo wukasuga estadia elufu kilala ni mia mukaagakandi endiwo yalwo lwawanga olwa efaraasi eingiramo yatuuka ku omunwa.

Owusasuko 15

Olwembo olwa Muusa no olwa Ekimaatwa

¹Nikuemao nyaginga amiiso ku igulu, mbona ekilago kindi ekinene kandi ekiluguulwa. Nyawona enyankoi musamvu awaawanga ni wagingre eminyako-nyaako musamvu emilulu ino. Eminyako-nyaako gino nigio egiawanga egituukre, aeniki nigio egialagananga owutuuko owua okusu okwa Katonda.

²Nyawona ekintu ekifwana ne enyanza eya amanzi agafwanana ne egilaasi eizogaane no omurro. Awantu awaakira ensisi eyo no omufwano gwayo alala ne enamba eyawanga ne eimeriire eriina riae, iwo waawanga ni waimeriire ku

ensanyaata eya enyanza eyo. Waawanga ni wagingre amakana aga Katonda yawa-aa mu amakono gaawu.

³Kandi waaemba olwembo olutondowola Ekimaatwa, olufwanana no olwa Muusa omukurumu owa Katonda yaemba otino, “Iwue Omwami Katonda, ori na amaani goona! Omiire okukola ewintu ewikate-kaate kandi ewiluguulwa. Ori Omwami owa ewialo wiona kandi okola ewintu mu engira endootu kandi enyigolovu.

⁴Omuntu otaesa okuku-aa owuti kandi oku-aa eriina riao owunene naanu? Iwue eng’ene ni iwue omweru, kandi awantu awa ku ekialo kiona waaza okuza okukusawa aeniki wamiire okuwona kiomo okenga ekiina no owulongoole.”

Enyankoi musamvu ne emidambo musamvu

⁵Olwa waamala okuemba, nyawarra ku igulu mbona ekaalu ne eiguulweo, muni mu eema eya owuwoni, Asi Aeru Owutuukre aa Katonda amenyere.

⁶Kandi nyawona ne enyankoi musamvu awagingre emidambo musamvu emiwiiwi ni wafuma Asi Aeru Owutuukre, ni waiwooye enguwo endiire enzeru zerre ezing’ena-ng’ena, kandi ni wawasaanie ewifuwa wiawu ne ewitambaaya ewia edhaabu.

⁷Omulala ku endukwa ine endamu yatoola endaawo musamvu ezilongerwe ne edhaabu a-aa omulala ki omulala ku enyankoi oludaawo lwae. Endaawo zino ziwanga ni ziizuule no okusu okwa Katonda orio amiire goona okwa aaza okuswawuka nakwo awantu.

⁸Asi aeru Owutuukre ao yaizula du ne eriosi eriemere mu owukaate na amaani aga Katonda. Awulao omuntu owaesanga okuingira ansi aeru atuukre ao nawuno awantu wasooke wawone emidambo musamvu emiwiiwi egio giwue.

Owusasuko 16

Endaawo musamvu ezingire okusu okwa Katonda

¹Nikuemao, nyawurra omwoyo ni guema Asi Aeru Owutuukre ni gulaga enyankoi musamvu wukalu gutino, “Mufume mugie mufuke okusu okwa Katonda okuri mu endaawo musamvu ezio ku ekialo.”

²Kutio, enyankoi owa kuluweri yatoola oludaawo lwae afuma agia afuka okusu okwa Katonda okwawangamo ku ekialo. Nikuemao, ewisonga ewilulu ewinye-nyeevu wiafuma ku awantu awaawanga ne ekilago ekia ensisi kandi awaasawanga omufwano gwae.

³Enyankoi owa okuwiri yatoola oludaawo lwae agia afuka okusu okwa Katonda okwawangamo mu enyanza. Enyanza yagaluka ewa ki amasaai aga omuntu ofwire, kandi ewintu ewilamu wiona ewiawanga mu enyanza, wiafwa wiwua chwe!

- ⁴Enyankoi owa okusatu yatoola oludaawo lwae agia afuka okusu okwa Katonda okwawangamo mu enzuzi ne ewisulo ewia amanzi. Nikuemao, amanzi ago gaagaluka gawa amasaai.
- ⁵Nikuemao nyawurra enyankoi oimeriire amanzi na awoola otino, “Iwue Katonda, ni iwue omiire okuwaa amiire goona kandi okiaza okuwaa. Ori Katonda omweru kandi ekio nikio ekigera no ori owuyanga okenga ekiina otino.
- ⁶Aeniki awantu wano waasuluzia amasaai aga awagambi waa alala na awantu waa aweeru. Ni iwue owaeere amanzi agagaluuke gawa amasaai mbwe wanywe. Ekio nikio ekisugaane nawo ino!”
- ⁷Nikuemao, nyawurra omwoyo ni guemerra mu isiga eria omusango ni guirania gutino, “Ee, Omwami Katonda! Ori na amaani amangi. Iwue okenga ekiina geeza kandi kiomo kusugre ne enkola ezia omuntu ki omuntu.”
- ⁸Enyankoi owa okune yatoola oludaawo lwae agia afuka okusu okwa Katonda okwawangamo ku iwasu. Iwasu riawaluka ilulu pe, risamba awantu ki omurro.
- ⁹Owuyu owua iwasu wuasamba awantu ino kandi awantu waatanika okufuuwa eriina eria Katonda ori na amaani ku emidambo emiwiiwi egia waawona egio. Ni kukawa kutio, awantu ngawakagaluka wareka owuoni namba oku-aa Katonda owunene.
- ¹⁰Nikuemao, enyankoi owa okutaanu yatoola oludaawo lwae afuma agia afuka okusu okwa Katonda okwawangamo, ku entewe eya owuami owua ensisi. Ekierema kia-amba ewialo wiona ewia ensisi yawanga ne ekangatiire, kandi awantu waaluma endimi ziwu ku owululu owua waawanga nawuo.
- ¹¹Awantu awo waafuuwa Katonda owa ku igulu, ku ewisonga ewinye-nyeevu no owululu owua waawurra, ni ngawakagaluka wareka enkola ziwu embiiwi.
- ¹²Nikuemao, enyankoi owa mukaaga yatoola oludaawo lwae afuma agia afuka okusu okwa Katonda okwawangamo mu oluuzi olunene olwa Yufreeti. Kuno kwagera amanzi gakamiira chwe mu oluuzi olwo, okulongerera awaami awa ewufumanyanga engira.
- ¹³Nikuemao, nyawona ekikeeno ekifwana ne ekikere ni kifuma mu omunwa ogwa oguzoka ogunene guria. Ekikere kindi kiafuma mu omunwa ogwa ensisi ne ekindi kifuma mu omunwa ogwa omugambi owa owuweeyi.
- ¹⁴Ewikeeno ewisatu ewiwiiwi wino wiawanga na amaani aga okukola ewintu ewiluguulwa. Kutio wiafuma wigia okukumia awaami awa ku ekialo kiona okuuzi okulwana iye owuire owunene olwa Katonda owa amaani arikengra awantu wona ekiina.
- ¹⁵Mumanye mbwe Omwami Yesu awoola otino, “Muwurre, nyiza okuuzi owuiwisi ki omwiwi! Kutio, omuntu ori amiiso kandi ori amankaga asereekwe.

Omuntu ki oyo aaza okuwa na aiwooye enguwo kugere atagenda-genda kikuna, awantu wawone owukuna wuae.”

¹⁶Ewikeeno ewio wiagia wikumia awaami awa ku ekialo awo woona alala asi aetwa mu Oluibrania mbwe Amagedooni.

¹⁷Enyankoi owa musamvu yatoola oludaawo lwae afuma agia afuka okusu okwa Katonda okwawangamo ku omuyaga. Nikuemao, omwoyo ogwa kungulu gwafumira ku entewe eya owuami eri Asi Aeru Owutuukre ogwawoola gutino, “Ewintu wiona wimiire okuikola wiwuere!”

¹⁸Nikuemao, emesi ziamesa, enkuwa ziawaluka kandi ekialo kiazegera enzegera ekiari okuwurrwa okuemera ri!

¹⁹Okuzegera okwa ekialo okwo kwagera omugizi omunene guwaluuka kasatu kandi emigizi egia ewialo windi giaolomoka ansi. Katonda ngaakalawira omugizi omunene ogwa Babulooni, ni yaguta gunywera mu ekikombe ekiizuule du ne edivaai eya okusu kwae okuwiiwi.

²⁰Okuzegera okwo kwagera ewizinga wiona winywenkera mu amanzi kandi ewigiri wiaolomoka ansi.

²¹Entare enkate-kaate, ezia owuzito owukasuga ekiilo amakumi asatu ne ekintu endala ki endala, ziaema ku igulu ziolomoka ku awantu. Owutuukre, awantu waafuuwa Katonda ku emidambo emiwiiwi egia entare ezio ziawareetra aeniki giawanga emidambo emilulu ino.

Owusasuko 17

Omukazi omusondo omukianyaanya

¹Nikuemao, omulala ku enyankoi musamvu awaawanga ne endaawo musamvu waria yaaza andaga otino, “Iza nkulage kiomo Katonda aaza okuswawuka omusondo omunene, oikaale ku amanzi amangi oria.

²Awaami awa ku ekialo woona waamala okumuta ku owuriri, kandi owusondo wuae wuamba awantu woona awa ku ekialo kiomo edivaai endulu pe eamba awantu.”

³Mu owusasuko, Omwoyo Omweru yagera mbona enyankoi owanyira mu ekeewa. Mu ekeewa omwo, nyawona omukazi na aikaale ku ensisi enzakanyu ejojerweko amiina aga amanyego ku Katonda. Yawanga ensisi eri ne emitwe musamvu ne enziga ikumi.

⁴Omukazi oyo yawanga na aiwooye enguwo endiire eya amasendi amangi erimo igondo ebuluu-buluu no owuakanyu-kanyu. Yawanga na asaatre omuwiri gwae ne ewintu ewilongerwe ne edhaabu, ewitiiti ewia amasendi amangi ewietwa mbwe paali, alala na amawaale aga amasendi amangi. Mu okukono kwae

yawanga na agingre ekikombe ekia edhaabu ekiizuule ne ewintu ewia omuziro, ne enkola ziae embiwi ezia owusondo.

⁵Ne ekieni kiae kiawanga ni kijojerweko eriina eriri ekilago ekia ekintu ekiiwisre. Kiajojwako mbwe, inze ndi omugizi omunene ogwa babulooni, ni inze ng'inwawu awasondo na awantu awakola ewintu ewia omuziro ku ekialo woona.

⁶Nikuemao, nyawona no omukazi oyo anywere kandi adung're na amasaai aga awantu awa Katonda awaaitwa ku okuganya kwawu ku Yesu. Olwa nyamuwona, nyawa no okuluguula ino.

⁷Ne enyankoi yambuuzia otino, "Ekigera no oluguula ino otio niki? Nyiza okukulaga ekintu ekiiwisre ku eriina eria omukazi ono, ne ensisi eya aniinreko eri ne emitwe musamvu ne enziga ikumi eyo.

⁸Ensis eya owuine yawangao, ni nyingeeno ewulao kandi eeza okufuma ne eema mu endiwo eya owuina nikwo eeza okugia okuonwa ilala. Awantu awamenyere ku ekialo awa amiina gaawu ngagakajowa mu ebuuki eya owulamu, Katonda ni yawanga na akiari okuluka ekialo, wariluguula ino olwa wariwona ensisi eno, aeniki ensisi eno yawanga ne eri endamu, ni nyingeeno emiire okufwa ni kandi eeza okuirana ewe endamu.

⁹Omuntu ki omuntu paka aingirizie geeza ku eking'ana kino. Emitwe musamvu, giimeririire ewigiri musamvu ewia omukazi ono aikaaleko.

¹⁰Lwona, giimeririire awaami musamvu. Awaami wataanu ku iwo wamiire okufwa, omulala ari omwami enyinga zino, no otuukre aaza okuwaako. Ni iye aaza okuwa ku entewe ku amiire amatoono.

¹¹Ensis eyawangao ni nyingeeno ewulao, ari omulala ku awaami musamvu ooza okuirana okuwa omwami owa munaane, kandi nikwo aaza okugia okuonwa ilala.

¹²Enziga ikumi ezia owuine ziria, ziimeriire awaami ikumi awakiari okutanika emirimo egia owuami. Ni waaza okutuukra amaani aga okuwa awaami alala ne ensisi ku enyinga endala-ndala.

¹³Woonna wari na amaingirizio amafwanani, ago okuuza oku-aa ensisi amaani gaawu no owukire wuawu.

¹⁴Awaami ikumi alala ne ensisi, waaza okuvumbula iye ne Ekimaatwa. Ne Ekimaatwa kiiza okuwakira, aeniki iye no Omukangasi owa awakangasi kandi Omwami owa awaami. Awantu awaaza okuwa ne Ekimaatwa wari awantu awayaeta, na awalowole waae, na awamulonda ne emioyo giawu giona."

¹⁵Nikuemao, enyankoi oyo yandaga otino, "Amanzi amangi aga owuine no omukazi omusondo aikaaleko ago, gaimeriire omurima omungi ogwa awantu, enganda ezia awantu ne ewiriango ewia awantu.

¹⁶Ensis ne enziga ikumi ezia owuine ezio, ziiza okurega omukazi omusondo oyo uwiiwi. Ziiza okumuvuulako ewintu wiae wiona zimureke ekikuna kikidi. Nikuemao, ziiza okuria omuwiri gwae, no ogusigaale ziiza okusamba mu omurro.

¹⁷Aeniki Katonda yaagalanga mbwe okuagala kwae kuikole, yagera awaami wano ni wawa na amaingirizio amalala kandi waganyana oku-aa ensisi amaani no owukire wuawu kugere ewakangatre, kutuuka olwa amang'ana aga Katonda garituuka kuwuene kiomo yagawoola.

¹⁸No omukazi owa owuine oyo, aimeririire omugizi omunene ogukangatiire awaami wona awa ku ekialo kiona.”

Owusasuko 18

Omugizi ogwa Babulooni gusambuuke

¹Nikuemao, nyawona enyankoi wundi na aema ku igulu na aika ansi ku ekialo. Yawanga na amaani amangi kandi owueru owua yawanga nawuo wuagera ekialo kiwa ekieru zerre.

²Enyankoi ono yaogerera wukalu na awoola otino, “Gusambuuke! Gusambuuke! Omugizi omunene ogwa Babulooni gusambuuke guwuere ansi! Kandi asi ao aaza okuwa asi aa ewikeeno ne emisambwa niwio ewimenyeremo, kandi owuiwiso owua enyonyi emwamu ne entiang'i ezia mu isaka ezitaomerezia.

³Awaguzi na awagula ewintu wamiire okutuukra emfuno eya owunyazi owuema ku enkola embiiwi eya owulamu owuoneeke owuri ku omugizi guno kandi awantu awa ku ekialo wona wamiire okudung'a ne edivaai yaae endulu pe! Omugizi guno gufwana omukazi omusondo owa awaami awa ku ekialo wamiire okusawa ki katonda.”

⁴Nikuemao, nyawurra omwoyo gundi ni guemerra ku igulu ni guwoola gutino, “Inywe awantu wange, paka mumizule enkola embiiwi ezia awantu awa omugizi ogwo wakola. Ni, ni mwona muzi-ingiiremo, mwona muuza okuswawukwa owululu kiema iwo.

⁵Owuoni owungi owua omugizi ogwo wuigereeke ni wuniina kungulu kutuuka ku igulu, kandi Katonda aingiriizie owuoni owua gumiire okukola.

⁶Ewintu ewiwiiwi ewia awantu awa Babulooni waakorra awantu wandi niwio ewia mwona muwakorre, muwakorre ewintu ewiwiiwi ewio kawiri okukira kiomo waawikola. Edivaai endulu eya waafukanga mu ewikombe ni wa-aa awantu, mu ewikombe wiawu aweene ewio muwafukremo endulu pe kawiri okukira eyaawu.

⁷Mu-ee awantu awa omugizi guno emidambo emingi no owululu owungi owuagani no okuitumbula okungi no okugonzia okugula ewintu ewia iguzi eria kungulu ewiwula ne emirimo. Mu emioyo giawu waaitumbulanga ni wawoola

watino, 'Inze ndi omwami kandi ng'andi omutaka ki omukazi omufwire yawa! Lwona, nambona ni nyiza okuwona owululu yawa.'

⁸Kutio, ku owuire owulala wueng'ene emidambo egia amalwire, enumbe, ne enzala giiza okumuamba kandi aaza okusambwa no omurro awue chwe, aeniki Omwami Katonda ooza okumuswawuka ari na amaani amangi.

⁹Olwa awaami awa ewialo awaakola nae enkola ezia owusondo kandi waria nae ewintu ewia amasendi amangi wariwona eriosi eria omurro ogumusamba, warirra kandi warikuba enkweri.

¹⁰Emidambo egio girigera owuti wuriwa-amba kandi wari-imerra ale ni warra watino, 'Awiifu! Gano mang'anaaki? Muwoneko omugizi omunene ogwa Babulooni! Omugizi ogwaiyomboka geeza, ni katio mu owuire wulala wueng'ene gusambuuke guwuera ansi chwe!'

¹¹Awaguzi na awagula ewintu ku ekialo, waaza okurra omugizi ogwo kandi waaza okukuba enkweri aeniki wawulao awantu awaaza okugula ewintu wiawu kandi.

¹²Ewintu ewiagulwanga ku omugizi ogwa Babulooni wiawanga edhaabu, efeedha, amawaale agang'ena-ng'ena aga amasendi amangi, enguwo enzakanyu ne ezindi ziona ezia iguzi eria kungulu, amabaawu agawunya geeza, ewintu ewilungi ewia amasendi amangi ewiwanzrwe okuema ku amabaawu na amiino aga enzovu alala ne ewintu ewilongerwe ne ewiuma, esaaba alala na amawaale aga amasendi amangi.

¹³Ewindi wiawanga ewintu ewiwunya geeza kiomo mudalasiini, viungo, owubaani, mane-maane ni uudi; ewiokuria kiomo edivaai, amavuta, owusie owunyuke, engaano; emiandu kiomo eng'ombe, amagondi, efaraasi ne egaare ziagio, awakurumu ni namba owulamu owua awantu.

¹⁴Awaguzi awo warirra ni wawoola watino, 'Ewintu ewiloot-lootu ewia emioyo egia awantu awamenyere Babulooni giagalanga ino wiwuere, kandi owulootu wuagwo ne ewintu ewiageranga omugizi ogwo ni guwonekana omugizi omulootu witeekere wiwuere chwe, kandi ngawiriwoneka kandi!'

¹⁵"Awaguzi awaatuukranga owunyazi wuawu okuema ku omugizi guno wariwa no owuti kandi wari-imerra ale ni warra kandi ni wakuba enkweri.

¹⁶Warirra wukalu ni wawoola watino, 'Awiifu! Gano mang'anaaki gano? Muwoneko omugizi omunene ogwa Babulooni! Omugizi ogwa awantu awamenyeremo waiwoyanga enguwo enzakanyu kandi ezia amasendi amangi, ogwang'ena-ng'enanga geeza ne ewintu ewilongerwe ne edhaabu alala na amawaale agagulwa amasendi amangi!

¹⁷Ni, ku enyinga endala eng'ene owunyazi owuawangamo wuoneeke wuwuere chwe!" "Awaunguzi woona awakangatiire amaato aga okuwungula alala na

awantu awaawungulanga ewintu wiawu mu emialo egia ao giona wari-imerra ale.

¹⁸Kandi warirra ni wakuba enkweri wukalu olwa wariwona eriosi eria omurro ogurisamba omugizi ogwo. Wariwoola watino, ‘Omugizi omulootu kandi ogwaombokwa geeza ki omugizi ogwa Babulooni guriai?’

¹⁹Waatoola egunduusi wafuka mu emitwe giawu ni warra ni wari no owululu wungi watino, ‘Awiifu! Awiifu! Gano mang’anaaki gano? Muwoneko kiomo omugizi omunene guno, ogwa aweene amaato agawungulamo waatuukra owunyazi owungi, gusambuuke guwuere chwe mala ku enyinga endala eng’ene!’

²⁰Enyankoi awa ku igulu, musangaale aeniki Katonda amiire okukengera awantu awa ku omugizi ogwa Babulooni ekiina. Lwona mbwe awantu awa Katonda, awatumwa na awagambi awa Katonda, wasangaale aeniki Katonda amiire okukengera awa ku omugizi ogwa Babulooni ekiina.”

²¹Nikuemao enyankoi ori na amaani amangi yatoola iwaale inene arigiza mu enyanza wukalu no okusu na awoola otino, “Nintio lwona omugizi omunene ogwa Babulooni guuza okusambulwa guwuere ansi chwe kandi ngaguriwoneka kandi.

²²Awulao omuntu oriwurra kandi enyembo ezia awakubi awa amakana ne ezia awakubi awa ewinanda alala na ezia awakubi awa ekombi. Awulao omuntu oriomboka namba orilonga kandi ekintu ansi ao. Lwona, awulao omuntu oriwurra kandi embaare ezia okusia ni zirramo kandi.

²³Wuwulao owueru owua etaaya owuriema omwo kandi. Lwona, riwulao erioga eria awaala awaagala okukwewua ne eria awazia awagia okukwa omwo kandi. Omugizi guno gurionwa gutino aeniki awaguzi na awagula ewintu awari omwo, waawanga awantu awanyazi kandi awari na amaani amangi ino mu ekialo kiona. Kandi awantu awa mu ewialo wiona waasemeriziwua ne engira ezia owulaguzi owua awantu awa Babulooni.

²⁴Amasaai aga awagambi awa Katonda, aga awantu awa Katonda na aga awantu wona awaaitwa ku ekialo, gaatuukrwa ku omugizi ogwo.”

Owusasuko 19

Enyankoi watondowola Katonda no owusangaavu

¹Olwa enyankoi ori na amaani amangi ono yamala okuwoola otio, nyawurra erioga erifwana eria omurima ogwa awantu awangi ku igulu ni wawoola watino, “Aleluuya! Owuinunuzi no owunene na amaani goona, gari aga Katonda iifu.

²Aeniki iye nio omukengi owa ekiina omuigolovu kandi ori ku owuene. Amiire okukenga kiomo aaza okuswawuka awantu awa ku omugizi omunene ogwa Babulooni, awaawanga awasondo awaona awantu awa ku ekialo kiona no

owusondo wuawu. Amiire okukengera omusoodani omunene oyo ekiina ekia olumbe ku amasaai aga awantu waae aga yasuluzia.”

³Wairana waogerera kandi kawiri ni wawoola watino, “Katonda atondowolwe! Eriosi eria omurro ogumusamba ngariiza okuwua yaaya, ni riiza okuvunda ni riwariire kungulu tiiri, amiire goona.”

⁴Nikuemao, awagaaka amakumi awiri ni wane ne endukwa ine endamu waakuba ansi amasigamo gaawu ni wasawa Katonda owawanga na aikaale ku entewe eya owuami. Waawoolanga watino, “Katonda atondowolwe! Amin.”

⁵Nikuemao, omwoyo gwafuma ku entewe eya owuami ni guwoola gutino, “Mutondowole Katonda iifu, inywe awakurumu waae woona, awamuere owuti, owe omunene nakuwa omutono.”

⁶Nikuemao, kandi nyawurra omwoyo ogufwana ogwa omurima omukaate, ogwafwananga amanzi agaolomoka ansi kandi olukuwa oluwaluka, ni guogerera gutino, “Aleluuya! Omwami Katonda iifu ari na amaani amangi kandi entewe eya owuami ne eyaae.

⁷Kutio, katusangaale kandi tuomererwe ni tumu-aa owunene. Aeniki enkwerezi eya Ekimaatwa emiire okutuuka, kandi omwala oagala okukwewua amiire okui-ingizia ari amankaga.

⁸Katonda amiire okumingizizia enguwo endootu, enzeru zerre eng’ena-ng’ena-ung’enang’ena. (Enguwo enzeru eimeriire enkola endootu ezia awantu awa Katonda.)”

⁹Nikuemao enyankoi yandaga otino, “Joja ansi otino: Awantu awaeterwe okuza okuria mu omugomo ogwa enkwerezi eya Ekimaatwa, wasereekwe.” Kandi yandaga otino, “Gano na amang’ana aga Katonda agari kuwue.”

¹⁰Nikuemao, nyagwa ansi amafunikira ku amagulu gaae, okumusawa. Ni, yangaania na andaga otino, “Otakola otio yaaya, aeniki ndi mala omukurumu owa Katonda kiomo iwue na awantu woona awari awawoni awa Yesu. Sawa Katonda eng’ene! Aeniki owuwoni owufumiwua ku Yesu, wuri owugambi owuema ku amaani aga Omwoyo Omweru.”

Omuntu owarumusianga efaraasi enzeru

¹¹Nikuemao, nyawona igulu ni ri-iguukeo kandi nyawona efaraasi enzeru ne eimeriire emberu wange! Omuntu owawanga na aginiinreko yaetwanga ‘Omuigolovu’ kandi ‘Owuene.’ Ni iye omukengi owa ekiina omulootu kandi olwanra owuigolovu.

¹²Amiiso gaae gafwana endimi ezia omurro kandi aiwooye ekigudu ekiteerweko owuyaayi owungi ku omutwe gwae. Ajojerweko eriina riae eriwulao omanyire, ogawuuke ni iye omwene.

- ¹³Aiwooye enguwo endiire etowookwe mu amasaai. Eriina riae rietwa mbwe Amang'ana aga Katonda.
- ¹⁴Awa-iiye awa ku igulu waamulondanga ni waniinre ku efaraasi enzeru zerre kandi ni waiwooye enguwo endootu enzeru zerre eziwulako itone.
- ¹⁵Omwambe ogwa olugangala omwogi pia, ogwa aaza okukira nagwo ewialo, gufuma mu omunwa gwae. Aaza okukangatra ewialo ewio na amambala kandi aaza okumiga edivaai mu owuina owua owumigro owua okusu okungi okwa Katonda.
- ¹⁶Ku enguwo yaae ni ku itangu riae, ziajojwako eriina riae mbwe: omukangasi owa awakangasi kandi omwami owa awaami.
- ¹⁷Nikuemao, nyawona enyankoi na aimeriire ku enyanga. Enyankoi oyo yaeterezia wukalu enyonyi ziona ezibuluka ku omuyaga na azilaga otino, "Muuze, muikumie alala mu omugomo ogwa okuria okwa Katonda aaza okuwa-aa!"
- ¹⁸Muuzza okuria emiwiri egia awaami, awakangasi awakate-kaate, awa-iiye na awakangasi wandi woona. Lwona muuzza okuria enyama eya efaraasi ne emiwiri egia awantu awazisomosia. Muuzza okuria awantu woona: awakangasi na awantu awatari awakangasi, awagule na awantu awari owuyanga."
- ¹⁹Nikuemao, nyawona ensisi na awaami awa ku ekialo woona ni waikumiiizie alala na awa-iiye waawu okuuzza okulwania omuntu owawanga na aniinre ku efaraasi oria, na awa-iiye waae.
- ²⁰Ensisisi no omugambi owa owuweeyi oria, waa-ambwa. Ee, omugambi owa owuweeyi ono, nio owakola amankono amakate-kaate na amaani aga yaeewua ne ensisi, okusemerezia awantu woona awaawanga ne ekilago ekia ensisi eyo, kandi awaasawanga omufwano ogwa ensisi eyo. Woonna wawiri waarigizwa mu omurro omunene uguakaka ne ekibiriiti.
- ²¹Awa-iiye wandi awasigaale, waaitwa no omwambe ogwa olugangala omwogi pia, ogwafumanga mu omunwa ogwa omuntu owasomosianga efaraasi. Ni waamala okuitwa otino, enyonyi ziaawagwirirako zitanika okuria emiwiri giawu.

Owusasuko 20

Owuami owua emiaka elufu kilala

- ¹Nikuemao otino, nyawona enyankoi na aika ansi na aema ku igulu na ari ne ekifunguo ekia owuina owukorre endiwo, kandi na agingre omunyororo omusumba mu okukono kwae.
- ²Yavuamra oguzoka ogwo, agusiwa ku emiaka elufu kilala. Eyo nie enzoka enkulu eria, eetwa mbwe Ekikeeno namba Sataani.
- ³Yagitoola agiluuma mu owuina owukorre endiwo, nikwo aigalao owuina owuo wukalu mala owukubako ekifuuli. Yakola otio kugere Sataani ataaza yasemerezia

awantu awari ku ekialo kandi nawuno emiaka elufu kilala giwue. Ne emiaka egio gimiire okuwua aaza okusiwulwa kandi wutono.

⁴Nikuemao, nyawona entewe ezia owuami, na awantu awaawanga ni waeerwe amaani aga okukengera awantu ekiina ni waziikaaleko. Lwona, nyawona emioyo egia awantu awaaitwa ku okufumia owuwoni owua Yesu, kandi ku amang'ana aga Katonda. Wano niwo awantu awaalowa okusawa ensisi namba omufwano ogwalongwa mu embonekano yayo, no okuteewuako ewilago ewia ensisi ku ewieni namba ku amakono. Waaziuka wawa awalamu, kandi wakangatra ekialo ni wari alala ni Yesu, ku emiaka elufu kilala.

⁵Awafu awaasigala, iwo ngawakaziuka mu okuziuka okusookere kuno, ni waarinda nawuno emiaka elufu kilala egio giwua.

⁶Awantu awaaza okuziuka okuziuka okusookere kuno, wari aweeru kandi awasereekwe ino. Olumbe olwa okuwiri luwula na amaani ku iwo kandi waaza okuwa awoozia awa Katonda na awa Kristo. Lwona, waaza okukangatra awantu nae ku emiaka elufu kilala.

⁷Ne emiaka elufu kilala gimiire okuwua, Sataani aaza okusiwulwa aeme mu owusiwe.

⁸Nikuemao aaza okufuma okusemerezia awantu awaema mu enganda ziona mu embega ine ziona ezia ekialo, eziri Googi ni Magoogi. Ekikeeno kiiza okuwakangatra ni wagia okulwania Katonda kandi awantu awaaza okuwalonda wariwa awangi owuluku.

⁹Awantu wano waaza okufuma ni waema mu embega ziona ezia ekialo kandi warisunguuzia omugizi ogwa Katonda agonziizie, ogwa awantu wae aweeru wamenyeremo. Ni, Katonda arituma omurro okuema ku igulu oгуuza okusamba awantu awo guwamale chwe.

¹⁰Ekikeeno ekiawasemerezia kiona kiarigizwa mu omurro omunene aa ensisi alala no omugambi owa owuweeyi woona waarigizwa, kandi waaza okuwa ni wawurra owululu owuire no omuwasu ku amiire goona agawula ne entuuko.

Ekiina ekituukre

¹¹Nikuemao, nyawona entewe enzeru enene eya owuami no omuntu owawanga na agiikaaleko. Ekialo ni igulu wiasomoka wiema emberi wae, kandi ngawikaesa okutuukra asi aa okuiwisa.

¹²Nikuemao, nyawona awafu woona, awanene na awatono, woona ni waimeriire emberi wa entewe eya owuami owuo, okukengerwa ekiina. Kandi ebuuki enyingi ziasanukulwa. Ebuuki indi eetwa mbwe ebuuki eya owulamu, yoona yasanukulwa. Awafu waakengrwa ekiina nikulondokana ne ewintu ewia waakola kiomo wiajojwa mu ebuuki zino.

¹³Enyanza yafumia awafu awaafwiramo kandi olumbe ne ekialo ekia awafu kiona kiafumia awafu awawangamo. Omuntu ki omuntu yakengerwa ekiina nikulondokana ne ewintu ewia yakola.

¹⁴Olumbe ne ekialo ekia awafu ziarigizwa mu enyanza eya omurro. Enyanza eya omurro eno, nio olumbe olwa okuwiri.

¹⁵Omuntu-umuntu owa eriina riae ngarikatuukrwa ni rijojrwe mu ebuuki eya owulamu, yarigizwa mu enyanza eya omurro eyo.

Owusasuko 21

Igulu iyia ne ekialo ekiyia

¹Nikuemao, nyawona igulu iyia ne ekialo ekiyia, aeniki igulu eriasooka ne ekialo ekiasooka wiawanga ni wimiire okuwita kandi enyanza yawulangao.

²Kandi nyawona omugizi omweru ogwa Yerusaleemu omuyia, ni guika ni guema kungulu ku igulu ku Katonda. Omugizi guno gwawanga ni gulongerwe owulootu kiomo omwala ogia okuagaana no omuzia owagala okumutoola, aiwoya na agia mu omugomo ogwa enserezi yaae.

³Nikuemao nyawurra omwoyo oguri kungulu ni gufumira ku entewe eya owuami ni guwoola gutino, “Wurra! Nyingeeno katio, Katonda amenyere agati eya awantu. Waaza okuwa awantu waae, kandi yoona aaza okuwa Katonda waawu.

⁴Aaza okuwaeeya amaziga goona mu amiiso, kandi olumbe ngaluriwaaao kandi. Lwona awulao omuntu oriwa na amaziga, namba owululu, namba eminyako-nyaako kandi, aeniki ewintu ewikulu wiona wimiire okuwita wiwulao.”

⁵Nikuemao, omuntu owawanga na aikaale ku entewe eya owuami eyo yawoola otino, “Wurra! Nkola ewintu wiona wiwe ewiyia.” Lwona yandaga otino, “Joja amang’ana aga nkulagre ago goona, aeniki gari kuwuene kandi gasugaane gaganyweko.”

⁶Nikuemao kandi yandaga otino, “Ewintu wiona wimiire okuwua! Inze ni inze Alfa kandi ni inze Omeega, Owutaniko kandi Owutuuko. Omuntu owurra owulwo, nyiza okumu-aa amanzi agareeta owulamu wusa na ataoloole ekintu.

⁷Omuntu-umuntu okirre amaani aga Ekikeeno, nyiza okumu-aa empanwa zino ziona kandi aaza okuwa omwana wange, ni noona nyiza okuwa Katonda waae.

⁸Na awantu awati, awawula no okuganya ku Yesu, awaoneeke, awiisi, awasoodani, awalaguzi, awasawa katonda ensaasa na awaweeyi woona, iwo waaza okurizwa mu enyanza eyia no omurro ogwa ekibiriiti. Enyanza eno nio olumbe olwa okuwiri.”

Yerusaleemu empia

⁹Nikuemao, nyawona omulala ku enyankoi musamvu awaawanga ni wari ne endaawo musamvu eziizuule ne emidambo egituukre. Yagamba-gamba ni inze na

andaga otino, “Iza nkulagirizie omwala omulootu ooza okuwa omukazi owa Ekimaatwa.”

¹⁰Omwoyo ogwa Katonda gwagera enyankoi na anginga kungulu mala anyira ku entonge eya ekigiri ekiliire. Yandaga omugizi omweru ogwa Yerusaleemu ni guika ansi ni guema ku igulu ku Katonda.

¹¹Owunene owua Katonda niwuo owuamurikanga omugizi ogwo, kandi owueru owuawangamo wuafwananga owua amawaale aga yaspa. Lwona wuang’ena-ng’enanga ki edhaabu kandi wuwawanga owueru zerre ki idaaфу.

¹²Omugizi ogwo ogwawanga ne enzizi enene eziniinre kungulu ino, kandi yawanga ne ewikulo ikumi ni wiwiri. Ku ekikulo ki ekikulo, kwawanga ni kujojerweko endala ku amiina aga enganda ikumi ni iwiri ezia Awaisraeli. Lwona ekikulo ki ekikulo kiarindwanga ne enyankoi omulala-lala.

¹³Nyaluwega olwa ewufumanyanga, ewikulo wiawangao ewisatu, embo ewikulo ewisatu, emilambo ewikulo ewisatu, kandi ewugwanyanga yoona ewikulo ewisatu.

¹⁴Enzizi eya omugizi ogwo yawanga ne eigereeke ku owulusa owua amawaale ikumi na awiri, kandi ku iwaale ki iwaale riajojwako eriina eria omulala ku awatumwa awa Yesu ikumi ni wawiri.

¹⁵Enyankoi owagamba-gamba ni inze yawanga na agingre ensimbo elongerwe ne edhaabu eya okugeraania owuagani owua omugizi ogwa Yerusaleemu, alala ne ewikulo ne enzizi ziafwo.

¹⁶Omugizi ogwo gwawanga ni guombookwe owuagani: owuliire owua ansi, no owugia kungulu alala no owuiyaagu wuagwo wuagananga. Wiona wiawanga ni wiri staadia 12,000.

¹⁷Nikuemao, lwona enyankoi yageraania enzizi eya omugizi ogwo. Enzizi eyo yawanga ne eri ekiubiiti 144 okugia kungulu nikulondokana no owugeraani owua omuntu, owua enyankoi yakola nawuo.

¹⁸Enzizi eyo yawanga ne eombookwe na amawaale agang’enan-ng’ena ki yaspa, no omugizi ogwene gwawanga ni guombookwe ne edhaabu ensa kandi yang’ena-ng’enanga ki egilaasi.

¹⁹Amawaale agaatanikwa nago, aga enzizi yaombokwako, gaawanga ni gasaatrwe na amawaale aga yaspa. Iwaale eriasooka riawanga ni rikorre amagondo aga itu iwisi ni buluu, ne eria okuwiri riawanga ni igondo eria buluu. Eria okusatu riawanga ni igondo erigia okuwa itu iwisi, ne eria okune riawanga ni igondo eria itu iwisi ering’ena-ng’ena.

²⁰Eria okutaanu riawanga ni igondo eririmo owuakanyu-kanyu, ne eria mukaaga riawanga ni igondo ering’ena-ng’ena ki edhaabu. Eria musamvu riawanga ni igondo eria itu iwisi eririmo owugi-wugi, ne eria munaane riawanga ni igondo

eria buluu ni itu iwisi. Eria kienda riawanga ni igondo eria owugi, ne eria ikumi riawanga ni igondo erieru ni itu iwisi. Eria ikumi ne endala riawanga ni igondo eria owuakanyu no owugi, ne eria ikumi ni iwiri riawanga ni igondo eria amethiisto.

²¹Ku ewikulo ikumi ni wiwiri ewio, ekikulo ki ekikulo kiawanga ni kilongerwe ni iwaale erieru ilala erietwa mbwe eluulu. Ne engira ezia ku omugizi ogwo ziawanga ni zilongerwe ne edhaabu kandi ziawanga ni zing'ena-ng'ena ki egilaasi.

²²Ng'anyawonako ekaalu ku omugizi ogwo, aeniki Omwami Katonda ori na amaani goona alala ne Ekimaatwa niwo ekaalu ku omugizi ogwo.

²³Iwasu namba omwenzi wiawulanga emirimo ku omugizi ogwo aeniki owunene owua Katonda niwuo owuawalangamo kandi Ekimaatwa niki ekimuri ekiaemangamo.

²⁴Awantu awa ku ekialo waaza okugenda-genda mu owueru owua ku omugizi ogwo, kandi awaami awa ku ekialo waaza okureeta owunyazi wuawu omwo.

²⁵Awulao omuntu ori-igalao ewikulo ewia ku omugizi ogwo namba owuire wulala, kandi ekierema ngakiriweeramo.

²⁶Warireeta ewintu ewilootu no owunyazi owua awantu awa ku ekialo ku omugizi ogwo.

²⁷Ni, kiwulao-uwula ekintu ekitari ekieru ekiri-ingira ku omugizi ogwo, namba omuntu okola ewintu ewia ensuuko, namba omusemerezi owa awantu ori-ingira ku omugizi ogwo. Awari-ingira, ni mala awantu awa amiina gaawu gajojerwe mu ebuuki eya owulamu eya Ekimaatwa, weng'ene.

Owusasuko 22

Oluuzi olwa owulamu

¹Nikuemao, enyankoi oyo yandaga oluuzi olwa amanzi agaesana owulamu. Gawanga amanzi ameeru zerre kandi gaafumanga ansi eya entewe eya Owuami owua Katonda no owua Ekimaatwa.

²Oluuzi olwo lwaikranga agati eya engira enene eya omugizi ogwo, tiiri. Emiti egiesana owulamu kandi egiamia ensaafu omwenzi ki omwenzi, emienzi ikumi ni iwiri ku omwaka, giawanga ni gimerre entulo eno ne eno eya oluuzi olwo. Amatu aga emitu egio giareranga awantu woona awa ku ekialo.

³Kiwulao ekintu-ukintu ekia omuziro, ekiriwa ku omugizi ogwo kandi. Owuami owua Katonda no owua Ekimaatwa wuriwa ku omugizi ogwo kandi awakurumu waae warimusawa omwo.

⁴Warimuwona amiiso na amiiso kandi eriina eria Katonda ririjojwa ku ewieni wiawu.

⁵Ekierema ngakiriwaamo, owueru owua ekimuri no owua enyanga ngawuriagalana omwo aeniki owueru owua Omwami Katonda niwuo owuriwalamo kandi awakurumu waae wano wariwa awaami omwo amiire goona.

Yesu aaza wuangu

⁶Nikuemao, enyankoi yandaga otino, “Amang’ana gano na amang’ana agari kuwuene kandi na amang’ana agasugaane gaganywe nago. Omwami Katonda oesania Omwoyo gwae Omweru ku awagambi, atumre enyankoi okulaga awakurumu awa Katonda ewintu ewia paka wiikole.

⁷Ni muwurre! Nyiza wuangu! Omuntu orindre amang’ana aga owugambi agajojrwe mu ebuuki eno asereekwe.”

⁸Inze Yowaana, ni inze owawurra kandi owawona ewintu wino wiona ni wiikola. Olwa nyamala okuwiwurra kandi mbiwona, nyagwa ansi ku amagulu aga enyankoi owandagirizia ewintu wino, mbwe musawa.

⁹Ni yandaga otino, “Otakola otio! Aeniki noona ndi mala omukurumu owa Katonda kiomo iwue na awagambi awa Katonda awiina waa, alala na awantu woona awaere amang’ana agari mu itu erizingrwe rino owuti. Katonda nio osugaane asawue!”

¹⁰Kandi yandaga otino, “Otaaza waawisra awantu amang’ana aga owugambi agari mu ebuuki eno yaaya, aeniki enyinga ziago ziri ampi.

¹¹Mureke omuntu okola owuoni akole-ukola owuoni, no omuntu owa amaingirizio amawi, awe-uwa na amaingirizio amawi. No omuntu omuigolovu awe-uwa omuigolovu, kandi omuntu omweru awe-uwa omweru.”

¹²Yesu awoola otino, “Muwurre! Nyiza wuangu kandi empanwa yange eya nyiza okugawira omuntu ki omuntu nikulondokana ne ewintu ewia yakola, ndi nayo mu amakono gange.

¹³Inze ni inze Alfa kandi Omeega, owa kuluweri kandi omariizia, Owutaniko kandi Owutuuko.

¹⁴Awantu awaoziizie enguwo ziwu wasereekwe aeniki waaza okuwa no owuesani owua okuingirra mu ekikulo, ni waingra ku omugizi okuria ensaafu ezia omuti oguesana owulamu.

¹⁵Ne embwa na awalaguzi, awasoodani, awiisi, awantu awasawa katonda ensaasa, na awagonziizie owuweeyi kandi awasemerezia awantu, iwo wariwa enze eya omugizi ogwo.

¹⁶Inze ndi Yesu. Ntumre enyankoi wange okuwareetra amang’ana agammueere gano kugere mugalage amakaniisa. Inze ni inze omutwe ogusewuuke ku isina eria enyumba eya Daudi eriagwisiwua, kandi ni inze eng’eni-ng’eni eya kunkio ewala enzeru zerre.”

¹⁷Omwoyo Omweru ogwa Katonda na awantu awa Katonda awari ki omwala oogala okukwewua waalaga Yesu watino, “Iza.” No, omuntu-umuntu owuriire amang’ana agari mu ebuuki eno ka-awoole mbwe, “Yesu, iza.” Omuntu-umuntu owurra owulwo ka-aze anywe, omuntu-umuntu oogala okutoola amanzi agaesana owulamu ka-aze atoole amanzi ago wusa.

¹⁸Omuntu-umuntu owuriire amang’ana aga owugambi agari mu ebuuki eno asiagiziwua otino: no osongre ekintu-ukintu ku amang’ana agajojrwe ano, Katonda aaza okukusonga emidambo egigamba-gambrweko mu ebuuki eno.

¹⁹Kandi no omuntu atoorreo eking’ana namba ekilala ku amang’ana agajojrwe mu ebuuki eya owugambi eno, Katonda arimunyaga iwaga riae eria okuria ensaafu ezia omuti oguesana owulamu, lwona ngarimuganyira okuingira ku omugizi omweru, kiomo galagaanwe mu ebuuki eno.

²⁰Omuntu owoola amang’ana gano, awoola otino, “Kuwuene, nyiza wuangu!” Kuwe kutio! Omwami Yesu, ganya ooze!

²¹Owusiza owua Omwami Yesu ka-wuwe ni inywe awantu awa Katonda mwona. Amin!

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil